Ra 'Da'yonhogui

nangue ma Hmuu ra Jesucristo

El Nuevo Testamento

de Nuestro Señor Jesucristo

otomí de la sierra



El Nuevo Testamento en el otomí de la sierra

La Liga Bíblica 1M primera edición 1974 [otm] La Liga Bíblica 5C segunda edición 1999 La Liga Bíblica versión electrónica 2009

Publicado por

© La Liga Bíblica 1974 y 1999

Se permite copiar, distribuir y comunicar públicamente esta obra bajo las siguientes condiciones:

- ▶ Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- ▶ No comercial. No puede utilizar esta obra para fines lucrativos.
- ► Sin obras modificadas. No se puede alterar, transformar o generar una obra a partir de ésta.

PRÓLOGO

Este libro es el Nuevo Testamento de las Sagradas Escrituras en el idioma otomí de la Sierra. Hablan este idioma cerca de 20,000 personas que habitan en el municipio de Huehuetla en el estado de Hidalgo y municipios colindantes del mismo estado y de los estados de Puebla y Veracruz.

Originalmente el Nuevo Testamento fue escrito en el idioma griego, pero como personas de otros países donde no se hablaba el griego querían leerlo en su lengua nativa, pronto se empezó a traducir a otros idiomas. Hasta la fecha el Nueva Testamento se ha traducido a más de mil quinientos idiomas del mundo.

Esta traducción al otomí de la Sierra está basada en el manuscrito griego llamado Textus Receptus, que fue el que utilizó Casiodoro de Reina en el año 1569. Cipriano de Valera también lo utilizó en su revisión de 1602.

Los traductores del Nuevo Testamento al idioma otomí de la Sierra hicieron lo posible por comprender a fondo el significado expresado en el original, y para ello se refirieron al manuscrito griego y a varios comentarios. Una vez determinado dicho significado, se esforzaron por comunicarlo en otomí con claridad.

Algunas palabras griegas no se pueden traducir al otomí con una sola palabra. Por lo tanto, ha sido necesario expresarlas a veces con una frase descriptiva, y otras veces efectuando una sustitución de tipo cultural (es decir, usando una palabra otomí con función semántica semejante a la de la palabra griega). Ciertas palabras griegas tienen un significado tan complejo que ha sido necesario usar palabras distintas para traducirlas de acuerdo con el significado que la palabra griega tiene en cada pasaje donde aparece.

La gramática varía mucho entre los dos idiomas. Si se traducen en forma literal, las figuras de construcción o de retórica del griego a veces no se entienden en otomí y a veces se entienden mal. Por lo tanto, los traductores han procurado expresar el significado del original con naturalidad en el otomí. Para lograrlo, han escogido las construcciones gramaticales, el orden de las oraciones, las figuras de construcción, y el estilo, no del griego ni del español, sino del otomí. En algunos casos ha sido necesario hacer explícita aquella información implícita en el manuscrito griego, que sus

lectores comprendieron sin dificultad, para que el lector otomí la pueda comprender en la actualidad.

La forma ligüística de la traducción se ha determinado usando como colaboradores hablantes nativos del otomí de la Sierra. El significado de la traducción se ha comprobado revisando la traducción con varios hablantes nativos.

El Nuevo Testamento es uno de los libros más leídos de todos los tiempos. Despierta el interés de personas de todas las edades, razas y nacionalidades. La vida de los personajes narrada en sus páginas y las enseñanzas que contiene, han inspirado la vida de millones de personas. Se espera que la lectura de este libro sea benéfica para los otomíes de esa región, y les ayude a ser mejores vecinos, mejores mexicanos y mejores ciudadanos del mundo.

ACLARACIONES SOBRE EL ALFABETO OTOMÍ DE LA SIERRA

Muchas de las letras del alfabeto otomí de la Sierra son iguales a las del alfabeto español, y representan los mismos sonidos; algunas, sin embargo, representan sonidos un poco diferentes; y otras son letras que no se encuentran en el alfabeto español, y representan sonidos que tampoco existen en español. La guía que a continuación se da, facilitará la lectura de este libro.

Letras que representan sonidos un poco diferentes del español.

como en	ra xaha	ʻla tortuga'
como en	ra za	'el árbol'
como en	ra fani	ʻla mula'
como en	ra j u	'el frijol'
como en	ra haho	'la zorra'
como en	ra u	ʻla sal'
como en	ra uąhi	'el campesino'
	como en como en como en como en	como en ra za como en ra fani como en ra ju como en ra haho como en ra u

Letras que representan sonidos que no se encuentran en español:

ą	como en	ąhą	'duerme'
ä	como en	ra ä	ʻla pulga'
į	como en	ra įtį	'el borracho'
3	como en	ex ra za	'tumba el árbol'
Ę	como en	εhε	'viene'
Ø	como en	ra øni	ʻel pollo'
ŧŧ	como en	ra u	'el tecolote'
th	como en	ra theni	'el cuchillo'
1	como en	ra ją'i	ʻla persona'

El símbolo (´), que en español representa el acento, en otomí representa el tono alto, que se indica en aquellos prefijos cuya única diferencia es el tono. Por ejemplo:

ra ngu	'la casa'	da mba	'irá'
rá ngu	'su casa'	dá mba	'fui'

Índice

SAN MATEO	1
SAN MARCOS	68
SAN LUCAS	107
SAN JUAN	172
HECHOS	220
ROMANOS	280
1 CORINTIOS	307
2 CORINTIOS	334
GÁLATASGÁLATAS	351
EFESIOS	361
FILIPENSES	371
COLOSENSES	378
1 TESALONICENSES	385
2 TESALONICENSES	390
1 TIMOTEO	393
2 TIMOTEO	401
TITO	406
FILEMÓN	409
HEBREOS	411
SANTIAGO	431
1 PEDRO	438
2 PEDRO	446
1 JUAN	451
2 JUAN	458
3 JUAN	460
JUDAS	462
ADOCAL IDCIC	165

MATEO

Ran ho ma'da'yo bi 'yo't'a ra Mateo

Yúm bombøta ra Jesucristo

Guehna n'da ra søcuą i ja ua im ma to'o yú ngurpa bøta ra Jesucristo. Nu'a n'da ra Abraham nε man'da ra David nε xun ngu mi'da gätho yú ngurpa bombøta u.

²Nu ra Abraham bim 'bʉ a n'da rá ts'unt'u ngue ra Isaac. Nu ra Isaac xø bim 'buh rá ts'unt'u, ra Jacob a. Nε nu ra Jacob xø bim 'bʉh vʉ́ ts'unt'u. Nu'a n'da ra Judá a ne'u yún 'yohu. Ne gue'u bi xandgahe и dyu ja'i israelgähe, dyu judíohe. ³Ne nu ra Judá bim 'bʉ i yoho yʉ́ ts'unt'u. N'dam'bui thoho yoho. Nu'a n'da ra Fares. Nu'a man'da ra Zara. Ne nula rá mbe # rá thuhu ra Tamar a. Ne nu ra Fares bim 'bu a n'da rá ts'unt'u ngue ra Esrom. Nε nu ra Esrom, xø bim 'buh rá ts'unt'u, ra Aram a. 4Ne nu ra Aram bim 'bu a n'da rá ts'unt'u ngue ra Aminadab. Ne nu ra Aminadab. xø bim 'bu a n'da rá ts'unt'u, ra Naason a. Ne nu ra Naason, xø bim 'buh rá ts'unt'u, ra Salmón a. ⁵Nu ra Salmón xø bim 'buh rá ts'unt'u, ra Booz a. Ne nu ra Booz, rá mbe a ra Rahab. Ne nu ra Booz xø bim 'buh

rá ts'unt'u, ra Obed a. Nɛ nu rá mbe ra Obed, ra Rut a. Nɛ nu ra Obed xø bim 'buh rá ts'unt'u, ra Isaí a. 6Nɛ nu ra Isaí xø bim 'buh rá ts'unt'u, ra David a. Nɛ nu ra David gue'a bin ts'ut'abi a. Nɛ nu ra David xø bim 'buh rá ts'unt'u, ra Salomón a. Nɛ nu rá mbe ra Salomón, gue'a xí du rá ndø rá thuhu Urías.

⁷Ne nu ra Salomón xø bim 'buh rá ts'unt'u, ra Roboam a. Ne nu ra Roboam xø bim 'buh rá ts'unt'u, ra Abías a. Ne nu ra Abías xø bim 'buh rá ts'unt'u, ra Asa a. 8Ne nu ra Asa xø bim 'buh rá ts'unt'u, ra Josafat a. Ne nu ra Josafat xø bim 'buh rá ts'unt'u, ra Joram a. Ne nu ra Joram xø bim 'buh rá ts'unt'u. ra Uzías a. ⁹Ne nu ra Uzías xø bim 'buh rá ts'unt'u, ra Jotam a. Ne nu ra Jotam xø bim 'buh rá ts'unt'u, ra Acaz a. Ne nu ra Acaz, xø bim 'buh rá ts'unt'u, ra Ezequías a. ¹⁰Ne nu ra Ezequías xø bim 'buh rá ts'unt'u, ra Manasés a. Ne nu ra Manasés, xø bim 'buh rá ts'unt'u, ra Amón a. Ne nu ra Amón, xø bim 'buh rá ts'unt'u, ra Josías a. ¹¹Nε nu ra Josías, xø bim 'buh rá ts'unt'u ra Jeconías a. ne'u yún 'yohu. Ne gue'u yu pa bi

ts'ix u ma mi israelhe dyu judíohe bu ja ra häi Babilonia. Bi zix yún suihu.

¹²Ne nubuya nu ra Jeconías bin xand bu ra häi Babilonia a, ne'a rá ts'unt'u ngue ra Salatiel. Nu ra Salatiel xø bim 'buh rá ts'unt'u, ra Zorobabel a. ¹³Ne nu ra Zorobabel xø bim 'buh rá ts'unt'u ra Abiud a. Ne nu ra Abiud xø bim 'buh rá ts'unt'u, ra Eliaquim a. Ne nu ra Eliaquim xø bim 'buh rá ts'unt'u, ra Azor a. 14 Ne nu ra Azor xø bim 'buh rá ts'unt'u, ra Sadoc a. Ne nu ra Sadoc xø bim 'buh rá ts'unt'u, ra Aquim a. Ne nu ra Aquim xø bim 'buh rá ts'unt'u, ra Eliud a. ¹⁵Nε nu ra Eliud xø bim 'buh rá ts'unt'u, ra Eleazar a. Ne nu ra Eleazar xø bim 'buh rá ts'unt'u, ra Matán a. Ne nu ra Matán xø bim 'buh rá ts'unt'u, ra Jacob a. 16 Nε nu ra Jacob xø bim 'buh rá ts'unt'u, ra José a. Gue'a rá ndø ra María a. Ne gue'a rá mbe ra Jesús a, ngue ra Cristo a buya, rá thahni Oja.

17 Nɛ gue'u gätho yum bombøta ra Jesucristo u. Mbudi tho ra Abraham, ná 'dɛ'magoho a ra David. Nɛ xø bim 'buh mi 'dɛ'magoho yum bombøta nɛ gue'u yu pa bi ts'ix pu Babilonia. Nɛ xø bim 'buh mi 'dɛ'magoho, ná 'dɛ'magoho a ra Cristo buya.

Nu'a bin ja 'bʉ mim 'bʉh ra Jesucristo

¹⁸Nɛ nu'bʉ mim 'bʉh ra Jesucristo, nu'a rá mbe ngue ra María bi 'yän'na ra José, nɛ ya in nde din thạt'ui, pɛ nu'bʉ hin ním 'bʉhmi, ya bi hnu ngue in hạt'ʉhni ra María, pɛgue bi nɛqui zɛhɛ rá t'uhni nangue rá Hogandahi Oja.

19 Nɛ nu ra José buya bi bɛni hanja
bin hat'uhni a ra María. Pɛgue ra
hocja'i a ra José nɛ him mi nde di
yap'a ra María bu 'buh ra zɛ'mi
pɛgue bi bɛni da hyɛtho. 20 Nɛ nu ra
José, nu'bu ngubu mim bɛni, bi 'ui
n'da ra t'i 'bu min apu rán ngunsɛ,
bi nu rám 'bɛhni Oja bi 'yɛmbi:

—Nu'i, hague José, rám bom'bεto i ra David, xun ho 'bu gam 'buhmi a ra xisu, nguetho nu ra 'uɛre dim 'bui, dim 'bui nangue rá Hogandahi Oja a. ²¹Nε dim 'bu a n'da rá ts'unt'u ra María, gui xip rá thuhu ra Jesús. Nu'a ra Jesús nam bøni ngue da yani gätho yú mijudíohu, yu israel, nangue yú ts'oqui u, bi 'yɛmp'a rám 'bɛhni Oja a ra José 'bu min aha.

²²Nguetho maya'bu thoho bi zän Oją a ra María 'bu mi man'a ra pøngahya ngue bi 'yɛna:

N'da ra hmute ngue hin jam'bu n'dandi bi zo a n'da ran 'yohu, ne din hat'uhni.

Nɛ nu'a rá t'ʉhni dim 'bʉi da t'ɛmbi ra Emanuel, bi 'yɛn'a ra pøngahyą maya'bʉ.

Nɛ nu'a ra Emanuel in nde da ma: "Dí 'bʉhmbʉ Oją."

²⁴ Janangue'a nu'bʉ mi hyax bʉya a ra José, bi 'yøt'e 'bɛ'a bi xi a rám 'bɛhni Oją, nɛ 'bex bi zin'a ra María. ²⁵Pɛ him 'bexque njuạntho bim 'bʉhmi, ja gue'bʉ bim 'bʉh rá ts'ʉnt'ʉ ra María. Nɛ nu ra José bʉya bi xih rá thuhu ra Jesús a ra t'ʉhni bim 'bʉi.

Nu'u 'da yun 'yohu bi dande ra Jesús 'bu min 'uɛre

Nε nu ra Jesús bám 'bupu ra hnini Belén guepu ra häi Judea.

Nɛ min ts'ut'abi bu ja a ra xɛqui a ra Herodes, nɛ mí zam bu ra dahnini Jerusalén. Nɛ bi zøm bu Jerusalén 'da yun 'yohu ngue yú 'bɛfi mí hand yu sø. Nɛ nu'u bí nɛxpu mbɛ ní bøx ra hyadi u. ²Nɛ nu'bu mi zøm bu Jerusalén bi 'yän'du 'bupu:

—Hapu i 'bucua a rá hmuts'ut'abi yu judío ja bim 'bui, bi 'yɛn'u.
Nguetho dán nuhe n'da ra sø njam'bu dá nuhe n'dandi. Nε gue'a ra hmɛpya bi 'yurcahe ngue ya bim 'bui, nɛ bá ɛhmbe ya ga thandehe a, bi 'yɛn'u bi nu ra sø.

³Nɛ nu ra ts'ut'abi Herodes, nu'bu mi sifi 'bɛ'a bi man'u yun 'yohu bi zøm bu, bi hyonya thoho nangue a ram hma ngue bim 'buh man'da ra ts'ut'abi. Nɛ gätho 'bupu Jerusalén bin su nguetho im bɛni: "Masque i ja 'bɛ'a din ja ya," ɛn u. ⁴Nɛ nu'a ra ts'ut'abi Herodes buya bi zon'du yu hmumbäja nɛ'u yu xänbate nija, bi 'yänni hapu im man yú søcua yu pøngahya dim 'bu a rá hmuts'ut'abi yu judío, ngue ra Cristo. ⁵Nɛ nu'u bi 'yɛmbi:

—Guepu Belén ra häi Judea dim 'bui, nguetho gue'a bi man ra pøngahyą 'bu maya'bu 'bu mi hma ngue,

⁶ Nu ra hnini Belén bʉ ra häi Judea,

ra t'uhnini a, pegue din ja tengu n'da ra dahnini

nguetho guepu dim 'bʉpʉ ra Hmu

di jamansu ma t'uhni yu ją'i israel,

i ɛn Oją, bi 'yɛn'a ra pøngahyą maya'bʉ, bi 'yɛn ʉ yʉ mbäją.

⁷Nu'bʉ mi mbenc'ʉ yʉ mbäją nɛ yʉ xänbate nija, nu ra Herodes bi zon'du bi nu ra sø, pɛ njon mi ndepe da nu 'bu mam bá ts'i. Nɛ nu'bu mam bá ts'i bu 'buh ra Herodes, bi 'yänni:

—Ma njąm'bu bi nequi a ra sø, bi t'ɛmp'u.

⁸Nɛ nu'bʉ mi xifi, nu ra Herodes bʉya bi 'yɛ̞mp'ʉ bi nu ra sø:

—Ní mbähä bu Belén, gui hyomhbu hapu bim 'bu a ra 'uɛre, nɛ nu'bu gá timhbu hapu i 'bui, gua εhmbu gui xiju, nɛcä ga mba ga thạnde a, bi t'ɛmp'u bi nu ra sø. Pɛ hinga gue'a mim bɛn a.

⁹Nε nu'ʉ yʉn 'yohʉ bʉya bi mba da hyoni hapu bim 'bu a ra 'uere, nε xø bi nεqui mahøn'a a ra sø xpí nu bu yú häi. Ne i 'bet'o a. Ne nu'bu mi zøm bu Belén, bin säya a ra sø bu din 'yɛ̞'t'ui a ra ngu nubu mí 'bu a ra 'uεre. 10 Νε nu'u yun 'yohu 'bu mí nu bin säya a ra sø, bin johya yú mbui buya. 11 Ne bi yut'ambo, bi nu a ra 'uεre nε ra María rá mbe. Nε bin dąnyahmu, bi dąnde a ra 'uɛre. Nɛ 'bexque bi xo't' yú 'bɛni bá tu, ne bi un yun t'unni a ra 'uere ngue emme xun ngu di muui. Bi unna n'da ra oro, ne rá ndega ra za bi unni, ne n'da ra 'yethi yuman'u. ¹²Νε nu'bʉ min ą ʉ yʉn 'yohʉ ngue bi nu ra sø, Oja bi 'yut'a n'da ra t'i ngue nu'bu bi mbengui hin dí mba bu bí 'buh ra Herodes. Janangue'a n'danni n'da ra 'yu bi hyax 'bu mi mbeng bu yú häi buya.

Ra Jesús bi ts'ix bu Egipto

¹³Nε nu'bʉ mí mba ʉ yʉn 'yohʉ bʉya, n'da rám 'bɛhni Oją bi xi a ra José 'bʉ min aha:

—Dami ndants'i. Dami six'a ra 'uεre nε a rá mbe. Gui' dahmbʉ, ni

mbähä bu ra häi Egipto nε gam 'buhmbu bu 'da yu pa. Nε him 'bex gua pengüi, jague'bu dá xi'aui gua pengüi. Nguetho nu ra Herodes da hyon'a ra 'uεre, nε nu'bu da dịni da hyo, bi 'yṣmp'a rám 'bɛhni Oją a ra José.

¹⁴Nɛ 'bex bi ndanc'a ra José a ra xui a. Bi zix a ra María nɛ rá t'ʉhni, nɛ bi mba bʉ ra häi Egipto. Him bi dø'mi 'bɛ da hyats'i. ¹⁵Nɛ bám 'bʉрʉ Egipto jague'bʉ mi du ra Herodes, ja bá penc'ʉ bʉya. Nɛ bin ja 'bɛ'a bi man Oją maya'bʉ, bi 'yɛna: "Gan zohn'na ma t'ʉhni bʉ Egipto," i ɛn Oją, bi 'yɛn'a rá pøngahyą.

Ra ts'ut'abi Herodes bi manda dí ho yu t'uhni

16 Nɛ nu ra Herodes ɛmmɛ bin cuɛ ngue ya bi thät'i, nguetho nu'ʉ yʉn 'yohʉ bi nu ra sø hin í mbeng bʉ 'bʉ mi dɨn'a ra t'ʉhni. Janangue'a bi mbɛn'ndʉ yʉ dofʉi ngue da hyo yʉ 'uɛre bʉ Belén nɛ yʉ hnini i hänbʉ. Nɛ gätho ʉ yʉ t'ʉhni hinga na pɛ'ts'a nyojɛya gätho bi hyo. Nguetho bi man ʉ yʉn 'yohʉ, ya mbɛ má nyojɛya ya bi nɛqui a ra sø. ¹7 Nɛ nu'a bin ja, maya'bʉ thoho bi man a ra pøngahyą ra Jeremías ngue ngubʉ din ja 'bʉ mi 'yɛna:

¹⁸ Bin ja n'da ran ts'oni bʉ ra hnini Ramá.

nts'ɛdi bi mbah yú xisu yu judío, bin zoni nɛ him bi 'yø a bi xi u bi hyurpa yú mbui, nguetho ɛmmɛ im bɛn'u yú t'uhni bi thopi, bi 'yɛn'a ra Jeremías 'bu maya'bu.

¹⁹Nɛ nu'bʉ mi du ra Herodes bʉya bi 'uṭ man'da rám 'bɛhni Oja a ra José 'bʉ min xui, bʉ ra häi Egipto. ²⁰—Dami ndants'i. Dami six a ra t'uhni ne a rá mbe. Dami penju bu ra häi Israel, nguetho ya bi du u mí nde xtá hyo a ra t'uhni, bi t'ɛmp'a ra José.

²¹Ne nu ra José buya bi hyax ra 'vu ní mba bu ra häi Israel 'bu mi hyats'i, ne bi zix a ra t'uhni ne'a rá mbe ra t'uhni bi zits'i, ɛna xtán zøm bu ra xεqui Judea. ²²Pε nu'bu mí 'yø a ra José ngue in ts'ut'abi bu ra Arquelao, bi zu da zøm bu mahøn'a, nguetho nu ra Arquelao rá ts'unt'u ra Herodes a. Ne'a xí 'ui xø bi bem buva, ngue'a hin da mba bu Judea. Janangue'a í mba bu ra xequi Galilea buya. ²³Nε bi mba dim 'bupu ra hnini Nazaret. Janangue'a bin ja 'bɛ'a xmán t'o't'i bu ja yú søcuą yú pøngahyą Oją, gue nu ra Jesús da t'embi ra mengu Nazaret.

Bi man rám hma Oją bu ja ra dąpo ra Xuua Nxixyą

3 1-2 Nε nubʉya nu ra Xuua Nxixyą bi dʉ'mi bi xih yʉ ją'i nε bi 'yɛ̞na:

—Dami päh nin 'yomfɛnihu nguetho ya mi ts'utho di manda ua rá ts'ɛdi Oją, bi t'ɛmb yu ją'i.

Ne mí 'bupu ja ra dąpo bu ra xequi Judea 'bu min yąhu yu ją'i a ra Xuua.

³Nɛ nu a ra Xuua gue'a bi man ra pøngahyą Isaías maya'bu ngue bi ma ba ɛhɛ, 'bu mi 'yɛna:

N'da ra ja'i din ya bu ja ra dapo ne da 'yena:

"Damin sähu ga simhbu ra Hmu mi ts'utho da zøcua,

dami hoc ni mbuihu ga tømhbu xun ho," da 'yɛna, bi 'yɛn a ra Isaías maya'bu. ⁴Nu yú he ra Xuua ám 'be yú xingu yu camello, nɛ midín gut'u yu xifani, nɛ mi sa yu t'axi nɛ mi si yu t'afi t'asa dapo. ⁵Nɛ nu'bu mi du'mi bi man rám hman a ra Xuua, bi mba u yu mɛngu bu Jerusalén, bi zøm bu 'buh ra Xuua, nɛ yu mɛngu bu ra xɛqui Judea, nɛ'u mi 'bupu hänbu ra dathe Jordán, ngue nde da 'yøde 'bɛ'a da man'a ra Xuua. ⁶Nɛ nu ra Xuua bi xixyaba u to'o bi 'yømanho 'bɛ'a bi ma, nɛ bin juanni nangue yú ts'oqui. Nɛ xun ngu bi xixyaba bu ja ra dathe Jordán.

⁷Nε xun ngu ma ngurpihe dyu israelhe, dyu judíohe, bi zøm bu mí 'bäh ra Xuua εna din xixya u. Nu'u 'da yu fariseo u, nε u 'da yu saduceo u. Nε nu ra Xuua buya bi 'yɛmp'u:

-Nu'ahu tengu'bu ni menihu yu pozu nguetho gyu tontohu. To'o bi xi ahu gua shmbu ua ngue gua 'dahmbu bu ja ran unbi xun u tho, bi 'yɛna. ⁸Ha guím bɛmhbʉ da zä gan yamhbu 'bu hin gui 'yothu a rán säui u to'o bi päh yú mbui, bi t'emp'u ma ngurpihe. ⁹Pe hin din ja ran 'yets'i ni mbuihu ngue gui 'yɛmhbu: "Nugähe yú t'uhnigähe ra Abraham, ya hin gan nuhe ran unbi," hingui sä gui 'yɛmhbu, nguetho nɛhya yu do i 'bongua da zä din ja'i ngue da 'yɛmbi yú t'uhni ra Abraham 'bu gue'a da nde Oja da 'yøt'e, bi 'yɛn'a ra Xuua. ¹⁰Nε nu'a ra aza ya mahoqui xʉn ho ngue da 'yex u yu za hingui ho yún dät'ä, ne da thøspu ja ra sibi din zø. Nε nu'ahu tengu'bu gyu zahu ngue hingui ho yún dät'ä, bi t'emp'u yu fariseo nε yu saduceo.

¹¹Nε xø bi xi u mi'da:

—Nugä dí xixyą ahʉ nangue ra dehe 'bʉ ya gá päh ni mbʉihʉ, pε nu'a man'da ba ɛhɛ, di hoc'ahʉ nangue rá Hogandahi Oja tengu'bʉ n'da ra sibi. Nɛ nu'a, man'da i ja rá ts'ɛdi xinda guecä. Hin dí sʉcä tengu a, i ɛn a ra Xuua. ¹²Nɛ da 'yøt' ran juanbi, tengutho 'bʉ i pa ma hoqui yʉ jʉ, ngue n'danni i pa m'bɛ'ts'i ʉ yʉ jʉ nɛ n'danni da t'ɛn ʉ yʉ́ häi. Nɛ nu ʉ yʉ́ häi da t'upʉ ja ra sibi njam'bʉ i huɛt'i, bi 'yɛmb yʉ jạ'i a ra Xuua.

Bin xixya ra Jesús

13 Nɛ nubʉya bi nɛxpʉ ra häi Galilea ra Jesús, bi zøm bʉ ja ra dathe Jordán guepʉ ja ra dapo bí 'bʉh ra Xuua. Bi zøm bʉ ngue bi nde din xixya a ra Jesús. 14 Pɛ nu ra Xuua him mi ndehma di xixyabi ra Jesús, nɛ bi 'yɛmbi:

—Pε nu'i guí εna ga xixyą i, pε go man sä'be go gui xixyągui, bi 'yɛn'a ra Xııııa.

¹⁵—Pɛ nuya xun ho 'bu gui xixyagui, nguetho i jatho ga øthu 'be'a bi man Oja, bi 'yɛn'a ra Jesús.

—Da nde 'bʉ, bi 'yɛ̞n'a ra Xuua bʉya.

¹⁶Nε nu'bu mi gua a bin xixyą ra Jesús nε bi bøx bu ja ra dehe, 'bex bi nu ngue bi xoh mahɛts'i, nε bi nu bá cạh rá Hogandạhi Oja tengu n'da ra t'azu, bi zøpu mí 'bä a ra Jesús. ¹⁷Nε 'bex bi t'ø a n'da ra nde bí 'yɛh mahɛts'i, bi 'yɛna:

—Nuna guehna ma Ts'unt'ugä na, ngue ɛmmɛ dídi huɛcä nɛ dí numanho, bi 'yɛn Oją.

Bi mba nts'ä a ra Jesús nangue ra zįthu

A Ne nu rá Hogandahi Oja buya 'bex bi zixpu ja ra dapo, in ndepe da mba nts'ä a ra Jesús nangue ra zithu. ²Nε nyote pa nε nyote nxui bim 'bɨpɨ ja ra dapo, nε him bin sihmɛ, nɛ ɛ̞mmɛ bin tumanthuhu maha. ³Nε nubɨya, bi zøm bɨ a ra zɨthu ngue da zäp rá mbɨl ra Jesús. Nε bi 'yɛ̞mbi:

—Nu'bu majuani rá Ts'unt'u i Oja, dami japi dim hme yu do i 'bongua ne gui si, bi 'yɛn'a ra zithu.

⁴Nu ra Jesús bi dati:

—Hin ga øt'ä a, bi 'yɛna. Nguetho mán t'o't'i bu ja rám hman Oją, hinga hønt'a ra hmɛ dám 'buh yu ja'i pɛ nɛ a gätho i ma Oją, bi t'ɛmp'a ra zithu.

⁵Nu ra zįthu xø bi zixpʉ Jerusalén a ra Jesús, nε bi 'yɛxpʉ magats'i rá 'bet'e ra danija. ⁶Nε bi 'yɛmbi:

—Nu'bu majuani gue'e rá Ts'unt'u i Oja, damin säqui ne gui so nu häi,

Nε Oją ba pεhn yɨm 'bεhni mahɛ̞ts'i ngue da mbäx'i'i nε da bɛnt'i i,

nε hin hapʉ gui 'uaqui nangue yʉ do,

tengutho im mam bu ja rám hman Oją, bi 'yɛ̞n'a ra zi̞thu, bi t'ɛ̞mp'a ra Jesús buya.

⁷Nu ra Jesús bi 'yɛna:

—Hąha, gue'a i hmam bu, pε nε a i hmam bu, ngue "Nu Oją ma Hmuhu njongui sä da zä a ngue da bą 'bu majuani da 'yøt'a im man'a," bi 'yɛn'a ra Jesús.

⁸Ne xø man'dandį buya, bi zix mahøn'a ra zįthu a ra Jesús bu rá nya n'da ra t'øhø xun hɛts'i, ne bi 'yuti gätho na ndoho ra ximhäi ne gätho 'be'a xun ho i ja bu ja yu hnini. ⁹Ne bi 'yɛmbi:

—Gätho ga 'da a ya 'bε'a dá ut'i i 'bu gan danyahmu gui thandegui, bi t'εmp'a ra Jesús, bi 'yɛn'a ra zithu.

¹⁰Nɛ bi dąh mahøn'a ra Jesús, bi 'yɛmbi:

—Nu'i grá zịthu, dami 'dagui nanguecä, nguetho nu rám hman Oją i ɛna: "Hønt'a Oją ra Hmu ga thạndehu nɛ ga ørpahu rá 'bɛfi a," bi 'yɛn'a ra Jesús.

¹¹Nɛ nubuya bi 'da'a ra zithu bu 'buh ra Jesús, nɛ bá ɛh yum 'behni Oja bi zopu mí 'bu a ra Jesús bu dapo nɛ bi 'uin a.

Ra Jesús bi dump rá 'bɛfi bu ra xɛqui Galilea

¹²Ne bi bøm bu ja ra dapo a ra Jesús buya. Ne nu'bu mí bøm bu, bi 'yøde ngue bi jot'a fädi ra Xuua nxixyą. Janangue'a bi mbengda bu ra häi Galilea. Guepu ra hnini Nazaret bim 'bʉpʉ mahøn'a. ¹³Pɛ hinga nya'a bim 'bupu ne bi mba bu ra hnini Capernaum, nubu ra ndendadehe guepu ra xequi yú häi mam bombøtahe ra Zabulón ne mam bombøtahe ra Neftalí. 14-15 Nu'bu mi zøm bu a ra Jesús bin ja 'bɛ'a bi 'yo't'a ra pøngahya Isaías maya'bu ngue din ja bu ra häi Zabulón nε ra häi Neftalí, i hänbu ra dądehe, 'danguadi ra dąthe Jordán, ngue ne a i t'embi Galilea, guepu 'bu u i thande yú ojazehe. Ne bi 'yɛn'a ra pøngahya ngue:

¹⁶ Nu yu ją'i mi 'bupu tengu'bu i bupu ja ra 'bɛxui, nε i ja bu ran date,

pε nuya bi nεqui n'da ran nεqui ngue di yot'i,

bi 'yɛn'a ra Isaías 'bʉ maya'bʉ. Nɛ gue'a bin ja 'bʉ mi zøm bʉ ra Jesús.

¹⁷Nε nu ra Jesús bi dʉ'mi bi mam bʉ rám hma nε bi 'yɛ̞na:

—Dami päh nin 'yomfɛnihu nangue yu ts'oqui, ngue da zä di manda ua rá ts'ɛdi Oją bi zøcua guí 'buhmbu, bi 'yɛ̞mb yu ją'i a ra Jesús 'bu mim 'bupu.

Goho yu mbahuą bi den'na ra Jesús

¹⁸Nε n'da ra pa mí 'yo bu ja ra ndendądehe a ra Jesús nubu ra häi Galilea, nε bi nu yoho yun 'yohu din 'yohu zεhε u. Nu'a n'da ra Simón, gue'a ra Pedro a. Nε nu man'da ra Andrés. Nε nu'u yu mbahuą u, nε mi εnxit'ą bu ja ra dądehe. ¹⁹Nε nu ra Jesús bi 'yεmp'u:

—Ba tɛngaui, gui xihmbu yu ja'i da 'yɛc'yɛigui, tengu thoho bu gní thɛui yu hua guí øt'ui, bi 'yɛmp'u.

²⁰Nε 'bex bi hyερu yú xit'ą nε bi dɛn'na ra Jesús.

²¹Nɛ bi thopʉya bin 'yo mi ts'ʉ a ra Jesús, nɛ bi nu mi yoho yʉn 'yohʉ din 'yohʉ zɛhɛ ʉ, nɛ nu n'da ra Jacobo, nɛ nu man'da ra Xuua, gätho yoho yʉ ts'ʉnt'ʉ ra Zebedeo ʉ. Nɛ mín 'yohʉ a rá ta mi hu bʉ 'bɛn yʉ mbosa, mí 'uɛt yʉ xit'ą. Nɛ xø bi xi ʉ da dɛnni mahøn'a. ²²Nɛ 'bex bi zopʉ rá ta nɛ'ʉ yʉ mbosa, 'bex bi dɛn'na ra Jesús bʉya.

Ra Jesús bi xänbi xun ngu yu ją'i

²³Nɛ nu ra Jesús mí 'yo gätho ra häi Galilea nɛ mí xänba u yu ja'i bu ja yu nija nɛ bi ma 'bɛpu dí manda ua rá ts'edi Oja. Nɛ midí hoc yu hyɛnni ngue 'bɛ'a gä ní gɛhɛ mí hɛmp'a n'da ngu n'da. ²⁴Nɛ gätho yu ja'i bu ra xɛqui Siria bi 'yøde 'bɛ'a øt ra Jesús, nɛ bá thunba u yu hyɛnni ngue 'dahma 'dan'yo yun u mí hɛmbi nɛ'u mín 'yohu yu zithu, nɛ'u zant'a mi sändate 'da yu ora, nɛ'u xí ts'a rá ja'i, nɛ gätho bi

hoc'a ra Jesús. ²⁵Nɛ xun ngu yu ja'i bi dɛn'na ra Jesús. Mín numanho da dɛnthoho yu ja'i nangue 'bɛ'a bi 'yøt'e. Nu'u 'da yu mɛngu bu ra xɛqui Galilea, nɛ u 'da yu mɛngu bu ra xɛqui Decápolis, nɛ'u 'da mí 'bupu Judea, nɛ'u 'da mí 'bupu 'danguadi ra dathe Jordán, nɛ'u 'da mí 'bupu ra hnini Jerusalén. Gätho bi zøm bu mi 'bu a ra Jesús.

Ra Jesús bi mba bu ja ra nyuni

5 Nε nu ra Jesús 'bu mi nu yu ją'i εmmε xun ngu bi zøpu, nε bi ndex bu ja ra nyuni nε mi hupu. Nε'u yú xädi buya bi zøm bu mí hudi, 'darpu mi huhmbu. ²Nε bi xänba u.

Nu'u i hạn rán jạpi Oją

³Nɛ bi 'yɛmp'ʉ yú xädi ra Jesús:
—Nu'ʉ to'o pạsɛ hingui ho yú mbui
bu na nu Oją nɛ da hyon Oją di zɛdi,
nu Oją da zimanho bu di manda rá
ts'ɛdi, janangue'a mająpi u buya.

⁴Nɛ nu'ʉ tu yʉ́ mbʉi, Oją da hyurpa yʉ́ mbʉi, janangue'a mająpi ʉ.

⁵Nɛ nu'ʉ im bɛni i cosɛ häi, da hyạn a ra hogahäi bi man Oja di unni, janangue'a majapi ʉ.

⁶Nε nu'ʉ i humbi da 'yøt' ran ho, Oją di japi da 'yøt'e xʉn ho, janangue'a mająpi ʉ.

⁷Nɛ nu'ʉ di huɛ̞c yʉ́ mija̞'ihʉ, xin di huɛ̞c Oja̞ ʉ, janangue'a maja̞pi ʉ.

⁸Nɛ nu'ʉ n'dat'a im bɛni, dim 'bʉhmbʉ Ojạ ʉ, janangue'a majapi ʉ.

⁹Nε nu'ʉ øt' ran hocpate, nu Oją da 'yɛ̞mbi yʉ́ t'ʉhni ʉ, janangue'a majapi ʉ.

¹⁰Νε nu'ʉ i nu ran ʉnbi nangue ran ho i øt'e, da yʉrpʉ di manda rá SAN MATEO 5 8

ts'ɛdi Oją ʉ, janangue'a mająpi ʉ, i ɛn'a ra Jesús.

11 Nɛ gan johyahu 'bu i u'ts'ahu yu ja'i nɛ i then'nahu nɛ i xi ahu yu fɛhni 'bu guí tɛngahu, bi 'yɛn'a ra Jesús.

12 Nɛ da hyu ni mbuihu, gan johyahu, guim bɛmhbu ngue 'dat'a ran unbi guín nuhu u yu pøngahya mam 'bɛt'o, nɛ i ja 'bɛ'a din 'da ahu ngue am 'bɛ'ts'i mahɛ̞ts'i, bi 'yɛ̞n'a ra Jesús.

Ra ų ua ja ra ximhäi

13—Nu'ahu gyu uhu hapu 'buh yu ja'i, nguetho nu'a ra u di hoqui 'bɛ'a i pa njapi, nɛ ngutho ahu guídí hoju yu ja'i, i ɛn a ra Jesús. Pɛ nu'bu bi 'bɛh rá ts'ɛdi ra u, ya hin'yu 'bɛ'a sä dí hoqui, janangue da mba ma bunt'i thoho bu häi. Dami jamansuhu hin din ja bu gui 'yøthu tengu a, bi 'yɛmp'u yú xädi ra Jesús.

Ran nequi ua ja ra ximhäi

¹⁴Νε bi 'yɛn'a ra Jesús:

—Nu ahu gyun nequihu bu 'buh yu ja'i, bi 'yemp'u yú xädi. Dami jafu da hnu a ran nequi. Tengu n'da ra hnini i ja bu ja rá nya ra t'øhø, am 'batho xun ho ngue hin'yu 'be'a i juti. 15 Ngutho n'da ra sibi, hingui sä da mba ma cu'ti bu ja ra huada 'bu da mba ma søque, i jatho da t'expu m'batho, janangue'a di yot'i gätho 'bupu. 16 Ne ngutho gui 'yøthu ngue tengu'bu gyu sibihu emme di hyärpu i 'buh yu ja'i. Janangue'a da hnut'ahu xun ho nin t'øt'ehu, ne u da 'yespa Oja ma Tahu 'bupu mahets'i u buya, bi 'yemp'u yú xädi ra Jesús.

Ra Jesús bi 'yurcahʉ 'bɛ'a nam bøn'ʉ yʉ́n t'ɛ̞di ra Moisés

¹⁷Νε xø bi 'yɛ̞n'a ra Jesús:

—O guím bɛmhbʉ ngue ga 'bɛcä vun t'edi bi man ra Moisés ne 'be'a bin xänbate u yu pøngahya, pε bá εcä ngue ga ut'ahu 'bε'a majuani nam bøn u. 18 Majuani dí xi ahu, gätho 'be'a nt'o't'i bu, ne xínga n'da u ngue hin din ja, 'bu guexta'a i jatho ra ximhäi nε mahεts'i. ¹⁹Janangue'a madí ts'utho maha a ram hma ngue hingui nde da 'yurpa ra güenda n'da, ne i xi u mi'da ngue din jabu da 'yøt'e, ρε zi ts'utho rá ts'edi di nequi bu bí ja rá ts'edi Oja bu mahets'i 'bu. Pe nu'u di ja'ts'i gätho u mam bu ja rám hma Oja, ne i xi u mi'da ngue din ja bu da 'yøt'e, ne man'da xun ngu rá ts'edi di nequi bu bí ja rá ts'edi Oja, bi 'yɛn'a ra Jesús. 20 Nɛ gue'a dí xi ahu a, nde'bu man'da xun ho gui 'yøthu xinda gue ma ngurpihu yu fariseo ne yu xänbate nija. Nguetho nu'bu hin gui 'yøthu xun ho, njam'bu da zä gui cuthu hapu di manda rá ts'edi Oja, bi 'yemp'u yú xädi ra Jesús.

Ra Jesús bi ma hingui ho ra cue

²¹Νε man'da bi man ra Jesús, bi 'yɛ̞na:

—Gue'bu go maya'bu bi sih mam bombøtahu ran t'ɛdi ngue im ma: "O guí hacpahu rá te ni mija'ihu, nɛ nu to'o da hyacpa rá te rá mija'iui, i jatho da ts'änba rá muui a bi 'yøt'e," bi t'ɛmp'u. ²²Pɛ i jagä man'da ga xi ahu, ngue nu'bu 'bo'o di cuɛp rá mija'iui nangue'a bi 'yørpe, ngue im bɛni di co'ts'i, guehma da nu ran ts'ɛmbi. Nɛ nu'a to'o da xih ra ts'ore bu ja rá hmi rá mija'iui, da ts'ixpu 'buh yu ngurpi da ts'ɛmbi. Nɛ nu to'o ɛmmɛ then rá mija'iui dí

mba bu ja ran ts'embi ngue ra sibi njam'bu i huet'i, bi 'yen'a ra Jesús.

²³ Janangue'a nu'bu guí pähä bu ja ra niją ngue guí ɛna gui thandehu Oja, pɛ nu'bu gá sømhbu bu nɛ 'bex gá bɛmhbu 'be'a xquín xihmi ni mija'ihu, ²⁴ gua peng thohu nɛ 'bɛ gui mba bu i 'bu a ni mija'iui gam punbaui, ja da zä gui thandehu Oja buya, bi 'yɛn'a ra Jesús.

²⁵Nɛ nu'bu guí pạhmbu ja 'bɛ'a guidín xihmbu n'da ni mija'ihu, pɛ gan hocpa zɛhɛhu, nɛ hin gui tømhbu da ts'ix ahu bu 'buh yu ts'ut'abi. Nguetho nu'bu gui sømhbu bu, ²⁶ guehma da jo ahu nɛ hin da hyɛc'a thohohu ra zɛ'mi jague'bu gui unhdu ra mbɛti hangu da 'yä ahu, nɛ xínga n'da centavo da nde gui 'yɛspahu, bi 'yɛn a ra Jesús.

Ra Jesús bi 'yɛ̞na hingui ho ran 'yomt'ɛ̞ni

²⁷Νε man'da bi xih yú xädi ra Jesús:

—Nu man'da ran t'ɛdi maya'bu i ɛna: "O guí øthu ran 'yomt'ɛni." ²⁸Pɛ i jagä man'da ga xi ahu, ngue nu'bu n'da ran 'yohu da hyant'a n'da ra xisu, nɛ im bɛn'a n'da ran 'yomfɛni xun ts'o nangue a, madague'bu bi bɛntho, tengu'bu ya bi 'yøt' ran 'yomt'ɛni bu rá mbui a buya, bi 'yɛn a ra Jesús.

29-30 Janangue nu'bu i ja a i ut'ahu ra ts'oqui, pɛ gui samzɛhɛ ni mbuihu madague'bu guím bɛmhbu ɛmmɛ xun u 'bu gui 'yɛshu. Tengu'bu xquí hya'a n'da ni dähu nɛ xquí 'yɛmhbu bu ma'ueni nɛ xquí n'dadä thohohu, uague tengu'bu xquí hyɛc'a nin 'yɛihu nɛ xquí

'yɛmhbu bu ma'ueni nɛ xquí n'da'yɛ thohohu. Pɛ man'da xun ho guin nuhu nangue gá 'bɛhmbu yu ts'oqui, xinda gue'bu xquí 'yøthu yu ts'oqui nɛ xquí 'bɛhmbu ran ho mazại bu ja ra sibi.

Ra Jesús bi 'yɛ̞na hin da hyɛh rá xisu n'da ran 'yohʉ

³¹Nɛ man'da bi man ra Jesús, bi 'yɛ̞na:

—Ne a bi mam 'bu maya'bu gue:

"Nu'bu n'da ran 'yohu in nde da
hyeh rá xisu, i jatho da 'yøt'a n'da
ra søcua din xummi." 32 Pe i jagä
man'da ga xi ahu, ngue hingui
sä da hyeh rá xisu n'da ran 'yohu
gue'bu hingui øt' ran 'yomt'eni a ra
xisu. Nguetho nu'bu bi hyeh rá xisu
n'da ran 'yohu, di japi da 'yøt' ran
'yomt'eni a ra xisu 'bu bi hyegui ne
dim 'buhmi man'da ran' yohu. Ne
'bu n'da ran 'yohu dim 'buhmi n'da
ra xisu bi thegui, ra 'yomt'eni a, bi
'yen a ra Jesús.

Nte ga ndønbahu rá thuhu, bi 'yɛn'a ra Jesús

33—Nɛ guí pạhmbu ran t'ɛdi mí hmam 'bu maya'bu ngue i ɛna: "Pɛ nu'bu gá ndønbahu rá thuhu Oją, guehma gui ja'ts'a gá mamhbu."

34Pɛ nuya i jagä man'da ga xi ahu, bi 'yɛn'a ra Jesús. Hin'yu 'be'a i sä gui ndønbahu rá thuhu 'bu ja a guí xihmbu ni mija'ihu ngue guín ndefu da 'yɛc'yɛi a guí xihmbu. Hingui sä gui ndømhbu Oja, pɛ ngutho hingui sä gui ndømhbu mahɛts'i, nguetho nu bu mahɛts'i bí ja bu rá ts'ɛdi Oja. ³5Nɛ xíngui sä gui ndømhbu ra ximhäi, nguetho nɛcua i ja ua rá ts'ɛdi Oja. Nɛ xíngui sä

gui ndømhbu ra hnini Jerusalén, nguetho rá hnini rá Thahni Oją a. ³⁶Nɛ xíngui sä gui ndømhbu ni yahu, nguetho 'dat'a Oja bi zän'na, nɛ xínga n'da ni xtahu sä gui sänzɛhɛhu gue'bu xun t'axi o gue xum pothi da gohi. ³⁷Pɛ nu'bu ja a guí xihmbu ni mija'ihu, "da zä," ga ɛmhbu 'bu da zä, "hin da zä," ga ɛnthohu 'bu hin da zä. Pɛ gätho mi'da yum hma bí nɛxpu ja rán 'yomfɛni ra zithu, bi 'yɛn'a ra Jesús.

Bi 'yɛ̞n'a ra Jesús hin ga cos'hu 'bu ja a da t'ørcahu

³⁸Ne xø bi 'yen'a ra Jesús: —Nu'ahu gá 'yøhmbu 'bε'a bi sih mam bombøtahu ngue: "Nu'bu n'da ra ja'i di ts'onba rá dä rá mija'iui, pε nε a da mba ma ts'onbi rá dä. Nε nu'bu rá ts'i da 'yøcpe, ngutho nε'a xin da t'øcpa rá ts'i." ³⁹Pε nuya i jagä man'da ga xi ahu ya, ngue nu'bu 'bu a n'da in nde di un'nahu. pε o guí suhmbu a. Nε nu'bu 'bo'o da mbεp'ahu 'danguadi ni hmihu, gui unhdu man'da nguadi da mbep'ahu. 40 Ne nu'bu 'bo'o da zix ahu bu 'buh ra ze'mi ngue da gan'na ni pahnihu, pe ne a ni cotohu gui unhdu. 41 Ne nu'bu i si ahu gui tuspahu rá 'beni n'da ra ja'i n'da ora, xun ho 'bu nyo ora gui tuxhu a rá 'beni. 42 Ne hønt'a go to'o da 'yä ahu 'bɛ'a i honi, dami unhdu. Nε nu'bu 'bo'o da mip'ahu 'bu ja a guí pes'hu, pe xun ho 'bu gui unhdu, bi 'yɛn'a ra Jesús.

Ga hugc man suihu, bi 'yen'a ra Jesús

43—Ne a n'da ram hma maya'bu i ena: "Dami huec ni amigohu ne gui ucpa nin suihu," mí t'en'ahu.

⁴⁴Pε i ja man'da ga xi ahʉ, ngue gui huge nin suihu, gan yamanhohu u man yu ts'ore nangue ahu, ne gui 'yørpahu ran ho to'o di uc'ahu. Nε dami 'yäfu rá mate Oja u to'o i numan'ʉ ahʉ nɛ ʉ di ʉn'nahʉ, bi 'yɛn a ra Jesús. 45 Nɛ nu'bu ngubu gui 'yøthu, 'da'angu gá 'yøthu a ma Tahu 'bupu mahεts'i ngue bá pεnh ra 'ye nε ra hyadi. Pε hinga hønbu 'bu u yu hocja'i gue i so ra 'ye nε ra hyadi, pe nepu i 'buh yu ts'om'bäi, bi 'yɛna. 46Pɛ nu'bu hønt'u to'o di huɛc'ahu guidí huɛju, 'bɛ'a gue gá tahmbu 'bu ngubu gá 'yøthu. Pe nε n'dat'a gá 'yøthu u yu ziyate hyacahäi. 47 Pe ha guí emhbu xun ho guí øthu 'bu hønt'u ni cuhu guidí zenguahu. Nu'bu guin jahu bu, 'da'angu guí øthu u i thạnde yú oja zehe. 48 Pe nde'bu xun hotho gui 'yøthu, nguetho xun hotho Oja ma Tahu bí 'bupu mahɛts'i, bi 'yɛmp'u yú xädi ra Jesús.

Hin ga øthu ran 'yets'i 'bu dí øthu yun t'øt'e xun ho

Nε man'da bi man ra Jesús, bi 'yɛ̞mp'ʉ mi 'bʉpʉ:

—Pε nu'bu guí øthu rá 'bɛfi Oją, hin gui 'yøthu da 'yɛs'a ni mija'ihu, nguetho hin te di 'da ahu ma Tahu 'bupu mahɛts'i 'bu din jabu gui 'yøthu, bi 'yɛn'a. ²Nɛ nu'bu guín nde gui fäxhu n'da ra hyoya, hin gui 'yøthu ngue da nu ahu yu ja'i, tengu øt'u di yorpa a im bɛni 'bu di un'na n'da ran t'unni yu hyoya, ngue di um bu ja yu nija o guepu ja yu 'yu ngue in nde da 'yɛspa yu ja'i 'bɛ'a i øt'e. Majuani dí xi ahu, ya hønt'a ran 'yɛts'i bi daha 'bu ngubu i øt'e, bi 'yɛna. ³Pɛ nu'bu i ja a guí nde

gui unhdu n'da zi hyoya, nde'bu hin gui xihmbu u mi'da 'bɛ'a gá 'yøthu.

Nɛ man'da xun ho 'bu hin njon da nu 'bɛ'a guídí unhdu, pɛ go da nu Oja ma Tahu, nɛ i ja 'bɛ'a din 'da ahu buya, bi 'yɛn'a ra Jesús.

Hingui yoho guim bemhbu 'bu guí yahu Oja

⁵Nε man'da dí xi ahu:

—Nu'bu guí yạhu Oja, o guí øthu tengu i øt'u di yorpa a im bɛni, bi 'yɛn'a ra Jesús. Nu'u, i 'bäpu ja yu nija nɛpu ja yu xo'yu, ɛna i yahu Oja pɛ hønt'a ran 'yɛts'i im bɛni. Majuani dí xi ahu, hønt'a ran 'yɛts'i bi daha nangue 'bɛ'a i øt'e. 6Nɛ nu'bu guí yahu Oja gui mbähä bu njon da nu ahu, pɛ Oja ma Tahu go i nu ahu nɛ di 'da ahu 'bɛ'a guí äfu a, i ɛna.

⁷Pε hinga guexta'a ram hma gui mamhbu ngue nte ní mba tho 'bu guí yạhu Oją, tengu i øt'u tɛn yú oją zɛhɛ. Nɛ sä im bɛni i ø'a Oją 'bɛ'a im ma 'bu xun ngu i xifi. ⁸Nɛ o guí øthu tengu i øt'u, nguetho nu Oją ma Tahu ya i pądi 'bɛ'a gätho guí homhbu gue'bu hinga ná äfu, i ɛna. ⁹Pɛ guim bɛmhbu 'bu guí yạhu Oją 'da yum hma tengu dí xi ahu ngue:

Nuya ma Ta ahe guí 'bupu mahɛts'i.

Da hnumansu ni thuhu.

Ne dín ndehe din ja ua n'dihi ni ts'edi ngue di manda ua.
Ne da t'øt' ua ni pähä ua ja ra häi tengu tho i t'ørpu mahets'i.

¹¹ Nε dami 'daje ran ts'ihmε dí homhbe ra pa i jabu ya.

12 Dami punga ma ts'oquihe, tengu thoho bu na punbahe u i ørcahe ran ts'o.

NE o guí hegahe da daje ran ts'o, pe dami yanje nangue ran ts'o. Nguetho nu'i gra hmuts'ut'abi, gä di manda ua ja ra häi ni ts'edi, ne i ja ni ts'edi mixte njam'bu da guadi gätho yu pa mazai.

Nε hønt'a dí xi'ahe ya.

¹⁴Nguetho nu'bu gadi punbahu yú ts'oqui ni mija'ihu, ngutho da 'yøt'ahu Oja ma Tahu 'bupu mahɛts'i, di pun'na ni ts'oquihu.
¹⁵Pɛ nu'bu hin gadi punbahu ni mija'ihu, nɛ ahu hin di pun'nahu Oja ma Tahu 'bupu mahɛts'i 'bu, bi 'yɛn'a ra Jesús.

Hin gui 'yuhmbu 'bu guí et' yun ts'ihme 'bu guín yahu Oja

16—Nɛ nu'ahu, nu'bu guí nde gui 'yɛt' nin sihmɛhu n'da ora ngue guim bɛmhbu Oja, o guí øthu tengu øt'u di yorpa a im bɛni. Nu'u i ut yu ja'i 'bɛ'a øt'e, nde'a dí hnumanho, pɛ hønt'a ran 'yɛts'i bi daha nangue 'bɛ'a bi 'yøzɛhɛ, bi 'yɛn'a ra Jesús. 17 Pɛ nu ahu, 'bu guí ɛt' nin sihmɛhu ngue guím bɛmhbu Oja, pɛ gan 'yomanhohu tengu'bu ya gán sihmɛhu. 18 N'dahma njon da badi 'bɛ'a gá 'yøthu gue gá 'yɛt' nin sihmɛhu, nɛ hønt'a Oja ma Tahu i nu ahu 'bɛ'a gá 'yøthu, nɛ i ja 'bɛ'a di 'da ahu buya, bi 'yɛn'a ra Jesús.

Gui hyomhbu 'be'a dí necmanho bu mahets'i

¹⁹Νε man'da bi man ra Jesús, bi 'yɛ̞na:

SAN MATEO 6 12

—Hin gui muns'hu 'be'a gdám membetihu ua ja ra ximhäi, nguetho nuua i 'buh yu zu'uɛ ngue di ts'oni 'be'a gätho guí pes'hu, nε ja'bu da boxjua, nε ja'bu da bę ahu yu bę. 20 Pegue gui hyoni gui xanthu 'be'a dí hnumanho ahu bu mahɛts'i. Nguetho hin te dim 'bεpu, hin da yurpu yu bε ngue da bε ahu 'be'a guí pes'hu bu, ne hin da boxjua, ne njo'o bu yu zu'ue ngue di ts'oni. ²¹ Nguetho hønbu i ja ním pe'ts'i n'da im ben rá mbui n'da. Nu'bu guecua ja ra ximhäi i ja 'bɛ'a i pe'ts'a n'da, hønt'ua im ben a n'da, nε nu'bu guepu mahεts'i, guepu im ben a n'da 'bu, bi 'yen'a ra Jesús.

Ran nequi ní mbui n'da

22 Ne xø bi 'yena:

—Nɛ nu'bʉ hønt'a xʉn ho guím bɛmhbʉ nɛ guí øthʉ, din ja ahʉ tengutho 'bʉ n'da ra jạ'i xʉn ho rá dä, i handi xʉn ho ran nɛqui, din jabʉ ni mbʉihʉ. ²³Pɛ nu'bʉ hinga gue'a guím bɛmhbʉ, sä guí ɛmhbʉ i ja ahʉ ran nɛqui, pɛgue xʉm 'bɛxui thoho ni mbʉihʉ, tengutho 'bʉ n'da ra jạ'i ngue hingui ho rá dä, nɛ xʉm 'bɛxui thoho bʉ i handi, bi 'yɛn'a ra Jesús.

Hin di yoho yú hmu n'da

²⁴Nε xø bi 'yεna:

—Nɛ hingui sä dim 'bu i yoho yú hmu n'da ra 'yɛhɛ. Nguetho nu'bu yoho yú hmu i 'bu a n'da, nu'a n'da da numanho, nɛ nu'a man'da hin da numanho. Uague nu'a n'da da hyumbi dim pɛhmi a, pɛ nu'a man'da da zocpa thoho rá 'bɛfi a. Janangue'a hingui sä yoho yú hmu da dɛn'na n'da. Hingui sä da 'yɛmp

Oją rá Hmu 'bʉ i numanho ʉ yʉ mbɛti, nguetho tengu'bʉ rá hmu a ra mbɛti, bi 'yɛn'a ra Jesús.

Oją di jamansu yú 'yęc'yei

²⁵—Janangue'a dí xi ahu, hin go guim bɛnsɛhʉ 'bɛ'a gui sihʉ ngue gdám 'buhmbu, ne xín guim bemhbu 'be'a gui hyehu. Pe guim bemhbu ngue man'da di muui ni tehu xinda gue u nin ts'ihmehu, nε man'da di muui ni ja'ihu xinda gue u ni hehu, bi 'yɛn'a ra Jesús. ²⁶Dami nuhu yu doja i 'yo hønbu go hapu, ne hin'yu yú huahi, ne xín te i pe'ts'i, pe dí xi ahu, nu Oja ma Tahu bí 'bupu mahets'i gätho i 'uin ʉ. Nɛ nu ahʉ, man'da di mu ahu xinda gue u yu doja, bi 'yɛn'a ra Jesús. ²⁷Ne ha guím bemhbu man'da nya'a gam 'buhmbu ua ja ra ximhäi 'bu ɛmmɛ guím bendumbuihu 'be'a gätho guidí 'behmb#.

²⁸Ne hanja emme go guím bensehu nangue ni hehu. Xøgue ts'utho guí ɛc'yɛihʉ, bi 'yɛn'a ra Jesús. Pɛ dami nuhu yu døni i ja bu dapo, ne nu'u hingui dim pefi ne xíngui di hoc yú he. 29 Pε dí xi ahu, man'da mahotho yu døni xínda gue a rá he ra ts'ut'abi Salomón ngue mí he 'bu mi ja rá ts'ɛdi, bi 'yɛn'a ra Jesús. ³⁰Ne ngubu bi 'yøt'a Oja nangue yu døni, mahotho nám pa ya, nε nixudi da mba nts'equi ne da t'udi. Janangue'a guim bɛmhbu, man'da xun ho da 'yøt'ahu Oja xinda gue u yu døni, bi 'yɛn'a. 31 Janangue o guí ɛmhbʉ: "'Bɛ'a hmaha ga sihʉ." Uague: "'Bɛ'a hmaha ga hehʉ." 32 Nguetho nu'u i thạnde yú oją zehe, gue'a zai i hon'u, pe nu'ahu i

'bupu ni Tahu bu mahɛts'i, nɛ i padi 'bɛ'a gä guidí 'bɛhmbu, bi 'yɛn'a ra Jesús. 33 Janague'a nu ahu, m'bɛt'o thoho gan umhbu di manda ahu rá ts'ɛdi Oja, nɛ gui hyomhbu n'da ra hogambui nangue rá pähä Oja, nɛ nubuya di 'da ahu 'bɛ'a gätho gui hyomhbu. 34O guím bɛndumbuihu, o guí ɛmhbu: "'Bɛ'a da zä ga øthu 'bu nixudi." Pɛgue gui tømhbu, 'bɛ nixudi ja gui pahmbu buya 'bɛ'a da zä gui 'yøthu. N'da pa ngu n'da pa i ja 'bɛ'a din ja, bi 'yɛn'a ra Jesús.

Ra Jesús bi ma hingui ho ran yapi

—"Nuna bi 'yøt' yu ts'oqui," hin gui 'yemhbu, n'dahma hinga gue'a dí ts'ep'ahu a, bi 'yɛngähe ra Jesús. ²Pε nu'bʉ guídi yafu u mi'da ngue guím bemhbu hønse ahu xun ho ahu, pe Oja hin da numanho ahu 'bu. Ne 'da'ingu da 'yøt'ahu Oją tengu gá 'yørpahu u gá yafu, bi 'yɛna. ³Hanja bi zä gá nurpahu ra zi häi i o rá dä ni miją'ihu, ne hin go guí pąhmbu i o ra xecza ni dähu. In jabu ní negui ni ts'oquihu. ⁴Ne ha da zä gui xihmbu ni mija'ihu: "Mba ga hap'a ra häi o ni dä," sä gui 'yɛmfu, nɛ go man'da xun ndoho ra xecza i o ni dähu. ⁵Emme guidí yorpahu a guí øthu. Pe nde'bu m'bet'o gan hoju nangue yu ts'oqui guídi hosehu, janangue'a da zä gui hyamp'ahu ra häi o rá dä ni mija'ihu, bi 'yɛn'a ra Jesús.

⁶O guidí unhdu a xun ho u yu fo'yo, ndetho da za ahu. O gue'bu guidí unhdu a di muui u yu ts'udi, ndetho da nem bu häi, bi 'yen'a ra Jesús.

Nu'bu ja da t'äp'a Oją di uni

7Ne xø bi 'yemp'u:

—Dami 'yäfu Oja 'bɛ'a guí homhbu, nɛ nu'a di 'da ahu. ⁸Nguetho nu'a to'o da 'yädi, Oja di un'na bi 'yäpi. Nɛ nu'a to'o ja a i honi, di und Oja a i honi. Nɛ nu'a to'o da hyoni da socpa n'da ra goxthi njut'i thoho, Oja da xocpa a, bi 'yɛn'a ra Jesús.

9-11 Pɛ nu'ahu madague'bu gyú ts'om'bäihu, xínga n'da ahu guidí unhdu ra do ni t'uhnihu 'bu i ä'ahu ra hmɛ, nɛ xíng ra c'ɛya guidí unhdu 'bu i ä ahu ra hua, pɛ hønt'a xun ho guidí unhdu ni t'uhnihu. Ha maguet'a Oja ma Tahu 'bupu mahɛts'i ngue hin di 'da ahu xun ho 'bu ja a guí äfu, bi 'yɛn'a ra Jesús.

12 Nɛ nu'bu guí nde da 'yøt'ahu ran ho ni mija'ihu, nde'bu gui 'yørpahu ran ho. Gue'a nam bøn'a rán t'ɛdi ra Moisés nɛ rám hma yu pøngahya maya'bu, bi 'yɛn'a ra Jesús.

N'da ran t'uti nangue ra goxthi nε yʉ 'yu

¹³⁻¹⁴Νε man'da bi man ra Jesús, bi 'yεna:

—Nu'a ní yut'a n'da bu ja ra te mazai, tengu'bu n'da ra goxthi xun ts'it'i, uague n'da ra t'u'yu, nε hingui ngu yu ja'i i numanho da thopu. Pε dami hyomhbu gui cuthu bu. Nguetho nu'a ra goxthi xun ndoho nε ra da'yu ní zix a n'da bu ja ran unbi mazai, nε xun ngu u yu ja'i i numanho da thopu, bi 'yṣn'a ra Jesús.

Nda'a u yu hyäte pøngahyą

15—Pɛ gam fähmbu nangue yu hyäte pøngahyą. Nu'bu i søm bu guí 'buhmbu, sä øt'e tengu'bu yu dɛ'yo ngue xun ho, pɛ nu yú mbui tengu'bu n'da ra zate. 16 Nɛ da zä

gui pahmbu yu hyäte pøngahya nangue yún t'øt'e i øt'e, tengu thoho yu za da ba a n'da nangue yún dät'ä i zupu. Nguetho hin din zupu ja n'da ra za n'da ran dät'ä 'bu hinga gue'a rá za a. ¹⁷Pε nu ra za xun ho i zuh yún dät'ä xun ho, ne ngutho ra za hingui ho i zuh yún dät'ä hingui ho. 18 Nguetho nu'a ra za xun ho hin da zä din zupu yún dät'ä ngue hingui ho, ne ngutho a ra za hingui ho hin njam'bu da zä din zupu yún dät'ä xun ho. ¹⁹Nε nu yu za hingui ho u yún dät'ä, da mba nt'ets'i ne da t'udi. ²⁰ Janangue'a da zä gui pahmbu u yu hyäte pøngahya nangue 'bɛ'a da 'yøt'e, bi 'yɛn'a ra Jesús.

Nda'a u di manda rá ts'edi Oja

²¹Ne xø bi 'yen'a ra Jesús:

—Nε sä εna yú hmuju u 'da, pε hin da yurpu di manda rá ts'εdi Oją u. Pε hønt'u majuani i øt' rá pähä ma Ta mahɛts'i da yurpu u.

²²Nε nu'bu bi zøn ra pa ran juanbi 'bu rán zegui, xun ngu da mbarqui da 'yɛngui: "Ma Hmu, nugähe dá mamhbe a nim hma, nɛ nangue ni thuhu dá hømhbe thi yu zithu, nɛ nangue ni thuhu xun ngu yun t'øt'e mixte dá øthe," da 'yɛngui.

²³Pɛ nugä ga ɛmp'u: "Njam'bu dá pa ahu. Dami 'uehmbu ua ja ma hmigä, gyu ts'om'bäihu," ga ɛmbi, bi 'yɛn'a ra Jesús.

Hønt'a go to'o in nde da 'yø a dím ma, bi 'yɛ̞n'a ra Jesús

²⁴—Pe nu'a to'o i øh ma nde ne i øt'a ma pähägä, i øt'e tengu bi 'yøt'a n'da ran 'yohu ngue mí ja rán 'yomfeni ne bi hyø a n'da rá ngu bu ja n'da ra dongu xun juani. ²⁵Nɛ bin ja n'da ra da'ye, nɛ ɛmmɛ xun ngu yu dehe bi 'yugui, nɛ bá ɛh ran dahi xun ndoho mí nde xtí yøt'a ra ngu. Pɛ him bi yøt'a, nguetho nu'a ra ngu mí høpu ja ra dongu xun ho. ²⁶Pɛ nu'a to'o i ø'a dí ma nɛ hingui urpa ra güɛnda a, i øt'e tengu bi 'yøt'a n'da ran 'yohu ngue ra 'yambui, nɛ bi hyøh rá ngu bu mi ja n'da ra 'bomu. ²⁷Nɛ bin ja n'da ra da'ye ngue bi 'yuh yu dehe, nɛ ran dahi xun ndoho, nɛ bi yøt'a rá ngu. Nɛ ɛmmɛ nts'utho bin ja buya, bi 'yɛn'a ra Jesús.

Nu yu ja'i bi numanho rán xädi ra Jesús

²⁸⁻²⁹Nɛ nu'bʉ mi gua a bi ma ra Jesús 'bʉ mí hyupʉ ja ra nyuni, nu yʉ jạ'i mi huhmbʉ bʉ bi hyonya ʉ.

—Haguen ja i xänbi xun ho, ne hinga ngubu i xängahu ma xänbatehu bu ja ra niją, bi 'yɛ̞n'u yu ja̞li.

Nguetho nu'bu mi xänba ra Jesús, bi 'yuti ngue mi ja rá ts'ɛdi xun ho a.

Ra Jesús bi hoc'a n'da ran 'yohu mi hemb ra t'axca'ya

Nε nu'bu mi gua a bi man ra Jesús, nε bi gapu ja ra nyuni buya, nε εmmε xun ngu yu ja'i mí numanho da dɛnthoho mahøn'a.

Nε bá ε'a n'da ran 'yohu ngue mi hɛmb ra t'axca'ya. Bin danyahmu bu mí 'bäh ra Jesús, nε bi 'yɛmbi:

—Gra Hmu, nu'bʉ ni pähä, da zä gui 'uec'i ts'ʉ ran ʉ dí hɛ̞mbi.

³Nε nu ra Jesús bʉya bi uạt rá 'yε bi dädi nε bi 'yɛmbi:

—I jagä ra pähä ngue 'bex da zä i. Dami yáni. Nɛ nu'bʉ mí 'yɛmbi, 'bexgue bi yạn'a ran 'yohʉ. ⁴Nɛ nu ra Jesús bʉya bi hɛcpa a ran 'yohʉ njon da xifi to'o a bi japi bi yạni, nɛ bi 'yɛmbi:

—Ní mba bu 'buh yu mbäją da nu i ngue ya bi yan i, nɛ gui un'na n'da ra 'bøts'e tengu i man yún t'ɛdi ra Moisés, bi 'yɛn'a ra Jesús.

Ne ja bi thopu ra hnini Capernaum buya.

Ra Jesús bi hocpa rá 'yɛ̞hɛ n'da ra hmudofʉi

⁵Nε nu'bu mí zøm bu ra hnini Capernaum a ra Jesús, 'bex bá ε a n'da ra hmudofui ra mɛngu bu Roma, nɛ bin c'at'ui nɛ bi 'yäp ra mate, ⁶bi 'yɛ̞mbi:

—Nu'i grá Hmu, nu n'da ma 'yɛhɛ i 'bɛm bʉ ja ma ngu, i ts'a rá jạ'i, hingui sä di 'yạni, ɛmmɛ xʉn 'doni, bi 'yɛmbi.

⁷Nε nu ra Jesús bi 'yɛ̞mp'a:

—Ga mba bu ga hoqui.

8-9 Pε nu ra hmudofui buya bi 'yɛ̞mbi:

—Hingui jatho gui mba bu ja ma ngu, grá Hmu, nugä hin dí sucä tengu e nɛ hin drá judíogä. Pɛ dí pądi ngue i ja ni ts'ɛdi zɛhɛ, ngue nu'bu guim ma da yạni, nɛ 'bexgue da yạni, bi 'yɛna. Tengu thohogä bin 'dac'i ts'u man t'ɛdi, nɛ nu'bu i ja 'bɛ'a dí xi u ma dofui nɛ'u ma 'yɛhɛ, 'bexgue 'dahmantho in ja. Nɛ ngutho i, da zä guim mantho ua nɛ 'bexgue da yam buya, bi 'yɛn'a ra hmudofui.

¹⁰ Nu'bu mí 'yøh ra Jesús 'bε'a bi man a ra hmudofui, bi hyonya thoho nε bi xi u min 'yohu:

—Majuani dí xi ahu, njam'bu xtá tingä n'da ma menguhu yu

ją'i israel dyu judíohu ngue xtám bądi i ja ma ts'edi xun ho tengu na ran 'yohu, bi 'yɛn'a ra Jesús.

11 Guim bɛmhbu a dí xi ahu, xun ngu yu ją'i ngue gätho na ndoho ra ximhäi, ngue him ma mijudíohu, da 'yɛc'yɛigui nɛ da yurpu di manda rá ts'edi Oją, 'darbu dim 'buhmbu ma ngurpa bombøtahu ra Abraham, nɛ ra Isaac nɛ ra Jacob. 12 Pɛ xun ngu ma mijudíohu ngue yún sähu xtán yurpu, pɛ man'da go da t'entpu ja ra 'bɛxui u, nɛ din zom bu nɛ din guxpu yú ts'i, bi t'ɛmp'u yu jạ'i 'bu mi 'yɛn'a ra Jesús.

¹³Nɛ nubʉya bi t'ɛmp'a ra hmudofʉi:

—Ní mba ni ngu, ya bin ja a gám ma nguetho gá 'yɛ̞c'yɛi i ja ma ts'ɛdi, bi 'yɛ̞n'a ra Jesús.

Nε 'bexgue bi yan a rá 'yεhε buya.

Ra Jesús bi hocpa rá suto ra Pedro

¹⁴Nε nu'bʉ mí mbenc'a ra hmudofʉi bʉya, xø bi tho a ra Jesús, bi zøm bʉ rá ngu ra Pedro. Nε bi nu 'bɛm bʉ rá oi a rá suto ra Pedro, mi hɛmb ra pa. ¹⁵Nε nu ra Jesús bʉya bi bɛndba rá 'yɛ, nɛ 'bex bi bøn a ra pa mi hɛmbi. Nɛ bi ndanc'a ra xisu bʉya, bi hyonba ra hmɛ a ra Jesús nɛ ʉ mín 'yohʉ, nguetho ya bi yạn'a ra xisu bʉya.

Xun ngu yu hyenni bi hoc'a ra Jesús

16 Nɛ nu'bu min xui buya xun ngu yu ja'i bá ts'i bu mi 'buh ra Jesús ngue min 'yohu yu zithu. Nɛ hønt'a n'dare bi man ra Jesús, 'bexgue gätho bi hyøn a thi u yu zithu, nɛ bi hoc'u yu hyɛnni. 17 Gätho bin ja 'be'a bi man a ra pøngahya Isaías maya'bu ngue din ja 'bu mi 'yɛna:

"Da du zehe 'be'a gätho xun hei dín nuhu, ne da nuse 'be'a gä man u dí hemfu," bi 'yen'a ra Isaías 'bu maya'bu.

Yoho yun 'yohu gna da den'na ra Jesús

¹⁸Nε nu'bʉ mín nu ra Jesús ngue εmmε xʉn ngu yʉ jạ'i mi 'bäpʉ, bi 'yɛ̞mp'ʉ yʉ́ xädi:

—Masque xʉn ho 'bʉ ga thohmbʉ 'danguadi ra dądehe, bi 'yɛ̞na.

¹⁹Nɛ nu n'da ra xänbate niją bi 'yɛmbi:

—Xänbate i, dín nde ga tɛn'ni i hønbʉ go hapʉ gui mba, bi 'yɛ̞mp'a ra Jesús.

²⁰Nε bi dą a ra Jesús nε bi 'yεmbi:

—Pε nu yu haho i ja yú ngu nε yu doja i ja hapu da 'yoi. Pε nugä ngue dán ją'igä ua ja ra ximhäi, hin'yu ma ngungä ua, bi 'yɛmthoho ra Jesús.

²¹Νε xø bi 'yɛn'a man'da ra ją'i min 'yohʉ bʉya:

—Ma Hmu, dami tøcpi ts'ʉ, 'bɛ ga äcä ts'ʉ ma ta nɛ ga tɛn'na bʉya, bi 'yɛmbi.

²²Bi dą'a ra Jesús, bi 'yɛmbi:

—Tenga maha, nu'u xun du da 'yä u 'bupu, tengu'bu ne u xun du u, bi 'yena.

Ra Jesús bi säyaba ran dąhi nɛ ra t'øthe

²³Nε nu'bu mi gua'a man ra Jesús buya, 'bex bi hyu bu ja ra mbosa nε bi mbähä yú xädi, dí mba bu 'danguadi ra dądehe. ²⁴Nε bi mbu'a n'da ran dąhi ts'εdi bi 'yɛn ra dehe, nε εmmε di thoni yu t'øthe, bi dons i ts'u ra dehe a ra mbosa. Pε nu ra Jesús mí ąha, him bi 'yurpa ra

güɛnda 'bɛ'a midí ja ra dehe. ²⁵Nɛ bi 'yä ʉ yʉ́ xädi nɛ bi 'yɛ̞mbi:

—Gra Hmu, dami nuhu, guin yanje, nguetho ya in nde ga tonthu mbo ra dehe, bi 'yɛmbi.

²⁶Nε nu ra Jesús bi dadi:

—Hanja, ha ɛmmɛ zi ts'utho guí ɛc'yɛigahu ngue i ja ma ts'ɛdi, nɛ guín suhu.

Nε nubʉya bi ndanc'a ra Jesús nε bi xi a ran dahi ngue din hε nε ra dehe, nε 'bexgue bin hε bʉya. ²⁷Nε nu'ʉ yʉn 'yohʉ bʉya bi hyonya thoho 'bɛ'a bi 'yøt'a ra Jesús.

—'Bɛ'a di 'yɛt'ui na ran 'yohu, nguetho nɛ ran dạhi i ø'a i xifi, nɛ ra dehe i ø'a i xifi, bin 'yɛmzɛhɛ u.

Ra Jesús bi hoc'i yoho yun 'yohu min 'yohu yu zithu

²⁸Nɛ nubʉya bi zøm bʉ 'danguadi ra dądehe bʉya, nguepʉ ra xɛqui Gadara. Nɛ 'bex bá ɛ̞pʉ yoho yʉn 'yohʉ ngue min 'yohʉ yʉ zɨthu, nɛ mán ts'utho ʉ, tengutho ʉ yʉ zate. Mí 'bʉpʉ ja yʉn 'yägui ʉ, janangue'a nu yʉ jạ'i i su da thopʉ hänbʉ ja ran 'yägui. Nɛ 'bex bá ɛ̞'ʉ yʉn 'yohʉ bin c'athʉ a ra Jesús, nɛ bi mbafi:

²⁹—'Bɛ'a gní 'yɛ̞cua gra Jesús, rá Ts'unt'u i Oją. Ha cpí 'yɛ̞hɛ gui ungahe, nɛ hinga na søn ra pa gui ungahe, bi 'yɛ̞n yu zi̞thu min 'yohu u yun 'yohu.

³⁰Ne hinga yatho bu mi 'bu i 'da yu ts'udi. ³¹Ne nu'u yu zithu buya bi 'yemp'a ra Jesús:

—Nu'bu guín nde gui hyønje thi, dami 'daje ran t'ɛdi ga сuthe nu 'yo yu ts'udi, bi 'yɛn'u:

32—Ni mbähä, dami cuthu nu, bi 'yɛn'a ra Jesús.

Nε nu yu zithu buya bi bøm bu ja rá mbui u yun 'yohu, nε 'bexgue bi yurpu 'buh yu ts'udi. Ne nu yu ts'udi buya bin tihi ne bi gapu ja ra nguani, him bi zä bin säya, nin uɛm bu ja ra dehe, bim 'bερu. ³³Nε nu'u mi fä u yu ts'udi buya, 'bexgue bi mba n'dihi bu ja ra hnini, ne nu'bu mi zøm bu, bi mam buya ngue 'be'a bin ja nangue u yun 'yohu min 'yohu yu zithu, ne nangue u yu ts'udi. 34 Ne bá eh yu mengu bu ra hnini buya, bi zøpu 'bäh ra Jesús, ne nts'edi bi 'yäp ra mate ngue da mbengui, nguetho him bi numanho 'be'a bi 'yøt'a.

Ra Jesús bi hoc'a n'da ran 'yohu xí ts'a rá ją'i

Ne nu ra Jesús buya, xø bá hu mahøn'a ra mbosa, bá peng bu 'danguadi ra dądehe. Bi zøm bu ra hnini mi 'bui. ²Ne bá thunba bu man'da ra hyenni mahøn'a, ngue n'da ran 'yohu bá 'yox ra 'beza nguetho midí ts'a rá ją'i. Ne 'bexgue mí pa a ra Jesús mí ec'yei u ngue i jase rá ts'edi, janangue'a bi 'yemp'a ra hyenni:

—O te guím bɛni n'yø, nguetho ya dá pun'na ni ts'oqui, bi 'yɛn'a ra Jesús.

³Nɛ nu'ʉ 'da yʉ xänbate niją bʉya, nu'bʉ mi 'yøde 'bɛ'a bi man ra Jesús, 'bex bi bɛn ʉ:

—Nuna ran 'yohu hingui ho i øt' na, ha hinga hønt'a Oją sä di punba n'da, mi ɛ̞nsɛ u.

⁴Pε nu ra Jesús 'bex bi bądi 'bε'a mim bęn'ʉ yʉ xänbate niją, nε bi 'yɛmp'ʉ:

—Hingui ho guím bɛmhbu mbo ni mbuihu, ngue guí ɛmhbu hingui ho 'bɛ'a dá øt'ä, bi 'yɛna. 5-6 Ha guím bɛmhbu nte ní mbatho dá xicä ran 'yohu, ngue rá ts'oqui ya dá punbi. Ha guím bɛmhbu man'da xquí pahmbu i ja ma ts'ɛdi 'bu ga xifi da ndants'i, din 'yo. Pɛ nuya ga ut'ahu ngue i ja man t'ɛdigä ua ja ra häi ga punba yú ts'oqui yu ja'i, nugä ngue dán ja'igä ua ja ra ximhäi, bi 'yɛmp'u.

Ne xø bi 'yemp'a ran 'yohu i ts'a rá ja'i buya:

—Dami ndants'i, cax ni fidi, ní mba ni ngu, bi 'yɛmbi.

⁷'Bex bi ndanc'a ran 'yohu mi ts'a rá ją'i, bi mba rá ngu. ⁸Nε nu'bu mín nu yu ją'i 'bɛ'a bi 'yøt'a ra Jesús, bin su nɛ bi 'yɛ̞spa Oją nangue a n'da ra ją'i bin t'un'na ran t'ɛ̞di ngue di punba yú ts'oqui yu ją'i.

Ra Mateo bi den'na ra Jesús

⁹Nε nu'bʉ mi bøm bʉ ra Jesús, bi thopʉ mi hucä bʉ dí hạcä ra renta, drá hyącahäigä ngue drá Mateo, nɛ bi 'yɛ̞ngui:

—Dami tengui.

Ne nubuya dá ndangui ne dá tenni.

¹⁰Nɛ nubuya 'darbu dán sihmɛgähe ra Jesús yú xädigähe a ya. Nɛ bi zøm bu xun ngu yu ziyate hyacahäi nɛ yu ts'om'bäi, 'darbu dá huhmbe bu dán sihmɛhe. ¹¹Nɛ nu yu fariseo buya, ngue im bɛni hønsɛ xun ho, 'bu mi nu 'bɛ'a bi 'yøt'a ra Jesús, bi 'yängähe ngue yú xädigähe buya:

—Hanja in jabu ni xänbatehu 'darbu i sihmɛhu yu ziyate hyacahäi nɛ yu ts'om'bäi, bi 'yɛn'u.

¹²Nu'bʉ mí 'yø'a ra Jesús 'bɛ'a bi man ʉ, bi 'yɛmp'ʉ: SAN MATEO 9 18

—Hingui honi to'o da mbäx u im bense xun zaqui tengu ahu, pe hønt'u i pase xum bøca i honi to'o da mbäx u tengu ya i nde da dengui, bi 'yemp'u. 13 Ní mbähä bán xähmbu bu ja ni søcuahu 'be'a nam bøn'a rám hma Oja ngue i ɛna: "Pɛ nugä man'da dí numanho 'bu gui 'yøthu ran huşcate xinda gue u yu 'bøts'e guidí 'daju," i en Oja, i em bu ja vú søcua Oja, bi 'yɛn'a ra Jesús. Ne nugä him bá ecä gan zon'du im bense xun ho, pe bá ecä gan zon'du i padi hingui ho, janangue da zä di päh yún 'yomfeni, bi 'yen'a ra Jesús, bi 'yɛmp'u yu fariseo.

Ra Jesús bi ma nda'a ní pa da 'ye't' yún sihme yú xädi

¹⁴Νε n'da ra pa bʉya bi zøm bʉ 'bʉh ra Jesús yʉ́ xädi ra Xuua Nxixya, nε bi 'yänni:

—Hanja dí ε't'ähe man ts'ihmε, nε yu fariseo, pε nu ni xädi hingui ε't' yún ts'ihmε u, bi t'ɛ̞mp'a ra Jesús.

¹⁵Ra Jesús bi man'a n'da ran t'uti 'bʉ mi dądi, bi 'yɛ̞mbi:

—Pε nu'u i 'bupu ja ran thạti hin da du yú mbui, nguetho 'bupu a ran 'yohu din thạti. Pε da zøn ra ora da ts'ispa a ran 'yohu, nε ja da 'yɛ't' yún ts'ihmε buya, bi 'yɛn'a ra Jesús.

16Pɛ nu'a din xä u ma xädigä hin da bømanho 'bu nɛ'a ram hma maya'bu da dɛn ya, bi 'yɛna. Tengutho'bu n'da ra 'ya'bø't'e 'bu dí 'bø't'a ra 'bø't'e ma'da'yo, hin da bømanho, nɛ nu'a ra 'bø't'e ma'da'yo di ts'on a ra 'ya'bø't'e.

17Nɛ tengutho i øt' yu ja'i 'bu da xit' ra gui'uva ma'da'yo bu ja ra 'yambot'asɛi, da fø'a nɛ dim fäni.

Janangue i xit'a ra gui'uva ma'da'yo bu ja ra mbot'asçi ma'da'yo, nɛ hin da føgue nɛ hin dim fäni, bi 'yɛn'a ra Jesús, bi 'yɛmp'u yú xädi ra Xuua.

Ra Jesús bi xoxa n'da ra hmute xí du, nɛ bi hoc'a n'da ra xisu mi hɛ̞mb ra mbäji

¹⁸Nɛ nu'bu mí yahu u, 'bexgue bi zøm bu n'da ra ngurpi bu ja ra nija, nɛ bin danyahmu bu mí 'bäh ra Jesús nɛ bi 'yɛmbi:

—Bi du n'da ma t'įxu, 'yørqui ts'u ra mate ga mbε gui cäx ni 'yε, nε da dambεni.

19 'Bex bi mba a ra Jesús, bi den'na bi du rá t'thni. Ne gätho dá mbäcähe dyt xädigähe. 20 Ne nu'bt má mbähmbe bt 'yu, hin da ná sømhbe bt ja rá ngu a ra ngtrpi, bi ztje n'da ra xisu ngue ná 'de'mayo njeya min 'youi ra mbäji. Bi hyän bt rá xttha ra Jesús ne bi därpa rá nyani rá pahni. 21 Nguetho mí ense ra xisu: "Go høntho ga thärpa rá pahni, ya da yangui." 22 Ne nu'bt mi därpa rá pahni ra Jesús a ra xisu, 'bex bi nye a ra Jesús, bi nu a ra xisu ne bi 'yembi:

—Damin johya gra xisu, ya bi yan i nguetho gá 'yɛ̞c'yɛi i ja ma ts'ɛdi, bi 'yɛ̞mbi. 'Bexgue gue'a ra ora bi ya̞n'a ra xisu bʉya.

²³Nɛ bi tho a ra Jesús buya, dá søngähe bu rá ngun'a ra ngurpi, nɛ mí 'bupu yu mbɛ'bida nɛ xun ngu yu ja'i mi 'bupu ngue mí ɛna xtá 'yäh ra hmute xí du. ²⁴Nɛ bi 'yɛn'a ra Jesús:

—Dami pømhbu thi, nguetho nuna ra hmute him bi du, nε i ątho, bi 'yɛ̞mbi. Pɛ bin thetho u yu jali 'bu mi 'yø a bi xifi, nguetho mi pa u ya xí du ra hmute. ²⁵Nɛ nu'bu mi bøn'u yu jali buya, bi thopu mbo mi 'bɛn a ra hmute ra Jesús, nɛ bi bɛndba rá 'yɛ 'bex bi ndanc'a n'dihi ra hmute. ²⁶Nɛ gätho na ndoho ra xɛqui bu bi 'yø u yu jali 'bɛ'a bin ja.

Yoho yu xädä bi hoc'a ra Jesús

²⁷Nε bi bøm bʉ rá ngu ra ngʉrpi a ra Jesús. Nε bi dɛnni yoho yʉ xädä, nɛ i mba't' bʉ ní mba:

—Dami huggä'be, gram bom'bɛto i ra David, bi 'yɛmbi.

²⁸Nε bi zøm bʉ ja ra ngu a ra Jesús, bi dɛn'ndʉ yʉ xädä. Nu ra Jesús bi 'yänni:

- —Ha guí εc'yεiui i ja ma ts'εdigä ngue ga xoc'a ni däui, bi 'yεn a ra Jesús.
- —Dí εc'yεi'be ngue i ja ni ts'εdi, gra Hmu, bi 'yεn ʉ yʉ xädä.

²⁹Nu ra Jesús buya bi därpa yú dä nɛ bi 'yɛ̞mbi:

—Din ja tengu a gá 'yɛɛ'yɛiui, bi 'yɛ̞mbi.

³⁰Nε 'bex bi xo ʉ yʉ́ dä. Nε nu ra Jesús bʉya bi hεcpa ʉ yʉn 'yohʉ, bi 'yɛ̞mbi:

—Njon gui xihmi 'bε'a dá øt'aui.

31 Pε høntho bi bøm bu yu xädä,
'bex bi xih yu ją'i 'bε'a bi 'yørpa ra
Jesús.

Ra Jesús bi xocpa rá nde n'da ra gore

32 Nu'bu mi bøn u yu xädä, xø bá ts'inba man'da ran 'yohu a ra Jesús. Midí goreba n'da ra zithu min 'youi. 33 Nu ra Jesús buya bi hyønba thi ra zithu min 'youi a ra gore, 'bex bi nya a buya. Nu yu ja'i buya bi hyonya thoho 'bu mi nu a bin ja, nɛ bi 'yɛna:

—Hinjam'bu xtá nuhu ua ja ma häihu ra Israel tengu dí nuhu ya, bi 'yɛn u.

³⁴Pε nu u yu fariseo sä i εna:

—Nuna ran 'yohu i høn a thi yu zįthu nangue rán t'ɛdi bi un'na rá hmu yu zįthu, sä i ɛn u.

Bi hugc yu ją'i ra Jesús

³⁵Nε nu ra Jesús nzại mi pa bu ja yu hnini nε min xänbate bu ja yu niją, nε mim mam bu ran ho ma'da'yo ngue 'bɛpu ní manda rá ts'edi Oją. Nε midí hoqui hønt'a go man u mi hɛmb yu jạ'i. ³⁶Nε bi huɛc'u yu jạ'i a ra Jesús nguetho mi 'bui tengu'bu yu dɛ'yo 'bu njon midí jamansu, i 'yodumbui thoho. ³⁷⁻³⁸Nε bi 'yɛngähe ngue yú xädigähe:

—Majuani dí xi ahu, xun ngu yu ja'i i 'bui ngue di däp rá mbui Oja 'bu 'bo'o da xifi nangue'a, pɛ hingui ngu i 'bui ngue da xifi. Nde'bu gui 'yäfu Oja di un ra 'bɛfi mi'da da mbäx'a rá 'bɛfi. Tengu'bu i ja n'da ra huahi xu 'yot'i, nɛ hingui ngu yu mbɛfi, nɛ da 'yäp'a ra mɛhuahi mi'da yu mbɛfi 'dahma da xoc'a n'dihi, bi 'yɛn'a ra Jesús.

Nu ra Jesús bi zänni 'de'mayoho yú xädi

Ne nu ra Jesús buya bi zängahe dí 'de'mayoho gähe yú xädigähe, ne bi 'daje rán t'edi ga hømhbe thi yu zithu ne ga hoje 'be'a gä nín u i hemb yu ja'i.

²Nɛ nugähe 'dɛ'mayoho bi zängahe, m'bɛt'o ra Simón, gue'a ra Pedro, nɛ'a ra Andrés rán 'yohʉ a ra Pedro. Nɛ ra Jacobo nɛ a ra Xuua rán 'yohʉ a ra Jacobo, ngue gätho SAN MATEO 10 20

yoho yú ts'unt'u ra Zebedeo u. ³Nɛ ra Felipe, nɛ ra Bartolomé, nɛ ra Tomás, nɛcä dra Mateogä ngue min hạcahäigä, nɛ ra Jacobo rá ts'unt'u ra Alfeo, nɛ ra Lebeo ngue gue'a rá thuhu ra Tadeo; ⁴nɛ ra Simón t'ɛmbi ra cananista; nɛ ra Judas Iscariote, gue'a xí dä a ra Jesús. Nɛ guecähe 'dɛ'mayoho bi huangähe ra Jesús.

Bi mben'du yú xädi da mamp'a rám hma

⁵Nɛ nu'bʉ mí zängahe dí 'dɛ'ma yohogähe bi 'yɛ̞nje:

—Nuya hin gui mbähä bu i 'bu u him ma mijudíohu, dyu israelhu. Xínga guepu ra xequi Samaria gui mbähä. ⁶Pe nuya gui mbähä bu 'bu u ma menguhu yu israel. Nu'u i 'bui tengu yu dɛ'yo bi 'bɛh ra 'yu in nde xtán donspu ja ran date. ⁷Ne nubu hapu gui mbähä gui 'yemfu: "Damin umhbu ya ngue di manda ahu rá ts'edi Oją," bi 'yengähe ra Jesús. 8Gui hoju u i hemp'a ra t'axca'ya, ne hønt'a go man u i hemb yu ja'i, ne gui xoxhu u xøn du, ne gui hyømhbu thi yu zithu in 'yohu 'da yu ja'i. Ne nu'bu gui 'yøthu u, hin gui 'yäh nin zäbihu, nguetho hin dá pä ahu a ma ts'edigä, bi 'yengähe ra Jesús.

⁹Nɛ hin te ma mbɛti gui hyaxhu 'bu gá mbähä, bi 'yɛngähe. ¹⁰Nɛ xín ni tu'døza gui tuxhu, nɛ hønt'a ni he guí hehu nɛ hønt'a ni thixfani gui 'yuthu, nɛ hin'yu 'bɛ'a gui hyaxhu, nguetho nubu gui sømhbu i ja nin t'ɛdi ngue da zimanho ahu

¹¹Nε nu'bʉ gá sømhbʉ bʉ ja yʉ́ hnini ma mi israelhʉ gui 'yänhdʉ hapʉ 'bʉ a n'da ran 'yohʉ ngue

ra hocją'i ne nu'a gätho yu ją'i i numansu a. Ne guepu gam 'buhmbu bu, jague'bu gui thohmbu bu man'da ra hnini mahøn'a, bi 'yɛngähe ra Jesús. 12 Nu'bu gá sømhbu bu ja rá ngu, gui zenguahu, gui 'yäfʉ rán japi Oja nangue'a. 13 Ne nu'bu rán säui a da 'yøt'ahu u yu mengu bu hapu gui sømhbu, Oja di un rán japi gá 'yäfu buya. Pε nu'bu hin'na, tengutho 'bu nte gamí 'yäfu. 14 Ne nubu hapu gui sømhbu, nu'bu hin da zimanho ahu nε hingui nde da 'yømanho a guí xihmbu, dami pømhbu bu ne gui huaju yu bøhäi ni guahu. Nu'a nam bøn'a gui sohmbu bu u. ¹⁵Nɛ majuani dí xi ahu, nu yu mengu bu i ja n'da ra hnini hin da zimanho ahu, pe nu'bu bin ja ra pa ran juanbi, man'da emme xun u tho da nu, xinda gue'u mí 'bupu maya'bu bu ja ra hnini Sodoma ne ra hnini Gomorra, bi 'yɛnje a ra Jesús.

Yun unbi da nu yú xädi ra Jesús

¹⁶Nε xø bi 'yεna:

—Nuya hønbu go hapu ga pen'nahu, emme di un'nahu u 'bupu, tenguthoho yu zate di unba yu dε'yo. Damim fähmbu tengu yu c'εya nε gui 'yøthu tengu øt' yu t'azu, hønt'a ran ho gui 'yøthu. ¹⁷Ne gam fähmbu, nguetho nu yu ją'i di dä ahu bu 'buh yu ngurpi bu ja yu niją, nε da mbεp'ahu. 18 Nε da zix'ahu bu 'buh yu ze'mi ne yu ts'ut'abi, nguetho guí ec'yeigahu, pε hinga ndetho da zix ahu bu. Nguetho nu'bu da zix ahu bu, da zä gui xihmbu yu ze'mi ne yu ts'ut'abi nangue ma thuhugä, n'dahma ne u yu judío nε u i thande yú oja zehe

21 SAN MATEO 10

da 'yøde nanguecä. ¹⁹Nɛ nu'bu da ts'ix ahu bu 'buh yu ts'ut'abi, o guí hądumbuihu 'bɛ'a guim mamhbu o gue'bu da zä gan yahu uague hin'na, nguetho Oja di 'da ahu ran 'yomfɛni 'bɛ'a gui mamhbu 'bu bi mba ma juan'ni ahu. ²⁰Nguetho hinga guesɛ ahu gan yahu 'bu bi mba ma juan'ni ahu, pɛ gue'a rá Hogandahi Oja ma Tahu din ya, bi 'yɛngähe ra Jesús.

²¹Ne dim 'bu i 'da di däse yún 'yohu da mba ntho. Ne nu'u 'da di däse yú ts'unt'u bu 'buh ra ze'mi da tho. Ne dim 'bu i 'da yu ts'unt'u di yap zehe yú ta ngue da tho. Ne din jabu da t'ørpa u i ɛc'yɛigui, bi 'yɛn'a ra Jesús. ²²Nɛ gätho na ndoho ra ximhäi da ts'an ahu nangue guí tengahu, pe nu'bu gui hyäthu gue'bu go ran zegui, gui taha gan yamhbu buya, bi 'yɛn'a ra Jesús. ²³Nɛ nu'bu n'da ra hnini di uc'ahu, dami 'dahmbu bu, ne gui mbähä bu man'da ra hnini buya. Ne majuani dí xi ahu, hin gní täthu gätho yu hnini Israel gui xihmbu rám hma Oja ne gui 'dahmbu, 'bu bá pengä.

24-25 Nɛ tengu thoho n'da ra xädi hin da t'ɛmbi xun ho 'bu him bi t'ɛmbi xun ho rá xänbate; nɛ hin da hnumanho n'da ra 'yɛhɛ 'bu him bi hnumanho rá hmu. Nɛ din jabu da 'yøt'ahu, hin da numanho ahu yu ja'i, tengu thohogui him bi hnumanhogui, nɛ i t'ɛngui drá zithu, bi 'yɛn'a ra Jesús.

Ra Jesús bi ma hønt'a Oja da ts'u

²⁶—Janangue'a hin gui suhu 'bɛ'a da 'yøt'ahu yu ja'i, guehma gui mamhbu a dí xi ahu. Hin gui cømhbu a. ²⁷Nu'a dí xi ahu ua njonguin nu, dami mamhbu bu 'buh yu ja'i, nɛ nu'a dí xi ahu njongui øde, dami mbahmbu bu ja yu hnini, da t'øpu 'bɛ'a gätho dá xi ahu ya, bi 'yṣngähe ra Jesús. ²⁸Nɛ o guí suhu u in nde da hyo ahu, hin'yu yú ts'ɛdi nɛ'a ni mbuihu di juat'ahu. Man'da xun ho 'bu gui suhu a Oja, nɛ hønt'a i sä di un'na ni ja'ihu nɛ ni mbuihu bu ja ran unbi mazai, bi 'yṣngähe ra Jesús.

29-31 Janangue 'yo guí hadumbuhu, guim bambu yu doja i 'bä bu ja yu täi, hingui ngu di muui, pa nu'u xínga n'da da du 'bu hin rá pähä Oja da du. Janangue'a guim bambu, hin'yu 'ba'a din ja ahu 'bu hin rá pähä Oja din ja. Nguetho man'da di mu ahu bu na nu Oja xinda gue u yu doja, na i padi gätho nangue ahu. Janangue'a hin gan suhu, bi 'yangähe ra Jesús.

Da ma to'o ten ra Jesús

32—Nɛ gätho to'o da mam bu 'buh yu ja'i ngue i tɛngä, nɛcä gam ma bu 'buh ma Ta nubu mahɛts'i nangue u. 33 Pɛ nu'a to'o din cøm bu i 'buh yu ja'i nanguecä, nɛcä xin ga cøm bu bí 'buh ma Ta bu mahɛts'i, bi 'yɛngähe ra Jesús.

Ra Jesús bi ma da ts'u u to'o da denni

34—Nɛ hin guim bɛmhbu ngue bá ɛcä da zɛh yu sui, pɛ man'da din ja yu sui nanguecä. 35-36 Nu yu 'yɛc'yɛi da ts'upu ja rá ngusɛ, nu'bu hing yu 'yɛc'yɛi 'bupu. Nu yun 'yohu din suhmbu yú ta, nɛ nu yu xisu buya din suhmbu yú mbe nɛ u yú cä, nangue u hingui ɛc'yɛigui, bi 'yɛna.

³⁷Pɛ nu'bʉ n'da ra ją'i man'da im bɛn'a rá ta nɛ rá mbe xínda guecä,

hin ga ɛmbi ngue rá hmugui. Nɛ nu'bu n'da ra jạ'i man'da im bɛn'a rá ts'unt'u nɛ rá t'ixu xínda guecä, ngutho u hin da zä ga ɛmbi ngue rá hmugui, bi 'yɛn'a ra Jesús. ³⁸Pɛ nu'bu 'bo'o ɛna i tɛngui nɛ hingui hät' yun unbi da t'ørpe, nɛcä xín ga ɛmbi rá hmugui. ³⁹Nɛ nu'a to'o da zu da thacpa rá te nanguecä, da mba ma unbi bu ja ran date rá te a, pɛ nu to'o hin da zu da thacpa rá te nanguecä, hin da mba ma unbi bu ja ran date a, bi 'yɛngähe ra Jesús.

Ra Jesús i man yun t'unni

⁴⁰Νε xø bi 'yɛn'a ra Jesús:

—Nu'a to'o da zimanho ahu, necă xin bi zimanhogui, ne'a bá pengä xim bi zimanho a. 41 Ne nu'a to'o da zimanho n'da rá pøngahyą Oją nangue a ra 'befi i øt'e, 'da'angu ran ho din t'unui a ra pøngahyą. Ne nu'bu 'bo'o da zimanho n'da ra hocją'i nangue a ran hocją'i i øt'e, 'da'angu ran ho din t'unui a. 42 Ne nu'bu n'da ra ją'i i ja 'be'a di un'na n'da ma xädigä ngue'a i tengui, madague'bu hønt'i ts'u ra dehe di unni, pe ne a i ja 'be'a din t'unni ngue man'da xun ho, bi 'yɛn'a ra Jesús.

Ra Xuua Nxixyą bi manda dí änni to'o a ra Jesús

Nu'bu mi gua a man ra Jesús buya, bi mbɛngähe dí 'dɛ'mayohogähe. Nɛ n'danni bi mbasɛ ra Jesús buya. Bi mba bin xänbate bu mi'da yu hnini bu ra häi Galilea.

²Nε mi ofädi ra Xuua Nxixyą, nε bi sifi 'bɛ'a gätho bi 'yøt'a ra Cristo, janangue'a bi mbɛn'ndʉ yoho yʉ́ xädi a ra Xuua. Nɛ nu'bʉ mi zøm bʉ 'bʉh ra Jesús, ³bi 'yänni:

—Ha gue'e gra Cristo, gra Thahni i Oją, ngue mi hma ba εhε, uague ga thoqui ga tømhbu, bi 'yɛ̞n'u yú xädi ra Xuua.

4-5 Nu ra Jesús buya bi 'yɛ̞mp'u yú xädi ra Xuua:

—Ni mbɛ bu, gui xihmi a ra Xuua 'bɛ'a gätho guí øhmi, bi 'yɛmbi. Dami xihmi 'bɛ'a guín nuui, ngue nu yu xädä bin zø yú dä ya, nɛ'u yu dogua i 'yo, nɛ'u mi hɛmb ra t'axca'ya ya bi yan u, nɛ'u yu gogu ya i øhnahya ya, nɛ'u 'da xøn du i pa nsots'i, nɛ yu hyoya i si a ram hma ngue 'bɛpu dím pø u. 6 Majapi u to'o hin di u't' yú mbui nanguecä, bi 'yɛn'a ra Jesús 'bu mi 'yɛmp'u yú xädi ra Xuua.

⁷Nɛ nu'bʉ mi mbenc'ʉ yʉ́ xädi ra Xuua, nu ra Jesús bi xih yʉ jạ'i 'bɛ'a øt' ra Xuua, nɛ bi 'yɛmbi:

—'Bɛ'a guí mbähä guin nuhu bu ja ra dąpo 'bu mi 'bupu ra Xuua. Ha gá mbähä gbá nuhu n'da tengu ra xithi i ɛn ran dąhi. ⁸Uague gá mbähä gbá nuhu n'da ran 'yohu mahotho rá he mí he. Pɛ guí pahmbu to'o mahotho yú he i 'bupu ja yu ngunts'ut'abi u. ⁹Uague gá mbähä gbá nuhu n'da rá pøngahyą Oja. Majuani ngue gán nuhu n'da rá pøngahyą Oja, nɛ nu'a, man'da xun hɛts'i rá ts'ɛdi a xínda gue'u gä mi'da yu pøngahya. ¹⁰Nguetho gue'a ra Xuua a mí hmam bu ja rám hman Oja maya'bu 'bu mí 'yɛna:

M'bεt'o ga pεhna n'da ran 'yohu ngue mam 'bεhni da xih yu ją'i ngue da døp'e'e xun ho, bi 'yεn Oją, bi 'yεn'a ra Jesús. 23 SAN MATEO 11

11 Majuani dí xi ahu, njon mí 'buh man'da ran 'yohu man'da xun hɛts'i nangue a rá 'bɛfi bin t'unni xínda gue a ra Xuua. Pɛ hønt'a go to'o din uni ngue di manda rá ts'ɛdi Oja, madague'a hingui hɛts'i rá 'bɛfi din t'unni, pɛ man'da xtán hɛts'i bu dí nɛqui, xinda guepu ni nɛqui a ra Xuua ya, bi 'yɛna.

12 Asta gue'bu mi dump' rá 'bɛfi ra Xuua nɛ guehya, i honi da yurpu di manda rá ts'ɛdi Oją yu ją'i. Nɛ nu'u i humbi i honi, da dąha da yurpu, bi 'yɛn'a ra Jesús. 13 Nɛ gue'a bi man u yu pøngahya maya'bu u bin ja, nɛ mí ɛm bu ja yún t'ɛdi Oja, nɛ gue'u mí man u 'bu hín nim 'buh ra Xuua. 14 Nɛ nu'bu guí ɛc'yɛi a dí xi ahu, gui pahmbu ngue tengu'bu da gue a ra Elías a ra Xuua, ngue gue'a ra Elías guí tømhbu ngue mí 'buh maya'bu. 15 Nɛ nu'bu 'bo'o i ja rá zagu di jamansu a dím mangä ya, bi 'yɛn'a ra Jesús.

¹⁶Ga xi ahu 'bε'a guí øthu ya, ngue nte guí urpahu ra güenda. Guí øthu tengu i øt' yu t'uhni 'bu in eni. Din suse u, ne i xih yú mit'uhnihu: ¹⁷"Dá pixt' mam 'bixt'i pɛ hin gá 'yurpahu ra güenda, ne hin gán nεhmbu," i εn'u 'da. "Pε nugähe dá pe'be n'da ra 'bei ngue tengu'bu xøn du n'da, pe nte gá bemhbu ne hin gán zomhbu, " i ɛn'u mi'da yu t'uhni. ¹⁸Ne ngutho guí øthu, hin gá 'yurpahu ra güenda a ra Xuua, ngue him mi ho yun sihme ne him bi zi ra vino, pe gá 'yemdahu in 'youi ra zithu. 19 Pe nugä, dán ja'igä ua ja ra ximhäi, xun ho man ts'ihme 'bu n'dandi ne ma ts'ithegä, pε xínga guecä guí urcahu ra güenda. Pe guí xiju yu fehni, guí

ɛnju: "Nuna ran 'yohu ran zäthu nɛ ra mihni na, nɛ yú amigo yu ts'om'bäi nɛ yu ziyate hyacahäi," guí ɛnju. Pɛ Oja i padi 'bɛ'a xun ho da 'yot'e ngue bi zänga'be, bi 'yɛn a ra Jesús.

N'da ram hma nangue ran unbi da nu yu ja'i him bi päh yú mbui

²⁰Nε man'da ram hma bi man ra Jesús nangue yu hnini bu bi 'yøt'e xun ngu yún t'øt'e mixte. Nguetho nu yu ja'i bu, njam'bu bi nde bi päh yú mbui, madague'a bi nu yún t'øt'e mixte. Nε bi 'yɛn'a ra Jesús:

²¹—Hughi maha ahu gyu menguhu bu ra hnini Corazín nε ra hnini Betsaida, nguetho nu'bu xcá øt'ä yun t'øt'e xcá ut'ahu bu ja ra hnini Tiro nε ra hnini Sidón, xtán du yú mbui nangue ran ts'o mí øt'u ne xtí päh yú mbui u. 22 Janangue'a nu'bu bi zøn ra pa din ja ran juanbi, man'da xun u tho ran unbi gui nuhu xinda gue u 'bupu Tiro nερu Sidón, bi 'yɛ̞mbi. ²³Ngutho ahu gyu menguhu ra hnini Capernaum. Masque guí ɛmhbʉ man'da xʉn hɛts'i rá ts'edi ni hninihu xínda gue u mi'da. Pegue hin'na, guehma da mba ma juadi ahu. Nguetho nu'bu xcá øt'ä yun t'øt'e mixte bu ra hnini Sodoma tengu dá ørpu ja ni hninihu, hin xtán guadi nangue ra sibi, nguetho xtím päh yún 'yomfeni yu mengu bu, ne guexta'a di jat'a ra hnini ya. ²⁴Pe guehma majuani dí xi ahu, 'bu bin ja ran juanbi, man'da xun u tho ran unbi gui nuhu, xínda gue a da nu yu mengu bu ra hnini Sodoma, bi 'yɛn'a ra Jesús.

Ra Jesús i hurpa rá mbui n'da

²⁵Νε nubuya nu ra Jesús bin yąui Oją nε bi 'yεna: —Ma Ta i, gra Hmu mahɛts'i, nɛ gra Hmu ua ja ra häi, jamadi ya ngue gá japi him bi bạ'a ram hma nangue ni ts'ɛdi u im bɛnsɛ ja yún 'yomfɛnisɛ, pɛ gá japi bi badi nangue'e u i hon'a'i, tengu yu t'uhni ngue hin te i padi. ²⁶Nɛ gue'a gá 'yøt'e ma Ta i, ngue gue'a gá numanhosɛ guí øt'e, bi 'yɛn'a ra Jesús 'bu min yaui Oja rá Ta.

²⁷Ne xø bi 'yemp'u yu ja'i buya: —Gätho 'bε'a i ja, bi 'dacä ma Ta. Nε njon da baqui xun ho, hinda hønt'a ma Ta i pąqui. Nε njon da badi xun ho ma Ta, hinda høngdä ngue rá Ts'unt'ugui dí pacä a, ne u ngue ma pähä ga japi da bądi, bi 'yɛn'a ra Jesús. ²⁸⁻³⁰Nε nu'bu gá yähmbu ne gán xømbuihu nangue 'bε'a gätho guí øthu, ba εhmbu gui tengahu, ne nugä ga hut'a ni mbuihu. Ne nu'a ra 'befi dí 'da ahu hingui hại a, tengu'bu dí huthu ran thuyą dín hyanbahu ya. Ne nugä dí sεt ma mbui nε hin'yu ran 'yεts'i ma mbui, ne ga xän'nahu ngue njabu gui 'yøthu, ne ga hut'a ni mbuihu, bi 'yɛn'a ra Jesús.

Ra Jesús bi 'yuti nda'a man'da xun ho xtá 'yøt'u yu fariseo

Nε nu'a n'da ra pa mi 'yo a ra Jesús bu ja yu huahi.
Nεcähe dá mbähmbe yú xädigähe a, 'bu ra pa ran ts'äya. Dá ndehmehe ne dá tuje 'da yu trigo. Dá tent' ma 'yehe u yu trigo ne dá sahe. ²Nu yu fariseo bi nu 'be'a dá øthe ne bi 'yemp'a ra Jesús:

—Nu ni xädi bi 'yøt'a hin xtá 'yøt'e, nguetho bi 'yøt'a n'da ra 'bɛfi ra pa ran ts'äya, 'bʉ mi dʉc yʉ trigo.

³Ne bi da'a ra Jesús, bi 'yembi: —Ha hin gán nuhu bu ja ni søcuahu, ngue nε a ra David bi mbesta a rán t'edi Oja 'bu mi mbähä u 'da, ne bin tumanthuhu, má hin'yu 'be'a da zi u. ⁴Janangue'a bi yʉrpʉ ja rá ngu Oją, bi zi u yu 'bøxthuhme him mi sä da zi u, pe hønt'u yu mbäją mi si u. Pe hin guí ɛmhbu bi 'yøt' ra ts'oqui ra David, bi 'yɛn'a ra Jesús. ⁵Uague hin guím bemhbu 'be'a mam bu ja rán t'edi ra Moisés nangue yu mbäją 'bupu ja ra niją, ngue ne'bu ra pa ran ts'äya i øt' yú 'bɛfi. Pɛ hing ra ts'oqui a i øt'e, nguetho guepu ja ra nija dim pefi. ⁶Ne nugä dí xi ahu, man'da xun hets'i ma ts'edigä xínda gue ra niją, hanja guí ɛmhbu bi 'yøt' ra ts'oqui ma xädigä, bi 'yɛmbi. ⁷Pɛ nu ahʉ hin guí pahmbu 'be'a nam bøn'a im ma bu ja rám hman Oja ngue i ɛna: "Nugä man'da dí nde din ja nin hugcatehu, xinda gue gui hyohu yu zu'uş ngue gui pøscahu," i en Oją, bi 'yen'a ra Jesús. Nu'bu xquí pahmbu 'be'a nam bøn'a, hin xcami yafu u hin'yu yú ts'oqui, bi 'yɛn'a ra Jesús. ⁸Nɛ nugä guecä dán ją'igä ua ja ra ximhäi, drá hmu, ne i ja man t'edi ga mangä 'bɛ'a da 'yøt' yʉ ja'i ra pa ran ts'äya, bi 'yɛmbi.

N'da ran'yohʉ ra mbεdi rá 'yε bi hoc'a ra Jesús

⁹Nε bi thoh pʉya nε bi yʉrpʉ ja ra niją. ¹⁰Nε nu yʉ́n sʉihʉ a ra Jesús mi nde xtán dinba n'da ra ts'oqui ngue mi sä xtí yąpi, nε bi t'ɛmp'a ra Jesús:

—Ha da zä da mba ma hoqui a ra pa ran ts'äya n'da ra hyɛnni, uague hin'na, bi 'yɛn'ʉ. Nguetho mí 'bʉpʉ n'da ran 'yohʉ ngue ra mbɛdi rá 'yɛ. ¹¹Nɛ bi da'a ra Jesús:

—Ha i 'bʉ a n'da ahʉ ngue nu'bʉ ni dɛ'yohʉ da däpʉ ja ra hyahäi gue'bʉ ra pa ran ts'äya, ha hin gui jʉxhʉ. ¹² Ha má guet'a n'da ra ja'i ngue hin da zä da t'ørpa ran ho 'bʉ ra pa ran ts'äya. Nɛ nu'a, man'da di muui xinda gue yʉ dɛ'yo, bi 'yɛ̞n'a ra Jesús.

13 Nɛ nubuya, bi 'yɛn'a ra Jesús:
—Dami juan ni 'yɛ, bi t'ɛmp'a ran 'yohu.

Ne bi juạn buya. Ne 'bex bi gohi xun ho tengu man'da rá 'ye xun ho. ¹⁴Ne nu yu fariseo emme bin cue buya. Bi bøm bu ja ra nija, bi nyase u 'be'a dí zä da hyo ra Jesús.

Maya'bʉ bi hma 'bε'a bi 'yøt'a ra Jesús

¹⁵Nε nu'bʉ mi bɛn'a ra Jesús 'bɛ'a mi nde xtá 'yørpa ʉ yʉ fariseo, bi bøm bʉ bʉya, bi mba n'danni, nɛ ɛmmɛ xʉn ngu yʉ jạ'i bi numanho da dɛnthoho. Nɛ gätho midín hyɛnni bi hoc'a ra Jesús. ¹⁶Nɛ bi xi ʉ njon da xifi to'o a bi hoqui. ¹⁷Nɛ nu'a bi 'yøt'a ra Jesús ngue njon bi ndepe da xifi, bin thɛui a mi hma maya'bʉ 'bʉ mi 'yɛn'a ra pøngahya Isaías:

Nuna guehna ma 'yɛhɛgä dá huahni ngue ɛmmɛ didí huɛcä nɛ i hurca ma mbui, ga un ma Hogandahi ngue da xi u i thande yú oja zɛhɛ, nangue ran juanbi ga øt'ä 'bu ran zɛgui ra pa.
Nɛ hin din sute a nɛ xín dim

mbatho, ne hingan ts'edi din

ya hapu din 'yo.

Nε nu'u in ja tengu'bu ra xithi bi domp' ran dahi, da xots'i mahøn'a.

Ngutho u in ja tengu n'da ra sibi mi ts'utho da huɛzɛhɛ, di japi ngue da dɛ xun ho mahøn'a, asta gue'bu bi zøni dim hmu xun ho ua ja ra ximhäi, nɛ din jabu da 'yøt'e.

Nɛ gätho yu ja'i 'dahma 'dan'yo bu na ya da dømp' ran ho da 'yørpa u, i en Oja, bi 'yen'a ra Isaías maya'bu.

Gue'a bi ma nangue ra Cristo rá Thahni Oja.

Bi t'ɛmbi n'youi rá ts'ɛdi ra zithu a ra Jesús

²²Nɛ n'da ran 'yohʉ min 'youi ra zithu nɛ mi xädä nɛ mi gore, bi ts'ixpʉ 'bʉ a ra Jesús, ngue di hoqui. Nɛ 'bexgue bin zø yʉ́ dä, nɛ bi nyą bʉya. ²³Nu'ʉ gätho bi nu 'bɛ'a bi 'yøt'e bi hyonya thoho ʉ, nɛ bi 'yɛna:

—Masque guehna mi man u yu pøngahyą, ngue rám bom'bεto ra David, ngue rá Thahni Oją, bi 'yɛn'u yu ją'i.

²⁴Nε nu yʉ fariseo 'bʉ mi 'yøde 'bɛ'a i man yʉ ją'i, bin cuε ʉ, bi 'yɛ̞na:

—Nuna ran 'yohu na i høn a thi yu zithu nguetho in 'youi rá ts'ɛdi a yú hmu, sä ɛn'u.

²⁵⁻²⁶Nε 'bex bi ba'a ra Jesús 'be'a mim bɛn'ʉ yʉ fariseo nɛ bi 'yɛmp'ʉ:

—Pε him majuani guí mamhbu, nguetho nu ra zithu hin da zä din susehu yúm fäts'ihu. Nu'bu din suse din juase yú ts'edi u 'bu, tenguthoho 'bu n'da ra ts'ut'abi din heque nε din tunhdu u yúm SAN MATEO 12 26

fäts'ihu, di 'bɛsɛ yú ts'ɛdi 'bu. Nɛ ngutho n'da ra hnini o gue n'da ra ngu 'bu din heque, pɛ gä dim 'bɛ u. ²⁷Nu'ahu guí ɛmhbu dín 'yo'be rá ts'ɛdi ra zi̞thu, janangue'a i sä dí høn a thi yu zi̞thu, sä guí ɛmhbu. Pɛ xi'bu da gue'a dí øt'ä, ha in jabu u guí xänbahu 'bu i høn a thi yu zi̞thu u. Nɛ guesɛ u i ut'ahu ngue him majuạni a guí mamhbu, bi 'yɛn'a ra Jesús. ²⁸Pɛgue rá Hogandahi Oja dá høn a thi yu zi̞thu nɛ dá ut'ahu ngue ya di manda rá ts'ɛdi Oja ua guí 'buhmbu, bi 'yɛmp'u.

²⁹Nɛ tenguthoho n'da ran 'yohu 'bu i 'bupu ja rá ngu, hin njongui sä da yurpu 'bu hinga m'bɛt'o da mba nthurpi yú 'yɛ, nɛ nuya sä da yurpu nɛ da hyaspi 'bɛ'a gätho i ja bu. Dín jagä bu, him mí sä xcá mispa yu zithu 'bu hin xcá tapä u yú hmu, bi 'yɛn'a ra Jesús.

30 Nε nu'a to'o hingui numansugui, man sui'be a. Nε nu'a to'o hingui øt' ma 'bɛfi i di japi dim 'bɛ u mi'da, bi 'yɛn'a ra Jesús.

31 Janangue'a dí xi ahu, hønt'a go má ts'oqui nɛ hønt'a go má ts'ore da man a n'da, i sä da mba ma punbi, pɛ nu'bu i man ra ts'ore nangue rá Hogandahi Oja n'da, ya hin da zä da mba ma punbi n'da 'bu. 32 Pɛ dí xi ahu, nu'bu 'bo'o da man ra ts'ore nanguecä, dán ja'igä ua ja ra ximhäi, pɛ i sä da mba ma punbi a. Pɛ nu'a da man ra ts'ore nangue rá Hogandahi Oja, pɛ hin jam'bu da mba ma punbi a, bi 'yɛn'a ra Jesús.

Ra Jesús bi ma 'da'anguui a rá mbui n'da a rán t'øt'e n'da

³³—Pε nu'bʉ xʉn ho ran t'øt'e ngue dá høn a thi ʉ yʉ zithu,

nde'bu gui numanhoju 'bu, nguetho gui 'yɛmfʉ xʉn ho ra za gue'bʉ xun ho rán dät'ä. Pɛ nu'bu hingui ho yun dät'ä gui 'yemfu hingui ho ra za 'bu. Nguetho nu yún dät'ä i zupu da ba a n'da nda'a ní za a, bi 'yɛn'a ra Jesús. 34 Nu ahu, tengu'bu yú meni ahu yu pozu. Hague dán zä gui mamhbu n'da ra nde xun ho 'bu xun ts'otho ahu. Nguetho nu'a i yupu rá mbui n'da, gue'a i pøn rá nde n'da, bi t'ɛmp'ʉ yʉ fariseo. ³⁵Nu'a ran 'yohu i yuh ran ho rá mbui, hønt'a xun ho im ma, ρε nu'a ran 'yohu xun ts'o, hønt'a im ma, nguetho xun yuh ran ts'o rá mbui. 36 Νε dí xi ahu ngue nu'a ra pa din ja ran juanbi, gätho yu ja'i da mba ma juanbi nangue a him bin 'yomfeni 'be'a í mba a bi man u. ³⁷Ne nangue yum hma gá mamhbu dí ts'än'nahu ran unbi 'da ahu ne dí mba ma thøgue 'da ahu, bi 'yɛn'a ra Jesús.

Ra Jesús nte ma hmepya bi 'yu 'bu mi t'äp yu hmepya

³⁸Nɛ nubʉya, bi t'ɛmp'a ra Jesús, bi 'yɛmp'ʉ 'da ma ngʉrpihe yʉ fariseo nɛ yʉ xänbate niją:

—Gra xänbate, dami 'yurcahe n'da ra hmɛpya ngue'bʉ majuani Oja bi 'da'a ni ts'ɛdi.

³⁹Bi da'a ra Jesús:

—Nu'u xø 'uegue nangue Oją nε xun ts'o yú mbui, gue'u i äh yu hmεpya u. Pε hin da t'ut yu hmεpya u, pε hønt'a n'da ra hmεpya da t'uti, tengu bi 'yøt'a ra Jonás. ⁴⁰Ngue tengu thoho ra Jonás, hyu pa nε hyu xui bi 'yo bu mbo rá foho n'da ra dąhuą, nε ngutho din jacä guecä dán ja'igä ua ja ra ximhäi, hyupa

nε hyu xui ga o bu 'bu u xun du, bi 'yɛn'a ra Jesús 'bu mi 'yɛmp'u. 41 Nɛ dí xi ahu, nu'u mí 'bupu ra dahnini Nínive 'darbu gam 'bähmbu u 'bu bin ja ran juanbi 'bu ran zegui, nε da 'yut'ahu i ja ni ts'oquihu. Nguetho nu'u 'bex bi päh yú mbui 'bu mí 'yø a bi man a ra Jonás, pe nu ahu xø hin guín nde gui päh ni mbuihu nangue'a dí mangä. Νε nugä, man'da xun hets'i ma ts'edi xinda gue ra Jonás, bi 'yɛn'a ra Jesús. 42 Ne'a ra xisu min ts'ut'abi bu Sur, 'darbu gam 'bähmbu a 'bu bin ja ran juanbi 'bu ran zegui. Ne da 'yut'ahu ngue i ja ni ts'oquihu. Nguetho nu'a yatho bá ehe ngue mi nde da 'yø a 'bɛ'a bi man a ra ts'ut'abi Salomón nangue ran 'yomfeni bi un Oją, pe nu'ahu hin guí nde gui 'yøhmbu a dím mangä. Pe nugä man'da i ja rá ts'edi mam hmangä xinda gue ra Salomón, bi 'yɛmp'u yu fariseo a ra Jesús.

Nu rá mbui n'da da yut' ra zįthu mahøn'a 'bu hin da ben Oją

⁴³—Pε nu'a ran ts'o guidí hohu, din ja ahu tengu bi 'yøt'a n'da ra ja'i min 'youi n'da ra zithu. Nε bi bøn a ra zįthu, bin 'yo bu ja ra 'yonhäi, mí honi hapu din säya pe him bi dini hapu din säya. Nε bi mbeng bu ja rá mbui ra ja'i bu bá nets'i. 44" Man'da xun ho 'bu ga peng bu bá nets'i," bi 'yense a ra zithu. Ne nu'bu mi mbeng buya, bi zøm bu ja rá mbui a ra ja'i mahøn'a, nε bi nu tengu'bu n'da ra ngu ngue mán jogui bu rá mbui, ne njom mí 'bupu nguetho him bin zam bu rám hman Oją. 45 Nε xø bi mba buya bá si mí yoto yú minzithuhu ngue

man'da ɛmmɛ xun ts'o i øt'e, nɛ bi yurpu, bin säya bu rá mbui a ra ją'i. Nɛ man'da ɛmmɛ xun ts'o bi 'yøt'a ra ją'i buya. Nɛ gan jahu bu, bi 'yɛmp'u yu ją'i a ra Jesús.

Nda'a u i din cuhu ra Jesús

⁴⁶Nε nu ra Jesús mi yąhu yu ją'i 'bu mi zøm bu a rá mbe nε yún 'yohu. Bi zøm bu ja ra ngu mí 'bui. Pε him bi yurpu, bim 'bätho bu thi, mi nde xtín yaui a rá ts'unt'u. ⁴⁷Nε nu'u 'da buya bi xi a ra Jesús:

—I 'bäcua thi ni mbe nε nin 'yohu, nε in nde gan yąhu 'na, bi t'ɛmp'a ra Jesús.

⁴⁸Nε bi da a ra Jesús:

—Ga xi ahʉ to'o a ma mbe nε to'o u man 'yohu.

⁴⁹Nε bi 'yut'ʉ yʉ́ xädi bʉya:

—I 'bucua ya ma mbe nε ma cu, bi 'yɛna. ⁵⁰Nguetho hønt'a go to'o i øt' rá pähä ma Ta bí 'bupu mahɛts'i, gue u man 'yohu u, nε gue'u man ju u, nε gue'u ma mbe u, bi 'yɛn'a ra Jesús.

Rán t'uti ra mbomhmudä

13 Nε nubuya bi bøn'a ra Jesús bu ja ra ngu mí 'bui, nε bi mba nín hupu ja ra ndendeją.

2 Nε εmmε bim pεti bu yu ją'i, janangue'a nu ra Jesús bi ndexpu ja n'da ra mbosa nε bi hyu bu. Pε hingui 'yo a ra mbosa, bá copu ndenthe. 3 Nε bi xänba u yu ją'i, bi xi i 'da yun t'uti. Nε nu'a n'da ran t'uti bi mam bu, bi 'yṣna:

—N'da ra mbomhmudä bi mba bu huahi. ⁴Nɛ nu'bu mi mbon yu hmudä, nu'u 'da bi zo bu ja ra 'yu, nɛ bá ɛh yu doja bi za u. ⁵Nɛ nu mi'da yu hmudä bi zo bu ja yu SAN MATEO 13 28

'bodo, 'bexgue bi bøts'e nguetho hingui pidi ra häi. ⁶Pɛ nu'bʉ mambá pøx ra hyadi 'bexgue bi 'yot'ʉ nguetho him mi ja yʉ 'yʉ xʉn ho. ⁷Nɛ nu mi'da yʉ hmudä bʉya bi zo bʉ ja yʉ 'bo'uṭini, nɛ bi bøx'ʉ yʉ hmudä. Pɛ nu'bʉ min te yʉ 'uṭini bʉya bi go'mi, nɛ bim 'bɛdi. ⁸Pɛ nu'ʉ 'da bi zo bʉ ja ra hogahäi, nɛ bin ja xʉn ho ʉ. Nu 'da bi ndø'a n'da ciɛnto, nɛ nu'ʉ 'da bi ndø'i hyate, nɛ 'däte ma 'dɛt'a bi ndø ʉ 'da. ⁹Pɛ nu'bʉ i ja ni zaguhʉ, dami jamansu 'bɛ'a dí xi ahʉ, bi 'yɛmp'ʉ yʉ ja'i a ra Jesús.

I än'du yú xädi ra Jesús hanja i xih yun t'uti yu ja'i

¹⁰Nε dá xihmbe ra Jesús bʉya, dá εmfe:

—Hanja gní xänba yun t'uti yu ją'i, nε hingui pą u 'bε'a nam bøn u, dá εmfe.

¹¹Nε nu ra Jesús bi dąrcahe buya, nε bi 'yεnje:

—Nu ahu bin ja ahu gá pahmbu a njom mi pah mam'bet'o 'bepu ní manda rá ts'edi Oją, pe nu'u mi'da, him bin japi da bądi, bi 'yεngähe ra Jesús. 12 Νε tengu thoho a ram hma i ɛna: "Nu'a i ja, man'da xun ngu din t'unni, ne nu'a zi ts'utho i ja, ne'a i ja da thanba a," gan jahu bu. Nu'u i honi da badi, man'da xun ngu da badi. Pe nangue u hingui honi da badi, ne a zi ts'u mi padi da thanba u. 13 Janangue'a yun t'uti thoho dí xi u, nguetho i øde ρε εna gue'bu him bi 'yøde, nε i nu pε tengutho 'bu hin te xtá nu; him bi yut' yú mbui a dá xifi, bi 'yɛn'a ra Jesús. ¹⁴Nɛ majuani i man'a ra pøngahyą Isaías nangue u 'bu mi 'yɛn'a:

Gui 'yøhmbʉ pε hin gui pąhmbʉ 'bɛ'a gá 'yøhmbʉ.

Ne gui nuhu pe hin gui pahmbu 'be'a nám bøn'a guin nuhu.

¹⁵ Nguetho nu ni mbuihu ɛmmɛ xum mɛtho,

ne njam'bu gui 'yøhmbu, tengu'bu njot'i ni guhu, ne njam'bu gui nuhu, tengu'bu guidí ts'ant' ni dähu,

ne hin jam'bu i sä da ben ni mbuihu ngue dim pädi nangue ran ts'o, ngue ga nyan ahu.

i en Oją, bi 'yen'a ra pøngahyą Isaías 'bu maya'bu, bi 'yen a ra Jesús.

16 Pɛ nu'ahu majapi ahu nguetho i nu ni dähu nɛ i øh ni guhu, bi 'yɛngähe ra Jesús. 17 Majuani dí xi ahu ɛmmɛ xun ngu yú pøngahya Oja nɛ xun ngu yu ja'i ngue 'dat' Oja mim bɛni, mí nde xtá nuna gätho guí nuhu ya, pɛ him bi zä bi nu; nɛ ɛmmɛ mí nde xtá 'yøhna guí øhmbu ya, pɛ him bi zä bi 'yøde, nguetho him mí zøn ra ora xtám badi, bi 'yɛngähe dyu xädigähe ra Jesús.

'Be'a rán theui a ran t'uti ra mbomhmudä

NE nuya ga xi ahu 'be'a nam bøn'a rán t'uti a ra mbomhmudä, bi 'yɛngähe ra Jesús. 19 NE nu'a to'o bi sih ram hma ngue di manda ua rá ts'edi Oja, ne him bi badi 'be'a nam bøn'a, in ja tengu u yu hmudä bi zo bu ja ra 'yu, ne 'bex bá ɛ'a ra zithu bi hyax a ra hmudä bi thupu ja yú mbui u. 20 NE nu'u yu hmudä bi zo bu ja yu do, tengu'bu n'da ra ja'i ɛmme di johya 'bu ja bi 'yø a ram

29 SAN MATEO 13

hma, pε maxøts'e thoho. ²¹Nε hinga gätho mbo yú mbui, nguetho hin'yu yú 'yu xun ho, ne go zi ts'u din unbi nangue a ram hma, 'bexgue da 'uegue. ²²Νε nu'a ra hmudä dá xi ahu bi zo bu ja yu 'ujni, nam bøni tengu n'da ra ja'i bi 'yø a ram hma, pe hønt'a emme im ben ra ximhäi ne ra mbeti ngue i hät'i, janangue'a bi japi bim 'bε a nε hin te bin ja rá 'bɛfi Oja nangue'a ra ja'i tengu a. ²³Pε nu'a ra hmudä dá ma ngue bi zo bu ja ra hogahäi, nam bøni tengu u i ømanho a ram hma ne i padi 'be'a yún thehu a, ne din te xun ho u ne da ndøgue tengutho yu hmudä, ngue nu'u 'da bi ndø'a n'da ciento, ne'u 'da bi ndø a hyate, ne u 'da bi ndø a 'däte ma 'dɛt'a.

Rán t'uti ra hmudä xun ho ne a hingui ho

²⁴Nɛ nu ra Jesús buya bi xih mi'da yun t'uti u yu ja'i, nɛ bi 'yɛmbi:

—Nu'bu bi 'yøt' ran ts'ut'abi Oją, in ja tengutho 'bu n'da ra ja'i bi du a n'da yu hmudä xun ho bu ja rá hughi. ²⁵Pe nu'bu mín xui ne gätho bin aha, bi mba a rán suiui ne 'darbu bi duhmi a n'da yu hmudä hingui ho bu ja rá huahi, ne bi mba buya. ²⁶Nε nu'bu mí bøx buya, bi bøx'u xun ho nɛ u hingui ho, 'darbu bi bøts'e. ²⁷Νε nu'ʉ yʉ́ 'yɛ̞hε bʉya bi mba bi xi u yu hmu: "Nu yu hmudä gá tupu ja ra huahi, xun ho 'bu gmi tuhu, hapu bi nequi u yu hmudä hingui ho," bi 'yɛmbi. 28Ne nu u yú hmu buya bi 'yɛmbi: "Nɛ masque n'da man sui'be bá ¿hɛ bi ts'onga ma huahi," bi 'yena. "Ha ga xathu u yu paxi hingui ho," bi

'yɛn'u yu 'yɛnɛ buya. 29 Nɛ nu yu hmu bi 'yɛmbi: "Hin'na, hin da zä gui mbähä gui xathu u yu paxi hingui ho, nguetho xøhma ts'urpu thoho nɛ u xun ho gui xathu. 30 Man'da xun ho gui hyɛthohu 'darpu din te, ja gue'bu bin ja ran sofo. Nɛ nubuya ga xi u yu mbɛfi ngue nu'u hingui ho di pɛti nɛ da 'yudi, nɛ nu u xun ho buya da mbɛ'ts' bu ja ma ngu," bi 'yɛn u yu hmu, bi 'yɛn'a ra Jesús.

Nε guehna man'da ran t'uti bi mam 'bʉ mi xi ʉ yʉ ją'i.

Rán t'uti rá hmudä ra mostaza

³¹Nɛ man'da ran t'uti bi man'a ra Jesús nɛ bi 'yɛ̞na:

—Nε tengu n'da rá hmudä ra mostaza bi dupu ja rá huahi n'da ra ja'i. Nε zi ts'utho a, εmmε man'da zi ts'u xínda gue u mi'da yu hmudä. ³²Pε nu'bu bin te nε man'da xun ndoho bu ni nεqui, madague'bu ra c'ani thoho, pε i te tengu'bu n'da ra za guepu da zä da 'yøt' yú 'bafi yu doja bu ja yú 'yε. In jabu rá ts'εdi Oja bu ni nεqui ngue di manda ua, bi 'yɛn'a ra Jesús.

Rán t'uti rá íxi ra hocjuni

³³Nε man'da ran t'uti bi ma ra Jesús nε bi 'yɛ̞na:

—Nε tengu ra íxi 'bu din jap'a ra hocjuni, nε gätho bi nden a ra juni buya. In jabu rá ts'εdi Oją bu ni nεqui ngue di manda ua, bi 'yɛ̞na.

Maya'bu bi ts'änni da man yun t'uti a ra Jesús

³⁴Nɛ ngubu bi 'yøt'a ra Jesús, hønt'u yun t'uti bi 'yut'u yu ja'i 'bu mi xänbi. ³⁵Nɛ gue'a bi man'a ra SAN MATEO 13 30

pøngahyą maya'bu ngue din ja 'bu mi 'yɛna:

Ga utä yu ją'i yun t'uti, Ga xänba a njon mi pądi asta gue'bu go mi mbuh ra ximhäi, i ęn Oją, bi 'yɛ̞n'a ra Isaías 'bu mim pøngahyą.

'Be'a rán theui a rán t'uti ra hmudä xun ho ne'a hingui ho

36 Nɛ nubuya bi xi u yu jali a ra Jesús ngue da mbengui. Nɛ nu'bu gätho mí mba u, bi mba ra Jesús bu ja ra ngu. Nɛ dá tɛndähe buya. Nɛ nu'bu mí hyupu ja a ra ngu, dá änhde:

—Dami xije ts'u 'bɛ'a nam bøn'a ran t'uti gá ma nangue ra hmudä hingui ho bi dupu rá huahi a ran 'yohu, dá ɛmfe.

³⁷Νε bi 'yɛ̞ngähe ra Jesús bʉya:

—Nu'a nam bøni ngue yu hmudä xun ho u dí tucä, guecä dán ją'igä ua ja ra ximhäi. 38 Ne nu a ra huahi nam bøni gue'a ra ximhäi. Ne nu'a ra hogahmudä nam bøni gue'u di manda rá ts'edi Oja u. Ne nu'a ra hmudä hingui ho nam bøni yu ja'i ngue rá mbeti ra zithu. 39 Ne nu a rán suiui a rá mbeti ra huahi ngue bi dupu yu hmudä hingui ho, gue'a ra zithu a. Ne nu'a ran sofo nam bøni rán zegui ra pa. Ne nu'u yu mbefi da xoqui nam bøni ngue yúm 'bεhni Oja mahεts'i. 40 Nε tengu thoho u yu hmudä bi bøts'e ngue hingui ho ne bi mba ma munts'i nε bi mba nt'udi, din ja bu 'bu ran zegui ra pa. 41 Nugä ngue dán ja'igä ua ja ra ximhäi, 'bu rán zegui ra pa ga pen'du mam 'behni di peti gätho nangu yu ją'i ra ximhäi. Ne gätho u bi 'yøt' ran ts'o da thøn a thi, nε

u gätho midí parpa yú miją'ihu da 'yøt' yu ts'oqui. ⁴²Nɛ da thøspu ja ra sibi njąm'bu i huɛt'i, guepu din zoni nɛ din guxt' yú ts'i bu. ⁴³Nɛ nubuya, nu'u to'o i øt' rá pähä Oją, di nɛc thoho tengu ra hyadi bu di manda rá ts'ɛdi ma Tahu mahɛts'i. To'o gätho ja yú zagu, di jamansu a dím mangä ya, bi 'yɛ̞ngähe ra Jesús.

Rán t'uti a ra mbeti man t'agui

⁴⁴Νε man'da ran t'uti bi man'a ra Jesús, bi 'yεna:

—Nu n'da ran 'yohu bi din'a n'da ra mbɛti bu mbo ra häi ngue ɛmmɛ di muui a. Nɛ bi gärpu mahøn'a. Nɛ midí johya, nɛ bi mba buya da mbä 'bɛ'a gätho mi pɛ'ts'i guepu bi zä bi dän'a ra xɛqui a guepu bi din'a di muui, ngue mi padi man'da da dapi bu. Nɛ din jabu gui 'yøthu ngue ɛmmɛ gui hyomhbu ngue di manda rá ts'ɛdi Oja, bi 'yɛn'a ra Jesús.

Rán t'uti a ra do ¿mme di muui xum hmadi

⁴⁵Nε xø bi 'yɛna:

—Nu n'da ra pøhø ngue mi honi da dän yu do i thim bu mbo ra dehe xum hmadi di muui. ⁴⁶Nɛ nu'bu mí din a n'da man'da mahotho xinda gue'u gä min nu mam'bɛt'o, bi mbä 'bɛ'a gätho mí pɛ'ts'i nɛ bi dän'a ɛmmɛ mahotho buya. Nɛ din jabu gui 'yøthu ngue ɛmmɛ gui hyomhbu ngue di manda rá ts'ɛdi Oją, bi 'yɛn'a ra Jesús.

Rán t'uti n'da ra xit'ą án t'ɛi bʉ ja ra dądądehe

⁴⁷Νε man'da bi man'a ra Jesús, bi 'yɛ̞na:

—Nu'a ní 'yøt' ran ts'ʉt'abi Oją, in ja tengu n'da ra xit'ą ngue i pa nt'ɛi bu ja ra dądądehe, nɛ i thɛ hønt'a go ní huą i 'bupu mbo ra dehe. ⁴⁸Nɛ nu'bu ya bi yu'a yú xit'ą yu mbahuą, da gux buya, da mba nín hupu ja ra ndenthe nɛ da huan'du yu hua xun ho da 'yurpu ja yú 'bøts'e nɛ nu'u hingui ho buya di bunt'i. ⁴⁹⁻⁵⁰Nɛ din jabu 'bu rán zɛgui ra pa, 'darbu dim 'bähmbu u yu ts'om'bäi u xun ho bi 'yøt'e. Nɛ nu yúm 'bɛhni Oja mahɛts'i da huan'du yu ts'om'bäi nɛ da 'yɛntpu ja ra sibi njam'bu i huɛt'i, nguepu din zom bu u nɛ din guxt pu yú ts'i, bi 'yɛngähe ra Jesús.

Mahyoni a mi pezehe ne'a xø bi dim ma'da'yo

⁵¹Nɛ nu'a ra Jesús bʉya bi 'yɛ̞ngähe yʉ́ xädigähe:

- —Ha guí pąhmbu a dí xi ahu ya.
- —Hąha, ma Hmu, ya dí pąhmbe a guím ma, dá ɛmbähe a.

52 Ne xø bi 'yengähe buya:

—Nu'u midín xäh ram hma maya'bu, nɛ a ram hma ma'da'yo da hyumbi din xädi, ngue 'bɛpu ní manda rá ts'edi Oją, hin te di 'bɛh rán xädi u buya, nɛ da zä da xänba u mi'da. Din ja tengu'bu n'da ra ją'i i ja 'bɛ'a i pɛ'ts'i ngue gä mahyoni. Nɛ'a bi zocpa yúm bombøta nɛ'a bi dinsɛ. Janangue'a hin te di 'bɛ u 'bupu ja rá ngu, bi 'yɛngähe ra Jesús.

Yu mengu bu rá hnini zehe him bi 'yec'yei rá ts'edi ra Jesús

⁵³Nε nu'bu mi gua'a bi man ra Jesús buya bi bøm bu. ⁵⁴Nε bi mba bu rá hnini zεhε ngue Nazaret. Nε bin xäpu ja ra niją, nε nu yu ją'i buya bi hyonya thoho 'bɛ'a bi 'yøt'a, nε bi 'yɛ̞na:

- —Hapu bí hya rán 'yomfεni na, ngue da zä da 'yøt'a i øt'e. ⁵⁵Ha hinga guehna rá ts'unt'u ra yaxi na, ngue i 'bucua rá mbe í María. Nε nu yún 'yohu ra Jacobo nε ra José nε ra Simón nε ra Judas. ⁵⁶Nε u yún ju dí 'buhmbu ua. Pε hapu bí hya a ran 'yomfεni na, bi 'yɛn u yúmɛnguhu. ⁵⁷Nε him bi numanho a ra Jesús. Pε nu ra Jesús bi 'yɛmp'u:
- —Gätho yu ją'i in jabu. Nubu ja yú hnini zehe hin da hnumanho n'da rá pøngahyą Oją, xínga gue'u i 'bupu rá ngu da numanho, bi 'yɛn'a ra Jesús.

⁵⁸Janangue'a hingui ngu yʉn t'øt'e mixte bi 'yørpʉ, ngue him bi 'yɛ̞c'yɛi ʉ 'bʉpʉ.

Ra Xuua Nxixyą bi thecpa rá 'yuga

Nɛ min ts'ut'abi bu ra xɛqui Galilea a ra Herodes. Nɛ nu'bu mi sifi 'bɛ'a gä bi 'yøt'a ra Jesús 'bu min 'yo bu, bi 'yɛn'a:

²—Masque ra Xuua Nxixyą a, bi dąmbęni bu 'bu u xun du, janangue'a i ja rá ts'edi xun ho i øt' yun t'øt'e mixte, bi 'yem buya.

3-5 Nguetho guese a ra Herodes bi hyo a ra Xuua Nxixyą. Bin cue a ra Herodes 'bu mi sifi ngue hingui ho a bi 'yøt'e ngue bi zinse a rá 'bepo, nu'a ra xisu mi 'buhmi a ra Felipe 'bu mi sin'a ra Herodes. Ne nu'a ra xisu, ra Herodías a. Ne bi 'yṣn'a ra Xuua: "Hingui ho gá 'yøt'e ngue gá sinba rá xisu a nin 'yohu," bi t'ṣmp'a ra Herodes. Bin cuetho ra Herodes buya bi got'a fädi a ra Xuua ne bi manda dí tu't'i con yu cadena. Ne mim bɛni xta hyo a ra Xuua, pɛ him bi hyo nguetho mi su din cue yu ja'i, ngue nu yu

SAN MATEO 14 32

ją'i mi pądi rá pøngahyą Oją a ra Xuua. ⁶Pɛ nu'bʉ mi zøn ra pa bin ja rá ngopa a ra Herodes 'bʉ mi dät ra jɛya mahøn'a, bi 'yøt'a n'da ran ts'ihmɛ nɛ bin nɛ a rá t'i̯xu a ra Herodas. Nɛ bi numanho a ra Herodes a ran hnɛi bi 'yøt' bʉya. ⁷Nɛ bi 'yɛ̞mp'a ra hmute: "Dami 'yädi 'bɛ'a gätho guí nde gui 'yäqui. Majuani dí xi i, ga 'da i 'bɛ'a gätho gui 'yäqui," bi 'yɛ̞n'a ra Herodes. ⁸Nɛ nu'a ra hmute bʉya bi 'yä a rá ya ra Xuua Nxixya ngue di o ra mbohi, nguetho gue'a xí xi a rá mbe a da 'yäp'a.

⁹Nε bi du rá mbui a ra Herodes buya, him mi ndehma da hyo a ra Xuua, pε hin'yu 'bε'a sä da 'yøt'e nguetho ya xí xifi di unni 'bε'a gä da 'yäpi, nε ya xí 'yøh yu ja'i di unni 'bε'a gätho da 'yäpi. ¹⁰Nε bi manda buya ngue da mba ba thεcpa rá ya ra Xuua Nxixya bu ja ra fädi, nε ba jät'a n'da ra mbohi din t'un'na ra hmute. ¹¹Nε nu'bu min t'unni bi dɛn a ra mbohi bi un'na rá mbe buya.

¹²Ne nu yú xädi ra Xuua buya, bá tunba a rá ngoc'yei bu ja ra fädi, bi 'yägui. Ne bi mba buya bá xi a ra Jesús ngue ya bi du ra Xuua.

Bi 'uin'i cut'a mahuahi yun 'yohu ra Jesús

13 Nɛ nu ra Jesús 'bʉ mí 'yøde bi du ra Xuua, 'bex dá mbähmbe dá huhe bʉ ja ra mbosa mí nde xcá sømhbe bʉ 'danguadi, mi ɛna xcám 'bʉsɛhe n'da zi ora. Pɛ nu'bʉ mi pa ਚ yʉ ja'i ngue dá mbähmbe bʉ a ra Jesús, nɛ ਚ bá nɛxpʉ ja yʉ hnini bi dɛngähe, bin 'yogua thoho gätho bʉ ja rá nyani a ra dadehe. 14 Nɛ nu'bʉ

má cąhmbe bu ja ra mbosa a ra Jesús, xun ngu u yu ją'i xí zøm bu. Nε εmmε bi huεc'u buya nε bi hoqui hønt'a go to'o mí u. ¹⁵Nε nu'bu min de buya dá εmbähe a ra Hmu:

—Ya bin de ya, nɛ njongui 'bucua ja ra xɛqui ua, dami xih yu ja'i da mba bu ja yu hnini nɛ da däm bu 'bɛ'a da zi, dá ɛmbähe a.

¹⁶Nε bi 'yɛn'a ra Jesús:

—Pε hingui jatho da mba, pε guesε ahu dami 'uimhbu, bi 'yɛngähe.

¹⁷Nε dá thạhmbe buya:

—Pε hin'yʉ 'bɛ'a da zi, nε hønt'i cʉt'a yʉ hmɛ i ja ua nɛ yoho yʉ huą, dá ɛmfe bʉya.

18—Bá cuhu ua, bi 'yɛn'a ra Jesús.

19 Nɛ bi xih yu ja'i ngue din säya
bu ja yu t'ɛi, nɛ bi hyan u cut'a
yu hmɛ nɛ yoho yu hua. Bi ndøs'
mahɛts'i nɛ bi 'yäp rán japi Oja,
nɛ bi xɛm buya nɛ bi 'dacähe dá
darpähe yu ja'i. 20 Gätho bin sihmɛ
u yu ja'i nɛ bin niya nɛ bi bong
mi'da yu xɛqui bi yu'i 'dɛ'ma yoho
yu 'bøts'e. 21 Nɛ nu'u gätho bin
sihmɛ í jua'i cut'a mahuahi u yun
'yohu, nɛ hin njon bi mbeh yu xisu
xinga gue yu t'uhni.

Bin 'yo maxøts'e ra dadehe a ra Jesús

²²Nε nubʉya, bi xije ga mbähmbe ngue ga 'daxhe ra dądehe mahøn'a. Dá huhe a ra mbosa dá mbähmbe bʉya. Go bi gosɛ bʉ a ra Jesús, bin 'yɛhmbʉ yʉ jạ'i. ²³Nε nu'bʉ mi mba ʉ yʉ jạ'i bi ndezɛhɛ bʉ ja ra nyuni nɛ bi nyaui bʉ Oją. Bá hazɛhɛ bʉ a. ²⁴Nɛ nu'bʉ má mbähmbe ngue dá huhe ra mbosa, 'bʉ mi zøm made ra dehe, bi zɛh ran dạhi nɛ ɛ̞mmɛ bin ja yʉ t'øthe, nɛ ts'ɛdi midí cos'a

ra mbosa. ²⁵Nε nu'bʉ ya mbɛ mí ts'ʉtho da hyats'i, nɛ 'yo a ra Jesús bʉ maxøts'e ra dehe ngue da zʉ'a ra mbosa. ²⁶Nε nu'bʉ mambá εpʉ ra Jesús, nɛ i 'yo bʉ maxøts'e ra dehe dá handähe bʉya, ba εpʉ nɛ hin dí pąhmbe ngue gue'a. Ɛmmɛ dán suhe nɛ dá mbahmbe:

- —Ba şhnʉ n'da ra ánima, dá şmhbe.
 ²⁷Nε bi darcähe a ra Jesús:
- —Dami hyuthu nzambui, o guín suhu, guecä, bi 'yɛngähe.

²⁸Νε bi dąt'a ra Pedro buya:

- —Nu'bu gue'e ma Hmu i, dami jaqui nɛcä dan 'yo maxøts'e ra dehe nɛ ga søm bu guí 'bäi, bi 'yɛn'a.
- ²⁹—Ba ɛcua, bi 'yɛn'a ra Jesús, bi t'ɛmp'a ra Pedro bʉya.

Ne nu'a ra Pedro buya bi gapu ja ra mbosa ne bi du'mi bin 'yo maxøts'e ra dehe ngue in nde da zøm bu bí 'bä a ra Jesús. ³⁰Pe bi nu ngue ɛmmɛ nts'ɛdi ran dahi ne 'bex bin su buya, ne bi du'mi bi dont'a mbonthe. Ne nts'ɛdi bi mbah puya:

- —Ma Hmu, dami yangui, bi 'yana.
- ³¹Nɛ 'bex bi bɛndba rá 'yɛ a ra Jesús bʉya.
- —Hanja ts'utho guí εc'yεi ngue i ja ma ts'εdi nε 'bexgue gá su 'bε'a gán nu, bi 'yεmp'a rá hmu.

³²Nɛ nu'bu mi hyu ra mbosa a ra Pedro nɛ ra Jesús buya, 'bex bin hɛ a ran dahi. ³³Nɛ nugähe mí huhmbe bu mbo ra mbosa dán danyahmuhe bu mí 'bä a ra Jesús nɛ dá ɛmfe:

—Majuąni maha, gue'e rá Ts'unt'u i Oją, dá εmfe.

Bi hoc'u yu hyenni bu ra hnini Genesaret a ra Jesús

³⁴Nε dá thohmbe buya dá sømhbe bu 'danguadi ra dehe bu mi ja ra xɛqui Genesaret. ³⁵Nɛ nu'ʉ yʉ jạ'i mi 'bʉpʉ, 'bʉ mi nu bi zøm bʉ ra Jesús, 'bexgue bi mbɛnh ra nde hønbʉ go hapʉ ja yʉ hnini ngue ya mí 'bʉpʉ ra Jesús. Nɛ bá ts'inbi gätho yʉ hyɛnni bʉ mi 'bʉcähe a ra Jesús. ³⁶Nɛ bi 'yäh ra mate ʉ ngue bi därpa rá nyạni rá pahni ra Jesús, nɛ 'bex bi yạn ʉ bʉya.

Ra Jesús bi ma 'bɛ'a di ts'onba rá mbʉi n'da

15 Νε nubʉya bá ε i 'da ma ngʉrpihe ngue yʉ fariseo nɛ yʉ xänbate niją. Bá nɛxpʉ Jerusalén ʉ, nɛ bi 'yän'na ra Jesús:

²—Hanja u ni xädi hingui ten yun t'øt'e mam bombøtahu ne him 'be i xut'ye 'bu i sihme, bi 'yen'u.

³Bi dą a ra Jesús nε bi 'yεmbi:

—Pε nε ahu guí festhohohu rán t'ɛdi Oja 'bʉ guí homhbʉ gui 'yøt' nin t'øt'e zehehu, bi t'emp'u yu fariseo. ⁴Nguetho i mam bu ja rám hman Oja: "Gui numansu ni ta ne ni mbe." Νε a i mam bu ngue: "Nu'a to'o san rá ta ne rá mbe i jatho da tho," bi 'yɛn'a ra Jesús. ⁵Pɛ nu ahu, 'dan'yo thoho guí mamhbu, ngue guí emhbu xun ho 'bu di yarpa Oja a mi ja ngue xtá mbäx'a rá mbe o gue rá ta n'da ran 'yohu. Ne hin gá xihmbu ngue him bi numansu rá ta 'bu ngubu bi 'yøt'e. 6Gá 'yɛmhbu nte ní mba tho yún t'ɛdi Oją 'bu guím bɛnsε nin t'ɛdihʉ, bi 'yɛn'a ra Jesús, bi t'εmp'ʉ yʉ fariseo. ⁷Pε εmmε guidí yorpahu a guím bemhbu, bi 'yɛmp'a ra Jesús. Majuani bi man Oją bu ja rá søcuą ra Isaías 'be'a guí øthu ngue bi 'yɛna:

8 Nuya yu ją'i ya i ęsqui nangue yú nde, pε maxøts'e thoho nε hinga gätho yú mbui.

⁹ Ne säti thoho 'bu i thandegui, nguetho hønt'u yun t'edi zehe i xänba u mi'da,
en Oia bi 'yen'a ra Isaías 'bu

i ɛn Oją, bi 'yɛn'a ra Isaías 'bʉ maya'bʉ, bi 'yɛn'a ra Jesús.

¹⁰Nε nubʉya, nu ra Jesús bi zon'dʉ yʉ ja'i:

—Dami 'yøhmbu 'bɛ'a dí xi ahu janangue'a gui pąhmbu 'bɛ'a nam bøn'a. ¹¹ Hinga gue'a i ts'i di ts'onba rá mbui n'da, pɛ gue'a ní bøm bu rá nde n'da, bi 'yɛ̞n'a ra Jesús.

¹²Nε dá mbähmbe bʉ mi 'bäh ra Jesús.

—Nu'u yu fariseo bi bɛman'u a gám ma, dá ɛmfe.

¹³Νε bi dąh ra Jesús, bi 'yεna:

—Hønt'a go 'bɛ'a ma paxi him bi 'yɛ̞zɛhɛ ma Ta, i jatho da mba nsat'i. ¹⁴Nte guim bɛmhbu nangue u nguetho tengu'bu i xädä u, nɛ εna da 'yut' ra 'yu yú mixädähu. Nɛ nu'bu n'da ra xädä i six'a rá mixädäui, thambɛni tho gätho yoho da zo bu ja n'da ra hyahäi, bi 'yɛ̞ngähe ra Jesús 'bu má ɛ̞mfe.

¹⁵Nu ra Pedro buya bi xi a ra Jesús:

—Dami xije nangue a ran t'uti gá ma mahɛ̞'bʉ, 'bɛ'a nam bøn'a, bi 'yɛ̞mbi.

¹⁶Νε bi dą'a ra Jesús:

—Ha nɛ ahu xíngui ts'u guí pahmbu 'bɛ'a nam bøn'a dí xi ahu, bi 'yɛna. ¹⁷Ha hin guí pahmbu nu 'bɛ'a da zi n'da, da yurpu ja rá nde nɛ da mba bu ja rá foho, nɛ hingui zam bu, bi 'yɛngähe. ¹⁸Pɛ nu 'bɛ'a gätho da bøn bu ja rá nde n'da í nɛxpu rá mbui nɛ gue'a di ts'on'a n'da. ¹⁹Nguetho

guepu mbo rá mbui n'da ni nɛx'u yu ts'on'yomfɛni, ran thodu, ran 'yomt'ɛni madague'bu bin that'a n'da o hin gana din thati, nɛ yum fɛ, nɛ yu fɛhni, nɛ yun ts'ante, nɛ gue'u gätho ní nɛxpu rá mbui n'da u. ²⁰Nɛ gätho u gue'u ní ts'om'bäi n'da ra ja'i u. Pɛ nu'bu bin sihmɛ nɛ him bi 'yøt'a ran t'øt'e ngue din xut'yɛ, hinga gue'a dán ts'on'a, bi 'yɛngähe ra Jesús.

N'da ra xisu hin rá menguhu a ra Jesús bi 'yęc'yei a rá ts'edi ne bi yạn'a rá t'ịxu

²¹Nε nubuya dá pømhbe bu a ra Jesús dá mbähmbe bu ja rá xεqui ra hnini Tiro nε ra hnini Sidón. ²²Nε dán c'athe n'da ra xisu ra mɛngu Canaan, hing ra israel a. Nε ts'ɛdi bi mbafi, bi 'yɛ̞mp'a ra Jesús:

—Gra Hmu, rám bom'beto i ra David, din ja nin huecate nangue ma t'ixu in 'youi n'da ra zithu ngue emme di unbi.

²³Nu ra Jesús bi thotho, tengu'bu him bi 'yø a bi xifi. Nugähe buya dá xihmbe ra Jesús:

—Dami 'yørpa ra mate a ra xisu, janangue'a da mbengui, nε i mbafi i tɛngahu.

²⁴Nu ra Jesús buya bi 'yɛna:

—Nu Oją bá pengui ga ørpa rá 'befi ngue hønt'u ma menguhu yu israel ga jamansu, nguetho i 'bui tengu yu de'yo bi 'beh ra 'yu, bi 'yena.

²⁵Pε nu ra xisu bi zøm bʉ 'bäh ra Jesús bin dąnyahmu nε bi 'yṣmbi:

—Gra Hmu, dami zequi.

²⁶Pε nu ra Jesús bi 'yɛ̞mbi:

—Hingui ho 'bu n'da ran 'yohu da hyanba rá hmɛ yú t'uhni, go di un'du yu t'u'yo, bi 'yɛmbi.

Ngubu bi xifi nguetho hing ra israel a ra xisu. ²⁷Bi 'yɛn'a ra xisu buya:

—Majuani guím ma gra Hmu, pe ne'u yu t'u'yo i si yu xeca hme 'bom bu ja ra 'bimexa ngue i he u yú hmu.

²⁸Ra Jesús buya bi 'yɛmp'a ra xisu:

—Gra xisu, ɛmmɛ guí ɛc'yɛi xʉn ho a ma mate. Janangue'a din ja a gá 'yädi, bi 'yɛmbi.

Nε 'bexgue gue'a ra ora bi yan'a rá t'ixu.

Bi hoc mi'da yu hyenni a ra Jesús

²⁹Nε nubuya nu ra Jesús bi bøm bu. Dá mbähmbe bu ja ra ndendadehe bu Galilea nε dá texhe bu ja ra nyuni, ne bi hyupu a ra Jesús. ³⁰Nε xʉn ngu yʉ ja'i bi zøm bu mi hudi, ne bá ts'inba yu dogua, nε yu xädä, nε yu gore, nε yu do'yε, ne xun ngu mi'da yu mbedi ne yu hyenni bá ts'inba bu mi hu'a ra Jesús. Ne nu ra Jesús buya gätho bi hoc'u. 31 Ne nu yu ja'i bi hyonya thoho 'bu mi nu bin ya yu gore ne bin 'yo u mí dogua nε bi yạn'u mi do'ye, ne bin zø yú dä u mi xädä. Nε nu'bu mi nu 'bε'a bi 'yøt'a ra Jesús, bi 'yɛspa Oja, ngue ma Ojahe dyu israelhe. Nε hyu pa dán degähe bu yu ja'i.

Bi 'uin'i goho mahuahi yun 'yohu ra Jesús

³²Νε nu ra Jesús bi zongahe bi 'yṣngähe:

—Emme dím bengä yu ją'i i 'bucua nguetho ya ná hyupa i 'bucua ne hin'yu 'be'a da zi yu. Ne nu'bu ga xifi da mba bu yú ngu, masque hin da hyät'i da zøm bu ja yú ngu, bi 'yɛn'a ra Jesús.

³³Nε dá εmhbe buya:

—Pε hin hapu ga timhbu ra hmε ga unhndu yu ja'i, nguetho εmmε xun ngu i 'bucua, nε njongui 'bucua ngue ga tämfu ra hmε, dá εmfe.

³⁴—Hangu guí hạhʉ ra hmɛ thạ, bi 'yɛ̞n'a ra Jesús.

—Yoto thoho yu hmε nε zi yoho yu t'uhua, dá εmfe.

³⁵Nε nu ra Jesús bi xih yʉ ja'i din säya bu häi. 36 Ne bi hyan'u yu hme a ra Jesús nε yu huą, nε bi 'yäp rán japi Oja nangue u bi hyani. Nubuya, nu ra Jesús bi xen yu hme ne yu huą nε bi dargähe ngue ga unhde yu ja'i bu mí hudi. ³⁷Ne gätho u mí 'bupu bin sihmε u nε bin niyą, nε bi bongui yoto yu 'bøts'e 'bu mi niya. ³⁸Ne goho mahuahi u yun 'yohu bin sihmε, nε njom bi mbeh yu xisu nε yu t'uhni. ³⁹Nε nu ra Jesús buya bi xih yu ja'i da mbeng yú ngu. Ne nu'bu mi mbeng yu ja'i buya dá mbähmbe mahøn'a a ra Jesús, dá huhe ra mbosa mahøn'a ngue ga sømhbe bu ra xequi Magdala.

Yú ngurpi yu judío bi 'yäh mi'da yu hmepya

Ne nu'bu ma sømhbe bu, bi zøm bu 'da ma ngurpihe ngue yu fariseo ne yu saduceo, in nde da zäp rá mbui a ra Jesús, bi 'yembi:

—'Yurcahe n'da ra hmɛpya ngue ga pahmbe majuani Oja bá pɛn'ni i, bi 'yɛn'ʉ.

²—Pɛ nu'ehu, bi 'yɛn'a ra Jesús, guí nuhu xun thɛni yu güi 'bu xøn de nɛ guí ɛmhbu buya ngue din hyadi 'bu bi hyats'i. ³Nɛ nu'bu

SAN MATEO 16 36

guí nuhu ts'utho xun theni yu güi 'bu xudi, guí ɛmhbu din dạ'ye buya. Emme guidí yorpahu a guím bemhbu. Hanja ngue guí pahmbu 'bɛ'a nam bøn'ʉ yʉ güi guí nuhʉ nɛ hin go guí pahmbu 'be'a nam bøn yu hmepya guí nuhu ya, bi 'yen'a ra Jesús. ⁴Nu ahu guí 'buhmbu ya, gue ahu gyu ts'om'bäihu, xcá 'uehmbu bu rá 'yu Oja, ne sä guí ähmbu ra hmepya ya pe hin da t'ut'ahu ra hmepya. Pe hønt'a ra hmεpya da t'ut'ahu tengu bi 'yøt'a ra Jonás maya'bu, bi 'yɛn'a ra Jesús bi 'yεmp'u yu fariseo. Nε xø dá mbäcähe a ra Jesús buya.

Ra Jesús bi xih yú xädi di jamansu nangue rá íxi yu fariseo

⁵Nɛ nubʉya dá penje mahøn'a 'danguadi ra dądehe a ra Jesús. Nɛ dá pumbɛnihe a ra hmɛ nzại mí sihe ngue min 'youi ra íxi. ⁶Nu ra Jesús bʉya bi 'yɛngähe:

- —Damim fähmbu nangue yú íxi yu fariseo nε yu saduceo, bi 'yɛna. ⁷Νε dá εnsεhe:
- —I man na ya ngue him bá hạhu ra hmɛ.

⁸Nε nu ra Jesús bi bądi 'bε'a dá bęmhbe nε bi 'yęnje:

—Hanja guí εmhbu: "Hin'yu ra hmε ga sihu." Pε ts'utho guí εc'yεihu. ⁹Ha gá pumbɛnihu 'bu má 'uịngä goho mahuahi yun 'yohu ngue hønt'i yoto yu hmε nε yoho yu t'uhua, nε bi bong thoho yoto yu 'bøts'e yu hmε. ¹⁰Nε'bu má 'uịn'i cut'a mahuahi yun 'yohu ngue hønt'i cut'a yu hmε mi ja, nε xun ngu yu 'bøts'e bi yu 'bu mi bongui. ¹¹Hanja hin gá pahmbu 'bu má xi ahu nangue yú íxi yu fariseo nε yu

saduceo, pɛ hin nangue u yu hmɛ dá xi ahu, bi 'yɛngähe.

12 Ja dá pąhmbe buya 'bɛ'a nam bøn'a bi xije ra Jesús. Dá pąhmbe ngue gue'a yún xädi yu fariseo nɛ yu saduceo, nɛ hinga gue'a njuantho ra íxi bi ma.

Ra Pedro bi ma to'o a ra Jesús

¹³Νε nubuya dá mbähmbe ra Jesús bu ra xεqui Cesarea, guepu min ts'ut'abi ra Felipe. Νε bi 'yängahe dyu xädigähe ra Jesús:

—'Bɛ'a im bɛ̞n'ʉ yʉ ją'i ngue to'ogä, ngue guecä dán ją'igä ua ja ra ximhäi, bi 'yɛ̞na.

¹⁴Dá thạthe buya:

—Nu'u 'da yu ja'i im beni gue'e gra Xuua Nxixya, ne nu'u 'da im beni ngue gue'e gra Elías mi 'buh maya'bu. Ne nu'u 'da im beni gue'e grá Jeremías ngue maya'bu xøn du, uague man'da rá pøngahya Oja, i en'u, dá emfe buya.

¹⁵Nu ra Jesús buya bi 'yängähe:

—Xi'ahu, 'bɛ'a guím bɛmhbu ngue to'ogä.

16 Ra Simón Pedro buya bi dati:

—Gue'e rá thahni i Oją ngue ra Cristo, rá Ts'unt'u i Oją i 'bui.

¹⁷Ra Jesús bi 'yɛmbi:

—Mająpi i gra Simón, rá ts'unt'u i ra Jonás, nguetho nu'a gá ma hinga n'da ra ja'i bi bɛn'ni i, pɛgue Oja ma Ta bí 'buh mahɛts'i bi bɛn'ni i. ¹⁸Pɛ nɛ'a dí xi i, nu'i gra Pedro, nu'a ni thuhu nam bøni gue ra do. Nguetho tengu 'bu da gue'e gra dongu guepu dí mbuh rán ngu Oja, nangue'e ga du'mä ga pɛt'u da 'yɛc'yɛigui. Nɛ hin'yu 'bɛ'a da zä di jua u, xíng ran date, bi 'yɛn'a ra Jesús. ¹⁹Nɛ ga 'da a n'da nin t'ɛdi ngue gui xih yu ja'i

'bɛpu dí yut'a n'da bu di manda Oja. Tengu'bu ga 'da a n'da ran sogui ngue gui xocpu di manda rá ts'ɛdi Oja. Nɛ nu'a gui 'yɛmbi hingui ho ua ja ra ximhäi, nɛpu mahɛts'i da t'ɛmbi hingui ho a. Nɛ ngutho a gui 'yɛmbi xun ho, nɛpu mahɛts'i da t'ɛmbi xun ho, nɛpu mahɛts'i da t'ɛmbi xun ho a, bi 'yɛn'a ra Jesús.

²⁰Pɛ nubʉya, nu ra Jesús bi hɛgähe hin ga mamhbe bʉ 'bʉh yʉ jạ'i ngue guesɛ a rá Thahni Oją, ngue ra Cristo.

Ra Jesús bi ma da tho ne da dambeni

²¹Nε nu'a ra pa a, bi dʉ'mi bi xije jatho da mba bʉ Jerusalén di ʉnba bʉ ʉ ma ngʉrpihe, ngue yʉ dạc'yεi nɛ yʉ mbäja nɛ yʉ xänbate nija. Nɛ bi xije da tho nɛ da dambɛni 'bʉ ná hyupa. ²²Nɛ nubʉya bi zixpʉ ma'ueni a ra Pedro nɛ bi zʉi, bi 'yɛmbi:

—O guidí japi da bent'i i, damin yani, bi t'emp'a ra Jesús, bi 'yen'a ra Pedro.

²³Νε bi dą'a ra Jesús:

—Dami pøni gra zįthu. Ní mba, nguetho guí εngui hin ga øt'ä a bi zän Oją. Hin'yʉ nin 'yomfɛni tengu im bɛn Oją, pɛ hønt'a im bɛn yʉ jạ'i guím bɛni, bi 'yɛn'a ra Jesús, bi t'ɛmp'a ra Pedro.

²⁴Nɛ nubʉya, bi 'yɛngähe:

—Pε to'o gätho in nde da dɛngui i jatho hin da bɛn'a rá pähä zɛhɛ nɛ da hyät yʉn ʉnbi madague'bʉ da tho. ²⁵Nguetho nu'a to'o di huɛczɛhɛ rá te, da mba ma ʉnbi rá te bʉ ja ran dạte, pɛ nu'a to'o hingui su da thạcpa rá te nanguecä, da dịn'a ra te mazại a. ²⁶Pɛ nu'bʉ n'da ra jạ'i, madague da 'yøt'e rá mbɛti 'bɛ'a gätho i ja ua ja ra

ximhäi, pɛ nte ní mbatho 'bu him bi pøh rá te. Nguetho njo'o n'da ra ją'i da zä da guzɛhɛ rá te, bi 'yɛn'a ra Jesús. ²⁷ Nguetho nugä ngue dán ją'igä ua ja ra ximhäi, nɛ din jagä rá ts'ɛdi ma Ta bu mahɛts'i 'bu bá pengä mahøn'a, nɛ gätho yúm 'bɛhni ban 'yohe 'bu bá ɛcä. Nɛ i ja 'bɛ'a ga undä nangue 'bɛ'a bi 'yøt'a n'da ngu n'da yu ja'i. ²⁸ Majuani dí xi ahu, hinga gä gní tuhu 'bu bi du'mi di manda ma ts'ɛdi ua, guecä dán ja'igä ua ja ra ximhäi, bi 'yɛngähe ra Jesús.

N'da ran t'uti bi 'yøt' ra Jesús

17 Nε nu'bu mi tho i 'dato pa nu ra Jesús bi zix ra Pedro nε ra Jacobo nε ra Xuua, rán 'yohu ra Jacobo, nε bi mbähä bu ja ra t'øhø. ²Nε nu'bu mí zøm bu, bim pä'a ra Jesús. Nu rá hmi bi hyät'i tengu'bu ra hyadi, nε nu rá he bi t'axqui tengu'bu ran nεqui. ³Nε nu'u ma mixädihe min 'yohu, bi nu bi zøm bu ra Elías nε ra Moisés, bin yahu ra Jesús.

⁴Nɛ nu ra Pedro bʉya bi 'yɛ̞mp'a ra Jesús:

—Gra Hmu, xun ho ngue dí 'buhmbe ua, nɛ ga høcähe hyu yu t'ungu. Nu n'da gam 'busɛ, nu n'da dim 'buh ra Moisés, nɛ nu'a man'da dim 'buh ra Elías, bi 'yɛn'a ra Pedro.

⁵Pε nu'bʉ mí yą ra Pedro, bi nεqui n'da ra güi di fɛxni, ngue bi go'bʉ, nɛ bi 'yø'a n'da ra nde bin yą bʉ ja ra güi: "Guehna ma Ts'ʉnt'ʉgä na, ɛmmɛ dídi huɛcä na nɛ dí numanho. Dami 'yøhmbʉ 'bɛ'a i xi ahʉ." Gue'a bi man'a ra nde bi 'yøpʉ.

⁶Nε nu'bʉ mí 'yø a ra nde ʉ ma mixädihe 'bex bin danyahmu bʉ häi nɛ bi nyetho nguetho bin su u. ⁷Nɛ nu ra Jesús buya bi mba bu mín danyahmu u nɛ bi 'yɛmbi:

—Dami ndanju, o guín suhu.

⁸Nɛ nu'bʉ mi ndøx'ʉ bʉya njom bi nu, pɛ hønt'a ra Jesús mí 'bäpʉ.

⁹Nε nu'bʉ mam bá ερʉ 'yu bʉ ja ra t'øhø bʉya, bi 'yɛn'a ra Jesús:

—Nuya njon gui xihmbu 'bɛ'a gá nuhu bu, jague'bu dá thambenigä bu 'bu u xøn du, nugä ngue dán ja'igä ua ja ra ximhäi, bi t'ɛmp'u.

¹⁰Nɛ nu ma mixädihe bʉya bi

'yänni:

—Hanja i εn'ʉ yʉ xänbate niją ngue m'bɛt'o thoho ba penc'a ra Elías, nε ja ba ε'a rá Thahni Oją ngue ra Cristo bʉya, bi 'yɛ̞n'ʉ.

11—Majuani im ma ngue m'bɛt'o ba ɛh ra Elías di hoqui gätho. 12 Pɛ dí xi ahu, ya bi zøh ra Elías nɛ njon bi badi ngue gue'a. Pɛgue bi mba ma unbi nɛ bi mba ma ucpi, nɛ ngutho da t'ørcä ya, nugä ngue dán ja'igä ua ja ra ximhäi, bi 'yɛn'a ra Jesús.

¹³Ja bi bą н ma mixädihe bнуа gue tengu'bн ra Elías a ra Xuua Nxixyą.

Nu ra Jesús bi hoc'a n'da ra sändąte

¹⁴Nɛ nu'bu mi zøm bu 'buh yu ja'i, bi zøm bu n'da ran 'yohu bu mí 'bäh ra Jesús, nɛ bi 'yɛmbi:

15—Gra Hmu, dami 'yørqui ts'u ran huɛcate a ma ts'unt'u, jant'a thoho i sändate nɛ hønbu go i so 'bu xø 'yagui. Ja'bu i so bu ja ra sibi, nɛ ja'bu i so bu ja ra dehe, hønbu go hapu 'yo 'bu xøn zändate. 16 Nɛ bá sigä bu mi 'bu u ni xädi, pɛ him bi zä bi hyacpa a ran u in 'youi, bi 'yɛn'a ran 'yohu.

¹⁷Nε bi 'yɛn'a ra Jesús:

—Gyu ts'om'bäihu, hin guí ¿c'yɛihu Oją xun ho. Hangu yu pa ga tøp'a thoho ahu ngue gui 'yɛc'yɛigahu, bi 'yɛn'a ra Jesús. Bá si ni ts'unt'u guím ma, bi t'ɛmp'a ran 'yohu.

¹⁸Nu'bu mi zøpu buya, nu'a ra Jesús bi zu a ra zįthu min 'youi, ne bi xifi da bøni. 'Bex bi yąn'a ra ts'unt'u buya.

19 M'bɛjua buya bin yahu u ma mixädihe a ra Jesús nubu dám 'busehe.

—Hanja him bi zä dá høngähe thi a ra zįthu min 'youi a ra ts'unt'u, bi 'yɛn'u.

²⁰Bi dą a ra Jesús nε bi 'yεna:

—Him bi zä gá hyømhbu thi ra zithu, nguetho ts'utho guí ¿c'yɛihu. Man'da zi ts'utho ni t'ec'yeihu xinda gue n'da rá hmudä ra c'u ngue ɛmmɛ zicuɛ. Nɛ nu'bʉ da zøni gui 'yɛ̞c'yɛihʉ tengu n'da rá hmudä ra c'u, da zä gui xihmbu n'da ra t'øhø: "Dami 'uegue gui than nu n'danni," gui 'yɛmfʉ, nɛ da 'uegue. Hin te gui hyɛmfu 'bu majuani gui 'yɛc'yeihu. Gätho xun hei i sä gui 'yøthu, bi 'yɛnje. 21 Pɛ nu'u 'da'u yu zįthu tengu min 'youi a ra ts'unt'u, xun hei da hyøn a thi u, pe hønt'bu emme hah rá mbui din yaui Oja ne da 'ye't' ran ts'ihme n'da, da zä da hyøn a thi u, bi 'yɛngähe ra Jesús.

Ra Jesús bi ma mahøn'a da tho ne da dambeni

²²⁻²³Νε nu'bʉ mán 'yohe bʉ ra häi Galilea, bi 'yɛ̞nje mahøn'a a ra Jesús:

—Nugä ngue dán ją'igä ua ja ra ximhäi, dan dägä bu 'buh yu ją'i ngue da thogä. Pɛ ga thambɛni 'bʉ ná hyu pa, bi 'yɛn'a ra Jesús. Nɛ ɛmmɛ bi du ma mbʉigähe bʉya.

N'da ran t'änni to'o i jut ra mbeti nangue ra niją

²⁴Nε nu'bʉ má sømhbe bʉ ra hnini Capernaum a ra Jesús, bi t'ɛmp'a ra Pedro:

—Xi ni xänbatehu, ha hingui jut'a ra mbɛti dí haxähe nangue ra nija, bi t'ɛmbi.

²⁵Bi dą a ra Pedro buya:

--Hąhą i jut'i, bi 'yεmp'u.

Nε nubʉya nu'bʉ mi yʉrpʉ ja ra ngu xín säya a ra Jesús, 'bex bi t'än'na ra Pedro:

—'Bɛ'a guím bɛni gra Simón, ha nɛ'u yú t'uhni yu ts'ut'abi i jut'a ra mbɛti ua ja ma häihu, uague hønt'u yu ja'i thoho, bi 'yɛn'a ra Jesús.

²⁶Bi dą a ra Pedro:

- —Nu'u yu ją'i thoho.
- —Janangue'a hin mán zähma'be ga jut'ä 'bu hingui jut'u yú t'uhni yu ts'ut'abi, bi 'yɛn'a ra Jesús.
- ²⁷—Pɛ ni mba bu ja ra dadehe, gui hyu'ts'a n'da ra hua, nɛ gui xemba rá nde. Gui tim bu n'da ra mbɛti, ngue'a xøt'a ga jut'ui a ra cota a ra nija, n'dahma hin da bɛman'u u i hax ra mbɛti, bi 'yɛn'a ra Jesús.

Ra Jesús bi ma to'o xtán hẹts'i bu dán nu Oją

18 Ne xø dá änhde a ra Jesús:
—Xiya, to'o man'da xun
hets'i rán t'edi bu na hnu bu di
manda rá ts'edi Oja, dá emfe.

²Nu ra Jesús buya bi zohna n'da ra t'uhni nε bi guts'i bi mbämp'u made, ³nε bi 'yɛ̞nje: —Majuani dí xi ahu, nde'bu gui päh ni mbuihu gui cohmbu tengu'bu gyu t'uhnihu, nu'bu hin'na hin gui sä gui cuthu bu di manda rá ts'edi Oja 'bu, bi 'yɛnje.

Ne nu'a to'o da gohi tengu'bu ra t'uhni ne da 'yøt'e ngue hin'yu rá ts'edi, gue'a xtán hɛts'i rán t'ɛdi bu na hnu bu di manda rá ts'edi Oja.

Ne nu'a to'o da numanho n'da ra t'uhni nangue ma thuhugä, nam bøni bi zingä buya, bi 'yɛngähe ra Jesús.

Yun t'u't'ate i ja ua

6—Pɛ nu'bu 'bo'o di japi da 'ue a n'da ra t'uhni ngue i ɛc'yɛigui, xun utho ran unbi da nu. Man'da xun u xinda gue'bu da t'erpa ra dojuni rá 'yuga nɛ da thørpu ja ra dadehe, bi 'yɛn'a ra Jesús.

⁷—Nhuɛcate ahu nangue yum 'bɛpate xun ngu da t'øt'ahu. Guehma gui nuhu u, pɛ í huɛhi maha to'o di 'bɛp'ahu, bi 'yɛna.

⁸Pe nu'bu guí ɛmhbu gue'a ni 'yɛhu o gue ni guahu di 'bɛp'ahu gui 'yøthu ra ts'oqui, pe xun ho 'bu gui hyeju gui 'yemhbu bu yatho. Nguetho man'da xun ho 'bu dan 'datho ni guahu o gue dan 'datho ni 'yɛhu 'bu gá mba bu ja ra te mazai, xinda gue'bu di yoho ni 'yε o gue di yoho ni gua ne gui mba bu ja ra sibi njam'bu da huɛt'i. 9Ne ngutho 'bu guí ɛmhbu gue'a n'da ni dähu di 'bεp'ahu gui 'yøthu ra ts'oqui, pε xun ho 'bu gui hyahmbu gui 'yemhbu bu yatho. Nguetho man'da xun ho 'bu dan 'datho ni dähu 'bu gui cuthu bu ja ra te mazai xinda gue'bu di yoho ni dähu nε gui mba bu ja ra sibi njam'bu da huɛt'i, bi 'yɛn'a ra Jesús.

Ran t'uti nangue ra de'yo bim 'bedi

10—Dami jamansuhu a guí øthu. Hin gui 'yøthu tengu'bu nte di muui u zicuɛ, nguetho dí xi ahu nu yúm 'bɛhni Oją di jamansu u, nɛ zại i 'bupu ja rá hmi ma Ta bu mahɛtsi u yúm 'bɛhni. 11 Nguetho nugä, ngue dán jaligä ua ja ra ximhäi, bá ɛcä ngue ga nyanba yú te u xøm 'bɛdi nangue yu ts'oqui, bi 'yɛn'a ra Jesús.

12-13—'Bɛ'a guím bɛmhbu bi 'yøt'a n'da ran 'yohu ngue mí si n'da ciento yú dɛ'yo. Nɛ bim 'bɛ a n'da. Ha him bi hyon'a bim 'bɛdi. Pɛ bi zopu u goho 'däte ma 'dɛ'ma guto bu mi sapaxi u, bi mba bi hyon'a bim 'bɛdi. Nɛ nu'bu mi dini, man'da bin johya nangue'a, xinda gue'u mi'da ngue him bim 'bɛdi. ¹⁴In jabu ma Tahu bí 'bupu mahɛts'i, in ndepe xinga n'da dim 'bɛdi, madague'a hin te di muui bu na hnu, bi 'yɛn'a ra Jesús.

N'da ran hocpi nangue yu 'yɛɛ'yɛi

¹⁵Νε man'da ram hma bi man ra Jesús, bi 'yɛ̞ngähe:

—Nu'bu n'da ni cuhu bu ja ram peti, 'bu hinga gue'a da 'yøt'e e, gui xi 'bu guí 'buseui, janangue'a da badi hingui ho a bi 'yøt'e e, bi 'yɛngähe ra Jesús. Nɛ nu'bu bi 'yømanho a gui xifi, ya gá taha gá hocpa rá mbui a ni cu. 16 Pɛ nu'bu hingui urpa ra güɛnda a gá xifi, gui six man'da o gue mí yoho yu cu din testigo nangue'a guí mammi. 17 Pɛ nu'bu guexta'a him bi 'yurpathoho ra güɛnda a guí mammi mahøn'a, gui mam bu ja ram peti buya. Nɛ nu'bu him bi 'yurpa ra güɛnda

a 'bɛ'a gá xihmbu bu, pɛgue gui 'yøthu tengu'bu hin ni cuhu a buya, bi 'yɛngähe ra Jesús.

18—Majuani dí xi ahu, nu 'bɛ'a guí ɛmhbu hingui ho ua ja ra ximhäi, nɛpu mahɛts'i i t'ɛmbi hingui ho a. Nɛ ngutho a guí ɛmfu xun ho, nɛpu mahɛts'i i t'ɛmbi xun ho a, bi 'yɛngähe ra Jesús.

19—Nɛ nu'bu guí yohmi 'bu n'dat'a guím bɛmmi 'bu ja a guí ähui ma Tahu 'bupu mahɛts'i, nu'a di 'da aui a gá 'yähui. 20 Nguetho nu'bu dim pɛti nangue ma thuhugä 'da, madague'bu yoho o gue hyu, pɛgue dí 'bä i nde bu, bi 'yɛn'a ra Jesús.

²¹Nε bi 'yän'na ra Pedro:

—Gra Hmu, xi'bu ja 'bɛ'a da 'yørca n'da ra ja'i, hangu yu nidi ga punbi. Ha xøt'a yoto nidi, bi 'yɛn'a ra Pedro.

²²Bi da a ra Jesús:

—Hinga hønt'i yoto nidi, pε nde'bu thocpa tho gui punbahu, bi 'yɛn'a ra Jesús.

N'da ran t'uti a him bi punba rá mimbefiui

²³—Janangue'a dí xi ahʉ, nu'a nán ts'ʉt'abi Oją, i øt'e tengu bi 'yøt'a n'da ra ts'ʉt'abi 'bʉ mi 'yʉrpa ra güɛnda hangu in dupate yʉm fäts'ihʉ. ²⁴Nɛ nu'bʉ mi nu rá søcuą, 'bexgue bi manda ba ts'i a n'da ngue min dupate yʉ millone thoho. ²⁵Pɛ nu'a ra ją'i, hin'yʉ 'bɛ'a mi ja ngue xtán zä xtán gut'a min dupate. Nɛ nu ra ts'ʉt'abi bʉya, mi nde xtá mbä a, nɛ yʉ́ t'ʉhni, nɛ rá xisu mí 'bʉpʉ ja rá ngu, nɛ 'bɛ'a gä mi pɛ'ts'i, ngue da gut'a ndupate. ²⁶Nɛ nu'a ran 'yohʉ bʉya bin danyahmu

nε nts'εdi bi 'yäp ra mate a rá hmu: "Gra hmu, tøcpi ts'u, jante tho ga jut'i i." ²⁷Nu rá hmu buya bi huɛc'a, nε bi punba a rán dupate nε bi thøh puya. 28 Pe nu'bu mi nexpu, bin c'at'ui n'da rá mimbefiui xí hmit'i ts'u ra mbeti. Nu'a xí mba ma thøgue buya, 'bexgue bim bent'ate, bi bendba rá 'yuga a bin c'at'ui, ne bi 'yembi: "Curca a ma mbeti guí tuc ya," bi 'yɛmbi. 29 Nɛ nu'a rá mimbefiui buya bin danyahmu ne nts'edi bi 'yäp rá mate, bi 'yembi: "Tøcpi ts'u, jante tho ga jut'i i," bi 'yembi. 30 Pe nu'a xí mba ma punbi him bi dø'mi, bi got'a fädi, embi din ofädi jague'bu da gut'a in dupate. 31 Ne nu yú mimbefiui buya emme bi bendumbui 'be'a bi 'yøt'a xí mba ma punbi, ne bi mba bi xi a rá hmu 'bɛ'a bi 'yøt'a. ³²Nu yú hmu buya bi manda bá ts'i a ran 'yohu mahøn'a ne bi 'yembi: "Gra ts'om'bäi, nugä dá pun'ni i 'bu gmí 'yäc ra mate, madague'a xun ngu guí tuqui. ³³Nde'bu nɛ'e xquí huęc'a ni mimbefiui," bi 'yen'a rá hmu. 34 Emme bin cue a rá hmu, bi manda da jot'i gue'bu go bi gut'a gätho yu millone min dupatese, bi 'yɛn'a ra Jesús, 'bu mi man a ran t'uti.

³⁵Din jabu da 'yøt'ahu ma Tahu 'bupu mahɛts'i 'bu hin gui punbahu ni mija'ihu ngue gätho ni mbuihu, bi 'yɛngähe ra Jesús.

Man'da ram hma nangue ran hyegui

Nε nu'bu mi gua'a man ra Jesús, bi bøm bu Galilea, bi hyax ra 'yu ni mba bu ra xεqui Judea, 'danguadi ra dathe Jordán. ²Nɛ xʉn ngu yʉ jạ'i bi dɛnthoho nɛ bi hoqui xʉn ngu yʉ hyɛnni.

³Nɛ nubuya, bi zøm bu'da ma ngurpihe ngue yu fariseo, bu mi 'bäh ra Jesús . Mí honi 'bɛ'a dí yapi, nɛ bi 'yɛmbi:

—Ha sä da hyɛh rá xisu n'da 'bʉ madí ts'ʉtho 'bɛ'a da 'yøt'e, bi 'yɛn'ʉ.

⁴Nu ra Jesús bi dąti:

—Ha hin gá nuhu bu ja rám hman Oją, ngue'bu rá mbudi thoho ra ximhäi bi zän Oją n'da ran 'yohu nɛ n'da rá xisu. ⁵Nɛ i mam bu: "Nu n'da ran 'yohu him man da dɛn'na rá ta o rá mbe 'bu dim 'buhmi rá xisu, pɛ dim 'buhmi da gohi tengu'bu n'dan ją'itho," i ɛm bu ja rám hma Oją. ⁶Janangue'a nu'bu n'da ran 'yohu i 'buhmi rá xisu, pɛ hingui yonją'i bu na hnu, n'datho. Nɛ nu'a bi zän Oją, dim 'bui tengu'bu n'dan ją'itho,pɛ hin njon da bɛni din hyɛgui, bi 'yɛn'a ra Jesús, bi t'ɛmp'u yu fariseo.

⁷—Hanja gní 'yɛnje, nɛ nu ra Moisés bi ma da t'øt'a n'da rá søcuą ran xuni 'bʉ da hyɛh rá xisu n'da ran 'yohʉ, bi 'yɛn'ʉ yʉ fariseo.

⁸Xø bi 'yɛ̞n'a ra Jesús bʉya:

—Gue'a bi 'yo't'a ra Moisés, nguetho εmmε xum mε ni mbuihu. Pε nu'bu rá mbudi ra ximhäi him mín jabu. ⁹Nε dí xi ahu, nu'bu n'da ran 'yohu bi hyɛh rá xisu nε him mi 'yomt'ɛni a rá xisu, pɛ nu'bu bin thạt'ui man'da ra xisu a ran 'yohu, ya i 'yomt'ɛni a buya. Nɛ ngutho 'bu n'da ran 'yohu din thạt'ui n'da ra xisu bi thɛgui, nɛ a ra 'yomt'ɛni a buya, bi 'yɛn'a ra Jesús.

¹⁰Nε nubʉya, dá εmbähe ra Jesús:

—Nu'bu hingui sä da hyɛh rá xisu n'da, man'da xun ho 'bu hin din that'a n'da 'bu.

¹¹Ra Jesús bi 'yɛ̞na:

—Pε hinga gätho da zä din jabu, pε hønt'u bi zän Oją din jabu.

12 Nguetho i 'bu i 'da ngue him bim 'buh rá xisu nguetho yu mbɛdi gue'bu go mim 'bui. Nɛ nu'u mi'da yun 'yohu him bim 'buh yú xisu nguetho bi mbocpa u yú hmu. Nɛ nu'u mi'da, yú pähä zɛhɛ him bim 'buh rá xisu nguetho gue'a í ts'änni ngue hin dim 'buh rá xisu, ngue nte di hɛni nangue rá 'bɛfi Oją mahɛts'i da 'yøt'e. Nu'a to'o da bɛn'na ram hma na, gue'a da bą a, bi 'yɛn'a ra Jesús.

Ra Jesús bi 'yäp rán jąpi Oją nangue'u yu t'uhni

13 Nε nubuya bá ts'inba 'da yu t'uhni bu mi 'buh ra Jesús, ngue'a mi hndepe da dospa yú yą yu t'uhni, nε da 'yäp rán jąpi Oją nangue u yu t'uhni. Nugähe buya, dá hεcpähe u yú ta u yu t'uhni ngue hin da thopu 'bä a ra Jesús. 14 Pε nu ra Jesús bi 'yɛ̞nje:

—O guí hεcpahu yu t'uhni ngue him ba thocua, pε dami jafu ba thocua, nguetho nu'u to'o di manda rá ts'εdi Oją, tengu'bu yu t'uhni u, bi 'yɛna.

¹⁵Nɛ bi dospa yɨ yą yu t'uhni buya nɛ bi 'yäp rá mfäts'i Oją. Nɛ nu'bu mi jua a bi 'yøt'a ra Jesús, dá pøngähe bu buya.

N'da ra membeti bi nyaui ra Jesús

¹⁶Νε man'da ra ts'ʉnt'ʉ bi mba bʉ 'bä a ra Jesús nε bi 'yɛ̞na:

—Hoga xänbate i, 'bɛ'a nin ho da zä ga øt'ä ngue ga tingä ra te, bi 'yɛna. ¹⁷Ra Jesús bi 'yɛmp'a:

—Ha guím bɛni 'bɛ'a guí ma ngue guí ɛngui xʉn hogui, nguetho hønt'a xʉn ho a Oją. Pɛ nu'bʉ guín nde gui tịn ra te, dami ją'ts'ʉ yʉn t'ɛdi.

¹⁸—Nda'a nín t'ɛdi, bi 'yɛn'a ra ts'ʉnt'ʉ.

19 Bi da'a ra Jesús:

—O guí hạcpa rá te ni miją'iui, o guí 'yomt'ɛni, nε o guím pɛ, nε o guí man yu fɛhni, nɛ gui numansu ni ta nɛ ni mbe, nɛ gui huɛc ni miją'iui tengu'bu da guesɛ i, bi 'yen'a ra Jesús.

²⁰—Gätho u xtá ją'ts'i gue'bu go mán t'uhni, 'be'a man'da di 'bedi ga øt'e, bi 'yɛn'a ra ts'unt'u.

²¹Nu ra Jesús bi 'yɛmp'a:

—Nu'bu guí nde gui tịn ra te, ní mba bá pä 'bɛ'a gätho i ja i, nɛ gui darpa yu hyoya a rá muui 'bɛ'a gätho gá pä, nɛ din ja'a man'da di muui bu mahɛts'i buya, nɛ nubuya ba ɛhɛ gui tɛngui.

²²Pɛ nu ra ts'ʉnt'ʉ 'bʉ mí 'yø a bi xifi, ɛmmɛ bi du rá mbʉi, nguetho ɛmmɛ xʉn ngu 'bɛ'a gä mi ja, nɛ bi mbeng thoho bʉya.

²³Nε nu a ra Jesús buya:

—Majuani dí xi ahu, bi 'yɛna, xun hɛi da yurpu di manda rá ts'ɛdi Oja n'da ra mɛmbɛti. ²⁴Dami 'yøhmbu mahøn'a. Man'da hingui hɛi da yut'a ra camello bu ja rá gu ra 'yofani, xinda gue'a n'da ra mɛmbɛti da yurpu di manda rá ts'ɛdi Oja ,bi 'yɛnje.

²⁵Nɛ dá hyonya thohohe 'bʉ má øhmbe bi ma ra Jesús. "To'o maha da zä din yani," dán 'yɛm zɛhɛhe bʉya.

²⁶Bi hyęrcähe ra Jesús ne bi 'yɛnje:

—Hin da zä da 'yøzεhε yu ją'i, pε nu'a Oją hingui hεmp'a da 'yørpa u yu ją'i.

²⁷Nu ra Pedro buya bi 'yɛmp'a ra Jesús:

—Gra Hmu, nugähe dá socähe gätho 'bɛ'a mí pɛts'ähe nɛ dá tɛn'nahe, 'bɛ'a maha ga timhbe ya.

²⁸Ra Jesús buya bi 'yɛ̞nje:

—Majuani dí xi ahu, 'bu bin ja ma'da'yo mahɛts'i nɛ ma'da'yo ra ximhäi, din ja ma ts'ɛdi mixte, ga hupu ja ma mɛxa ga øt' ran ts'ut'abi, nugä ngue dán ja'igä ua ja ra ximhäi. Nɛ ahu guí 'dɛ'mayoho ahu, 'darbu ga huhmbu, ga comhbu ma ts'ɛdigä, nɛ'ahu ga juanbahu ma mi israelhu dyu judíohu, bi 'yɛngähe ra Jesús.

²⁹Νε man'da bi man ra Jesús, bi 'yεna:

—Nu'a to'o bi zoh rá ngu, o gue rán 'yohu o gue rán ju, o gue rá ta o gue rá mbe, o gue rá xisu o gue yú t'uhni bi zogui ngue bi dɛngui, o gue rá huahi, da daha man'da xun ngu xinda guet'a n'da ciɛnto nidi, nɛ a ra te mazai da hyani, bi 'yɛngähe ra Jesús. ³⁰ Pɛgue nu'u im bɛni i 'bɛt'o dim 'bɛjua u. Pɛ nu'u t'ɛmbi i 'bɛjua, dim 'bɛt'o u, bi 'yɛngähe ra Jesús.

N'da ran t'uti bi 'yøt'a n'da ra me'befi

 $20~{\rm N}\epsilon$ man'da ran t'uti bi man ra Jesús, bi 'yɛ̞na:

—Nu'bu bi 'yøt' ran ts'ut'abi Oja, din ja tengu bi 'yøt'a n'da ran 'yohu mí ja ra dahuahi. Midi 'yonba yu mbɛfi 'bu xudi thoho. ²Nɛ 'bex bi xifi hangu da gu't'i, nɛ bi mba bu ja rá huahi u buya. ³Nu'bu mbɛ guto xudi, xø i 'yo bu hnini a ra mɛ'bɛfi

mahøn'a, ne bi nu 'da yun 'yohu mi 'yotho bu ne bi mben bu ja rá huahi. 4"Ní mbähä, gam pehmbu, ga jut'ahu hangu dí nde ahu gui tahmbu," bi 'yembi. Ne bi mba u buya. ⁵Nε nu'bu mi hyuxyadi, xø 'yo bu ja ra hnini mahøn'a ra me'befi ne bi mbenh mi'da bu rá huahi. Ne'bu mi zøn'a hyu nde, xø bi mbenh mi'da. ⁶Ne'bu mi zøn a cut'a nde, xø 'yo bu mahøn'a nε bi nu bu mi'da yu ją'i: "Hanja ngue xcán dethohu," bi 'yɛmbi. ⁷"Nguetho njon bi xije ra ' bɛfi," bi 'yɛn'u. Ne bi 'yɛmp'u: "Ní mbähä bu ja ma 'befigä gam pehmbu bu, ga jut'ahu hangu dín ndegä ga jut'ahu," bi 'yɛmbi. ⁸Nu'bu min de buya nu ra me'befi bi xi a rá ngurpa mbefi: "Dami zon'du yu mbefi, m'bet'o gui jut'u m'bejua bi zøni," bi 'yemp'a. ⁹Nε nu'bʉ mi mba nju't'i ʉ xi zøm bu ja ra huahi 'bu cut'a nde, bin ju't'i tengu'bu gä ra pa xtím pɛfi. ¹⁰Nε nu'bu min ju't'u bi mbumxudi ra 'bɛfi, bi bɛni ngue man'da xtán daha xun ho xinda gue'u n'da ora tho bim pefi. Pegue 'da'angu bi daha. ¹¹ Janangue'a bin cue u 'da ¹²nε bi 'yεmp'a ra mε'bεfi: "Hanja ngue 'da angu gá jurcahe u m'bejua bi zøhø, ne ts'utho bim pe u. Pe nugähe, gätho ra pa dám pehmbe, madague'a xum pa ra hyadi," bi 'yembi. ¹³Pe bi dati, bi 'yemp'a n'da mí 'bäpu: "Xi'e n'yø, nte man ts'o dá øt'e e. Ha hinga gue'a dá xi i dá jut'i i. ¹⁴Dami hyan'a nin zäbi, ní mba. Nugä, i ja ma pähä 'da angu ga jut'ahu u rán zegui bi zøhø. ¹⁵Ha hin'yu man t'ɛdi ga øt'ä a dín nde ga øt'ä nangue ma mbeti, uague guí seya nguetho dá ørpa ran hocja'i

n'da," bi 'yɛn'a ra mɛ'bɛfi bʉya, bi 'yɛn'a ra Jesús 'bʉ mi man a ran t'uti. ¹6Nɛ ngubʉ din ja 'bʉ bin ts'ʉt'abi Oją . Nu'ʉ m'bɛjua dim 'bɛt'o ʉ, nɛ nu'ʉ 'bɛt'o dim 'bɛjua ʉ. Xʉn ngu bi zonhd Oją , pɛ hinga gätho bi huahni, bi 'yɛngähe ra Jesús.

Xø bi ma mahøn'a ngue da du ne da dambeni ra Jesús

¹⁷Nɛ nu'bu mi ts'utho ga sømhbe bu Jerusalén, dí 'yohe bu ja ra nguani. Nɛ bi gugähe bu ma'ueni ts'u a ra Jesús, dí 'dɛ'mayohohe, nɛ bi 'yɛnje:

¹⁸—Nuya ga mbähä bu Jerusalén. Nu'bu dá sømhbu bu, da mba ma dägä bu 'buh yu hmumbäja ne yu xänbate nija, ngue da hyogä, guecä dán jaligä ua ja ra ximhäi. ¹⁹Ne di dägä bu 'bu u him ma mijudíohu, ne din thengui ne da thexcä ne di cuarcä bu ja ra za, ga tu bu, ne da t'ägui. Pe nu'bu ná hyupa ga thambenigä, bi 'yengähe ra Jesús.

Rá mbe ra Jacobo ne ra Xuua bi 'yäp rá mate ra Jesús nangue yú ts'unt'u

²⁰Nε nu'a rá mbe ra Jacobo nε ra Xuua, ngue yú ts'unt'u ra Zebedeo u, bin dąnyahmu bu ja a rá gua ra Jesús, in nde 'bε'a da 'yäpi. ²¹Nε nu ra Jesús bi 'yɛ̞mbi:

- —'Βε'a guí nde ga øt'e e, bi 'yεmbi.
- —Dami 'yørca ra mate ngue nu'bu gui 'yøt' ran ts'ut'abi,'da xtí hyut'u ma t'uhni, bi 'yɛn'a ra xisu.

²²Bi da a ra Jesús:

—Pɛ hin guí pądi 'bɛ'a nam bøn'a gá 'yäqui.

Ne bi 'yän'na ra Jacobo ne ra Xuua: —Ha guí ɛna nɛ'aui gui hyät'ui gui nuui ran ʉnbi tengu gan nugä, bi 'yɛn'a ra Jesús.

Nε bi da u buya:

—Haha, ga hät'be.

²³—Majuani maha, nɛ'aui gui nuui ran unbi tengu gan nugä, pɛ hingui sä ga 'da'a ran t'ɛdi guí ähmi. Pɛ gue'a ma Ta di un rán t'ɛdi to'o in ndepe 'da xtí hyutho 'bu dán ts'ut'abigä, bi 'yɛn'a ra Jesús.

²⁴Nɛ nugähe dí 'dɛt'agähe bʉya dán cuɛ 'bʉ má øhmbe a 'bɛ'a bi man ʉ yoho. ²⁵Nɛ gä bi zongahe ra Jesús dí 'dɛ'mayohohe, nɛ bi 'yɛnje:

—Nu'u yu ts'ut'abi ua ja ra ximhäi i øt' yú 'yɛhɛ to'o gätho di manda, nɛ tengu'bu maguesɛ yú ts'ɛdi u. ²6 Pɛ nu'ahu hinga gue'a gui 'yøthu a. Pɛgue gan 'yɛhɛ thohohu nangue u mi'da 'bu guí nde din ja ni ts'ɛdihu. ²7-²8 Nɛ nu'ahu 'bu guín nde gam 'bɛt'ohu, gui 'yøthu ngue hin'yu ni ts'ɛdihu nɛ gan 'yɛhɛ thohohu, tengu thohogä ngue dán ja'igä ua ja ra ximhäi, him bá ɛcä dam hmugä, pɛ bá ɛcä dan 'yɛhɛgä nɛ ga dä ma te gan yanba yú te yu ja'i, bi 'yɛnje ra Jesús.

Yoho yu xädä bi hoc'a ra Jesús

²⁹Nɛ nu'bʉ xø má nɛxhe bʉ ra hnini Jericó, xʉn ngu yʉ jạ'i bi dɛntho na ra Jesús. ³⁰Nɛ mí hupʉ yoho yʉ xädä bʉ ja ra nden'yu. Nu'bʉ mí 'yøde mba bʉ ra Jesús, bi mbafi:

—Grá Hmu, rám bom'beto i ra David, dami huggä'be, bi 'ygn'ʉ yʉ xädä.

³¹Nɛ nu yʉ ją'i min 'yohʉ ra Jesús bi hɛcpa ʉ yʉ xädä. Pɛ man'da bi mba ʉ, bi 'yɛ̞m mahøn'a: —Grá Hmu, rám bom'beto i ra David, dami huggä'be, bi 'yɛn'ʉ.

³²Nu ra Jesús buya 'bu mí 'yø a man u yu xädä, bi 'yänni:

—'Bɛ'a guín nde ga øt'aui, bi 'yɛ̞mp'ʉ.

³³Nu'u bi dąti:

—Grá Hmu, xoga ma dä'be, bi 'yɛ̞n'ʉ.

³⁴ Emmε bi huɛc'a ra Jesús ʉ, bi därpa thoho yʉ́ dä, 'bex bi xoh yʉ́ dä nɛ bi dɛn'na ra Jesús bʉya.

Yu ją'i bi 'yęspa a ra Jesús 'bu mí yurpu Jerusalén

21 Ne bi zøm bu ja ra ndehnini Betfagé, nubu ja ra nyuni Olivos, ne him ma yabu ra hnini Jerusalén. Nu ra Jesús buya bi mben'ndu yoho ma mixädihe, ²ne bi 'yembi:

—Ní mbɛ nu ja ra t'uhnini, guehnu gua timmi n'da ra buru in 'youi rá basi. Bá xocui, nɛ bá siui ua u. ³Nu'bu da t'ɛn'aui 'bɛ'a gui jahui, "Nu'a ra hmu da hyon'i ts'u nɛ 'bexgue ba sin'a thoho'be," gui 'yɛm thohoui, bi 'yɛn'a ra Jesús.

⁴Nɛ guehna bi man ra pøngahyą maya'bʉ ngue din ja 'bʉ mi 'yɛna:

⁵ Gui 'yɛmfʉ yʉ mɛngu bʉ Jerusalén:

"Dami nuhu ya ba gcua ni hmuts'ut'abihu,

nε hin din 'yεts'i, ba hyux'a n'da zi buru thoho

bán 'youi rá bạsi ," gui 'yɛmfʉ, bi 'yɛn'a ra pøngahyą maya'bʉ.

⁶Nu ma mixädihe buya bi mba nɛ bi 'yøt'a bi xih ra Jesús. ⁷Nɛ bá si ra buru nɛ'a rá basi, nɛ bi gaṣpa yú coto nɛ bi hyux'a ra Jesús buya. ⁸Nɛ nu yu ja'i ɛmmɛ xun ngu u bi dɛnni nɛ bi mbøh yú coto bu ja ra 'yu nɛ yú pahni, nɛ yú paxi yu za bi mbøcpa bu ngue da thopu ra Jesús. Nɛ bi 'yɛt'inde ra Jesús. ⁹Nɛ nu'u i 'bɛt'o nɛ'u bim 'bɛjua bi mbuh na thuhu buya, bi 'yɛna:

—Mixte thoho rá ts'edi rám bom'beto ra David. Ne xun ngu rán japi in 'youi, nguetho bá ehe nangue rá thuhu Oją, ra Hmu. Mixte thoho Oją mahets'i, bi 'yen'u yu ja'i bu ní mba.

¹⁰Nε nu'bu bi yurpu Jerusalén ra Jesús, gätho mi 'bupu ja ra hnini bi hyonya thoho, nε bi 'yän'ndu mín 'yohu ra Jesús:

—To'o nín 'yohu na, bi 'yɛn'u.

11—Guehna ra pøngahya, ra Jesús, ra mengu Nazaret bu ra häi Galilea, bi 'yen'u bi t'änni.

Bi hyøn a thi u mim pä bu ja ra nija ra Jesús

12 Nɛ nu'bu mi zøm bu Jerusalén a ra Jesús bi yurpu ja rá danija Oja, bi hyøn a thi gätho u mím pä bu nɛ'u mín täi bu. Nɛ bi ndønpa yú mɛxa u midí päh yu mbɛti, nɛ bi buntpa yún thuts'i u mi pä yu ts'aha, nɛ bi 'yɛmp'u:

13"Í thø a ma ngu ngue da mba nthạndegä bu," i ɛn Oja, i ɛm bu ja rám hma. Pɛ nu'ahu gá 'yørpadahu tengu'bu ra hyado guepu nín 'yan'u yu bɛ, bi 'yɛn'a ra Jesús.

14 Nɛ nu'bu mí 'bupu ja ra danija, xø bi zøm bu mi'da yu xädä, nɛ'u mi dogua. Nu ra Jesús bi hoc'u buya. 15 Pɛ nu yu hmumbäja nɛ yu xänbate nija him bi numanho yun t'øt'e bi 'yøt'a ra Jesús bu. Nɛ bin cuɛ 'bu mí 'yø a bi man'u yu t'uhni 'bu mí 'yɛna: "Majapi rám bom'bɛto ra David," bi t'ɛmp'a ra Jesús:

16—Ha hin guí ø'a 'bɛ'a man yu t'uhni ngue i ɛ'ts'i i, bi t'ɛmp'a ra Jesús.

—Dí øcä a i man'ʉ, bi 'yɛ̞n'a. Pɛ xi ahʉ ha hin guím bɛ̞mhbʉ a i mam bʉ ja rám hma Oja̞ ngue i ɛ̞na:

Gá japi bi bømanho a i man u yu t'uhni 'bu i ɛ'ts'i i, bi t'ɛmp'a Oją 'bu mi t'ɛmbi,bi 'yɛn'a ra Jesús.

¹⁷Nε bi zotpu u yu hmumbäją nε yu xänbate, dá mbäcähe a ra Jesús, bán oxähe bu ja ra hnini Betania.

Ra Jesús bi japi da 'yot'a n'da ra za

¹⁸Nɛ nu'bʉ mí hyax bʉya, xø dá pengähe a ra Jesús bʉ Jerusalén. Nɛ bin tumanthuhu bʉ 'yu. ¹⁹Nɛ bi nu n'da ra za bʉ ja ra nden'yu, bi mba ɛna da dʉcpa n'da rán dät'ä. Pɛ hønt'ʉ yʉ́ paxi mi ja. Nɛ bi 'yɛn'a ra Jesús:

—Nuya, njạm'bu din zuh nin dät'ä ya.

Nε 'bexgue bi 'yot'a ra za buya.

²⁰Nu'bu mán nuhe bi 'yot'a ra za, dá hyonya thohohe nε dá änhde ra Jesús:

—Hanja í 'yot'a n'dihi ra za, dá εmfe.
 ²¹Bi da'a ra Jesús:

—Majuani dí xi ahu, nu'bu gui 'yɛc'yɛigahu xun ho, nɛ n'dat'a guim bɛmhbu a rá ts'ɛdi Oja, hinga hønt'a dá øt'ä sä gui 'yøthu, pɛ sä gui 'yøthu man'da xun hɛi. Sä gui xihmbu nu ra t'øhø: "Dami 'uegue guin hyøzɛhɛ bu ja ra deja," gui 'yɛmfu, nɛ da 'ueh puya. ²²Nɛ nu Oja di 'da ahu 'bɛ'a gä guí äfu 'bu n'dat'a guím bɛmhbu a rá ts'ɛdi Oja, bi 'yɛngähe ra Jesús.

Bi t'än'na ra Jesús to'o bi un rán t'gdi

²³Nɛ nu'bʉ má sømhbe bʉ Jerusalén, xø bin xänbate bʉ ja ra dạniją a ra Jesús. Ne xø bi mba bu yu hmumbäją ne mi'da ma ngurpihe, ne bi 'yän mahøn'a:

—Hanja gní 'yøt'a njabu. To'o bi 'da'a nin t'ɛdi, bi 'yɛn'u.

²⁴⁻²⁵Bi 'yɛn'a ra Jesús buya:

—Necä ga än'nahu to'o bi un rán t'ędi ra Xuua ngue bi 'yøt' ran xixyą. Hague Oją uague yu ją'i. Nu'bu gui xiju, necä ga xi ahu to'o bi 'dacä man t'ędi buya, bi 'yɛn'a ra Jesús.

Ne bin 'yemzehe u yu hmumbäją ne yu xänbate nija:

—"Bε'a gue ga xihmbu, nguetho nu'bu ga εmfu, "Oją bi un rán t'εdi a ra Xuua," nε da 'yɛna: "Hanja hin gá 'yɛc'yɛihu thạ." ²⁶Νε nu'bu ga εmfu, "yu ja'i thoho bi un rán t'εdi ra Xuua," pε da zuju yu ja'i 'bu, nguetho im bɛn u ngue rá pøngahyą Oją a ra Xuua, bin 'yɛmzɛhɛ u.

²⁷ Janangue'a bi 'yɛmp'a ra Jesús:

—Hin dí pąhmbe, bi 'yɛntho н.Nu ra Jesús bнya bi 'yɛna:

—Xínga guecä ga xi ahu to'o bi 'dacä man t'ɛdi ga øt'ä a dí øt'ä, bi t'ɛmp'u.

Ran t'uti a yoho yu ts'unt'u bi sih ra 'bɛfi

²⁸Νε man'da bi man ra Jesús, bi 'yεna:

—Nu n'da ran 'yohu mí 'bu i yoho yú ts'unt'u. Ne bi 'yemp'a n'da rá ts'unt'u: "Ní mba bu huahi, bám pefi," bi 'yembi. ²⁹Ne bi da'a rá ts'unt'u: "Hin'na, hin ga mba," bi 'yentho. Pe m'bejua bin 'yomfeni ts'u ne bi mba bim pefi. ³⁰Ne'a man'da rá ts'unt'u bi xifi da mba mahøn'a. "Haha, ga mba," bi 'yena. Pe him bi mba, bi 'yen'a ra Jesús. ³¹Ne xø bi 'yän'ndu yu xänbate nija:

—Nuya, dami xiqui nangue ran t'uti dá xi ahu, nda'a ní ts'unt'u ngue njuantho bi 'yøt'a rá pähä rá ta, bi 'yɛn'a ra Jesús.

Nu'u bi dati:

—Masque nu'a ra ts'unt'u him mi nde da mba 'bu ra mbudi, gue'a njuantho bi 'yøt'a rá pähä rá ta, bi 'yɛn'u.

Nɛ nubuya bi 'yɛn'a ra Jesús:
—Guehma majuani dí xi ahu,
nu yu ziyate hyacahäi nɛ yu xisu
'yomt'ɛni, man'da da yurpu di
manda rá ts'ɛdi Oja, pɛ nu ahu
hin gui cuthu bu. ³²Nguetho
nu'bu mi xi'ahu a ra Xuua
Nxixya, bi xän'nahu a ra 'yu xun
ho, nɛ nu ahu hin gá 'yɛc'yɛihu.
Pɛ nu yu hyacahäi nɛ yu xisu i
'yomt'ɛni,man'da go bi 'yɛc'yɛi u nɛ
bi päh yú mbui. Nɛ nu'bu gmí nuhu
u, nɛ guexta'a hin gá nde gá päh ni
mbuihu, bi t'ɛmp'u yu hmumbäja
nɛ yu xänbate nija.

Rán t'uti yu ts'om'bäi mbefi

33 Ne bi 'yem mahøn'a ra Jesús:
—'Yøhmbu ts'u man'da ran t'uti ga xi ahu. Mí 'bu a n'da ran 'yohu mi ja rán uandät'ä, ne bi fø't'e, ne bi hyø a n'da ra ngu guepu da themp' yu guindät'ä. Ne bi mbä'ma n'da ra jado xun hets'i, da ndex'u da nu rá häi.

Nɛ nubuya bi hmit yú häi u 'da yu mbɛfi, nɛ bi nde bi mba n'danni a ran 'yohu buya. ³⁴Nɛ nu'bu mi ts'utho din ja yun dät'ä, bá pɛhn'i 'da yú 'yɛhɛ da duspa u yún dät'ä, nguetho gue'a án yahu a, ngue di un'ni ts'u 'bɛ'a da bøm bu. ³⁵Pɛ nu'u yu mbɛfi bi bɛnt'u yúm 'bɛhni a ra hmu. Nu'a n'da bi mbɛmthoho.

Nu'a man'da bi hyotho. Ne nu'a man'da, bi hyøta dotho a. ³⁶Ne xø mahøn'a, bá pehn mi'da xun ngu yú 'yehe ngue xtan duspa yún dät'ä a rá mbeti ran uandät'ä. Pe nu'u yu mbefi xø bi bent mahøn'a 'bu mi zøpu u, ne 'da'angu bi t'ørpe tengu bi t'ørpa u mbudi bi zøpu.

³⁷Nɛ nubuya bá pɛn'na rá ts'unt'u zehe a rá mbeti ra huahi. Bi bɛni: "Masque da numansu na ma ts'unt'u." ³⁸Pɛ nu'bu mí nu ba ɛpu rá ts'unt'u, nu yu mbefi xø bi bɛn'u: "Nuna, rá ts'unt'u zehe, da gohmi ra häi na 'bu bi du rá ta. Pɛ mbähä ga hohu, janangue ga cosehu ra häi buya." ³⁹Nɛ bi bɛnt buya, bi zixpu ma'ueni nɛ bi hyo, bi 'yɛn'a ra Jesús.

⁴⁰Nu ra Jesús bi 'yän'ndʉ mí 'bäpʉ:

—Xi'bu da mbase na ra hmu, 'be'a da jap'u yú mbefi 'bu, bi 'yemp'u.

⁴¹Bi dą u buya:

—Masque da hyo u yú mbɛfi, nguetho ɛmmɛ yu ts'om'bäi u, nɛ nu rá häi buya di hmit'u i padi da gu't'a ra renta 'bu bi zøn ra pa da gu't'i, bi 'yɛn'u.

⁴²Nε xø bi 'yɛm bʉya:

—Ha njam'bu gá nuhu bu ja rám hma Oja a ram hma i ɛna:

Nu'a ra do bi bunt'u yu gado 'bu mi hyøh ra ngu, gue'a ra do man'da mahyoni, tengu thoho yu guangu. Gue'a bi zän Oja a, nɛ gui hyonya thohohu, i ɛm bu rám hma Oja, bi 'yɛn'a ra Jesús.

Ne gue'a i mam bu nangue a rá Thahni Oją ngue ra Cristo. ⁴³ Janangue'a dí xi ahu, Oją him bi numanho a gá 'yøthu ne da thạn'nahu a ra 'bɛfi bu di manda rá ts'ɛdi Oją, din t'un'du mi'da ngue da 'yøt'manho a ra 'bɛfi gmí øthu. ⁴⁴Nɛ nu'a ra do bi mba ma bunt'i, tengu'bu n'da ra xindo i ti bu ja ra 'yu. Nɛ hønt'a go to'o da dạng bu ja ra do, din tuni, nɛ hønt'a go to'o da zɛ'ma ra do, 'bexgue da 'yɛt'i, bi 'yɛ̞n'a ra Jesús.

⁴⁵Nu'bu mi 'yø'a bi man a ra Jesús, bi ba u yu fariseo nε yu hmumbäja, gue guesε u bi 'yøt'u bi sifi. ⁴⁶Nε mí nde 'bexgue xtám bɛnt'a ra Jesús, pɛ him bi bɛnt'i, nguetho mi su u yu ja'i, ngue mi ɛn'u, rá pøngahya Oja a ra Jesús.

N'da ran t'uti ngue ran thạti

Nε xø bi thoqui bi xänba yu jąli nangue yun t'uti thoho bi man a ra Jesús, nε bi 'yɛ̞mp'u:

²—Nu'a ní manda rá ts'ɛdi Oją, i t'øt'e tengu bi 'yøt'a n'da ra ts'ut'abi. Nu'a ra ts'ut'abi bi zän'na n'da ra ngo 'bu min thata n'da rá ts'unt'u. ³Ne bi mben'du yúm 'behni ngue ba sinba yú amigo, pε him bi nde bá ehe. ⁴Ne xø bi mbehn mi'da, bi 'yɛmbi: "Dami xihmbu ma amigo ba εhε, nguetho ya dá hoc ran ts'ihmε. Dá manda bi tho 'da man dani xun zaqui ne ya gätho mahoqui, i ɛn'a ra hmu, gui 'yɛmfu." Nɛ gue'a bi man u yúm 'behni. 5Pe him bi 'yurpatho ra güenda u yú amigo, nε bi mba da huahi a n'da, nu man'da bi mba bám pätho, ⁶nɛ nu'u mi'da bi bent thoho yúm 'behni ne i thenthoho ne bi hyo u. ⁷Nu'bu mí 'yø a bin ja, ɛmmɛ bin cuɛ ra ts'ut'abi buya, bi mbenh yú dofui bá ho u yu hyote ne bi 'yump'a yú

hnini. ⁸Nɛ bi xih mahøn'a u yúm 'bɛhni: "Nuya him bá ɛ'u ma amigo nguetho hing yún sähu ba ɛhɛ. ⁹Ní mbähä bu ja yu 'yu nɛ gbá sihu ua hønt'a go má ja'i gba timhbu bu, nguetho ya ma hoqui 'bɛ'a da zi ua ja ran thati." ¹⁰Nu yúm 'bɛhni buya bi mba bu ja yu 'yu nɛ bá pɛn bu ja ran thati to'o gätho bin c'athu bu, pɛ hinga mfadi 'bu yu ts'om'bäi o gue yu hocja'i 'da. Nɛ bi yupu ja rá ngu ra ts'ut'abi yu ja'i.

¹¹Ne nu ra ts'ut'abi buya bi yurpu mbo da nu u yu ja'i bi zøm bu. Ne bi nu n'da ran 'yohu ngue him mi he u yú he i the 'bu in ja n'da ran thati. 12 Νε bi 'yɛ̞n'a ra ts'ʉt'abi buya: "Xi'i grán 'yohu, hanja gá cut'ua nε hin guí he yún säui da the ua ja ran thati," bi 'yɛmbi. Pɛ nu ran 'yohu him bi zä bi dati. ¹³Nɛ bi 'yɛmp'u yú 'yɛhɛ ra ts'ut'abi: "Dami turpahu yú gua na ran 'yohu ne yú 'ye, ne gui 'yenthu bu ja ra 'bexui. Din zom bu ne din guxpu yú ts'i u," bi 'yɛn'a ra ts'ut'abi, bi 'yɛn'a ra Jesús. ¹⁴Nguetho xun ngu i ts'ohni pε hinga gä yɨn sähɨ ngue da yurpu, bi 'yena.

N'da ran t'änni nangue ra renta bi t'än'na ra Jesús

¹⁵Nε nubʉya bi mba ʉ yʉ fariseo. N'danni bá nyạsε ʉ, bi hyoni 'bɛ'a dí ʉcpa ra Jesús ngue di yạpi. ¹⁶Janangue bi 'bɛhn pʉ 'bʉh ra Jesús ʉ mi'da yʉ́ mifariseohʉ, nɛ mi'da ma ngʉrpihe mi tɛn'na ra ts'ʉt'abi Herodes. Nu'bʉ mi zøm bʉ, bi 'yɛ̞n'ʉ:

—Grá xänbate, dí pąhmbe gätho majuąni guím ma, bi 'yɛmp'a ra Jesús u. Nɛ guí u a majuạni rá 'yu Oja, nɛ hin guí su 'bʉ da hnumanho i ogue hin'na, bi 'yɛ̞n'ʉ. ¹⁷Pɛ dín ndehe gui xije ts'ʉ 'bɛ'a guím bɛ̞ni. Ha din thɛui yʉ́n t'ɛ̞di Oja̞ ngue dí juthe ra renta a ra ts'ʉt'abi Roma in ts'ʉt'abi ua, uague hin'na.

¹⁸Рє nu ra Jesús bi bądi 'bɛ'a mim bɛn'ʉ ngue in nde da dini 'bɛ'a dí yąpi. Janangue'a bi 'yɛmbi:

—Emme guidí yorpahu a guím bemhbu. Høntho guí nde gui sägdahu. ¹⁹Xi ni mbeti gní jut ni rentahu, ga nugä, bi 'yen'a ra Jesús.

Bi un'na ra mbεti bʉya. ²⁰Nε nu'bʉ mi nu a ra mbεti, bi 'yɛ̞n'a ra Jesús:

—To'o rá hmi na i cuat na ra mbεti, nε to'o rá thuhu mán t'o't'i ua, bi 'yɛ̞n'a ra Jesús.

²¹—Rá hmi ra ts'ʉt'abi Roma nɛ rá thuhu a, bi 'yɛ̞n'ʉ.

Nu ra Jesús buya bi 'yɛmp'u:

—Nu'a rá mbɛti ra ts'ʉt'abi gui unhdʉ a. Nu'a xin rá mbɛti Oją, gui unhdʉ Oją a, bi 'yɛ̞n'a ra Jesús.

²²Nε nu'bʉ mí 'yø a bi man ra Jesús, bi hyonya thoho ʉ ngue mi nde xtí yapi. Nε xø bi mbatho ʉ.

N'da ran t'änni gue'bu bi dambeni u xøn du

²³Nɛ m'bɛjua bʉya xø bi zøm bʉ 'da ma ngʉrpihe ngue yʉ saduceo. Nu'ʉ him mi ɛ̞c'yɛi ngue da da̞mbɛ̞ni ʉ xøn du, nguetho mi ɛ̞n'ʉ, nu rá mbʉi n'da, ma zä dim 'bɛ 'bʉ bi du. Nɛ nu'ʉ bi 'yän'na ra Jesús, bi 'yɛ̞mbi:

²⁴—Xänbate i, dím benthohe ran t'edi bi man ra Moisés, ngue nu'bu da du n'da ran 'yohu, 'bu 'buh rá xisu, ne hin ním 'bu a n'da rá t'uhni 'bu mi du, nu'a rán 'yohu din thatui

a rá xisu a ra du, nε nu'bu dim 'buh rá mbudi t'uhni, da t'embi rá t'uhni a xí du. 25 Pe mí 'bucua yoto yun 'yohu midín 'yohuzehe u. Nu'a ra mbudi n'yohu bin thatui n'da ra xisu, pegue bi du n'dihi a ran 'yohu. Nε hin ním 'buh yú t'uhni 'bu mi du, janangue'a bi zinba rá xisu a rán 'yohuzehe. 26 Pe ne'a guexta'a bi du n'dihi, ne hin ní dintho rá t'uhni a ra xisu 'bʉ mi du. Janangue'a xø bim 'buhmi a man'da rá mbegue. Nε bin ja gue'bu go mi dät'i bim 'buhmi gätho u yú mbegue a ra xisu. ²⁷M'bejua buya nese ra xisu bi du, bi 'yɛn'ʉ. ²⁸Nuya, dami xije 'bɛ'a din ja 'bu majuani da dambeni u xøn du, ngue guí mamhbu. Nda'a nín 'yohu da 'yembi rá xisu a ra xisu, nguetho gätho yoto bim 'buhmi, bi 'yɛmp'a ra Jesús 'bu mi denthoho u.

²⁹Bi dat'a ra Jesús:

—Nu ahu guídí 'bɛthohu, nguetho hin guím bɛmhbu 'bɛ'a mam bu ja rá t'ohni Oja, nɛ xín guí pahmbu rá ts'ɛdi Oja. 30 Nu'bu bi dambɛni u xøn du, ya him man ja ran thati, pɛgue dim 'butho tengu yum 'bɛhni Oja mahɛts'i, bi 'yɛn'a ra Jesús.

31-32 Nɛ nangue'a ram hma ngue da dambɛni u xøn du. Ha hin gá nuhu bu ja rá t'ohni Oja 'bɛ'a bi ma nangue u ma ndu mbombøtahu 'bu mi 'yɛna: "Nugä drá Ojagä, nu ra Abraham nɛ ra Isaac nɛ ra Jacob, i ɛc'yɛigui," bi 'yɛn Oja. Ngubu im ma nguetho guexta'a i 'buh yú mbui u, bi 'yɛn'a ra Jesús.

³³Nɛ nu'ʉ yʉ jạ'i 'bʉ mí 'yø a bi man ra Jesús, bi hyonya thoho a bi xifi 'bʉ mi xänbi.

Ra Jesús bi ma nda'a nín t'ɛdi man'da mahyoni

34 Nɛ nu mi'da ma ngurpihe ngue yu fariseo, 'bu mi nu hin'yu man'da sä da man'u yu saduceo, bin 'yänzɛhɛ 'bɛ'a mí sä ngue dí yap'a ra Jesús. 35 Nu'a n'da ra xänbate nangue u yu fariseo buya, bi 'yän'na ra Jesús:

³⁶—Xänbate i, bi 'yɛna, nda'a rán t'ɛdi Oja hnɛhi thoho ga øt'ähe.

³⁷Bi da a ra Jesús buya:

—Nu'a ran t'ɛdi i ɛna: "Gam bɛmhbu Oja ngue gätho ma mbuihu, nɛ gätho ma ja'ihu , nɛ gätho man 'yomfɛnihu." ³⁸ Guehna ran t'ɛdi i 'bɛt'o na, nangue u gä mi'da yun t'ɛdi. ³⁹Nɛ'a ɛna: "Dami huɛc ni mija'ihu tengu bu gní huɛczɛhɛ ni ja'ihu." Guehna ná yoho ran t'ɛdi guexta'a mahyoni na. ⁴⁰Nɛ nu'bu gá 'yothu ya yoho yun t'ɛdi, tengu'bu gá jashu gätho yun t'ɛdi ra Moisés nɛ yum hman yu pongahya Oja, bi 'yɛn'a ra Jesús.

To'o rá 'yu a ra Cristo

⁴¹Nε guexta'a mi 'bäpʉ yʉ fariseo, ⁴²nε bi t'ɛmp'ʉ bʉya:

—'Bɛ'a guím bɛmhbu, to'o rá 'yu a ra Cristo, rá Thahni Oją, bi 'yɛmp'u, bi 'yɛn'a ra Jesús.

Bi dą u yu fariseo buya:

—Nu rá Thahni Oją, rám bom'beto ra David a, bi 'yɛn'ʉ.

⁴³Νε xø bi 'yɛ̞n'a ra Jesús:

—Pε nε guese ra David bi 'yɛ̞mbi rá hmu a ra Cristo 'bʉ hin ním 'bʉi, nguetho bi 'yɛ̞na:

⁴⁴Nu Oją bi 'yemp'a ma Hmu: "Hyucua ja man 'yei ga conhui ma ts'edi gue'bu go dá tapä gätho u man suihu ngue gui manda u buya," bi t'ɛmp'a ma Hmu, bi 'yɛn'a ra David, 'bu mi bɛnba rá Hogandahi Oja 'bɛ'a bi ma.

45 Hanja i şmbi rá hmu ne xin rám bom'beto a rá Thahni Oją, ngue ra Cristo, bi 'yṣn'a ra Jesús, bi 'yṣmp'u.

⁴⁶Nɛ hin'yʉ 'bɛ'a bi zä dí dąti, janangue'a him man'dandį bi zä da 'yän'ndʉ yʉ fariseo bʉya.

Bi man ra Jesús 'bɛ'a nam bøn'a øt'ʉ yʉ fariseo nɛ yʉ xänbate niją

Nɛ nu ra Jesús bi xi u yu ją'i, nɛcähe buya:

²—I ja yɨn t'ɛdi da xän'nahɨ u yún t'edi ra Moisés u yu xänbate nija nε yu fariseo. ³Dami 'yøhmbu 'bu i xän'nahu u, pε hin gui 'yøthu tengu yún t'øt'e i sänzehe, nguetho 'dan'yo thoho gä mi'da i øt'e. ⁴Nɛ xʉn hɛi i xi ahʉ gui 'yøthu, tengu'bu n'da ra 'beni xun hyu i xi ahu gui tuxhu, pe nuse'u xíngui ts'u in nde da 'yøt'a i sän zehe. ⁵Ne hønt'a i honi da hnumanho yún t'øt'e i ørpu 'buh yu ja'i. Janangue'a di cuat yú de yún t'ędi Oją ngue xun ndoho ne i pät' yú 'ye, ne emme di ho di hoc yún zudi yú nyampahni. 6Ne emme di ho rá mbudi din sihme bu i t'øt' yun ts'ihmε; nε di ho da mipu ja ran thuts'i mahoqui bu ja ra niją. ⁷Ne ęmme di ho da t'ęspa 'bu din zenguate. Ne i honi da t'embi yú xänbate u. Høntho in nde da hnumansu.

⁸Pε nu ahʉ o guí ndehʉ da t'ɛn ahʉ gyʉ xänbatehʉ, nguetho høngdä ni Xänbatejʉ ngue drá Thahnigä, nɛ nu'ahʉ guidín cuhʉ, 51 SAN MATEO 23

bi 'yɛngähe ra Jesús. ⁹Nɛ hin gui 'yɛmfu ni tahu 'da u i 'bucua ja ra häi, nguetho nu'a ni Tahu bí 'bupu mahɛts'i a. ¹⁰Nɛ xín gui ndehu ngue da t'ɛn ahu gyu hmuhu, nguetho guecä drá Thahni Oja ngue ra Cristo, ni Hmuju. ¹¹Nu'a to'o din 'yɛhɛ thoho nangue yú mija'ihu, pɛ gue'a man'da xtán hɛts'i bu dá nu Oja a. ¹²Nguetho nu'a i øt'e ngue xun hɛts'i, man'da zi cuɛ bu dá nu Oja a, pɛ nu'a i øt'e ngue hingui hɛts'i, pɛ man'da xtán hɛts'i bu dá nu Oja a, bi 'yɛn'a ra Jesús.

¹³Nɛ nubʉya bi 'yɛ̞mp'ʉ yʉ xänbate niją nɛ yʉ fariseo:

—Huɛhi maha ahu, gyu xänbatehu bu ja ra niją, nɛ gyu fariseohu, ɛmmɛ guidí yorpahu a guím bɛmhbu, nguetho gá xihmbu u mín nde xtán yurpu di manda rá ts'edi Oja, ngue xquí 'yuthu ra 'yu, pɛ nɛ tengu'bu gá corpa zɛhɛhu ra goxthi, nguetho 'dan'yo thoho gá xänbahu. Nɛsɛ ahu hin da zä gui cuthu bu, bi 'yɛn'a ra Jesús.

14 Hughi maha ahu, gyu xänbatehu ng gyu fariseohu, gmmg guidí yorpahu a guí øthu. Sä nya'a guí yahu Oja bu ja yú ngun yu xisu xøn du yú ndø, ngue guí gmhbu guí äfu rám fäts'i Oja u, pg ng guí haspahu 'be'a bi zopa yú ndø. Janangue'a man'da xun utho ran unbi gui nuhu.

¹⁵Huɛhi maha ahu, gyu xänbatehu nɛ gyu fariseohu, ɛmmɛ guidí yorpahu a guí øthu. Säti thoho gán 'yohu hønbu go hapu nɛ yatho gá mbähä, ngue gá sømhbu bu 'bu u i thạnde yú oją zɛhɛ, ngue gá xihmbu da dɛn'na nin xädihu. Pɛ nu'a to'o bi dɛn'nahu man'da gá jafu bim 'bɛdi, nɛ 'da gdí mbähä bu ja ran unbi mazai, bi 'yɛmp'u.

¹⁶Huɛhi maha ahʉ, gyʉ ngʉrpihʉ, pegue tengu'bu gyu xädähu ne guí xihmbu u guí xänbahu: "Nu'bu ja 'bɛ'a bi ma n'da ra ja'i, nɛ bi ndønba rá thuhu ra niją, hingui jatho di ją'ts'a," guí ɛmfu. "Pɛ nu'bu bi ndønba a rá oro i ja bu ja ra nija, i jatho di ja'ts'a bi ma," guí emhbu. 17 Gyu 'yambuihu ne gyu xädähu. Guí ɛmhbu man'da di muui ra oro xinda gue ra nija, pegue hin'na maha nguetho gue'a ra nija ní t'embi xun ho a ra oro i ja bu, bi 'yɛn'a ra Jesús. 18 Nɛ guí ɛmhbu: "Nu'bu ja 'be'a bi man a n'da ra ja'i, ne bi ndønba rá thuhu ran ts'äya bu ja ra niją, guí ɛmhbu hingui jatho di ja'ts'i. Pε nu'bu bi ndønba rá thuhu ran t'unni i høxpu ja ran ts'äya, ya ra ts'oqui a buya 'bu him bi ją'ts'i," guí ɛmhbu. 19 Gyu 'yambuihu, tengu'bu gyu xädähu. Guí çmhbu man'da di muui u yu 'bøts'e i ja bu xinda gue ran ts'äya. Pegue hin'na maha, gue'a ran ts'äya ní t'embi xun ho u yu 'bøts'e bí ja bu. ²⁰Nguetho nu'a bi ndønba rá thuhu ran ts'äya bu ja ra niją, hinga hønt'a ran ts'äya, pε gätho í ndønba rá thuhu 'be'a gätho høxpu. ²¹Ne nu'a to'o bi ndønba rá thuhu ra nija, hinga hønt'a ra nija bi ndønba rá thuhu, pe ne a rá thuhu Oja bi ndønbi, nguetho rá ngu Oja a ra nija. ²²Ne'bu n'da bi ndønba rá thuhu mahets'i, pe hinga høn bu mahets'i bi ndøni, pe ne a rá thuhu Oja bi ndønbi, nguetho bí 'bupu Oja bu mahets'i.

²³Hughi maha ahu gyu xänbatehu ne gyu fariseohu, emme guidí SAN MATEO 23 52

yorpahu a guí øthu. Hin njam'bu gá pumbenihu gá hyaxhu bu ja ra nija a ná 'det'a yú 'yethi yu tuhu bi bøxpu ja ni huahihu, tengu bi man ra Moisés, pe gá pumbenihu u yun t'edi man'da mahyoni, ngue i ¿na: "'Da gdí numanhohu ni mija'ihu, ne din ja nin hugcatehu, ng gui 'ygc'ygihu Oją." Guehya nde'bu man'da gan εhya gui 'yøthu, madague'bu gui thoqui gui 'yøthu u mi'da. 24 Pe gá 'yøthu tengu'bu gám fähmbu ngue xínga n'da ra 'uɛ i sä di uashu 'bu ja a guí sihu, pe nu'a go ra fani ne man'da go hin gá nuhu 'bu gmí tuthu a, nguetho hin guí pahmbu nda'a nín t'ɛdi man'da xun ndoho.

²⁵ Hughi maha ahu gyu xänbatehu ng gyu fariseohu, εmme guidí yorpahu a guím bɛmhbu. Gá 'yɛmhbu xun hotho ahu, pg gá 'yøthu tengu'bu n'da ra baso bi mba m'berpe bu maxøts'e, pg hinga ngpu mbo. Ng tengu'bu n'da ra mbohi høn bu ní ndi a häi bi 'berpe, ng guín jahu bu nguetho εmme i yuh ni mbuihu nangue ram fg ng ran ts'iyate. ²⁶ Gyu xädähu, nde'bu gui 'yøthu tengu'bu ngpu mbo bin sut'i n'da ra mbohi, ng majuani xtán ho ahu buya, bi 'yɛn'a ra Jesús.

²⁷ Huɛhi maha ahu gyu xänbatehu nɛ gyu fariseohu, ɛmmɛ guidí yorpahu a guím bɛmhbu. Nɛ guín jahu tengu'bu ra jado bu ja ran 'yägui ngue xun t'axi maxøts'e, nɛ mahotho, pɛ nubu mbo, yupu yu do'yodu nɛ gä mi'da xun xatho.

²⁸ Guín jahu bu. Nubu na nu ahu yu ja'i, ɛna xun ho ahu. Emmɛ guidí yorpahu a guím bɛmhbu nɛ ɛmmɛ yuh ran ts'o ni mbuihu, bi 'yɛn'a ra Jesús.

29 Pe í hughi maha ahu gyu xänbatehu ne gyu fariseohu. Guidí yorpahu a guí øthu. Gá hocpahu yú jadon'yägui u yú pøngahya Oja maya'bu bi hyo nim bombøtahu, ne'u yú jadon'yägui u guí emfu yu hocją'i gá hocpahu. 30 Ne sä guí ɛmhbu: "Nu'bu di 'buhmbu u 'bu mi hyo yú pøngahya Oja น mam bombøtahน, กะ xcá uthน ngue hingui ho a bi 'yøt'e, ne xcá 'uethohu," guidín 'yɛmfu. 31 Janangue'a gadín juanzehehu ya ngue yú 'yu ahu yu hyote. 32 Dami juahmbu a ra 'bɛfi bi 'yut'ahu nim bombøtahu, bi 'yɛn'a ra Jesús.

³³Tengu'bu gyu pozuhu. Hin da zä gui 'dahmbu bu ja ra sibi njam'bu i huɛt'i. ³⁴Nguetho, nu'bu ba pɛn'nahu ma pøngahya ne ma xänbate, hin gui simanhohu u, gui hyohu u 'da, ne gui cuathu bu ja ra za u 'da, ne gui fehmbu u 'da bu ja ni nijahu. Ne emme gui ucpadahu u 'da 'bu i 'yo bu ja ni hninihu. 35 Ne nangue a gui 'yøthu, tengu'bu gá hyosehu u gä yun hocja'i bi tho gue'bu go rá mbudi ra ximhäi, 'bʉ mí tho ra Abel ngue man ra hocja'i ne asta gue'bu mi tho a ra Zacarías, rá ts'unt'u ra Berequías, gá hyohu bu ja rá goxthi ra niją. ³⁶ Majuani dí xi ahu, tengu'bu ni ts'oqui zehehu u gä yun thote i jatho ya, ne da ts'än'nahu ran unbi nangue u, bi 'yɛn'a ra Jesús, bi t'ɛmp'u yu xänbate niją nε yu fariseo.

Bi huệc'u yu mɛngu Jerusalén ra Jesús

³⁷Nɛ nubuya bi xi a n'da ram hma u yu mɛngu bu Jerusalén, bi 'yɛmbi: —Emmɛ dím bɛn ahu gyu mɛnguhu Jerusalén. Nzai guí hohu yu pøngahya, nɛ guidí bat'adohu u mi'da ba pɛn'nahu Oja. Nɛ xun ngu yu nidi dím bɛngä xcá pɛt'ahu xcá jamansu ahu, tengu'bu n'da ra sumfø di pɛt yú t'uhni nɛ i comp' rá hua, pɛ nu'ahu, hin gá ndehu xcá ja ahu bu, bi 'yɛn'a ra Jesús. ³⁸ Dami nuhu ya, nu ni hninihu tengu'bu ya njongui 'bupu ya, ³⁹ nguetho hin gui nuju mahøn'a jaque'bu bi zøn ra ora ba pengä ua nɛ gui 'yɛscahu. "Majapi a ba ɛhɛ nangue rá thuhu ma Hmuhu Oja," gui 'yɛnju, bi 'yɛn'a ra Jesús.

Bi ma ra Jesús da guah ra dąniją

Nε nubʉya, nu ra Jesús 'bʉ mi bøm bʉ ja ra dạniją, dá utähe 'bɛ'a gä mí ja bʉ ja ra ngu.

-Mahotho ua, dá ¿mfe.

²Pε nu ra Jesús bi 'yɛ̞nje:

—Guí nuhu ngue mahotho i ja ua, pε gätho da mba nso't'i, nε xínga n'da ra do din tøcua ngue hin da mba ma juadi, bi 'yɛn'a ra Jesús.

M'bet'o din ja yu hmepya 'bu ran zegui

³Nɛ dá nɛxähe dá mbähmbe bu ja ra nyuni Olivos. Nɛ ní mipu ra Jesús dá ändähe 'bu njom mí øde, yú xädigähe:

—Dín ndehe gui xije nda'a ní pa din ja a gám mam bu ja ra niją. 'Bɛ'a ní hmɛpya din ja 'bu guá pengui mahøn'a nɛ'bu ran zɛgui ra pa, dá ɛ̞mfe buya.

⁴Nε bi 'yɛ̞ngähe ra Jesús:

—Damim fähmbu 'dahma njon da hyä ahu. ⁵Nguetho xun ngu yu hyäte ba ɛhɛ da 'yɛna: "Nugä, guecä, rá thahnigä Oją, drá Cristogä," da 'yɛn ahu. Nɛ xun ngu da hyät'u nangue ra fɛhni da man u. ⁶Nɛ nu'bu gui 'yøhmbu ngue din ja yu sui, o gue'bu gui 'yøhmbu i ja bu ja 'da yu hnini ya, pɛ o guín suhu, nguetho jatho din ja u. Nɛ nu'bu bin ja u, xínga gue'bu rán zɛgui'bu. ⁷Nguetho da ndants'u 'da yu ts'ut'abi din suhmbu u yú mi ts'ut'abihu, nɛ da ndanc'u 'da yu hnini din suhmbu mi'da yu hnini. Nɛ xun ngu yu nidi din ja ra thuhu, nɛ ra dạgɛhɛ, nɛ din ja yu 'yamhäi bu ja yu xɛqui ua ja ra ximhäi. ⁸Pɛ nu'u, yú mbudi thoho yun unbi din ja u.

⁹Ne da mba ma dä ahu ne da ts'ix ahu ngue din un'nahu, ne da tho ahu 'da ahu. Ne gätho yu ja'i da zan ahu nguetho guí tengahu. ¹⁰Ne nu'u 'da mí ec'yeigui, m'bejua da 'uese. Ne guese u di dä u ma 'yec'yei da mba ma unbi. 11 Ne dim 'bui xun ngu yu hyäte pøngahya ne xun ngu yu ja'i da hyät'u. 12 Ne nangue a ran ts'o xtá ngu, him ma din ja yún huşcate u 'da. 13 Pe nu'a da hyät'i gue'bu go ran zegui, da daha dim pø a. 14 Ne gätho na ndoho ra ximhäi da hma 'be'a da zä dí yurpu di manda rá ts'edi Oja n'da. Ne gätho yu ja'i 'dahma 'dan'yo bu na ya da sifi, ne nubuya, gue'a ra pa ran zegui a buya, bi 'yen'a ra Jesús.

15-16 Nu ra pøngahyą Daniel maya'bu bi ma ngue din ja n'da ran ts'o di ts'oni gätho. Janangue'a nu'bu gá nuhu da mbudi din ja bu ja ra danija a, dami 'dahmbu bu ra xɛqui Judea, ní mbähä bu ja yu dapo. Nguetho nts'utho ran unbi din jabu. 17'Bex gui mbähä. Nu'bu gdi tøhmbu bu maxøts'e ra tøcangu, hin gui cuthu mbo ra ngu ngue

SAN MATEO 24 54

gui hyaxhu 'bɛ'a di ja bu. Dami 'dathohu. 18 Ne nu'bu gdi 'bähmbu bu ja ni huahihu, hin 'be gui mbähä bu ni ngumhbu ngue gba ca ni xi'yohu. Dami 'dathohu. ¹⁹Huɛcate u yu xisu in hat'uhni u yu pa u, ne'u i 'buh yú 'uere, nguetho xun hẹi thoho da 'da u. 20 'Yäfu rá mate Oją hinga gue'θ yθ pa xtan sε din ja ahu ran 'dagui, ne xínga gue'bu ra pa ran ts'äya, nguetho i man u yun t'edi hinga yatho gan 'yohu a ra pa ran ts'äya. 21 Dami 'yäfu rá mate Oja, nguetho nu'a ran unbi din ja, hin jam'bu n'dandi xøn ja gue'bu go rá mbudi ra ximhäi. Ne nu'bu ya bin ja, hin man'dandi din ja a ran unbi tengu a. ²²Nɛ nu Oja da zänba thoho u yun unbi din ja nangue a di hugc'u xí huahni. Nu'bu hin'na, njon da bongui.

²³Nu'u yu pa u, "Dami nuhu ua, i 'bäcua ra Cristo," da 'yɛn ahu. Nε nu'u mi'da da 'yɛn ahu: "Dami nuhu i 'bähnu ra Cristo." Pe o guí εc'yεihu u. 24 Nguetho xun ngu yu hyäte dim 'bui, sä da 'yɛn'u: "Guecä, rá thahni Oja, drá Cristogä," sä da 'yɛn'u. Nɛ xun ngu da 'yɛna ngue dim pøngahyą nangue Oją, nε da 'yøt' yu hyonya nt'øt'e nε yu hmepya ngue da nde da hyät yu ja'i. Nε da hyoni 'bε'a da zä dí hyät'u xí huahn Oja. ²⁵Nuya gätho dá xi ahu guepu da zä gui pahmbu 'be'a din ja. 26 Janangue nu'bu da 'yɛn ahu: "Ní mbähä, bí 'bäpu ma'ueni a ra Cristo," da 'yɛn'ahu, pe o guí pähä. O gue da 'yɛn'ahu: "Bá cuthu ua, i 'bäcua ra Cristo," da 'yɛn'ahu, pε o guí cuthu bu. ²⁷ Nguetho nu'bu bá pengä ua mahøn'a, nugä ngue dán ja'igä ua ja ra ximhäi, dan jagä

tengu rán nɛqui ra huɛi ngue dam 'bathogā gātho ra ximhäi. ²⁸Nɛ tengu i øt' yʉ pada, ɛmmɛ di pɛti bʉ 'bɛn ʉ xʉn du, din jabʉ a ran ts'ɛmbi din ja bʉ 'bʉ ʉ yʉ ts'om'bäi.

'Bu bá peng ra Jesús

²⁹Nε xø bi thoqui bi man ra Jesús nε bi 'yɛna:

—Nu'bu bin ja a ran unbi buya, him man di nɛc ra hyadi nɛ ra zana, nu'u yu sø 'bupu mahɛts'i da dägui. Gätho bí ja bu mahɛts'i gä di 'bɛh yú ts'ɛdi u. ³⁰Nɛ nubuya di nɛqui bu mahɛts'i ra hmɛpya nanguecä ngue dán ja'igä ua ja ra ximhäi, nɛ gätho yu hnini ua ja ra ximhäi din su. Nɛ da nugui ba ɛcä bu ja yu güi, dan 'yo'be ma ts'ɛdi tate thoho, mixte thoho, bi 'yɛn'a ra Jesús. ³¹Nɛ nts'ɛdi din ya ra thuxi. Nɛ ba pɛnhdä yum 'bɛhni Oja di pɛti gätho u bi huahn Oja, gä na ndoho ra ximhäi.

³²Guim bɛmhbu 'bɛ'a dí øthu ua ma häihu dyu israelhu, ngue nu'bu dí nuhu bi mbudi dim puh yú mbui 'da yu za, ya dí pahmbu mi ts'utho ba ɛpu yú pa ra pa'ye. ³³Nɛ ngutho 'bu guín nuhu bin ja gätho ya yun unbi dí xi ahu, gui pahmbu buya ngue mbɛ rán zɛgui. ³⁴Nɛ majuani dí xi ahu, di 'butho ua 'da ahu 'bu bi mbudi din ja. ³⁵Nu ra ximhäi nɛ mahɛts'i da zøni da gua u, pɛ nu'a mam hmangä njam'bu da gua a.

³⁶Pɛ njongui padi nda'a ní pa din ja a dím mangä ya, xínga gue'u yúm 'bɛhni Oja mahɛts'i nɛ xínga guengä rá Ts'unt'ugä Oja dí padi, pɛ hønt'a Oja ma Ta i pa a ra ora din ja.

³⁷Nɛ tengu thoho bin ja 'bʉ mí 'bʉh ra Noé, ngutho din ja 'bʉ bá

pengä mahøn'a, nugä ngue dán ją'igä ua ja ra ximhäi. ³⁸Nu yu pa u ngue'bu mi ts'utho din ja ra dambunt'i, nu yu ja'i mi 'buhmbu ra Noé hønt'a ran ts'ihme mim beni nε hønt'a ran thạti mí honi, gue'bu go mí yurpu ja ra mbosa ra Noé. 39 Ne him bi 'yurpa ra güenda a bi sifi ngue din ja ra 'ye, jague'bu mi mbuh ra 'ye, nε bi yuh ra dehe ua ja ra häi ne gätho bi gua u. Ne din jabu 'bu bá pengä mahøn'a, guecä dán ja'igä ua ja ra ximhäi. ⁴⁰Nε dim 'bu i yoho yun 'yohu bu ja a ra huahi, nu'a n'da da mba nts'its'i ne man'da da ts'opu. 41 Ne'bu di cum bu ja n'da ra ngu yoho yu xisu, nu'a n'da da mba nts'its'i ne nu man'da da ts'opu.

⁴² Janangue'a dí xi ahʉ, o guí tonspahʉ ra t'aha, nguetho hin guí pahmbʉ 'bɛ'a ní ora ba ε a ni hmuhʉ. ⁴³ Nu'bʉ n'da ran 'yohʉ xtám badi nda'a ní xui xtán yʉrpʉ yʉ bɛ bʉ ja rá ngu, xtín ätha, xtán dø'mi, nɛ hin xtá japi xtá nyʉrpʉ ja rá ngu ngue da bɛpi 'bɛ'a i ja bʉ. Pɛ hingui padi 'bɛ'a ní pa, janangue'a i tø'mi gätho yʉ pa. ⁴⁴ Janangue'a dí xi ahʉ, damin sähʉ nguetho ts'ʉrpʉ thoho ga søcä, guecä dán ja'igä ua ja ra ximhäi, ngue ra ora njongui tøcpä ga søcä, bi 'yɛn'a ra Jesús.

Rán t'uti ra hogambefi ne ra ts'om'bäi mbefi

45-46 Nε xø bi 'yεna:

—Dami 'yøthu tengu'bu gyu hogambefihu. Nu'a ra ngurpambefi 'bu xun ho i øt'e, ne nu'bu da mba n'danni rá hmu da zopu ja rá ngu, da 'yøt'e tengu'bu i 'buse bu rá hmu. Ne nu'bu bá penc'a rá hmu, bi nu

bi jamansu rá 'bɛfi, nɛ xʉn ngu ran jąpi da nu a buya. 47 Majuąni dí xi ahu, nu'a ra ngurpambefi, man'da din t'un ra ts'edi, ne 'be'a gätho i pε'ts'a rá hmu di jamansu a. 48 Pε nu'bu ra ts'om'bäi a ra ngurpambefi, nε im bɛni ngue him 'be ba penc'a rá hmu, 49 nε di unba yú 'yεhε nε i tenthoho yu mihni, 50 ts'urpu thoho ba penc'a rá hmu n'da ra pa ngue hingui pa a ra ngurpambefi. 51 Ne nubuya din t'un'na n'da ran unbi xun utho, ne n'dat'a ran unbi da nuhu u di yorpa a im beni. Ne din zom buya ne din guxtpu yú ts'i bu ja ran unbi mazai, bi 'yɛn'a ra Jesús.

N'da ran t'uti nangue yu hmute xtí hyun yun thati

Nε xø bi 'yɛna: —Nu'bu bi 'yøt' ran ts'ut'abi Oja, din ja tengu bin ja 'bu min ja n'da ran thạti. Nu'a to'o gä bin sä, bi thopu mbo, pε nu'u him bin sä, bi gopu thi u. Nu'bu min ja ran thati, 'dɛt'a yu hmute bi mba, ena xtín hyumhbu u din thati. Ne bá the yú bombilla mi tøm'ma ran 'yohu din thati. ²Pe nu'u cut'a yu hmute yu 'yambui u, ne nu'u mi cut'a bin 'yomfeni u. 3Ne nu'u yu 'yambui him bi dux man'da ra sibi ngue xta xirpa yú bombilla 'bu bin the a po bu. ⁴Pe nu'u bin 'yomfeni, bi dux yú sibi ngue da xirba rá bombilla 'bu bin the a po bu. 5Ne nu'a ran 'yohu him 'be bi zøm bu. Nε nu yu dø'mate bi zuh ra t'aha u. 6Nu'bu made ra xui bi 'yø a n'da ra nde bi 'yɛna: "Ya ba ɛcua ran 'yohu, ndanshu, ba thahmbu," bi 'yɛna. ⁷Gätho bi ndang buya nɛ bi

SAN MATEO 25 56

hoc yú sibi u. 8Pe nu'u yu 'yambui, bi 'yemp'u bin 'yomfeni: "'Daje ts'u ni sibihu nguetho i nde da huɛt ma bombillahe," bi 'yɛ̞n'ʉ. ⁹Pε bi dą ʉ bi dux yú sibi: "Hin da zä, nguetho nu'bu ga 'da ahe go da hugt' ma sibihu 'bu. Pε xun ho 'bu gui mbähä gba tämhbu." 10 Pε nu'bu mi mba ba tän ra sibi, 'bexgue bi zøm bu a ran 'yohu din thati. Ne nu'u yu hmute bi dux yú sibi bi yurpu mbo ngue da nu ra ngo ran thati, ne 'bex bi mba njut'i ra goxthi buya. ¹¹Νε nu'bu mi zøm bu u xí mba bá tän ra sibi, bi nu ngue njut'i tho ra goxthi, nε bi mba u, bi 'yɛn'u: "Gra hmu, grá hmu, dami xoqui," bi 'yɛn'u. ¹²Pε nu'a ra hmu bi dạt'ʉ: "Hin dí padi to'o ahu," bi 'yembi, ne him bi xocpi, bi 'yɛn'a ra Jesús.

¹³Ne bi 'yenje ra Jesús buya: —Gue'a dí xi ahu, nde'bu gan äthahu nguetho hin guí pahmbu a ra pa ba pengä ua, guecä dán ja'igä ua ja ra ximhäi, bi 'yen'a ra Jesús 'bu mí 'yengähe.

N'da rán t'uti yu 'yɛ̞hɛ bi ts'ocpa ra mbɛti

¹⁴Nε man'da ran t'uti bi man ra Jesús, nε bi 'yɛ̞na:

—Nu'bu bi 'yøt' ran ts'ut'abi Oja, da 'yøt'e tengu bi 'yøt'a n'da ran 'yohu 'bu mi zon'ndu yú 'yɛhɛ, bi 'yän'na rá mbɛti xí zocpi. Nguetho nu'bu mí mba n'danni n'da ra häi, bi zon'ndu yú 'yɛhɛ da zocpa rá mbɛti.

¹⁵Nu n'da rá 'yεhε bi zocpa cut'a mahuạhi ngue di pεpi; nε nu man'da, yo mahuạhi bi zocpa a; nε nu man'da bi zocpa n'da mahuạhi. Bi unni hangu xøt'a di pεpi n'da ngu n'da. Ne bi mba buya. ¹⁶Ne nu'a bi unni cut'a mahuahi, bi pepi ne bi dah mi cut'a mahuahi. ¹⁷Ne'a bi unni yomahuahi, yomahuahi xø bi dapi. ¹⁸Pe nu'a bi un'na n'da mahuahi, bi mba bá cät'a häi a rá mbeti xi un'na rá hmu.

¹⁹Nε him 'be bá penc rá hmu. Pe nu'bu mi zøhø bi zon'ndu yú 'yɛhɛ mahøn'a ngue da nu 'bɛ'a xí 'yøt'ʉ. ²⁰M'bɛt'o bi zøn'a xín t'unni cut'a mahuahi, ne bi däp'a rá hmu cut'a mahuahi ngue rá mbeti zehe rá hmu. Ne xø bi un'na xí daha ngue mi cut'a mahuahi, nε bi 'yɛmbi: "Grá hmu, i ja ua ni mbeti, nehna cut'a mahuahi dá taha," bi 'yembi. 21"Xun ho," bi 'yɛn'a rá hmu. "Nu'i grá hogambefi," bi t'em buya. "Xun ho gá 'yørpa a ts'utho dá 'da i, janangue'a ga 'da i man'da xʉn ngu ya. Bá thocua mbo 'dat'ua dan johyaui," bi 'yɛn'a rá hmu. ²²Ne xø bi zøm bu man'da xí unni yo mahuahi, ne bi 'yena: "Grá hmu, i ja ua ra mbeti gá 'daqui, nehna mi yomahuahi dá taha i ja ua," bi 'yemp'a rá hmu. 23 Ne nu'a rá hmu buya bi 'yɛmbi: "Xun ho, grá hogambefi, xun ho gá 'yøt'e, madague'bu hingui ngu dá 'da i, nuya man'da xun ngu ga 'da i. Bá thocua mbo 'dat'ua dan johyaui," bi 'yembi. 24Pe nu'bu mí zøm bu a xi hyan'a n'da mahuahi, bi 'yemp'a rá hmu: "Grá hmu, mí pạcä ngue hin'yu nin huεcate nε nzại guí honi 'bepu gdí hyanba rá mbeti yu ja'i ne gui hyanba yú huahi u 'da. ²⁵ Janangue'a dá pɛs' thoho a gá 'daqui, dí su gui suqui 'bu xcá 'betho, ne i ja ua ni mbeti gá 'dac ya," bi 'yɛna. 26 Nε nu'a rá hmu

57 SAN MATEO 25

buya bi 'yembi: "Gra ndødanhyei, hingui ho gá 'yøt'e ngue hin gá pep'a ra mbeti. 27 Nu'bu guí pądi ngue dí numanhogä ga tacä, sä xquí hmi a ra mbeti ne xtán dạh rán zäbi, ne hin xtím 'beh puya," bi 'yɛn'a rá hmu. 28 Ne bi 'yɛmp'u mi'da yú 'yehe mí 'bäpu: "Hyanba na ra mbeti, dami un'na bin t'unni 'det'a mahuahi. ²⁹ Nguetho nu'a bim pɛfi xun ho, man'da xun ngu din t'unni. Pe nu'a him bim pefi, pe da thanba a zi ts'u mí pɛ'ts'i. ³⁰Nɛ nuna ra ts'om'bäi mbɛfi na, bá høthu bu ja ra 'bexui guepu din zom bu ne din guxtpu yú ts'i," bi 'yɛn'a ra hmu buya, bi 'yɛn'a ra Jesús 'bu mi man na ran t'uti. Ne njabu din ja 'bu bi 'yøt'a ran ts'ut'abi Oją.

Ran t'uti nangue ran ts'ɛmbi da t'ørpa yʉ jạ'i

³¹Ne bi 'yem mahøn'a ra Jesús: -Nu'bu bá pengä, nugä ngue dán ją'igä ua ja ra ximhäi, dam mixtegä, dan ts'ut'abigä; dan 'yohe yúm 'behni Oja ne ga hupu ja ma mexa ngue din ja ma ts'edi xun ho. 32 Ne dim peti gätho yu ją'i gä na ndoho ra ximhäi bu ga hucä. Nε gätho ga huan'du tengu øt'a n'da ra mbände'yo, ngue n'danni ga fä'bu yu de'yo ne n'danni ga fä'bu yu denzu. 33 Ne nu yu de'yo ga fämp'u ja man 'yei ne nu yu dεnzu ga fämp'u ja ma gaha. 34 Nε ga emp'u dim 'bäpu man 'yei: "Ba ɛhmbu ua, bi jap'ahu Oja. Ga 'da ahu ra ts'edi án ts'änni ngue gui hyamhbu gue'bu go rá mbudi ra ximhäi," ga ɛmp'u. 35"Nguetho gá 'daju ra hmɛ 'bu mán tumanthuhu; nε gá 'daju ra dehe 'bu mán tuthe;

nε gá säyagahu 'da ahu 'bu mán 'yo bu n'danni ni hninihu. 36 Ne gá 'daju ma he 'bu gmí nuhu hin'yu ma hegä; ne gá nuc 'bu mán hyenni, ne gá zenguagahu 'bu mán ofädi," ga εmp'u, bi 'yɛn'a ra Jesús. ³⁷Nε da 'yɛnc'u: "Grá Hmu, 'be'a ní pa dá øt'ahe a guím ma. Hin dím bembbe ngue gán tumanthuhu n'dandi ne gamá 'uin ahe. Ne hin dím bembbe ngue gán tuthe ne xcá 'da ahe ra dehe. 38 Ne hin dím bemhbe 'bu xcamá säya ahe, nε xcá 'da ahe ni he. 39 Ne hin dím bembe 'bu gamán hyenni o gue gamán ofädi ngue xcá nu ahe," da 'yɛngui. 40 Nɛ nugä drá hmuts'ut'abigä, ga embä u buya: "Majuani dí xi ahu, nu'a ran ho gá 'yørpahu n'da ma cuhu, madague'a nte di muui bu na hnu, pε guecä gá 'yørcä a," ga εmp'u buya, bi 'yɛn'a ra Jesús.

⁴¹—Nε nubuya, nugä drá hmuts'ut'abigä, ga emp'u 'bäpu ja ma gaha: "Dami 'uehmbu ua ja ma hmi, ní mbähä bu ja ra sibi njam'bu da huɛt'i, nguepu dá sänni din zø a ra zithu ne u yú mizithuhu. ⁴²Nguetho dán tumanthuhu ne hin gá 'uinju, ne dán tuthe, ne hin gá sithegahu, 43 ne hin gá säyagahu 'bu mán 'yo bu n'danni, nε hin te má he gá 'daju 'bu gmín nuhu hin'yu ma hegä; ne hin gá nugui 'bu mán hygnni, ng hin gbán nuju 'bu mán ofädi," ga emp'u. 44Ne nu'u da 'yɛngui: "Grá hmu, 'bɛ'a ní pa dá nu ahe ngue gán tumanthuhu o gue gán tuthe o gue gán 'yo bu n'danni ra hnini. Ne 'be'a ní pa dá nuhe hin mí he ni he; o gue xquín hyenni o gue xcamín ofädi," da 'yεn'u. 45 Pε nugä drá hmuts'ut'abigä, ga ɛmp'u

buya: "Majuani dí xi ahu, n'da ma cu madague'a nte di muui bu na hnu, 'bu hin gá 'yørpahu ran ho, necä hin gá 'yørcahu ran ho," ga emp'u. 46 Ne nu u buya da nu ran unbi mazai. Pe nu'u bi 'yøt' ran ho din ja ra te mazai u, bi 'yɛn'a ra Jesús.

Nu yu ngurpi bi ma da bent' ra Jesús

Nε nu'bʉ mi gua a bi man ra Jesús, bi 'yṣngähe:

²—Nuya man yopa thoho di 'bɛdi ngue din ja ra dampɛti a ran dabaxjua, nɛ nubʉya da mba ma dägä ngue da mba ma cuatigä bʉ ja ra za, guecä dán ja'igä ua ja ra ximhäi, bi 'yɛ̞ngähe ra Jesús.

³Pɛ nu'ʉ ma ngʉrpihe ngue yʉ hmumbäją, nɛ yʉ xänbate niją, nɛ yʉ dạc'yɛi, bim pɛti bʉ mbo rá mbä't'i rá ngu ra Caifás, nu'a mi hmumbäją a ra jɛya a. ⁴Nɛ bi nyạsɛ ʉ, bi ma nda'a ní fɛhni da xi a ra Jesús ngue da bɛnt'i da hyo. ⁵Nɛ bi ma, 'bɛ da gua a ra dạmpɛti, ja da tho a. Nguetho bi zu din junthʉ yʉ jạ'i mi 'yo bʉ ja ram pɛti.

N'da ra xisu bi hocpa rá ngợc'yεi ra Jesús

⁶Nε nu'bu mi mbeng bu ra hnini Betania a ra Jesús, bi zøm bu ja rá ngu a ra Simón mí hɛmb ra t'axca'ya mam'bɛt'o. ⁷Nɛ bi hyupu mi ja a rá mɛxa a, ɛna din sihmɛ. Bi zøm bu n'da ra xisu mí tu n'da ra xaro xum hmadi, án t'øt'e ra do ra alabastro. Nɛ mi po bu ra 'yɛthi yuman'u, nɛ'a ɛmmɛ di muui a. Nɛ nu'bu mi zøm bu a ra xisu bu i hudi, bi xo'ts'a rá 'yɛthi bi xispa rá ya ra Jesús. ⁸Nɛ dán cuɛhe 'bʉ mán nuhe 'bɛ'a bi t'ørpa ra Jesús, nɛ dá ɛ̞mhbe:

—Ndetho bi xispa ra 'yεthi, ⁹xʉn ho 'bʉ xta 'bä, xtá mba ma darpi yʉ hyoya a ra mbɛti, dá ɛ̞mhbe bʉya.

¹⁰Nɛ bi baˈa ra Jesús ˈbɛˈa dá bɛ̞mhbe, nɛ bi ˈyɛ̞nje:

—Hanja gní unbahu rá mbui na ra xisu, nɛ xun ho 'bɛ'a bi 'yørque.

11 Nu yu hyoya nzai gam'buhmbu ua u, nɛ hønt'a go má pa da zä gui fäxhu u. Pɛ nugä hin dan zangä ua, bi 'yɛngähe ra Jesús.

12 Nuna ra xisu bi hoga ma ngøc'yɛi 'bu mi xiscä ra 'yɛthi, ngue da mba nt'äguigä bu ja ran 'yägui.

13 Nɛ majuani dí xi ahu, hønbu go hapu da hman a rán ho ma'da'yo Oja, nɛhna da hman na bi 'yørcä na ra xisu, n'dahma hønbu go hapu da fɛn'a, bi 'yɛn'a ra Jesús.

Nu ra Judas bi ma di dä ra Jesús

¹⁴Nε nubʉya, nu'a ma mixädihe ra Judas Iscariote, bi mba bi nyahʉ yʉ hmumbäja ¹⁵nε bi 'yɛ̞mbi:

—Hangu gui 'daju ngue ga dä ahu ra Jesús, bi 'yɛ̞mp'u.

Ne 'bexgue bi unni 'däte ma 'det'a yu mbeti ngue ra t'axi buya. Ne xø bi mbeng bu 'bu a ra Jesús buya.

16 Pe emme mí honi 'be'a ní ora da zä dí dä a ra Jesús.

Rán ts'ihme ra Hmu

¹⁷Nɛ nu'a rá mbudi pa ra dampeti nangue ran dabaxjua 'bu zai dí sihe a ra hmɛ hinguin 'youi ra íxi, ngue dyu judíohe, dyu israelhe, dá änhde ra Jesús yú xädigähe:

—Hapu guín nde ga hoje a rán ts'ihmε ram baxjua ga sihu ya, dá εmfe.

¹⁸Nε bi xi ʉ yoho ma mixädihe a ra Jesús, nε bi 'yṣmp'ʉ:

—Ní mbε bu ja ra hnini Jerusalén nε gui xihmi a ran 'yohu, gui 'yɛnui: "Nugä, ya mi ts'utho da zøn ma ora, nε dí nde ga si rán sihmε ram baxjua bu ja ni ngu, nε u ma xädigä, i ɛn'a bá pɛngähe," gui 'yɛnui.

19 Ne bi 'yøt'a bi xi u buya, ne bi hoc'a rán zibde a ram baxjua u buya. 20-21 Nu'bu mín de buya, dá sømhbe bu Jerusalén, 'darpu dán sihmehe bu ja ra mexa ra Jesús, ne bi 'yenje:

—Majuąni dí xi ahʉ, i 'bʉ a n'da ahʉ ngue gui däjʉ, bi 'yɛ̞nje.

²²Νε εmmε bi du ma mbʉihe, nε n'da ngu n'dagähe dá εmfe:

—Grá hmu, ha guengä ga dä i, dá ¿mfe n'da ngu n'daje.

²³Νε bi da a ra Jesús:

—Gue'a dí com'be ma mbohi ua dí sihmɛhu, gue'a di dägä a, bi 'yɛm buya. ²⁴Guecä ngue dán ja'igä ua ja ra ximhäi, da t'ørcä 'bɛ'a gätho i mam bu ja rám hma Oja ya, pɛ í huɛhi maha a ran 'yohu ngue nu'a di dägä. Man'da xun ho 'bu hin xtím 'bu a, bi 'yɛn'a ra Jesús.

²⁵Νε bi dą'a ra Judas buya:

—Xänbate i, ha guecä.

—Hąha, gue'e, bi 'yɛmp'a ra Jesús.

²⁶Νε nubuya bi hyąc'a ra hmε ra Jesús nε bi 'yäp rán jąpi Oją, bi xεm buya, bi darcähe a.

—Dami sihu na, guehna nim bøni ma ngøc'yɛi na, bi 'yɛnje.

²⁷Ne bi dec'a ra vaso mi po rán gui ra uva buya, bi un ra jamadi Oją mahøn'a, ne bi 'daje a ra vaso, bi 'yenje: —Gätho dami sihu, ²⁸ guehna nam bøni, ma jigä ngue bi hoc'a ra 'da'yo 'yu bi 'yøt'ahu Oja na. Nɛ dim fäni dí punba yú ts'oqui yu ja'i. ²⁹Nɛ dí xi ahu, him man'dandi ga sigä ra guindät'ä jague'bu bi zøn ra pa ga sihu ma'da'yo bu di manda rá ts'ɛdi ma Ta, bi 'yɛ̞ngähe ra Jesús.

Ra Jesús bi badi din cøn'a ra Pedro

³⁰Nɛ dán tuhmbe a ra thuhu nɛ dá mbähmbe bu ja ra nyuni Olivos buya. ³¹Nɛ bi 'yɛngähe ra Jesús mahøn'a:

—Dí pądi, nu'bu ni xui, gätho gui soga thohohu, bi 'yɛngähe ra Jesús. Nɛ gue'a nt'o't'i bu ja rám hman Oja, i ɛna: "Ga ho ra mbändɛ'yo nɛ din 'uɛxt'u yú dɛ'yo buya," i ɛn Oja, bi 'yɛn'a ra Jesús. ³²Pɛ nu'bu dá thambɛnigä, ga mbagä bu Galilea ní tin ahu bu, bi 'yɛngähe ngue yú xädigähe.

³³Νε bi 'yɛn'a ra Pedro:

—Madague'bu gätho da 'uegue pε nugä, hin'nagä, bi 'yɛn'a.

³⁴Bi da a ra Jesús:

—Majuani dí xi i, guet'a ra xui i jabuya ná hyundi xquí conc 'bu bi mbah ra oni.

³⁵Nu ra Pedro bi dąti mahøn'a:

—Madague'bu 'darpu ga tuui, pɛ njąm'bu ga cøn'i, bi 'yɛna.

Nε n'dat'a gätho dá mamhbe ngue hin ga 'uehmbe ʉ ma mixädihe.

Ra Jesús bi du rá mbui bu ja ra nuandät'ä Getsemaní

³⁶Nɛ nu'bʉ má sømhbe bʉ ra nyuni Olivos, dá cʉthe a ra Jesús bʉ ja ra nuạndät'ä mí ɛ̞mbi Getsemaní. —Dami huhmbu ua ya, ga mbagä ua njongua ts'u, da nyą'be Oją ma Ta, bi 'yɛ̞nje.

³⁷Nε hyu ʉ ma mixädihe bi zits'i, bi zix'a ra Pedro nɛ'ਚ yoho yਚ ts'ਚnt'ਚ ra Zebedeo. Nɛ ɛmmɛ man'da bi du rá mbਚi a ra Jesús. ³⁸Nɛ bi 'yɛ̞mp'ਚ ma mixädihe min 'yohਚ:

—
Ena da føh ma mbні a ra dumbні, ɛna ga tugä. Dami tøcpahн, 'dat'a dan äthahн, bi 'уɛmp'н.

³⁹Nɛ xø bi dạm mi ts'ʉ ra Jesús bʉ mi huhmbʉ ʉ, nɛ bin dạnyahmu bʉ, bi nye'ma häi, bi nyaui Oja, bi 'yɛmbi:

—Ma Ta i, nu'bu da zä, dami japi hin gan nugä a ra mbohi xcá sänni; pɛ hin dín nde ma pähä zɛhɛ pɛ hønt'a go ni pähä zɛhɛ gui 'yøt'e, bi 'yɛmp'a Oją.

⁴⁰Nε bá peng bu mí hu u xí zopu buya, nε mí ą u. Nε bi 'yɛmp'a ra Pedro:

—Ha xínga n'da zi ora xquí sethu a ra t'aha, ngue 'bɛ xcán hyumhbu ts'u. 41 Damin äthahu nɛ gui nyahu Oja, guepu da zä hin hapu gui tanju 'bu bi ts'ä ahu ya, nguetho nu ní mbui n'da i ja ra pähä nangue Oja, pɛ nu ní ngøc'yɛi n'da xun güent'i thoho.

⁴²Nε ná yondį buya bi mba bi nyaui Oją mahøn'a:

—Ma Ta i, nu'bu ya hin da zä ga socä a xcá sänni, pɛ hønt'a ni pähä zɛhɛ gui 'yøt'e, bi 'yɛ̞n'a ra Jesús.

43 Ne xø bi mbeng bu mi 'bu u ma mixädihe. Xø mí ątho 'bu xø mi zøm bu mahøn'a, nguetho ɛmmɛ mí nde t'aha u. 44 Ne xø bi zopu u mahøn'a, ya ná hyundi buya bi mbengui di nyaui Oja, nɛ guexta'a

bi ma. ⁴⁵Nɛ xø bi mbeng bʉ mí 'bʉh ma mixädihe mahøn'a, nɛ bi 'yɛ̞mbi:

—Nuya, 'da'angutho 'bu gán ahmbu ya o hin'na, nguetho ya bi zøn ra ora da mba ma dägä bu 'buh yu ts'om'bäi, guecä dán ja'igä ua ja ra ximhäi. ⁴⁶Dami ndanshu, ga mbähä ba nuhu ya ba ɛcua ngue di dägä, bi 'yɛmp'u.

Bi fent'a ra Jesús

⁴⁷Nɛ guexta'a mí yahu u ma mixädihe 'bu mi zøm bu a ra Judas, n'da ma mixädihe dí 'dɛ'mayoho gähe. Nɛ bán 'yohu xun ngu yu ja'i ba hya yú juai nɛ yu ts'aza. Nɛ gue'u yúm 'bɛhni yu hmumbäja nɛ yu dạc'yɛi, ma ngurpa judíohe. ⁴⁸Nɛ nu'a di dä ra Jesús bi xi a n'da ran t'uti da 'yøt' 'bu bi zøm bu: " Nu'a ga sus 'bu dán zɛngua'be, gue'a guim bɛnthu a," bi 'yɛn'a ra Judas. ⁴⁹Janangue'a nu'bu mí zøm bu 'bä a ra Jesús, bi 'yɛmbi:

—Xude ya 'bu, grá xänbate , bi 'yembi.

Ne bi zuspa rá 'yogu buya. ⁵⁰Ne bi da'a ra Jesús buya:

—Xi'e n'yø, ha gue'a gní 'yɛ a. Nɛ nu'u mi'da buya bi hyäm bu 'bä a ra Jesús nɛ bi bɛnt'i.

⁵¹Nɛ nu'a n'da ma mixädihe min 'yohu ra Jesús, bi c'os' rá juai nɛ bi zecpa rá gu a rá 'yɛhɛ ra hmumbäja. ⁵²Nɛ bi 'yɛn'a ra Jesús buya:

—Dami pε'ts'a ni juai bu ja rán t'o. Nu'u din tuhni nangue ra juai, nε'u dí du ra juai u, bi 'yεmp'a. ⁵³Ha guí εna hin xtan zä ga äp'a rám fäts'i Oja ma Ta nε ba pɛnhua 'dɛ'mayo munts'i yúm 'bɛhni da yangui, bi 'yɛmp'a n'da ma mixädihe. ⁵⁴Pε nu'bu da gue'a xcá mangä a, hague

dán zä ga ją'ts'ä a bi man rá t'ohni Oją, ngue 'bɛ'a i jatho din ja, bi 'yɛn'a ra Jesús.

⁵⁵Nɛ bi 'yɛmp'ʉ yʉ ją'i bʉya:

—'Bɛ'a guí homhbu ua ngue guí hạ ni juaihu nɛ ni zahu. Ha guí ɛmhbu drá bɛgä, nɛ nya'a thoho dá xän'nahu bu ja ra dạnija nɛ njam'bu gá bɛndgahu bu, bi 'yɛmp'u. ⁵⁶Pɛ gue'a din ja a tengu bi man'u yú pøngahya Oja 'bu maya'bu, bi 'yɛn'a ra Jesús.

Nɛ nugähe bʉya dyʉ xädigähe, 'bexgue dá 'dahmbe,dá sohmbe bʉ ra Hmu.

Bi juanba a ra Jesús u yú ngurpi yu judío

⁵⁷Nɛ bi bɛnt'a ra Jesús, bá si bʉ 'bʉh ra Caifás, ngue ra ngʉrpa mbäją. Nɛ ya xím pɛti gätho ma xänbate nijąhe nɛ yʉ dạc'yɛi, ma ngʉrpihe dyʉ judíohe. ⁵⁸Nɛ bi dɛn'na ra Pedro bʉya pɛgue a ná 'bɛjua thoho, bi zøm bʉ ja rá ngun'yu a ra hmumbäją bʉ hapʉ xí zøn'a ra Jesús. Nɛ 'darbʉ bi hyuhmbʉ ʉ yʉ asmayo, ngue in nde da nu a da t'ørpa a ra Jesús.

⁵⁹Nε nu'u yu hmumbäja nε yu dac'yεi nε gä mi'da ma ngurpihe dyu judíohe, dyu israelhe, mi hon'a n'da ra fɛhni ngue da zä dí yap'a nɛ da hyo. ⁶⁰Pε guehma nte bi dinbi, madague'bu xun ngu u bin juanni, bi 'yɛmbi majuani u yu fɛhni. Nɛ m'bɛjua buya, bi zøm bu yoho yun 'yohu din testigo, ⁶¹nɛ bi 'yɛn'u:

—Nuna ran 'yohu na bi 'yɛna:
"Nugä da zä ga xo't'ra danija ne man
hyupa thoho da zä ga høe mahøn'a,"
bi 'yɛna, bi 'yɛn'u bin juan bu.

⁶²Nε bi ndanc'a ra hmumbäją bʉya bim 'bäi, bi t'ɛmp'a ra Jesús: —Hanja hin guí thąti 'bε'a i man ya yʉn 'yohʉ.

⁶³Pε nu ra Jesús bin hεtho. Nε bi 'yɛn'a ra hmumbäją bʉya:

—Nangue rá thuhu Oją mahɛts'i, dami xije 'bʉ majuani gue'e grá Thahni, grá Cristo, rá Ts'ʉnt'ʉ i Oja, bi t'ɛmp'a ra Jesús.

64 Bi da a ra Jesús buya:

—Gue'a gám ma. Nɛ dí xi ahu, guin nuju, guecä dán ją'igä ua ja ra ximhäi, dam mixtegä ga com'be rá ts'ɛdi Oja tate thoho rá ts'ɛdi. Nɛ guin nuju 'bu bá cacä mahɛts'i mahøn'a, ba ɛcä bu ja yu güi, bi t'ɛmp'a ra hmumbäja.

65 Nɛ nu ra hmumbäją buya, bi dunsɛ rá pahni. Nam bøni ɛmbi hingui ɛspa Oją ra Jesús nangue'a bi ma. Nɛ bi 'yɛna:

—Nuna ran 'yohu na, bi man ra ts'ore nangue Oją. Him man ga homhbu yu testigo. Nɛ gätho gahu dá øhmbu a bi ma. ⁶⁶'Bɛ'a guí ndehu ga øthu ya, bi t'ɛmp'u yú mingurpihu.

Bi da u:

—Nuna i ja rá ts'oqui, i jatho da du, bi 'yɛn'ʉ.

⁶⁷Nε nubʉya, 'dahma 'dan'yo bi t'ørpa ra Jesús. Bi zox ʉ 'da, bi mbε'mi ʉ mi'da , bi mbɛnpa rá hmi ʉ mi'da, ⁶⁸bi 'yɛ̞mbi:

—Nu'bu majuani grá Thahni i Oja, ngue ra Cristo, dami xije to'o bi mbεp'i i.

Nε εmmε bi denthoho.

Ra Pedro bi gøn'a ra Jesús

⁶⁹Nɛ nu ra Pedro mi hupu thi bu ja ra ngun'yu, nɛ nu n'da ra xisu rá 'yṣhɛ ra hmumbäja, bi mba bu hu a ra Pedro, bi 'yɛmbi: —ξna ne'e gmín 'yohu na ra Jesús ra mengu Galilea, bi 'yemp'a ra Pedro.

70 Nɛ bi da'a ra Pedro, bin cøni:—Hin dí padi, bi 'yɛn'a.

Nε gätho ʉ mi 'bʉpʉ bi 'yø a bi man ra Pedro.

⁷¹Nε nu'bʉ mi nde da bøn'a ra Pedro, bi nu man'da ra xisu bʉya nɛ bi 'yɛ̞mp'ʉ mí 'bʉpʉ:

—Nuna ran 'yohu na min 'youi ra Jesús, ra mɛngu bu Nazaret, bi 'yɛn'a ra xisu.

⁷²Νε xø bin cøn'a ra Pedro:

—Majuani dím mangä ngue hin dí pacä a ran 'yohu guím ma, bi 'yɛmp'a ra xisu.

⁷³M'bεjua bʉya nu ʉ 'da mi 'yo bʉ, bi mba bʉ 'bäh ra Pedro, nε bi 'yɛmbi:

—Majuani maha, ne'e gmin
 'yohu a, mfadi thoho ni ndehu ne
 'da'angu bu gna yahu a, bi 'yemp'a.

⁷⁴Ne nts'edi bi mam buya ne bin juanni, bi 'yena:

—Oją i pądi majuąni hin dí pącä a ran 'yohu guí mamhbu, bi 'yɛn'a ra Pedro.

Ne 'bexgue bi mbah ra tamfø buya. 75 Ne nu ra Pedro buya, ja bi ben'a xí man a ra Jesús 'bu mi 'yembi: "Dí padi hin ní mbah ra tamfø 'bu na hyundi xquí cøngui." Ne bi nexpu buya ne emme bin zoni, xun u bi beni nangue a bi 'yøt'e.

Ra Jesús bi mba ma dä bu 'buh ra ts'ut'abi Pilato

27 Nɛ nu'bu mi hyax buya, gätho yu hmumbäja nɛ yu dac'yɛi, ma ngurpihe dyu judíohe, dyu israelhe, 'da'angu bi bɛ̞ni ngue di dä ra Jesús bu 'bu a ra ts'ut'abi,

ngue da hyo. ²Nɛ án thu't'i 'bʉ mi mba ma dä bʉ 'bʉ a ra Poncio Pilato, ra ts'ʉt'abi bʉ a.

Bi zut rá 'yuga ra Judas

³Nɛ nu'a ra Judas xí dä a ra Jesús, 'bu mi 'yøde 'bɛ'a bi man u ma ngurpihe ngue da hyo a ra Jesús, bi mba buya bi cospa a 'däte ma 'dɛt'a yu mbɛti ngue ra t'axi xí un'ndu yu hmumbäją, bi bɛni 'bɛ'a bi 'yøt'e.

⁴Nɛ bi 'yɛn'a ra Judas:

—Hingui ho hma a dá øt'e. Dá fänba rá ji n'da ran 'yohu hin'yu rá ts'oqui, bi 'yɛ̞mp'u yu hmumbäja.

Pε nu'u bi dati:

—Him ma güεndagähe 'bε'a gá 'yøt'e. Ya guí pą'a guím bɛnsε bu, bi 'yɛn'u yu hmumbäją.

⁵Bá ɛn bu ra mbɛti bu ja ra niją a ra Judas buya, nɛ bi mba bá sut rá 'yuga bu ja ra ndehnini.

⁶Nɛ nu'ʉ yʉ hmumbäją bi hyąx'a ra mbɛti nɛ bi 'yɛna:

—Hingui sä ga pɛs'hʉ ua na ra mbɛti ngue dim pɛcua mahøn'a, nguetho rán jut'iui ra ji na, bi 'yɛn'ʉ, nɛ gue'a i mam bʉ ja man t'ɛdihʉ.

⁷Nε bin 'yänni 'bε'a di jap'a ra mbɛti. Nɛ bi bɛni da dämba n'da xɛqui rá häi a ra 'yøt'ats'øe, guepu da t'äh yu 'damhnini 'bu da du bu. ⁸Nɛ asta guetya ní huti "rá häi ra ji" a ra xɛqui bu. ⁹Nɛ nu'a bin ja, maya'bu bi man'a ra pøngahyą Jeremías ngue din ja 'bu mí 'yɛna ngue: "Da thax i 'däte ma 'dɛt'a yu mbɛti ngue ra t'axi, rá muui a ra ja'i. Gue'a bi man u yu mɛngu israel ngue di muui.

10 Nɛ bi dänba rá häi a ra 'yøt'ats'øe, ngubu bi xicä ra Hmu," bi 'yɛn'a ra Jeremías 'bu maya'bu 'bu mí ma.

Ra Pilato bi juanba a ra Jesús

¹¹Nu'bu mim 'bäpu ja rá hmi ra ts'ut'abi Pilato, bi 'yɛmp'a ra Jesús:

—Ha gue'e grá hmuts'ut'abi yu judío, bi t'ɛmbi.

Bi da a ra Jesús:

-Gue'a guím ma.

¹²Nε nu'bʉ mi yąp'ʉ yʉ hmumbäją nε mi'da ma ngʉrpihe a ra Jesús, pɛ hin te i tątho a ra Jesús. ¹³Nu ra Pilato bi 'yɛ̞mp'a ra Jesús:

—Ha hin guí ø'a i man'ʉ di yąp'i i, nɛ hin guí thạti.

¹⁴Pε nu ra Jesús guexta'a hin te bi ma. Nε εmmε bi hyonya thoho ra ts'ʉt'abi, him mi pądi 'bɛ'a sä da bɛni.

Bi hma da mba ma cuati bu ja ra pont'i ra Jesús

¹⁵Nɛ nu ra ts'ʉt'abi nzại midi thø a n'da ra ofädi 'bʉ ra pa ra dampɛti ran dabaxjua. Midi thø'a to'o bi huan'ndʉ yʉ jali. ¹⁶Nɛ mi o bʉ n'da ran 'yohʉ í Barrabás, gätho mi fapʉ 'bɛ'a mí øt'a. ¹⁷Nu ra Pilato bʉya bi 'yän'ndʉ bim pɛti bʉ:

—To'o guí ndehu ga хосраhu ya. Ha gue ra Barrabás uague ra Jesús ngue nu'a ɛmbi ra Cristo, bi 'yɛmp'u.

¹⁸Ngubн bi ma nguetho mi pądi ун zɛya н ун yąpate.

19 Nɛ nu'bu mi hupu ja ran ts'ɛmbate ra Pilato, bi mbɛnpa ra nde a rá xisu bi 'yɛmbi: "Hin te gui 'yørpa a ra hogan'yohu, nguetho má xui dá 'uị n'da ra t'ị nts'utho nangue a," bi 'yɛmp'a ra nde bi mbɛnbi.

²⁰Pε nu yʉ hmumbäją nε ʉ yʉ dac'yεi, bi 'bɛp'ʉ yʉ ja'i da 'yäpi go

da mba ma thøgue a ra Barrabás, nε go da mba ntho a ra Jesús. ²¹Νε bi 'yän mahøn'a a ra ts'ʉt'abi:

—Nda'a guín ndehu ga thøcä, bi 'yɛ̞mp'u yu ja̞'i.

Nε bi da u buya:

—Gue'a ra Barrabás gui thøgue, bi 'yɛn'ʉ.

²²Νε bi dą a ra Pilato buya:

—Xi'a ra Jesús ɛmbi ra Cristo, 'bɛ'a ga ørpä a thą.

Gätho bi 'yɛn'u 'bupu:

—Dami cuatpu ja ra pont'i a.

²³—Pε hin te mán ts'o dá tịnba na, bi 'yɛ̞n'a ra Pilato.

Pe nts'edi bi da u:

—Dami cuatpu ja ra pont'i.

²⁴Min nu ra Pilato bɨya ngue hingui sä dim päh yɨ mbɨti yɨ jali, pɛ man'da bin junthɨ u. Janangue'a bi manda bá thunba ra dehe bɨya, bin xɨtlyɛ bɨt yɨ hmi yɨt jali, nɛ bi lyɛm bɨya:

—Nε nugä hin ma ts'oquigä rán dąte da nu na ran 'yohu hin te in dupate, pε go ni ts'oqui zεhεhu, bi t'εmp'u yu ją'i.

²⁵Nɛ bi dą u yu ją'i buya:

—Haha, madague'a i 'yosɛ ma güɛndahe a rán date na ran 'yohu, nɛcähe nɛ mam bom'bɛtohe dim 'bu 'bu niya'bu, bi 'yɛn'u.

²⁶Nu ra Pilato buya bi xocpa a ra Barrabás, nɛ bi manda dí fɛi a ra Jesús buya. Nɛ bi manda da mba ma cuati bu ja ra pont'i.

²⁷Nɛ nu yu dofui buya bi zix'a ra Jesús bu mí ja yú ngun'u yu dofui bu ja ra ngunts'ut'abi. Nɛ gätho yu dofui mí 'bupu bim pɛti, midi fäts'a ra Jesús. ²⁸Nɛ bi mbøcpa rá he buya nɛ bi het'a n'da ra he xun jupoi tengu mi he yu ts'ut'abi. ²⁹Nɛ nts'ɛdi

SAN MATEO 27 64

bi huspa n'da ra corona tengu mí hu'ts' yu ts'ut'abi, pɛgue ran thenni thoho bi 'yørpe, janangue'a ám 'be ra 'yu'uini a ra corona. Nɛ bi un'na n'da ra tøhø rán 'yɛi tengu mí ha yu ts'ut'abi. Nɛ bin danyahmu bu ja rá hmi nɛ bi 'yɛmbi: "Grá hmuts'ut'abi yu judío." Nɛ bi 'yɛns' yu biba, pɛgue ran thenni thoho bi 'yørpe.

³⁰Nɛ bi ts'ots'i, nɛ bi hyạnba a rá tøhø nɛ bi mbärpa rá yą. ³¹Nɛ nu'bu mi gua'a bi 'yuspi bi mbøcpa a ra he xí het puya, bi het'u yú hesɛ mahøn'a. Nɛ bi zix buya ngue di cuatpu ja ra pont'i bu ndehnini.

Bi cuatpu ja ra pont'i ra Jesús

³²Nɛ nu'bu mi ts'utho da bøm bu ja ra hnini, bin c'athu bu n'da ran 'yohu ra mengu bu Cirene, í Simón a. Ne bi t'ørpa ra ts'edi da duspa rá pont'i ra Jesús.

³³Ne bi zøm bu ja ra nyuni embi Gólgota buya. Nu'a ra Gólgota in nde da ma "ra t'øhø nyaxmu" a.
³⁴Ne nubuya bi un'na n'da ra vino mauaspi ra 'yethi xun ju. Nu'bu ya mí zä a ra Jesús, him bi nde bi zi.

35 Nɛ nu'bɨ mi jua a bi cuatpɨ ja ra pont'i bɨya, nu'ɨ yɨ dofɨi bi 'yøt'a n'da ran taha nangue rá he ra Jesús. Gue'a bi man'a ra pøngahya maya'bɨ ngue din ja 'bɨ mi 'yɛna: "Da mba ma dat'i a ma he nangue n'da ran taha da 'yøt'e."

³⁶Nɛ mi hupu yu dofui mi fädi. ³⁷Nɛ nubu rá ya a ra pont'i bi mba nt'o't'i bu ram hma bi ma 'bɛ'a í ts'ɛmba a ra Jesús, bi 'yɛn'a ra t'ohni: "Nuna ra Jesús na, rá hmuts'ut'abi yu judío na."

³⁸Nɛ bi mba ma cuatihʉ ra Jesús yoho yʉ bɛ̞, 'da a n'da yʉ́ pont'i. Nɛ bi 'bämp'u ja rán 'yɛi a n'da nɛ bi 'bämp'u ja rá gaha a man'da. ³⁹Nɛ nu yu ja'i mi thopu, bi zani, ⁴⁰nɛ bi 'yɛmbi:

—Nu'i guí ɛna gui xo't' ra dạniją nɛ xø man hyupa thoho gui hyøh mahøn'a, 'bɛ'a guí øt' ya thą. Nu'bʉ majuạni gue'e rá Ts'ʉnt'ʉ i Oją, dami cąpʉ ja ra pont'i, gan yạnsɛ, bi 'yɛn'ʉ.

⁴¹Nε'u yu hmumbäją bi 'yuspi nε yu xänbate niją, nε yu fariseo, nε yu dąc'yεi, gätho ma ngurpihe, din 'yεmp'u:

⁴²—Bi yạnba yú te u 'da, pε hingui sä din yạnsε ya. Pε nu'bu majuạni da guehna ma hmuts'ut'abihu, dyu israelhu, sä xtán gạsε bu ja ra pont'i nε xcá εc'yεihu buya. ⁴³Bi ma, i εna i tợp'ma rấm fäts'i Oja, da zä da yạn a Oja ya 'bu, nguetho ya bi ma, guesε rấ ts'unt'u Oja na, bi 'yɛn'u 'bu mi 'yuspi.

⁴⁴Nε'ʉ yʉ bε 'darbʉ bi guat'ʉ bi zan a ra Jesús.

Bi du ra Jesús

⁴⁵Nε nu'bʉ mi hyuxadi bʉya bim 'bɛxui ra häi, nɛ jague'bʉ hyunde bi nɛqui mahøn'a. ⁴⁶Nu'bʉ mi ts'ʉtho da zøn a hyunde, nts'ɛdi bi mbah ra Jesús, bi 'yɛ̞na:

—Elí, Elí, lama sabactani, bi 'yɛna ngue ra nde ra arameo.

Nu'a nam bøni: "Ma Oją i, ma Oją i,hanja gá hyega thoho," bi 'yena.

⁴⁷Nu'bʉ mi 'yø'a bi man ra Jesús 'da yʉ jạ'i mi 'bäpʉ, bi 'yɛฺna:

—Nuna ran 'yohu na, i mba't'a ra pøngahyą Elías, mí 'bu 'bu maya'bu.

⁴⁸Nε nu'a n'da mí 'bäpʉ 'bex bi mba bá hạ n'da εna ra fʉnjo, bi durpu ja ra vino ne bi ndøcta n'da ra xithi, ne bi 'uąspa a ra Jesús, embi da zi. 49Ne bi 'yen'u mi'da mí 'bäpu:

—Dami hyɛhmbu. O te guidí unhdu. 'Bɛ gan nuhu 'bu ba ɛh ra Elías da yani, bi 'yɛn'u.

⁵⁰Nε xø bi mbafi nts'ɛdi mahøn'a ra Jesús, nɛ 'bex bi du buya. ⁵¹Nε nu'a ra ora a buya, nu'a ra 'bø't'e mi ndam bu man'da mbo ra danija bá fupu magats'i bi xɛt'i nɛ 'bexgue bi zøt'a häi. Nɛ bi 'yan ra häi buya, nɛ bi fø'i 'da yu do hønbu go hapu. ⁵²Nɛpu ja yun 'yägui bi føh yu jado. Nɛ nu'bu mi dambɛni ra Jesús, bi bøx u 'da yu 'yɛc'yɛi xi du, bi dambɛni bu ja yún 'yägui u, ⁵³bi mba bu ra hnini Jerusalén u nɛ bi nu u 'da yu ja'i u xi du. Pɛ hinga gätho yu pa.

54Nε nu'bu mi du ra Jesús, nε nu'a ra hmudofui mí fä a ra Jesús, nε'u mi'da min 'yohu, 'bu mi nu di 'yạn ra häi, nε'u gä mi'da bin ja, εmmε bin su u, nε bi 'yɛ̞n'u:

—Majuąni maha, rá Ts'unt'u Oją na ran 'yohu.

sisu ngue man yɨm fäts'ihɨ a ra Jesús 'bɨ mán 'yohe bɨ ja ra 'yu, 'bɨ mambá nɛxhe bɨ Galilea. Mi 'bäpɨ ɨ, nguetho mi nde da nu 'bɛ'a da t'ørpa ra Jesús. Nɛ nu'ɨ bi nu 'bɛ'a gä bin ja. se Nɛ nu'a n'da mi 'bäpɨ, ra María Magdalena a; nɛ'a man'da ra María mi 'bäpɨ, ngue rá mbe ra Jacobo nɛ ra José; nɛ nu man'da ra xisu mi 'bäpɨ, gue'a rá mbe ra Jacobo nɛ ra Xuua, yɨ ts'ɨnt'ɨ ra Zebedeo ɨ; nɛ'ɨ mi'da yɨ xisu mi 'bäpɨ.

Bi mba nt'ägui a ra Jesús

57-58 Nɛ nu'a ra José, n'da ra mɛmbɛti bʉ ra hnini Arimatea, bi mba bu 'buh ra Pilato 'bu mi ts'utho da yuh ra hyadi. Bi 'yädi da 'yäcpa rá ngøc'yɛi ra Jesús, nguetho mi ɛc'yɛi a. Nɛ bi manda ra Pilato buya din t'unni. 59 Nu ra José buya bi duspa rá ngøc'yɛi a ra Jesús nɛ bi mbärpa n'da ra 'bø't'e xun ho. 60 Nɛ bi gärpu ja rán 'yägui zɛhɛ a ra José. N'da ra hyado xí manda xí mba nthɛqui. Nu'bu mi gua'a bi gärpu, bi juaspu n'da ra xindo xun hyu bu ja rá goxthi ra hyado, nɛ bi mba buya. 61 Nɛ mi hupu ra María Magdalena, nɛ man'da ra María mi hupu ja rá goxthi ra hyado.

Yu dofui bi mbäh ran 'yägui

62 Nɛ nu'bɨ mi hyax a ra pa ran ts'äya bɨŋa, xudi thoho bi mba ɨ yɨ hmumbäja nɛ yɨ fariseo, bá nu ra Pilato, 63 nɛ sä bi 'yɛmbi:

—Ma ts'ut'abi ahe, dá bɛmhbe man'da bi man'a ra hyäte 'bu him maní du, bi 'yɛna: "Nu'bu ná hyupa ga thạmbɛni bu 'bu u xøn du," bi 'yɛna. ⁶⁴ Janangue'a xun ho 'bu gui pɛhni to'o da mbäh ran 'yägui an hyupa, xøhma ba ε u yú xädi 'bu bin xui da gucpa a rá ngøc'yεi, nɛ da 'yɛna bi dạmbɛni buya. Man'da xun ts'o ra fɛhni tengu a, xinda gue a bi mansɛ 'bu mi 'bui, sä bi 'yɛn'u yu hmumbäja nɛ yu fariseo.

⁶⁵Bi dą a ra Pilato buya, bi 'yɛmbi:

—Sixhu u n'dan nε'ts'i ni dofui dá 'da'ahu. Dami cothu xun ho bu ja rá goxthi a ra hyądo, nε njon da zä da xo't'i.

66 Nε bi mbähä u yu mbäją nε yu fariseo, bi got'i xun ho a ra hyądo nε bi mερya, nε bá peng buya, bá copu yu dofui ngue da mbädi.

SAN MATEO 28 66

Bi dąmbęni ra Jesús

Nε nu'bu ya mi thoh ra pa ∠O ran ts'äya, xø rá mbudi ra semana, bi mba mxudi thoho u yoho yu xisu. Nu'a n'da ra María Magdalena ne'a man'da ra María. Nu'bu mí nets'i ní mba bu bí ja a ra hyado. ²Ne nu'bu mí mba u, 'bexgue nts'edi bi 'yan ra häi mahøn'a. Nguetho bi 'yøt'a rám 'bɛhni Oja xí zøpu 'bu mí 'uec'a ra do mi juaxpu ja rá goxthi ra hyado. 3-5 Nε nu'a rám 'bɛhni Oją di fɛxni tengu n'da ra huɛi. Nε nu rá he buya, xun t'axi tengu n'da ran nequi. Ne nu'u yu dofui 'bu mín nu a rám 'behni Oja emme bin su, bi fɛt'i, nɛ nte sä da 'yøt'e, tengu'bu xi du. Nu'a rám 'bɛhni Oja, mi hupu ja a ra do xí 'ueque, nε bi 'yemp'u yu xisu 'bu mi zøm bu:

—O guín suui. Dí pądi ngue guí hommi a ra Jesús xí cuatpu ja ra pont'i u. ⁶Pε njo'o ua, bi mba nsots'i tengu mi ma. Ba thohmi gui nuui ua mí 'bɛni, bi 'yɛn'a rám 'bɛhni Oja 'bu mi 'yɛmp'u yu xisu. ⁷Nuya, ní mbɛ 'dahmantho, gui xihmi yú xädi: "Bi dambɛni bu 'bu u xøn du ya," gui 'yɛnui. Nɛ nde'bu gätho ahu gui mbähä bu Galilea nɛ guepu guin c'athu bu. Nɛ gue'a bá ɛcä ua ngue ga xi aui, bi 'yɛmp'a rám 'bɛhni Oja mahɛts'i.

⁸Nɛ bi bøm bu ja ra hyado u yu xisu, bin su nɛ xim midi johya. Bin tihi, bi mba bá xi u yu xädi ra Jesús 'bɛ'a bi sifi. ⁹Nɛ bi zupu 'yu a ra Jesús u yu xisu.

—Xíhats'i, bi 'yεmp'ʉ.

Nu yu xisu buya bin danyahmu ne bi hyup'u yu gua, bi dande buya. ¹⁰Ne bi 'yen'a ra Jesús: —O guín suui, ni mbɛ ba xihmi uma cuhu, ní mbähä bu Galilea, ja nín timhbu bu, bi 'yɛn'a ra Jesús.

Ra fehni bi man yu dofui

¹¹Nɛ nu'bu mí mbenc'u yu xisu, nɛ'u yu dofui mí fäh ran 'yägui bi mba bá xi u yu hmumbäją 'bɛ'a gätho bin ja. ¹²Bim pɛti yu hmumbäją buya, nɛ yu dąc'yɛi. Bi ma 'bɛ'a da zä da 'yøt'e. Nɛ nubuya xun ngu ra mbɛti bi un'ndu yu dofui ¹³nɛ bi 'yɛmp'u:

—Gui 'yɛmhbu: "Bá ɛ u yú xädi 'bu min xui 'bu mán ahmbe, bi bɛp'a rá ngøc'yɛi," gui 'yɛmhbu, bi 'yɛmp'u. '4Nɛ nu'bu da 'yø'a ra ts'ut'abi ngue gán ahmbu, nɛ da 'yɛna da zu ahu, nugähe dan yahe ga fäx ahe, bi 'yɛn yu hmumbäja 'bu mi 'yɛmp'u yu dofui.

15 Ne bi hyạn a ra mbeti u yu dofui buya. Bi mba da 'yøt'a bi sifi. Ne nu'a ra fehni bi man u, xun ngu bi 'yęc'yei u ma mijudíohe dyu israelhe. Ne guexta'a ra fehni i man u.

Yú xädi ra Jesús bi un yún t'gdi da mamp'a rám hma

¹⁶Nε dá mbähmbe bu ra häi Galilea buya, dí 'dɛ'ma'da gähe, yú xädigähe ra Jesús. Nε dá sømhbe bu ja ra nyuni xí xije ra Jesús dan c'athe bu. ¹⁷Nε nu'bu má nuhe, dá ɛspahe a, pɛ nu'u 'da him mi ɛc'yεi gue gue'a. ¹⁸Nε bi hyäm bu dí 'bähmbe a ra Jesús nε bi 'yɛ̞nje:

—Gätho ra ts'ɛdi bin 'dacä ga manda gätho ra ximhäi nɛ mahɛ̞ts'i, bi 'yɛ̞nje. ¹⁹ Janangue'a ní mbähä ya hønbʉ go hapʉ 'bʉh yʉ jạ'i gä na ndoho ra ximhäi, gui xihmbʉ da 'yɛɛ'yɛigui. Nɛ nu'ʉ to'o di däcä 67 SAN MATEO 28

yú mbui, gui xixyąbahu nangue rá thuhu ma Ta, nɛ nangue rá thuhu rá Ts'unt'u, nɛ rá thuhu rá Hogandąhi Oją. ²⁰Nɛ gui xänbahu da 'yøt'e 'bɛ'a gätho dá xi ahu. Nɛ guim bɛmhbu dín 'yohu gätho yu pa asta gue'bu da guah ra ximhäi, bi 'yɛngähe ra Jesús buya.

MARCOS

Ran ho ma'da'yo bi 'yo't' ra Marcos

Nu ra Xuua Nxixyą bi ma mi ts'utho da zøh ra Hmu

Ja ua rá mbudi ran ho ma'da'yo nangue'a ra Jesucristo, rá Ts'unt'u Oją. ²Bin ja a mán t'o't'i 'bu maya'bu bu ja rá søcuą Oją 'bu mí 'ygna:

> Nugä ga pɛhn'na n'da mam 'bɛhni dim 'bɛt'o bu gni mba. Nu'a da xih yu ja'i da døp'e'e, bi 'yɛ̞mp'a rá Ts'unt'u.

³Ne'a ra pøngahyą Isaías bi ma nguehna rám 'bɛhni 'bʉ mi 'yɛna ngue:

N'da ra ja'i din ya nts'ɛdi bʉ ja ra dapo ngue da 'yɛ̞na:

"Damin sähu ga simhbu ra hmu mi ts'utho da zøcua,

Dami hoc ni mbuihu ga tømhbu xun ho," da 'yɛn a mam 'bɛhni, i ɛn Oją, bi 'yɛn'a ra Isaías.

⁴Nɛ gue'a ra Xuua bi 'yøt' ran xixyą bu ja ra dąpo bi man Oją maya'bu. Nu ra Xuua bi xih yu ją'i din xixyą to'o di päh yún 'yomfɛni nɛ da mba ma punbi yú ts'oqui buya. ⁵Gätho yu ją'i mi 'bupu ra xɛqui Judea, nɛpu ra dąhnihni

Jerusalén, bi zøm bu i øt' ran xixyą ra Xuua. Nɛ nu'u 'da bi päh yún 'yomfɛni nɛ bi mam buya ngue hingui ho 'bɛ'a xí 'yøt'e. Nɛ bi mba ma xixyaba bu ja ra dathe Jordán u buya.

⁶Nu ra Xuua mí he n'da ra mbapahni án t'øt'e ngue yú xingu yu camello nε mi ja rán gut'i ra xifani. Νε hønt'u yu t'axi nán sihmε nε ra t'afi t'asa dapo. ⁷Νε bi 'yɛ̞na:

—Ba ɛpʉ n'da man'da ja rá ts'ɛdi xinda guecä, hin dí sʉcä tengu a.

⁸Nugä xtá xixya ahʉ nangue ra dehe thoho, pɛ nu'a di 'da'ahʉ rá Hogandahi Oja, bi 'yɛ̞mb yʉ ja'i a ra Xuua.

Bi mba ma xixyąbi ra Jesús

⁹Nɛ nu yʉ pa bi 'yøt' ran xixyą ra Xuua, bi nɛxpʉ ra hnini Nazaret ra Jesús, ngue ra xɛqui Galilea. Nɛ bi zøm bʉ ra Jesús bin xixyą'a bʉya bʉ ja ra dạthe Jordán. Gue'a ra Xuua bi 'yøt' ran xixyą. ¹⁰Nɛ nu'bʉ mí bøxpʉ ja ra dehe bʉya 'bex bi nu bi xoh mahɛ̞ts'i nɛ bá cạh rá Hogandahi Oja, tengu n'da ra t'azʉ, bi zøpʉ 'bäh ra Jesús. ¹¹Nɛ bi t'ø a n'da ra nde mahɛ̞ts'i bi 'yɛ̞na:

—Ma Ts'unt'u i, dadí huɛc'i i nɛ dín numanho i, bi 'yɛn a ra nde.

Nu ra Jesús bi ts'äp rá mbui bu ma'ueni

12 Nɛ nubuya nu rá Hogandahi Oja 'bex bi bɛnbi da mba bu ma'ueni a ra Jesús. 13 Nɛ nyote pa bim 'bupu nɛ nyote xui. Nɛ nu ra zithu ra Satanás bi zäp rá mbui a ra Jesús gätho yu pa bim 'bupu, nɛ mí 'buhmbu bu yu zate. Pɛ bi mbäx'u yúm 'bɛhni Oja mahɛts'i a ra Jesús 'bɛ'a gä bi nu bu.

Nu ra Jesús bi du'mi bi man a rám hma bu ja yu hnini

¹⁴Ya xí jot'a fädi ra Xuua Nxixyą 'bu mi bøm bu ra Jesús bu ra xεqui Judea, bi mba bu Galilea. Nε bi mam bu ran ho ma'da'yo ngue 'bερu dí manda rá ts'εdi Oją n'da. ¹⁵Nε bi 'yɛ̞mb yu ją'i:

—Mi ts'utho da zøn ra pa di manda ua rá ts'ɛdi Oją, dami päh nin 'yomfɛnihu, damin unsɛhu di manda ahu Oją 'dahma din ja ahu ra te ma'da'yo. Gue'a bi man a ra Jesús 'bu mí 'yɛ̞mp'u yu jạ'i.

Ra Jesús bi zohni goho yu mbahuą

¹⁶N'da ra pa mi 'yo bu a ra Jesús bu ndendądehe t'εmbi Galilea. Nε nubuya bi nu a ra Simón n'youi rán 'yohu i Andrés a, mi επχit'ą bu ja ra dądehe u, ngue yú 'bɛfi yu mbahuą u. ¹⁷Ra Jesús bi 'yɛmp'u:

—Ba tengaui ga ja aui gui xihmi yu jali da 'yec'yeigui tengu thoho bu gní theui yu hua ngubu guí øt'ui, bi 'yemp'u.

¹⁸'Bex bi hyɛpu yú xit'a buya nɛ bi dɛnni.

19 Ne xø bi thogui bin 'yo mi ts'u ne bi nu a ra Jacobo n'youi rán 'yohu i Xuua a, gätho u yoho yú ts'unt'u ra Zebedeo u. Mi hubu ja yú mbosa u, midi hoc yú xit'a. ²⁰ Ne xø bi xifi da den'du. 'Bex bi den'du buya bi zopu rá ta bu ja ra mbosa u buya ne yú mbefi.

Ra Jesús bi hoc'a n'da ran 'yohu min 'youi ra zithu

²¹Nε nubuya nu ra Jesús bi yuthu bu ja ra hnini Capernaum u xí tɛnni. Nu ra pa ran säya mí curpu ja ra niją nɛ mi xänba bu yu ją'i.

²²Nε nu'u buya, εmmε bi hyonya thoho 'bu mí 'yø a bi man ra Jesús, nguetho bi xänbi xun ho nɛ hinga ngubu mí man u ma xänbate sɛhe ngue dyu israelhe, dyú judíohe.

'Bex gue bi badi ja rán t'ɛdi ra Jesús.

²³Nɛ mi 'bupu n'da ran 'yohu n'youi ra zithu nɛ nts'ɛdi bi mbah puya, bi 'yɛna:

²⁴—'Be'a guí nde gui 'yørcahe grá Jesús, grá mɛngu Nazaret. Ha gui juaje ya. Dí pądi gue'e rá Thahni i Oją gue xʉn hotho, bi 'yɛ̞na.

²⁵Pε nu ra Jesús bi dąmhyą ra zithu, bi 'yεmbi:

—Daman hɛ, dami pøm bu ja rá mbui na ran 'yohu, bi 'yɛmbi.

²⁶Nu ra zįthu bʉya nts'ɛdi bi huạ'ts'a ran 'yohʉ, nts'ɛdi bi mbafi, nɛ bi bøm bʉya. ²⁷Gätho bi hyonya thoho ʉ 'bʉpʉ nɛ bin 'yɛ̞mzɛhɛ ʉ:

—'Bɛ'a nam bøn'a dí nuhu ya.
'Bɛ'a ni 'da'yonxädi na, nguetho i ja rán t'ɛdi na i suh yu zithu nɛ i su u, bin 'yɛ̞mzɛhɛ u.

²⁸Nɛ 'bexque 'dahmantho bi hmam bu gätho ra häi Galilea 'bɛ'a bi 'yøt'a ra Jesús.

Bi hoc'a rá suto ra Simón a ra Jesús

²⁹ Nu'bu mi bøm bu ja ra niją a ra Jesús bi mbähä ra Simón, nɛ ra Andrés, nɛ ra Jacobo, nɛ ra Xuua. Bi zømhbu bu rá ngu ra Simón. ³⁰Nɛ nu'a rá suto ra Simón 'bɛm bu rá oi, i hɛmb ra pa. Nɛ bi si a ra Jesús. ³¹Nɛ bi nu bu i 'bɛn'a ra xisu buya, bi bɛnba rá 'yɛ nɛ bi xots'i. 'Bex bi bøn a ra pa, hin hapu xun'u, nɛ 'bex bi zä bi hoc yún sihmɛ buya.

Ra Jesús bi hoqui xun ngu yu hyenni

32 Nɛ nu'bu mí yuh ra hyadi gätho u mi u bá ts'inba a ra Jesús bu mi 'bui, nɛ u min 'yohu ra zithu bá ts'inbi. 33 Bim pɛti bu ja ra goxthi gätho yu ja'i 'bupu ja ra hnini. 34 Gätho na ngu yu hyɛnni bi hoqui, nɛ bi hyønba thi yu zithu min 'yohu u 'da. Nɛ nu yu zithu, ɛmmɛ mi ndehma da ma to'o a ra Jesús, pɛ nu ra Jesús him bi japi din ya u.

Nu ra Jesús bi xänba yu ją'i bu ra xequi Galilea

³⁵Nɛ nu'bʉ mi ts'ਚtho da hyax buya, bi ndants'a ra Jesús bi bøm bu ja ra hnini, bi mba bu ma'ueni bin yaui Oja. ³⁶Nɛ nu'bʉ mi hyats'i xun ho buya, bi mba ra Simón da hyoni, nɛ'u mi'da mi 'buhmbu bi mbähä da hyomhbu ra Jesús. ³⁷Pɛ nu'bu mí dim buya, bi 'yɛmbi:

—Mbähä bu ja ra ngu nguetho gätho yu ja'i hon'a bu mahøn'a, bi 'yɛmbi.

38—Hin'na, pɛ man'da xun ho 'bu ga mbähä bu ja mi'da yu hnini, nɛpu ga mangä bu mam hmam bu, nguetho gue'a bá ɛcä ua a, bi 'yɛn'a ra Jesús.

39 'Bex bi mbähä buya, bin 'yo gätho ra häi Galilea, bi man rám hman Oją bu ja yu niją ne bi hyøn'a thi yu zįthu mín 'yohu 'da yu ją'i bu bi thogui.

Bi hoc'a n'da ran 'yohu mi hemb ra t'axca'ya

⁴⁰Nɛ bi zøm bu n'da ran 'yohu bu 'bäh ra Jesús, i hɛmb ra t'axca'ya. Bin danyahmu, bi 'yäp ra mate, bi 'yɛna:

—Nu'bu ni pähä da zä gui hogui ts'u, bi 'yɛmbi.

41 Bin yeh rá mbui ra Jesús, bi dä'a ra hyɛnni, ne bi 'yɛmb buya:

—I jagä ra pähä da yan'a ya, bi 'yɛmbi.

42'Bex bim 'bɛ'u yu 'ya mi hɛmbi. 43,44Nu ra Jesús buya, nts'ɛdi bi hɛcpi nɛ bi 'yɛ̞mbi:

—Nuya, njon gui xifi 'bɛ'a dá øt'e'e. Ni mba, bán 'yupʉ 'bʉh ra mbäją, gui un bʉ n'da ra 'bøts'e i man rán t'ɛdi ra Moisés da hyaxpʉ n'da 'bʉ ya bi yan ra t'axca'ya, nɛ da fah bʉya ngue bi zä i, bi 'yɛmbi.

Ne bi xifi da mba buya. 45 Pe nu ran 'yohu 'bu mi bøm bu bi mbudi emme mma. Ne bi xih yu ja'i 'be'a xí t'ørpe. Jannangue'a nu ra Jesús ya him bi zä da yurpu ja yu hnini ne 'yotho bu ma'ueni nguetho emme bi muns yu ja'i 'bu i curpu ja ra hnini. Pe guehma xun ngu yu ja'i mi zøm bu hapu mi 'yo ngue høn bu go hapu ní nets'i.

Bi hoc'a n'da ra ją'i mi ts'a rá ją'i

Nu'bu mi tho i ts'u 'da yu pa bi yut mahøn'a bu Capernaum ra Jesús. Nu'bu mi 'yøh yu ja'i ngue 'bupu ja ra ngu, ²'bexque xun ngu bi zøm bu yu ją'i gue'bu go mi yupu mbo ra ngu nɛpu thi. Nu ra Jesús buya, bi xih rám hman Oja u yu ją'i. ³Nɛ nubuya, bi zøm bu 'da yun 'yohu i tu n'da ra hyɛnni ngue mí ts'a rá ją'i. Goho ma 'yohu u yun dute. ⁴Nɛ hingui sä da thopu 'buh ra Jesús nguetho mi du bu yu ją'i. Janangue'a bi xø'ts'a n'da xɛqui ra 'bet'e, bi camp'u a ra hyɛnni con rá 'beza. ⁵'Bex bi bah ra Jesús ngue mi pa u ngue i jasɛ rá ts'edi, nɛ bi 'yɛmp'a ra hyɛnni buya:

—Nu'i, n'yø, ni ts'oqui ya xʉm pun'ni i, bi 'yɛmbi.

⁶Nε nu'u 'da yu xänbate niją, mi hupu. Nε nu'bu mí 'yø'a 'bɛ'a i man ra Jesús, ⁷bi 'yɛnsɛ mbo yú mbui n'da ngu n'da: "Xina, hanja ni man na tengu na. Pɛ hingui numansu Oja na, njo'o n'da ra ja'i da zä di punba yú ts'oqui n'da, hinda hønt'a Oja," bi 'yɛnsɛ yú mbui u. ⁸Pɛ nu ra Jesús 'bexque bi batho 'bɛ'a mbɛn u, nɛ bi 'yɛmp'u:

—Hanja ngubu guím bɛmhbu mbo ni mbuihu. ⁹ Ha guím bɛmhbu ngue nte ni mba tho a dá xicä na ran 'yohu ngue rá ts'oqui ya xum punbi. Ha guím bɛmhbu man'da xquí pahmbu ngue i ja ma ts'ɛdi 'bu ga xifi da ndants'i, da gax rá fidi din 'yo. ¹⁰ Pε nugä ngue dán ja'igä ua ja ra ximhäi, ga ut'ahu ya i ja man t'ɛdi ua ja ra häi ngue ga punba yú ts'oqui n'da ra ja'i, jannangue'a ga japi din 'yo na ran 'yohu ya, bi 'yɛn a ra Jesús.

Nε nubʉya, bi 'yε̞mp'a mí ts'a rá ją'i:

¹¹—Nu'i, dí xi i, ndants'i, cax ni fidi, ni mba ni ngu, bi 'yɛmbi.

¹² Nubʉya, 'bex bi ndants'i, bi gax rá fidi, bi bøm bʉ i ja ra ngu. Nɛ bi

nu u gätho mi 'bupu. Nε bi hyonya thoho u. Jannangue a bi 'yɛspa Oją u buya nε bi 'yɛn u:

—Njam'bu xtá nuhu tengu a bin ja ya, bi 'yɛn u.

Nu ra Leví 'bex bi dεn'na ra Jesús

13 M'bɛjua bʉya xø bi mba mahøn'a bʉ ja ra ndendądehe a ra Jesús. Nɛ mi søm bʉ yʉ ją'i nɛ mi xänba bʉ ʉ. 14 Nu'bʉ mi thopʉ 'bʉ a ra Leví, i hupʉ ja rá mɛxa gue'a ra hyącahäi a. Nu'a ra Leví rá ts'ʉnt'ʉ ra Alfeo a. Nu ra Jesús bʉya bi 'yɛmbi:

—Ba tengui.

'Bex bi ndants'a ra Leví buya, bi denni.

Jesús bin sihmehu yu ts'om'bäi

15 Ne bin sihmehu ra Jesús ne yú xädi bu ja rá ngu a ra Leví. 'Darpu bin sihmehu 'da yu ziyate hyacahäi ne mi'da yu ts'om'bäi. Xun ngu mi 'bupu nguetho xun ngu u ya xí 'yec'yei a. 16 Ne nu'u 'da ma xänbatehe bu nija, yu fariseo u, ne nu'bu mi nu ra Jesús ne yú xädi sihmehu u yu ziyate hyacahäi ne yu ts'om'bäi ne bi 'yemp'u yú xädi ra Jesús:

—Hanja ngubu øt' ni Hmuhu. Hingui ho øt'a ngue i sihmehu yu ziyate hyącahäi ne yu ts'om'bäi, bi 'yɛn u.

¹⁷Nu'bʉ mí 'yøh ra Jesús 'bɛ'a bi man ʉ, bi 'yɛ̞mp'ʉ:

—Nu'u im bɛnsɛ xun zaqui hingui honi to'o da mbäts'i, hinda hønt'u i pasɛ in zäman'u i honi to'o da mbäx u. Nɛ nugä bá ɛcä ga fäx u i padi ja yú ts'oqui, him bá ɛcä ga fäx u im bɛnsɛ yu hocja'i, bi 'yɛn a ra Jesús.

Ran t'änni nangue u ε't' yún sihmε

18 Nu'u yu xädi ra Xuua Nxixya ne yu xädi yu fariseo mí e't' yun sihme u. Ne bi zom bu u 'da bu mí 'buh ra Jesús ngue bi 'yänni ne bi 'yembi:

—Hanja hingui ɛ't' yén sihmɛ u ni xädi nɛ i ɛ't' yén sihmɛ u yé xädi ra Xuua nɛ yé xädi yu fariseo, bi 'yɛn

¹⁹Ra Jesús bi xi'a n'da ran t'uti ngue ran thati 'bu mi dat'u, bi 'yembi:

-Pε nu'u i 'bupu ja ran thạti hin da du yú mbui nguetho 'bupu a ran 'yohu din thati. Hin da 'yɛna ngue hin din sihme u. 20 Pe da zøn ra ora da ts'ispa a ran 'yohu ne ja da 'ye't' yún sihme buya, bi 'yen a ra Jesús. ²¹Nɛ nu'a din xä u ma xädigä hin da bømanho 'bu ne'a ra nyomhma da den ya, tengu thoho ra naxca 'bø't'e hin da zä di 'bø't'a ra 'ya'bø't'e nguetho da xε thoho mahøn'a. 22 Νε ngutho a ra vino ma'da'yo hin da zä da sirpu ja ra 'yambot'asgi nguetho nu'a ra vino ma'da'yo da dun 'bu da sirpu ne dim fän a ra vino buya, gätho 'da dín ts'ontho buya. Nu'a ra vino ma'da'yo i pa nsi't'i bu ja yu mbot'asçi ma'da'yo, pi 'yen'a ra Jesús 'bu mí dadi.

Bi t'ɛmbi i øt' ra 'bɛfi u yú xädi ra Jesús a ra pa ran ts'äya

²³Nɛ nu'a ra pa ran ts'äya bi mbähä yú xädi ra Jesús, bi thopu ja n'da rá huahi yu trigo. Nu yú xädi buya i toc yu trigo bu bi thogui. ²⁴Nu yu fariseo bi nu 'be'a bi 'yøt'u yú xädi ra Jesús nɛ bi t'ɛmp'a ra Jesús buya:

—Hanja ngubu i øt'u ni xädihu ya ne i ma man t'edihu hin dam pehmbu a ra pa ran ts'äya, bi 'yɛn'u yu fariseo.

²⁵Pε nu'a ra Jesús bi 'yɛmp'u:

—Ha hin guí nu bu ni søcuahu ngue ne ra David bi mbesta rán t'ędi Oją 'bu n'dandį 'bu min tumanthuhu bu bin 'yo ne u min 'yohu. ²⁶ Janangue'a bi yurpu ja rá ngu Oją ne bi zihu bu yu 'bøxthuhme. Pe him mi sä xtán zi u ne hønt'u yu mbäją i sä da zi u. Ne nu ra Abiatar, ra hmumbäją bu a, bi 'yemp'u.

27 Ne xø bi 'yena:

—Í ts'än'na ra pa ran ts'äya nguetho bi ndep yu ją'i hin ε din unbi, hin í ts'änni ngue da mba nts'upi. ²⁸Nε nugä ngue dán ją'igä ua ja ra ximhäi, drá hmugä nε i ja man t'εdi gam mangä 'bε'a da 'yøt' yu ją'i ra pa ran ts'äya, bi 'yɛn a ra Jesús.

Bi hoc'a n'da ran 'yohu him mi sä di juan rá 'yɛ

Nε nu ra Jesús buya bi yurpu ja ra niją mahøn'a. Nε mí 'bupu n'da ran 'yohu him mi sä di juąn rá 'yε. ²Nε mi 'bupu 'da di axtho ra Jesús 'bu di hocpa rá 'yε ran 'yohu. Nε nu'bu da nu di hocpi di yap puya nguetho ra pa ran ts'äya a. ³Pε nu ra Jesús bi 'yɛmp'a ran 'yohu:

—Ndants'i, gam 'bähnu made i 'buh yu ja'i, bi 'yɛmbi.

⁴Nε nubʉya, bi 'yän'dʉ 'bʉpʉ nε bi 'yɛmp'ʉ:

—Dami xiju ya 'bɛ'a xun ho da t'øt' 'bu ra pa ran ts'äya. Ha da t'øt'a n'da ran ho uague da t'øt'a n'da ran ts'o. Ha xun ho 'bu da yanba rá te rá mija'iui n'da, uague xun ho 'bu da hyacpa rá te rá mija'iui n'da.

Pɛ nu'u hin'yu 'bɛ'a sä dí dati.
⁵Nu ra Jesús bi hyanman'u yu ja'i buya nɛ bi zøt rá mbui nguetho hin'yu ran hocja'i u. Nubuya bi 'yɛmp'a mi u rá 'yɛ:

—Dami juạn ni 'yε. Nε 'bex bi juạn rá 'yε buya, bi gomanho. ⁶Bi bøn yu fariseo buya nε in cuε. Bin yahu mahøn'a u yún suihu ngue mi tɛn ra Herodes, nε mí hon u 'bɛpu dí hyo a ra Jesús.

Xun ngu yu ja'i bim peti bu ja ra dadehe mahøn'a

⁷Nu ra Jesús bi 'uegue bi mbähä yɨ xädi bɨ ja ra dądehe nɛ xɨn ngu yɨ ją'i mi 'bɨpɨ ra häi Galilea bi dɛnthoho. ⁸Nɛ ɨ yɨ mɛngu bɨ ja ra häi Judea, nɛpɨ ra hnini Jerusalén, nɛpɨ ra häi Idumea, nɛpɨ 'danguadi ra Jordán, nɛpɨ ra xɛqui Tiro nɛ Sidón, bi 'yø ɨ 'bɛ'a gätho bi 'yøt'a ra Jesús. Janangue a gätho bi zøm bɨ mi 'bɨ a. ⁹Nɛ nu ra Jesús bi 'yɛ̞mp'ɨ yɨ xädi:

—Damin sähu, gui jomhbu n'da ra t'umbosa nu ja ra dehe, bi 'yɛ̞mp'u.

Ngubu bi xifi nguetho i nu man'da man'da ní zøntho yu ja'i ne nu'bu bin du bu yu ja'i da hyuxpu ja ra mbosa ra Jesús buya. ¹⁰Nguetho ya xí hoqui xun ngu yu hyenni, janangue a din tønthoho u yun zäman'u in nde da benba rá pahni ra Jesús ngue mi pa u, høntho ga thärpa thoho rá pahni 'bex gue da yangui, mi en'u. ¹¹Ne nu'u min 'yohu ra zithu bin danyahmu bu 'buh ra Jesús ne mbafi, en u:

—Nu'i gue'e rá Ts'unt'u i Oją, bi 'yɛn u.

¹²Pε nu ra Jesús nts'εdi bi hεcpa u nguetho hingui ndepe gue'u yu zįthu dí bą u yu ją'i gue gue'a rá Ts'unt'u Oją a.

Ra Jesús bi huahni 'dɛ'mayoho yú xädi

¹³M'bɛjua bʉya bi guam bʉ ja ra nyuni a ra Jesús. Nubuva bi zohn'du 'da yú xädi ne nu'u bi mba bu 'buh ra Jesús u buya. 14 Ne nubuya bi huahn'du 'de'mayoho, bi zänni din 'yohu ngue da zä da mbehni da xih yu ja'i rám hman Oja. ¹⁵Ne bi un yú ts'edi di hoc yu hyεnni nε da hyøn a thi yu zithu n'yohu 'da yu ja'i. 16 Bi zänna ra Simón, ne bi zänbi dí huti ra Pedro a. ¹⁷Nɛ ra Jacobo nɛ'a ra Xuua rán 'yohu na ra Jacobo. Gätho yoho yú ts'unt'u ra Zebedeo ya. Νε bi zänba yún sospathuhu Boanerges, i nde da ma tengu n'da ra ngäni. ¹⁸Ne'a ra Andrés bi zänni, ne ra Felipe, ne ra Bartolomé, ne ra Mateo, ne ra Tomás, ne man'da ra Jacobo ngue rá ts'unt'u ra Alfeo, ne ra Tadeo, nε man'da ra Simón, t'ɛmbi ra cananista. 19 Ne ra Judas Iscariote gue'a di dä a ra Jesús. Ne nu'bu mí gua'a bi un yú ts'edi u, bá ệh yú ngu.

Bi t'embi in 'youi rá ts'edi ra zithu a ra Jesús

²⁰Ne xø bi zøm bu xun ngu yu ja'i mahøn'a xø him mi pongui din sihme ts'u ra Jesús ne yú xädi. ²¹Nu'bu mí 'yø u yú meni ra Jesús 'be'a gätho i øt'a, embi in gat'i, ne bá e u bi zøm bu 'buh ra Jesús i nde da zits'i.

²²Nε nu yʉ xänbate niją xpí 'yɛ a Jerusalén, sä ɛn ʉ n'youi ra zithu ra Jesús, nɛ ɛn ʉ nangue rá ts'ɛdi yú hmu ra zithu gue'a ní zä i høn a thi yu zithu ra Jesús, sä bi 'yɛn u yu xänbate nija.

²³ Nu'bʉ mí bạh ra Jesús 'bɛ'a bi man ʉ, bi zon'dʉ bʉya nɛ bi xih yʉn t'uti da bądi hinga gue'a man ʉ. Bi 'yɛ̞mp'ʉ:

—Hin da zä a ra zįthu din susehu yú minzįthuhu, ne xtí 'betho rá ts'edi. ²⁴Tengu n'da ra ts'ut'abi bu ja ra hnini hingui sä da hyą rá ts'edi 'bu din susehu u yú ją'i. ²⁵Ne ngutho n'da ra ngu 'darpu 'buhmbu yú ts'unt'u n'da ran 'yohu da guase u 'bu hinga 'dat'a im beni. ²⁶Ngutho u yu zįthu 'bu xtín susehu yú hmu, xtan guase u 'bu hinga 'dat'a im beni. 26 km, xtan guase u 'bu hinga 'dat'a im beni. 26 km, xtan guase u 'bu hinga 'dat'a im ben'u, bi 'yen'a ra Jesús.

²⁷Nε xø bi xih man'da ran t'uti nangue 'bε'a bi 'yørpa ra zįthu, bi 'yεmbi:

—Njon da zä da yнгрн ja rá ngu n'da ran 'yohн i ja rá ts'ɛdi gue'bн hinga m'bɛt'o da thu't'i. Рɛ nu'bн ya bi thu't'i, hingui hɛi da thaspi 'bɛ'a gätho i pɛs' рнуа, bi 'yɛn a ra Jesús.

²⁸Pε majuani dí xi ahu hønt'a go ma ts'oqui bi 'yøt' yu ja'i da mba ma punbi 'bu da hyon ra punbi, nε hønt'a go ma ts'ore bi ma. ²⁹Pε nu'u to'o im man ra ts'ore nangue rá Hogandahi Oja njam'bu da zä da mba ma punbi u, da nu ran unbi gätho yu pa mazai, bi 'yɛn a ra Jesús.

30 Ngubu bi xih yu xänbate niją ra Jesús nguetho bi 'yɛn'u hinga gue'a rá ts'ɛdi rá Hogandahi Oja in 'youi ra Jesús, ngue mi høn a thi yu zithu.

Ra Jesús i şmbi rá mbe nɛ yɨn 'yohɨ ɨ i öt' rá pähä Oją

³¹Nɛ nubʉya bá ɛ̞sɛ rá mbe ra Jesús nɛ yʉ́n 'yohʉ. Pɛ mí 'bätho bʉ thi nguetho him bi zä bi yʉt'a mbo. Nɛ bi xi ʉ 'bäpʉ mbo:

—Xihmi ts'ʉ ra Jesús ngue dín zohndähe ua thi, bi 'yɛ̞mp'ʉ.

³²Νε nu'ʉ 'darpʉ mí huhmbʉ ra Jesús bi 'yɛ̞mp'ʉ bʉya:

—'Bäpʉ thi ni mbe nε nin 'yohʉ, i hon a i 'na.

³³Nu ra Jesús buya bi dąt'u:

—Ga xi ahʉ te'o a ma mbe nε man 'yohʉ.

34-35Ne bi hyant'u 'darpu huhmbu buya, ne bi 'yena:

—'Bucua ya ma mbe, nɛ man 'yohu, nguetho hønt'a go te'o da 'yørpa rá pähä Oja, gue'a man 'yohu a, nɛ gue'a man ju a, nɛ gue a ma mbe a, bi 'yɛmp 'bu mi dadi.

Ran t'uti ra mbomhmudä

A Nε xø bi xänba yu ją'i mahøn'a bu ja ra ndendądehe a ra Jesús. Nε εmmε xun ngu yu ją'i bim pεtihu bu. Janangue'a bi yurbu ja ra t'umbosa bi dạn i ts'u bu ja ra ndenthe. Nu yu ją'i bi gopu ndenthe buya. ²Nu ra Jesús buya xun ngu yun t'uti bi xih yu ją'i 'bu mí xänbi, nε bi 'yɛna:

³—'Yøhmbu ts'u ran t'uti ga xi ahu ya. Nu'a n'da ra uahi bi mba bá pon yu hmudä. ⁴Nɛ bi zo 'da bu 'yu. Nubuya bá ɛh yu doja bi jua'a nts'a yu hmudä xí zo bu. ⁵Nu'u mi'da yu hmudä bi zo bu ja yu ndaxnado nɛ ts'utho ra häi bu. Janangue'a 'bex bi bøxa n'dihi. ⁶Pɛ nu'bu mam bá pøx ra hyadi 'bex bi 'yot'u nguetho hin hapu sä da mba yú 'yu. ¬Nu'u mi'da bi zo bu ja yu dapo, bi bøts'e pegue bi gom' yu dapo, nɛ nte bi ndø'u. ⁶Pɛ nu'u mi'da buya bi zo bu ja ra häi xun ho. Bi bøts'e nɛ

bin te, nɛ bi ndøgue. Nu'ʉ 'da 'däte ma'dɛt'a bi ndøgue, nu'ʉ 'da hyate, nu'ʉ 'da n'da ciɛnto bi ndøgue ngue n'da 'bäi, bi 'yɛn a ra Jesús.

Ne xø bi 'yemp'u yu ja'i:
Hønt'a go to'o ja yú zagu bi 'yø a dá ma, bi 'yembi.

Hanja i xih yun t'uti yu ja'i a ra Jesús

¹⁰Nu'bu mi 'busɛhu 'dɛ'ma yoho yú xädi ra Jesús nɛ'u mi'da yú 'yɛ̞c'yɛi, bi xifi da xi u 'bɛ'a na mbøn a ran t'uti bi ma. ¹¹Nu ra Jesús bi 'yɛ̞mp'u buya:

—Gue'ahu bi ja ahu gui pahmbu a him mam fadi mam 'bɛt'o ngue 'bɛpu ní manda rá ts'ɛdi Oja. Pɛ nu'u yu ja'i thoho gue'u da sänba yun t'uti, 12 madague da nu pɛ hin da 'yørpa masu 'bɛ'a da nu, nɛ madague da 'yøde pɛ hin da badi 'bɛ'a ní mba a, nɛ hin da bɛni di päh yu mbui ngue da hyon ra punbi, bi 'yɛn'a ra Jesús.

Rán theui a ran t'uti a ra mbomhmudä

13 Nɛ xø bi 'yɛmp'u mahøn'a:
—Nu'bu hin guí pahmbu 'bɛ'a
na mbøn'a ran t'uti dá mangä, ha
da zä gui pahmbu gätho mi'da
ga xi ahu 'bu. 14 Nu'a na mbøn'a
dá mangä, nu'a ra uahi que'a bá
man rám hman Oja hønbu go
hapu. 15 Guehya bi zo bu ja ra
'yu na mbøni bi 'yømanho rám
hman Oja ya. Pɛ nu ra zithu 'bex
bi japi bi pumbɛni a ram hma bi
sifi. 16 Ximangutya bi zo bu ja yu
ndaxnado na mbøni bi 'yøh ram
hma nɛ bin johya. 17 Pɛgue hinga
gätho rá mbui bi bɛni. Janangue'a

nu'bu bi nu yun ucpi nε yun unbi nangue rám hman Oją him bi hyät'i, 'bex gue bi zu nε bi 'uegue. ¹⁸Nε nuya bi zo bu ja ra dapo na mbøni bi 'yømanho ram hma ¹⁹pe emme di ho ra ximhäi ne ra mbeti i hät'i, ne di ho da 'yøt' yú pähä zehe. Tengu'bu bi gomba ram hma, nε hin di japi din te yú mbui. 20 Pε nuya bi zo bu ja ra häi xun ho, na mbøni bi 'yømanho rám hman Oja, bi hyani, nε bin te yú mbui xun ho, ne bi xant'a ram hma xun ho, tengutho yu hmudä, gue bi ndø'a 'däte ma'dɛt'a u 'da, nɛ hyate u 'da, ne n'da ciento u 'da, bi 'yemp'u yú xädi 'bu mi xifi 'bɛ'a na mbøn'a ran t'uti bi ma.

Gätho him mam fadi da zøni da fadi

²¹Nɛ xø bi 'yɛn'a ra Jesús:

—Nu'a mam hmangä nts'änni gätho yu ja'i da 'yøde, tengu n'da ra nyot'i nts'änni di yot'i gätho bu mbo ra ngu, hingan ts'änni da mba ma cu't'i bu ja ra 'bihuanza o ra 'bit'ots'i. 22 Nguetho gätho 'be'a him mam fadi da zøni da fadi, ne gätho 'be'a him midí nequi da zøni da hnu. 23 Hønt'a go to'o ja yú zagu bi 'yø a dá ma. 24 Ne nu'a di jamansu a i øde da bądi xʉn ho nε Oją di japi man'da xʉn ngu da zøni da badi. Pε nu'a hin ε di jamansu a i øde, pe ne'a zi ts'u mi padi dim 'bɛdi, nɛ tengu ni t'ɛni gnán ɛmhbʉ gue'a dí t'ɛn'nahʉ, nɛ man'da mbongui thoho din 'da ahu. ²⁵Din ja ahu tengu ram hma i ɛna: "Nu'a xun ngu i ja man'da xun ngu din t'unni pe nu'a ts'utho i ja man'da da thanba a."

Rán t'uti ra hmudä i te

²⁶⁻²⁷Nu ra Jesús bi 'yɛmp'ʉ mahøn'a:

—Nuya di manda ua rá ts'ɛdi Oją madague'bu hin di nɛqui, tengu thoho n'da ra hmudä 'bu bi du a n'da ran 'yohu, madague'bu hingui nu hague ám bøts'e pɛgue i pądi da bøts'e, nte im bɛntho. ²⁸Nguetho nu'a ra häi dí tesɛ yu thuhu a. Nu'bu bi mbudi bi bøts'e, yu paxi thoho, m'bɛjua buya da ndøh yú dạxi, nɛ nubuya din thạ u. ²⁹Nɛ nu ran 'yohu buya da xoqui nguetho bi zøn ra ora da 'bɛ'ts'i, bi 'yɛn a ra Jesús. In jabu rá ts'ɛdi Oją ngue di manda ua nɛ njongui nu hague na te.

Ran t'uti rá hmudä ra mostaza

³⁰Ne man'da ran t'uti bi xih yú xädi ra Jesús mahøn'a, ne bi 'yemp'u:

—'Bɛpu dá bɛmhbu hague di manda ua rá ts'ɛdi Oją. Ga xi ahu n'da ran t'uti nangue'a. 31-32 In ja tengu n'da rá hmudä ra mostaza i pa m'boni, nɛ ɛmmɛ zicuɛ tho, ɛmmɛ man'da zicuɛ xinda gue mi'da yu hmudä, pɛ man'da i te xun ngu yú 'yɛ, xinda gue gä mi'da yu paxi nɛ xøgue sä da 'yøt' yú 'bafi yu doja bu ja yú xaha. Njabu rá ts'ɛdi Oją bu ni nɛqui ngue di manda ua, bi 'yɛn'a ra Jesús.

Hanja bi xih yun t'uti u yu ja'i

³³Ne xun ngu mi'da yun t'uti bi xänba yu ja'i a ra Jesús 'bu mi xänbi tengu ya i hmangua, pe hønt'u hingui hei bu dá fadi bi xifi. ³⁴Ne nte bi xih mi'da yum hma, hønt'u yun t'uti bi xifi. Pe nu'bu mi 'busehu yu xädi bi xih puya 'be'a na mbøn'u yun t'uti bi mam bu 'buh yu ja'i.

Bi xifi din he ran dahi ra Jesús

³⁵Nu'bʉ mín de bʉya nu ra Jesús bi 'yɛ̞mp'ʉ yʉ́ xädi:

—Nuya ga thohmbu nu 'danguadi ra dądehe, bi 'yɛ̞mp'u.

³⁶Nɛ nubʉya bi xih yʉ jạ'i da mbeng bʉ yʉ́ ngu. Nu yʉ́ xädi bʉya bi 'yon a ra mbosa mi huhʉ ra Jesús, bi mbähä bʉya. Nɛ xʉn ngu mi'da yʉ jạ'i bi dɛnni ngue bi hyusɛ yʉ́ mbosa ʉ. ³⁷Nɛ nu'bʉ ya i 'yo bʉ ja ra dehe nɛ nts'ɛdi ran dạhi bin ja, nɛ bi donts' ra dehe ra mbosa nɛ mi ts'ʉtho xtán yudi. ³⁸Pɛ nu ra Jesús mi hunh ra huhni, nɛ mi ąpʉ ja ra mbosa. Nu yʉ́ xädi bi 'yä ra Jesús nɛ bi 'yɛmbi:

—Xänbate i, ha nte guím bɛni nɛ nde ga tuhʉ, bi 'yɛmp'ʉ.

³⁹Bi ndants'a ra Jesús bʉya nε bi 'yɛ̞mp'a ran da̩hi nɛ a ra dehe:

—Daman hɛ, bi 'yɛmbi.

'Bex gue bin hɛ ran dạhi nɛ ra dehe bʉya him mam bi 'yạni. ⁴⁰Nubʉya, bi 'yɛ̞mp'ʉ yʉ́ xädi:

—Guín suhu nguetho ts'utho guí ¿c'yɛigahu.

4¹Nu yɨ xädi bɨya bi zu a ra hmu, ne bi hyonya thoho a bin ja. Bin 'yemzehe n'da ngu n'da ɨ:

—'Bε'a di 'yεt'ui na ran 'yohu, nε ya 'bex gue in hε a ran dahi nε ra dehe di hεcpi.

Ra Jesús bi hyønba thi yu zithu a ra mengu bu Gadara

Nubuya nu ra Jesús nɛ yú xädi bi zøm bu 'danguadi ra dadehe nubu ja ra häi Gadara. ²⁻⁶Nɛ mi 'bupu n'da ran 'yohu min 'youi yu zithu. Nu'a mi zam bu ja ran 'yägui, nɛ njo'o to'o mi sä da zammi

nguetho gä i xɛcthoho yu cadena mi pa nthat'i. Xun ngu yu nidi bi thurpa yú 'yɛ nɛ yú gua nangue yu cadena, pɛ gätho i xɛcthoho. Njon mi sä di hɛcpi. Gätho ra pa nɛ ra xui mi mbapu ja ra dapo o guepu ja ran 'yägui, nɛ midi unba zɛhɛ nguetho mi hɛzɛhɛ rá ja'i nangue yu do. Nu'bu mí bøm bu ja ra mbosa a ra Jesús nɛ yú xädi, 'bex bá ɛ a ran 'yohu bin c'athu, bí 'yɛpu ja ran 'yägui, bin danyahmu bu 'bäh ra Jesús, bi dande, 'nɛ nts'ɛdi mbafi, bi 'yɛna:

- —'Bɛ'a guí nde gui 'yørcahe grá Jesús, rá Ts'unt'u i Oją mahɛts'i. Nuya dí ä a ra mate hin gui ungahe, bi 'yɛn'u yu zithu 'bu mi sifi da bøm bu rá mbui ran 'yohu. Ne nubuya nu ra Jesús bi 'yän'nu yu zithu:
 - —'Bε'a ní thuhu, bi 'yεmbi.
- —Ma thuhu "N'dan nɛts'igähe" nɛ ɛmmɛ xun ngu gähe, bi 'yɛna.

 10-12 Nɛ nts'ɛdi dí ä a ra mate gue'bu ga pømhbe hin gui pɛngahe bu n'danni i ja yu häi, dami 'yørcahe ra mate gui pɛngahe nu 'buh yu ts'udi ga cuthe nu, bi 'yɛn'u.

 Nguetho hinga yatho mí 'yo u yu ts'udi xun ngu, mi sapaxi bu.

13 Nu ra Jesús ya bi un ran t'ɛdi da yurpu 'buh yu ts'udi. Nu'bu mí yurpu ya 'bex bán tih yu ts'udi bá capu ja ra nguani u 'bex bi yupu ja ra dehe u, nɛ gä bi du bu u buya. Mbɛ yo mahuahi i jua u.

14 Nu u yun 'yohu midi jamansu yu ts'udi, 'bex bi 'da 'bu min nu 'be'a bi 'yøt'u yu ts'udi. Bi mba bá mam bu ja ra hnini nepu huahi a bin ja. 'Bex bi mba yu ja'i buya da nuse u 'be'a bi man u yu mbädi yu

ts'udi. 15 Nu'bu mí zøm bu, bi nu i hupu a ran 'yohu madí unba ra zithu, ya xí zä nɛ i he rá zi pahni. Emmɛ bi mbidi yu ja'i buya. 16 Nu'u xí nu yu ts'udi, xø bi xifi xun ho yu ja'i mahøn'a 'bɛ'a xín ja. 17 Nɛ nubuya, nu yu mɛngu bu ɛmmɛ bi 'yäp ra mate ngue 'bex gue da bøn a ra Jesús bu ja yú häi u.

¹⁸Bi mba da ndex ra mbosa a ra Jesús buya. Nε nu'a ran 'yohu xí unba ra zithu εmmε i nde da dɛn'na ra Jesús gue 'darpu din 'yohu. ¹⁹Pε nu ra Jesús him bi un ran t'εdi nε bi hεcpi.

—Ni mba bu ni ngu, nɛ gui xi u nim 'buihu ran ho bi 'yøt'a Oja ra Hmu ngue bi huɛc'a i, bi 'yɛmp'a ran 'yohu.

²⁰Nu'a min 'youi ra zįthu bʉya, bi mba rá ngu. Bi dʉ'mi bi mam bʉ gätho ra xεqui Decápolis 'bɛ'a xí 'yørpa ra Jesús. Nε gätho ʉ bi xifi bi hyonya thoho ʉ.

Ra Jesús bi 'yä'a rá t'ịxu ra Jairo nε bi hoc'a n'da ra xisu mi hεmb ra mbεji

²¹Nε nu'bu ya mi zøn ra Jesús bu ná 'danguadi ra dądehe, εmmε xun ngu yu ją'i bim pεti bu ndenthe mahøn'a guepu bin säya ra mbosa. ²²Bi zø'a n'da rá ngurbi ra niją i Jairo a, bin dąnyahmu bu ja rá gua ra Jesús. ²³Nε εmmε bi 'yäp ra mate, bi 'yɛmbi:

—'Yørqui ts'u ra mate ga mbähä ba cäx ni 'yɛ ma t'ixu nguetho ɛmmɛi, janangue'a da yani nɛ hin da du, bi 'yɛmbi.

²⁴Nu ra Jesús bi mbe buya, ne xun ngu yu jali bi denludu, xøgue bin du bu ni mba u. ²⁵Ne bi zupu 'yu n'da ra xisu ná 'de'mayon jeya mi hεmb ra mbeji. 26 εmmε xí nu ran unbi nangue xun ngu yu 'yøthebate xí 'yøthe. Xi juadi gätho rá mbeti mi ja, ne xingui ts'u bi dits'i, xøgue man'da ɛmmɛi. ²⁷Pɛ nuya i hon a ra Jesús nguetho xí 'yø'am man yʉ ja'i ngue di hoqui hønt'a go 'bɛ'a man u. Janangue nu'bu mi zudi 'bex bi yut'i nde bu ní mba u, bi därpa rá xuthapahni ra Jesús buya. ²⁸ Nguetho mí ense ra xisu, "Høntho ga thärpa rá pahni, ya da yangui," mi ɛna. 29 Nɛ nu'bu mi därpa rá pahni ra Jesús 'bex bin he a rá mbeji mí hemb buya. 'Bex bi ba a ra xisu ngue ya bi zä xun ho. 30 Bex bi bah ra Jesús ngue bi hoc'a n'da ra ja'i rá ts'edi 'bu mí därpa rá pahni. Janangue bi nyg'a ra Jesús, bi hyet'u yu ja'i min 'yohu nε bi 'yɛna:

—To'o bi därca ma pahni, bi 'yɛna. ³¹Nu yú xädi buya bi 'yɛmbi:

—Guín nuhma ɛmmɛ du ua yu ją'i, "To'o bi därca ma pahni," nɛ guí ɛna.

³²Nu ra Jesús i tø'mi da manse to'o xí därpa rá pahni. ³³Ne nu ra xisu buya, bin su ne di fet'i nguetho pa a xí t'ørpe. Ne bi mba bu 'bäh ra Jesús bin danyahmu bu ja rá hmi ne bi xifi gätho 'be'a xí 'yøt'e. ³⁴Nu ra Jesús buya bi 'yɛmbi:

—Nu'i grá zi xisu, bi zä i nguetho gá 'yɛ̞c'yɛigui. Ni mba da hyu ni mbui, him man di un'a a gmi hɛ̞mbi.

³⁵Gätho na yaui a ra xisu 'bex bi zøpu mi'da yu ja'i bí 'yɛpu ja rá ngu a ra Jairo, bi t'ɛmp'a ra Jairo:

—Nu'a ni t'įxu ya bi du. Säti thoho man'da gadi pah na ra xänbate.

³⁶Pε nu ra Jesús 'bʉ mí 'yø a bi man'ʉ, bi 'yɛmp'a ra Jairo bʉya: —O di tu ni mbui, høntho gui 'yɛc'yɛi ngue majuani i ja ma ts'ɛdi, bi 'yɛ̞mp'a.

³⁷Guehma bi thoh puya nɛ njom bi japi da dɛnni. Hønt'a ra Pedro, nɛ ra Jacobo nɛ ra Xuua rán 'yohu ra Jacobo, bi xifi da mbähä bu rá ngu ra Jairo. ³⁸Nu'bu mi zøm bu ja rá ngun a ra Jairo buya, bi nu ngue i zon'u yu ja'i 'bupu, nɛ ɛmmɛ di mbahni na ts'oni. ³⁹Bi yurpu mbo ra Jesús buya, bi 'yɛmp'u 'bupu:

—Hanja çmmɛ gadi hihu na ts'oni. Nuna ra hmute hingui tu pɛgue i aha.

⁴⁰ Nu'bu mi 'yøh yu ja'i 'be'a bi man a, bi den thoho buya. Nu ra Jesús buya, bi 'yɛmp'u yu ja'i:

—Dami pømhbu thi, bi 'yɛmbi.

Hønt'a rá ta nɛ'a rá mbe ra hmute xí du nɛ yú xädi, bi yuthu ra Jesús bu 'bɛn a ra hmute. ⁴¹Nu'a ra Jesús buya bi bɛnba rá 'yɛ a ra hmute nɛ bi 'yɛmbi:

—Talita cumi, bi 'yɛmbi. I nde da ma: "Nu'i grá hmute dí xi i, dami ndants'i."

⁴²Nu'a ra hmute bʉya 'bex bi ndants'i nɛ bin 'yo. 'Dɛ'mayon jɛya mi pɛ'ts'a. Nu'ʉ bi yʉthʉ mbo bi hyonya thoho. ⁴³Nu'a ra Jesús bʉya nts'ɛdi bi 'yɛ̞mp'ʉ:

—Njon gui xihmbu 'bɛ'a dá øt'ä, bi 'yɛ̞mp'u. Nɛ nubuya bi 'yɛ̞mp'a ra Jairo:

—Dami 'uin na ni t'ixu ya, bi 'yɛmbi.

Ra Jesús bi zøm bu rá hninizehe

6 Bi bøm bu ra Jesús buya, bi mba bu ja rá hnini zεhε Nazaret. Bi mbähä yú xädi. ²Νε nu'a ra pa ran ts'äya, bi mbähä yɨ xädi bɨ ja ra niją. Nu ra Jesús bɨya bi xänba bɨ yɨ ja'i. Nu'bɨ mi 'yøh yɨ ja'i a bi man'a ra Jesús, bi hyonya thoho nɛ din 'yɛ̞mzɛhɛ ɨ:

—'Bɛ'a nin xädi im man na. 'Bɛ'a ni ts'ɛdi i ja na, ngue i sä i øt' yʉn t'øt'e mixte na. ³Ha hinga guehna ra yaxi na, rá ts'ʉnt'ʉ ra María. Nɛ yʉ́n 'yohʉ ra Jacobo, nɛ ra José, nɛ ra Judas, nɛ ra Simón, nɛ ʉ yʉ́n ju dí 'bʉhmbʉ ua, bi 'yɛn ʉ.

Ne bi u't' yú mbui zehe u.

4 Janangue'a nu'a ra Jesús bi
'yɛmp'u:

—Gätho yú pøngahyą Oją i hnumansu, pɛ hønbu ja rá häizehe nɛpu 'buh yú mɛni, nɛpu ja rá nguse hingui hnumansu bu, bi 'yɛn'a.

⁵Nε hingui ngu yun t'øt'e bi 'yørpu ngue xtá 'yut rá ts'ɛdi. Hønt'u zi yoho yun zäman'u bi gäx rá 'yɛ bi japi bi yan'u. ⁶Nε bi hyonya thoho a ra Jesús nguetho him bi 'yɛ̞c'yɛi u ngue i ja rá ts'ɛdi u yú mɛnguhu. Nɛ nubuya bi mba bu ja yu t'uhnihni jombu Nazaret, nɛ bi xänba bu u yu ja'i.

Bi mbehn'du 'de'mayoho da mamp'a rám hma

⁷M'bɛjua bʉya bi xi ʉ 'dɛ'mayoho yʉ́ xädi ngue da mba bʉ ja yʉ hnini. Nɛ 'da i yoho bi zänni, nɛ bi un yʉ́ ts'ɛdi da hyøn'a thi yʉ zɨthu in 'yohʉ ʉ 'da yʉ jạ'i. ⁸⁻⁹Nɛ bi xi ʉ nte da hyax 'bʉ bi mba ʉ. Hønt'a n'da ra tøhø da hyats'i n'da ngu n'da ʉ. Nɛ hønt'ʉ yʉ thịxfani da 'yʉt'i. Xíng yʉn ju'døza, xíng yʉn zɛdi da hyats'i, xing ra mbɛti, nɛ xín da gax ਚ yojo'ts'i yʉ́ pahni.

¹⁰Nε man'da bi 'yεmp'u:

—Hønbu go hapu da mba ma säya ahu 'bu gá sømhbu bu ja yu hnini, gam 'buhmbu bu gue'bu go gá nɛxhu bu. ¹¹Nɛ nubu hapu gui sømhbu ngue hin da zin ahu nɛ hin da 'yømanho a guí mamhbu, dami pømhbu bu, dami huaju ra häi ja ni xinguahu, ra hmɛpya ngue gui sohmbu bu u. Nɛ majuani dí xi ahu, nu'a ra hnini hin da zin ahu, man'da xun ngu ran unbi da nu a 'bu bi zøn ra pa ran juanbi, xinda gue'a ra hnini Sodoma nɛ ra hnini Gomorra, bi 'yɛmp'u yú xädi.

12 Ne bi bøm bu 'de'mayoho buya, bi mba. Hønbu go hapu bin 'yo bi xih yu ja'i di päh yún 'yomfeni nangue yu ts'oqui bi 'yøt'e. 13 Ne bi hyøn a thi xun ngu yu zithu mín 'yohu 'da yu ja'i ne xun ngu yun zäman'u bi gox ra aceite ne bi japi bi zä u.

Rán dạte ra Xuua Nxixya

¹⁴Mí ø a ra ts'ut'abi Herodes ngue mí man yu ją'i 'be'a mí øt'a ra Jesús bu mí 'yo, ne bi 'yemb buya:

—Masque gue'a ra Xuua Nxixyą a bi dambęni, janangue'a i øt yun t'øt'e ngue i uh rá ts'edi, bi 'yɛ̞na.

¹⁵Pε nu'ʉ 'da yʉ ja'i, mi εna:

—Ra Elías a ra Jesús.

Nε nu'u 'da i ɛna:

—Ra pøngahyą tengu mi 'buh maya'bu.

¹⁶Pε nu ra Herodes 'dat'a im ma, bi 'yɛ̞na:

—Gue'a ra Xuua Nxixyą a ngue dá manda da ts'ɛcpa rá 'yʉga, masque bi dambɛni, bi 'yɛn a ra Herodes.

17-18 Nguetho guese ra Herodes bi mbɛnh'du bá bɛnt ra Xuua, bi du't'i nɛ bi got'a fädi. Nguetho in cuɛ ra Herodes 'bu mí t'ɛmbi hingui ho a bi 'yøt'e ngue xí zin a rá 'bɛpo. Nɛ nu'bu mí zin'a ra xisu, mi 'buhmi a ra Felipe. Nɛ nu'a ra Felipe, rán 'yohu zɛhɛ a ra Herodes. Nɛ nu ra xisu i Herodías a. Nɛ gue'a ra Xuua Nxixya bin yaui ra Herodes, bi xifi hingui ho a bi 'yøt'e. Him bi 'yømanho ra Herodes buya, janangue bi manda dí cot'a fädi ra Xuua Nxixya.

19 Ne a ra Herodías bin cue ne emme honi 'bepu dí hyo a ra Xuua. Pe him 'bex bi zä bi hyo. 20 Nguetho nu ra Herodes mi padi ra hocja'i a ra Xuua, ne bi xi u yu mbängoxthi njon da japi da yurpu ngue di unba ra Xuua. Ne nu ra Herodes, ja'bu di manda bá ts'inba ra Xuua ngue i nde da 'yø i ts'u rám hman ra Xuua. Ne bi 'yømanho tho madague'bu hinga gätho i padi 'be'a nam bøn'a i man ra Xuua.

²¹Nu'bʉ mi zøn ra pa rá ngopa ra Herodes, nu ra Herodías bʉya bi dini 'bɛpʉ dí hyo ra Xuua bʉya. Bi 'yøt'a n'da ra dansihmɛ ra Herodes bá si yʉm fäts'ihʉ, nɛ yʉ hmudofʉi nɛ'ʉ yʉ ngʉrpi bʉ ja ra häi Galilea.

²²Nu'bʉ min sihmɛ ʉ bi yʉrpʉ rấ t'ixu ra Herodías, bin nɛsɛ a ra hmute. Nu ra Herodes nɛ ʉ gä mi huhmbʉ bʉ ɛ̞mmɛ bi numanhop rấn hnɛi ra hmute.

—Nuya gui 'yäqui 'bɛ'a guí nde gui 'yäqui, nugä ga 'da i, bi 'yɛmbi. ²³Nɛ xø bi 'yɛmbi:

—'Yɛɛ'yɛi Oja majuani ga 'da i 'bɛ'a gui 'yaqui madague a gui 'yac made gatho 'bɛ'a dí pɛ'ts'a, bi 'yɛmbi.

²⁴Nu'a ra hmute buya bi bøni ne bi 'yän'na rá mbe ngue ra Herodías, bi 'yɛmbi: —'Bε'a sä ga äpi, mbe.

Nu'a rá mbe buya bi 'yɛ̞mbi:

—'Yäp'a rá yą ra Xuua Nxixyą. ²⁵Bi mbenga n'dihi ra hmute buya bi 'yɛ̞mp'a ra Herodes:

—Dí nde 'bexque guehya gui 'dac'a rá yą ra Xuua Nxixyą, gui cärca ra mbohi, bi 'yɛmbi.

²⁶Nu ra Herodes buya bi du rá mbui 'bu mi 'yø a bi man a ra hmute, pε hingui sä 'bɛ'a da mam buya nguetho hupu ja ran sihmε u xí 'yøde 'bɛ'a bim ma ngue ya xi ma majuani di unni 'bɛ'a da t'äpi. ²⁷ Janangue a guehma bi mbɛnhna n'da ra dofui bá hanba rá ya ra Xuua. ²⁸ Nu'a ra dofui buya bi mba bá sɛcpa rá ya ra Xuua nubu ja ra fädi nɛ bá cät'a n'da ra mbohi, bi unna ra hmute buya. Nu ra hmute buya, bi unna rá mbe a rá ya ra Xuua. Nɛ gue'a bin ja 'bu mi du ra Xuua Nxixya.

²⁹Nu'bu mí 'yøh yú xädi ra Xuua ngue bi ts'εcpa rá yą, bá ε u, bi duspa rá ngøc'yεi nε bi mba bi 'yäpu ja ran 'yägui buya.

Bi un ran ts'ihmɛ cut'a mahuahi a ra Jesús

30 Nu'bu jam bá penc u yú xädi a ra Jesús, bi xifi 'bɛ'a gätho xi 'yørpu bin 'yo, nɛ bi ma 'bɛ'a gätho bi mam bu 'buh yu ja'i 'bu mi xih rám hman Oja u. 31 Nu ra Jesús bi 'yɛmp'u:

—Ga mbähä ts'u nu n'danni ngue dan säyahu ts'u nu, xøhma guí yähmbu, bi 'yɛ̞mp'u.

Nguetho xun ngu yu ją'i i søm bu, ní mba nɛ ní 'yɛhɛ, nɛ xíngui ts'u im bongui din sihmɛ u. ³² Janangue a bi hyu ra mbosa u im bɛni da zøm bu ma'ueni u guepu da zä dim 'buse u. ³³Pe xun ngu mi'da yu ją'i bi hyant'a ra mbosa bu ni mba ne bi bądi i hu bu ra Jesús. Ne bá nexpu ja yú hnini u, ne emme bin ti u ne 'yogua thoho ne m'bet'o bi zøm bu da zøn'a ra mbosa. ³⁴Nu'bu mi gah ra mbosa ra Jesús ne yú xädi, bi nu xun ngu yu ją'i ya xí zøm bu, ne bi huec'u ngue in ja tengu yu de'yo njo'o di jamansu. Ne 'bex bi du'mi bi xih yu ją'i rám hman ra Jesús mahøn'a asta gue'bu go mín de. ^{35,36}Nu'bu mín de buya bi t'emp'a ra Jesús:

—Emme bin de ya, ne hinga nan sihme yu ja'i, dami penpu ja yu t'uhnini ya da dän yu hme bu nguetho ma'ueni ua ne hin'yu 'be'a da zi, bi 'yen'u yu xädi.

³⁷Pε nu'a ra Jesús bi 'yɛna:

—Gue'ahu gui 'uimhbu yu ja'i, bi 'yembi.

Nε bi 'yɛn'u yú xädi:

—Pε ha guí εnje gua tämhbe yociento ra hmε ngue ga unhde yu ją'i da zi, bi 'yɛn'u. ³⁸Nu ra Jesús buya bi 'yɛmp'u:

—Bá nuhu bu hangu yu hmɛ ja bu. Nu'bu mí bądi, bi 'yɛmbi:

—Cut'a mhmɛ nɛ yoho yu huą ja ua, bi 'yɛn u.

³⁹Νε bi xih puya:

—Dami xihmbu yu ja'i din säya nu i ja yu 'bot'ei.

⁴⁰Nε 'darpu bi hyu u n'da ciento, nε 'darpu bi hyu u mi yote ma 'det'a, nε njabu bi 'yøt'e gätho u mi'da. ⁴¹Nu'bu mi gun'u cut'a yu hmε nε u yoho yu hua ra Jesús, bi ndøs mahɛ̞ts'i, bi 'yäp rán japi Oja nε bi xɛn'u yu hmε. Νε u yu hua buya. Nubuya bi un'du yú xädi di

darpa yu ją'i. ⁴² Gätho bin sihme u 'bupu ne bin niyą xun ho u. ⁴³Ne nu'bu mi jua'a bi pet'u bi bongui, 'de'mayo 'bøts'e bi yudi. ⁴⁴Ne nu'u bin sihme cut'a mahuahi ma 'yohu u.

Ra Jesús bin 'yo maxøts'e bu ja ra dadehe

45,46 Nu ra Jesús buya bi xih yú xädi m'bet'o da mba u da zøm bu ra hnini Betsaida, ne bi yut'a n'dihi bu ja ra mbosa u buya. Nu ra Jesús him 'bex gue bi mba nɛ nu'bu min 'yɛhmbu gätho yu ja'i, bi ndexpu ja ra nyuni bin yaui Oja bu. 47 Nu'bu min xui, ya i 'yo bu ra mbosa bu made ra dehe. Nu ra Jesús mi 'butho bu bán ts'ogui. 48 Ng nu'bu mí hyant'u 'be'a øt'u yú xädi, bi nu ngue xun hại bu ni 'yon yú mbosa nguetho di costa'a ran dahi a ra mbosa. Nε nu'bu maguembu da hyax puya bá εh ra Jesús bu ní mba yú xädi, ba 'yo maxøts'e ra dehe. Ne nu'bu mi zudi ena da mi'ts'a ra mbosa. 49,50 Nu'u yú xädi 'bu mi nu bi bɛn u: "N'da ra du i mba bu," ɛn'u. Nɛ ɛmmɛ bi mba u nguetho bin su. Nu'a ra Jesús bi 'yɛmp'u:

—Guecä o te guím bɛmhbн. Damin johyahн, bi 'yɛmp'н.

⁵¹Nε bi ndexpu ja ra mbosa buya.
'Bex bin hε ran dąhi, nε εmmε bi hyonya thoho yú xädi 'bu mi nu 'yo maxøts'e ra dehe ra Jesús, nε bin hε n'dihi ran dąhi.
⁵²Bi hyonya thoho nguetho him bi bεni 'bε'a bi nu 'bu mi 'uin'i cut'a mahuahi yun 'yohu bu ndenthe, nguetho hingana padi xun ho u.

Ra Jesús bi hoc'u yun zäman'u bu ja ra xɛqui Genesaret

⁵³Nɛ bi zøm bʉ 'danguadi ra dadehe bʉya, nubʉ ra häi Genesaret, bi zopu yú mbosa. ⁵⁴Nu'bu mi gapu ja ra mbosa, gätho yu ja'i bi badi gue gue'a ra Jesús. ⁵⁵Nε nu yʉ ja'i bʉya 'bex bi mba bá si yu hygnni, bi zixpu da thoh ra Jesús. Mi oxpu ja yú 'beza 'da, hønbu go hapu ní nets'i. Ne nu'bu mi thopu ra Jesús bu ja yú häi u, 56 hønbu go hapu bi thogui, o gue yu t'uhnini o gue yu dahnini, o guepu ma'ueni yu hnini, ya xí 'bom bu yun zäman'u. Ne gätho bu bi thogui bi si a ra Jesús: "Mada hønt'a ni pahni ga thät'i i," bi t'embi. Ne hønt'a go to'o bi därpa rá nyampahni 'bex bi zä buya.

Ra Jesús bi ma nda'a dí ts'onba rá mbui n'da ra ja'i

Nε bi nεxpu Jerusalén 'da yu fariseo nε yu xänbate niją, bi zøm bu mi 'buh ra Jesús. ²Nε bi nu u 'da yú xädi ra Jesús i sihme nε hin nin xu'yε tengu rán su'yε bi zänzehe yún t'etizehe u. Ne bi 'yɛmbi øt ra ts'oqui u. ³Nguetho nu'u γu fariseo nε gätho mi'da ma mijudíohe emme i tenda'u yún t'edi yu dac'yei. Ne nu'bu hin nin xu'yε tengu man yún t'εdi, ya hin din sihme 'bu. 4Ne ngutho 'bu xpá mbenga täi, him 'bex gue i sihmɛ, 'bε din xu'yε xun ho tengu yún t'edizehe i ten'du. Ne man'da xun ngu yun sut'i i ten'du, tengu yun t'edi yu dąc'yei. Yún sut'i ngue yu tasa, ne yu xaro, ne yu t'egui, ne yúm 'be't'e yu t'ots'i. ⁵Janangue nu yu fariseo ne yu xänbate nija bi 'yänna ra Jesús:

—Hanja u ni xädi hingui ten yún t'ędi yu dąc'yei ne i sihme ne hin nin xu'ye, bi 'yemp'u. ⁶Bi dąh ra Jesús, bi 'yɛmp'u:
—Nu'ahu yoho nin 'yomfɛnihu,
bi 'yɛmp'u. Nɛ majuani bi man
ra Isaías nangueehu 'bu mim
pøngahya, bi 'yɛna:

Nuya yu ja'i nangue yu nde i ęscagui,

pε maxøts'e thoho, hinga gätho mbo yú mbui im bɛ̞ngui.

⁷ Säti thoho i ɛscagui nguetho hønt'u

yún t'ɛdi zɛhɛ i xänba u mi'da, i ɛn Oja, bi 'yɛn a ra Isaías, bi 'yɛn a ra Jesús. ⁸ Gue'a gá 'yøthu a nguetho gá hyɛhmbu yún t'ɛdi Oja nɛ gá tɛnhdu yún nt'ɛdi zɛhɛ yu ja'i nangue yún sut'i yu xaro, nɛ yu tasa nɛ xun ngu mi'da guí øthu, bi 'yɛmp'u.

⁹Nε man'da bi xi u, bi 'yεmp'u:

-Nε hønt'a ram fε'ts'i guí øthu nangue yún t'edi Oja, tengu 'bu nte di muui, nguetho hønt'u nin t'ɛdi zehehu guí nde gui tenhdu. 10 Gue'a gní festahu rán t'ędi Oją bi xi a ra Moisés a guí øthu, nguetho nu a ra Moisés bi 'yɛna: "Gui numansu ni tahu nε ni mbehu" Nε man'da ram hma bi ma: "Nu'a to'o da zan rá ta o gue rá mbe, jatho da tho a." 11,12 Pε nu'ahu 'dan'yo thoho guí mamhbu ngue guí ɛmhbu hing ra ts'oqui 'bu bi yarba Oja a mi ja ngue xtá mbäx a rá mbe o gue rá ta n'da ran 'yohu. Nε hin gá xihmbu ngue him bi numansu yú ta 'bu ngubu bi 'yøt'e. ¹³Gue'a gní combahu rám hman Oja a, nangue ni t'ec'yei zehehu guí xänbahu mi'da yu ją'i. Ne xun ngu mi'da guí øthu, bi 'yɛmp'u yu fariseo a ra Jesús.

¹⁴Νε nubʉya bi zohni gätho yʉ jạ'i bi 'yɛ̞mp'ʉ: 83 SAN MARCOS 7

—Dami 'yøhmbu, gätho ahu, nɛ dami pahmbu na ga xi ahu ya.

15 Hin'yu 'bɛ'a da yurpu mbo rá mbui n'da, gue di ts'onba bu, pɛgue nu'a ní bøm bu ja rá mbui n'da gue a dí ts'onba rá ja'i n'da a.

16 Hønt'a go to'o ja yú zagu bi 'yø a dím mangä, bi 'yɛmp'u yu ja'i a ra Jesús.

¹⁷Nɛ bi 'uepʉ 'bʉh yʉ jạ'i a ra Jesús, bi mbähä yú xädi bʉ ja ra ngu. Nɛ nubʉya bi 'yän'dʉ yú xädi:

—'Bɛ'a gue na mbøn'a ran t'uti gá ma.

¹⁸Νε bi 'yεmp'ʉ yʉ́ xädi bʉya:

—Ha nε ahu hin guí pahmbu a dá mangä. Ha hin guí pahmbu hin'yu 'bε'a da yurpu mbo rá mbui n'da, gue hinga gue'a dí ts'onba bu a.

19 Nguetho nu'a 'bε'a gätho i si n'da, hin din zam bu rá mbui n'da, pε da mba bu rá foho n'da nε da thotho a, bi 'yɛn a ra Jesús.

Ngubu bi man ra Jesús i ndepe da fądi ngue xun ho 'bɛ'a gätho i ja ua ngue da zi n'da. ²⁰Nɛ mi ɛn'a ra Jesús:

-Nu'a ní bøm bu rá mbui n'da ra ja'i, gue a dí ts'on'a n'da a. ²¹Nguetho nubu ja yú mbui yu ją'i ní bøm bu gätho yu ts'on'yomfeni, ne'bu i 'yomt'eni thoho n'da, ne'bu di 'yomt'eniba n'da ra xisu ne i 'buh rá xisu, ne'bu i hacpa rá te rá mija'iui. ²²Ne'bu øt' ram fe, ne'bu øt' ran ts'iyate, ne'bu nzại øt ran ts'o, ne'bu i häte, ne'bu ra 'yasä o gue ran ts'eya, o gue yun c'ate, o gue yun 'yɛts'i, o gue'bu i øt'e tengu 'bu hin'yu rán 'yomfɛni n'da. ²³Gue'ʉ gätho ní bøm bʉ yʉ́ mbʉi yu ja'i ne gue'u ní ts'onba yú mbui yu ją'i u, bi 'yɛmp'u yú xädi ra Jesús.

N'da ra xisu ngue hing yu judío bi 'yɛ̞c'yɛi ra Jesús

²⁴Nu'bu mi jua a bin yahu yú xädi a ra Jesús, bi mbähä bu ra xεqui yu hnini Tiro nɛ Sidón. Nɛ nu'bu mi dini hapu din säya bi nde ngue njon da badi, pɛ njam'bu bi zä bin 'yagui. ^{25,26}Nguetho 'bex bi zøm bu n'da ra xisu mi 'bu a n'da rá t'ixu min 'youi ra zithu. Bi zøm bu ngue ya xí 'yøde nangue rá ts'ɛdi ra Jesús. Nu ra xisu, hin ma mijudíohe a, ra mɛngu bu ra xɛqui Sirofenicia. Bin danyahmu bu ja rá gua ra Jesús nɛ nts'ɛdi bi 'yäp ra mate ngue da hyønba thi a ra zithu in 'youi a rấ t'ixu. ²⁷Nu'a ra Jesús bi 'yɛmbi:

—Hin nin säui ga øt'a a guím ma nguetho him ma mɛnguhu. Tenguthoho bu ja n'da ra ngu hin rán sähu rá mbudi da t'in u yu t'u'yo, yú mbudi u go yu t'uhni, bi 'yɛmbi.

²⁸Bi dą a ra xisu buya:

—Majuani guím ma, gra Hmu, pɛ nɛ'u yu t'u'yo i sip yú xɛni yu ts'unt'u i hɛpu 'bimɛxa.

²⁹Nu'a ra Jesús bi 'yɛmp'a:

—Xun ho ngue ngubu gá bɛni, janangue nu ra zithu min 'youi ni t'ixu ya bi bøni. Ni mba ya.

30 Nu'bu mi zøm bu rá ngu bi nu a rá t'ixu 'bem bu ja rá oi, ya xí 'ue a ra zithu buya.

Ra Jesús bi hoc'a n'da ran 'yohu i gogu nε i 'bare

³¹Nɛ bi bøm bu ra häi Tiro a ra Jesús bi thotho bu ra hnini Sidón, nɛpu yu hnini ra häi Decápolis, nɛ bi zøm bu ja ra dądehe Galilea mahøn'a. ³²Bá ts'inba n'da ra gogu ne i 'bare, bi t'äp ra mate ra Jesús da dospa rá yą a. ³³Nu'a ra Jesús bi zixa ra gogu bu ma'ueni ts'u nguepu njongui 'buh yu ją'i, ne bi dimba rá saha bu ja yú zagu, ne nu rá jini bi gospa rá jani. ³⁴Ne nubuya, bi ndøts' mahęts'i a ra Jesús ne bin ga'ts'i ne bi 'yena:

—Efata, bi 'y
ξn a ra Jesús.Nu'a i nde da ma: "Dami xoqui."

35 Nε 'bex bi xoh yú zagu, nε bi xoh rá nde nε bin yą xun ho buya.
36 Nu ra Jesús buya nts'εdi bi xifi njon da xifi 'bɛ'a bi 'yørpe. Pε nu'bu mi sifi hin da ma pε man'da bi ma. 37 Nε gätho u bi xifi εmmε bi hyonya thoho u, nε bi 'yɛ̞n'u:

—Xøgue xun ho tho gätho i øt'a ra Jesús. Di jap yu gogu da 'yøhnahya nɛ di japi din ya yu gore, bi 'yɛn u.

Ra Jesús bi un ran ts'ihme u goho mahuahi

Nu'u yu pa u, xun ngu yu ja'i bim peti mahøn'a bu ma'ueni mi 'buh ra Jesús, ne nte mi ja bu 'be'a da zi, nguetho ma'ueni bu. Janangue a bi zohn'du yú xädi ra Jesús ne bi 'yɛmp'u:

²—Nhuɛcate tho yu ja'i nguetho ná hyupa dí 'buhmbu ua ya, nɛ hin'yu da zi. ³Nɛ nu'bu ga pɛnpu yú ngu yu ja'i ngue ban sihmɛ bu masque da güent ra thuhu bu 'yu nguetho nu'u 'da yabu bá nɛts'i, bi 'yɛn a ra Jesús.

⁴Bi dą u yú xädi buya:

—Ma'ueni ua, hapu da zä da thin a da zi ya 'bucua.

⁵Nu ra Jesús bi 'yän'dʉ:

—Hangu yu hmɛ guí cuhu, bi 'yɛ̞mp'u.

--Yotomhmε, bi 'yɛn u.

⁶Nu ra Jesús buya bi xifi da hyupu häi yu ją'i. Nɛ bi hyan u yotomhmɛ bi 'yäp ra jamadi Oja nɛ bi xɛm buya, bi un'du yú xädi di darpa u yu ja'i i hupu. ⁷Nɛ yu t'uhua mi cu u, bi japi nɛ bi un'du yú xädi buya bi darpa yu ja'i hupu. ⁸Gätho bin sihmɛ u nɛ bin niya xun ho. Nɛ nu'bu mi mba ma pɛti u bi bongui, bin ja yoto 'bøts'e. ⁹Nɛ nu'u bin sihmɛ mi jua'i goho mahuahi. Nɛ nubuya, bi xih yu ja'i da mba yú ngu. ¹⁰Nɛ bi yurpu ja ra mbosa ra Jesús buya nɛ yú xädi, bi zøm bu ra häi Dalmanuta.

Yu fariseo i äp ra hmεpya a ra Jesús

11'Bex bi zøm bu yu fariseo buya bi zä ra Jesús 'bu majuani Oja bi un rá ts'edi ne bi 'yäp yu hmepya mahɛts'i. 12'Pe nu ra Jesús bin ga'ts'i, bi du rá mbui nguetho guexta'a hingui ɛc'yɛi gue ja rá ts'edi, ne bi 'yɛmp'u:

—Hanja ngue guexta'a guí äjʉ yʉ hmɛpya. Majuani dí xi ahʉ hin te ma hmɛpya ga ut'ahʉ ya.

¹³Nɛ bi zopu u buya, bi mba bi yurpu ja ra mbosa mahøn'a u, bi mba bu 'danguadi.

Yú xädi ra Jesús bi xifi di jamansu nangue yún xädi yu fariseo

¹⁴Pε nu yú xädi ra Jesús bi pumbɛni him bi hyax ra hmε. Nε hønt'a zi n'dam hmε mi o bu ja ra mbosa. ¹⁵N'da ran t'uti bi xih yú xädi ra Jesús nε bi 'yɛmbi:

—Dami jamansuhu nangue rá íxi yu fariseo nε rá íxi ra Herodes, bi 'yɛ̞mp'u.

¹⁶Pε yú xädi buya sä bin 'yɛ̞mzɛhɛ n'da ngu n'da u: —Masque i xiju nguetho him bá hahu ra hmɛ.

17 Pε nu ra Jesús 'bex bi bądi ngue him mi pą u ngue gue'u yún t'øt'e yu fariseo nε'u mi tɛn ra Herodes bi xifi, nε bi 'yɛmp'u:

—Ha gue'a gnín 'yänhdu a, ngue nte bá hạhu ra hmɛ. Hin gadin 'yomfɛnihu, xum mɛ tho ni mbuihu. ¹⁸ Ja ni dähu nɛ hin guím bɛmhbu 'bɛ'a gá nuhu, ja ni zaguhu nɛ hin guím bɛmhbu a gá 'yøhmbu. ¹⁹ Nɛ nu'bu má xɛngä cut'a yu hmɛ dá japi bin xạndi janague bin niya xun ho cut'a mahuahi dá 'uingä, ha'mi 'bøts'e yu xɛqui gá pɛthu tha.

Nε bi 'yɛn u:

—'Dε'mayo 'bøts'e.

NE nu'bu má xengä yoto yu hme dá japi bin xandi janangue a bin niya xun ho goho mahuahi dá 'uingä, ha'mi 'bøts'e gá pethu yu xequi tha.

Nε bi 'yɛn'u:

-Yoto 'bøts'e.

²¹—Ha guexta'a hin guí pahmbu a dím mangä, bi 'yɛn'a ra Jesús.

Ra Jesús bi hoc'a n'da ra xädä bu ra hnini Betsaida

²²Nu'bu mi zøm bu ra hnini Betsaida ra Jesús nɛ yú xädi, 'bex bá ts'inba n'da ra xädä, nɛ bi t'äp ra mate da dädi. ²³Nu ra Jesús buya bi bɛnba rá 'yɛ ra xädä nɛ bi zix bu ma'ueni ts'u ra hnini. Bi zorpa yú dä nɛ bi därpa yú xidä, nɛ nubuya bi 'yän 'bu in nu ts'u ran nɛqui. ²⁴Nɛ nu'bu min hanni ra xädä bi 'yɛna:

—Dín nugä yʉ ją'i ya, εna yʉ za, pε i 'yo, bi 'yɛna.

²⁵Nε bi därpa yɨ dä mahøn'a nε bi japi bi nu xɨn ho ran nεqui bɨŋa. ²⁶Nɛ nu ra Jesús bʉya bi mbɛnpʉ rá ngu bi 'yɛmbi:

—Hin gui mba bʉ hnini nε njo'o to gui xifi nangue a dá øt'e'e, bi 'yɛ̞mp'a mí xädä.

Ra Pedro bi ma gue gue'a rá Thahni Oja a ra Jesús

²⁷Nɛ nu'bʉ mi bøm bʉ ra hnini Betsaida a ra Jesús nɛ yʉ́ xädi, bi mbähä bʉ ja yʉ hnini ra xɛqui Cesarea Filipo. Nu'bʉ mi mba bʉ 'yu bi 'yän'ndʉ yʉ́ xädi nɛ bi 'yɛmp'ʉ:

—'Bɛ'a i man yʉ ją'i nanguecä, bi 'yɛ̞n'a ra Jesús.

28 Ne nu'u bi dati:

—En u 'da yu jali gue'e grá Xuua Nxixya. Ne nu'u mi'da i en u gue'e grá Elías. Ne mi'da i en u, gue'e 'da u yu pøngahya mi 'buh maya'bu, bi 'yen u yú xädi.

²⁹Nu ra Jesús bi 'yänzɛhɛ yú xädi mahøn'a:

—Xi ahu, 'bɛ'a guí mamhbu nanguecä.

'Bex bi dą a ra Pedro, bi 'yɛmbi:

—Nu'i gue'e grá Cristo, rá Thahni i Oją, bi 'yɛ̞n'a. ³⁰Nε nu'a ra Jesús bi hɛcua yú xädi ngue hin da ma to'o a.

Bi man ra Jesús nangue rán dątezehe

3¹Nu ra Jesús bi dʉ'mi bi xi ʉ yײ xädi 'bɛ'a da t'ørpe ngue gue'a bin jạ'i ua ja ra ximhäi a, nɛ bi xi'ʉ ngue hin da numanho ma ngʉrbihe yʉ dạc'yɛi, nɛ yʉ ngʉrba mbäja nɛ yʉ xänbate nija, nɛ bi xi ʉ jatho da nu xʉn ngu ran ʉnbi nɛ da tho, nɛ da dạmbɛni 'bʉ ná hyupa. ³²Nɛ bi xifi xʉn ho 'bɛ'a da t'ørpe, hin'yʉ 'bɛ'a bi gøn'dʉ. Pɛ nu ra Pedro bi zixmanhɛ nɛ bi hɛcpi, bi 'yɛ̞mbi:

- —Njon gui japi da bɛnt'i i, damin yani, bi 'yɛmbi. ³³Nu ra Jesús bi hyand bʉ mi 'bäh mi'da yʉ́ xädi 'bʉ mi 'yɛmp'a ra Pedro:
- —Dami 'uegue nangue ma hmigä grá zįthu Satanás. Nu'i hingui sä guim bɛni tengu im bɛn Oja, hønt'a guím bɛn a guín nu ua ja ra ximhäi, bi 'yɛmbi.

³⁴Nu'a ra Jesús buya bi zohn'du yu ja'i ne yú xädi ne bi 'yemp'u:

Hønt'a go to'o i nde da dɛngui, hin da zän zɛhɛ 'bɛ'a da 'yøt'e nɛ da hyät yun unbi madague da tho, nɛ da bɛni tengu dím bɛngä. ³⁵Nguetho nu'u to'o i su da du nanguecä, pɛ gätho yu pa da nu ran unbi mazai u, pɛ nu'u hingui su da du nanguecä nɛ nangue mam hmangä, gätho yu pa mazai dim 'bu u. ³⁶Hin'yu 'bɛ'a xun ho da nu u yu ja'i 'bu xtí pɛti gätho 'bɛ'a i ja ua ja ra ximhäi, nɛ hønt'a ran unbi mazai da nu u. ³⁷Hin'yu 'bɛ'a sä da 'yøt'a n'da ra ja'i ngue da 'yɛna di pøsɛ rá te, bi 'yɛn a ra Jesús.

38 Ne xø bi 'yena:

—Nε nu'a to'o i pɛ'ts' rá sä nanguecä nε nangue mam hmangä bʉ 'bʉ ʉ hingui ɛc'yεi Oją, nɛcä ngue dán ją'igä ua ja ra ximhäi, xín ga ɛmbi ma t'ਚhni 'bʉ rán zɛgui ra pa a, 'bʉ bá pengä mahøn'a. Nɛ din jagä rá ts'ɛdi ma Ta bʉ mahɛ̞ts'i nɛ gätho yਚm 'bɛhni ban 'yohe 'bʉ bá ɛcä mahøn'a, bi 'yɛ̞n a ra Jesús.

Ra Jesús bim pä a n'da ora bu ja ra nyuni

Ne man'da bi xi u, bi 'yembi:
—Majuani di xi ahu, 'bu i 'da
ahu ngue hin gni tuhu 'bu bi du'mi
di manda ua rá ts'edi Oja.

²Nu'bɨ mi tho'a n'dato pa xím man ra Jesús na, bi zixa ra Pedro nɛ'a ra Jacobo nɛ ra Xuua bɨ ma'ueni bɨ bí ja n'da ra t'øhø xɨn hɛts'i. Nu'bɨ mí zøm bɨ, bi nu yɨ xädi bim pä'a ra Jesús. ³Nɛ rá pahni bim pädi bi fɛxni, nɛ ɛmmɛ bi t'axqui xinda gue'ɨ gätho mi'da t'ɛmbi xɨn t'axi. ⁴Nɛ bi nɛqui bɨ ra Elías n'youi ra Moisés, bin yahɨ ra Jesús, mi 'bɨh maya'bɨ ɨ. ⁵Nu ra Pedro bɨya bi xih ra Jesús:

—Ma xänbate i, xun ho ngue gätho dí 'buhmbu ua ya, bi 'yεna. Ga høhmbe hyu yu t'ungu. N'da'e nε n'da Moisés, nε n'da Elías, bi 'yεna.

⁶Ngubu bi ma nguetho him mi padi 'bɛ'a bi ma nguetho εmmε bi mbidi. ⁷Nε nubuya, bá εh yu güi bi gomp'u mi 'bä u nε bi 'yø a n'da ra nde u ngue bin ya bu ja yu güi, bi 'yɛna:

—Guehna ma Ts'ʉnt'ʉ ɛmmɛ dadí huɛqui, dami 'yømanhohʉ 'bɛ'a da man na, bi 'yɛn a ra nde bin yą.

⁸Nɛ nu'bʉ min hanni ʉ yʉ́ xädi ra Jesús, njon mam bi nu, hønt'a ra Jesús bi nu i 'bäpʉ.

⁹Nε nu'bu mi gapu ja ra t'øhø, bi 'yɛmp'u yú xädi ngue njo'o to da xifi 'bɛ'a xi nu bu, jague'bu bi dambɛnisɛ a ra Jesús gue nu'a bin ja'i ua ja ra ximhäi a. ¹⁰ Janangue a bi bɛntho a ram hma bi sifi nɛ him bi ma. Nɛ bin 'yänzɛhɛ nɛ bin 'yɛmp'u:

—Bɛ'a ní mba a ram hma bi ma ra Jesús ngue da dambɛni.

¹¹Nɛ bi 'yän'na ra Jesús ʉ bʉya:

—'Bε'a ní mba a i man yu xänbate niją ngue jatho duam 'bεt'o ra Elías nε m'bεjua ra Cristo, bi 'yɛmbi. 12 Mi da a ra Jesús, bi 'yɛmp'u:

87

—Majuani im man u, bam 'bɛt'o ra Elías di hoqui gätho 'bɛ'a ja ua. Nɛ ha guím bɛmhbu 'bɛ'a man rám hman Oja ngue din ja buya, ngue da zøh man'da din ja'i ua ja ra ximhäi, da nu xun ngu ran unbi nɛ da t'ɛmbi nte di muui. ¹³Pɛ dí xi ahu ngue bi zøcua a gue bi thocpa rá 'bɛfi ra Elías, nɛ bi 'yørpe gätho mí ndesɛ yu ja'i da 'yørpe, tengu nt'o't'i nangue a, bi 'yɛna.

Ra Jesús bi hoc'a n'da ra t'uhni min 'youi ra zithu

14 Nε nu'bu mi zøpu 'buh mi'da yú xädi bi nu n'da munts'i yu ją'i ngue madi thɛ'ts'u. Nε nu'u 'da yu xänbate niją ngue madin junthu yú xädizεhε ra Jesús. 15 Gätho yu ją'i mi 'bupu bi hyonya thoho 'bu min nu ba ερu ra Jesús nε bin 'yɛmp'u: "Βε'a din ja ya." Νε 'bex bin tihi bi mba bí zɛngua. 16 Nε nu ra Jesús bi 'yän'du nε bi 'yɛmp'u:

—'Bɛ'a gue gnín junthu, bi 'yɛ̞mp'u.

¹⁷'Bex bi dą a n'da ran 'yohu mín 'yohu yu ją'i:

—Xänbate i, nugä bá sigä ua n'da ma ts'unt'u ngue in 'youi ra zithu di japi i gore. ¹⁸Nε hønbu go hapu i sits'i, nε i hua'ts'i, nε i pøn yu fugui rá nde buya. Nε di cuxt' yú ts'i nε di bøcabi. Nε dá xi u ni xädi buya gue da hyønba thi ra zithu pε him bi zä, bi 'yɛn'a.

19 Nu'a ra Jesús bi 'yɛmp'a:

—Nu'ehu guexta a hin guí εc'yεihu 'bε'a dí xi ahu. Ha'mi pa ngue ga tøp'a thoho ahu ngue gui 'yεc'yεigahu. Nu'a ni ts'unt'u ba singa ya, bi 'yɛn'a ra Jesús.

²⁰Bá ts'i buya. Nu'a ra zithu 'bu mi nu ra Jesús 'bex bi dɛxa häi ra ts'unt'u min 'youi. Nɛ nu'bu mi zo bu häi din dạn buya, nɛ i pøn yu fugui rá nde. ²¹Nu ra Jesús bi 'yän'na rá ta ra ts'unt'u:

—Man jąm'bu bi mbudi.

Bi dą a rá ta ra ts'unt'u buya:

—Bi mbu 'bu min t'uhni. ²²Nε xun ngu yu nidi di japi i apu ja ra sibi nεpu po ra dehe 'bu i 'yo bu, i nde dí du a. Nu'bu da zä, dami zεc'be gui huεga'be, bi 'yɛmbi.

²³Nu ra Jesús bi dadi:

—Hạhạ, nu'bu guí εc'yεi gue i ja ma ts'εdi. Gätho din ja a da nde n'da ra ja'i 'bu i εc'yεi i ja rá ts'εdi Oja, bi 'yεmbi.

²⁴Nu'a rá ta ra t'ʉhni 'bex bi dạti nts'ɛdi:

—Majuani dí εc'yεi pε dami jaqui man'da ga εc'yεi xun ho, bi 'yεna.

²⁵Nε min nu ra Jesús, man'da ni zøtho yʉ jạ'i, janangue a 'bex bi hyøn a thi ra zįthu min 'youi ra ts'ʉnt'ʉ, bi 'yɛ̞mbi:

—Grá gore zįthu nɛ grá gogu, dami pøm bu nɛ him man gui curpu rá mbui na ra ts'unt'u, bi 'yɛmbi.

²⁶Nε nu'a ra zįthu bi mbafi nε nts'εdi bi huąspa rá ją'i ra t'ʉhni, nε bi bøm bʉya. Nu'a ra t'ʉhni bi gohi tengu 'bʉ xi du. Nε xʉn ngu ʉ εna: "Bi du." ²⁷Pε nu'a ra Jesús bi bɛnba rá 'yɛ, nɛ bi xots'i, nɛ bim 'bäh ra t'ʉhni bʉya.

²⁸Nε bi mbähä yɨ xädi ra Jesús bu ja ra ngu buya. Nu'bu mi zøm bu bi 'yän bu ma'ueni ts'u:

—Hanja him bi zä dá hømhbe thi ra zithu min 'youi ra t'uhni, bi 'yɛ̞n'u yú xädi. SAN MARCOS 9 88

²⁹Νε nu ra Jesús bi 'yɛ̞mp'ʉ:

—Nuna ra zįthu tengu na, hin da zä gui hyømhbu thi 'bu hinga m'bɛt'o gui 'yɛ't' nin sihmɛhu nɛ ɛmmɛ gan yahu Oja, bi 'yɛmp'u yú xädi ra Jesús.

Ra Jesús im ma mahøn'a rán dąte

³⁰ Nu'bu mi bøm bu ra Jesús ne yú xädi, bi mbähä bu Galilea, ne nu ra Jesús njom bi ndepe da bądi ngue i 'yo bu. ³¹ Nguetho mí xänba yú xädi ne mí embi:

—Nugä nque dán jaligä ua ja ra ximhäi, da mba ma dägä bu ja yú 'yε yun 'yohu nε da thogä. Nε nu'bu dá tu, ga thambɛnigä 'bu na hyupa. ³²Pε nu yú xädi him bi badi 'be'a nam bøn'a bi ma nε mí su da 'yänni.

Nu'a i nde dim 'bɛt'o din 'yɛhɛ thoho a

³³Ne bi zøm bu Capernaum buya. Ne nu'bu mi zøm bu ja yú ngu, nu ra Jesús bi 'yän 'du yú xädi:

—'Bε'a gnín junthu bu 'yu.

- ³⁴Nɛ him bi dą ʉ nguetho xin junt pʉ 'yu, xin 'yänni nangue'a to'o dim 'bɛt'o. ³⁵Nu'bʉ min säya ra Jesús,
- —Bá thạmhbu ua, bi 'yɛmp'u 'dɛ'mayoho yú xädi. Nɛ nubuya bi 'yɛmp'u:
- —To'o nde di ngurbi da 'yøt'e ngue dim 'bεjua thoho nε din 'yɛ̞hɛ nangue gätho u mi'da, bi 'yɛ̞n'a ra Jesús.

³⁶Nɛ nubuya bi japi dim 'bä inde n'da ra t'uhni, nɛ bi dospa rá xixi nɛ bi 'yɛmp'u:

³⁷—Nu'a te'o i simanho n'da ra t'ʉhni nangue ma thuhugä, nɛcä i simanhogui. Nɛ nu'a to'o i simanhogui, hinga høngdä i simanhogä a pɛ nɛ'a Oją bá pɛngä ua i simanho a, bi 'yɛ̞n a ra Jesús.

Nu'a i ten rá ts'edi ra Jesús rám fäts'iui a

³⁸Nu ra Xuua bi 'yɛmp'a ra Jesús:

—Xänbate i, xtán nuhe n'da ran 'yohu i ndøn'na ni thuhu 'bu i høn a thi yu zįthu in 'youi 'da yu ją'i, nɛ dá hɛcpahe, nguetho hin dín 'yohu.

39 Pe nu ra Jesús bi 'yemp'u:

—Nde'bu hin xqui hɛcpahu nguetho hin di c'aman'ugä to'o øt' yun t'øt'e mixte nangue ma ts'ɛtigä. 40 Nɛ nu'u to'o i 'bui ngue him man suihu, gue'u mam fäts'ihu u. 41 Hønt'a go te'o di 'da ahu ts'u ra dehe ngue i padi guí tɛngahu, majuani dí xi ahu i ja 'be'a di un Oja a nangue ran ho bi 'yøt'ahu, bi 'yɛn a ra Jesús.

Nu'a da 'yøt' ran ts'o xun ngu ran unbi da nu a

⁴²Nε xø bi 'yɛn'a ra Jesús:

—Hønt'a te'o di 'bερi da 'yøt' ran ts'o n'da ra t'uhni i ec'yeigui, xun utho ran ts'embi da nu a. Man'da xun u xinda gue'bu da thurpi rá 'yuga bu ja ra do ngue ra juni xun hyu, ne da t'en bu mbonthe ja ra deja. 43 Nu'bu ni 'yɛhu di ja ahu gui 'yøthu ran ts'o, xun ho 'bu gui 'yøthu tengu 'bu gui hyeju. Madague gan do'yehu pegue gui timhbu ra te mazai, xinda gue'bu di ja yoho ni 'yɛhʉ nɛ gui nuhʉ ran unbi mazai guepu ja ra sibi njam'bu i hugt'i. 44 Xun utho guin nuhu bu 'bu, tengu tho 'bu i sa a ni ngøhu yu zu'ue, ne njam'bu din he a dí zapi gätho yu pa, ne tengu 'bu n'da ra sibi njam'bu da huɛt'i.

⁴⁵O nu'bu ni guahu di ja ahu gui 'yøthu ran ts'o, xun ho 'bu gui 'yøthu tengu 'bu gui hyɛju. Madague gan doguahu pɛgue gui timhbu ra te mazai xinda gue'bu di ja yoho ni guahu nɛ gui nuhu ran unbi mazai. ⁴⁶Xun u tho guin nuhu bu 'bu, tengu tho n'da ra du ngue 'buh yú zu'uɛ sap yú ngø nɛ njam'bu din hɛ a ni zapi gätho yu pa, nɛ tengu 'bu n'da ra sibi njam'bu da huɛt'i.

47 O nu'bu ni dähu di ja ahu gui 'yøthu ran ts'o, xun ho 'bu gui 'yøthu tengu 'bu gui hyahmbu. Madague gan 'dadä thohohu, pegue gui cuthu bu di manda rá ts'edi Oja, xinda gue'bu di ja yoho ni dähu ne gui nuhu ran unbi mazai. 48 Xun u tho guin nuhu bu 'bu, tengu tho n'da ra du ngue 'buh yú zu'ue sap yú ngø ne njam'bu din he a ni zapi gätho yu pa, ne tengu 'bu n'da ra sibi njam'bu da huet'i.

⁴⁹ Gätho ahu din ja ahu yun unbi 'dahma gui pømanhohu, tengu tho u yu 'bøts'e din t'un Oja i pa ma japi ra ų ngue da bømanho. ⁵⁰ Nu ra ų xun ho. Pɛ nu'bu bi 'bɛh rá ts'ɛdi ya hin'yu 'bɛ'a sä dín hoqui. Nɛ ngutho ahu o guidi jafu gui 'bɛhmbu ran ho i ja ahu. Pɛ guim 'bumanhohu ni mija'ihu.

Ra Jesús bi ma njon da hyeh rá xisu

Nu'bɨ mam bá ερɨ Capernaum ra Jesús bi zøm bɨ ra xɛqui Judea, nɛ bin 'yo bɨ rá nyạni ra häi Judea nɛpɨ 'danguadi ra dathe Jordán. Bi mbɨh yɨ ja'i bim pɛti mahøn'a bɨ mi 'bäh ra Jesús, nɛ bi xänbi mahøn'a tengu nzai mi øt'e. ²Nɛ nu'bɨ mi zøm

bu yu fariseo, bi 'yän 'bu da zä da hyɛh rá xisu n'da ran'yohu, nguetho i nde da dinbi 'bɛ'a dí yąp'a ra Jesús. ³Nu'bu mi da a ra Jesús:

—'Bɛ'a mam bʉ ja rán t'ɛdi ra Moisés nangue ran hyɛgui.

⁴Bi da'u yu fariseo buya:

—Nu ra Moisés bi ma ngue nu'bu n'da ran 'yohu in nde da hyɛh rá xisu, da t'ørpa ra søcua ngue ran xuni.

⁵Nu'bʉ mi dą a ra Jesús bi 'yɛ̞mp'ʉ:

—Nangue'a xum mɛ ni mbuihu janangue a gue a ran t'ɛdi bi man ra Moisés a. ⁶Pɛ nu'bu rá mbudi ra ximhäi, Oją bi zänna n'da ran 'yohu nɛ rá xisu. ⁷ Janangue a nu'bu n'da ran 'yohu da zin a n'da ra xisu him man i 'yo rá güɛnda rá ta o gue rá mbe, ⁸ pɛgue dim 'buhmi rá xisu nɛ din ja tengu 'bu n'dan ja'itho. Nu mam 'bɛt'o mí yonja'i, pɛ nu'bu bi zini din ja tengu 'bu n'dan ja'itho.
⁹Nɛ nu'u di pɛnba Oja u, njon da zä di xunba u, bi 'yɛn a ra Jesús.

10 M'bejua bi zøm bu ja n'da ra ngu ne bi 'yän'du yú xädi:

—'Be'a nam bøn a gám ma, bi 'yɛn ч.

¹¹Nu ra Jesús bi 'yɛmp'ʉ:

—Gätho te'o da hyεh rá xisu nε da zim man'da, nu'a øt' ra 'yomt'ɛni a. ¹²Νε ngutho n'da ra xisu 'bʉ da hyεh rá ndø nε da zim man'da ran 'yohʉ nɛ'a øt' ra 'yomt'ɛni a, bi 'yɛn a ra Jesús.

Nu ra Jesús i numanho yu t'uhni

¹³ Nu'u 'da yu ja'i bi zix yu t'uhni bu 'buh ra Jesús, i ndepe da dospa yu ya. Pe nu yu xadi bi hecpa u ngue hin da zix yu t'uhni bu 'buh ra Jesús. ¹⁴Nu'bu mi nu ra Jesús 'be'a bi 'yøt' yú xädi bin cue buya, ne bi 'yɛna:

—Dami jafu yu t'uhni ba thocua, 'yo gui corpahu bu, nguetho hønt'u to'o da gohi tengu n'da ra t'uhni ngue din unse di manda rá ts'edi Oja, da yurpu di manda rá ts'edi Oja u. 15 Majuani dí xi ahu, nu'bu hin gui cohmbu tengu n'da ra t'uhni hin da zä gui cuthu bu di manda rá ts'edi Oja 'bu, bi 'yɛn'a ra Jesús.

¹⁶Nε nubʉya i thɛx'ʉ yʉ t'ʉhni nɛ bi dospa yʉ́ yą nɛ bi 'yäp rám fäts'i Oją nangue ʉ.

Ra membeti ts'unt'u bi si a ra te mazai

¹⁷ Nu'bʉ mi bøn'a ra Jesús bʉ mí 'bʉi, 'bex bá ε a n'dihi n'da ra ts'ʉnt'ʉ. Bi zʉpʉ 'yu, bin dạnyahmu bʉ ja rá gua ra Jesús nɛ bi 'yɛ̞mbi:

—Hoga xänbate i, 'bε'a ga øt'ä ngue din jagä ra te maząi, bi 'yεn a.

18—Ha guím bɛni 'bɛ'a guím ma ngue guí ɛngui xun hogui. Nguetho hønt'a Oja xun ho. 19 Ha guí pa u yún t'ɛdi Oja ngue i ɛna: "O guí 'yomt'ɛni, o guí hacpa rá te ni mija'iui, o guím pɛ, o guí man yu fɛhni, hin gan siyate, nɛ gui numansu ni ta nɛ ni mbe, nɛ gue'a man yun t'ɛdi a," bi 'yɛn a ra Jesús.

²⁰Nε bi dą a ra ts'ʉnt'ʉ bʉya:

—Xänbate i, gätho yun t'ɛdi dá øt'ä gue'bu go man t'uhnigä.

²¹Nu ra Jesús ɛmmɛ bi huɛc 'bʉ min hyɛtui nɛ bi 'yɛmbi:

—I ja a man'da di 'bɛdi gui 'yøt'e. Ni mba, bá pä 'bɛ'a gätho i ja i, nɛ gui darpa yʉ hyoya ni mbɛti bʉya. Nɛ din ja a 'bɛ'a m'bɛ'ts'i bʉ mahɛ̞ts'i gue di muui. Nɛ nubʉya ba ɛ̞hɛ gui tɛngui, nɛ gui hyät' yʉn ʉnbi madague gui tu, bi 'yɛ̞mbi.

²²Pɛ nu ra ts'ʉnt'ʉ bi du rá mbʉi 'bʉ mi 'yø a bi man a ra Jesús nguetho ɛ̞mmɛ ra mɛmbɛti a. Janangue a bi 'uetho.

²³Nu ra Jesús bi hyant'ʉ gätho mi 'bäpʉ nɛ bi xih yʉ́ xädi bʉya:

— Emme xun hei n'da ra membeti da yurpu di manda rá ts'edi Oją, bi 'yena.

²⁴Nε nu yú xädi bi hyonya thoho a bi man ra Jesús. Pε nu ra Jesús xø bi 'yɛ̞mp'u yú xädi mahøn'a:

—Ma zu t'uhni ahu, xun hei da yurpu di manda rá ts'edi Oją n'da 'bu i hu rá mbui nangue ra mbeti. ²⁵Man'da hingui hei ra camello da yurpu ja rá zagu ra 'yofani, xinda gue n'da ra membeti da yurpu di manda rá ts'edi Oją, bi 'yemp'u.

²⁶Nε xø man'da bi hyonya tho ʉ yʉ́ xädi nε bin 'yɛmzɛhɛ ʉ:

—To'o maha da zä da din a ra te mazai 'bʉ, bi 'yɛ̞n ʉ.

²⁷Nu ra Jesús bin hyệthu yú xädi nɛ bi 'yɛ̞mp'ʉ:

—Hingui sä da dįnsε ra te maząi n'da ra ją'i pε nu Oją gätho da zä da 'yøt'e, bi 'yεn'a ra Jesús.

²⁸Nu ra Pedro buya bi 'yɛ̞mp'a ra Jesús:

—Nugähe, gätho 'bɛ'a mi jaje xtá sohmbe nɛ dá tɛn'nahe.

29-30—Majuani, εn a ra Jesús, nε dí xi ahu ya, hønt'a go to'o bi zoh rá ngu, o gue yú cu, o gue rá ta, o gue rá mbe, o gue rá xisu, o gue yú t'uhni, o gue yú häi, ngue da dɛngui, pε εmmε man'da xun ngu din ja ngue yú ngu, o gue yún 'yohu, o gue yún ju, o gue yú mbe,

o gue yú t'uhni, o gue yú häi, xinda gue u gätho mi ja mam 'bɛt'o, pɛ nɛ'u yun unbi da nu, nɛ da nu ran ho gätho yu pa mazại 'bu rán zɛgui ra pa. ³¹Nɛ xun ngu u mi 'bɛt'o dim 'bɛjua nɛ nu'u mi 'bɛjua dim 'bɛt'o u, bi 'yɛn'a ra Jesús.

Ra Jesús bi ma mahøn'a rán date

32 Nu'bu mi mba bu 'yu Jerusalén ra Jesús, xun ngu yu ja'i bi denni. Nu ra Jesús mi 'bet'o, min 'yohu yu xädi, ne mí 'bejua yu ja'i. Ne min su u yu xädi, midi hyonya thoho u ngue nde da mba bu Jerusalén ra Jesús. Ne nu ra Jesús bi zix bu ma'ueni ts'u yu xädi nde da xifi 'be'a da t'ørpe. 33 Ne bi 'yemp'u:

—Nuya ná mbähä bu Jerusalén. Ne nugä ngue dán ją'igä ua ja ra ximhäi, da mba ma dägä bu 'buh yu ngurpa mbäja ne'u yu xänbate nija, ne da 'yørcä ran juanbi u ngue ga tu, ne di dägä bu 'bu u him ma mijudíohu. ³⁴Ne da mba nthengui ne da mba m'be'migui, ne da mba nts'ots'igä, ne da thogui. Pe nu'bu ná hyupa ga thambenigä, bi 'yemp'u yú xädi.

Äh ra mate ra Jacobo ne ra Xuua

35 Nu ra Jacobo nɛ ra Xuua, yɨt ts'unt'u ra Zebedeo, man'da bi hyäm bu mí 'bäh ra Jesús nɛ bi 'yɛ̞mbi:

- —N'da ra mate dí nde ga ä'a'be.
- ³⁶Nε nu ra Jesús bi 'yɛ̞mp'ʉ:
- —'Βε'a guí nde ga øt'aui.
- ³⁷Nε bi 'yεmp'ʉ bʉya:
- —Dí nde'be 'darpu ga huhmbu ngue 'da xtá hutho'be bu ja ni mɛxa 'bu gán ts'ut'abi, bi 'yɛmbi.

³⁸Nε nu ra Jesús bi 'yɛmp'ʉ:

—Nu'aui, hin guí pąhmi 'bɛ'a nam bøn'a guí ähmi. Ha da zä nɛ'aui gui säui ran unbi ga sägä. Ha da zä nɛ aui gui hyät'ui ra dumbui ga hät'ä.

39—Da zä, bi 'yɛn ʉ.

Nε nu ra Jesús bi 'yɛmp'ʉ:

—Majuani, nu ran unbi ga sägä gui säui a, nε nu a ra dumbui ga hät'ä nε aui gui hyät'ui a. ⁴⁰Pε hinga gue'a man t'εdigä gam mangä to'o dan hyuhmbe bu ja ma mεxa. Pεgue gue'a Oja di un ran t'εdi to'o xan zänni, bi 'yɛn a ra Jesús.

⁴¹Nu'bʉ mi 'yø ਚ yਚ mixädihʉ 'bɛ'a bi man ra Jacobo nɛ ra Xuua, bi mbʉdi bin cuɛ ਚ. ⁴²Janangue'a nu ra Jesús bi 'yɛ̞mp'ਚ gätho 'dɛ̞'mayoho yਚ xädi bਚya:

—Nu'u i ja yú ts'edi ua ja ra häi emme xun hei i ørpa u to'o di manda u, ne emme din 'yex'u. 43 Pe nu'ahu hinga ngubu gui 'yøthu. Pe hønt'a go to'o da nde din ja rán t'edi xun ho, pegue jatho din 'yehe ngue gätho mi'da. 44 Ne nu'bu 'bu a n'da ahu ngue i nde dim 'bet'o, pegue din 'yehe thoho ngue gätho mi'da. 45 Tengu thohogä, ngue dán ja'igä ua ja ra ximhäi, him bá ecä ngue dam hmugä, pe bá ecä ngue dan 'yehe thohogä, ne ga dä ma te gan yanba yú te yu ja'i, bi 'yen'a ra Jesús.

Ra Jesús bi hoc'a ra xädä i Bartimeo a

⁴⁶Nε mi thopu ja ra hnini Jericó ra Jesús nε yú xädi, n'yohu xun ngu yu ja'i. Nε mi hupu nden'yu n'da ra xädä rá thuhu ra Bartimeo, rá ts'unt'u ra Timeo. Mí äh ra mbεti a. ⁴⁷Nε nu'bu mi 'yøde ngue gue'a ra Jesús ra mɛngu Nazaret ní mba bu, bi mba't'i, bi 'yɛmbi:

—Hague Jesús, rám bom'beto i ra David, dami huggui, bi 'ygna.

⁴⁸Pε nu yʉ jạ'i bi hεcpi, bi xifi din hę. Pε nu'a ra xädä man'da nts'εdi mbafi:

—Rám bom'beto i ra David, dín ja a nin huęcate nanguecä, bi 'yɛna.

⁴⁹Nu ra Jesús bim 'bäh puya, bi zonhna ra xädä. Nu yu ja'i mí 'bejua bi xi a ra xädä:

—Dami ndants'i, gan johya, nguetho in zon'na i ra Jesús, bi 'yɛ̞mp'ʉ.

⁵⁰ Bi tonts'a rá coto ra xädä buya, bi ndants'i ne bi mba bu mi 'bäh ra Jesús. ⁵¹ Nu'a ra Jesús bi 'yɛmp'a:

—'Bɛ'a guí nde ga øt'a i. Nɛ nu ra xädä bi 'yɛmbi:

—Xänbate i, dí nde gui xoga ma dä.

⁵²Νε nu ra Jesús bi 'yεmbi:

—Ni mba, bi zä i nguetho gá 'yęc'yeigui, bi 'yena.

Nε 'bex bin zø yú dä nε 'bex bi den bu ni mba ra Jesús.

Bi hyux ra buru a ra Jesús nε bi t'ęspi

Ne mi ts'utho da zøm bu Jerusalén ra Jesús ne u mín 'yohu. Bin 'yo bu hämbu ra hnini Betfagé ne ra hnini Betania, herpu ja ra nyuni Olivos. Ne nubuya bi mbehn'du yoho yú xädi ra Jesús.

²—Ni mbɛ nu njon nu bí ja ra hnini nɛ nu'bu gá sømmi, gui timmi bu n'da ra buru nthat'i ngue njo'o to xí hyux'a n'dandi, nɛ gua xoc puya nɛ gua siui ua. ³Nɛ nu'bu da t'ɛn'aui: "Hanja ngubu guí øt'ui," 'bu da t'ɛn aui, gui 'yɛnui: "Nu'a ra Hmu i honi nɛ xø ba si'be ua mahøn'a," gui 'yɛnui, bi 'yɛn'a ra Jesús.

⁴Nɛ bi mba bʉya, nɛ bi dim bʉ a ra buru, nthat'i bʉ ja ra goxthi nguepʉ i thoh ra 'yu. Nɛ bi xoc'ਚ bʉya.

⁵Nu'u mi 'bupu bi 'yɛn'u:

—'Bɛ'a guí øt'ui bʉ, hanja guí xocui ra buru.

⁶Nu'ʉ yʉ xädi bi dạt'ʉ nε bi xifi tengu xi xih ra Jesús.

—Dami sixui 'bu, bi t'ɛmp'u yu xädi buya.

⁷Bá ts'inba a ra buru a ra Jesús buya ne bi mbøh yú coto u bá si ra buru, ngue bi gaspi ne bi hyuxa ra Jesús buya. ⁸Ne'u yu ja'i bi mbøh yúm 'bexøts'e pahni bi ximba bu 'yu, ne nu'u mi'da yu ja'i bi xec yu paxi ne bi mbøcpa bu ja ra 'yu.

⁹Nu'ʉ mi 'bɛt'o bʉ ní mba a ra Jesús, nɛ ʉ mi 'bɛjua, gätho í mba ʉ bi 'yɛ̞n'ʉ:

—Mająpi a bá pɛnhd Oją, bi 'yɛn u. ¹⁰Din ts'ut'abi a tengu tho ma mbombøtahe ra David. Mixte rá ts'ɛdi Oją, bi 'yɛm bu ní mba u.

¹¹Bi yuthu bu Jerusalén ra Jesús buya. Nε bi yurpu ja ra danija, nε bi nu 'bɛ'a gätho i t'ørpu nε bi bøm buya nguetho ya bin de. Bi mba bu ra hnini Betania nε u 'dɛ'mayoho yú xädi bi mbähä.

Ra Jesús him bi numanho ra za him mi zuh yú ndät'ä

¹²Nu'bʉ mi hyax bʉya bi bøm bʉ Betania ra Jesús, bi mbeng bʉ Jerusalén. Nɛ bin tumanthuhu bʉ 'yu a. ¹³Nɛ mi hant'a n'da ra za ja yʉ́ paxi, bi mba da nu 'bʉ i zʉpʉ yʉ́ ndät'o. Pɛ nu'bʉ mi zøm bʉ, nte bi dim bʉ, hønt'ʉ yʉ́ xi nguetho hinga gue'ʉ yʉ pa i zʉh yʉ́ ndät'o, nɛ säti tho ja yʉ́ xi. ¹⁴Nu ra Jesús bʉya bi 'yɛmp'a ra za:

—Njąm'bʉ to da zi mahøn'a ʉ ni ndät'o, bi 'yɛmbi.

Nε bi 'yøh yú xädi a bi man ra Jesús.

Ra Jesús bi hyøn a thi u yu mbä ne u yu däi bu ja ra danija

¹⁵Nε bi thopu Jerusalén ra Jesús nε yú xädi. Nε bi yurpu ja ra danija mahøn'a. Nε bi hyøn a thi gätho yu mbä nε yu däi mi 'bupu. Nε bi ndønba yú mεxa yum pämbεti nε yún thuts'i yu mbät'azu. ¹⁶Nε njon di japi da thopu nija 'bu i tu yú 'bɛni. ¹⁷Nε bi 'yɛmp'u yu ja'i buya:

—Ha hinga nt'o't'i bu ja rá søcuą Oją ngue bi 'yɛna: "Í thø a ma ngu nguepu da dandegui gätho yu ja'i 'bucua ja ra ximhäi," i ɛn Oja, bi 'yɛn a ra Jesús. Pɛ nu'ahu, xcá 'yørpahu tengu 'bu rá hyado nguepu nin yan u yu bɛ, bi 'yɛmp'u buya.

18 Bi 'yø u yu xänbate niją nɛ yu ngurpa mbäją 'bɛ'a xí man'a ra Jesús, nɛ i honi hague dán zä da hyo, nguetho bin su 'bu mi nu gätho yu ja'i madi hyonya thoho nangue a 'bɛ'a bi xänba ra Jesús. 19 Nu'bu mín de bi bøm bu a ra Jesús bu ja ra dahnihni Jerusalén nɛ yú xädi. Bi mbähä bu ra hnini Betania mahøn'a.

Bi 'yot'a ra za

²⁰Nu'bʉ mi hyax bʉya bi thoh mahøn'a bʉ 'bä a ra za ngue mi ɛna xtán zip yʉ́n dät'o ra Jesús. Nu'bʉ mi nu'ʉ, ya xí 'yot'i gätho yʉ́ 'yʉ. ²¹Nu ra Pedro bʉya bi bɛn a xí man ra Jesús nɛ bi 'yɛmbi:

—Xänbate i, nɛ nunʉ ra za gá 'yɛ̞mbi him man'dandi da ts'ip yʉ́n dät'o nɛ ya xø 'yot' ya, bi 'yɛ̞n a ra Pedro.

²²Nε nu'bʉ mi dąh ra Jesús, bi 'yεmp'ʉ:

—Dami 'yɛc'yɛihʉ ngue gätho da zä da 'yøt' Oja a xun hei. ²³ Janangue'a nu'bu ya gá xihmbu n'da ra t'øhø da 'uegue din hyøzehe bu ja ra deją, din ja a gá mamhbu 'bu hingui yoho guím bemhbu, ne guí pąhmbu majuąni gätho sä da 'yøt' Oja a xun hei. 24 Janangue'a dí xi ahu ngue nu'bu ja a guí äfu Oja, dami 'yɛc'yɛihu ngue di 'da ahu a guí äfu ne din ja a buya. ²⁵Νε nu'bu guí yạhu Oją him man guim bemhbu a bi 'yøt'ahu ni mija'ihu, gam punbahu u ne'a Oja di pun'nahu buya. ²⁶Nguetho nu'bu hin gadim punbahu ni mija'ihu xinga gue'a ni Tahu bí 'bupu mahęts'i di pun'nahu, bi 'yemp'u yú xädi ra Jesús.

Ran t'änni nangue rán t'ɛdi ra Jesús

²⁷Bi zøm bu Jerusalén ra Jesús ne yú xädi, ne xø bi zøm bu ja ra danija. Ne nu yu ngurpa mbäja bi zøm bu mi 'bäh ra Jesús, n'yohu yu xänbate nija ne yu dac'yei. ²⁸Nu'u bi 'yän'na ra Jesús:

—To'o bi 'da a ran t'ɛdi gui 'yøt'a guí øt'e.

²⁹⁻³⁰Nε nu ra Jesús 'bʉ mi dądi bi 'yɛ̞na:

—Necä ga än'nahu to'o bi un rán t'edi ra Xuua Nxixyą, hague Oją uague yu ją'ithoho. Ne nu'bu gá xiju, necä ga xi ahu to'o bi 'dacä man t'edi buya. 31 Nu'u bin 'yemzehe u buya:

—Xi'bu ga xihmbu ngue gue'a Oją bi un rán t'ɛdi, nɛ da 'yɛnju: "Hanja hin gá 'yɛc'yɛihu tha," da 'yɛnju buya. ³²Nɛ nu'bu ga ɛmhbu yu ja'i thoho bi un ran t'ɛdi ra Xuua, pɛ hingui sä ga xihmbu tengu a, bi 'yɛn u, nguetho gätho yu ja'i mi ɛspa ra Xuua nɛ bi 'yɛc'yɛi ngue rá pøngahya Oja a. 33 Nɛ nu'bu mi da u yu xänbate nija nɛ u gätho min 'yohu,

—Hin dí pąhmbe, bi 'yɛntho u. Nu ra Jesús bi 'yɛmp'u:

—Xinga guecä ga xi ahu to'o bi 'dacä man t'ɛdi, bi 'yɛn'a.

Rán t'uti yun ts'ombefi

12 Nu ra Jesús 'bex bi dʉ'mi bi xi a n'da ran t'uti nε bi 'yɛ̞mp'ʉ:

—Nu n'da ran 'yohu bi 'yøt'a n'da ra nuandät'o, nε bi fø't'e nε bi 'ya'ma n'da ra hyahäi guepu da 'yøt'a n'da ran thε'ma guindät'o, nε bi hyø a n'da ra jado xun hεts'i da ndex u da nu rá häi.

Ne bi hmit'u yu mbefi a rá häi ngue dim pepu, ne bi mba n'danni a ran 'yohu. ²Nu'bu bi zøn ra pa din ja u yun dät'o, bá pehna n'da rá 'yehe ba tu a xí mamhbu di unni. ³Pe nu'u yu mbefi bi bent'a ra 'yehe, nε bi mbε mi nε bi mbenthoho buya nε nte bi unni. ⁴Nu rá mbεti ra nuandät'ä bá pehn man'da rá 'yehe buya. Pe ne'a bi mba ma bat'a do a, ne bi mba ma unba rá ya, ne bi zantho, ne xø bi mbenthoho buya. ⁵Ne bá pehn man'da, ne xø bá tho a. Ne xun ngu mi'da bí 'behni. Nu'u 'da bi unba thoho ne nu mi'da bi hyo.

⁶Mi 'bu a n'da rá ts'unt'u a rá mbeti ra nuandät'o ne emme di huec'a. "Nu yu mbefi masque da numansu ma ts'unt'u," bi 'yense, ne bá pen'na buya. ⁷Pe nu u yu mbɛfi 'bu mi nurpa a rá ts'unt'u, bin 'yɛmzɛhɛ u: "Nuna, guehna da gohmi ra häi 'bu bi du rá ta. Mbähä ga hohu nɛ nubuya ma mbɛti zɛhɛhu ra nuandät'o," bin 'yɛmzɛhɛ u. ⁸Nɛ bi bɛnt'i nɛ bi hyo nɛ bi 'yɛm bu ma'ueni bu ja ra nuandät'o, bi 'yɛn'a ra Jesús 'bu mi man a ran t'uti.

⁹—Nuya guim bɛmhbu 'bɛ'a da 'yøt'a rá mbɛti ra nuandät'o, bi 'yɛmp'u. Guehma ba ɛsɛ nɛ da hyo u xí hmit'a rá nuandät'o nɛ di un ra nuandät'o u mi'da, bi 'yɛn a ra Jesús. ¹⁰Ha hin gán xähmbu rá t'ohni Oja ngue i ɛna:

Nu'a ra do bi bunt'u yu gado, gue'a man'da mahyoni tengutho bu ná thon yu guangu.

¹¹ Gue'a bi zänd Oja,

hanja gní hyonya thohohu, ɛm bu rám hman Oją, bi 'yɛn a ra Jesús.

¹²Nu yu ngurba mbäją ne'u min 'yohu, bi nde da bent'a ra Jesús nguetho bi bądi ngue go yún t'uti u nangue a bi man ra Jesús, pegue bi zutho din cue yu ją'i, janangue him bi bent'i. Bi mbatho u buya.

Ran t'änni nangue ra renta im man ra ts'ut'abi Roma

13 Ne bi 'bɛnpʉ 'bʉh ra Jesús ਚ mi'da yʉ fariseo ne ਚ 'da ma ngʉrpihe mi tɛn'na ra ts'ਚt'abi Herodes. Bi 'bɛhni ngue da 'yän'na n'da ran t'änni ne nu'bʉ hinga gue a da ma, 'bex gue di yapi. 14 Nu'bʉ mi zøm bʉ bi 'yɛn ਚ:

—Xänbate i, dí pąhmbe gätho majuąni guím ma nɛ njon guí su, nguetho hin guí ørpa masu a man yu ją'i nɛ guí xänba a majuani rám hman Oją u yu jąli. Dín nde gui xije, ha din theui yún t'ędi Oją 'bu dí øthu ngue dí juthu ra renta im man ra ts'ut'abi bu Roma in ts'ut'abi ua, uague hin'na. Ha xun ho 'bu ga thoqui ga juthu uague hin'na, bi 'yɛn u. ¹⁵Pɛ nu'a ra Jesús mi pądi høntho i nde da dinbi 'be'a dí yąp'a, janangue a bi 'yɛmp'u:

—Hanja gní 'yängahu, xi'a ni mbɛti gní juthu ra renta im man ra ts'ut'abi, gan nugä.

¹⁶Nε bi un buya.

—To'o rá pøte nε rá thuhu i cuat na ra mbεti, bi 'yɛn a ra Jesús.

Nε nu'u bi 'yen u:

—Rá pøte nε rá thuhu ra ts'ʉt'abi Roma i cuat na.

¹⁷Mí dạh ra Jesús nɛ bi 'yɛ̞mp'ʉ:

—Nu'a rá mbɛti ra ts'ʉt'abi Roma, gui un'na. Nu'a xin rá mbɛti Oja gui un'na Oja a, bi 'yɛ̞mp'ʉ.

Nε nu'u bi hyonya thoho nangue a bi man'a ra Jesús.

Ran t'änni nangue u da dambeni

¹⁸Nε bá ε th 'da yth saduceo bthya ngue mi εn th njo'o to da dąmbεni. Nε bi 'yan'na ra Jesús, bi 'yɛmbi:

19—Xänbate i, nu'a n'da ran t'ɛdi bi man'a ra Moisés i ɛna, ngue nu'bʉ da du n'da ran 'yohʉ nɛ njo'o rá t'ʉhni 'bʉ bi du, nɛ nu'a rán 'yohʉ zɛhɛ da zinba a rá xisu a rán 'yohʉ bi du. Nɛ nu'a rá t'ʉhni dim 'bʉ da t'ɛmbi rá t'ʉhni a xí du. 20 Nɛ mi 'bʉ i yoto yʉn 'yohʉ i din 'yohʉ zɛhɛ ʉ. Nɛ nu'a ra 'bɛt'o n'yohʉ bi zin'a n'da ra xisu, nɛ nu'bʉ mi du njo'o yʉ t'ʉhni. 21 Janangue'a nu a rán 'yohʉ a bi du bi zin a ra xisu mahøn'a. Nɛ'a bi du a, nɛ xinga gue a bim 'bʉh yʉ t'ʉhni a. Nɛ ná

hyu ngutho. ²²Nɛ gätho ʉ yoto ma 'yohʉ nɛ 'dat'a ra xisu bi zini, nɛ xinga n'da mím 'bʉh yú t'ʉhni 'bʉ bi du ʉ. Nɛ nzɛgui nɛsɛ ra xisu bi du. ²³Nuya dami xije nu'bʉ majuani da dambɛni yʉ jali, nda'a nin 'yohʉ dim 'bʉhmi ra xisu, nguetho gätho yoto bim 'bʉhmi, bi 'yɛn ʉ yʉ saduceo. ²⁴Mi dah ra Jesús nɛ bi 'yɛmp'ʉ:

—Nu'ahu 'dan'yo thoho guí mamhbu nguetho hin guím bembbu 'be'a mam bu ja rá t'ohni Oją xín rá ts'edi Oją guí pąhmbu. ²⁵Nu'bu bi dambeni u xun du him man ja ran sini bu pegue dim 'butho yu ja'i tengu yúm 'bɛhni Oja 'bupu mahɛts'i. ²⁶Nɛ nu'a ram hma ngue da dambeni u xun du, majuani a ne guin nuhu bu ja rám hman Oją ngue nu'bu min yaui Oja ra Moisés bu ja ra t'uza bi 'yɛmbi: "Nugä drá Ojagä, nu ra Abraham ne ra Isaac nε ra Jacob ngue nim bombøtahu, i ęc'yeigui," bi 'yen Oją. 27 Ngubu bi ma nguetho guexta'a i 'buh yú mbui u. Pe hin guím bemhbu, nguetho 'dan'yo thoho guí mamhbu, bi 'yɛn a ra Jesús.

Rán t'edi Oja man'da ja ts'editho

²⁸Nu'bu min yahu yu saduceo ra Jesús, mi 'bupu n'da ra xänbate nija bi 'yøde 'bɛ'a bi man ra Jesús nɛ bi badi ngue xun ho a bi ma. Janangue'a bi 'yänni:

—Nda'a rán t'ɛdi Oją ngue man'da ja ts'ɛditho ga øthʉ, bi 'yɛ̞n'a.

²⁹⁻³⁰Bi dą'a ra Jesús:

—Nu'a rán t'ɛdi Oją man'da jats'ɛditho ga øthʉ, gue'a ran t'ɛdi ngue i ɛna: "Dami 'yøhmbʉ gyʉ́ ją'i israelhʉ, nu'a Oją ra Hmu, n'datho a. Nɛ guim bɛmhbu a nangue gätho ni mbuihu, nɛ gätho ni tehu, nɛ gätho ni tehu, nɛ gätho ni tyomfɛnihu, nɛ gätho ni ts'edihu," i ɛn rá t'ohni Oją. Pɛ guehna ran t'ɛdi man'da ja ts'edi tho ga øthu, bi 'yɛn'a ra Jesús. ³¹Nɛ 'da'angutho ui ná yoho ran t'ɛdi ga øthu i ɛna: "Gui huɛc ni mija'ihu tengu bu gnin huɛc zɛhɛhu," i ɛn rá t'ohni Oją. Guehya yun t'ɛdi man'da ja ts'ɛditho ga øthu xinda gue u mi'da, bi 'yɛn a ra Jesús.

³²Νε nu'a ra xänbate niją, bi 'yεm buya:

—Xänbate i, majuani xun ho guím ma, ngue hønt'a n'da Oja i 'bui ne njo'o man'da tengu a. Ne ja ts'edi tho da ben Oja n'da ngue gätho rá mbui, ne gätho rá te, ne gätho rán 'yomfeni, ne gätho rá ts'edi, ³³ne di huec rá mija'iui tengu bu nin hueczehe n'da. Man'da ja ts'editho da 'yøt'a n'da u xinda gue u gätho yu 'bøts'e ne yun t'unni dí mbøspa Oja n'da, bi 'yen a ra xänbate nija.

³⁴Nɛ nu ra Jesús 'bu mí 'yø a bi man ra xänbate niją bi bądi ngue n'dat'a Oją im bɛni janangue a bi 'yɛmbi:

—Nu'i ts'utho di 'bε i ngue da zä gui curpu di manda rá ts'εdi Oją, bi 'yɛ̞mp'a.

Nε nubʉya njom man'da bi zäpi da 'yän mi'da yʉn t'änni.

To'o gue rá Ts'unt'u a ra Cristo

³⁵⁻³⁶Nε mí xänba yʉ jạ'i a ra Jesús bʉ ja ra dạnija, nε bi 'yɛmp'ʉ:

—Hanja ɛn ʉ yʉ xänbate niją ngue nu ra Cristo rám bom'bɛto ra David a, nɛ xim mi ɛmbi rá Hmu 'bʉ hin ním 'bʉi, nguetho mi ɛn'a ra David:

Nu'a Oja bi 'yɛmp'a ma Hmu:

"'Dat'ua ga huhmi ga conhui ma ts'ɛdi

gue'bu go dá tąpä nin suihu ua ja ra ximhäi

nɛ gui manda u buya,"
bi t'ɛmp'a ma Hmu, bi 'yɛn a ra
David 'bu mí bɛnba rá Hogandahi
Oja nangue 'bɛ'a da 'yøt' ra Cristo.

37 Guesɛ ra David bi 'yɛmbi rá Hmu
a ra Cristo. Hague nja pɛ nɛ rám
bom'bɛto a, bi 'yɛn a ra Jesús.

Pε nu yʉ ją'i, bi 'yømanho gätho a bi man ra Jesús.

Ra Jesús bi ma 'bɛ'a i øt'ʉ yʉ xänbate nija

³⁸Nɛ bi thoqui bi xänba yʉ jạ'i a ra Jesús bi 'yɛmp'ʉ:

—Gam fähmbu nangue a i xi ahu yu xänbate niją, nguetho hønt'a ran 'yɛts'i i øt'u nɛ di ho da hye yu pahni xu mba guepu i 'yo, nɛ di ho da mba ma zɛngua bu ja yu täi, ³⁹nɛ di ho da hyux bu ja yun thuts'i xun ho bu ja yu niją, nɛ di ho yú mbudi din sihmɛ bu ja yun sihmɛ u, ⁴⁰nɛ i haspi 'bɛ'a gätho bi ts'ocpa u yu xisu xøn du yú ndø, nɛ sä nya'a thoho in yahu Oja ngue i nde da t'ɛmbi xun ho tho yú mbui. Man'da xun ngu ran unbi da nu ya, bi 'yɛn'a ra Jesús.

Ran t'unni man'da di muui bu na nu Oja

⁴¹Nɛ mi hupu ra Jesús bu mí ja ra huada guepu i pa njät'i ra mbɛti rán t'unni Oją. Nɛ in nu bu i cät' ra mbɛti u yu ją'i bu ja ra huada. Nɛ bi nu xun ngu yu mɛmbɛti bi thopu ngue xun ngu ra mbɛti bi gärpu ja ra huada n'da ngu n'da u. ⁴²Nɛ bi zøm bu n'da ra hyoya xisu xi du rá

ndø, nε bi gät'i yocentavo thoho.

43 Νε nu'bu mi nu a bi 'yøt'a ra xisu
buya nε bi 'yɛ̞mp'u:

—Majuani dí xi ahu nuna zu hyoya xisu man'da xun ngu di muui a bi gärpu ja ra huada xinda gue'u gätho mi'da. ⁴⁴Nguetho gätho u mi'da bi gät'a i pongui, pε nuna ra xisu madague i hyoya na, pε bi gät'i gätho mi pε'ts'i, bi 'yεmp'u yú xädi a ra Jesús.

Ra Jesús bi ma ngue da mba nso't'i ra danija

Nu'bʉ mi bøm bʉ ja ra danija ra Jesús nε yʉ́ xädi, nu'a n'da bi 'yɛ̞n'a:

—Xänbate i, hyandi ts'u nu ra niją, ɛmmɛ xu ndoho yu do n'yohu nɛ ɛmmɛ mahotho.

²Mi dah ra Jesús ne bi 'yemp'u:

—Guín nuhu ngue mahotho ne emme ndoho yu do, pegue da zøn ra pa da so't'i, bi 'yemp'u.

Yú hmepya ngue rán zegui

³Nɛ nu'bʉ mi zøm bʉ ja ra nyuni Olivos, bi hyupʉ ra Jesús, hɛ̞'t ra danija. Nɛ hønt'ʉ yʉ́ xädi mi 'bʉhmbʉ bʉ. Nɛ nubʉya ra Pedro nɛ ra Jacobo nɛ ra Xuua nɛ ra Andrés:

⁴—Nda'a ní pa da mba nso't'i ra niją gá xije, bi 'yɛn ʉ. Nda'a ni hmɛpya da hnu 'bʉ din ja a guím ma, t'ɛ̞mp'a ra Jesús.

Mi da a ra Jesús ne bi 'yemp'u: —Gam fähmbu njon da hyä ahu, nguetho xun ngu ba ehe ngue sä da 'yena: "Nugä, guecä drá Cristogä," da 'yen'u. Ne xun ngu u da hyät'i.

⁷Nɛ nu'bʉ gui 'yøhmbʉ yʉ sʉi nɛ'bʉ da hma ngue din ja yʉ sʉi, o guin suhu nguetho jatho din ja u. Pɛ nu'bu din ja u xinga gue'bu ran zɛgui 'bu. ⁸ Nguetho nu yu ja'i bu 'da yu häi din suhmi yú mija'ihu. Nɛ nu 'da yu ts'ut'abi din suhmbu yú mits'ut'abihu, nɛ din ja yu 'yanhäi, nɛ xun ngu yu nidi din ja ra thuhu nɛ yun 'yo'ts'i. Nɛ guehya yú mbudi yun unbi ya, bi 'yɛmp'u.

⁹Nε xø bi 'yɛn'a:

—Nε gam fähmbu njon di 'uec'ahu bu ja rá 'yu Oją, nguetho da mba ma dä ahu bu ja ran juanbate, nepu ja yú niją ma mijudíohu da 'bεp'ahu, nε nangue guí εc'yεigahu da ts'on'nahu bu 'buh yu ts'ut'abi, nepu 'buh yu dats'ut'abi ngue da ts'ep'ahu. Ne xun ho 'bu din jabu nε gue'a dí zä gui xihmbu mam hmangä u. ¹⁰Pe m'bet'o thoho da mba nsifi gätho yu ja'i 'bucua ja ra ximhäi ran ho ma'da'yo dí pø u. 11 Nε nu'bu da zix ahu di dä ahu bu 'buh ra ts'ut'abi, pε him 'bε gui hyonsehu 'be'a gui mamhbu 'bu da mba ma juan'ni ahu, nguetho nu'bu bi zøn ra ora da t'än'nahu, hønt'a rá Hogandahi Oja da zä di ben'nahu 'be'a gui mamhbu. 12Ne nu n'da ran 'yohu di manda da tho rán 'yohu, nε nu'a rá ta di manda da tho rá ts'unt'u. Ne da ndants'u yú ts'unt'u din tunhdu u yú ta ne yú mbe ne di manda da tho rá ta ne rá mbe 'da yu ts'unt'u. ¹³Ne gätho yu ja'i da zan ahu nangue a guí ɛc'yɛigahu. Nε nu'ʉ to'o gätho da hyät yʉn ʉnbi gue'bu go rán zegui, gue u dim pø u, bi 'yemp'u.

¹⁴Nε bi thoqui bi xi u:

—Ba ε a n'da ra ts'εdi xʉn ts'o ngue di ts'oni gätho. Ngubʉ bi man ra Daniel gue rá pøngahyą Oją. Νε SAN MARCOS 13 98

nu'bu gá nuhu dim 'bäpu guepu hin rán säui dim 'bäi, dami 'dahmbu gyú menguhu bu Judea, gui mbähä bu ja yu t'øhø guin 'yamhbu bu. Nu a to'o da nu ra søcua i ja ua, da 'yɛ't'ambui na. 15 Ne nu'bu bin ja a, to'o i 'bäpu goxthi hin da yurpu mbo rá ngu, hin da bɛni ja 'bε'a 'bε da hyats'i, 'bex gue da 'dagui. 16 Ne nu'a to'o 'bäpu ja yú huahi hin da mbeng bu ja yú ngu ngue ba ca yú coto, 'bex gue da 'datho bu. ¹⁷Huɛcate u yu xisu in hat'uhni ne u 'buh yú 'uere yu pa u. 18 'Yäfu rá mate Oja ngue hin din ja ahu ran 'dagui 'bu yu pa xun se xøhma hin da zä gui 'dahmbu. ¹⁹Ne nu'u yu pa u, din ja xun ngu yun unbi hin jam'bu n'dandi xøn ja gue'bu go rá mbudi ra ximhäi. Ne nu'bu ya bin ja, him man'dandi din ja yun unbi tengu u. ²⁰Pe nangue u yú 'yεc'yεi, Oja di japi hingui ngu yu pa din ja yun unbi, nu'bu hin'na njon xtam bongui, bi 'yεn a ra Jesús.

²¹Nɛ bi thoqui bi ma, bi 'yɛna:

—Nε nu'bu da si ahu: "Dami hyanthu, 'bucua ra Cristo ya, rá Thahni Oją," da t'ɛn ahu. O gue da t'ɛn'ahu: "Ba nuhu 'bupu ra Cristo ya, rá Thahni Oją," da t'ɛn ahu, pɛ o guí εc'yɛihu. ²²Nguetho xun ngu dim 'bu u yu hyäte Cristo nɛ yu hyäte pøngahyą da 'yøt' yu hyonya nt'øt'e nguetho i nde da hyät yu 'yɛc'yɛi gue bi huanh Oja, 'bu da zä da hyät'u. ²³Pɛ nde'bu gam fäsɛhu nguetho ya dá xi ahu 'bɛ'a gätho din ja m'bɛjua, bi 'yɛn a ra Jesús.

Nu'a din ja 'bu bi zøcua mahøn'a ra Jesús

²⁴Νε xø bi 'yεmp'ʉ yʉ́ xädi a ra Jesús: —Nɛ nu'bu ya bi guah yun unbi, nu a ra hyadi di 'bɛh rá ts'ɛdi nɛ ra zana him man ja rán nɛqui. ²⁵Nɛ nu yu sø da dägui. Nɛ gätho mi'da di 'bɛh yú ts'ɛdi u gä bí ja bu mahɛts'i, di 'yani. ²⁶Nɛ nubuya da hnugui ba ɛcä ua ngue dán ja'igä ua ja ra ximhäi, ba ogä bu ja yu güi, dan 'yo'be xun ngu ma ts'ɛdi nɛ dam mixte xun ho. ²⁷Ga pɛn'du yúm 'bɛhni Oja mahɛts'i buya, di pɛt'u gätho xtá huahni guecua gätho na nguni ra ximhäi, bi 'yɛn'a ra Jesús.

²⁸Nuya da zä gui pahmbu 'bɛ'a gue nin t'uti i ut'ahu 'da yu za.
Nu'bu bi bøx yú 'dogui u yú 'yɛ guí pahmbu mi ts'utho din ja ra hyethe buya. ²⁹Ngutho 'bu ya bin ja gätho u dá xi ahu, gui pahmbu ngue mi ts'utho ba pengä ua mahøn'a buya, bi 'yɛna. ³⁰Majuani dí xi ahu di 'butho ua 'da ahu 'bu bi mbudi din ja a dí xi ahu. ³¹Mahɛts'i da guadi, nɛcua ja ra häi, pɛ nu'a mam hmangä hin jam'bu da gua a.

³²Pɛ nu'a ra pa a, njongui padi 'bɛ'a ní ora din ja a dím mangä, xinga gue u yúm 'bɛhni Oja 'bupu mahɛts'i, xinga guecä ngue dán ja'igä ua ja ra ximhäi dí padi. Hønt'a Oja ma Ta i padi, bi 'yɛn a ra Jesús.

³³Nɛ xø bi 'yɛna:

—Thocpa thoho gan nuhmbu tengu'bu hin gui tonspahu ra t'aha. Nε xinga n'da zi ora gui pumbɛnihu Oja nε thocpa thoho gan yahu a, nguetho hin guí pahmbu nda'a ni pa ba pengä mahøn'a. ³⁴Tengu n'da ran 'yohu bi mba yatho bi zoh rá ngu, bi un yún t'ɛdi yú 'yɛhɛ ngue di jamansu bu, n'da ngu n'da bi xi a da 'yøt'e. Nε bi xi a ra mbängoxthi

ngue hin di tonspa ra t'aha. ³⁵Nɛ ngutho dí xi ahu, dami tømhbu tengu 'bu gan äthahu nguetho hin guí pahmbu 'bɛ'a ní pa ba pengä ua, o gue'bu bin de, o gue'bu made ra xui, o gue'bu bi mbah yu øni, o gue'bu bi hyats'i. ³⁶Nguetho hin guí pahmbu nda'a ni ora ba ɛcä, xi'bu ba ɛcä nɛ ga tin ahu bu gdi ahmbu. ³⁷Nɛ nu'a dí xi ahu, ngutho dí xicä gätho mi'da: "Dami tømhbu," bi 'yɛmp'u yú xädi a ra Jesús.

Yú ngurbi yu judío i nde 'bex gue da bɛnt'a ra Jesús

Nε man yopa da dät ra pa 'bu mi bɛn a xí 'yøt' ma mbombøtahe bu Egipto dyu judíohe. Nu yu ngurpa mbäją buya nε yu xänbate niją bi bɛni 'bɛ'a ni fɛhni da xi a ra Jesús guepu da zä da bɛnt'i ngue da hyo. ²Nε bin 'yɛmzɛhɛ u:

—Hinga gue a ra pa ra dampeti gam benthu ne xøhma din cue yu ja'i, bi 'yen u.

N'da ra xisu bi naspa ra 'ygthi rá yą ra Jesús

³Nɛ mi 'bupu ra Jesús bu ja rá ngu ra Simón bu ja ra hnini Betania. Gue'a ra Simón mi hɛmb ra t'axca'ya 'bu mam 'bɛt'o. Nɛ nu'bu mi sihmɛ bu ra Jesús bi zøpu n'da ra xisu i tu n'da ra xito nt'øt'e ngue ra do'yaxi, mi po ra 'yɛthi ɛmmɛ yuman'u a, nɛ xun ngu di muui a. Bi xɛcpa rá nde buya nɛ bi naspa rá ya ra Jesús. ⁴Nu'u 'da mí 'bupu, bin cuɛ u buya nɛ bi 'yɛn u:

—Hanja bim 'bɛtho ra 'yɛthi nɛ xum hmadi di muui. ⁵Mi sä xtá 'bä xtin t'un yu hyoya a hyu ciɛnto rá muui a ra 'yɛthi, bi 'yɛn u. Nε bi numan'ʉ ra xisu ʉ. ⁶Nε nu ra Jesús bi 'yɛ̞mp'ʉ:

—Hanja guín jahu bu, o guidi pahmbu ra xisu nguetho xun ho bi 'yørcä na. ⁷Nu'ahu thocpa thoho gam 'buhmbu yu hyoya nɛ hønt'a go ma pa da zä gui fäxhu u. Pɛ nugä hinga thocpa thoho dam 'buhmbu. ⁸Bi 'yørca ra xisu a mi sä da 'yøt'e, bi hoga ma ngøc'yɛi ngue da t'ägä bu ja ran 'yägui. ⁹Majuani dí xi ahu gue hønbu go hapu da hman ran ho ma'da'yo gätho na ndoho ra ximhäi, nɛhna bi 'yørca ra xisu da hman na, 'dahma nɛ'a da fɛn a, bi 'yɛn'a ra Jesús.

Ra Judas im ma di dä a ra Jesús

10 Nu'a ra Judas Iscariote buya, ngue'a n'da yú xädi ra Jesús, bi mba bu 'buh yu ngurpa mbäją bi xifi di däp'a ra Jesús. 11 Nε bi hyu yú mbui u yu ngurpa mbäją nε bi xifi di un ra mbεti. Nε bi mbenc'a ra Judas buya mi honi jąm'bu di dä a ra Jesús.

Bin sihmehu ra Hmu u yú xädi

12 Nu rá mbudi ra pa ra dąmpeti ngue ran dąbaxjua i ts'i ra thuhme hin'yu rá ixi, ne i ho ra t'ude'yo. Ne nu yú xädi ra Jesús bi 'yembi:

—Hapu guí ndeje ga hoje ran ts'ihmɛ ra mbaxjua ga sihu, bi 'yɛ̞n u.

¹³Nɛ nubuya bi xi u yoho yú xädi: —Ni mbɛ bu ja ra dahnihni Jerusalén, nɛ nu'bu gá nuui bu n'da ran 'yohu i tu n'daxaro ra dehe gui tɛnui bu da zøni. ¹⁴Nɛ nu'bu gá sømhbu gui 'yɛnui a ra mɛngu bu: "Nu'a ra Hmu bá pɛngähe ngue ga än'nahe hapu i ja a ra cuarto ngue ga sihe ran ts'ihmɛ ra mbaxjua," gui 'yɛ̞nui. ¹5Nɛ nu'a bʉya da 'yut'aui n'da ra cuarto i ja bʉ maga̞ts'i xʉn ndoho nɛ mahoqui. Guepʉ ja gui hocui bʉ a ran sihmɛ ga sihʉ, bi 'yɛn'a ra Jesús.

16 Bi mba yú xädi buya ne bi zøm bu ja ra dahnihni Jerusalén ne bi dim bu gätho 'be'a xi sifi. Gätho bi hocpu 'be'a da zi bu 'bu bin de, ne bi mbeng bu 'buh ra Jesús buya.

17 Nu'bu min de ts'u, bi mbähä ra Jesús 'de'mayoho yú xädi buya.

18 Gätho bin sihme u. Ne nu ra Jesús bi 'yemp'u:

—Majuani dí xi ahu, dí sihmehu ua n'da gue di dägä, bi 'yemp'u.

¹⁹Nu yú xädi buya bi du yú mbui, n'da ngu n'da bi 'yänni:

—Ha guecä, bi 'yɛn'ʉ.

²⁰Nɛ nu'a ra Jesús bi dąt'ʉ:

—Go gue'a n'da gue gue'ahu guí 'dɛ'mayoho ahu gue dí comh ma mbohi'be. ²¹ Majuani nugä ngue dán ja'igä ua ja ra ximhäi, ga tugä tengu nt'o't'i nanguecä. Pε í huɛhi maha a ran 'yohu ngue di dägä. Man'da xun ho 'bu hin xtim 'bu a, bi 'yɛn a ra Jesús.

²²Gätho na sihmε ʉ bi hyąc man'da ra hmε ra Jesús, bi un ra jamadi Oją, bi xεni nε bi darpa yʉ́ xädi bʉya.

—Dami sihu na. Guehna nam bøn'a ma ngøc'yɛigä na, bi 'yɛ̞mp'u.

²³Nε bi dεc'a ra vaso mi po a nzại mi si θ. Bi un ra jamadi Oja nε bi un'dθ bθya, bi zi n'da ngu n'da θ.

²⁴—Guehna tengu 'bu ma jigä na, i øt' ra 'da'yo nhogui, dim fäni dí yanba yú te yu ja'i 'bucua ja ra ximhäi. ²⁵Majuani dí xi ahu, hin ga si man'da ra gui uva ja gue'bu bi zøn ra pa ga si ma'da'yo bu di manda rá ts'ɛdi Oją, bi 'yɛn a ra Jesús.

Jesús bi bądi gue a ra Pedro da gøn'a

²⁶Nε bin tu a n'da rá thuhu Oją u buya. Bi bøm bu mi sihmε u nε bi mba bu ja ra nyuni Olivos. ²⁷Nε nu ra Jesús bi 'yɛ̞mp'u yú xädi:

—Nu'ahu dí pạcä ngue gui 'dahmbu, gui sogahu nán xui ya, tengu nt'o't'i bu ja rám hman Oją i ɛna: "Ga ho ra mbändɛ'yo nɛ din 'uɛxt'u yú dɛ'yo," i ɛm bu ja rá t'ohni, bi 'yɛna. ²⁸Pɛ nu'bu dá thạmbɛnigä dan timhbu bu Galilea, bi 'yɛmp'u yú xädi a ra Jesús. ²⁹Nu'a ra Pedro bi 'yɛn'a:

Madague a gätho da ldak

—Madague a gätho da 'dah ya 'da, pε nugä hin ga soc'i'i.

30 Nu ra Jesús bi dą'a buya:

—Hąha, dí pacä 'bɛ'a gui 'yøt'a ra xui jabʉya, ná hyundį xqui cøngä 'bʉ bi mbah ná yondį ra øni, bi 'yɛn a.

³¹Pε nu'a ra Pedro man'da nts'εdi bi 'yεn'a:

—Nugä hin ga cøn'a i madague'bu 'darpu ga tuui, bi 'yɛmbi.

Nε 'da'angu bi ma gätho ʉ mi'da yʉ́ xädi bʉya.

Ra Jesús i tu rá mbui nε gue'a ra ora da nu yun unbi a

³²Nε bi yʉrpʉ ja ra nuądøni Getsemaní guepʉ ja ra nyuni Olivos. Nu ra Jesús bʉya bi 'yɛ̞mp'ʉ yʉ́ xädi:

—Hyuhmbu ua gätho ahu, 'bɛ dán yagä'be Oja ua nan jongua ts'u, bi 'yɛ̞n'a.

³³Nε nubuya bi zixa ra Pedro, nε ra Jacobo, nε ra Xuua. Nε nu ra

Jesús ɛmmɛ bi hyundumbʉi nɛ bin su. ³⁴Nɛ bi 'yɛ̞mp'ʉ:

— Еттє tu ma mbui, єпа da hyog ra dumbui. Gui cohmbu ua пє gan äthąhu, bi 'yєтр'u.

³⁵Nɛ bi mba bʉ njom bʉ ts'ʉ. Bin dạnyahmu bʉ ja ra häi bin yaui Oja, gue'bʉ da zä hin da nu ran ʉnbi a da nu. ³⁶Nɛ bi 'yɛna:

—Ma Ta i, hin te guí hεmbi, gätho da zä gui 'yøt'e. Dami 'uegä a ran unbi. Pε hin dín nde gue gue'a ma pähä zεhε ga øt'ä pε gue'a go guí nde da t'øt'e, bi 'yɛna.

³⁷Nε bi mbeng bʉ xi go ʉ hyu nε bi 'yɛ̞mp'a ra Pedro:

—Hague grá Simón, ha guí aha. Ha hingui sa xquin atha n'da ora. ³⁸Damin athahu ne gui 'yafu Oja ngue gui serbahu 'be'a di ben'nahu ra zithu. Nu rá mbui n'da ja ra pähä nangue ran ho, pe nu rá ngoc'yei n'da xun güent'i a, bi 'yen a ra Jesús.

³⁹Nɛ bi mbeng mahøn'a ra Jesús bin yaui Oja nɛ guexta'a bi xifi. ⁴⁰Nɛ nubʉya bi mbeng bʉ bá co ʉ hyu nɛ bi dim bʉ i aha nguetho ɛmmɛ mí ndet'aha ʉ. Janangue nu'bʉ mi zo ʉ hingui padi 'bɛ'a dí da ʉ. ⁴¹Ná hyundi bán yaui Oja, 'bʉ mam bá pengbʉ bá co ʉ hyu, nɛ bi 'yɛmp'ʉ:

—Ahmahu ya, damin säyahu ya, bi 'yɛn'a. Nuya bi zøn ra ora ngue da mba ma dägä bu 'buh yu ts'om'bäi, nugä ngue dán ja'igä ua ja ra ximhäi. 42 Dami ndanshu, ga mbähä dan c'athu a di dägä, ya häntua, bi 'yɛmp'u yú xädi a ra Jesús.

Ra Jesús bi bent'u yún suihu

⁴³Gätho ná yąhu yú xädi 'bex bi zøm bu ra Judas, gue'a n'da rá xädi. Nɛ xun ngu yu ja'i bi zix'a, mi ha yu juai nɛ yu ts'at'ɛgui. Nɛ gue'u yu yu 'bɛhni yu ngurpa mbäja nɛ yu xänbate nija nɛ yu dac'yɛi. 44 Nɛ nu'a ra Judas ya xí xi u: "Nu'a ga suspa rá 'yogu gue a ra Jesús a, 'bex guim bɛnthu buya nɛ gui sixhu, nɛ hin gui thøhmbu," xi 'yɛmp'u min 'yohu. 45 Janangue a nu'bu mi zøpu mi 'bäh ra Jesús:

—Xänbate i, xänbate i, bi 'yɛmbi. Nɛ bi zuspa rá 'yogu. 46 'Bex bi bɛnt puya. 47 Nɛ 'bex bi c'o'ts' rá juai a n'da min 'yohu ra Jesús nɛ bi zɛcpa rá zagu rá 'yɛhɛ ra dambäja. 48 Nɛ nu ra Jesús bi 'yɛmp'u bi bɛnt'i:

—Ha guí εmhbu drá bεgä ngue guá hạhu ni juaihu nε ni zahu ngue gui bɛntcahu. ⁴⁹ Gätho yu pa dám 'buhmbu, dá xän'nahu bu ja ra dạnija nε hin gá bɛntcahu bu. Pɛ ja xi jabu thoho, ngue din ja a nt'o't'i bu ja rám hman Oja ngue mi hma din ja, bi t'εmp'u yúm 'bɛhni yu mbäia.

⁵⁰Pε nu'ʉ yʉ́ xädi bʉya gätho bi 'dagui, bi zopʉ a ra Jesús.

Ra ts'unt'u ngue bi 'dagui

⁵¹Hønt'a n'da ra ts'unt'u bi dɛn'na 'bu mi ts'ix a ra Jesús, dim pät'a ra the'bø't'e, nε mí εn u nε'a xtám bɛnt'a. ⁵²Pε nu'a hønt'a ra the'bø't'e bi bɛntpa a, nε bi 'dah puya nε bin 'yo mánxi bu ní mba.

Ra Jesús bi mba ma dä bu 'buh yu mbäją

⁵³ Nu'bu mi mba ma dä bu 'buh ra dambäja, bim peti u ma ngurbihe ngue yu ngurpambäja ne yu dac'yei ne yu xänbate nija. ⁵⁴ Ne nu ra Pedro bin tɛt'i, i 'bɛjua thoho bu ni mba, gue'bu go mi zøm bu mbo rá mbä't'i rá ngu ra dambäja, nɛ bi hyuhmbu bu u yu asmayo nija, bin taṣpihu u. ⁵⁵Nu yu ngurba mbäja nɛ gätho u mi'da i øt' ran juanbate, mi honi to'o da ma xun ho 'bɛpu dí yap'a ra Jesús ngue da hyo, nɛ madague'a xun ngu u bin ya pɛ xinga n'da u bi ma njuantho. ⁵⁶Xun ngu bi man yu fɛhni pɛ him bin tin yum hma. ⁵⁷Xø bi ndants'u 'da mahøn'a bi zänba man'da ra fɛhni u, nɛ bi 'yɛn u:

58—Nuna ran 'yohu bi ma nɛ bi 'yɛna, "Nugä ga yø't' ra niją ua, nt'øt'e yú 'yɛ yu ja'i, nɛ nu'bu ná hyupa ga høcä n'da ngue hinga nt'øt'e yú 'yɛ yu ja'i," bi 'yɛnna ran 'yohu, nɛ nugähe dá øhmbe 'bu mí 'yɛnna, bi 'yɛm buya.

⁵⁹Pε xinga gue'ʉ bin tịn ʉ yፏm hman ʉ. ⁶⁰Pε nu ra Jesús bin hɛtho. Njo'o to bi dạti. ⁶¹Nu'a ra ngʉrpa mbäją bi 'yän mahøn'a:

—Ha gue'e grá Cristo. Ha gue'e rá Ts'ʉnt'ʉ i Oją nui̯xte rá ts'ɛdi.

62 Nu ra Jesús bi dati:

—Guecä, nɛ guin nujʉ, nugä ngue dán ją'igä ua ja ra ximhäi, ga com'be rá ts'ɛdi Oją madą rá ts'ɛdi. Nɛ guin nujʉ 'bʉ bá pengä, ba ɛcä bʉ ja yʉ güi, bi 'yɛ̞n'a ra Jesús.

63 Pε nu'a ra dambäja bi dunse rá pahni, εmbi hingui εspa Oja ra Jesús nangue a bi ma. Nε bi 'yɛm buya:

—Ya hin ga homhbu mi'da yu testigo, ⁶⁴nɛ dá øhmbu ya ngue hingui ɛspa Oja na ran 'yohu. 'Bɛ'a guí mamhbu ga ørpahu ya, bi 'yɛn a ra dambäja.

Nε gätho 'da'angu bi man ʉ ngue di un ran ts'ɛmbi ngue da hyo.

65 Nu'u 'da buya bi zox'a ra Jesús, ne bi gorpa rá dä, ne bi mbe'mi ne bi 'yɛmbi, "Grá pøngahya, man ya, to'o bi mbep'a'i," bi 'yɛn u. Ne nu yu asmayo bu nija ɛmme bi mbemp'a rá hmi.

Ra Pedro bi gøn a ra Jesús

⁶⁶Nu'bu mim 'bäpu ra Pedro bu mbo ra mbä't'i, bi thopu n'da ra xisu ngue rá 'yɛhɛ ra dambäja. ⁶⁷Nε bi nu'a ra Pedro din taspi, bi hyɛ't'i nɛ bi 'yɛmbi:

—Ęna nɛ'e gmín 'yohu ra Jesús ra mɛngu bu Nazaret, bi 'yɛ̞mp'a ra Pedro.

⁶⁸Pε nu'a ra Pedro bin cøni.

—Hin dí pądi 'bɛ'a nam bøn'a guím ma, bi 'yɛ̞n a ra Pedro.

Nɛ bi 'uegue bi mba bu hänt ra goxthi. Nɛ bi mbah ra tamfø buya. ⁶⁹Ná ya'a ts'u buya xø bi thopu ra 'yɛhɛxisu bu 'bäh ra Pedro, nɛ bi 'yɛmp'u 'bupu:

—Nuna ran 'yohʉ, min 'yohʉ ʉ mi tɛn'na ra Jesús.

70 Pε nu'a ra Pedro bin cøni mahøn'a. Ná ya'a ts'ʉ bʉya, guesɛ ʉ mí 'bʉpʉ mi 'bäh ra Pedro bi 'yɛn ʉ:

—Majuani guín 'yohu u nguetho grá mɛngu Galilea nε 'da igu bu gná yahu u, bi t'ɛmp'a ra Pedro.

⁷¹Nu'a ra Pedro buya bi 'yɛmp'u:

—Nu'bu him majuani dí xi ahu, Oja da zegbä, janangue dí xi ahu, hin dí pacä a ran 'yohu guí mamhbu, bi 'yen a.

72'Bex bi mbah ná yondị ra tamfø buya. 'Bex bi bɛn a ra Pedro 'bɛ'a xí xih ra Jesús ngue xí 'yɛmbi: "Dí pacä ngue ná hyundị xqui cøngä 'bu bi mbah ná yondị ra øni," xí 'yɛmp'a ra Jesús. Nɛ nu'bu mi bɛn a xí 'yøt'e, bi du rá mbʉi ra Pedro nε 'bex bin zoni.

Ra Jesús bi mba ma dä bu buh ra ts'ut'abi ra Pilato

Nu'bu t'uxudi tho, nu yu ngurba mbäja ne yu dac'yei ne yu xänbate nija ne gätho u mi'da ma ngurbihe dyú judíohe, bin yase u. Ne nubuya bi zix a ra Jesús ngue di däp'a ra Pilato. Bin tha't' 'bu mi zits'i. ²Ne nu ra Pilato bi 'yän'na ra Jesús:

—Ha gue e grá hmuts'ut'abi yu judío, bi 'yɛ̞mp'a.

Bi da a ra Jesús:

—Gue'a guím ma, bi 'yɛna.

³Nɛ nu yu ngurpa mbäja ɛmmɛ bi yapi. ⁴Janangue a nu ra Pilato bi 'yän'na ra Jesús mahøn'a, bi 'yɛmbi:

—Hanja hin ni thątya i di yąpi'i. Nε xʉn ngu 'bɛ'a gätho i xi'i, bi 'yɛ̞mbi.

⁵Pε nu ra Jesús guexta'a him bi dąt'a ra Pilato. Janangue'a nu ra Pilato bi hyonya thoho.

Ra Jesús bin t'un ran ts'embi ngue da du

⁶Nu'a ra pa ram pɛti ra mbaxjua, zai di thø a n'da ra ofädi ra Pilato hønt'a go nda'a da man yu ja'i. ⁷Nɛ min ofädi n'da ran 'yohu i Barrabás, 'darpu mi ofädihu u 'da'ingu bi 'yothu ngue bin hote u, bi dum'ma n'da ra sui. ⁸Nu'bu mi zøh yu ja'i xun ngu bu mi 'buh ra Pilato, nu'u bi xih ra Pilato di thøcpa n'da ra ofädi tengu nzai bi 'yot' 'bu ra pa ram pɛti. ⁹Janangue a nu ra Pilato bi 'yɛmp'u:

—Ha gue'a ni hmuts'ut'abihu gyú israelhu, gyú judíohu, ga thoc'ahu, bi 'yɛmp'u.

¹⁰Nguetho mi pąh ra Pilato di seya thohoba ra Jesús yu ngurpa mbäją 'bu mi däp'a. ¹¹Pε nu yu ngurpa mbäją bi parpa yu ją'i gue'a ra Barrabás da 'yäh yu ją'i. ¹²Nu ra Pilato xø bi 'yɛ̞mp'u mahøn'a:

—Xina ni hmuts'ut'abihu, gyú israelhu, gyú judíohu, 'bɛ'a ga ørpä na buya, bi 'yɛn'a.

¹³Nu yu ją'i buya nts'edi bi 'yen u:
 —Go gui cuarpu ja ra pont'i na ra
 Jesús.

¹⁴Pε nu ra Pilato bi 'yɛ̞mp'ʉ:

—'Bɛ'a gue man ts'o хн 'yøt'na, bi 'yɛmp'н.

Ne nu'u yu ja'i man'da nts'edi bi 'yen u:

—Go cuarpu ja ra pont'i na, bi 'yɛn u.

¹⁵Nu ra Pilato bi nde da 'yørpa rá pähä yʉ ją'i, janangue guehma go bi thøcpa a ra Barrabás. Nε bi manda da mba m'bεi a ra Jesús nε da mba ma cuati bʉ ja ra pont'i.

¹⁶Nu yu dofui buya, bi zixa ra Jesús bu mbo guepu ja yún säya yu dofui, ne bi zo u gätho yú mindofuihu 'bupu. ¹⁷Ne bi mba ma hete n'da ra pahni xun jupoi a ra Jesús ngue tengu he yu ts'ut'abi, nε nts'εdi bi mba ma huspi n'da ra corona á m'be yu 'yu'uini nguetho bi den thoho. ¹⁸Ne bi zengua u nε bi 'yɛnspa yú biba u: "Damim 'bumanho gra hmuts'ut'abi yu judío," bi 'yɛmp 'bu mi denthoho. ¹⁹Ne bi despa rá yą yʉ za ne bi zots'i, ne bin danyahmu, ena i thande pegue bi denthoho. ²⁰Nu'bu mi jua'a bi denni bi tonspa a ra pahni xun jupoi nε bi het'a rá pahni zehe. Bi guc puya ngue bi zits'i da 'døm'pu ja ra pont'i.

SAN MARCOS 15 104

Ra Jesús bi mba ma cuati bu ja ra pont'i ne bi du

²¹Ne nu'bʉ mi mba bʉ 'yu, bin c'athu ra Simón, ra mengu bu Cirene, rá ta ra Alejandro ne ra Rufo, bí 'yɛ a huahi a. Nɛ nu yʉ dofui buya bi 'yørpa ra ts'edi a ra Simón da duspa rá pont'i a ra Jesús. ²²Ne guepu ja ra nyuni Gólgota ní ts'ixa ra Jesús. Nu'a Gólgota in nde da ma "ra Nyuni Yaxmu." ²³Νε nu'bu mi zøm bu, bin t'un ra vino ngue ma uants'i n'da ra 'yethi xun ju a ra Jesús. Pε nu'a him bi zi a. ²⁴Νε nu'bʉ mi 'døm'pʉ ja ra pont'i buya, nu yu dofui bi 'yøt'a n'da ran taha u nangue yú he ra Jesús ngue i nde da badi nda'a ní 'bø't'e da gaxa n'da ngu n'da. 25 Guto xudi 'bu mi mba n'dø'mi bu ja ra pont'i a ra Jesús. ²⁶Ne mán t'o't'i bu ja ra pont'i a í yap'a bi 'yɛna, "Rá hmuts'ut'abi yu judío na," em bu.

²⁷Nɛ bi mba ma cuatihu ra Jesús yoho yu bɛ. 'Da a n'da yu pont'i. Nɛ bi 'bäm'pu ja rán 'yɛi a n'da nɛ bi 'bäm'pu ja rá gaha a man'da. ²⁸Nɛ nuna bin ja, mi mam bu ja rá t'ohni Oja maya'bu, bi 'yɛna: "Da t'ɛmbi ngue 'da'anguui u yu dadits'oqui a." ²⁹Nɛ nu yu ja'i bi thopu, bi ucpi nɛ bi denthoho, bi 'yɛmbi:

—Ha hinga gue e gá ma ngue gui xo't' ma nijąhu nε hyupa tho gui hyøh mahøn'a. ³⁰Sä gui cąpu ja ra pont'i ya 'bu, nε gan yąnsε, bi 'yɛmbi.

³¹Nɛ ximangutho bi man u yu ngurba mbäją bin 'yɛ̞mp'u:

—Nuna, bi yanba yá te u 'da, pε hingui sä din yansε ya. ³²Gan nuhu ra Cristo, rá hmuts'ut'abi yu judío 'bu ba cạpu ja ra pont'i, gan nugähu, ne ga ec'yeihu buya, bi 'yem 'bu mi denthoho. Ne u mi cuathu bu, bi ucpa ra Jesús.

Bi du ra Jesús

³³Nu'bʉ mi zøn a huxhyadi bʉya bim 'bɛxui gätho ra häi, ja gue'bʉ mi zøn a hyunde bin nɛqui mahøn'a. ³⁴Nɛ nu'a ra ora a ε xø i huxhyadi, nts'ɛdi bi mbah ra Jesús, bi 'yɛ̞na:

—Eloi, Eloi, lama sabactani, bi 'yɛ̞na. Nde da ma: "Ma Oja̞ i, ma Oja̞ i, hanja xcá hyɛga thoho."

³⁵Nu'bʉ mi 'yø ʉ 'da 'bʉpʉ, bin 'yɛ̞mp'ʉ:

—Nuna, nzo a ra Elías, bin 'yɛ̞mp'ʉ.

³⁶Nɛ bán ti a n'da mí hạ n'da tengu ra funjo xí 'yot'i, bi fospu ja ra vino xun ju, nɛ bi ndøct'a n'da ra xithi. Pi uąspa ra Jesús ɛmbi da zi, nɛ bi 'yɛmp'u min 'yohu:

—Pε 'bε ga undä na, ga nuhu 'bu da zøh ra Elías di tongui, bi 'yεmp'u.

³⁷Pɛ nu'a ra Jesús nts'ɛdi bi mbafi nɛ 'bex bi du. ³⁸Nɛ nubʉ mbo ra dạniją 'bex gue bin xɛngui nde ra 'bø't'e mi ndam bʉ. Bá fʉh magạts'i nɛ bi zøtahäi a bin xɛni. ³⁹Nɛ nu'a rá hmu yʉ dofʉi, mi hɛ̞t'a ra Jesús bi mba 'bʉ mi du, nɛ bi 'yɛ̞na:

—Majuani nuna ran 'yohu na, rá Ts'unt'u Oja na, bi 'yɛn a ra hmudofui.

⁴⁰Nε mi 'bupu 'da yu xisu bu ma'ueni ts'u, mi hant'a ra Jesús. Nu'a n'da ra Salomé a, nε nu'a man'da ra María, ra mɛngu Magdala, nε nu'a man'da ra María, rá mbe ra Jacobo nε ra José. ⁴¹Guehya yu xisu mi tɛn ra Jesús 'bu mi 'bupu Galilea nɛ mi fäts'i. Nɛ u mi'da yu xisu bi dɛn 'bu mi mba bu Jerusalén, mi 'bäpu.

Jesús bi mba nt'ägui

⁴²⁻⁴³Nε ya bin de, nε mim bɛni da 'yäcpa n'dihi rá ngøc'yɛi ra Jesús nguetho mi ts'utho da du'ma ra pa ran ts'äya, ne nu ra pa ran ts'äya njongui sä da t'ä a. Janangue a nu ra José ra mengu Arimatea, bi hyut'anzambui bi mba bán yaui ra Pilato, bi 'yäp a rá ngøc'yɛi ra Jesús. Nu ra José n'da rá ngurbi yu ja'i israel, pε gue'a n'da majuani mi εc'yεi Oja nε mi tøm'ma ra pa di manda ua rá ts'edi Oja. 44 Nu ra Pilato bi hyonya thoho 'bu mi sifi bi du ra Jesús. Νε nubuya bi mbεhna n'da ba si a rá hmu yu dofui ngue da 'yän 'bu majuani ya bi du. 45Ne nu'bu mi man a rá hmu yu dofui gue bi du, nu ra Pilato bi 'yɛ̞mp'a ra José:

—Da zä gui tuxa rá ngøc'yɛi ra Jesús 'bʉ.

⁴⁶Nu a ra José buya, bi dän a n'da ra 'bø't'e nε bi mba bi tongba rá ngøc'yεi ra Jesús, nε bi mbant'a ra 'bø't'e xi däi nε bi cu't' pu ja n'da ra hyado gue ran 'yägui xí mba nthεqui bu ja n'da ra t'umba'ye. Nε bi juaspa n'da ra xindo xun ndoho bu ja rá goxthi ran 'yägui. ⁴⁷Nε nu'a ra María, ra mɛngu bu Magdala, nɛ man'da ra María ngue rá mbe a man'da ra José, bi nu hapu bi jät'i.

Bi dąmbęni ra Jesús

Nu'bu mi thoh ra pa ran ts'äya, nu'a ra María ra mengu bu Magdala, ne ra María rá mbe a man'da ra José, ne man'da ra xisu ngue ra Salomé, bi dän yu 'yɛthi ngue yuman'u ngue da mba bu ja ran 'yägui da gospa rá ngøc'yɛi ra Jesús, tengu man t'øt'ehe dyú judíohe. ²Nɛ nt'uxudi da ndomingo 'bu mi bøx ra hyadi bi mba bu ja ran 'yägui u buya. ³Nɛ bin 'yɛmzɛhɛ u:

—To'o da zä di 'uec'a ra do bí juaxpu ja ra hyądo, bi 'yɛn u.

⁴Nε nu'bʉ mi zøm bʉ bi nu bʉya, ya ma 'ueque a ra do, ngue xʉn ndoho. ⁵Nε nu'bʉ mi yʉrpʉ ja ra hyado bʉya, bi nu n'da ran 'yohʉ mi hupʉ rá hyo ngue rán 'yɛi ra hyado, mi he n'da ra pahni xʉn t'axi. Nɛ nu'ʉ yʉ xisu bin su 'bʉ mi nu. ⁶Pɛ nu'a, bi 'yɛ̞mp'ʉ:

—O guín suhu. Dí pạcä guí homhbu ra Jesús ra mɛngu Nazaret, ngue bi 'døm'pu ja ra pont'i, pɛ bi dạmbɛni a, njo'o ua ya. Dami nuhu ua mí 'bɛni, bi t'ɛmp'u yu xisu.

⁷Ne xø bi 'yena:

—Pε nuya ni mbähä gui xihmbu ra Pedro nε'u mi'da yú xädi nε gui 'yɛmfu gui timhbu bu Galilea a ra Jesús tengu tho bi xi ahu," bi t'ɛmp'u yu xisu.

⁸Nε nu'ʉ yʉ xisu bʉya 'bex bi bøn'a n'dihi bʉ ja ran 'yägui nɛ bá ɛ ʉ, ɛmmɛ di fɛt'ʉ nguetho bin su, nɛ njo'o to min nde din yąhʉ ngue bin su.

Ra Jesús bin tįmmi ra María Magdalena

⁹Nu'a ra Jesús bi dąmbęni 'bʉ xudi thoho ndomingo. M'bɛt'o thoho bin ti̞mmi ra María ra mɛ̞ngu bʉ Magdala, ngue gue'a xí hyønba thi yoto yʉ zi̞thu. ¹⁰Nɛ nubʉya bi mba a ra María, bá xip'ʉ yʉ́ xädi

SAN MARCOS 16 106

ngue bi dąmbęni a ra Jesús, ne mí zon'u ngue tu yú mbui, ngue bi du ra Jesús. ¹¹Ne nu'bu mi 'yøde ngue bi dąmbęni ne bi man a ra María ngue bi nuse, pe him bi 'yęc'yei u.

Ra Jesús bin timhbu yoho yú xädi

¹²Nubuya bin tịmhbu mi yoho yú xädi a ra Jesús bu 'yu, 'dan'yo ts'u bu án nu u. ¹³Nε nu'u, bi mba u buya, bá xi u mi'da ngue xø bi nu mahøn'a, pε ngutho him bi 'yεc'yεi a bi man u.

Ra Jesús bi xi u yú xädi da mamp'a rám hma 'bu mí ndex mahɛts'i

¹⁴Rán zεgui thoho bin tịmhbu gätho 'dɛ'ma'da yú xädi ra Jesús. Mi hupu ja ra mɛxa u. Nɛ bi zu u nguetho him bi 'yɛ̞c'yɛi a xi sifi ngue bi dạmbɛ̞ni a. ¹⁵Nɛ nubuya bi 'yɛ̞mp'u:

—Ni mbähä gätho na nguni ra ximhäi, gui mamhbu ran ho ma'da'yo. Hønbu go hapu i 'buh yu ja'i gui xihmbu. ¹⁶Nu'a to'o da 'yɛ̞c'yɛi nɛ din xixyą, gan yạnba rá te a. Pɛ nu'a hin da 'yɛ̞c'yɛi, da nu ran unbi gätho yu pa mazại a.

17 Nɛ nu'u to'o da 'yɛ̞c'yɛigui xun ngu yu hmɛpya ga japi da 'yøt'u. Nangue ma ts'ɛdigä da hyøn a thi yu zithu in 'yohu 'da yu ja̞'i, nɛ din ya̞ 'dahma 'dan'yo yu nde, la ne nu'bu da bɛnt'u yu pozu nte da ja u, ngutho 'bu da zi ra 'yɛ̞thi ngue ran da̞te, nte da ja u. Nɛ di japi da yan u yun zäman'u 'bu da gäspa yú 'yɛ̞, bi 'yɛ̞mp'u yú xädi a ra Jesús.

Bi ndex mahęts'i a ra Jesús

19 Nɛ nu'bu mi gua a bi xih yu xädi, bi ts'ix bu mahɛts'i a ra Hmu, nɛ 'darpu ní conhui rá ts'ɛdi Oją.
20 Nu'u yu xädi bi mba buya bi man rám hman Oja hønbu go hapu bi mba. Nɛ nu ra Hmu bi japi da zä da ma xun ho nɛ bi japi da 'yøt' yu hmɛpya 'dahma da 'yɛc'yɛi yu ja'i yum hman u. Nɛ hønt'a dí xi ahu ya.

LUCAS

Ran ho Ma'da'yo bi 'Yo't'a ra Lucas

'Be'a í 'yo't' rá søcua ra Lucas

Dí pącä xun ngu yu ją'i bi 'yo't' yu søcua ngue i man'a bin ja 'bu mím 'bucua ja ra ximhäi ra Cristo. ²Nu'u bi 'yo't'u, tengu thoho bi xängahu u bi nuse 'bu mi 'yøt' rá 'befi ra Cristo, ne tengu thoho bi man'u hønbu go hapu. 3Necä dra Lucasgä dí o't'na ra søcua ngue im man'a bin ja, ne dí pen'na i, hague Teófilo, ma amigo i xun ho. Nε dá änzehe yu ja'i to'o bi nu 'be'a gä bin ja. Ne emme dá hongä 'be'a nt'o't'i gä mi'da yu søcuą, janangue'a da bømanho 'bɛ'a dí o't'ä. 4Nguetho dín nde gui padi xun ho ngue majuąni a bi sän'na i.

Rám 'behni Oją bi ma dim 'buh ra Xuua

⁵Nu'ʉ yʉ pa min ts'ʉt'abi ra Herodes bʉ ja ra xɛqui Judea, mi 'bʉpʉ n'da rá mbäją yʉ judío, ra Zacarías a. Madim pɛhmbʉ n'dan nɛts'i yʉ mbäją bi dʉm'ma ra mbäją Abías. Nu'a ra Elisabet, rá xisu ra Zacarías, gue'a n'da rám bom'bɛto ra Aarón a, ngue ra hmumbäją maya'bʉ. ⁶Nu'a ra Zacarías nɛ ra Elisabet, gätho yonja'i, Oja bi numanho u, nguetho xun ho yu mbui, nɛ mi øt'e gätho yun t'ɛdi Oja. ⁷Nu ra Elisabet nɛ ra Zacarías, xun dac'yɛi u nɛ xínga n'dandi mi 'buh rá t'uhni a ra Elisabet.

^{8,9}Ne nu'bu xøn zøn ra pa dim pepu ja ra danija u n'dan nets'i yu mbäja bi du'ma ra Abías, janangue'a madim pepu ra Zacarías. Ne zai mi thahna n'da ra mbäja, ngue da yurpu man'da mbo ra dąniją da 'yuh yu xiza yumanho. Nε gue'a ra Zacarías bi mba nthahni ngue da yurpu mbo. ¹⁰Nε xʉn ngu yʉ jạ'i mi 'bäpʉ thi mi yahu Oja 'bu ra ora bi 'yuh ra xiza ra Zacarías. 11 Ne 'bex bi zø a n'da rám 'bɛhni Oja bu mi 'bäh ra Zacarías. Ne mi 'bäpu rá hyo rán 'yɛi ra mɛxa guepu mí uh yu xiza. ¹²Nu'bu mi nu a buya, ɛmmɛ bin su ne hingui padi 'be'a da beni. ¹³Ne nu'a rám 'behni Oja bi 'yembi:

—O guín su Zacarías, nguetho bi 'yø Oją 'bɛ'a guí äpi, nangue ni xisu ra Elisabet din hąt'ʉhni nɛ dim 'bʉ a n'da rá ts'ʉnt'ʉ, nɛ gui xip rá thuhu dí Xuua. ¹⁴Nɛ gan johya nɛ ɛ̞mmɛ da hyu ni mbʉi, nɛ

xun ngu yu ja'i din johya 'bu bim 'bui. 15 Nguetho Oja di un ra 'bɛfi nuixte a. Nε nu'a, hin da zi ra vino xínga gue'a ra sɛi, nɛ din 'youi rá Hogandahi Oja gue'bu go bim 'bui. ¹⁶Ne nu'a rá 'befi da 'yøt'e, gue'a dí japi xun ngu yu ja'i israel di päh yún 'yomfeni ne da 'yec'yei Oja ra Hmu. 17 Ne nu'a ni t'uhni bam 'bet'o a 'bu bá ɛh ra Hmu mahɛts'i, nɛ din ja rá ts'ɛdi tenguthoho ra pøngahyą Elías, ne di japi din hocpahu yú t'uhni u yu ja'i. Ne nu'u nzai hingui øde 'bɛ'a pa nsifi, di japi da 'yøde. Nε nangue rám hman ra Xuua di da zä da zimanho ra Hmu 'bu bá εhε, bi t'emp'a ra Zacarías 'bu min yaui rám 'behni Oja.

¹⁸Nu ra Zacarías buya:

—Hague dán zä ga pącä a guí xiqui nguetho xtán dąc'yɛigä ne'a ma xisu, bi 'yɛ̞na.

¹⁹Nu rám 'bɛhni Oją bi 'yɛ̞mp'a bʉya:

—Nugä dí Gabriel ne dí 'bäcä bu ja rá hmi Oją, ne Oją bá pengä gue ga xi a ran ho din ja ahu. ²⁰Pe nuya, gan gore ya, nguetho hin guí ec'yei a dí xi i. Nuya hin da zä gan ya astague'bu go bin ja a dá xi a i, nguetho gätho din ja a dá xi a i, bi 'yen'a rám 'behni Oja.

²¹Nu yu ja'i mi 'bäpu thi, mi tø'ma ra Zacarías, nɛ him mi pa'u hanja him 'bexque pøni. ²²Nɛ nu'bu mi bøm bu ra Zacarías hingui sä din ya, hønt'a bi uanda rá 'yɛ. Nu yu ja'i bi bah puya ngue bi nu n'da ran t'uti bu mbo.

²³Ne nu'bu mi guah yu pa dim pepu ra Zacarías bi mba rá ngu buya. ²⁴Ne bin hat'uhni ra Elisabet, nɛ nubuya hin hapu í mba an cut'a zana, bim 'butho bu rá ngu. Nɛ bi 'yɛna: ²⁵"Xun ngu rá mate bi 'yørcä Oja, nuya him man da zangä yu ja'i nguetho dim 'bu'a n'da ma t'uhni ya," bi 'yɛnsɛ.

Rám 'behni Oją mahets'i bi ma dim 'buh ra Jesús

²⁶Nu'bu mi tho i cut'a ząna, nu'a Oją bi mbɛhn mahøn'a a rám 'bɛhni ngue í Gabriel. Bi mbɛhn pu ra hnini Nazaret bu ra xɛqui Galilea. ²⁷Nu'a, bi zøm bu mi 'bu a ra María. Nu ra María xínga n'dandį bin yąui n'da ran 'yohu, pɛ ya mi än'na ra José, n'da rám bom 'bɛto ra ts'ut'abi David a. ²⁸Nu rám 'bɛhni Oją bi zɛngua, bi 'yɛmbi:

—Nu'i María ya bi 'yøt'a n'da rá mate Oją nɛ guín 'youi a. Pɛ man'da bi jąp'a Oją xinda gue'ʉ gätho mi'da yʉ xisu, bi 'yɛmbi.

²⁹ Nu'a ra María 'bu mi nu rám 'behni Oja, bin su ne bin 'yomfeni 'be'a ním bøn'a bi sifi. ³⁰ Nu rám 'behni Oja bi 'yemp'a buya:

—O guín su María nguetho guín 'youi rá mate Oją, ³¹nε dim 'bʉ'a n'da ni Ts'ʉnt'ʉ nɛ gui xip rá thuhu ra Jesús. ³²Nε nu'a, din ja rá ts'ɛdi nɛ da fądi ngue rá Ts'ʉnt'ʉ Oją tạte thoho rá ts'ɛdi. Nɛ nu'a Oją di japi din ts'ʉt'abi tengu rám bombøta ngue ra David. ³³Nɛ di manda yʉ jạ'i israel gätho yʉ pa nɛ hin jạm'bʉ da guah rá ts'ɛdi a, bi 'yɛ̞n'a rám 'bɛhni Oja.

34 Nu ra María bi 'yɛn'a:

—Hague dán zä din jabu nε hin jam'bu dán ya'be n'da ran 'yohu, bi 'yɛ̞na.

³⁵Pε nu rám 'bεhni Oją bi 'yεmp'a:

—Nu rá ts'εdi rá Hogandahi Oja di ja i gui tịn ni t'thni, nε nu'a dim 'bti, rá Ts'tht'th Oja a. ³⁶Nε'a ni meni ra Elisabet xth dạc'yεi a, pε dim 'bth a n'da rá ts'tht'th. N'dato zana ya i ha'a rá t'thni nε mi εn yth ja'i ngue hin jam'bth da dịn rá t'thni. ³⁷Nu Oja gätho sä da 'yøt'a, hin'yth 'be'a gue hingui sä da 'yøt'e, bi 'yɛn'a rám 'bɛhni Oja.

³⁸Nu'a ra María bi 'yɛ̞n'a:

—Nugä rá 'yɛ̞hɛgä Oja, nu'bu gue'a in nde Oja, da 'yørque gätho guím ma, bi 'yɛ̞na.

'Bex bi mbeng mahɛts'i rám 'bɛhni Oja bʉya.

Ra María bi mba bí zengua ra Elisabet

39,40 Nu'a ra María buya, 'bex bi mba bí zengua yú meni mí 'bupu ja yu nyuni bu ra xequi Judea, gue'a ra Zacarías ne rá xisu ra Elisabet.
41 Ne nu'bu mi mba ma zengua ra Elisabet, 'bexque bi 'yan'a rá t'uhni mí o rá mbui. 'Bex bin 'youi rá Hogandahi Oja ra Elisabet buya, 42 ne bi 'yena:

—Oją man'da bi jąp'i i María, xinda gue'u mi'da yu xisu. Nɛ nu'a ni ts'unt'u dim 'bui, mająpi a. ⁴³Pɛ xun ngu ra mate gá 'yørque ngue gá zɛnguagui, nguetho gue'e rá mbe a ma Hmu. ⁴⁴Nɛ dí pądi gue'e rá mbe a ma Hmu nguetho nu'bu má øcä nin zɛngua, 'bex bin johya a ra t'uhni o ma mbui nɛ bi 'yani. ⁴⁵Bi jąp'a Oją nguetho gá 'yɛc'yɛi a bi xi i, nɛ majuani da 'yøt' Oja a bi xi i, bi 'yɛn'a ra Elisabet, bi 'yɛmp'a ra María.

⁴⁶Nu ra María buya bi 'yɛspa Oją nɛ bi 'yɛna: Emme dí espa Oją ma Hmu, ⁴⁷ ne din johya ma mbui nangue Oją mam pørpate.

48 Nguetho Oją bi bengä ngue dra hyoya 'yehegä, ne gätho yu ją'i da 'yengui dá tingä rá mate Oja.

⁴⁹ Xun ngu ran ho bi 'yørca Oją madą rá ts'edi, ne xun hotho a. ⁵⁰Ne da nu rá yembui to'o gätho da numansu a.

Nu Oją nuixte tho yún t'øt'e, bi 'berpa yú ts'edi u din yezehe ngue im beni jase yú ts'edi.

52 Ne bi 'berba yú ts'edi yu ts'ut'abi,

ne go bi un yú ts'edi yu ją'i thoho.

⁵³ Nɛ bi japi da ba u to'o i honi da badi,

pε nu'ʉ to'o him bi hyoni da badi bi japi di 'bɛ'ʉ.

Nɛ nu Oją bi mbäxcahu ya ngue dyu ją'i israelgähu, ngue bi 'yɛnju yú t'uhnigahu a, nɛ him bi pumbɛni a ran ho bi ma da 'yørcahu.

⁵⁵ Pε bi 'yøt'e tenguthoho bi si a ra Abraham ta t'ørcahu, yúm bom'bεtoju, gätho yu pa mazai, bi 'yɛn'a ra María 'bu mi 'yɛspa Oja.

⁵⁶Nε nu'a ra María hyuzna bi gopu rá ngu ra Elisabet, m'bεjua bi mbeng bu rá ngusε.

Bim 'buh ra Xuua Nxixyą

⁵⁷Nɛ bi zøn ra pa dim 'bʉ a rá ts'ʉnt'ʉ ra Elisabet. ⁵⁸Nɛ gätho yʉ́ mɛni nɛ yʉ́ mɛnguhʉ bin johya 'bɛ'a bi 'yørpa Oja a ra Elisabet, nɛ bi zøm bʉ rá ngu bi zɛngua a. ⁵⁹Nu'bʉ mi gua'an hyato pa xím 'bʉ a ra t'uhni, bi mba nts'its'i da thecua rá xifani. Ne gätho u mi 'bupu, bi ma da hyanba rá thuhu rá ta ngue dí Zacarías. 60 Pe nu rá mbe bi ma ngue hin da zä, pegue jatho da hyux rá thuhu ngue dí Xuua. 61 Ne gätho mi 'bupu bi 'yena:

—Pε njo'o n'da ni mεnihʉ í Xuua, bi 'yɛmbi.

⁶²Nε nu'ʉ, bi uạn yʉ́ 'yɛ, bi 'yän'na rá ta: "'Bɛ'a rá thuhu a ni t'ʉhni," bi 'yɛ̞mbi. ⁶³Nu rá ta bʉya bi 'yäh ra søcuą nɛ bi 'yo't'a n'da ram hma ngue bi 'yɛ̞na: "Dí Xuua a ma t'ʉhni." ⁶⁴'Bex bi zä bin yą mahøn'a ra Zacarías bʉya, nɛ bi 'yɛ̞spa Oją a. ⁶⁵Nɛ bi hyonya thoho gätho mi 'bʉpʉ. Nɛ gätho yʉ jạ'i mi 'bʉpʉ ja yʉ nyuni a ra xɛqui Judea bi 'yø a bin ja. ⁶⁶Nɛ gätho bin 'yomfɛ̞nisɛ 'bɛ'a da 'yøt'a ra t'ʉhni, nguetho Oją bi jąpi.

Bi 'yɛ̞spa Oja̞ ra Zacarías 'bʉ mim 'bʉh rá t'ʉhni

⁶⁷Nε bin 'youi rá Hogandąhi Oją ra Zacarías, nε bim pøngahyą a, bi 'yɛna:

68 Emme dí espa Oja ra Hmu nguetho bi benju dyu jali israelgähu, dyu judíohu, ngue da yanju.

69 Νε nanguehna ma t'ʉhni bim
'bʉi, janangue'a dí pądi
him ma ya'a ba pɛnga mam
pørpatehʉ i ja rá ts'ɛdi,
rám bom'bɛto ra ts'ʉt'abi David

a.

70 Gue'a bi bɛnba Oją u yú
pøngahyą maya'bu thoho,

71 ngue bi ma da yanju nangue
man suihu,
nɛ nangue gätho u i numan'uju.

⁷² Pε nu Oją bi huęc'u mam bombøtahu, nε him bi pumbęni ran ho mi

ęna da 'yørcahu.

⁷³ Nɛ majuani da 'yøt' Oja a bi xih mam bombøtahu ra Abraham,

⁷⁴ ngue bi xifi da yanju nangue u man suihu,

nε hin ga su ga thạndehʉ a Oją bʉya.

75 Janangue da gohi xun ho ma mbuihu bu dá nu a Oją, ne ga øthu ra hogam'bui bu ja rá hmi.

⁷⁶ Ne nuna ma t'uhni, da 'yemb yu ja'i rá pøngahya Oja mahets'i, ne da xih yu ja'i di päh yun 'yomfeni, da dø'ma ra Hmu.

⁷⁷ Nε da xi u da mba ma punbi yú ts'oqui,

nε da mba nhyani.

⁷⁸ Gätho da 'yøt' Oja nguetho di huggahu

ne ba pengahu ra Hmu ngue guese rán nequi ma mbuihu.

79 Nɛ gue'a di yorpa yɨ mbui u i 'bupu ja ra 'bexui nɛ i 'yo bu ja rá 'yu ran date, nɛ da zixpu ja ran nɛqui, bi 'yɛn'a ra Zacarías 'bu mim pøngahya.

80 Nɛ nu rá t'uhni, ngue ra Xuua, bin te mán zaqui nɛ bin te rá mbui nangue Oja. Nɛ nu'bu min te, bim 'bupu ja ra dapo asta gue'bu go bi zøn ra pa bi dump' rá 'bɛfi bi xi Oja, guepu 'buh yú mi'israelhu.

Bim 'bu'a ra Jesús

Nu'bʉ mím 'bʉh ra Jesús, gue'ʉ yʉ pa bin ja ra dapede bi 'yøt'a ra hmuts'ʉt'abi ngue ra Augusto César. ²Νε gue'ʉ yʉ pa bin 111 SAN LUCAS 2

ts'ut'abi ra Cirenio bu ja ra xequi Siria, ne gue'u yu pa ja bi du'mi bi 'yøt' ra pede u. ³Gätho yu ja'i bi mba bu ja rá hnini zehe yúm bombøta ngue da thuspa bu yú thuhu. ⁴Janangue nu ra José bi nexpu ja ra hnini Nazaret ngue ra xequi Galilea, ne bi mba bu ja ra hnini Belén ngue ra xɛqui Judea, nguetho guepu rá hnini a rám bombøta a ra José, ngue ra David. ⁵Ne bi mba da thuspa bu rá thuhu. Bi mbe a ra María rá xisu. Pe nu'a ra María ya min hạt'uhni a. ⁶Nɛ nu'bu mi zøm bu ja ra hnini Belén, bi zøn ra pa dim 'buh rá t'uhni buya. 7Ne bim 'bu a rá mbudi ts'unt'u a ra María ngue ra Jesús. Νε bi mbant yu bazu, ne bi cärpu ja rán ts'adethą yu fani bu ja ra ngumfani, nguetho hin'yu bu din säya bu ja n'da ra ngu.

Yúm 'behni Oją bi xih yu mbände'yo ngue bim 'buh ra Jesús

⁸Nu'a ra xui a buya, mi 'bupu häntho ra hnini Belén 'da yu mbändɛ'yo, madí jamansu yú dɛ'yo u. ⁹'Bex bi nu n'da rám 'bɛhni Oją u, nɛ bi yorpu rán nɛqui Oją bu 'bui, nɛ ɛmmɛ bin su'u. ¹⁰Pɛ nu'a rám 'bɛhni Oją bi 'yɛ̞mp'u:

—O guín suhu, nguetho bá εcä ga xi ahu n'da ram hma gue di ja ahu gan johyahu gyú ją'ihu ua ja ra ximhäi. ¹¹Nu bu ra hnini Belén, ngue rá hnini ra David, ja bim 'bu'a nim pørpatehu, gue'a ra Cristo ra Hmu bi ma ba pɛn'nahu Oją. ¹²Nɛ nu'bu gá timhbu n'da ra 'uɛre xí järpu ja rá yänza yu fani m'bant'i yum 'bahni, gue'a gdí pąhmbu a buya, bi 'yɛn'a rám 'bɛhni Oją 'bu mi 'yɛmp'u yu mbändɛ'yo.

¹³'Bex bi nɛqui n'dan nɛts'i yɨm 'bɛhni Oją, bi 'yɛspa Oją ngue bin tuhu, nɛ bi 'yɛn'u:

¹⁴ Nuixte rá ts'edi Oja mahets'i. Oja da hyurpa yú mbui gätho u i 'bucua ja ra häi, hønt'a go to'o da hyan'a rá mate, bi 'yem 'bu min tuhu.

¹⁵Nε bi mbeng mahεts'i yɨm 'bεhni Oją bɨya. Nε nu'ɨ yɨ mbändε'yo bin 'yɛmp'ɨ bɨya:

—Ga mbähä bu ja ra hnini Belén, ga nuhu a bin ja ngue bi jaju ra Hmu ga pahmbu.

¹⁶Bi mba n'dihi ң bңya, nε bi dim bң a ra María nε ra José nε ra 'uєre. Nε nu'a ra uєre mi o bң ja rá yänza ra fani. ¹⁷Nε nu'bң mi nu'ң yң mbändε'yo bңya, bi mam bң a xí xih rám 'bєhni Oją nangue ra t'ңhni bim 'bңi. ¹⁸Nε gätho ң bi 'yø'a bi man'ң yң mbändε'yo, bi hyonya thoho ң. ¹⁹Pε nu'a ra María, bi bєm bң mbo rá mbңi 'bє'a gätho bin ja. ²⁰Nε nu yң mbändε'yo bi mbeng bңya, nε bi 'yɛspa Oją, ngue gätho bin ja'ң 'bɛ'a gätho bi sifi, nε xí nu.

Bi mba ma däpi Oją a ra 'uɛre Jesús bʉ ja ra dąniją

²¹Nu'bʉ mi gua'an hyato pa xím 'bʉi, bi thɛcua rá xifani ra 'uɛre, nɛ bi thuspa rá thuhu dí Jesús, nɛ ngue'a xí xih rám 'bɛhni 0ja a ra María 'bʉ hin ní hya rá t'ʉhni.

²²Nɛ nu'bʉ mí gua'a ra pa nts'änni da dø'ma ra María, tengu bi man yʉ́n t'ɛ̞di ra Moisés, ya i sä da mba bʉ ja ra dạniją bʉ Jerusalén. Nɛ bi zixa rá t'ʉhni ʉ ngue di däp Oją. ²³In ja bʉ bi 'yøt'e nguetho nɛ'a i mam bʉ ja rán t'ɛ̞di ra Moisés, ngue: "Gätho yʉ mbʉdi ts'ʉnt'ʉ da SAN LUCAS 2 112

mba ma däpi Oją," i ɛm bu ja yun t'ɛdi. ²⁴Nɛ bi hyaxa n'da ra 'bøts'e bu ja ra danija tengu bi mam bu ja rán t'ɛdi ra Moisés ngue i ɛna: "Yoho yu t'azu uague yoho yu ts'aha ngue da hyo bu ja nija to'o im 'buh yu t'uhni."

Nu ra Simeón i thex ra 'uere Jesús

²⁵Nε mi 'bʉpʉ Jerusalén n'da ran 'yohʉ i Simeón, ra hocją'i a, mi numansu Oją nε mi tø'ma ra pa ngue da mba nhyạni ʉ yʉ jạ'i israel, nε min 'youi rá Hogandạhi Oją a. ²⁶Nu rá Hogandạhi Oją bi bɛnba ra Simeón gue hin da du asta gue'bʉ go da nu'a rá Thahni Oją ba pɛhni ngue ra Cristo a. ²⁷Nɛ nu'a rá Hogandạhi Oją bi bɛnbi da zøm bʉ a ra Simeón bʉ ja ra dạniją 'bʉ mi zøm bʉ rá ta nɛ rá mbe di dä'a ra Jesús. ²⁸Nu ra Simeón bɨ dɛxa ra 'uɛre nɛ bi 'yɛspa Oją bʉya, bi 'yɛna:

²⁹ Ma Hmu i, pε hin te dím bεngä 'bu ga tugä ya,

nguetho dá nugä na gá xiqui ngue ga nugä, ni 'yɛ̞hɛgä.

Nuya dá nusegä mam pørpatehe,
 ngue gá sänni ngue da yanba yú te u to'o da bah na.

32 Nuna di japi da nu ran nequi u hing yu judío,

ne gue'a dí t'escahe dyu ja'i israelgähe, dyu judíohe, bi 'yɛn'a ra Simeón 'bu mi dɛxa ra 'uɛre Jesús.

Bim pøngahyą ra Simeón 'bʉ mi nu ra Jesús

³³Nu ra José ne rá mbe ra Jesús bi hyonya thoho 'be'a bi man ra Simeón nangue'a ra 'uere. ^{34,35}Nu ra Simeón buya, bi 'yäp Oją da 'yɛnspa rán jąpi ra José nɛ ra María, nɛ bi 'yɛna:

—Nuna ra t'ʉhni 'bʉ din dạn'yohʉ nts'änni xʉn ngu ʉ yʉ́ mi'israelhʉ dim 'bɛdi 'bʉ hin da numanho. Pɛ nu'ʉ to'o da numanho da yạn'a. Guehna dí fạdi 'bɛ'a im bɛm bʉ mbo yʉ́ mbʉi n'da ngu n'da yʉ ja'i. Nɛ nu'i María, gui nu ra dumbʉi xʉn ʉ tho ngue 'bɛ'a da t'ørpa na ni ts'ʉnt'ʉ, bi 'yɛn'a ra Simeón.

Nε'a ra Ana bim pøngahyą 'bʉ mi nu ra Jesús

³⁶Ne'a n'da ra dac'yei xisu ngue í Ana mi 'bupu ja ra danija, ne'a xin rá pøngahya Oja a. Nu'a, rá t'ixu ra Fanuel a, rám bom'beto ra Aser ngue n'da rá ts'unt'u ra Israel. Nu ra Ana, nu'a nyoto jeya bim 'buhmi rá ndø ne 'bex bi du. 37 Ne bim 'buse goho 'däte ma goho njeya, ya xun dac'yei a. Ne nu ra Ana, mi zam bu ja ra danija a. Min yaui Oja ra pa ne ra xui, ne ja yu pa him mi sihme 'bu i thande Oja. 38 Nu'bu min yahu ra Simeón ra María nε ra José, bi zøm bu ra Ana, ne 'bex bi xi Oją jamadi 'bu mi nu'a ra 'uɛre, nguetho bi badi gue yú yante u. Janangue'a bi 'yɛmp'u to'o mi tømp' yú yante ngue ya bi zøh ya.

Bi mbenc'a ra José bu ra hnini Nazaret ne rá xisu

³⁹ Nu'bu mi 'yøt'u gätho mi man rán t'gdi Oja ngue da 'yøt'e, nu ra José ng ra María bi mbeng bu ja ra hnini Nazaret bu ja ra xequi Galilea. ⁴⁰ Ng nu'a ra t'uhni bin te mán zaqui a, ng mi ja rán 'yomfgni xun ho. Ng gmmg bi jap Oja a.

Dε'mayon jεya pε'ts'a ra Jesús 'bu mi mba bu ja ra danija

⁴¹ Nu ra José ne ra María zại n'dandi n'da jeya i pa bu ja ra

hnini Jerusalén da nu ra dampeti ngue ran dąbaxjua. 42 Ne nu'bu mi mbe'ts'a 'de'mayon jeya ra Jesús, bi mbähä bu ja ra hnini Jerusalén ngue da nu ra dampeti bu. 43 Nu'bu mi gua'a ram peti, bi mbeng bu yú ngu yu ja'i. Ne nu'bu mi mba bu 'yu ra José nε ra María, him mi pa'u ngue bá copu a ra Jesús. ⁴⁴Pε mim beni min 'yohu yú amigo. Ne n'dapa bin 'yo bu ja ra 'yu. Ne nu'bu mín de bin säya buya, nε njo'o bu ra Jesús. Ne nu rá mbe ne rá ta bi 'yän'du yú amigo: "Ha gbán 'yohu a ra Jesús," ne'u yú meni bi 'yänni. ⁴⁵Pε him bi dini, janangue'a bi mbeng bu Jerusalén, bi hyom bu.

⁴⁶Nε ná hyupa buya ja bi dim bu ja ra danija. Mi 'buhmbu bu yu xänbate nija. Nε nu'a ra Jesús mi øde 'bɛ'a mi man'u nε bi 'yän yun t'änni 'bɛ'a bi 'yøde. ⁴⁷Nu yu xänbate nija buya bi hyonya thoho nangue gätho 'bɛ'a mi pa'a ra Jesús. ⁴⁸Nε nu'a rá mbe nε ra José, bi hyonya thoho 'bu mi nu i yahu yu xänbate. Nu'a rá mbe bi 'yɛmbi:

—Ts'unt 'u, hanja in jabu gá 'yørca'be, nguetho nu'a ni ta nɛcä ɛmmɛ dá hon'a'be nɛ mi tu ma mbui'be.

49 Nu ra Jesús bi dądi:

—Pε nde'bu hin xquí hyongüi, nguetho guí pąhmi ngue jatho ga øt'ä rá 'bεfi ma Ta.

⁵⁰Pε nu'ʉ, him bi bądi 'bε'a nam bøn'a bi man'a.

⁵¹Pε nu'a ra Jesús 'bex bi mbähä bu ja rá ngu bu ra hnini Nazaret, nε nzại mi øt'a i pa nsifi. Pε nu'a rá mbe mim bɛntho bu ja rá mbui 'bɛ'a gätho bin ja. ⁵²Nu ra Jesús, in te rá ja'i nε in te rán 'yomfɛni. Nε gätho yu ją'i mi numanho a nɛ'a Oją mi numanho a.

Xuua Nxixyą bi du'mi bi man rám hma Oją bu ma'ueni

^{1,2}Nu'bʉ ná 'dɛ'ma cʉt'a njɛya in ts'ut'abi ra hmuts'ut'abi Tiberio, ne bin yaui Oja ra Xuua bu ja ra dąpo mi 'bui, bi xifi di dump'a rá 'bɛfi. Nɛ gue'a ra Xuua rá ts'unt'u ra Zacarías a. Ne guet'a ra jeya bin ts'ut'abi ra Poncio Pilato bu ja ra xequi Galilea, ne n'dat'a ra jeya bin ts'ut'abi a ra Felipe bu ja ra xεqui Iturea nε ra xεqui Traconite. Nu'a ra Felipe ngue rán 'yohu ra Poncio Pilato. Ne guet'a ra jeya a bin ts'ut'abi ra Lisanias bu ja ra xequi Abilinia. Ne 'dat'a ra jeya mi ngurpa mbäją ra Anás ne ra Caifás bu Jerusalén. ³Nε nubuya, bi dump' rá 'befi ra Xuua Nxixya, bin 'yo bu n'danguadi ra dathe Jordán ne bi xih yu ja'i di päh yun 'yomfeni nangue yú ts'oqui, n'dahma da mba ma punbi. Ne bi xifi din xixyą buya. ⁴Nε guehna ra Xuua bi man'a ra Isaías 'bu mi 'yɛna:

> N'da ra ją'i din yą bu ja ra dąpo nɛ da 'yɛ̞na:

"Dami päh nin 'yomfɛnihʉ, ga simhbʉ ra Hmu mi ts'ʉtho da zøcua.

Dami hoc ni mbuihu, ga tømhbu xun ho.

⁵ Tengu yu mbothäi nɛ yu t'øhø din juạni

tengu n'da ra 'yu i pa ma hoqui, hingui ndaxni, i uɛntho, din ja bu ni mbuihu.

⁶ Ne gätho yu ją'i da nu'a ram pørpate ba pend Oją," da 'yena, bi 'yen'a ra Isaías. ⁷Nɛ bi zøm bu yu ją'i bu 'buh ra Xuua ngue in nde din xixyą u. Nɛ nu ra Xuua bi 'yɛ̞mp'u:

-Nu'ahu tengu thoho 'bu gyú pozuhu, ne guí ensehu hin guin nuhu rá muui ni ts'oquihu 'bu gan xixyąhu, ne hin gui hoc ni mbuihu. 8Pε nte di muui 'bu guí şmhbu gán yamhbu ngue ya nim bombøtahu ra Abraham. Pe nehya yu do i 'bongua mi sä xtá 'yena yú t'uhni ra Abraham gue'bu gue'a xtán nde Oja a. ⁹Ne nu'a to'o gätho him bi päh yún 'yomfeni nangue yú ts'oqui, tengu'bu yu za ngue hingui ho yún dät'o. Ne nu rán ts'onza Oja ya mahoqui xun ho ngue da 'yex'u yu za hingui ho yún dät'o, ne da thøspu ja ra sibi din zø, bi 'yen a ra Xuua.

¹⁰Nu yu ją'i buya, bi 'yɛn'u:

—'Bɛ'a sä ga øt'ähe 'bʉ, bi 'yɛ̞mp'a ra Xuua.

¹¹Nu ra Xuua bi dąti:

—Nu'a to'o i ja yoho yú pahni, di un'na n'da to'o hin'yu rá pahni. Nɛ nu'a to'o i ja 'bɛ'a da zi, di unni ts'u a to'o hin'yu da zi, bi 'yɛ̞na.

¹²Nε'ʉ 'da yʉ hyącahäi xí zøm bʉ ngue in nde da mba ma xixyąbi, bi 'yän'dʉ:

-Xänbate i, 'bε'a sä ga øt'ähe.

¹³Nu ra Xuua bi dati:

—'Yo guí huspahu man'da ra renta, pe hønt'a i man rán t'ɛdi ra häi gui hyaju.

¹⁴Ne'u 'da yu dofui bi 'yänni:

—Nεcähe, 'bε'a sä ga øt'ähe, bi 'yɛn'ʉ.

Nu ra Xuua bi dąti:

—O guí hạcuahu ra mbeti yu ją'i nangue ni ts'edizehehu. Ne o gadí yafu n'da ra ją'i 'bu guí pahmbu him majuani a guí mamhbu. Ne hin guim bemhbu ngue man'da emme xun ngu gui tahmbu, pe hønt'a nin zäbi gui tahmbu, bi 'yen'a ra Xuua.

¹⁵Nε xʉn ngu ʉ ngue mi tø'ma ra Cristo mim bɛ̞nsɛ ʉ ngue ɛ̞mbi ra Cristo a ra Xuua. ¹⁶Pɛ nu'a ra Xuua bi 'yɛ̞mp'ʉ:

—Nugä dí xixyą ahu ngue ra dehe thoho, pɛ ba ɛ'a n'da ja rá ts'ɛdi xinda guecä, hin dí sucä tengu a. Nu'a di hoc'ahu nangue rá Hogandąhi Oją tengu'bu xtí hoc'ahu ra sibi. ¹⁷Nɛ da huahn'du yu ja'i tengu 'bu i pa nt'ɛi yu trigo. Nu rá xi di 'uec ran dahi, nɛ nu yu trigo da mba m'bɛ'ts'i, pɛ nu yú xi da t'upu ja ra sibi njam'bu i huɛt'i, in jabu da 'yøt' 'bu bi huahn yu ja'i a ra Cristo, bi 'yɛn a ra Xuua.

¹⁸Nε xun ngu mi'da yum hma bi xi u yu ja'i nangue ran ho ma'da'yo. ¹⁹Pε nu ra Xuua bi damhya ra ts'ut'abi Herodes nguetho nu ra Herodes bi zin'a rá 'bεροzεhε, ngue rá xisu ra Felipe, í Herodías a ra xisu. Nε hinga hønt'a pε xun ngu mi'da yun ts'o bi 'yøt'a, janangue bi damhya. ²⁰Pε nu ra Herodes man'da xun ngu rá ts'oqui bi 'yøt'e nguetho bi got'a fädi a ra Xuua.

Ra Jesús bin xixya

2¹ Nu'bu mi xixyaba yu ja'i a ra Xuua, ne'a ra Jesús bi mba bu, bin xixya. ²² Nɛ nu ra Jesús 'bu mi yaui Oja, 'bex bá xoh mahɛts'i nɛ bá ca a rá Hogandahi Oja tengu n'da ra t'azu, nɛ bi zoxpu ja rá ja'i ra Jesús. Nɛ bi t'ø'a n'da ra nde mahɛts'i bi 'yɛna:

—Nu'i ma Ts'unt'u i, ɛmmɛ dadí huɛc'i i, nɛ dí numanho i, bi 'yɛn Oja.

Nu'u yum bombøta ra Jesús

²³Nu ra Jesús mi pe'ts'a n'däte ma'det'a njeya 'bu mi dump' rá 'befi ua ja ra häi. Nu yu ja'i mim beni rá ts'unt'u ra José a ra Jesús. Ne nu ra José rá ts'unt'u ra Elí a. 24 Nu ra Elí, nu'a rá ta, gue'a ra Matat a. Nu ra Matat, nu'a rá ta gue'a ra Leví a. Nu ra Leví, nu'a rá ta gue'a ra Melqui a. Nu ra Melqui, nu'a rá ta gue'a ra Jana a. Nu ra Jana, nu'a rá ta gue'a ra José a. ²⁵Nu ra José, nu'a rá ta ra Matatías a. Nu ra Matatías, nu'a rá ta ra Amós a. Nu ra Amós, nu'a rá ta ra Nahum a. Nu ra Nahum, nu'a rá ta ra Esli a. Nu ra Esli, nu'a rá ta ra Nagai a. ²⁶Nu ra Nagai, nu'a rá ta ra Maat a. Nu ra Maat, nu'a rá ta, ra Matatías a. Nu ra Matatías, nu'a rá ta ra Semei a. Nu ra Semei, nu'a rá ta ra José a. Nu ra José, nu'a rá ta ra Judá a. ²⁷Nu ra Judá, nu'a rá ta ra Joana a. Nu ra Joana, nu'a rá ta ra Resa a. Nu ra Resa, nu'a rá ta ra Zorobabel a. Nu ra Zorobabel, nu'a rá ta ra Salatiel a. Nu'a ra Salatiel, nu'a rá ta ra Neri a. ²⁸Nu ra Neri, nu'a rá ta ra Melqui a. Nu ra Melqui, nu'a rá ta ra Adi a. Nu ra Adi, nu'a rá ta ra Cosam a. Nu ra Cosam, nu'a rá ta ra Elmodam a. Nu ra Elmodam, nu'a rá ta, ra Er a. 29 Nu ra Er nu'a rá ta ra Josué a. Nu ra Josué, nu'a rá ta ra Eliezer a. Nu ra Eliezer, nu'a rá ta ra Jorim a. Nu ra Jorim, nu'a rá ta ra Matat a. ³⁰Nu ra Matat, nu'a rá ta ra Leví a. Nu ra Leví, nu'a rá ta ra Simeón a. Nu ra Simeón, nu'a rá ta ra Judá a. Nu ra Judá, nu'a rá ta ra José a. Nu ra José, nu'a rá ta ra Jonán a. Nu ra Jonán, nu'a rá ta ra Eliaquim a. ³¹Nu ra Eliaquim, nu'a rá ta, ra Melea a.

Nu ra Melea, nu'a rá ta, ra Mainán a. Nu ra Mainán, nu'a rá ta ra Matata a. Nu ra Matata, nu'a rá ta, ra Natán a. 32 Nu ra Natán, nu'a rá ta, ra David a. Nu ra David, nu'a rá ta, ra Isaí a. Nu ra Isaí, nu'a rá ta, ra Obed a. Nu ra Obed, nu'a rá ta, ra Booz a. Nu ra Booz, nu'a rá ta ra Salmón a. Nu ra Salmón, nu'a rá ta, ra Naasón a. 33 Nu ra Naasón, nu'a rá ta ra Aminadab a. Nu ra Aminadab, nu'a rá ta ra Aram a. Nu ra Aram, nu'a rá ta ra Esrom a. Nu ra Esrom, nu'a rá ta ra Fares a. Nu ra Fares, nu'a rá ta ra Judá a. ³⁴Nu ra Judá, nu'a rá ta ra Jacob a. Nu ra Jacob, nu'a rá ta ra Isaac a. Nu ra Isaac, nu'a rá ta ra Abraham a. Nu ra Abraham, nu'a rá ta, ra Taré a. Nu ra Taré, nu'a rá ta ra Nacor a. 35 Nu ra Nacor, nu'a rá ta ra Serug a. Nu ra Serug, nu'a rá ta ra Ragau a. Nu ra Ragau, nu'a rá ta, ra Peleg a. Nu ra Peleg, nu'a rá ta, ra Heber a. Nu ra Heber, nu'a rá ta, ra Sala a, 36 Nu ra Sala, nu'a rá ta, ra Cainán a. Nu ra Cainán, nu'a rá ta ra Arfaxad a. Nu ra Arfaxad, nu'a rá ta, ra Sem a. Nu ra Sem, nu'a rá ta, ra Noé a. Nu ra Noé, nu'a rá ta, ra Lamec a. 37 Nu ra Lamec, nu'a rá ta, ra Matusalén a. Nu ra Matusalén, nu'a rá ta, ra Enoc a. Nu ra Enoc, nu'a rá ta, ra Jared a. Nu ra Jared, nu'a rá ta, ra Mahalaleel a. Nu ra Mahalaleel, nu'a rá ta ra Cainán a. 38 Nu ra Cainán, nu'a rá ta ra Enós a. Nu ra Enós, nu'a rá ta ra Set a. Nu ra Set, nu'a rá ta ra Adán a. Nε nu ra Adán, bi zänd Oja a.

Ra Jesús bi nu rán ts'äte ra zithu

A Nu ra Jesús bi πεχρι ja ra dąthe Jordán πε min 'youi rá Hogandahi Oja. Nε nu'a rá

Hogandąhi Oją bi bɛnbi da mba bʉ ma'ueni bʉ ja ra dąpo. ²Nɛ nyote pa nɛ nyote xui bim 'bʉpʉ ja ra dąpo ra Jesús. Nɛ bi ts'äp rá mbʉi, bi zä'a ra zi̞thu. Nɛ xíngui ts'ʉ bin sihmɛ gätho yʉ pa bim 'bʉpʉ, nɛ bin tumanthuhu bʉya. ³Nɛ bi 'yɛ̞n'a ra zi̞thu:

—Nu'bu majuani gue'e rá ts'unt'u Oja, dami japi dim hme ra do 'bengua, bi t'emp'a ra Jesús.

⁴Nu ra Jesús bi dąti:

—Nt'o't'i bu ja rám hman Oją: "Hinga hønt'a ra hmɛ dím 'buh yu ją'i pɛ nɛ'a gätho i man Oją," bi t'ɛmp'a ra zithu. Nɛ him bi 'yøt'a bi sifi.

⁵Pε nubʉya, nu ra zithu bi zix a ra Jesús bʉ ja n'da ra t'øhø xʉn hɛ̞ts'i, nɛ bi 'yuti hapʉ gätho 'bʉ'ʉ ja yʉ́ ts'ɛdi yʉ ts'ʉt'abi ua ja ra häi, ⁶nɛ bi 'yɛ̞mbi:

—Gätho guí nu ya ga 'da'a'i, nguetho ma mbɛtigä. Ya bin'daqui nɛ sä ga unni to'o gätho dín nde ga unni. ⁷Nε nu'bʉ gan dạnyahmu bʉ ja ma gua nɛ gui thạndegui, ga 'da a i gätho guín nu ya, i ɛn'a ra zithu.

⁸Nu ra Jesús bi dati:

—"Hønt'a Oją, ra Hmu, ga thạndehu ne ga ørpahu rá 'befi a," i ɛm bu ja rám hman Oją, bi 'yɛn'a ra Jesús.

⁹Nubʉya, nu ra zṭthu bi zix mahøn'a a ra Jesús bʉ ra hnini Jerusalén, nɛ bin tøpʉ magąts'i thoho ra dạniją. Nɛ bi 'yɛ̞mbi:

—Nu'bu majuani gue'e rá ts'unt'u i Oja, damin säqui, gui sonu häi, ne hin hapu gui 'uaqui, ¹⁰nguetho nt'o't'i bu ja rám hman Oja:

Nu'a Oją ba pɛn'dʉ yʉ́m 'bɛhni da mbäx'i i.

¹¹ Ne da bent'i i ne hin hapu gui 'uaqui, i em bu ja rá t'ohni Oja, bi 'yen'a ra zithu.

¹²Nu ra Jesús bi dati:

—Pε nε'a i mam bu ngue: "Nu Oją ma Hmuhu njongui sä da zä'a ngue da bą 'bu majuani da 'yøt'a im man'a," i εm bu ja rá t'ohni Oja, bi 'yɛn'a ra Jesús.

¹³Nu'bʉ mi gua'a bi man yʉ́n ts'äte ra zi̞thu, bi 'uepʉya, bi zo'a ra Jesús 'da yʉ pa.

Ra Jesús bi dump' rá 'bɛfi bu ja ra xɛqui Galilea

¹⁴Nu ra Jesús bi mbeng bu ja ra häi Galilea, min 'youi rá Hogandahi Oja. Ne gätho yu ja'i mi 'bupu bi 'yø'a i øt' ra Jesús. ¹⁵Ne bi xänba yu ja'i bu ja yu nija, ne gätho bi numanho a.

Nu ra Jesús bi mba bu ja ra hnini Nazaret guepu bin te

¹⁶Nu ra Jesús buya bi mba bu ja ra hnini Nazaret, guepu bin te. Nu ra pa ran säya bi mba bu ja ra niją tengu zại mi ørpu hapu mí 'yo. Nε bim 'bäi ngue da nɛh rám hman Oją. ¹⁷Nε bin t'un'na rá søcuą bi 'yo't'a ra pøngahyą Isaías, nɛ bi tunts'a ra søcuą guepu i ɛ̞na:

¹⁸ Nu'a Oją bi 'yenscä rá Hogandahi nguetho bi huangä ne bá pengä ga xih yu hyoya ran ho ma'da'yo.

Bá pɛngä ngue ga hurpa yɨ mbɨi to'o i ja yɨ dumbɨi.

Ne ga xocua u to'o xí bent'a ra zithu tengu'bu i ofädi u.

Ga xocpa yún 'yomfɛni yu ja'i nɛ da ba'a majuani rá 'yu Oja Ne ga japi him man zä ran u u di unba yú hmu.

¹⁹ Nɛ ga xih yu ja'i ngue bi zøn ra ora da 'yørpa rá mate Oja u, i m bu ja rá søcua ra Isaías guepu bi nɛh ra Jesús.

²⁰Nu ra Jesús 'bʉ mi gua'a bi nɛh ra søcuą, bi mbants'i, bi uni da 'bɛs' mahøn'a ra søcuą. Nɛ bi hyuh pʉya ngue da xi ʉ 'bɛ'a mí mam bʉ. Nɛ gätho yʉ jạ'i mi 'bʉpʉ ja ra niją bi hyɛt'a ra Jesús. ²¹Nu'a bi 'yɛna:

—Nu'a dá nεcä ya, mi mam bu ja rá søcuą ra Isaías ngue mi ma din ja, nε bin ja a ya, nguetho dí 'bucä ua, bi 'yɛna.

²²Nε gätho yʉ jạ'i bin yamanho nangue ra Jesús nε bi hyonya thoho nguetho mahotho a bi man ra Jesús bʉ ja ra niją. Nε ε̞n'ʉ:

—Hanja ngubu i øt'e, ɛn'u nguetho im bɛni gue ra Jesús rá ts'unt'u ra José.

²³Nu ra Jesús buya bi 'yɛ̞mp'ʉ:

—Masque guí nde gui xiju a ram hma i ɛna: "Grá 'yøthebate, damin hoczehe," masque guí nde gui xiju a, nguetho guím bensehu, hin dí øt'ua ja ma hnini zehe u yun t'øt'e nuixte tengu dá øt'ä bu ja ra hnini Capernaum, bi 'yɛna. 24 Majuani dí xi ahu, n'da rá pøngahya Oja hingui hnumansu bu ja rá häizehe. ²⁵Njabu bi 'yøt' ra pøngahya Elías 'bu maya'bu. Xun ngu yu xisu xí du yú ndø mi 'bui ngue yú mijudíohu, gue'bu him bin 'ye hyu jeya made, ne bin ja ra thuhu bu. 26 Pe him bi mbäx'a n'da ra xisu xí du rá ndø bu ja rá häizehe, pegue bi 'ben bu ra hnini Sarepta guepu ra häi Sidón, da mbäx a n'da ra xisu mi 'bupu, bi 'yɛna. 27 Nɛ ngutho bi 'yøt' ra

pøngahyą Eliseo, guexta'a xun ngu yú mijudíohu mi hɛmb ra t'axca'ya, pɛ xínga n'da bi hoc'a ra pøngahyą ngue yú mɛnguzɛhɛhu, hønt'a ra hmudofui Naamán, ra mɛngu bu ra häi Siria, bi hoqui, bi 'yɛn'a ra Jesús.

²⁸Nε nu'bu mi man'a ra Jesús a bi ma, nu yu ją'i mi 'bupu ja ra niją εmmε bin cuε buya. ²⁹Nε bi ndants'u bi bɛnt'a ra Jesús nε bi zixpu mayą ra nyuni, im bɛni da hyøm bu ja ra mba'ye. ³⁰Pε nu'a ra Jesús bi tho in de bu 'buh yu ją'i, nε bi zopu u, nε hin te bin jap'a.

Bi hoc'a n'da ran 'yohu min 'youi ra zithu a ra Jesús bu ja ra niją

³¹Nɛ nu'a ra Jesús bi mbeng bu ja ra hnini Capernaum bu ja ra häi Galilea, nɛ i xänba yu ja'i 'bu ra pa ran säya. ³²Nɛ gätho yu ja'i bi hyonya thoho nangue rán xädi a, nguetho ra Jesús bi 'yuti xun ho ngue mi ja rán t'ɛdi gue'bu mi xänbi.

33 Nu n'da ra pa mi 'bupu ra Jesús bu ja ra danija ne mi 'bupu n'da ran 'yohu min 'youi ra zithu, ne emme nts'edi bi mbafi, ne bi 'yena:

34—Gra Jesús, ra mengu Nazaret, 'be'a guí nde gui 'yørcahe, ha gui juaje ya. Nugä dí pącä to'o i, rá Hogam 'behni Oją i.

35 Ne nu ra Jesús bi 'yembi:
—Damin he ne gui pøm bu ja rá mbui na ran 'yohu.

Nɛ nu'a ra zithu nts'ɛdi bi hyømma häi ran 'yohu bu 'bäh yu ja'i nɛ bi bøm bu rá mbui ran 'yohu buya, pɛ hin hapu bi unba ran 'yohu. ³6Nɛ bi hyonya thoho yu ja'i 'bɛ'a bin ja na ran 'yohu. Nɛ bin 'yɛ̞mzɛhɛ n'da ngu n'da: "'Bɛ'a ní ts'ɛdi i ja na ran 'yohʉ nɛ i sä i høn'a thi yʉ zi̞thu, " bin 'yɛ̞mzɛhɛ ʉ.

³⁷Nɛ bi t'øde gätho ra xɛqui bʉ 'bɛ'a bi 'yøt'a ra Jesús.

Ra Jesús bi hocpa rá suto ra Simón Pedro

38 Nu ra Jesús buya bi bøm bu ja ra niją, bi mba bu ja rá ngu ra Simón Pedro. Nɛ nu'a rá suto ra Simón Pedro, xun u, nts'edi ra pa mi ja. Nɛ bi si a ra Jesús ngue xun u a ra xisu. 39 Nu ra Jesús bim 'bäpu mi 'bɛn'a ra hyɛnni, nɛ bi ma ngue da bøn'a ra pa.'Bex bi bøn'a ra pa, hin hapu xun u buya. 'Bex bi ndants'a ra xisu nɛ bi hoc ran sihmɛ, bi 'uin'u.

Nu ra Jesús bi hoqui xun ngu yu ją'i

⁴⁰Nɛ nu'bu mí yuh ra hyadi, gätho yu hyɛnni bi ts'ixpu 'buh ra Jesús. Nɛ 'bex bi yan'u yu hyɛnni 'bu mi mba nthädi n'da ngu n'da u, bi dä'a ra Jesús. ⁴¹Nɛ yu zithu min 'yohu 'da yu ja'i bi japi da bøn'u . Nɛ nts'ɛdi i mba'u, i ɛn'u:

—Nu'i, rá Ts'unt'u i Oją, bi t'ɛmp'a ra Jesús.

Pɛ nu ra Jesús him bi japi din yą nguetho mi pą'ʉ gue ra Cristo a ra Jesús.

Nu ra Jesús bi man rám hma bu ra xεqui Galilea

⁴²Nε nu'bʉ mi hyax bʉya, t'ʉxuditho bi mbasɛ bʉ ma'ueni ra Jesús. Nu yʉ jạ'i bi hyoni gue'bʉ go mi dịni, nɛ him min nde'ʉ da mba ra Jesús. ⁴³Pε nu'a ra Jesús bi 'yɛ̞mp'ʉ: —Nugä jatho ga mbagä mi'da yu hnini, ga mam bu ran ho ma'da'yo, ga xih yu ja'i 'bɛpu ní manda rá ts'edi Oja ua, jananjabu bá pɛngä Oja, bi 'yɛna.

⁴⁴Nε bi thopu ja mi'da yu hnini ja ra xεqui Galilea buya, nε bi mam bu rám hma bu ja yu niją.

'Da yʉ mbahuą bi jap'a ra Jesús xʉn ngu bi dɛ yʉ huạ

Nɛ man'da ra pa, ra Jesús mi 'bäpu ja ndendadehe Genesaret. Nɛ ɛmmɛ mi du bu yu ja'i in nde da 'yøh rám hman Oja, nɛ hingui sä bu dim 'bä'a ra Jesús. 'Nɛ bi nu, i høpu yoho yu mbosa hin te i ja bu mbo. Nɛ bi zo'u yú mbɛti bu ndenthe gue'bu mi mben yú xit'a. 'Nu'a n'da, rá mbɛti ra Simón Pedro, nɛ bi hyu'a ra Jesús. Nɛ bi xi'a ra Simón da gon'i ts'u ra mbosa. Nɛ nu yu ja'i bim 'bäpu ndenthe u. Nu ra Jesús bi xänba u yu ja'i buya. 'Nɛ nu'bu mi gua'a bi man ra Jesús bi 'yɛmp'a ra Simón:

—Dami thạm bu xun hệ ra dehe, ne gui 'yem bu ni xit'ạ. Guepu da zä gui the yu huą.

⁵Pε bi 'yɛn'a ra Simón:

—Xänbate, gätho ra xui dám pεhmbe nε hin te dá thεhe yu huą, pε nu'bu guím ma, ga εmhbe mahøn'a, bi 'yɛna.

⁶Nɛ bi 'yɛm bʉya, nɛ xʉn ngu bi dɛ yʉ huą gue'bʉ go mi mbʉdi bin tʉn yʉ́ xit'ą. ⁷Nɛ bi xi'ʉ yʉ́ mimbahuahʉ di zɛ'i ts'ʉ. Nɛ bi yuts'i gätho yoho yʉ́ mbosa, nɛ in nde da dom bʉ mbo ra dehe yʉ mbosa nangue nán hyʉ yʉ huą. ⁸Nɛ nu'bʉ mi nu ra Simón Pedro 'bɛ'a bin ja, bin dąnyahmu bu ja rá gua ra Jesús, nɛ bi 'yɛ̞mbi:

—Dami 'ue'i ts'u nanguecä nguetho nugä drá dądits'oquigä, bi 'yɛ̞n'a ra Pedro.

⁹Ngubu bi ma nguetho bi hyonya thoho ngue xun ngu yu hua bi dε. ¹⁰Nε'a ra Jacobo nε ra Xuua ngue yú ts'unt'u ra Zebedeo, bi hyonya thoho u. Nε nu'u mi comhbu rá 'bɛfi a ra Pedro. Pε nu ra Jesús bi 'yɛmp'a ra Simón:

—O guín su nɛ nuya gui du'mi gui hyon yu ja'i to'o da 'yɛc'yɛigui, bi 'yɛmbi.

¹¹Νε nu'bʉ mí zøm bʉ ndenthe ʉ yʉ́ mbosa bʉya, bi dɛn'na ra Jesús.

Nu ra Jesús bi hoc'a n'da mí hɛmb ra t'axca'ya

12 Nu n'da ra pa mi 'bupu ja n'da ra hnini ra Jesús. Nɛ'a n'da ran 'yohu mi 'bupu, mi hɛmb ra t'axca'ya gätho rá jạ'i. Nɛ nu'a ran 'yohu 'bu mi nu a ra Jesús, 'bex bim 'bɛmfo bu ja rá gua ra Jesús, nɛ bi 'yäp ra mate ran 'yohu ngue in nde da yani, bi 'yɛmbi:

—Ma Hmu i nu'bu guín nde, da zä gui jaqui da yangä.

13 Nu ra Jesús bi dąti nɛ bi 'yɛmbi:
—Nugä, dín nde ngue 'bex da zä i.
Nuya bi yan'a ya, bi 'yɛmbi.

'Bex bi zä'a ran 'yohu buya.

¹⁴Nɛ nu ra Jesús bi hɛcua a ran 'yohu gue hin da mam bu 'buh yu ja'i, pɛ da mam bu 'buh yu mbäja. Nɛ bi 'yɛmbi:

—Ní mba bu 'buh yu mbäją, gui 'yøt'a rán t'ɛdi ra Moisés ngue da 'yøt'a n'da 'bu bi yan'a ra t'axca'ya, n'dahma da bah yu ja'i ngue majuani bi yan'i, bi 'yɛn'a ra Jesús.

15 Pɛ nu'u yu ja'i guemhma mi ma hønbu go hapu ja yu hnini 'bɛ'a gätho øt'a ra Jesús, nɛ man'da xun ngu bi mba bu mi 'bui ngue da 'yøsɛ u 'bɛ'a i man'a, ngue in nde din hocpa yún u i hɛmp'i 'da'u. Nɛ xun ngu bi hoc'a ra Jesús, madague'a hønt'a go mán u mi hɛmp'u. 16 Nu'a ra Jesús buya mi pa bu ma'ueni guepu hingui 'buh yu ja'i, din yaui Oja.

Nu ra Jesús bi hoc'a n'da mi ts'a rá ją'i

¹⁷Nu n'da ra pa bi xänba yʉ ją'i ra Jesús. Ne mi 'bupu 'da yu fariseo ne 'da yu xänbate niją, xpí 'yɛ'u hønbu go hapu i ja yu hnini bu ra xequi Galilea ne ra xequi Judea, nepu ra dahnini Jerusalén. Ne nu'a ra Jesús bi 'yut'u ngue min 'youi xun ngu rá ts'edi Oją 'bu mi hoc yun zäman'u. ¹⁸Νε bi zøm bu 'da yun 'yohu, bá tu n'da ran 'yohu xun u, mi ts'a rá ją'i a, ox ra 'beza. Nε min nde xtán yurpu mbo 'buh ra Jesús. 19 Pe emme du yu ja'i bu ja ra goxthi, ne hin hapu sä dí yut'i. Janangue'a bi zix ra därgehe bu maxøts'e ra ngu, nε bi xospa rá 'bet'e nε bi cą'ma ran 'yohu bu made i 'bä'a ra Jesús. Nε ox ra 'beza 'bu mi camp'u. 20 Bi bah ra Jesús buya gue i ec'yei xun ho u yun 'yohu gue i ja rá ts'edi a, 'bu mi nu'a bi 'yøt'u. Janangue'a bi 'yemp'a ra därgehe:

—Amigo, ya ma punbi ni ts'oqui, bi 'yɛ̞mbi.

²¹Pε nu'u yu fariseo nε yu xänbate niją bin 'yɛmzɛhɛ u: "Hanja na ran 'yohu ngue ɛna da 'yøt'a i øt' Oja, nε ya ɛna sä di punba rá ts'oqui n'da ra ja'i. Hingui numansu Oją na," bi 'yɛ̞mp'ʉ yʉ xänbate nɛ yʉ fariseo.

²²Pε nu'a ra Jesús i pądi 'bε'a im bęn'ʉ, nε bi 'yε̞mp'ʉ:

—Hanja in jabu guím bɛmhbu.

²³ Ha guím bɛmhbu ngue nte ní
mbatho dá xicä ran 'yohu, ngue
rá ts'oqui ya xum punbi. Ha guím
bɛmhbu man'da xquí pahmbu ngue
i ja ma ts'ɛdi 'bu ga xifi da ndants'i,
din 'yo.

²⁴ Pɛ ga ut'ahu ngue i ja
man t'ɛdi ua ja ra häi ga punba
yú ts'oqui n'da ra ja'i, ngue ga japi
din 'yo na ran 'yohu, guecä gue dán
ja'igä ua ja ra ximhäi, bi 'yɛn'a ra
Jesús.

Ne nubuya bi 'yemp'a mí ts'a rá ja'i:

—Dami ndants'i, gui cax ni fidi ne gui mba ni ngu, bi t'embi.

²⁵'Bex bi ndants'a ran 'yohu bi gax rá fidi ne bi mba rá ngu, ne bi 'yɛspa Oja bu ní mba. Ne gätho yu ja'i mi 'bupu bi nu 'be'a bin ja. ²⁶Ne gätho bi hyonya thoho u, ne bin su, bi 'yɛspa Oja ne bi 'yɛn'u:

—N'da ran t'øt'e nuixte dá nuhu ra pa jabu ya, bi 'yɛ̞n'u yu ja̞'i.

Ra Jesús bi xih ra Leví da denni

²⁷M'bɛjua bʉya, bi bøm bʉ ja ra ngu ra Jesús, nɛ bi thopʉ mi hu'a ra Leví, guepʉ mí hạc rán ju't'i ra häi, nguetho ra hyacahäi a. Nɛ nu'a ra Jesús bi 'yɛ̞na:

—Dami tɛngui, bi t'ɛmp'a ra Leví. ²⁸Nu ra Leví bʉya, 'bex bi ndants'a, bi zopʉ gätho mi ja nɛ bi dɛn'na ra Jesús.

²⁹Nɛ nu'a ra Leví bʉya, bi 'yøt'a n'da ran sihmɛ xʉn ndoho bʉ ja rá ngu, ngue bin sihmɛ bʉ ra Jesús. Nɛ bi zøm bʉ ja ran sihmɛ xʉn ngu yʉ hyącahäi nε xun ngu mi'da yu ją'i, 'darpu bin sihmεhu ra Jesús. ³⁰Pε nu'u yu fariseo nε yu xänbate niją bi 'yɛ̞na:

—Hanja gní sihmehu yu dądits'oqui ne yu ziyate hyącahäi, bi t'emp'u yú xädi ra Jesús.

³¹Nu ra Jesús bi xi a n'da ran t'uti 'bu mi dat'u:

—To'o i 'buh mán zaqui hingui hon'a to'o da 'yøthe, pε hønt'a to'o xun u i hon'a da 'yøthe. ³²Nugä ma 'bɛfigä ngue ga xih yu dadits'oqui di päh yún 'yomfɛni. Pε nu'u to'o ɛnsɛ mahoqui yú mbui, nɛ hingui sä ga zɛ'u, bi 'yɛn'a ra Jesús.

Bi t'än'na ra Jesús hanja him bi 'yɛ't' yún sihmɛ yú xädi

³³Νε bi t'εmp'a ra Jesús:

—Nu yú xädi ra Xuua Nxixyą nząi ε't' yún sihmε 'bu i yaui Oja, nε'u yú xädi yu fariseo, pε nu ni xädi hin jam'bu ε't' yún sihmε. Hanja ngue in jabu, bi 'yɛmbi.

34 Nu ra Jesús bi dąti:

—Pε nu'ʉ i 'bʉpʉ ja ran thati, hin da du yú mbʉi nguetho 'bʉpʉ a ran 'yohʉ din thati. Hin da 'yɛna ngue hin din sihmɛ ʉ. ³⁵Pɛ da zøn ra ora da ts'ispa a ran 'yohʉ, nɛ ja da 'yɛ't' yún sihmɛ bʉya, bi 'yɛn'a ra Jesús.

³⁶Ne xø bi xih man'da ran t'uti, ngue da 'yuti hingui sä yú xädizehe ra Jesús da den'na ran yonxädi, ne bi 'yemp'u:

—Njo'o n'da ra ją'i da xɛn ma'da'yo rá pahni ngue da mbørba rá 'yapahni, nguetho nu'bu da mbørba a, hin da bømanho nɛ di ts'ontho a ma'da'yo. ³⁷Nɛ njo'o to da xirpu ra 'yaxfani mbot'asɛi ra vino ma'da'yo, nguetho nu'bu bin

hogui, da føh ra 'yaxfani buya. Ne dim fän ra vino ne di ts'on'a ra 'yaxfani, gätho dim 'bedi. ³⁸Nu'a ra vino ma'da'yo da sirpu ma'da'yo ra xifani, ngue hin dim 'beh ra vino, ne xín din ts'on'a ra xifani.

³⁹Nɛ to'o in zại i si ra nyomvino, pɛ hingui nde a ra vino ma'da'yo, nguetho man'da xu cuhi ra nyomvino, ɛn'u. Guín jahu bu ngue hin guí numanhohu man xädigä, bi 'yɛn'a ra Jesús.

Nu ra Jesús bi ma 'bɛ'a da t'øt' ra pa ran säya

6 Nu n'da ra pa ran säya, nu ra Jesús nɛ yú xädi bi thopu ja n'da ran uatrigo. Nu u yú xädi bi duc'i 'da yu trigo. Bi dɛnt yú 'yɛ'u yu trigo, bi za buya. 2Nɛ nu'u 'da yu fariseo bi 'yɛ̞mp'u:

—Hanja in jabu guí øthu, nguetho i mam bu ja man t'ɛdihu hingui sä gui 'yøthu ra 'bɛfi a ra pa ran säya, bi 'yɛn'u.

³Nu ra Jesús bi dąti:

—Ha hin guí pąhmbu 'bɛ'a mam bu ja rá søcuą Oją ngue nɛ'a ra David bi mbɛsta man'da rán t'ɛdi Oją, nɛ'u min 'yohu, nu'bu mi tumanthuhu.

4 Nu'a ra David bi yurpu ja rá ngu Oją nɛ bi zi yu thuhmɛ rán t'unni Oją oxpu ja ra mɛxa, nɛ bi un'du min 'yohu. Nɛ hønsɛ yu mbäją i sä da zi u. Pɛ hin guím bɛmhbu ra ts'oqui bi 'yøt'a ra David nɛ yun 'yohu nguetho xun ho bi 'yøt'u, bi 'yɛn'a.

⁵Nε man'da bi man'a ra Jesús, bi 'yɛ̞na:

—Nε nugä ngue dán jąligä ua ja ra ximhäi, dra Hmugä,nε ja man tlędi ga mangä 'bε'a da 'yøt' yʉ jąli ra pa ran säya.

Ra Jesús bi hoc'a n'da ran 'yohu mi mbɛdi rá 'yɛ

⁶Nε xø man'da ra pa ran säya, nu ra Jesús bi xänba yʉ jạ'i bʉ ja ra niją. Nε mi 'bʉpʉ n'da ran 'yohʉ ra mbɛdi rán 'yɛi. ⁷Nɛ'ʉ 'da yʉ xänbate niją nɛ 'da yʉ fariseo mi 'bʉpʉ, mi tømthoho, in nde da nu 'bɛ'a da 'yøt'a ra Jesús ra pa ran säya, nguetho in nde di yąp'a. ⁸Pɛ nu ra Jesús i pądi 'bɛ'a im bɛn'ʉ. Nɛ bi xi'a ran 'yohʉ mi ja rá mbɛdi'yɛ:

—Ba ɛcua, damim 'bäcua da nu'a yu ją'i, bi 'yɛ̞mbi.

Ne 'bex bi mba bu ran 'yohu. ⁹Nu ra Jesús bi 'yɛmp'u buya:

—'Be'a i mam bu ja man t'ɛdihu, nda'a xun ho ga øthu. Ha i mam bu ga øthu ran ho uague ran ts'o ga øthu ra pa ran säya. Uague i man bu gan yanbahu rá te n'da uague i mam bu ga jafu da du n'da a ra pa ran säya, bi 'yɛn'a ra Jesús.

¹⁰ Nubʉya, nu ra Jesús bi hyɛt'ʉ yʉ ją'i, nɛ bi 'yɛmp'a ran 'yohʉ:

—Dami juan ni 'yε.

Nu'a ran 'yohu bi juan rá 'yɛ, nɛ bin hogui xun ho. ¹¹Pɛ nu yu fariseo nɛ yu xänbate nija ɛmmɛ bin cuɛ'u nɛ bi hyoni 'bɛ'a sä da 'yørpa ra Jesús.

Ra Jesús bi huahn'du 'de'mayoho yú xädi

12 M'bɛjua bʉya bi mba bʉ ja n'da ra nyuni ra Jesús, haxa ín yaui Oja. 13 Nu'bʉ mi hyats'i bi zohn'dʉ yʉ́ xädi ngue i ja a da xifi mahøn'a. Nɛ bi huahni 'dɛ'mayoho din 'yohʉ ngue yʉ́ 'bäihʉ. 14 Nɛ nu'ਚ bi huahni, gue'a ra Simón t'ɛ̞mbi ra Pedro, gue'a rấ thuhu bi xih ra Jesús a.

SAN LUCAS 6 122

Ne'a ra Andrés , rán 'yohu a ra Simón, ne ra Jacobo, ne ra Xuua, ne ra Felipe, ne ra Bartolomé. ¹⁵Ne ra Mateo, ne ra Tomás, ne man'da ra Jacobo rá ts'unt'u ra Alfeo, ne ra Simón Zelotes, ¹⁶ne ra Judas rán 'yohu ra Jacobo, ne ra Judas Iscariote, gue'a xí dä'a ra Jesús 'bu m'bejua. Ne gue'u bi huan'na ra Jesús u ngue yú 'bäihu.

Xun ngu yu ja'i bi xanba a ra Jesús

17 Nubuya, nu ra Jesús nɛ yú xädi bi gapu ja ra nyuni nɛ bin thɛhu xun ngu yu ja'i bu xun juani, bí nɛxpu yu hnini ra xɛqui Judea, nɛpu ra dahnini Jerusalén, nɛpu ndendadehe, guepu i ja ra hnini Tiro nɛ ra hnini Sidón. Nɛ nu'u, bi zøm bu ngue in nde da 'yøde 'bɛ'a man ra Jesús, nɛ nu'u mi'da buya, in nde da mba ma hoqui u. Nɛ nu ra Jesús bi hoc'u.

18 Nɛ xun ngu u min 'yohu ra zithu bi zøm bu, nɛ nu'a ra Jesús bi hyøn'a thi u.

19 Nɛ gätho u min nde da därpa rá ja'i ra Jesús, nguetho gätho yu hyɛnni bi hoc'a nangue rá ts'ɛdi.

Ra Jesús bi ma to'o din johya nε to'o da nu ra dumbui

²⁰Nε nubʉya, nu ra Jesús bi hyɛ̞t'ʉ yʉ́ xädi nɛ bi 'yɛ̞mp'ʉ:

—Guí hyoyahu, pɛ ya gá cuthu bu di manda rá ts'ɛdi Oją janangue'a mająpi ahu.

²¹Nε guí tumanthuhuhu, pε Oją di ja ahu gui timhbu a guí homhbu, janangue'a mająpi ahu.

Ne guí sähu ra dumbui ya, pe Oją da hyut'a ni mbuihu, janangue'a mająpi ahu.

²²Nɛ ngutho 'bu i san ahu yu ja'i, nɛ'bu i 'uegue nangue ahu,

ne'bu di c'aman'u ahu, ne'bu da ndøm mants'o ni thuhuhu ngue guí tengahu, guecä ngue dán ja'igä ua ja ra ximhäi, guemhma majapi ahu. ²³Gan johyahu, da hyu ni mbuihu 'bu din jabu da 'yøt'ahu yu ja'i, nguetho ngutho bi t'ørpa u yu pøngahya mam'bet'o, ne i ja 'be'a din 'da ahu ngue am 'be'ts'i mahets'i, bi 'yen'a ra Jesús.

24 Ne xø bi 'yemp'u:

—Pε í huɛhi maha ahu gyu mɛmbɛtihu ngue hønt'a ni mbɛti guím bɛmhbu, nguetho ya hin guin nuhu man'da ran johya njam'bu da guadi.

²⁵Nε í huệhi maha ahʉ, ngue guí εmhbʉ hin te gadí 'bɛhmbʉ, pɛgue gan tumanthuhuhʉ.

Í hughi maha ahu, ngue ja nin johya zehehu, nguetho m'bejua da du ni mbuihu.

²⁶Í hughi maha ahu ngue gätho i mamanho nangue ahu yu ja'i. Bin jabu yu hyäte pøngahya bi numanho gätho yu ja'i, bi 'yɛn'a ra Jesús.

Dami hugc nin suihu, bi 'ygn'a ra Jesús

²⁷Pε dami 'yøhmbʉ na ga xi ahʉ ya, bi 'yɛ̞n'a ra Jesús:

—Gui huệc nin suihu ne gui 'yợrpa ran ho u to'o i numan'u ahu. ²⁸Nε dami 'yäp Oją da mbäx'u di c'ąman'u ahu, ne gui 'yäp Oją da 'yɛnspa rán japi u di un'nahu. ²⁹Nε nu'bu n'da da mbɛp'a ni 'yoguhu, gui 'bät ni hmihu da mbɛp'a man'da nguadi ni 'yoguhu. Ne nu'bu n'da da gạn'na ni cotohu, ne'a ni pahni gui unhdu. ³⁰Dami unhdu 'bɛ'a gätho da 'yä ahu, nɛ

nu'a da thạn'nahu hingui 'yähmbu. ³¹ Nu'bu guí ndehu da 'yøt'ahu ran ho ni mijạ'ihu nde'bu gui 'yørpahu ran ho.

³²Pε nu'bʉ hønt'ʉ di huɛ̞c'ahʉ gui huɛjʉ, hin te di muui a 'bʉ, 'da'angu gá 'yøthu u him mahoqui yú mbui. 33 Ne nu'bu hønt'u bi 'yøt'ahu ran ho guí ørpahu ran ho, hin te di muui 'bu, nguetho in jabu øt'u him mahoqui yú mbui. ³⁴Ne nu'bu hønt'u guí pahmbu i jut'i guí hmit ni mbetihu, hin te di muui 'bu, nguetho gue'a i øt' yu ts'om'bäi, di hmit yú mits'om'bäihu ngue im beni da mba ma cospi rá mbεti. 35 Pε dí xi ahu, dami huεc nin suihu, ne gui 'yørpahu ran ho u, ne gui hmithu madague'a guí padi hin di cos'ahu. Nu'bu ngubu gui 'yøthu, gue'a nám fadi gue yú t'uhni ahu Oja. Ne i ja 'be'a di 'da ahu Oja buya. Nguetho gue'a i øt' Oja, gätho i ørpa ran ho madague'a hin da 'yɛn'u: "Jamadi Oją." Ne gätho i ørpa ran ho madague yu ts'om'bäi u. 36 Dami huge ni mija'ihu tengutho bu í hugc'ahu Oja ma Tahu, bi 'yɛn'a ra Jesús.

Hin gui 'yemhbu bi 'yøt' yu ts'oqui u mi'da yu ja'i

³⁷Nɛ man'da bi man'a ra Jesús, bi 'yɛ̞na:

—"Nuna bi 'yøt' yʉ ts'oqui," hin gui 'yɛmhbʉ, nɛ hin da t'ɛn'ahʉ gá 'yøthʉ yʉ ts'oqui 'bʉ. Nɛ 'yo gadí yafʉ ni mija'ihʉ nɛ hin da zɛp'ahʉ Oja, pɛ gam punbahʉ nɛ Oja di pun'nahʉ bʉya. ³⁸ Dami un'dʉ 'bɛ'a i hon ni mija'ihʉ, nɛ Oja man'da xʉn ngu di co'ts'ahʉ nɛ dim fons thoho a di 'da ahʉ xinda gue'a gadí

un ni miją'ihu. Nguetho da 'yøt'ahu Oją tengu guí ørpahu ni miją'ihu, bi 'yɛn'a ra Jesús.

³⁹Ne xø bi xi'a n'da ran t'uti, bi 'yena:

—Hingui sä n'da ra xädä da 'yut ra 'yu rá mixädäui, ts'urpu thoho da däpu ja ra hyɛ u. Nɛ ngutho n'da ra ja'i hingui sä da 'yut ran ho rá mija'iui 'bu hingui pasɛ ran ho. 40 Nɛ ngutho n'da ra xädi, man'da hingui ngu padi xinda gue'a rá xänbate, nɛ nu'bu bi juah rán xädi, 'da'ingu i pahmi a. Nu'bu ts'utho i pa'a ra xänbate nɛ ts'utho i pa'a rá xädi.

⁴¹Nε hingui sä gui mamhbu nangue to'o i ja zu ts'u ran ts'o 'bu xun ts'o ni mbuihu. ⁴²Hanja gní 'yɛmhbu gui zɛhmbu u mi'da yu ją'i di hoc yú mbui, nɛ εmmɛ go xun ts'o ni mbuizɛhɛhu. Jatho 'bɛ gui hoczɛhɛ ni mbuihu, ja da zä gui zɛhmbu u mi'da, bi 'yɛn'a ra Jesús.

Nangue rán dät'o dí fa'a ra za

⁴³Nε man'da bi man'a ra Jesús ngue bi 'yεna:

—Nu n'da ra hogaza hingui sä din zuh yún dät'o ngue hingui ho. Nε ngutho a n'da ra za hingui ho, hingui sä din zuh yun dät'o xun ho. 44 Nu yún dät'o i zupu, gue'a ctí pahmbu 'bɛ'a ní za a ra za, nguetho hingui sä din zuh yun dät'o ngue yu higo bu ja ra 'ujnza. Ne xín din zuh yun dät'o ngue yu uva bu ja yu t'ax'uini. ⁴⁵Ngutho n'da ra ja'i xʉn ho rá mbui, i øt' ran ho tengu i ja bu mbo rá mbui. Ne ngutho n'da ra ts'om'bäi i øt' ran ts'o tengu i ja bu mbo rá mbui, nguetho gätho a i ja bu mbo rá mbui n'da, gue'a ní bøn rá nde n'da a, bi 'yɛn'a ra Jesús.

Rán t'uti u i øt'a man ra Jesús ne'u hingui øt'e

⁴⁶Nε xø bi 'yɛn'a ra Jesús: —Hanja gní 'yɛnju ni hmuju ne hin guí øthu 'bɛ'a dí xi ahu. 47 Ga xi ahu rán t'uti u i øt'a dí mangä. ⁴⁸Nu'u, i øt'e tengu bi 'yøt'a n'da ran 'yohu bi hyø'a n'da rá ngu, ne xun he bi 'yamp' ra häi ngue da mbämp'u yu jado. Ne nu'bu mam bá sh ra mboxthe, nte bi jap'a ra ngu, nguetho mbo bim foxa ra jado. ⁴⁹Pε nu'ʉ i øh ma nde nε hingui øt'a dí mangä, rán t'uti u tengu n'da ran 'yohu bi hyøh rá ngu ne bi 'yex maxøts'e yu jado, ne nu'bu mambá ε'a n'da ra mboxthe, 'bex bi yøt rán ngu buya, bi 'yɛn'a ra Jesús.

Ra Jesús bi hocpa rá 'yεhε n'da ra hmudofui

Ne nu'bu mi gua'a man'a ra Jesús, bi mba mahøn'a bu ja ra hnini Capernaum. ²Ne mi 'bupu n'da ra hmudofui, ra mengu bu Roma a. Ne xun'u n'da rá 'yehe, nde da du. Ne nu'a ra hmudofui emme madi huec'a rá 'yehe. ³Ne nu'bu mi 'yøde 'bupu ra Jesús bá pehni 'da yu ngurbi bu ja ra hnini ngue da zix'a ra Jesús di hocpa rá 'yehe. ⁴Ne nu'bu mi zøm bu 'buh ra Jesús, bi 'yäp ra mate da mba, ne bi 'yembi:

—Dín nde gui 'yørcahe ra mate gui mba, nguetho nu'a ra hmudofʉi ra hocją'i a, ⁵nε ε̞mmɛ di huɛ̞gahʉ ngue dyʉ judíohʉ. Nɛ nu'a bi guzɛhɛ a í thøh ma nijąhʉ, madague hing ra judío a, bi 'yɛ̞mbi.

⁶Nu ra Jesús bi mbähä, nɛ nu'bʉ mi ts'ʉtho da zøm bʉ ja rá ngu a ra hmudofʉi, pɛ nu'a ra hmudofʉi bá pehni 'da yú amigo mahøn'a, din c'athu a ra Jesús, da 'yembi:

—Hingui jatho gui søm bu ja ma ngu, nguetho nugä hin dí sucä tengu i, ⁷xíngui sä ga ɛna ga mba gan yaui, nε hin drá judíogä. Pε dí padi ngue i ja ni ts'edizehe, ngue nu'bu guim ma da yani, ne 'bex gue da yani. 8 Tengu thohogä bin 'dac'i ts'u man t'ɛdi, nɛ nu'bu i ja 'bɛ'a dí xi u ma dofui, nɛ'u ma 'yɛhɛ, 'bexgue 'dahmantho in ja. Ne ngutho i, sä guim mantho bu guí 'bäi nɛ 'bexgue da yan buya, bi 'yɛn'a ra nde bá pɛhna ra hmudofui ngue bi man'u yú amigo. ⁹Nu ra Jesús bi hyonya thoho 'bu mi 'yø'a bi man'u yun 'yohu ngue bá ρεhna ra hmudofui, ne bin yegui bi xi'u mí tenni, ne bi 'yena:

—Xínga n'da ma mijudíohu dá tịngä ngue i ɛ̞c'yɛi i ja ma ts'ɛdi tengu a ran 'yohu, bi 'yɛ̞n'a ra Jesús. Nuya bin ja a bi 'yäqui, bi 'yɛ̞na.

¹⁰Nε bi mbeng bu ja ra ngu u yú amigo a ra hmudofui buya, nε bi nu'a rá 'yɛ̞hɛ ra hmudofui ngue ya xí zä.

Nu ra Jesús bi xox rá ts'unt'u n'da ra xisu xí du rá ndø

¹¹Man'da ra pa buya, ra Jesús bi mbähä yú xädi bu ja ra hnini Naín. Ne xun ngu yu ja'i mi tenni. ¹²Ne nu'bu mi zøm bu ndehnini, ba ¿pu yu 'yägui, ba tu rá ts'unt'u n'da ra xisu xí du rá ndø. Ne njo'o man'da rá ts'unt'u. Ne xun ngu yu ja'i min 'yohu yu 'yägui. ¹³Ne nu ra Jesús 'bu mi nu a ra xisu buya, bi hu¿c'a ne bi 'y¿mbi:

—O guí zoni, εn'a.

¹⁴Νε nubʉya, bi dä'a ra huada mi o ra du a ra Jesús nε bim 'bä'ʉ yʉn dute. Nu ra Jesús bi 'yɛ̞mp'a ra du bʉya:

—Grá ts'ʉnt'ʉ, dami ndants'i, bi 'yɛ̞mbi.

¹⁵Nɛ nu'a xí du 'bex bi ndants pu ja rá huada nɛ bin yą. Nu ra Jesús buya, bi xi'a rá mbe da zits'i. ¹⁶Nɛ gätho yu ją'i mi 'bäpu bin su, nɛ bi 'yɛspa Oja u.

—Nuya, n'da ra pøngahyą nuįxte dí 'buhmbu ua, nε Oją da yąnju ya, yú ją'igähu Oją ya, bi 'yɛn'u.

¹⁷Nɛ gätho yʉ jạ'i mi 'bʉpʉ, nɛpʉ ra xɛqui Judea, bi ma 'bɛ'a bi 'yøt'a ra Jesús.

Ra Xuua Nxixyą bi mbehni 'da da 'yänni to'o a ra Cristo

¹⁸Nε bi si'a ra Xuua Nxixyą 'bɛ'a bi 'yøt'a ra Jesús, bi man u yú xädi. ¹⁹Janangue'a nu ra Xuua bi zon'du yoho yú xädi ngue da mbɛn bu 'buh ra Jesús nɛ da 'yänni: "Ha gue'e ra Cristo mi hma ba ɛhɛ, uague ga thoqui ga tømhbe," gui 'yɛnui, bi 'yɛn'a ra Xuua. ²⁰Nɛ nu'bu mi din'a ra Jesús u yúm 'bɛhni ra Xuua, bi 'yɛmbi:

—Nu'a ra Xuua Nxixyą bá pɛngä'be nguetho in nde da bądi gue'bu gue'e ra Cristo i hma ba εhε, uague ga thoqui ga tømhbe, bi 'yɛn'u.

²¹Nε 'bex bi hoc'ʉ 'da yʉ hyɛ̞nni a ra Jesús bʉya, nɛ bi hyøn'a thi yʉ zɨ̞thu ngue mín 'yohʉ 'da yʉ jạ̞'i, nɛ bi xocpa yʉ́ dä yʉ xädä. ²²Nɛ nubʉya, bi 'yɛ̞mp'ʉ yʉ́ xädi ra Xuua:

—Ní mbɛ ya, gui xihmi ra Xuua 'bɛ'a gá nuui ua, nɛ 'bɛ'a gá 'yøhmi ya. Gui 'yɛnui: "Nu yʉ xädä i nu ran nɛqui ya, nɛ yʉ dogua i sä i 'yo ya, nɛ nu'ʉ mi hɛmb ra t'axca'ya bi

yạn'u ya, nɛ yu gogu i øhnahyą ya, nɛ'u xí du bi ndants'i, nɛ yu hyoya i ø'a ran ho ma'da'yo ya. ²³Din johya u to'o i ɛc'yɛi xun ho, nɛ hin di u't' yú mbui u," gui 'yɛnui, bi 'yɛn'a ra Jesús.

²⁴Nɛ nu'bu mi mbenc'u yum 'behni ra Xuua buya, nu ra Jesús bi ma 'be'a øt' ra Xuua, ne bi 'yemp'u yu ja'i:

—Nu'bu gá mbähä bu ma'ueni ngue gá nuhu ra Xuua, 'bɛ'a gá bɛmhbu ngue gua nuhu bu. Ha guá nuhu n'da ran 'yohu xun güent'i tengu n'da ra xithi i ɛn ran dahi. ²⁵Uague gá nuhu n'da ran 'yohu mi he ra pahni xum hmadi. Pɛ nu'u, 'bupu ja ra ngunts'ut'abi u. ²⁶Uague guá nuhu n'da rá pøngahya Oja. Majuani a gá nuhu, nɛ hinga hønt'a n'da rá pøngahya Oja, pɛ nu'a, xun hɛts'i rá ts'ɛdi xinda gue'u mi'da yu pøngahya. ²⁷Gue'a ra Xuua i hmam bu ja rá søcua Oja, gue i ɛna:

Nugä, ga pɛhnˈna nˈda mam
'bɛhni dim 'bɛt'o bu gní mba,
da xih yu ja̞'i da døp'e xun ho,
i ɛm bu ja rám hman Oja̞, bi
'yɛ̞n'a ra Jesús.

²⁸Xínga n'da ra ją'i mi 'bui ngue nuixte rá 'bɛfi tengu ra Xuua. Pɛ nu'a to'o dim 'bupu di manda rá ts'ɛdi Oją, nu rá 'bɛfi da 'yørpu madague'a ts'utho, pɛ man'da nuixte a xinda gue'a ra 'bɛfi i øt' ra Xuua ya, bi 'yɛn'a ra Jesús.

²⁹Nɛ nu yu hyacahäi nɛ mi'da yu ja'i xí xixyaba ra Xuua Nxixya, 'bu mi 'yø a bi man ra Jesús, bi ba'u xun ho i øt' Oja. ³⁰Pɛ nu yu fariseo nɛ yu xänbate nija, ngue him bi nde'a ran xixya bi 'yøt' ra Xuua, him bi numanho'a bi nde Oja da 'yørpa'u. ³¹Nɛ xø bi 'yɛn'a ra Jesús:

SAN LUCAS 7 126

—'Bɛ'a nín t'uti ga xi ahu ngue gui pąhmbu 'be'a guí øthu. 32 Guí øthu tengu øt' yu t'uhni 'bu in eni ne i ɛmp'u yú mit'uhnihu: "Nugähe, dá pεhmbe ra 'bida pε nu'ahu hin gán nehmbu," en'u 'da. Ne xø en'u mi'da buya: "Pε nugähe, dá pεhmbe yu thuhu tengu'bu xun du n'da, ne nu ahu hin gán zomhbu," ¿n'u mi'da. ³³Ne ngutho guí øthu tengu øt' yu t'uhni, ngue nu ra Xuua Nxixya bi zøcua, ne him bin sihmehu yu ja'i nε xím bi zi ra vino. Pε nu ahu gá 'yɛmdahu in 'youi ra zithu. 34Pɛ nugä, ngue dán ja'igä ua ja ra ximhäi, ne bá ecä ne dí sihmehe yu ja'i, ne nu ahu sä guí enju drá hyugugä ne drá mihnigä, ne guí ɛnju dín amigogähe yu ziyate hyącahäi nε yu ts'om'bäi. 35Pε nu'bu majuani i ja rán 'yomfeni n'da, da badi to'o u ngue majuani bi un rán 'yomfeni Oja, bi 'yen'a ra Jesús.

Nu ra Jesús bin sihmε bu ja rá ngu n'da ra fariseo í Simón

³⁶Ne n'da ran 'yohu mí ten rán xädi yu fariseo, bi xi'a ra Jesús din sihme bu ja rá ngu. Ne bi mbähä ra Jesús buya, din sihmε bu. ³⁷Νε nu'a n'da ra xisu ra 'yomt'eni a, ne nu'bu mi 'yøde 'bupu ra Jesús, bi yurpu mi hu a ra Jesús, i tu n'da ra xito án t'øt'e ra do alabastro, mi po ra 'yɛthi yumanho, xum hmadi di muui. 38 Ne nu'a ra xisu mi hupu ja rá gua ra Jesús, nε mi zoni. Janangue bi mboxpu ja rá gua ra Jesús a rá guidä,ne bi ducua rá gua yú xtą, ne emme zuspa rá gua ra Jesús, ne bi xispa rá gua ra 'yethi yumanho. 39Ne nu'a ra mengu bu, 'bu mi nu 'bɛ'a i øt'a ra xisu, bi bɛ̞nsɛ: "Him majuani rá pøngahyá Oja a ra Jesús," nguetho ɛ̞mbi hingui padi ra 'yomt'ɛ̞ni a ra xisu.

40 Nu ra Jesús buya, bi 'yɛ̞mp'a:

- —Nu'i grá Simón i ja'a ga xi'i.Nu ra Simón bi 'yɛna:
- -Gra xänbate, dami xic 'bu.
- ⁴¹Nu ra Jesús buya, bi xih ra Simón n'da ran t'uti, ne bi 'yɛmbi:
- —Mi 'bʉ a n'da ran 'yohʉ zại di hmih ra mbɛti. Nɛ mi 'bʉ'a n'da ran 'yohʉ bi hmiti cʉt'a ciɛnto, nɛ man'da bʉya bi hmiti yote ma'dɛt'a thoho. ⁴²Nɛ nu'ʉ gätho yoho hin'yʉ 'bɛ'a dí co'ts'a ra mbɛti xí mba ma hmiti. Janangue nu'a xí hmih ra mbɛti bʉya, bi punba thoho ʉ. Dami xic ya, Simón, nda'a man'da da bɛn'a ra mate bi t'ørpe, bi 'yɛn'a ra Jesús.

⁴³Nu ra Simón bi dạh pʉya, nɛ bi 'yɛna:

- —Masque gue'a ran 'yohu min dupate xun ngu, man'da da bɛn'a ra mate bi t'ørpe, bi 'yɛna.
- —Majuani a guím beni, bi 'yen'a ra Jesús.
- ⁴⁴Nu ra Jesús buya, bi hyɛt'a ra xisu nɛ bi 'yɛmp'a ra Simón:
- —Guí nu na ra xisu 'bucua, nu'bu má cut'ua ja ni ngu xíngui ts'u gá 'dac ra dehe gue xcá pe't'ä ma gua, pε nu ra xisu i hucua, rá guidä í mbercä ma gua nε yú xtą í dugä ma gua. ⁴⁵Pε nu'i, hin gá susca ma 'yogu ngue xquí zɛnguagui, pε nuna ra xisu him bin hε a ní zusca ma gua. ⁴⁶Nε nu'i, hin gá cosca ma yą ra aceite, pε nuna ra xisu i hucua, bi xisca ma gua ra 'yɛthi yuman'u. ⁴⁷Guehna dí xi a i na, xun ngu rá ts'oqui na ra xisu nɛ xun ngu

rá punbi ya, janangue ɛmmɛ im bɛngä na. Pɛ nu'u im bɛnsɛ ts'utho ra punbi i honi, man'da ts'utho im bɛngä u, bi 'yɛn'a ra Jesús.

⁴⁸Νε nubʉya, bi 'yεmp'a ra xisu:

—Ya ma punbi ni ts'oqui ya, bi 'yɛn'a ra Jesús.

⁴⁹Ne nu'u i sihme bu bin 'yemzehe u:

—To'o nín 'yohu na, gue i εna sä di punba yú ts'oqui n'da, bin 'yεmzεhε u.

⁵⁰Pε nu ra Jesús bi 'yɛmp'a ra xisu:

—Gá 'yɛ̞c'yɛigui, janangue ya ma punbi ni ts'oqui ya. Ní mba ya nɛ gan johya, bi 'yɛ̞mbi.

Yu xisu bi mbäxa ra Jesús

Nu'bu mi tho'i 'da yu pa, nu ra Jesús bi mbähä 'dɛ'mayoho yú xädi bu ja yu hnini, ne bi mam bu 'bepu ní manda rá ts'edi Oja. ²Nε bi mbähä a ra Jesús 'da yʉ xisu xí hoc 'bu mí u, ne'u 'da xí hyønba thi yu zįthu min 'yohu, ne'a ra María ra mengu bu ra hnini Magdala, gue mín 'yohu yoto yu zithu 'bu mi hoc'a ra Jesús. ³Ne'a ra Juana, rá xisu ra Chuza, n'da ran 'yohu im hmu bu ja rá ngu ra ts'ut'abi Herodes. Ne'a ra Susana, ne xun ngu mi'da yu xisu bi mbähä, mi fäx'a ra Jesús nε yú xädi nangue yú mbeti zehe.

Rán t'uti ra mbomhmudä

⁴Nε xʉn ngu yʉ jạ'i bi nɛxpʉ i ja mi'da yʉ hnini, nɛ bim pɛti bʉ 'bʉh ra Jesús. Nɛ nu'a ra Jesús bi xi'a n'da ran t'uti, bi 'yɛ̞mp'ʉ:

⁵—Nu n'da ran 'yohu bi mba bu ja rá huahi bá pom bu yu hmudä. Nu'u 'da yu hmudä bi zo bu ja ra 'yu, nɛ nu yu ja'i bi nɛm buya nɛ yu doja bi za. ⁶Nɛ 'da'u yu hmudä bi zo bu ja yu ndaxnado, nɛ nu'bu mi bøts'e 'bex bi hmanc'a n'dihi, nguetho hin'yu ra dehe bu ja yu do. ⁷Nu'u mi'da yu hmudä bi zo bu ja yu 'uini, nɛ nu'bu mi bøts'e, bi gom' yu 'uini u, nɛ him bin te. ⁸Nɛ'u 'da yu hmudä bi zo bu ja ra hogahäi nɛ bin te xun ho bu, nɛ bin xandi, xun ngu bin ja, bi 'yɛm 'bu mi man ran t'uti.

Nu'u i ja yú zagu, bi 'yø'a dá ma, bi 'yɛ̞mp'u yu ja̞'i ra Jesús.

Hanja bi xih yun t'uti yu ja'i a ra Jesús

Nu'u yú xädi, bi 'yän'na ra Jesús:"Bɛ'a nam bøn'a ran t'uti gá ma.

¹⁰Nu'a ra Jesús bi 'yɛ̞mp'ʉ:

—Nu'ahʉ, Oją bi ja ahʉ gui pąhmbʉ 'bɛpʉ ní manda rá ts'ɛdi. Pɛ nu'ʉ mi'da, dí xih yʉn t'uti ʉ, nguetho in nu yʉ́ dä pɛ hingui pądi 'bɛ'a in nu, nɛ i ja yʉ́ zagu, pɛ hingui pądi 'bɛ'a i øde, bi 'yɛn'a ra Jesús.

Ra Jesús bi ma 'bɛ'a nam bøn'a rán t'uti ra mbomhmudä

11—Nuya, ga xi ahu 'bɛ'a nim bøn'a ran t'uti dá mangä. Nu'u yu hmudä, ra hmɛpya rám hman Oją u. 12 Nu'u bi zo bu ja ra 'yu, ra hmɛpya u to'o bi 'yøh rám hman Oją, pɛ nu ra zithu bi japi 'bex bi pumbɛni, nɛ him bi zä bi 'yɛ̞c'yɛi ngue da mba nhyạni. 13 Nɛ nu yu hmudä bi zo bu ja yu do , ra hmɛpya u to'o bi 'yøh rám hman Oją nɛ bin johya 'da yu pa. Pɛ him bi gopu mbo yú mbui rá hman Oja nɛ nu'bu bi zä ra zithu

SAN LUCAS 8 128

u, 'bex bi 'ueh puya. ¹⁴Nɛ nu'u yu hmudä bi zo bu ja yu 'uini, ra hmɛpya u to'o bi 'yøh rám hman Oja, pɛ hønt'a bi bɛni 'bɛ'a dí hyusɛ yú mbui, nɛ 'bɛ'a i ja ua, nɛ 'bɛ 'a bi numanhosɛ, hinga xøt'a din te bu yoho yu hmudä, nɛ nte bin ja a ra hoga hmudä. ¹⁵Nɛ nu'u yu hmudä bi zo bu ja ra hogahäi, ra hmɛpya u to'o bi 'yøh rám hman Oja, nɛ bi mbɛs'pu mbo rá mbui, nɛ bi xi'u mi'da yu ja'i, nɛ xun ngu mi'da bi 'yɛc'yɛi nangue'u, bi 'yɛn'a ra Jesús.

Ran nequi hinga nt'agui

¹⁶Νε man'da ran t'uti bi ma ra Jesús, bi 'yεna:

—Xínga n'da ra ją'i di søc yu bombilla ngue da go'mi, o gue da mbøxpu 'bit'ots'i, pɛ da 'yɛxpu m'batho ngue di nɛc bu mbo ra ngu. ¹⁷Ngutho mam hmangä. 'Bɛ'a gätho dí xi a zɛhɛhu, pɛ jatho gui xihmbu mi'da yu ją'i, janangue'a din ja ran nɛqui yú mbui.

18 Dami jamansuhu xun ho 'bu guí øhmbu mam hmangä, nguetho nu'bu guí øhmbu xun ho, sä gui pahmbu xun ho a mam hmangä. Pe nu'u to'o hingui øde xun ho, di pumbeni a zu ts'u bi 'yøde, bi 'yemp'u yú xädi ra Jesús.

Ra Jesús bi ma to'o rá mbe nε yú cu

¹⁹N'da ra pa bi mba bu rá mbe nε'u yú cu ngue da nu'a ra Jesús. Pε him bi zä da nu nguetho εmmε du yu ją'i bu mi 'bui. ²⁰Nε bi si'a ra Jesús i 'bäpu thi rá mbe nε yú cu, in nde da nu a. ²¹Nu ra Jesús bi dąti, bi 'yṣna:

—Nu ma mbe nε ma cu, gue'ʉ to'o i øh rám hman Oją, nε øt'a i mam bʉ, bi 'yɛ̞n'a ra Jesús.

Nu ra Jesús di japi din he ran dahi ne ra dehe

²²Nu'a ra Jesús n'da ra pa bi hyu n'da ra mbosa, bi mbähä yú xädi, nɛ bi 'yɛmp'u:

—Ga mbähä bu 'danguadi ra dądehe, bi 'yɛ̞na. Nε 'bex bi mba buya.

²³Pε nu'bu i 'yo'a ra mbosa bu ja ra dehe, bin ą'a ra Jesús. Nε εmmε nts'εdi ran dąhi bi 'yɛn'a ra dehe, gue'bu go mi mbo ra dehe bu mbo ra mbosa, nts'utho a bin ja. ²⁴Pε nu'u yú xädi, bi 'yents'a ra Jesús:

—Xänbate i, xänbate i, nde da goguahu ra dehe, bi 'yɛ̞mbi.

Bi ndants'a ra Jesús, bi hɛcua ran dạhi nɛ ra dehe, bin hɛ̞'u buya, nɛ xun ho ra dehe buya. ²⁵Nu ra Jesús bi 'yɛ̞mp'u yú xädi:

—Hanja, ha zu ts'utho guí εc'yεigahu.

Pε nu'ʉ yʉ́ xädi bin su, nε bi hyonya thoho. Nε bin 'yɛ̞mzehɛ ʉ:

—'Bɛ'a din 'yɛ̞t'ui na ran 'yohʉ, nɛ ya 'bexque in hɛ'a ran dahi nɛ ra dehe di hɛcpi, bi 'yɛ̞n'ʉ.

Ra Jesús bi hoc'a n'da ran 'yohu min 'youi ra zithu

²⁶Nε nu'bu min hệ ran dạhi, bi thopuya, bi zøm bu ja ra häi Gadara, din hyant'ui bu 'danguadi ra häi Galilea. ²⁷Nε nu'bu mi gą'a ra Jesús bu ja ra mbosa, bin c'at'ui n'da ran 'yohu ra mɛngu bu, min 'yohu yu zịthu a. Nɛ nu'a ran 'yohu, him mí he rá he, nɛ him mi 'bupu ja rá ngu, pɛ mi 'bupu ja yun 'yägui. ²⁸Nɛ nu'bu mi nu'a ra Jesús buya, 'bex bin dạnyahmu bu ja rá gua nɛ nts'ɛdi bi mba'a ra zithu:

—Nu'i Jesús, rá ts'unt'u i Oją nuixte, 'bɛ'a gui 'yørcähe ya. 'Yørcähe ts'u ra mate, o gadí ungahe, ²⁹bi 'yɛ̞n'a ra zi̞thu 'bu mi xifi da bøm bu rá mbui ran 'yohu.

Nguetho na ya'a thoho bi unba ran 'yohu nɛ i xɛcta yu cadena i pa thu't'i, nangue rá ts'ɛdi ra zithu, nɛ i sixpu ma'ueni mahøn'a. ³⁰Nu ra Jesús bi 'yänba rá thuhu a ran 'yohu.

—Dí n'dan nets'igähe, bi 'yɛm 'bʉ mi dadi.

Nguetho min 'yohu xun ngu yu zithu. ³¹Nɛ nu'u yu zithu bi 'yäp ra mate ra Jesús hin da 'yɛntpu hapu bí nɛts'i, nguepu ja ra mba'ye xun hɛtho nɛ nts'utho. ³²Nɛ mi 'bupu xun ngu yu ts'udi mi sihmɛ bu. ³³Nɛ nu yu zithu bi bøm bu ja rá mbui ran 'yohu nɛ bi yurpu 'buh yu ts'udi. Nɛ gätho yu ts'udi 'bex bin tihi, bin gøxpu ja ra nguani, gätho bi zo bu dehe, bim 'bɛdi.

³⁴Nu'ʉ yʉn 'yohʉ mi fäh yʉ ts'ʉdi, 'bex bi 'dah puya 'bu mi nu 'be'a bi 'yøt'u yu ts'udi. Bi mba bu ja ra hnini nepu ja yu huahi, bi ma 'be'a bin ja. 35 Ne xun ngu bi mba bu, ba nuse 'be'a bin ja. Ne bi nu'a ran 'yohu min 'yohu yu zithu, mi hupu ja rá gua ra Jesús, mi he rá he. Ya xí yam buya. Ne gätho yu ja'i bin su 'bu mi nu 'be'a bi t'ørpa ran 'yohu. 36 Nε nu'u yu ja'i in 'yohu a ra Jesús, 'bu mi hoc'a ran 'yohu, bi xi'u m'bejua bi zøm bu 'be'a gätho bi 'yøt'a ra Jesús. ³⁷Ne gätho mi 'bupu ja ra häi Gadara bi 'yäp ra mate ngue hin din 'yo bu ja ra xεqui a, nguetho εmmε min su gätho u. Janangue'a nu ra Jesús, bi hyu ra mbosa mahøn'a ne bi mbähä

yú xädi buya. ³⁸Nu'a ran 'yohu min 'yohu ra zithu, ɛmmɛ in ndehma da dɛn'na ra Jesús. Pɛ nu'a ra Jesús him bi japi da mba. Pɛ bi 'yɛmbi:

³⁹—Ní mba ni ngu nɛ gui mam bʉ 'bɛ'a bi 'yøt'a'a Oja.

Ne nu'a ran 'yohu bi mba rá ngu buya, ne bi mam bu rá hnini a ran ho bi 'yørpa ra Jesús.

Nu ra Jesús bi xoxa rá t'ixu ra Jairo, ne bi hocpu 'yu n'da ra xisu mi hemb ra mbeji

⁴⁰Nu'bu mi mbeng bu ra Jesús 'danguadi ra dądehe, ɛmmɛ bin johya yu ją'i nguetho xun ngu mi tømp'u. ⁴¹Nɛ 'bex bi zøm bu 'buh ra Jesús a ra Jairo, n'da ra ngurpi bu ja ra niją, nɛ bin dạnyahmu bu ja rá gua, nɛ bi 'yäp ra mate da mba ra Jesús bu ja rá ngu. ⁴²Nguetho hønt'a n'datho rá t'ixu mi 'bui, ngue 'dɛ'ma yonjɛya mi pɛ'ts'i, nɛ in nde da du. Nɛ nu'bu mi mbähä ra Jesús, ɛmmɛ du bu yu ja'i bu ní mba.

43 Nɛ nu'bu mi mba bu 'yu, hin ní zøm bu ja rá ngu ra Jairo, bi zu'a n'da ra xisu mí hɛmb ra mbäji, ngue 'dɛ'ma yonjɛya mi hɛmp'a ran u.
44 Pɛ nu'a ra xisu buya bi därpa rá nyampahni bu ja rá xuthä ra Jesús, nɛ 'bex bin hɛ'a ran u mi hɛmbi.

⁴⁵'Bex bi 'yän'na ra Jesús:

—To'o bi därca ma pahni, bi 'yɛ̞na.

Pε gätho u mi 'bäpu bi 'yɛmbi: "Njom bi dä'i." Nε'a ra Pedro nε mi'da yú xädi bi 'yɛmp'a:

—Hanja gní 'yɛna 'bo'o bi dä'a i, nɛ ɛmmɛ i du yu ja'i bu gní mba, bi 'yɛmbi.

⁴⁶Pε nu ra Jesús bi 'yɛ̞mp'ʉ:

—Pε dí pądi ngue n'da ra ją'i bi däqui nguetho ma ts'εdigä ín ho'a, bi 'yɛ̞na. ⁴⁷Nɛ nu'bu mi ba'a ra xisu hingui sä din cøni, ɛmmɛ bin su, nɛ di fɛt'i, nɛ bin danyahmu bu ja rá gua ra Jesús, nɛ bi xifi 'bɛ'a í dädi. Nɛ bi 'yɛna ngue 'bex bi yam 'bu mi dädi. ⁴⁸Nu ra Jesús bi 'yɛmthoho:

—Grá xisu, bi zä bi yąn'i nguetho gá 'yεc'yεi i ja ma ts'εdi. Ní mba ya nε da hyu ni mbʉi, bi 'yɛmbi.

49 Ne yaui ra xisu a ra Jesús 'bu mi zøm bu 'da yú 'yehe ra Jairo xí nexpu ja rá ngu, ne bi 'yembi:

—Nu ni t'įxu ya bi du'a, säti thoho guí pah na ra Hmu, bi t'ɛmp'a ra Jairo.

⁵⁰Pε nu'a ra Jesús mi øde 'bε'a bi man'a, nε bi 'yεmp'a ra Jairo bʉya:

—O guín su, pε dami 'yεc'yεi nε din nu'a ni t'įxu, bi 'yεmbi.

⁵¹Nε nu'bɨ mi zøm bɨ ja rá ngu a ra Jairo bɨya, nu ra Jesús him bi japi da tho'a mbo yɨ ja'i bɨ 'bɛn'a ra hmute xí du. Hønt'a ra Pedro nɛ ra Jacobo nɛ ra Xuua, nɛ rá mbe nɛ rá ta ra hmute bi thopɨ. ⁵²Nɛ mi 'bɨpɨ xɨn ngu yɨ ja'i mi zoni ngue xí du'a ra hmute. Nu'a ra Jesús bi 'yṣmp'ɨ:

—O guí zomhbu nguetho hingui tu na, i ątho na, bi 'yεn'a.

⁵³Pε nu yʉ jạli bi den'na ra Jesús nguetho mi pạdi ya xí du'a ra hmute. ⁵⁴Nu'a ra Jesús bi bɛntpa rá 'yɛ ra hmute nɛ bi 'yɛmbi:

—Nu'i grá hmute, dami ndants'i. ⁵⁵Nε 'bex bi ndants' pʉya, bin ja rá te, bim 'bʉi mahøn'a.

Nu ra Jesús bi 'yɛna:

—Dami 'uimmi na ni t'ixuui ya, bi t'emp'a rá ta ne rá mbe.

⁵⁶Nu rá ta nε rá mbe bi hyonya thoho ngue bi dąmbεni rá t'įxu. Pε nu'a ra Jesús bi xifi njon da xifi 'bε'a bin ja.

Nu ra Jesús bi mbεhni 'dε'mayoho yú xädi da mamp'a rám hma

Nu ra Jesús bi zohn'du 'dɛ'mayoho yú xädi nɛ bi un yún t'ɛdi ngue da hyøn'a thi yu zithu in 'yohu 'da yu ja'i, nɛ di hocua yun u i hɛmb yu ja'i. ²Nɛ bi mbɛhn'du yú xädi din 'yo bu ja yu hnini bu, nɛ da mam bu 'bɛpu ní manda rá ts'ɛdi Oja, nɛ di hoc yun zäman'u. ³Nɛ bi xi'u hin te da hyats'i, nɛ hin da hyax rá tøhø xíng ra mbɛti xínga gue mi'da yú pahni. Da mbatho. ⁴Nɛ bi 'yɛmp'u:

—Hønt'a to'o rá ngu bu guí cuthu, gam 'buhmbu bu gue'bu go gá thohmbu bu ja man'da ra hnini. ⁵Nɛ nu'bu gá cuthu bu ja 'da yu hnini nɛ hin da 'yømanho yu ja'i bu 'bɛ'a guí mamhbu bu, nɛ 'bex gui pømhbu bu ja yu hnini nɛ gui huaju rá häi i pät ni mbonguahu, ra hmɛpya ngue gui zohmbu bu u, bi 'yɛn'a ra Jesús.

⁶Nu yu xädi buya bi mba hønbu go hapu ja yu hnini ne bi mam bu ran ho ma'da'yo. Ne bi hoc yu hyenni.

Nu ra Herodes bi ma bi hyεcpa rá 'yʉga ra Xuua Nxixyą

⁷Nε mí ø'a ra ts'ʉt'abi Herodes 'bɛ'a gätho i øt'a ra Jesús, nɛ bi hyonya thoho. Nguetho nu'ʉ 'da yʉ jạ'i bi bɛni gue'a ra Xuua Nxixyą a, gue bi ndants' mahøn'a. ⁸Nu'ʉ mi'da bi bɛni gue gue'a ra Elías a ra Jesús, uague man'da rá pøngahyą Oją ngue bi dạmbɛni. ⁹Pɛ nu'a ra Herodes bi 'yɛna:

—Nugä dá manda bi thecpa rá 'yuga ra Xuua Nxixya, janangue'a dí pądi hinga gue'a ra Xuua a guí mamhbu. Pɛ to'o maha a, bi 'yɛ̞n'a ra Herodes.

Janangue şmmɛ min nde da nusɛ a ra Jesús.

Nu ra Jesús bi 'uin'ʉ cʉt'a mahuahi yʉ ja'i

10 Nu yú xädi buya bá peng bu xí 'bɛhni, nɛ bi xih ra Jesús 'bɛ'a bi 'yørpu bin 'yo. Nɛ nu'a ra Jesús buya bi mbäsɛhu yú xädi bu ja ra hnini Betsaida. 11 Pɛ nu'bu mi ba'u yu ja'i hapu ní mba a ra Jesús, bi dɛnni. Nɛ nu'a ra Jesús bi zomanho u 'bu mi zudi, nɛ bi xi'u buya 'bɛpu ní manda rá ts'ɛdi Oja, nɛ bi hoc'u gätho yun zäman'u.

12 Pε nu'bu mi ts'utho da yuh ra hyadi, gätho u 'dɛ'mayoho yú xädi ra Jesús bi xifi da 'yɛt' yu ja'i, da mba bu n'danni ja yu hnini, din sihmɛ bu nɛ bá opu 'bu bin xui. "Nguetho hin'yu 'bɛ'a da zi ua ma'ueni, " ɛn'u.

¹³Pε nu'a ra Jesús bi 'yɛmp'ʉ yʉ́ xädi:

—Pε nu'a zεhεhʉ gui 'uimhbʉ. Nu'ʉ yʉ xädi bʉya bi 'yɛ̞mp'a ra Jesús:

—Pε hønt'u cut'a yu hmε nε yoho yu t'uhua i ja ua. Pε hinda høn 'bu ga tämhbe mi'da yu hmε, sä ga 'uimhbe gätho yu ja'i i 'bucua buya.

14 Nguetho mbɛ cut'a mahuahi mi 'bupu yun 'yohu. Nu'a ra Jesús buya bi xi'u yú xädi di japi 'da n'danni da hyu'i yote ma 'dɛt'a yu ja'i. 15 Nɛ bi hyu pu ya gätho tengu xi xifi. 16 Nɛ nu'a ra Jesús bi hyan'a ra hmɛ nɛ yu hua, bi ndøs' mahɛts'i, nɛ bi jap'u. Nɛ bi xɛni bi un yú xädi di darpa u yu ja'i. 17 Nɛ gätho na ngu

yu ją'i bin niyą ne bi bong thoho, 'de'mayo 'bøts'e bi mbes'u yú xädi.

Nu ra Pedro bi ma gue'a ra Jesús ra Cristo

¹⁸N'da ra pa bin yaseui Oja ra Jesús, min 'yohu u yú xädi. Nu'bu mi gua'a bin yaui Oja, bi 'yän'du yú xädi:

—'Bɛ'a man yʉ ją'i nanguecä, 'bɛ'a im bɛn'ʉ to'ogä.

¹⁹Nu yú xädi bi 'yɛmp'a:

—Nu'u 'da i ma gue'e grá Xuua Nxixyą. Nɛ nu'u mi'da i ma gue'e gra Elías, nɛ nu'u mi'da i ma gue'e man'da ra pøngahyą mi 'buh maya'bu ngue bi dambɛni, bi 'yɛn'u.

²⁰Nɛ nu'a ra Jesús bi 'yänzɛhɛ yɨ xädi:

—Pε xi ahʉ, 'bε'a guím bɛmhbʉ to'ogä.

Nε nu'a ra Pedro bi 'yɛ̞mbi:

—Nu'i gra Cristo rá Thahni i Oją, bi 'yɛmbi.

²¹Ne nu'a ra Jesús buya bi hecpa yú xädi njon da xifi to'o a.

Nu ra Jesús bi man rán dąte

²²Nε bi 'yεmp'u:

—Nugä ngue dán ja'igä ua ja ra ximhäi, i jatho ga nu ran unbi xun ngu. Nu ma ngurpihu yu dac'yei ne yu ngurpa mbäja ne yu xänbate nija hin da 'yec'yeigui. Ne nu'u da hyogä u, pe ná hyu pa ga thambenigä ne dam 'bui mahøn'a, bi 'yen'a ra Jesús.

²³Nɛ man'da bi xi'ʉ yʉ́ xadi, bi 'yɛ̞mp'ʉ:

—To'o gätho in nde da dɛngui da hyɛh rán t'ɛdi zɛhɛ nɛ da hyät yʉn ʉnbi n'da pa ngu n'da pa, madague da tho. Nɛ da bɛni tengu dím bɛngä. SAN LUCAS 9 132

²⁴Pɛ nu'bu 'bu a n'da im bɛn rá te, nɛ i su da nu yun unbi, pɛ da nu ran unbi mazai a. Pɛ nu'a hinguim bɛn rá te madague da tho 'bu da dengä, di pøh rá te a. ²⁵Hin te di muui n'da ran 'yohu 'bu da 'yøt'e rá mbɛti 'be'a gä i ja ua ja ra ximhäi, 'bu hin da din'a ra temazai.

²⁶Nε nu'a gätho to'o i pɛs' rá sä nanguecä nɛ nangue mam hmangä, nɛcä hín ga ɛ̞mbi ma t'ʉhni ʉ 'bʉ bá ɛ̞cä ua nɛ gan 'yohe yʉ́ hoga m'bɛhni Oją mahɛ̞ts'i, nɛ din jagä rá ts'ɛdi Oją ma Ta, nugä ngue dán ją'igä ua ja ra ximhäi. ²⁷Pɛ majuạni dí xi ahʉ, 'bʉcua 'da hin da nu ran dạte asta gue'bʉ go di dʉ'mi di manda rá ts'ɛdi Oją ua ja ra ximhäi.

Ra Jesús 'dan'yo bu í nequi bu ja ra t'øhø

²⁸Mbε ná hyato pa buya, ra Jesús bi mbähä bu ja n'da ra nyuni ra Pedro, ra Jacobo nε ra Xuua, ngue din yaui Oją. ²⁹Ne nu'bu min yaui Oją a ra Jesús, 'dan'yo bu í nequi a rá hmi ne nu rá pahni emme xun t'axi, di fexni a. 30 Ne 'bex bi nequi bu ra Moisés nε ra Elías bin yahu ra Jesús, mi 'buh maya'bu u. 31 Ne bi hyärpu n'da ran nequi hapu mi 'bä #. Nɛ nu'# bi mamhb# 'bɛ'a da t'ørpa 'bu bi tho bu Jerusalén a ra Jesús. ³²Pε nu'a ra Pedro nε'u min 'yohu bi zuh ra t'aha u, ρε nu'bu min nuhu bi nu di hyärpu n'da ran nεqui bu 'bäh ra Jesús nε ra Moisés nε ra Elías. ³³Nε nu'bu ma guepu da mba ra Moisés ne ra Elías, nu ra Pedro bi 'yɛna:

—Ma Hmu i, ɛmmɛ xun ho ngue dí 'buhmbu ua ya, ga høcähe hyu yu t'ungu, 'da'a n'da ni mbɛtihu. Nu'i, πε ra Moisés πε ra Elías, bi 'yɛna.

Pe him mim ben'a mi man'a. 34Ne nu'bu mi 'yen'a ra Pedro, 'bex bá ca n'da ra güi bi go'ma ra Moisés ne ra Elías, ne emme bin su'u yu xadi ra Jesús. 35Ne bi t'øpu n'da ra nde bu ja ra güi ngue bi 'yena:

—Nuna ma ts'unt'u dadí huɛcä na, dami 'yøhmbu 'bɛ'a i man na, bi 'yɛn'a ra nde.

³⁶Nɛ nu'bʉ mi gua'a bi man'a ra nde bʉ ja ra güi, nu yʉ xädi bi nu 'bäsɛ bʉ ra Jesús. Nɛ nu'ʉ yʉ xädi, njom bi xi'ʉ 'bɛ'a bi nu'ʉ.

Ra Jesús bi hoc'a n'da ra t'uhni min 'youi ra z<u>i</u>thu

³⁷ Nu'bu mi hyax buya, bi gapu ja ra nyuni ra Jesús nɛ'u hyu yú xädi min 'yohu. Nɛ xun ngu yu ja'i bin c'athu ra Jesús. ³⁸ Nu n'da ran 'yohu nts'ɛdi bi mbafi:

—Xänbate i, nurqui ts'u ma ts'unt'u nguetho hønna zu n'datho dí si. ³⁹Nɛ ja'bu im bɛnt ra zithu nɛ ɛmmɛ di unba a, i tɛxa hai, nɛ ɛmmɛ mbafi, nɛ di fɛt rá ja'i, nɛ i soh yu fugui. Nɛ zai di ja bu ra zithu. ⁴⁰Nɛ dá xi'u ni xädi di hoqui, pɛ nu'u him bi zä bi hoqui, bi 'yɛn'a ran 'yohu.

⁴¹ Nu ra Jesús bi 'yɛmp'ʉ:

—Nu'ahu guexta'a hin guí ęc'yɛihu 'bɛ'a dí xi ahu. Ham'mi pa ngue ga tøp'a thohohu ngue gui 'yɛฺc'yɛigahu.

Ne xø bi 'yemp'a ran 'yohu buya:

-Bá si ua ni ts'unt'u.

⁴²Nɛ nu'bʉ bá si ra ts'ʉnt'ʉ, bi bɛnt mahøn'a a ra zi̞thu, bi dɛxa häi nɛ nts'ɛdi bi ʉnbi. Pɛ nu'a ra Jesús bi xi'a ra zi̞thu da bøni, nɛ bi hoc'a ra ts'unt'u buya. Bi xi'a rá ta da zix buya. ⁴³Nɛ gätho yu ja'i bi hyonya thoho a rá ts'ɛdi Oja.

Ra Jesús bi ma mahøn'a rán dąte

Nɛ guexta'a i yą ʉ yʉ ją'i nɛ i ma 'bɛ'a gätho i øt'a ra Jesús. Nu ra Jesús bʉya, bi 'yɛ̞mp'ʉ yʉ́ xädi:

44—Dami 'yøhmbu xun ho a dí xi ahu ya, nugä ngue dán ja'igä ua ja ra ximhäi, da mba ma dägä bu 'buh yu ts'om'bäi, bi 'yɛmbi.

⁴⁵Pε nu'ʉ yʉ́ xädi him mi padi 'bɛ'a nam bøn'a i man'a ra Jesús, nguetho Oja hin ní japi da ba̞'ʉ, nɛ bi zu da 'yän'na ra Jesús 'bɛ'a nam bøn'a bi man'a.

Ra Jesús bi 'yut yú xädi nda'a dim 'bɛt'o

⁴⁶Nu'ʉ yʉ́ xädi bin junzɛhɛ ʉ nangue'a to'o dim 'bɛt'o. ⁴⁷Nɛ nu'a ra Jesús mi pądi 'bɛ'a mim bɛn ʉ, nɛ bá si n'da ra t'ʉhni bi mbämp'ʉ i 'bäi, ⁴⁸bi 'yɛmp'ʉ yʉ́ xädi:

—Hønt'a go to'o da zimanho n'da ra t'uhni tengu na ngue i ɛc'yɛigui, nɛcä bi zimanhog 'bu ya bi ' yøt'a. Nɛ to'o bi zimanhogä nam bøni bi zimanho ma Ta. Nɛ nu'a to'o i øt'e ngue nte di muui, gue'a dim 'bɛt'o a, bi ' yɛn'a ra Jesús.

Nu'u hingui suju, ma amigohu u, bi 'yɛ̞n'a ra Jesús

⁴⁹Nu ra Xuua buya bi xi'a ra Jesús, bi 'yɛmbi:

—Nugähe dá nuhe n'da ran 'yohu bi ndøn'na ni thuhu 'bu mi hyøn'a thi yu zithu, nɛ dá hɛcuahe nguetho him man 'yogähe a ran 'yohu.

⁵⁰Pε nu'a ra Jesús bi 'yɛ̞mbi:

—Nde'bu hin xquí hɛcuahu, nguetho nu'u hingui suju ma amigohu u, bi 'yɛmbi.

Nu ra Jesús bi dąmhyą ra Jacobo nε ra Xuua

⁵¹Nε ya mi ts'utho da zøn ra pa da mba mahɛts'i ra Jesús. Nε bi nde bi mba bu Jerusalén, madague i padi da mba ma unbi bu. ⁵²Nu'bu mi mba bu 'yu, bi xifi da tho'u 'da yú xädi, da hyonbi hapu din säya. Nε nu'u yú xädi buya, bi yurpu ja n'da ra hnini bu ra xεqui Samaria. ⁵³Pε nu yu ja'i bu hinguin ndepe din säya bu'a ra Jesús, nguetho him bi numanho ngue ní mba ba nu ra dampɛti bu Jerusalén. ⁵⁴Nε nu ra Jacobo nɛ ra Xuua ɛmmɛ bin cuɛ 'bɛ'a bi man yu ja'i bu buya. Nɛ bi 'yɛmp'a ra Jesús:

—Ha guín nde ngue ga mandagä'be ra sibi ba cah mahɛts'i, nɛ din zø'ʉ gätho 'bʉcua, bi 'yɛ̞n'ʉ.

⁵⁵Pε nu ra Jesús bi dąmhyą u yú xädi buya, gue hingui ho a im bɛn'u. ⁵⁶Nε bi thopu man'da ra hnini buya.

Hyu yʉn 'yohʉ εna da dɛn'na ra Jesús

⁵⁷Νε nu'bʉ mi 'yo bʉ 'yu ra Jesús bi 'yɛ̞n'a n'da ran 'yohʉ:

—Ma Hmu i, nugä ga tɛn'ni i hønbu go hapu guí mba, bi 'yɛ̞mbi.

⁵⁸Nu ra Jesús bi 'yɛmp'a:

—Nu yu haho i ja yú oi bu ja yu hyado, nɛ yu doja i ja hapu din säya u, pɛ nugä ngue dán ja'igä ua ja ra ximhäi, hin hapu i jasɛ ma oigä ua, bi 'yɛmbi.

⁵⁹Nu ra Jesús buya, bi 'yɛmp'a man'da ran 'yohu:

—Dami tengui, bi 'yembi.

Pɛ nu'a ran 'yohu bi 'yɛm buya:
—Grá Hmu, 'bɛ ga äcä ma ta 'bu
bi du.

60 Nu ra Jesús bi 'yɛmbi:

—Pε gue'ʉ hingui ja ra te ma'da'yo, da 'yä'ʉ xøn du. Pε nu'i gui tɛngui, gui xih yʉ jạ'i 'bɛpʉ ní manda rá ts'ɛdi Oja.

61 Xø man'da ran 'yohu bi 'yɛmp'a ra Jesús:

—Ma Hmu i, dín nde ga tɛn'ni i, pɛ 'bɛ ga mbagä bʉ ma ngu dan 'yɛ'be ma ta nɛ ma mbe.

62 Pε nu ra Jesús bi 'yɛ̞mbi:

—Gätho to'o ɛna da dɛngui nɛ im bɛn'a bi zogui, hing yén sähu bu di manda rá ts'ɛdi Oją u. Nu'a i øt'u tengu øt'a n'da ran 'yohu 'bu i hɛnhäi nɛ in yɛh rá xuthä, hingui uɛntho yú the i hɛqui.

Ra Jesús bi mbɛn'du hyate ma'dɛt'a bu ja yu hnini

10 Nubʉya nu'a ra Jesús bi huan'dʉ hyate ma 'dɛt'a yʉ́ xädi nɛ bi mbɛhni 'da'i yoho bʉ ja yʉ hnini guepʉ da thosɛ ra Jesús.

2Nɛ bi 'yɛmbi:

—Tenguthoho 'bu ya xø 'yo't'a n'da ra huahi, pɛ zu yonja'i tho u yu xofo, xun ngu u yu ja'i da 'yɛc'yɛi, pɛ go zu yoho thoho u da xifi. Dami 'yäfu Oja ra Hmu ba pɛnh mi'da yu mbɛfi da xih yu ja'i da 'yɛc'yɛi.

³'Bex gui mbähä ya, nɛ nugä dí pɛn'nahu tengu'u yu dɛ'yo 'bu da mba bu 'buh yu zate. ⁴Nɛ o guí hax ni mbɛtihu, xín ni buxahu, xín gui cuxhu ná yopare ni thixfanihu, gui mbäthohu nɛ hinga nya'a gui zɛnguahu yu ja'i bu 'yu.

⁵Nɛ nu'bʉ guí cʉthʉ bʉ ja n'da ra ngu ngue di säya ahʉ a ra mɛngu bʉ, gui zɛnguahʉ, nɛ gui 'yäfʉ Oją da 'yɛnspa rán japi a ra mɛngu bʉ. ⁶Nɛ nu'bʉ in nde rán japi Oja a ra mɛngu bu, da gohmi a rán japi Oją 'bu, pɛ nu'bu hinguin nde, nte da gohmi 'bu. ⁷Nɛ nu'bu gá sømhbu bu ja n'da ra hnini, gam 'buhmbu bu hapu rá mbudi da mba ma säya ahu. Hin gui päpu gam 'buhmbu. Nɛ gui sihu 'bɛ'a gätho din 'da ahu, nɛ hin gui pɛs' ni sä gui sihu nguetho gue'a guí tahmbu a ngue guí xihmbu rám hman Oja u. Nɛ njo'o n'da ra mbɛfi ngue hin da mba njut'i. ⁸Nɛ hønt'a go má hnini nguepu da ts'in ahu, gui sihu 'bɛ'a gätho di 'da ahu yu ja'i.

⁹Nε gui hoc'u yun zäman'u i 'bupu, nε gui xihmbu yu ja'i ngue mi ts'utho di manda rá ts'edi Oja ua. ¹⁰Pε hønt'a go nda'a má hnini gui cuthu, ne nu'bu hin da zin ahu yu ją'i bu, gan 'yohu bu ja ra hnini, ne gui 'yemfu yu ja'i: 11"Nugähe dí huac ma guahe ra fonthäi ua ja ni hninihu, ra hmepya ngue ga sogahe ua. Pe gui pahmbu ena xtí manda maha ua rá ts'edi Oją," gui 'yemfu u. ¹²Nε dí xi ahu, nu'bu bi zøn ra pa ran juanbi, man'da xun u tho ran unbi da nu'u, xinda gue'u mi 'bupu ja ra hnini Sodoma, bi 'yɛn'a ra Jesús 'bu mi 'yɛmp'u yú xädi.

Da ts'änba rá muui yú ts'oqui u him bi 'ygc'yei ra Jesús

13 Í hughi gätho ahu guí 'buhmbu bu ja ra hnini Corazín, ng gätho ahu guí 'buhmbu bu ja ra hnini Betsaida, nguetho ya gá nuhu yun t'øt'e nuixte dá øt'ä ng hin gá päh nin 'yomfgnihu. Nu yu ja'i mi 'bupu ja ra hnini Sidón ng'u mi 'bupu ja ra hnini Tiro, nu'bu xtá nu'u yun t'øt'e nuixte gá nuhu ya, xtí päh yún 'yomfgni u, ng xtá hye yu pahni tengu yu 'døza ng xtá 'yux yu 'bospi yú ją'i, ra hmɛpya ngue ɛmmɛ tu yú mbui nangue yú ts'oqui u. ¹⁴Nɛ nu'a ra pa rán juanbi Oja, nu ahu man'da da zän'nahu ran unbi xinda gue'u mi 'bupu ja ra hnini Tiro nɛpu ja ra hnini Sidón. ¹⁵Nɛ ahu guí 'buhmbu bu ja ra hnini Capernaum, gnín 'yɛxhu a ngue guí ɛmhbu gui sømhbu bu mahɛts'i, pɛ hin'na, pɛ guepu ja ran unbi mazai gui mbähä, bi 'yɛn'a ra Jesús.

¹⁶Nε bi 'yεmp'u yú xädi buya:

—Nu'u i øh ni ndehu, tengu'bu ma ndesegä bi 'yø'u. Nu'u to'o hin da zin ahu tengu tho'bu him bi zingä'u, ne nu'u him bi zingä, xím bi zin'a ma Ta bá pengä, bi 'yen'a ra Jesús.

Bá penc'u hyate ma 'det'a xí mben'na ra Jesús

¹⁷Nu'bu mambá penc'u hyąte ma'dɛt'a yú xädi a ra Jesús bu bi mbɛhni,ɛmmɛ bin johya u. Nɛ bi 'yɛmp'u:

—Grá Hmu, hinga hønt'ʉ yʉn zäman'ʉ dá hoje pɛ nɛ'ʉ yʉ zi̞thu dá hømhbe thi 'bʉ má ndømhbe ni thuhu, bi 'yɛmbi.

¹⁸Nu ra Jesús bi 'yɛmp'u buya:

—Dá nugä rá hmu yu zithu 'bu gmí tafu, bi mba häi tengu ra huɛi 'bu xun gại, bi 'yɛna, nɛ ya dá 'da ahu ra ts'ɛdi gui tafu rá ts'ɛdi man suihu. ¹⁹Pɛ madague gui nɛs'hu yu pozu bu gui thohmbu, nɛ yu mbozu, pɛ nte da ja ahu. ²⁰Pɛ hin gan johyahu ngue bi zä guí hømhbu thi yu zithu, pɛ nu'a gdín johyahu ngue bi zin ahu Oja nɛ bi hyux ni thuhuhu bu mahɛts'i, bi 'yɛn'a ra Jesús 'bu mi 'yɛmp'u yú xädi.

Bin johya ra Jesús

²¹Nubuya nu rá Hogandąhi Oją bi japi ɛmmɛ di johya ra Jesús, nɛ bi 'yɛna: —Dí ε'ts'a i nguetho gá japi bi bạ'a ni ts'ɛdi u i hon'i, tengu yu t'uhni ngue hin te i pądi, nε hinga gue'u im bɛnsɛ ja yún 'yomfɛnisɛ gá japi bi bạ'u. Nɛ gue'a gá 'yøt'e ma Oja i, ngue gue'a gá numanhosɛ guí øt'e, bi 'yɛmp'a Oja.

²²Νε man'da bi man ra Jesús, bi 'yεna:

—Gätho i ja a ma Ta bi 'daqui. Nɛ hønsɛ ma Ta i pącä xun ho ngue rá Ts'unt'ugä, nɛ hønsɛgä rá Ts'unt'ugä dí pącä xun ho a ma Ta, nɛ'u to'o ga japi da bą'a, bi 'yɛ̞n'a ra Jesús.

²³Νε bi 'yɛmp'ʉ yਢ́ xädi:

—Gan johyahu ngue guín nuhu a dí øt'ä ya. ²⁴ Majuani dí xi ahu, xun ngu yú pøngahya Oja ne xun ngu yu ts'ut'abi mi 'bui, mi nde da nu'a guín nuhu ya, ne da 'yø'a guí øhmbu ya, pe him bi zä, bi 'yɛmp'u yú xädi ra Jesús.

Rán t'uti a ran 'yohu bi hugc rá mija'iui

²⁵Nɛ bi zøm bʉ 'bʉh ra Jesús n'da ra xänbate niją, im bɛni da zä'a ra Jesús, nɛ bi 'yänni:

—Xänbate i, 'bɛ'a sä ga øt'ä n'dahma din jagä ra te mazai, bi 'yɛ̞na.

²⁶—Βε'a mam bu ja yún t'εdi ra Moisés, bi 'yεn'a ra Jesús.

²⁷Nu'a ra xänbate nija bi 'yɛna:

—I mam bu: "Gam bɛmhbu Oją ra Hmu ngue gätho ma mbuihu nɛ gätho ma tehu, nɛ gätho ma ts'ɛdihu, nɛ gätho man 'yomfɛnihu, nɛ ga huɛc ma mija'ihu tengu bu nan huɛc zɛhɛhu," i ɛn rán t'ɛdi Oja, bi 'yɛn'a ra xänbate niją.

²⁸Bi dą'a ra Jesús buya:

—Majuani guí ma. Nuya gui 'yøt'u ne din ja'a ra te mazai, bi 'yembi.

²⁹Nu ra xänbate niją mi pąрн mbo rá mbнi ngue hinga gue'a mí øt'e, nɛ bi 'yɛmthoho:

—Pε to'o ma miją'i'be ga huęcä, bi 'yen'a.

³⁰Nε nu'a ra Jesús bi xi'a n'da ran t'uti nε bi 'yεmbi:

-Nu n'da ran 'yohu mi 'yo bu ja ra 'yu, bí nexpu Njerusalén ní mba bu Jericó. Νε nu'u 'da yu bε bi gorpa'yu ne bi unba'a ran 'yohu, ne gätho u yú pahni mi he bi gaspi ne'a rá mbeti. Ne bi zopu nden'yu a ran 'yohu buya, εna da du. ³¹Νε bi thopu n'da ra mbäja, ne bi nu'a ran 'yohu 'bem bu pe bi mbäcthoho. ³²Ne'a man'da ran 'yohu, ra mbefi bu ra nija a, bi thopu, bi nu'a ran 'yohu 'bem bu, ne'a bi mbäcthoho tengu bi 'yøt' ra mbäją. 33Pe nu'a n'da ran 'yohu, ra mengu Samaria, 'bu mi thopu buya, bi nu mi 'bem bu a ran 'yohu, ne bi huec'a. 34 Ne bi xispa ra aceite nε ra vino bu xí ts'erbi, ne bi mbantpa ra 'bø't'e. Ne bi 'yɛxa rá fani buya, bi zixpu ja n'da ra ngun'oi ne bi jamansu'a. ³⁵Ne nu'bu mi hyats'i, bi thopu ní mba, ne bi zocpi ts'u ra mbeti a ra mengu bu, ne bi xifi di jamansu'a ran 'yohu, ne da gurpa rá gasto 'bu hin dí gua'a 'bu bá peng bu ní mba, bi 'yɛn'a ra Jesús 'bu mi man ran t'ııti.

³⁶Nubʉya bi 'yän'na ra xänbate niją:

—Xiya, nda'a nín 'yohu bi 'yørpa ran huɛcate rá mija'iui.

Bi dą'a ra xänbate niją:

37—Nu'a bi mbäts'i.

Nu ra Jesús bi 'yɛmp'a bʉya:

—Ní mba din jabʉ gui 'yørna

—Ní mba din jabu gui 'yørpa ni miją'ihu, bi 'yɛmbi.

Ra Jesús bi mba bá nu'a ra Marta ne ra María

³⁸Ra Jesús ne'u yú xädi mi 'yo bu ja ra 'yu ní mba bu ja ra hnini Jerusalén, ne bi zøm bu ja n'da ra hnini guepu 'bu'a n'da ra xisu í Marta a. Ne nu'a ra Marta bi xi'u din säya bu ja rá ngu. ³⁹Ne mi 'bupu n'da rá juhue í María. Nu'a mi hupu i ya ra Jesús, bi 'yø'a bi man'a. ⁴⁰Pe nu'a ra Marta, xun ngu ra 'befi i øt'e. Ne bi 'yemp'a ra Jesús:

—Ma Hmu'i, ha hin guí urpa ra güɛnda 'bɛ'a øt' ma cu, nde'bu gui xifi di zɛqui, bi 'yɛmbi.

⁴¹Nu ra Jesús bi dat'a:

—Ma zu Marta, ɛmmɛ guím bɛn'a ni 'bɛfi. ⁴²Pɛ n'datho a mahyoni xun ho, nɛ gue'a bi huan'na ra María, nɛ njon di 'uecpa'a mam hmangä i øde, bi 'yɛn'a ra Jesús.

Ra Jesús bi xänba yú xädi din yąhu Oją

11 N'da ra pa bi 'ue'a ra Jesús nε bin yąui Oją. Nε nu'bʉ mi gua'a bin yąui Oją, n'da rá xädi bi 'yɛ̞mbi:

—Ma Hmu'i, dami xängahe dan yahe Oja tengu thoho ra Xuua bi xänba yú xädi.

²Nu ra Jesús bi 'yɛna:

—Ngubu gui mamhbu 'bu guí yahu Oja:

Ma Ta ahe,

Da hnumansu ni thuhu Nɛ dín ndehe din ja ua n'dihi ni ts'ɛdi ngue di manda ua.

³ Νε dami 'daje ra hmε dí homhbe ra pa i ja bu ya.

⁴ Dami punga ma ts'oquihe tengu thoho bu na punbahe u i ørcahe ran ts'o. O guí hɛgähe da dąje ran ts'o, pɛ dami yanje nangue ran ts'o, gui 'yɛmhbʉ, bi 'yɛn'a ra Jesús. ⁵Nɛ xø bi xih man'da ran t'uti ʉ, bi 'yɛna:

—Xi'bu n'da ran 'yohu xtí mba bu rá ngu n'da rá amigo, made ra xui, ne xtá 'yembi: "Hmiqui ts'u hyun thuhme, 6 nguetho nu'a n'da ma amigo ja bi zøm bu ja ma ngu, ne hin'yu 'be'a ga unni da zi," xtá 'yembi. ⁷Ne xi'bu xtá 'yemp thoho: "'Yo gadí paqui, nguetho ya án thu't'i ma ngu nε ya dá ohmbe gätho ma t'uhni, ne hingui sä ga ndants'i ngue ga 'da'i," xtá 'yentho. 8'Be'a hmaha xtá 'yøt'a ran 'yohu 'bu. Nu'bu hingui pes' rá sä di thoqui da 'yäpi, ne guehma da ndants'a rá amigo ne di un'na bi 'yädi, bi 'yɛn'a ra Jesús. ⁹In ja bʉ 'bʉ guí yạhu Oją, gui thoqui gui 'yäfu nε sä thocua thoho gui hyamhbu. Thocua thoho gui hyomhbu ne thocua thoho da zä gui timhbu. Thocua thoho guin zohmbu nε Oją da xoc'ahu. 10 Nguetho gätho to'o da 'yädi da hyani, ne gätho to'o da hyoni, da dini, ne gätho to'o da zofo da xocpi, bi 'yɛna.

11-13 Nɛ nu ahu madague gyú ts'om'bäihu, xínga n'da ahu gadí unhdu ra pozu ni t'uhnihu 'bu i ä ahu ra hua, nɛ xíng ra mbozu gadí unhdu 'bu i ä'ahu ra do'øni, pɛ hønt'a xun ho gadí un ni t'uhnihu. Ha maguet'a Oja ma Tahu 'bupu mahɛts'i ngue him ba pɛn'nahu rá Hogandahi 'bu guí äfu a, bi 'yɛn'a ra Jesús.

Bi t'ɛmp'a ra Jesús in 'youi ra zi̩thu

¹⁴Νε mi 'bʉpʉ n'da ran 'yohʉ hingui sä din ya, nguetho madi goreba ra zįthu. Nɛ nu ra Jesús bi hyøn'a thi ra zįthu nɛ bin yą ran 'yohu buya. Nu yu jąli ɛmmɛ bi hyonya thoho. ¹⁵Pɛ nu'u 'da bi 'yɛna:

—Nuna ran 'yohu sä i høn'a thi yu zithu, nguetho gue'a rá hmu yu zithu bi un rán t'ɛdi na, sä ɛn'u 'da.

¹⁶Nɛ nu'u mi'da bi zä ra Jesús 'bu ya majuani Oja bi un rá ts'edi, ne bi 'yäp ra hmepya mahets'i. ¹⁷Pɛ nu ra Jesús mi parpa yun 'yomfeni n'da ngu n'da'u ne bi 'yemp'u:

-Nu'bu din heczεhε yu ją'i 'bupu ja n'da ra hnini, ne ba eh yun suihu, hin da zä din tunhdu yun suihu 'bu. Da mba ma juadi u. Ne ngutho u 'bupu ja n'da ra ngu, 'bu din suse u dim 'bɛdi. ¹⁸Nɛ ngutho rá ts'ɛdi ra zithu, ha da zä din suse u ngue di 'beh yú ts'edi, ne sä guí emhbu, ngue'a rá ts'edi ra zithu a ná høn'a thi yu zithu u. 19 Be'a ni ts'edi guí emhbu i ja ni xädihu 'bu i høn'a thi yu zįthu. Guese'u i ut ahu ngue him majuani guím mamhbu. 20 Nugä dí høn'a thi yu zithu nangue rá ts'edi Oja, gue'a ctí pahmbu ngue ya di manda rá ts'edi Oją ua guí 'buhmbu, bi 'vɛn'a ra Jesús.

²¹Nɛ man'da ran t'uti bi ma, nɛ bi 'yɛ̞na:

—Nu'bu 'bu'a n'da i ja rá ts'ɛdi nɛ i ja 'bɛ'a dám fädi xun ho bu ja rá ngu, hin te da ja. ²²Pɛ nu'bu da zøm bu n'da ngue man'da i ja rá ts'ɛdi nɛ da dapi, da hyanba a nám fädi nɛ da duspi 'bɛ'a gätho i ja bu ja rá ngu buya.

²³Nu'a to'o hinga 'da'ingu dí mam'be, man sui'be a. Nɛ nu'a to'o hingui øt' ma 'bɛfi, di japi dim 'bɛ'u mi'da.

Rán t'uti ra zįthu bá peng bu ja rá mbui n'da ra ją'i

²⁴Νε man'da ran t'uti bi ma, bi 'yεna:

—Nu'bu bi bøm bu ja rá mbui n'da ra ja'i ra zithu, bin 'yo bu ja ra 'yonhäi, bi hyoni hapu sä dim 'bui, nε nu'bu him bi dini, bi bɛnsɛ ba peng mahøn'a hapu mi 'bui. ²⁵Nε nu'bu mi zøm bu, bi nu njongui 'bupu, nε ma hoqui xun ho. ²⁶Nε nubuya, bi mba bá hom mi yoto yu zithu man'da xun ts'o xinda guese'a bin honte, nε gätho bim 'buhmbu bu. Nε nu'a ra ja'i buya, bi gohi man'da xun ts'o xinda gue'bu mi 'bupu n'datho ra zithu, bi 'yɛn'a ra Jesús 'bu mi man ran t'uti. Din ja bu u hinga gätho rá mbui i εс'yεi.

Ran jąpi majuąni

²⁷ Gätho na yą ra Jesús nɛ bi dą'a n'da ra xisu, bi 'yɛ̞na:

—Mająpi'a ra xisu bi te'e, bi 'yɛmbi.

²⁸Pε nu ra Jesús buya bi 'yɛmp'a:
—Pε nε'u man'da majapi gätho
to'o i øh rám hman Oja nε i øt'a
gätho i mam bu, bi 'yɛmbi.

Yu ts'om'bäi bi 'yäh yu hmepya mahets'i

²⁹Bi munts'ʉ yʉ jạ'i bʉ 'bäh ra Jesús, nɛ nu ra Jesús bi xi'ʉ man'da ram hma, nɛ bi 'yɛ̞mp'ʉ:

—Nu'ahu guí 'buhmbu yu pa ja bu ya, gyú ts'om'bäihu, guí äju ra hmεpya mahɛts'i, pɛ hin te ma hmɛpya da t'ut'ahu, pɛ hønt'a n'da ra hmɛpya da t'ut'ahu tengu bi 'yøt'a ra Jonás. ³⁰Nε gue'a ra hmɛpya bi 'yøt' ra Jonás, bi bạh yu

ja'i bu ja ra hnini Nínive majuani Oja bí mbehn'na. Ngutho ahu, sä gui pahmbu majuani bá pengä Oja 'bu gá nuhu 'be'a din jacä, nugä ngue dán ja'igä ua ja ra ximhäi, bi 'yɛna. 31 Nɛ dí xi ahu, nu'a ra xisu min ts'ut'abi bu Sur, 'dat'a gui ndans'hu a 'bu bin ja ran juanbi 'bu ran zegui. Ne da 'yut'ahu ngue i ja ni ts'oquihu. Nguetho nu'a yatho bá εhε ngue mín nde da 'yø'a bi man'a ra ts'ut'abi Salomón nangue rán 'yomfeni bi und Oja, pe nu ahu, hin guín nde gui 'yøhmbu a dí mangä ngue dí 'buhmbu ua. Pe nugä man'da i ja rá ts'edi mam hmangä xinda gue ra Salomón, bi 'yɛn'a ra Jesús.

32 Ne xø bi 'yena:

—Nε'θ mi 'bθρθ ja ra hnini Nínive 'dat'a gui ndans'hθ θ 'bθ bin ja ran juanbi 'bθ ran zεgui, nε da 'yut'ahθ ngue i ja ni ts'oquihθ, nguetho nu'θ 'bex bi päh yθ mbθi 'bθ mí 'yø'a bi man'a ra Jonás, pε nu ahθ, xø hin guín nde gui päh ni mbθihθ nangue ni ts'oquihθ. Nε nugä, man'da xθn hξts'i mam hmangä xinda gue ra Jonás, bi 'yɛn'a ra Jesús.

Nu'a dá pąhmbu rán nequi Oją

³³Nε xø bi 'yɛn'a ra Jesús:

—Pε njon di søc'a n'da ra sibi ngue da go'mi, uague di cu't' pu ja ra huada. Pε i tixpu ja ra mbøxasibi, ndepe di yot'i gätho to'o ba εhε. ³⁴Gue'a ni dähu di ja ahu gui hyanthu ran nεqui. Nu'bu xun ho ni dähu, guí hanthu xun ho ran nεqui, nε nu'bu hingui ho ni dähu, xum 'bɛxuitho bu guí hanthu. ³⁵Nε ngutho ni mbuihu di ja ahu gui pahmbu rán nεqui Oja. Nu'bu i

139 SAN LUCAS 11

hon ni mbuihu rán ho Oja, i ja ahu ran nequi 'bu, nu'bu hin'na, sä guí ɛmhbu i ja ahu ran nequi, pɛ hønt'a ra 'bɛxui i ja ahu. ³⁶Nguetho hønt'bu guín ndehu bu ni mbuihu, di 'uec'ahu ra 'bɛxui a Oja nɛ di 'da ahu rán nequi, nɛ nubuya gui 'yøthu tengu'bu gyú sibihu nɛ gui 'yuthu mi'da rá 'yu Oja, tengu ra nyot'i di yorpu ní mba n'da, bi 'yɛn'a ra Jesús.

Nu ra Jesús bi xi'ʉ yʉ fariseo nε yʉ xänbate niją maxøts'e thoho i yạ'ʉ

³⁷Nε nu'bu mi gua'a man ra Jesús, n'da ra fariseo bi xih ná ts'ihmε a ra Jesús, nε bi mba bin sihmεhu. ³⁸Nε nu ra fariseo bi nu him bin xu'yε ra Jesús, tengu i man yún t'εdizεhε yu fariseo, nε bi hyonya thoho. ³⁹Pε nu'a ra Jesús bi 'yɛ̞mp'a:

—Nu ahu gyú fariseohu, guí pethu xun ho ni ją'ihu, pɛ guexta'a xun ts'o ni mbuihu. Hønt'a ran ts'iyate guím bɛmhbu, gyú ts'om'bäi thohohu. ⁴⁰ Xøgue, xum mɛ tho ni mbuihu. Nu Oją i pądi 'bɛ'a gadí jafu ni ją'ihu, pɛ nɛ'a ni mbuihu i pądi 'bɛ'a im bɛni, nguetho Oją gätho bi zän'du, bi 'yɛna. ⁴¹ Pɛ nu'bu gui huɛc ni miją'ihu nɛ gui fäxhu, da fąh puya mahoqui ni mbuihu.

42Í huệhi maha ahu, gyu fariseohu, nguetho guí hạxhu bu ja ra niją a ná 'dɛt'a yú 'yɛthi yu tuhu bi bøxpu ja ni huạhihu, pɛ go hin gá 'yøthu a man'da in nde Oja ngue 'da xquín numanhohu ni mija'ihu nɛ xquí huɛju u. Guehya nde'bu man'da gui 'yøthu, madague'bu gui thoqui gui 'yøthu u mi'da. 43 Huɛhi maha ahu, gyú fariseohu, ɛmmɛ guí

homhbu ngue da hnumansu ahu bu ja ra niją, ne gadí hohu yun zengua 'bu guí 'yohu bu ja ra täi. 44Í huɛhi maha ahu, nu'ahu tenguthoho n'da ran 'yägui hingam fadi, ne nu'a da thopu hin da badi o bu xu 'ya. Ngutho ahu, im bɛn yu ja'i ngue xun ho ahu, pe him majuani.

⁴⁵Nε mi 'bʉpʉ n'da ra xänbate niją, nε bi 'yɛ̞na:

—Nu'i grá Jesús, gra xänbate i, ɛmmɛ gadí unga ma mbuihe a gá ma, bi 'yɛmbi.

⁴⁶Bi dąt'a ra Jesús:

—Nε ahu, gyu xänbatehu, í huɛhi maha ahu, nguetho εmmε xun hei a gá hyuspahu yún t'ɛdi ra Moisés ngue guí xihmbu yu ja'i da 'yøt'e, pε nusε ahu xíngui ts'u guí øthu a guí xihmbu da 'yøt'u. ⁴⁷Í huɛhi maha ahu, guí hocpahu yú jadon'yägui u yú pøngahya Oja bi hyo'u nim bombøtahu, ngue guí nde da 'yɛn'ahu yu ja'i xun ho ahu. ⁴⁸Pε gue'a gní 'yuhmbu ngue guín numanhohu yún t'øt'e u nim bombøtahu, bi hyo'u yú pøngahya Oja nε go gadí hocpahu yú jadon'yägui bi 'yo u.

⁴⁹Pε nu Oją i pądi 'bɛ'a gätho din ja, janangue'a bi 'yɛna: "Ga pɛhndä u ma pøngahya, nɛ'u mi'da da mam mam hmangä. Nu'u 'da da tho, nɛ nu'u 'da da t'ɛthoho," bi 'yɛn Oja. ⁵⁰ Janangue'a gue'a ctí nuhu rán ts'ɛmbi Oja nangue gätho yú pøngahya Oja nɛ yúm 'bɛhni bi mba ntho gue'bu go rá mbudi ra ximhäi. ⁵¹Nu rá mbudi ra Abel bi tho asta gue'bu nɛ'a ra Zacarías bi tho bu mbo ra danija, tengu thoho 'bu ni ts'oquihu a gätho í tho'u yú pøngahya Oja, nɛ gue'a dí un'nahu a.

sanbatehu, guí pahmbu 'be'a nam bøn'a rá hman Oja pe hinga gue'a guí xänbahu yu ja'i. Him majuani guí tenhdu a ne hín gadí jafu da den'du in nde da denni, bi 'yen'a ra Jesús. Sa,54 Nε bi bøm bu ra Jesús buya. Pε nu yu xänbate nija ne yu fariseo emme bin cue, ne xø bi du'mi emme bi 'yän yun t'änni, ngue i honi 'bepu dí yap'a ra Jesús.

Ra Jesús bi ma 'bɛ'a din ja to'o i mam maxøts'e thoho

12 Νε bim pεti bu 'buh ra Jesús xun ngu yu ją'i, nε εmmε din tønthoho. Nu ra Jesús bi 'yɛmp'u yú xädi:

—Gam fähmbu nangue yú ixi yu fariseo ngue hin gui tɛnbahu yún t'øt'e, ɛna xun ho bu na hnu u pɛ n'dan'yo thoho im bɛn yú mbui. ²Hin gui 'yøthu tengu'u nguetho gätho 'bɛ'a im bɛm bu mbo rá mbui n'da, da fadi. Madague'bu ɛn'u njon da badi, pɛ guehma din c'a yú ts'oqui. ³Nɛ gätho a i man'a n'da bu njongui øde, da hmam bu 'buh yu ja'i. Nɛ gätho i mam mant'agui n'da bu ja rá ngu, da fapu 'buh yu ja'i, bi 'yɛmp'u yú xädi ra Jesús.

Gui suhu Oją, bi 'yęn'a ra Jesús

⁴Nε xø bi 'yɛna:

—Nu'ahu, ma amigo ahu, o guí suhu u in nde da hyo ahu. Nu'u, sä da hyo'a ni ją'ihu pe hin'yu 'be'a man'da i sä da 'yøt'e. ⁵Ga xi ahu to'o a gui suhu. Dami suhu Oją nguetho nu'a, i sä da hyo ahu ne i ja rá ts'edi da 'yent'ahu bu ja ran unbi mazai. Majuani dí xi ahu, jatho gui suhu Oja.

⁶Nɛ njom man'da gui suhu. Guim bɛmhbu yu doja, ts'utho di muui, hønt'a zu yocentavo di muui u cut'a ndoja, pɛ guexta'a i pa mfɛni u, Oja im bɛn'u. ⁷Nɛ nu ahu man'da di mu ahu xinda gue yu doja bu ní bɛn Oja, nɛ asta i padi hangu na ngu i ja ni xtahu. Janangue'a o guín suhu.

To'o hingui su da ma nangue ra Jesús

⁸Nɛ man'da bi man ra Jesús, bi 'yɛna:

—Majuani dí xi ahu, gätho to'o hingui su da mangua ja ra häi gue i paqui, nugä, ngue dán ja'igä ua ja ra ximhäi, ga mam bu ja yú hmi yúm 'bɛhni Oja, gue dí pacä u. 9Pɛ nu'a to'o da gøngä ua ja ra häi, nɛcä ga cøngä bu mahɛts'i a.

10 Nu'a to'o di c'aman'ugä nguecä ngue dán ja'igä ua ja ra ximhäi, sä da mba ma punbi 'bu da bɛn'a bi ma. Pɛ nu'u to'o di c'aman'u rá Hogandahi Oja, hin'yu rá punbi u.

11 Nu'bu pa ma yapi'ahu nɛ da ts'ix ahu bu 'buh yu ngurpi ja ra nija o guepu 'buh yu zɛ'mi nɛ yu ts'ut'abi, pɛ o ɛmmɛ guím bɛmhbu 'bɛ'a sä gui mamhbu 'bu da mba ma juanni ahu, 12 nguetho nu'bu gám 'bähmbu bu ja rá hmi u, nu'a rá Hogandahi Oja 'bex di bɛn'nahu gui mamhbu, bi 'yɛn'a ra Jesús.

Rán t'uti ra membeti bi bense 'be'a da hyoni

¹³Nε nu'bʉ min yą'a ra Jesús, mi 'bä inde bʉ 'bʉh yʉ ją'i n'da ran 'yohʉ, nɛ bi 'yɛ̞mbi:

—Xänbate i, dami xih man 'yohu da xɛgäts'u ra häi bi zoh ma ta'be.

14 Nu ra Jesús bi 'yɛna:

141 SAN LUCAS 12

—Nu'i, grán 'yohʉ, hin dra zε'migä ngue ga øt'ä a guí ma, bi 'yεmbi.

¹⁵Nε xø bi 'yεmp'u 'bupu:

—Dami jamansu ni mbuihu hin din ja ahu ran 'yuya. Nguetho hinga gue'a i ja n'da dám 'bu'a n'da, madague'a xun ngu i ja.

¹⁶Nε nubʉya, bi xi'a n'da ran t'uti, nε bi 'yɛ̞mp'ʉ:

—Mi 'bu'a n'da ran 'yohu ra membeti. Ne nu'a rá häi emme xun ho, ne xun ngu 'be'a gätho bin ja bu. ¹⁷Ne nu'u yú ngumpe'ts'i, emme bi yudi ne bi bongthoho 'bε'a mi ja bu ja rá huahi. Nε nu'a ran 'yohu buya, bi beni 'be'a sä da 'yøt'e. ¹⁸Nɛ bi bɛnsɛ: "Nuya, ga xo't' ma ngumpe'ts'i ne ga høh mi'da xun ndoho, n'dahma din ja hapu ga pe'ts'ä 'be'a gätho i jagä. ¹⁹Ne nubuya, dam 'butho, hønt'a dí hyu ma mbui ga øt'ä," bi 'yɛnsɛ ran 'yohu. 20 Pe nu'a Oja bi 'yemp'a: "Nu'i, hin guí pądi 'be'a guím ma, nguetho nán xui ya gui tu. Ne to'o hmaha da gohmi 'be'a gätho guím beni gui hyonse," bi 'yembi, bi 'yɛn'a ra Jesús.

²¹Ngubu din ja gätho yu 'yuya, ngue'a hønt'a i ja ua ja ra ximhäi im bɛni, pɛ hinga gue'a rá mbɛti dí yanba yú te u, bi 'yɛn a ra Jesús.

Nu Oją di jamansu yú t'uhni

²²Nɛ nubuya, bi 'yɛmp'u yú xädi:
—'Yo ɛmmɛ gui hyadumbuihu
'bɛ'a gui sihu nɛ 'bɛ'a gui hyehu.

²³Nɛ man'da xun ho guim bɛmhbu
ni tehu xinda gue nin sihmɛhu,
nguetho man'da di muui ni tehu,
nɛ'a ni ja'ihu man'da di muui xinda
gue ni hehu.

²⁴Damin 'yomfɛnihu

ts'u 'bɛ'a i øt' yu ca. Nu'u, hingui øt' yu huahi nɛ hin te i pɛ'ts'i 'bɛ'a i honi, pɛ nu Oja di jamansu'u. Pɛ man'da di jamansu ahu Oja xinda gue yu doja, nguetho man'da di mu ahu. ²⁵Nte sä gui tinsɛhu, xinga gue nin sihmɛhu, xinga gue ni hehu, xinga gue ni tehu, gue gam 'buhmbu ua nya'a thoho. ²⁶Janangue'a hin gui hyadumbuihu u nte di muui.

²⁷Dami nuhu yu døni. Hin te má 'bɛfi i øt'e, pɛ guehma i te. Nɛ nu'a ra ts'ut'abi Salomón mi he rá pahni mahotho ne xum hmadi. Pe nu yu døni man'da mahotho xinda gue rá pahni mi he ra Salomón. ²⁸Nu'a Oja di jamansu yu døni nε di japi din te, madague n'da pa thoho i døni. Xi ahu, ha hin guím bemhbu ngue man'da xun ho di 'da ahu Oja. Xøgue ts'utho guí ɛc'yɛihu. 29 Janangue o guí hadumbuihu 'be'a gui sihu n'da pa ngu n'da pa, 30 nguetho nu'u hingui εс'уεі Oją, gue'a i øt'н. Рε nu'ahн ni Tahu 'bupu mahets'i i padi 'be'a gätho guí homhbu. 31 M'bet'o thoho guin unsehu di manda ahu rá ts'edi Oją, ne nubuya di 'da ahu Oja 'be'a gätho guí homhbu, bi 'yɛn'a ra Jesús.

To'o di membeti bu mahets'i

32 Xø bi 'yɛn'a ra Jesús:

—O guín suhu, madague'a hingui ngu ahu, nguetho i hu rá mbui Oją ngue ya guí 'buhmbu bu di manda rá ts'edi. ³³Dami pähu 'bɛ'a i ja ahu, gui unhdu yu hyoya, nɛ din ja ahu xun ngu bu mahɛ̞ts'i. Nubu, nte dim 'bɛpu nɛ njam'bu din thegue, hingui sä n'da ra bɛ̞ da yurpu, xinga

SAN LUCAS 12 142

gue'u yu zu'uɛ. 34 Nu'bu guecua ja ra ximhäi i ja 'bɛ'a pɛ'ts'a n'da, hønt'ua im bɛn'a n'da, nɛ nu'bu guepu mahɛts'i, guepu im bɛn'a n'da bu, bi 'yɛn'a ra Jesús.

Ra Jesús bi ma da thø'mi xun ho

³⁵Nε xø bi 'yɛn'a ra Jesús:

--Dami tøgbahu nε gan sähu tengu'bu i sø ni sibihu. 36 Tengu i øt' yu 'yehe 'bu i tøm'bu yú hmu da mbeng bu xín sihme bu ja ran thati, n'dahma 'bex da xocpa n'dihi 'bu bi zofo. ³⁷ Emme din johya u bi dø'mi, nguetho da xi'u da hyupu ja rá mexa, go guese'a ra hmu din 'yehe buya, ngue da 'uin'u yú 'yehe. ³⁸Din johya u bi dø'mi madague'a made nxui uague t'uxuditho 'bu bi zøh ra hmu. ³⁹Nu n'da ran 'yohu 'bu xtám badi 'bɛ'a ní pa da yurpu ra be bu ja rá ngu, xtán dø'mi, hin di japi da fepi 'be'a pe'ts'i. Pe hingui pądi 'bɛ'a ní pa da yurpu ra bε, janangue i tø'mi gätho yu pa. ⁴⁰Ngutho ahu gui tøgbahu nguetho hin guí pahmbu 'be'a ní ora ba pengä, nugä ngue dán ja'igä ua ja ra ximhäi, bi 'yɛn'a ra Jesús.

Rán t'uti yu 'yɛhɛ xun ho ne'a hingui ho

⁴¹Nu'a ra Pedro bʉya, bi 'yänni 'bɛ'a bi man ra Jesús, bi 'yɛ̞mbi:

—Ma Hmu i, ha høngdähe guí xije ran t'uti, uague gätho u mi'da guí xifi.

⁴²Nu ra Jesús bi dąti:

—Nu'a ra 'yɛ̞hɛ xun ho, nzại i øt' rá 'bɛfi xun ho, nɛ di manda bu ja rá ngu rá hmu, nɛ di darpa yú mi'yɛ̞hɛhu. Nɛ nu'bu bi zøn ra ora din sihmɛ ts'u yú mi'yɛ̞hɛhu, i 'ui̞ni

xun ho. 43 Nε nu'a ra 'yεhε, da din'a rá hmu bu dim peh 'bu bi zøhø, da nu ran johya a buya. 44 Nguetho majuani dí xi ahu, nu rá hmu di un man'da ra 'bɛfi ngue di manda buya 'be'a gätho i pe'ts'i. 45Pe nu'bu n'da ra 'yεhε im bεnsε him ba ε'a n'dihi rá hmu, ne di du'mi di unba yú mí'yɛhɛhu, madague yu xisu o gue yun 'yohu, ne i sihmezehe nε i mihni, 46 ts'urpu thoho ba εh rá hmu ne bi dịn'a rá 'yehe bu hin di jamansu rá 'befi, ne da zu'a rá 'yɛhɛ buya. Nɛ da hyøn'a thi, nɛ da 'yembi nte rán jaui a. Ne da mbenpu ba nu ran unbi bu 'buh mi'da guexta'a him bi 'yøt'a xí sifi, bi 'vɛn'a ra Jesús.

⁴⁷Nɛ man'da ran t'uti bi xi'ʉ, nɛ bi 'yɛ̞mp'ʉ:

—Nu n'da ra 'yεhε 'bʉ mi bądi 'bɛ'a in nde rá hmu, nɛ him bi 'yøt'e, pɛ xʉn ʉ tho ram fɛi din jap'a. ⁴⁸Pɛ nu'a n'da ra 'yɛhɛ 'bʉ hingui pądi 'bɛ'a in nde rá hmu, nɛ him bi 'yøt'a i numanho rá hmu, pɛ ts'ਚtho ram fɛi din jap'a. Nu'a to'o bin japi da bądi xʉn ngu, jatho da 'yøt'e xʉn ngu. I jatho da 'yøt'e n'da ngu n'da hangu na ngu bin japi da bądi, bi 'yɛn'a ra Jesús.

Din ja yun heque

⁴⁹Νε xø bi 'yɛn'a ra Jesús:

—Nugä bá εcä, pε hinga gätho yu ją'i da numanhogui, janangue din su'u 'da. Pε guexta'a hinga nan ja xun ho. ⁵⁰M'bεt'o ga nu xun ngu yun unbi, nε nu'bu bi zøn ra pa din ja'a dím ma, n'da ran unbi xun utho ga nugä buya. Nε xun ho 'bu ga nu n'dihi. ⁵¹Pε o guí εmhbu din hε yu sui ngue bá εcä ua, pε man'da

din ja yu sui. ⁵²Nuya din hec yún 'yomfɛni u 'bupu ja n'da ra ngu. Tengu'bu hyu'u 'bupu da dɛngui, yoho u hin da dɛngui. ⁵³Nɛ din hec yún 'yomfɛni yun 'yohu nɛ din suhmbu yú ts'unt'u nanguecä. Nɛ yu xisu din suhmbu yú t'ixu nɛ din suhmbu yú ts'ihuɛ, hinga 'da'angu da bɛmhbu, bi 'yɛn'a ra Jesús.

Nu yʉ jạ'i him bi bạ'a rá hmεpya ra Jesús

54Nɛ xø bi 'yɛn'a ra Jesús:

—Nu'bu guí nuhu n'da ra güi ní
bøxpu ní yuh ra hyadi, guí ɛmhbu
din 'ye, nɛ din 'ye buya. 55Nɛ nu'bu
guí nuhu ba ɛh ran dahi bu sur,
guí ɛmhbu xtám pa ra pa buya, nɛ
xtám pa buya. 56Maxøts'e tho guím
mamhbu, guí pahmbu 'bɛ'a din ja
ra pa, pɛ nɛ hin guí pahmbu 'bɛ'a
ní hmɛpya guí nuhu ya, bi 'yɛn'a ra
Jesús.

Damin hocpazehe nin suihu

⁵⁷—Hanja ngue hingui sä gan 'yomfɛni 'bɛ'a xun ho gui 'yøthu, bi 'yɛn'a ra Jesús. ⁵⁸Nu'bu 'bu'a n'da da zix ahu bu 'buh ra zɛ'mi in nde di yąp'ahu, nu'bu gá mbɛ bu 'yu, gan hocuazɛhɛhu bu 'yu. Nu'bu hin'na, guehma gui sømmi bu 'buh ra zɛ'mi, nɛ di manda da jo ahu. ⁵⁹Nɛ hin da zä gui pømhbu bu asta gue'bu go gá juthu gätho bi zänni gui juthu, bi 'yɛn'a ra Jesús.

Hnehi thoho di päh rán 'yomfeni n'da

13 Nε bi si'a ra Jesús 'bε'a xí t'ørpa 'da yʉ mɛngu bʉ Galilea nɛ bi t'ɛmbi:

—Nu'a ra Pilato bi manda dí ho'ʉ 'da nu'bʉ mim bøx yʉ́ 'bøts'e bʉ ja ra danija Njerusalén, bi 'yɛmbi.

²Nu'a ra Jesús bi 'yɛ̞mp'ʉ:

—Ha guím bɛmhbu man'da i ja yú ts'oqui u to'o bi mba ntho xinda gue'u mi'da yú mɛnguhu.

³Pɛ hin'na maha. Pɛ dí xi ahu, ngubu dín un'nahu. Gui nuhu ran ts'ɛmbi mazai 'bu hin gui päh nin 'yomfɛnihu.

⁴Nɛ'u 'dɛ'ma hyato bi du bu Siloé 'bu mi yøt' ra jado, ha guí ɛmhbu man'da mi ja yú ts'oqui u xinda gue'u mi'da 'bupu Jerusalén.

⁵Hin'na maha, nɛ ngutho ahu guin nuhu ran unbi 'bu hin gui päh nin 'yomfɛnihu, bi 'yɛn'a ra Jesús.

Ra hmepya ra za him bin zuh vun dät'o

⁶Nε nubʉya, bi xi'a n'da ran t'uti, bi 'yɛ̞na:

—Mi 'bu'a n'da ran 'yohu mi ja n'da rá huąhi. Ne bi 'yet'a n'danza ra higo. Ne mi pa ran 'yohu da nu 'bu di zupu yún dät'o, pe xínga n'dandi bin zuh yún dät'o ra higo. ⁷Janangue bi zon'na rá mbefi bu ja rá huahi ne bi xifi da 'yexa ra za: "Nuya, ná hyu jeya ya ngue dí tø'mi din ja yún dät'o na ra za, pe hin te i zudi. Dami 'yex ya, ndetho í sunba yú dehe ra häi a ra za," bi 'yembi. ⁸Pe nu'a rá mbefi bi 'yena: "Dím 'bäpu man'da jeya, ga zunspa ra häi bu rán dui, ne ga ponbä xun ho yu häi. 9Xøhma din zuh yún dät'o buya. Pe nu'bu hin din zudi, ga exä 'bu," bi 'yen'a ra mbefi buya, bi 'yɛn'a ra Jesús 'bʉ mi man'a ran t'uti.

SAN LUCAS 13 144

Nu'a ra Jesús bi hoc'a n'da ra mbedi xisu

¹⁰N'da ra pa ran säya buya, min xänbate bu ja ra niją ra Jesús.

¹¹Nε mi 'bäpu n'da ra xisu ngue ná 'dε'ma hyąto jɛya madí unba ra zithu, him madi japi di juan rá ją'i.

¹²Nε nu'bu mi nu'a ra Jesús, bi 'yɛmbi:

—Grá xisu, ya bi zä ni ją'i ya, bi 'yɛ̞mbi.

13 Nɛ bi mba nthädi ra xisu buya, bi dä'a ra Jesús, 'bex bi juan rá ja'i a buya. Nɛ nu'a ra xisu bi 'yɛspa Oja. 14 Pɛ nu'a ra ngurpi bu ja ra nija ɛmmɛ bin cuɛ nguetho bi nu ra Jesús bi hoc'a n'da ra ja'i ra pa ran säya. Nɛ bi 'yɛmp'u mi 'bupu:

—Nts'änni 'dato pa gam pεhmbu n'da semana, nε gue'u yu pa gua εhmbu ngue din hoc'ahu ua, pε hinga gue ra pa ran säya gua εhmbu da mba ma hoc'ihu ua, bi 'yɛn'a ra ngurpi bu ja ra niją.

15 Nu ra Jesús bi 'yɛna:

—Xi ahu, ha hin guí xoju nin danihu ne guí sixhu bu ja ra dehe madague ra pa ran säya. ¹⁶Ne mi 'bäcua n'da ra xisu rám bom'beto ra Abraham, ná 'de'mahyato njeya madi unba ra zithu tengu'bu án thu't'i, ne guí ɛmhbu hingui ho ngue dá xocpä a nangue rá ts'edi ra zithu, nguetho ra pa ran säya ya, bi 'yɛn'a ra Jesús.

¹⁷Bin hɛtho u yun suihu ra Jesús buya, nɛ bi mbɛs' yu sä. Pɛ nu'u yu ja'i bin johya 'bu mi nu yun t'øt'e nuixte bi 'yøt'a ra Jesús.

Rán t'uti ra hmudä ra mostaza ¹⁸Νε xø bi 'yɛ̞n'a: —'Bε'a ní hmɛpya sä ga xi ahu ngue ga ut'ahu 'bɛpu ní manda rá ts'ɛdi Oją ua. ¹⁹Nu'a, tengu rá hmudä ra mostaza. Zu ts'u 'bu xu 'boni, pɛ nu'bu xum bøts'e, i te tengu n'da ra za, nɛ yu doja i øt' yú 'bafi bu ja yú 'yɛ, bi 'yɛ̞n'a ra Jesús.

Ran t'uti rá íxi ra thuhme

²⁰Nε xø bi 'yεna:

—'Bɛ'a man'da ra hmɛpya sä ga xi ahu ngue ga ut'ahu 'bɛpu ní manda rá ts'ɛdi Oją ua. ²¹Nu'a, tengu ra íxi 'bu din jap'a ra juni, nɛ gätho bi nden'a ra juni buya, bi 'yɛn'a ra Jesús.

Ran t'uti ra goxthi xun ts'it'i

²²Nu ra Jesús i 'yo ra 'yu ní mba bu Jerusalén, nε bi xänba yu ją'i bu ja yu hnini bi thogui. ²³Nε nu'u 'da yu ją'i bi 'yänni:

—Ha hin ε ngu'ʉ yʉ jạ'i dim pøhø, gue da mba nhyạni, εn'ʉ.

²⁴Nu'a ra Jesús bi dati:

—Nu'a ní yut'a n'da bu mahets'i, tengu n'da ra goxthi xun ts'it'i. Dami hyomhbu gui cuthu bu, nguetho dí xi ahu, da zøn ra ora xun ngu da nde da yʉrpʉ, pε ya him man zä. ²⁵Nguetho da zøn ra ora da gut ra goxthi ra Hmu, ne dim 'bäpu thi u 'da da zo'a, da 'yɛmbi: "Ma Hmu i, dami xogahe." Pe nu'a ra Hmu da 'yɛmda'u: "Hin dí pa ahu," da 'yɛmbi. ²⁶Nε nu'ʉ da 'yɛ̞n'ʉ: "Pɛ dán sihmɛhʉ, nε gá xängahe bu ja ma hninihe," da 'yembi. ²⁷Pe nu'a ra Hmu da 'yena: "Pε dí xi ahʉ, hin dí pa ahʉ, ní mbähä bu, hin da zä gui cuthu ua, gyú ts'om'bäihu," da 'yɛmthoho u.

²⁸Nε ғтте da bғndumbні н 'bн dim 'bäрн thi bн di manda rá ts'єdi Oją. Nɛ din zom bu di cuxt' pu yú ts'i u nangue ran unbi da nu bu. Nɛ da hyant'a ra Abraham 'bupu mbo, nɛ ra Isaac, nɛ ra Jacob, nɛ gätho mi'da yú pøngahya Oją, ²⁹ nɛ da hnu u xun ngu mi'da yu ja'i ngue bi nɛxpu gä na nguni ra ximhäi i hupu di manda rá ts'ɛdi Oją. ³⁰Nɛ dí xi ahu, to'o ɛna i 'bɛt'o ua, dim 'bejua bu u, nɛ nu'u t'ɛmbi i 'bejua ua, dim 'bɛt'o bu u, bi 'yɛn'a ra Jesús.

Ra Jesús min nde xtí hugc'u 'bupu Jerusalén

³¹Nu'bu mi man'a ra Jesús, bi zø'i 'da yu fariseo nɛ bi 'yɛn'u:

—Nde'bu gui pøn'a n'dihi ua di manda rá ts'ɛdi ra Herodes, nɛ in nde da hyo'a i.

32 Bi da'a ra Jesús:

—Nu ra Herodes ra hyäte a. Ní mbähä gui xihmbu ngue nuya nɛ nixudi ga thoqui ga øt' ma 'bɛfi, ga høn'a thi yu zithu, nɛ ga hoc yu hyɛnni bu ga thogui. Nimani buya ga juacä ma 'bɛfi, gui 'yɛmfu, bi 'yɛmbi. ³³Nuya, nɛ nixudi, nɛ nimani dan 'yogä, i jatho ga søm bu Jerusalén, nguetho guepu i tho bu yú pøngahya Oją, bi 'yɛn'a ra Jesús.

³⁴Νε εmmε bi du rá mbui ra Jesús nangue'u i 'bupu Jerusalén, nε bi 'yɛna:

—Nu ahu gyu mɛnguhu Jerusalén, guí hohu yú pøngahyą Oją, nɛ gadí bat'adohu u bí pɛn'nahu Oją. Hangu yu pa dá nde ga jamansu ahu tengutho n'da ra c'u'øni i comp' yú bąsi 'bu xun de, pɛ nu ahu hin gá ndehu. ³⁵Nuya njon da mbäh ni hninihu nɛ hin din ja ahu rán jąpi Oją. Nɛ dí xi ahu, hin gui nuju mahøn'a jague'bu bá εcä mahøn'a.

Ne nu'bu gá nuju, gui 'yɛnju:
"Majapi a bá ɛhɛ nangue rá thuhu
ra Hmu," gui 'yɛnju, bi 'yɛn'a ra
Jesús 'bu mi 'yɛmp'u yu mɛngu bu
Jerusalén.

Nu'a ra Jesús bi hoc'a n'da xun nden rá ja'i

Nu n'da ra pa ran säya, bi mba bán sihmɛ bu rá ngu n'da ra ngurpa fariseo a ra Jesús. Nɛ gätho i 'bupu ja ran sihmɛ ɛmmɛ bi dø'mi da nu 'bɛ'a da 'yøt'a ra Jesús. ²Nguetho mi 'bupu n'da ran 'yohu xu nden rá ja'i. ³Nɛ nu'a ra Jesús bi 'yän'du yu fariseo nɛ yu xänbate nija buya:

—Ha din theui yun t'edi 'bu di hoc'a n'da ra hyenni 'bu ra pa ran säya, en'a.

⁴Pε xínga n'da'ʉ bi dąt'a. Nu ra Jesús bʉya, bi hoc'a ran 'yohʉ nɛ bin 'yɛ̞hmi. ⁵Nɛ nubʉya, bi 'yɛ̞mp'ʉ yʉ fariseo nɛ yʉ xänbate niją:

—Xi'bu n'da ahu, 'bu xtan däh nin danihu ogue ni buruhu bu ja ra hyahäi a ra pa ran säya, ha hin guí juxhu madague ra pa ran säya, bi 'yɛn'a ra Jesús.

⁶Pε xínga n'da bi zä bi dądi.

Ra Jesús bi ma hin da hyoni din nuixte zehe n'da

⁷Nu ra Jesús bʉya, bi nu'ʉ 'da i hon yʉ́n thuts'i, in nde 'darpʉ da hyuhmbʉ ʉ i pa nt'ɛ̞spi bʉ ja ran sihmɛ, nɛ bi 'yɛna:

8,9—O guí homhbu ngue 'darpu gui hyuhmbu u ja yú ts'ɛdi, nguetho nu'bu 'darpu guí huhmbu u, xi'bu da zøm bu n'da ngue man'da da t'ɛspi, nɛ da xi ahu ra mɛngu bu, "Gui ndanju nguetho SAN LUCAS 14 146

rán säui da hyupu na," da 'yɛn'ahu.
"Bá huhnu," da 'yɛn'ahu, nɛ ɛmmɛ
gui pɛs' ni sähu buya. ¹¹ Man'da
xun ho gui hyuxhu bu ma'ueni
ts'u 'bu gá cuthu bu ja ran sihmɛ,
nɛ nu'bu bi nu ahu ra mɛngu bu,
da xi ahu: "Amigo ahu, ba ɛhmbu
ua, gui hyuxhu ua man'da xun
ho," da 'yɛn'ahu. Nɛ gätho'u 'bupu
da numanho ahu buya, bi 'yɛn'a
ra Jesús. ¹¹ Nguetho gätho'u din
'yɛzɛhɛ, da zøn ra pa da go'ahäi. Pɛ
gätho to'o hin din 'yɛzɛhɛ, da zøn
ra pa da t'ɛspi, bi 'yɛn'a ra Jesús.

¹²Nɛ xø bi 'yɛn'a ra Jesús, bi 'yɛmp'a ra mengu bu:

—Nu'bu gui 'yøt'a n'da ran sihme, o guí zon'du ni amigo, xínga gue'u ni cu, xínga gue'u ni meni, xínga gue'u yu membeti guin tøt'am'buihu, nu'u, m'bejua da zix'i i gan sihme, tengu gá 'yørpe. ¹³Pe nu'bu gui 'yøt'a n'da ran sihme, dami zon'du yu hyoya, ne yu mbedi, ne yu dogua, ne yu xädä, ¹⁴ne di jąp'ahu Oją buya. Nguetho nu'u, hin da zä di co'ts'a'i 'be'a gá 'yørpa u. Pe Oją di co'ts'a 'bu bi zøn ra pa da xox'u yú 'yɛc'yei xun du, bi 'yɛn'a ra Jesús.

Ran t'uti ra dansihme

¹5N'da ran 'yohu mi sihmehu bu, 'bu mi 'yø'a bi man ra Jesús, bi 'yena:

—Mająpi gätho to'o din sihme bu di manda rá ts'edi Oją, bi 'yɛn'a ran 'yohu.

¹⁶Nε nu'a ra Jesús bi xi'a n'da ran t'uti nangue'ʉ to'o njuantho din sihmɛ bʉ di manda rá ts'ɛdi Oja, nɛ bi 'yɛ̞mp'ʉ:

—Mi 'bu'a n'da ran 'yohu bi 'yøt'a n'da ra dansihme, ne emme xun ngu u bi xifi din sihme bu. ¹⁷Ne nu'bu mi gua'a bi hoc ran sihme, bi mben'na rá 'yṣhe da xi'u 'bex ba ṣhe. ¹⁸Pe gätho u bi ma hingui sä da mba. Nu n'da ran 'yohu bi 'yṣna: "Nugä ja dá tängä n'da ma huahi, jatho ga mba ba nugä. Dami pungagui, hingui sä ga mba," bi 'yṣn'a n'da. ¹⁹Ne nu'a man'da ran 'yohu xø bi 'yṣna: "Nugä ja dá tängä cut'a pare yu mbundani, jatho ga säpi ga pɛpi, dami pungagui, hingui sä ga mba," bi 'yṣn'a man'da. ²⁰Ne xø man'da buya bi 'yṣna: "Ja dá singä n'da ma xisu ne hingui sä ga mba bu," bi 'yṣn'a.

²¹Nu'a ra 'yɛhɛ bʉya, bi mbengbʉ ja rá ngu'a rá hmu, ne bi xifi 'be'a gätho bi man'u yun 'yohu. 'Bex bin cuɛ'a rá hmu buya, ne xø bi mbenh mahøn'a ngue da mba n'dihi bu ja yú 'yu ra hnini, ne ba si'u yu hyoya, yu mbedi, ne yu xädä, ne yu dogua da dim bu, ba εhε din sihmε. 22 Nubuya, nu ra 'yεhε bi 'yεmp'a rá hmu: "'Bucua ya bá sigä ya, pε him bi yuh ni ngu." ²³Nu rá hmu buya, bi 'yɛmbi: "Ní mba bu ma'ueni ts'u ra hnini, ne dami 'yørpa ts'ɛdi ba ɛ'ʉ hønt'a go to'o gui tim bu 'yu, da yuh ma ngu. ²⁴Pε xínga n'da ran 'yohʉ rá mbʉdi dá zohndä da zi na man sihmegä," bi 'yɛn'a rá hmu, bi 'yɛn'a ra Jesús 'bu mi man na ran t'uti. Bi ma nangue'u t'embi hin yún sähu, pe man'da go da yurpu di manda rá ts'edi Oją u.

Da nu yun unbi to'o da den'na ra Cristo

²⁵Nɛ xun ngu yu ja'i mi tɛn bu 'yu ra Jesús. Nu ra Jesús buya, bi nyɛgui nɛ bi 'yɛmp'u:

²⁶—To'o gätho in nde da dɛngui, jatho man'da xʉn ngu da bɛngä xinda guepu nam bɛn'a rá ta o gue rá mbe, ogue rá xisu, ogue yú t'uhni, o gue yú cu. Jatho man'da da bɛngä xinda guepu nín huɛczɛhɛ. Nu'bu hin'na, hin da zä da dɛngui. ²⁷Nɛ to'o gätho hin da hyät yun unbi, ngue i su da tho 'bu da dɛngui, hin da zä da dɛngü u.

²⁸Ne 'be gan 'yomfenihu ts'u 'bu gui hyäthu gui tengahu, tenguthoho n'da ran 'yohu 'bu da 'yɛna da hyøh rá ngu. ²⁹M'bɛt'o din 'yomfɛni 'bɛ'a da 'yøt'e, nu'bu hin'na, ts'urpu thoho hinga xøt'a dí jua'a rá ngu. Nu yu ją'i buya da denthoho, ³⁰nε da 'yɛn'ʉ: "Nuna ran 'yohu bi du'ma rá ngu, pe hinga xøt'a bi juadi," da 'yɛn'u,bi 'yɛn'a ra Jesús. ³¹Nε ngutho n'da ra ts'ut'abi 'bu i 'bu'i 'dɛt'a mahuahi yú dofui, pɛ m'bet'o din 'yomfeni 'bu da zä din tunhui a man'da ra ts'ut'abi 'bu'i 'däte mahuahi yú dofui. 32 Ne nu'bu im beni hingui sä da dapi, pe da mbehna n'da rám 'bɛhni da 'yän 'bu da zä din hocpadahu.

³³Nɛ ngutho ahʉ, pɛ jatho 'bɛ gan 'yomfɛnihʉ 'bʉ da zä gui 'yɛ'ts' ni pähä zɛhɛhʉ, nɛ him man guim bɛmhbʉ 'bɛ'a i ja ahʉ, janangue da zä gui tɛngahʉ bʉya, bi 'yɛn'a ra Jesús.

Hingui ho ra ų 'bu di 'beh rán ho

³⁴Νε man'da bi man ra Jesús, bi 'yεna:

—Nu ra ų mahyoni a, pɛ nu'bʉ di 'bɛh rán ho, hin'yʉ 'bɛ'a din hogui. ³⁵Nɛ nte da mbɛfi, xínga gue ra häi sä di hoqui, nɛ da mba ma bʉnt'i thoho. Guín jahʉ bʉ 'bʉ hin'yʉ nin hohʉ, bi 'yɛn'a ra Jesús.

Ran t'uti ra de'yo bim 'bedi

N'da ra pa, xun ngu yu
hyacahäi ne mi'da yu

ts'om'bäi bim pɛti bu, da 'yøde 'bɛ'a i man'a ra Jesús. ²Janangue'a nu'u yu fariseo nɛ yu xänbate niją bi c'aman'u ra Jesús, nɛ bi 'yɛn'u:

—Hingui ho øt'na ran 'yohu, nguetho i yahu nɛ i sihmɛhu yu ts'om'bäi, sä bi 'yɛn'u.

³Nɛ nu'a ra Jesús bi xi'a n'da ran t'uti, nɛ bi 'yɛmp'ʉ:

⁴—Xi'bu n'da ran 'yohu i 'bu'a n'da ciento yú de'yo, ne xtim 'be'a n'da, ne hønt'u goho 'däte ma'de'ma guto di 'bupu, 'be'a da 'yøt'a. Ha hin da zopu goho 'däte ma'de'ma guto, ngue da mba ba hon'a bim 'bedi gue'bu go bi dini. ⁵Ne nu'bu bi dini, da gäx rá xixi, din johya buya. ⁶Da duxpu ja rá ngu, da zon'du yú amigo, ne'u din tøt'am'buihu, ne da 'yɛmp'u: "Dan johyahu ya, nguetho dá tịngä na ma de'yo bim 'bedi," da 'yemp'u. ⁷Ngutho bu mahets'i, emme di johya u bí 'bupu 'bu bi päh rán 'yomfeni n'da ra dądits'oqui ua ja ra ximhäi. Man'da di johya nangue'a, xinda gue'u mbɛni hingui dim 'bɛdi, ngue ɛna hin'yu yú ts'oqui, bi 'yɛn'a ra Jesús.

Ran t'uti n'da ra xisu bi 'beh rá mbeti

⁸Nɛ man'da ran t'uti bi man ra Jesús, bi 'yɛ̞na:

—Ne ximangutho n'da ra xisu mi ja 'det'a yú mbeti ne bi 'be a n'da, pe 'be'a hmaha da 'yøt' ra xisu buya. Ha hin di søc rá sibi ne da goc rá ngu, da hyoni gue'bu go bi dini.

⁹Ne nu'bu bi dim buya, da zon'du yú amigo ne'u din tøt'am'buihu, ne da 'yembi: "Dan johyahu nguetho dá tingä ma mbeti dá 'becä," da 'yembi.

¹⁰Ngutho u yúm 'behni Oja bí 'bupu mahets'i, emme di johya 'bu bi päh

SAN LUCAS 15 148

rá mbʉi n'da ra ją'i ua, bi 'yɛ̞n'a ra Jesús.

Ran t'uti n'da ran 'yohu bi huec rá ts'unt'u

¹¹Ra Jesús bi ma man'da ran t'uti 'bepu ní huggahu Oja ne bi 'yena: -Mi 'bu'a n'da ran 'yohu yoho yú ts'unt'u mi 'bui. 12 Nu'a ná voho rá ts'unt'u bi 'yemp'a rá ta: "Dami 'dac ya 'be'a guím beni gui soga 'bu gá tu," bi 'yembi. Janangue nu'a ran 'yohu buya, bi unni 'bɛ'a gätho in ndepe da gohmi'u yú ts'unt'u. ¹³Mi tho'i ts'u yu pa buya, bi hyaxa bin t'un'na to'o xí 'yäh ra erencia, nε bi mba. Bi mba n'danni ra häi, yatho, nε 'bexque 'dahmantho bi jua'a bi hyats'i, nguetho bi 'yøt'e 'bɛ'a bi numanhose. 14 Gätho bi juadi, xíngui ts'u nte bi 'yegui. Ne guepu ra häi xí zøni bin ja n'da ra dathu, nε xíngui ts'u 'bε'a da zi.

¹⁵Pε nubuya bi hyon ra 'bεfi ra ts'unt'u. Ne nu n'da ran 'yohu, ra mengu bu, bi xifi di jamansup yú ts'udi. ¹⁶Pe njon bi 'ujn'a ra ts'unt'u nε in nde da zi'a mi si yu ts'udi, nguetho emme tumanthuhu. ¹⁷Ne nu'bu mi thoh yu pa, bin 'yomfeni buya, bi beni: "Nubu ja rá ngu ma ta, mbongui thoho 'be'a da zi yú 'yɛhɛ, nɛ nugä dí sägä ran unbi ngue hin'yu ga sigä ua. 18 Pe man'da xun ho 'bu ga pengä nε ga xi'a ma ta: "Nu'i ma ta'i, nugä dá øt'ä ram fe'ts'i nangue'e nε nangue Oją, 19 nε him man sä'be gui 'yɛngui ni ts'unt'ugä ya. Gui 'yengui ni 'yehethohogä ya, ga embi," bi 'yense a ra ts'unt'u.

²⁰'Bex bi mba bʉya bi hyax ra 'yu í mba bʉ 'bʉh rá ta. Pε nu'bʉ mi ts'ʉtho da zøn rá ngu, 'bex bi hyant'a rá ta ngue ba ¿pu, nɛ ¿mmɛ bin johya, bi huɛc'a rá ts'unt'u. Bin ti'a rá ta, bin c'at'ui bu 'yu, bi hyufi nɛ bi zuspa rá 'yogu. ²¹Pɛ nu'a ra ts'unt'u bi xi'a rá ta: "Nugä, dá øt'ä ram fɛ'ts'i nangue'e nɛ nangue Oją. Nɛ him man sä'be gui 'yɛngui ni ts'unt'ugä ya," bi 'yɛmbi.

²²Pε nu'a rá ta, bi xih yú 'yṣhɛ:
"Dami hethu ra pahni man'da xun
ho, nɛ dami cärpahu n'da ram fo'yɛ
rá xä, nɛ gui 'yurpahu yú zapato.

²³Nɛ ba sihu ra t'undani xun zaqui
nɛ gui hyohu, gui hoju ran sihmɛ
nɛ dan johyahu. ²⁴Nguetho nuna
ma ts'unt'u tengu'bu bi du, pɛ nuya,
tengu'bu bim 'bui mahøn'a. Bim
'bedi pɛ nuya dá tin ya," bi 'yɛn'a
rá ta.

Nε 'bex bin ja ran sihmε.

²⁵Pɛ nu'a ra 'bɛt'o ts'unt'u mi 'yo bu huahi, nɛ nu'bu mi mba bu ja rá ngu, i øh ra 'bida nɛ ran johya mi ja bu ja rá ngu rá ta. ²⁶Nɛ nu'a, bi zohn'na n'da rá 'yɛhɛ bi 'yänni: "'Bɛ'a i ja bu ja rá ngu ma ta," bi 'yɛmbi.

²⁷Nɛ nu ra 'yɛhɛ bi 'yɛmbi: "Nu'a nin 'yohʉ bi zøhø, nɛ ni ta bi hyo ran dạni xʉn zaqui, bi 'yøt'a n'da ran sihmɛ xʉn ndoho. Nguetho bin johya ngue ya bá penc'a nin 'yohʉ," bi 'yɛmbi.

²⁸Pε nu'a rá mbudi ts'unt'u bin cue ne him bi nde bi yurpu mbo ra ngu. Ne nu'a rá ta bi bøni, bi 'yørpa ts'edi da yurpu mbo. ²⁹Pε nu rá ts'unt'u bi 'yɛmp'a: "Emme xun ngu yu jɛya dá øt'ä ni 'bɛfi ne xínga n'dandi dá fɛsthoho a gá xiqui. Ne hin jam'bu xcá 'dac'a n'da ra t'uchibo ngue dan sihmehe ma amigo. ³⁰Pε nu'bu go mi zø'a

ni ts'unt'u bi juat'a ni mbeti ne xun ts'o bi 'yøt'e, 'bex gá hyo ra t'undani xun zaqui," bi 'yɛmbi.

³¹Pɛ nu'a rá ta bi 'yɛmbi: "Pɛ ma zu ts'unt'u i, thocua thoho dí 'buhmi ua, nɛ gätho 'bɛ'a i jagä, gätho ni mbɛti. ³²Pɛ xun ho 'bɛ'a dá øt'ä nguetho nu nin 'yohu tengu'bu ya xí du nɛ i 'bui mahøn'a, nu'a bim 'bɛdi pɛ ya dá timhbu," bi 'yɛn'a rá ta, bi 'yɛn'a rá Jesús 'bu mi man ran t'uti.

Ra nt'uti ra ngurpa 'yεhε hinga gue'a bi 'yøt'e

16
Ne xø bi ma man'da ran t'uti a ra Jesús, ne bi 'yena:
—Mi 'bu'a n'da ra membeti, ne mi si n'da rá ngurpa 'yehe bi xifi di manda 'be'a gätho i pe'ts'i. Pe bi si'a ra membeti hingui ho øt' rá ngurpa 'yehe nguetho i haczehe 'be'a i ndese.

2 Janangue'a bi zon'na rá 'yehe ne bi 'yembi: "Dá øcä hingui ho'a guí øt'e. Nuya, dami däqui hangu din theui ma 'befi nguetho ya him man gam pecua," bi 'yembi.

³Nu'a ra 'yɛhɛ bi bɛm buya 'bɛ'a da 'yøt'e. Bi 'yɛnsɛ: "Nuya him man zä dam pɛcua ya, nɛ hingui sä dam pɛh na huạhi, nɛ dí pɛ'ts' ma sä ga ätho ra mbɛti, 'bɛ'a hmaha ga øt'ya," bi 'yɛnsɛ. ⁴Bi bɛm buya 'bɛ'a da 'yøt'e n'dahma dim 'buh yu amigo di zɛ 'bu hin'yu rá 'bɛfi.

⁵Nε nu ra ngurpa 'yṣhε bi zon'du to'o i tup'a rá hmu. Nε bi 'yän'na n'da hangu in dupate. ⁶Nε bi dạti, bi 'yṣna: "N'da ciɛnto dạmbot'ɛgui ra aceite dí tupi." Nε nu'a ra 'yṣhɛ bi 'yṣmbi: "Dami ts'on ni søcuą nɛ gui 'yo't' ma'da'yo gui hyuxpu ngue hønt'a yote ma'dɛt'a yu dạmbot'ɛgui

guí tupa ma hmu," bi 'yɛmbi. ⁷Nɛ xø bi 'yän'na man'da ran 'yohu hangu xø in dupate a. Nu'a bi dati: "N'da ciɛnto t'ɛni ra trigo dí tupi." Nɛ nu'a ra 'yɛhɛ bi 'yɛmbi: "Dami päh ni søcua, nɛ dami hyuxpu goho 'däte t'ɛni thoho guí tupi."

⁸Nɛ nu'bu mi pạ'a rá hmu 'bɛ'a bi 'yøt' rá 'yɛhɛ, bi 'yɛmbi: "Emmɛ guí padi 'bɛ'a sä gui 'yøt'e ngue din jasɛ 'bɛ'a gätho gui hyoni," bi 'yɛn'a rá hmu. Nu yu ja'i 'buh ya, ɛmmɛ i padi da hyät' yu mija'ihu n'dahma da dasɛ. Pɛ nu'u i 'yo bu ja ran nɛqui, hingui padi da 'yøt'e tengu na, bi 'yɛn'a ra Jesús.

⁹Nɛ dí xi ahu ngue nu ra mbɛti di ts'onba rán 'yomfɛni u 'da, pɛ da zøn ra pa ngue hin te di muui a, pɛ nu ni mbɛtihu xun ho 'bu gui fäxhu yu ja'i, nɛ dim 'buh ni amigohu ngue 'darpu gním 'buhmbu bu mahɛts'i.

10 'Bu'i 'da zu ts'utho i ja da 'yøt'e, pe i padi di jamansu a, janangue'a mfadi da badi di jamansu 'bu di ja xun ngu 'be'a da 'yøt'e. Pe 'bui 'da zu ts'utho i ja da 'yøt'e, ne hingui padi di jamansu a, janangue mfadi ngue hin da badi di jamansu 'bu di ja xun ngu 'be'a da 'yøt'e. 11 Nu'bu hingui padi di jamansu 'be'a i ja ua ja ra ximhäi, ne xín da badi di jamansu rá 'befi Oja. 12 Ne nu'bu hingui padi di jamansu a hin rá mbeti zehe, njon da zä di un'na njuantho rá mbeti 'bu.

13 Njo'o n'da ra ja'i sä dim 'bu'i yoho yu hmu, nguetho nu'a n'da ra hmu hin da numanho a, nɛ nu man'da di huɛc'a. Uague da 'yørpa rá 'bɛfi a n'da nɛ da zocpada bu rá 'bɛfi a man'da rá hmu. Ngutho n'da

SAN LUCAS 16 150

ra ją'i hingui sä da 'yɛmbi rá hmu a Oją 'bʉ ɛmmɛ di ho ra mbɛti, bi 'yɛn'a ra Jesús.

¹⁴Nu yʉ fariseo εmmε di ho ra mbεti ʉ, nε nu'bʉ mi 'yø'a bi man ra Jesús, bi denthoho.

¹⁵Pε nu'a ra Jesús bi 'yɛ̞mp'ʉ:

—Nu ahu gyú fariseohu, guí øthu 'bε'a ní numansu ahu yu ją'i, pε nu Oją i pądi 'bε'a i ja bu mbo ni mbuihu. Nε nu'u gätho im bɛnsɛ yu ją'i ngue di muui, pε hin te di muui bu na nu Oją u, bi 'yɛn'a ra Jesús.

Ra Jesús bi ma din theui u yun t'edi a rá ts'edi Oją

16—Nu mam 'bɛt'o gán xähmbu yɨn t'ɛdi ra Moisés, nɛ gán xähmbu 'bɛ'a bi 'yo't' yu pøngahya maya'bu, bi 'yɛmp'u. Pɛ nu ra Xuua Nxixya bi du'mi bi man ran ho ma'da'yo nɛ bi ma 'bɛpu ní manda rá ts'ɛdi Oja. Nɛ xun ngu yu ja'i ya i øt'ra ts'ɛdi da yurpu di manda rá ts'ɛdi Oja.

17 Pɛ madague'a, pɛ xínga n'dant'ohni dim 'bɛ'u yun t'ɛdi. Nu ra ximhäi nɛ mahɛts'i da guadi, pɛ hin dim 'bɛ'u yun t'ɛdi, bi 'yɛn'a ra Jesús.

Ra Jesús bi ma hingui ho ran hyegui

18—Nɛ nu'a to'o da hyɛh rá xisu nɛ da zim man'da, ra 'yomt'ɛni a. Nɛ nu'a to'o da zin'a ra xisu bi thɛgui, nɛ gue'a dín 'yomt'ɛni a buya, bi 'yɛn'a ra Jesús.

Ran t'uti ra membeti ne ra hyoya í Lázaro

¹⁹Νε bi ma man'da ran t'uti ra Jesús, bi 'yɛ̞na:

—Mi 'bʉ'a n'da ra mɛmbɛti nɛ mahotho rá pahni xʉm hmadi a mi he, nɛ ɛmmɛ mi 'bumanho bu ja rá ngu, tengu thoho 'bu i ja ra ngo. ²⁰Nɛ i 'bu'a n'da ra hyoya, ɛmmɛ mi sä ran unbi, í Lázaro a. Nɛ gätho rá ja'i mi ja yu 'ya. Nɛ mi hupu ja rá goxthi ra mɛmbɛti, ²¹ngue mim bɛni da zi 'bɛ'a da hyɛpu ja rá mɛxa a ra mɛmbɛti. Nɛ nu'u yu xa'yo bi decpa yú 'ya bu i hudi.

²²Bi zøn ra pa bi du'a ra hyoya. Ne nu yém 'behni Oją bi zixpu mahęts'i nguepu 'bu'a ra Abraham. Mbejua buya bi du'a ra membeti.
²³Ne nu'bu mi du'a ra membeti buya, emme bi nu ran unbi bu bi mba.

Nε bi ndøts'e, bi nu yabu bí 'bu'a ra Abraham ne ra Lázaro 'darpu bí 'buhmi. ²⁴Nu ra membeti bi mbafi, bi 'yɛmp'a ra Abraham: "Nu'i mam bombøta i Abraham, dami huggui ts'u, ba penhua ra Lázaro da dut'ra dehe rá xä, da därca ma jani, nguetho εmmε di ung na ra sibi i ja ua." ²⁵Pe nu ra Abraham bi 'yemp'a: "Nu'i, mam bom'beto i, dami ben'i ts'u 'be'a gá 'yøt'e 'bu gmi 'bupu ja ra ximhäi. Gätho xun ho 'be'a mi ja i, pε nu'a ra Lázaro hønt'a ran unbi bi nu bu. Pe nuya din johya ua ra Lázaro ya, pε go hønt'a ran unbi guí nu ya. 26 Nε man'da dí xi'i, hingui sä n'da da nexua da zørpu guí 'bui, nguetho i ja inde n'da ra mba'ye xun ndoho. Ne nu'i hingui sä gua nexpu guí 'bui gui søcua, nguetho i cot'a ra mba'ye bu," bi 'yɛn'a ra Abraham.

²⁷Nu ra membeti xø mahøn'a bi xi'a ra Abraham: "Pɛ nu'bʉ hin da zä ba pɛnhua, pɛ gui pɛn'na ra Lázaro bʉ ja rá ngu ma ta da xi'ʉ 'bʉpʉ 'bɛ'a dí sägä. ²⁸Nguetho i

'bupu cut'a man 'yohu, nε dí ndepe ne'u da zøm bu guí 'buhmi 'bu bi du, ne him ba ecua ja ran unbi," bi 'yɛn'a. ²⁹Pε nu ra Abraham bi 'yɛmp'a: "Nubu 'buh nin 'yohu, i ja bu rám hman ra Moisés ne yú pøngahya Oja, i sä da 'yøxu 'be'a i man'u." 30 Pe nu ra membeti bi 'yɛ̞n'a: "Pε nu'i ma ta Abraham, hinga xøt'a rám hman ra Moisés ngue da 'yø'u man 'yohu, pe nu'bu da ndants'a n'da xun du ngue da xifi, da 'yø 'bu." 31 Pe nu ra Abraham bi 'yembi: "Nu'bu hin da 'yurpa ra güenda 'be'a i man ra Moisés ne vú pøngahya Oja, xín da 'yurpa ra güenda 'bu da ndants'a n'da xun du," bi 'yɛn'a ra Abraham, bi 'vɛn'a ra Jesús 'bʉ mi man ran t'uti.

Xun duxqui ra ts'oqui

Nu'a ra Jesús bi xih yú xädi, bi 'yɛ̞mp'u:

—Hin'yu n'da ra pa hin da ts'ä a ni mbuihu gue i nde di 'bɛp ahu gui 'yøthu ra ts'oqui. Pe ndumbuitho da nu'a to'o di japi da 'yøt' yu ts'oqui rá miją'iui. ²Dí xi ahu, to'o di japi da 'yøt' ran ts'o n'da hinga na te rá mbui, man'da xun ho 'bu xtín tharpa n'da ra dojuni rá 'yuga ne xtá t'entpu ja ra deja, xinda gue'bu xtí japi xta 'yøt' ran ts'o a n'da hinga na te rá mbui. ³Dami jamansu 'bɛ'a guí øthʉ. Nu'bʉ 'bu'a n'da ni mija'ihu bi 'yøt'ahu ran ts'o, dami xihmbu hingui ho'a bi 'yøt'ahu. Ne nu'bu da 'yømanho a guí xihmbu, damim punbahu 'bu. ⁴Nε nu'bu yoto nidi n'dapa da 'yøt'ahu ran ts'o, ne n'dandi ngu n'dandi da 'yä ahu ra punbi, dami punbahu gätho, bi 'yɛn'a ra Jesús.

Gätho xun hei sä da 'yøt'a n'da 'bu i ec'yei xun ho

Nu'u yu xädi bi 'yem buya: —Grá Hmu, dami jaje ga ec'yeihe xun ho, bi 'yemp'a ra Jesús.

⁶Nu'a ra Jesús bi 'yɛmp'ʉ:

—Madague'a ɛmmɛ zu ts'utho gui 'yɛc'yɛigahu, tengu bu ni nɛqui rá hmudä ra c'u, sä gui xihmbu ra za 'bäcua da 'uegue dím 'bäpu ja ra deja nɛ da 'ueh puya. Hin'yu 'bɛ'a xun hɛi 'bu gui 'yɛc'yɛigahu, bi 'yɛn'a ra Jesús.

Hin ga çmfu xun ho dí øthu 'bu dí øthu'a i siju

⁷—Nu'bu n'da ran 'yohu 'buh rá 'yɛhɛ di jamansup yú de'yo uague dim pepu rá hughi, ne nu'bu bin de bá spu ja rá ngu buya, ha da sifi din sihme. ⁸Pe hin'na, pe da sifi di hocpa rán sihme rá hmu, ne nu'bu bi niya, ja din sihme ra 'yehe buya. 9Nu'a ra 'yεhε 'bu bi 'yøt' rá 'bɛfi bi xih rá hmu, hingui t'ɛmbi "jamadi gá 'yørca ma 'bɛfi," hingui t'ɛmbi, ngue ya ra 'yɛhɛ thoho. 10 Ne ngutho ahu 'bu gá 'yøthu rá 'bɛfi Oją, gui 'yɛnthohu buya: "Hin nte dá øthe ngue dí hnumanhoje, nguetho hønt'a bi xije Oja dá øthe," gui 'yɛmhbu, bi 'yɛn'a ra Jesús.

Ra Jesús bi hoqui 'dɛt'a yʉn 'yohʉ mí hɛ̞mb ra t'axca'ya

11 Nu'a ra Jesús 'bu mi 'yo bu ja ra 'yu ní mba Jerusalén, bi tho inde bu ja yún yani yu xequi Samaria ne Galilea. 12 Ne nu'bu mi ts'utho da yut'a n'da ra hnini, ba ¿pu 'det'a yun 'yohu i nde din c'athu ra Jesús. Gätho mi hemb ra t'axca'ya u. Ne

nu'u yun 'yohu yabu ts'u bim 'bäi nε nts'edi bi mbafi, bi 'yɛn'u:

¹³—Nu'i Jesús, grá xänbate i, dami huggahe ts'u, bi 'ygmbi.

¹⁴Nu ra Jesús 'bu mi nu'u buya, bi xi'u da 'yut yú ja'i u yu mbaja. Nε nu'bu mi mba u, nu'a ra Jesús bi japi bin hoc yú ja'i bu ní mba. ¹⁵Nε nu n'da, 'bʉ mi bạdi bi zä rá ja'i, 'bex bá peng bu 'bäh ra Jesús nε nts'εdi bi 'yεspa Oja. 16 Bin danyahmu bu ja rá gua ra Jesús, bi 'yäp ra jamadi nguetho bi yan'a. Nε nu'a, ra mengu Samaria a, hing rá mijudíohu ra Jesús. 17 Pε nu ra Jesús bi 'yɛna:

18—Ha hinga gue'u 'dɛt'a dá hoqui. Hapu i 'bu'u mi guto. Ha hingui sä ba ¿'u 'da xtí un ra jamadi Oją. Pε hønna n'da ran'yohu hing ra judío bi ben'a ra mate bi 'yørpa Oja, nε im bεnsε u mi'da ngue εna i pa Oja u, bi 'yena.

¹⁹Nε xø bi 'yεmp'a ran 'yohu: —Damim 'bäi, ní mba ya. Bin yan'a ya nguetho gá 'yec'yei gue i ja ma ts'edi, bi 'yen'a ra Jesús.

Ra Jesús bi ma 'bɛ'a di ja bu di manda rá ts'edi Oja

²⁰Nu'ʉ 'da yʉ fariseo bi 'yän'na ra Jesús:

—'Be'a ní pa di manda ua rá ts'edi Oja, bi 'yɛn'u.

Nu ra Jesús bi 'yɛ̞mp'ʉ:

—Hin da fa 'bu bi manda rá ts'edi Oją ua. ²¹ Hingui sä n'da da 'yɛna: "Guecua di manda ua rá ts'edi Oja," xíngui sä n'da da 'yɛna: "Guembu di manda rá ts'edi Oja bu," njon da zä da 'yɛna, nguetho guepu ja ní mbui n'da di manda rá ts'edi Oją, bi 'vɛn'a ra Jesús.

—Da zøn ra pa εmmε guin ndehu ba pengä, nugä ngue dán ja'igä ua ja ra ximhäi. Pε di 'bεtho yu pa ba pengä. ²³Pɛ nu'ʉ 'da da 'yɛn'ahʉ: "Guecua i 'bucua ya," da 'yɛn'ahu. Nε nu'u mi'da da 'yɛn'ahu: "Guembu i 'bupu a." Pe 'yo guí øhmbu 'be'a da man'u. 24 Nguetho nu'bu bá

²²Ne nubuya, bi 'yemp'u yú xädi:

pengä, nugä ngue dán ja'igä ua ja ra ximhäi, di nequi tengu ra huei ngue di hyät'i gätho na nguni ra ximhäi. ²⁵Pε m'bεt'o thoho ga nugä xun ngu ran unbi, nguetho yu ją'i 'bucua ya, hin da 'yɛc'yɛigui.

²⁶Nu'a ra pa ba pengä, nugä ngue dán ją'igä ua ja ra ximhäi, nu yʉ ja'i dim 'bui da 'yøt'u tengu bi 'yøt' yu ja'i mi 'buhmbu a ra Noé. ²⁷Nu'u yu pa mi 'bu'a ra Noé, gätho yu ja'i mi øt'e 'bɛ'a mi numanhosɛ, mi sihme, mi mihni, ne mi sin yú xisu, ne gue'a mi øt'u gätho yu pa gue'bu go mi zøn ra pa bi yut ra dambosa ra Noé. Nε bin dą'ye buya, bi go'mi gätho ra häi a ra dehe, bi du gätho u yu ja'i mi 'bui. Din jabu da 'yøt' yu ja'i 'bu bá pengä.

²⁸Nɛ tengu bi 'yøt' yʉ jạ'i yʉ pa mi 'bu'a ra Lot, ne ngutho da 'yøt' yu ja'i dim 'bu 'bu bá pengä. Gätho yu ja'i bi 'yøt'e 'bɛ'a mi numanhosɛ da 'yøt'e, bin sihme, bim mihni, bim pä, nε bin täi, bi 'yøt' yú huąhi, bi hyøh yú ngu. 29 Gue'bu go mi zøn ra pa bi bøn ra Lot bu ja ra hnini Sodoma, ne bá cạh mahets'i ra sibi ma uanspi ra azufre, bi juah ra hnini, ne gätho mi 'bupu bi du buya. 30 Nε din jabu da 'yøt' yu ją'i 'bu bi zøn ra pa gua pengä.

31 Ne to'o i 'bäpu maxøts'e ra zets'angu, hin da yurpu mbo rá ngu ngue da hyạts'i 'bɛ'a ja bu, da mba tho. Nɛ gätho to'o dim pɛpu ja rá huạhi, hin ba peng bu ja rá ngu. ³²Dami bɛmhbu ts'u 'bɛ'a bi 'yøt'a rá xisu ra Lot 'bu mi sifi da 'da'u, nɛ man'da bi bɛnsɛ rá ngu, nɛ gue'a í du'a buya. ³³Nɛ gätho to'o in nde da yạnsɛ rá te, da nu ran unbi mazại a. Pɛ gätho to'o hin da bɛni da yạnsɛ rá te, din ja ra te mazại a.

³⁴Nu'bu bi zøn ra ora gua pengä, di ąpu yoho bu ja rá oi, nu'a n'da da ts'ix'a, nɛ nu'a n'da da gopu. ³⁵Nɛ nu'bu yoho yu xisu 'darpu i juni, nu'a n'da da ts'ix'a, nɛ nu'a man'da da gopu. ³⁶Nɛ nu'bu yoho yun 'yohu i 'yo bu ja yú huahi, nu'a n'da da ts'ixa, nɛ nu'a man'da da gopu, nɛ hønt'a to'o da 'yɛc'yɛi, da ts'its'i, bi 'yɛn'a ra Jesús.

³⁷—Grá Hmu, hapu din ja'a guím ma, bi 'yɛ̞mp'u yú xädi.

—Nubu hapu di peti yu pada, gui pahmbu gue di 'bom bu xun du, bi 'yen'a ra Jesús.

Ran t'uti ra xisu ne ra ze'mi

18 N'da ra pa, bi xi'a n'da ran t'uti yú xädi ra Jesús, ra hmɛpya jatho thocua thoho din yaui Oja nɛ hin din xømbui da 'yädi gue'bu go din ja 'bɛ'a ädi. ²Nε bi 'yɛna:

—Mi 'bu a n'da ra zɛ'mi bu ja n'da ra hnini, him bi numansu Oją xínga gue yú miją'ihu. ³Nɛ mi 'bupu n'da ra xisu xí du rá ndø. Nɛ thocua thoho mi søm bu nɛ mi äpi da mbäts'i nangue rán suiui i 'bui. ⁴Nɛ him 'be bi 'yurpa ra güɛnda 'bɛ'a bi man ra xisu a ra zɛ'mi. Jague'bu min xømbui nɛ bi 'yɛ̞nsɛ: "Nugä, hin dí numansu Oja, xínga gue'u yu ja'i. ⁵Pɛ ɛmmɛ di pac na ra xisu, masque ga øt'ä 'bɛ'a in nde n'dahma hin di thoqui da zøcua ngue di xuhnanyagui," bi 'yɛ̞nsɛ ra zɛ'mi, bi 'yɛ̞n'a ra Jesús.

6 Nubuya, bi 'yɛmp'u yú xädi:
—Dami bɛmhbu 'bɛ'a bi 'yøt'a ra
zɛ'mi. Madague ra ts'om'bäi. ⁷Dí
xi ahu, man'da da 'yø'a Oja 'bu gui
hyumbi gui 'yäfu rám fäts'i ngue yú
t'uhni ahu a. Nu'a Oja hingui tø'mi
'bɛ din xømbuizɛhɛ a. ⁸Pɛ dí xi ahu,
'bexque da mbäx ahu 'bu guí äfu
rám fäts'i. Janangue'a gui 'yäfu Oja
di zɛt'a ni mbuihu, nɛ hin da du ni
mbuihu ngue him 'be ba pengä ua.
Nɛ nu'bu bá pengä nugä ngue dán
ja'igä ua ja ra ximhäi, ga tin ahu bu
guí ɛ̞c'yɛigahu, bi 'yɛ̞n'a ra Jesús.

Ran t'uti n'da ra fariseo ne ra hyącahäi

⁹Nɛ xø bi xih man'da ran t'uti ʉ im bɛ̞ni xʉn hosɛ, nɛ i numan'ʉ ʉ yʉ́ mija̞'ihʉ. Nɛ bi 'yɛ̞na:

10—Yoho yun 'yohu bi mba bu ja ra danija, din yaui Oja. Nu'a n'da ra fariseo, nɛ nu'a man'da ra hyacahäi.
11 Nu'a ra fariseo, bim 'bäi nɛ bin ya, bi 'yɛna: "Jamadi Oja, nguetho nugä xíngui ts'u xun ts'o ma mbui, nugä hin drá siyategä, nɛ hin drá hyätegä, nɛ hin drá 'yomt'ɛnigä tengu'u gätho mi'da. Jamadi ngue nugä hin dí øt'ä tengu øt'na ra hyacahäi i 'bäcua. 12 Nugä zai dí ɛ't' man sihmɛ yondi n'da semana, nɛ dí un'a ná 'dɛt'a a dí tah pu ja ra nija," sä bi 'yɛn'a ra fariseo 'bu min yaui Oja.

13 Pe nu'a ra hyacahai, n'danni ts'u mi 'bai, ne i su da ndøts' mahets'i, bi hye'mahai, ne emme tu rá mbui. Ne bi 'yemp'a Oją: "Ma Oją i, dín yeh ni mbui, nguetho drá dądits'oquigä," bi 'yen'a ra hyącahäi. ¹⁴Pe dí xi ahu, nu'a ra hyącahäi ya xí punba Oją 'bu mi mbeng bu ja rá ngu. Pe hin'na a ra fariseo, guexta'a xun ts'o rá mbui 'bu mi bøm bu. Nguetho to'o din 'yets'i, gue'a dín unba u. Pe gätho to'o hin din 'yets'i, gue'a dí t'espa u, bi 'yen'a ra Jesús.

Ra Jesús bi jąp yu t'uhni

15 N'da ra pa, nu 'da yu ja'i bá si yú t'uhni bu 'buh ra Jesús ngue da mba nthädi u yú t'uhni. Pɛ nu'bu mi nu'u yú xädi 'bɛ'a øt' yu ja'i, him bi japi da ts'ix u yu t'uhni bu 'bä'a ra hmu, bi damyha thoho u. 16 Pɛ nu'a ra Jesús bi zon'du yu t'uhni nɛ bi 'yɛmp'u yú xädi:

—Dami jafu ba thocua ya yu t'uhni, o gadí hɛcuahu, nguetho gätho to'o da yurpu di manda rá ts'ɛdi Oją, jatho 'bɛ da gohi tengu n'da ra t'uhni. ¹⁷Dami 'yøhmbu 'bɛ'a dí xi ahu: Jatho gui 'yøthu tengu'bu gyú t'uhnihu 'bu guí ɛc'yɛihu. Nu'bu hin'na, hin gui cuthu bu di manda rá ts'ɛdi Oją, bi 'yɛn'a ra Jesús.

N'da ra membeti i yaui ra Jesús

¹⁸Νε nu'a n'da rá ngʉrpi yʉ judío, bi 'yän'na ra Jesús:

- —Grá hogaxänbate, 'bε'a sä ga øt'ä ngue din jagä ra te mazại.
 - 19 Bi dąh ra Jesús:
- —Ha guím bɛni 'bɛ'a guím ma ngue guí ɛngui xʉn hogui, nguetho hønt'a Oja xʉn ho. ²⁰Guí padi 'bɛ'a i mam bʉ ja yʉn t'ɛdi ngue i ɛm bʉ: "O guí 'yomt'ɛni, o guí hodu, o

guím pɛ, o guí man ra fɛhni, nɛ gui numansu ni ta nɛ ni mbe," i mam bu, bi 'yɛn'a ra Jesús.

²¹Nu ran 'yohu bi dąti:

—Gätho dí øt'ä u gue'bu go mán t'uhnigä, bi 'yɛ̞n'a ran 'yohu.

²²Nɛ nu'a ra Jesús'bʉ mi 'yøde 'bɛ'a bi ma, bi 'yɛ̞mp'a:

—Gadí 'bɛ'i ts'u. Ní mba, gui pä gätho 'bɛ'a i ja i, nɛ gui darpa yu hyoya. Gua ɛh puya, gui tɛngui. Nɛ nubuya, xun ngu din ja i bu mahɛts'i, bi 'yɛn'a ra Jesús.

²³Pɛ nu'a ran 'yohu 'bu mi 'yø'a bi man ra Jesús, ɛmmɛ bi du rá mbui, nguetho ɛmmɛ ra mɛmbɛti a. ²⁴Nu'a ra Jesús 'bu mi nu bi du rá mbui a ran 'yohu, bi 'yɛna:

—Xun hei yu membeti da yurpu di manda rá ts'edi Oją. ²⁵Man'da hingui hei n'da ra camello da yurpu ja rá gu ra 'yofani, xinda gue'u yu membeti da yurpu di manda rá ts'edi Oją, bi 'yen'a ra Jesús.

²⁶Nε nu'u yu ją'i 'bäpu bi 'yɛn'u:

—Рє nu'bu in jabu, to'o maha da zä dim pøhø 'bu, bi t'єmp'a ra Jesús.

²⁷Nu'a ra Jesús bi dat'u:

—Nu'a Oją sä da 'yøt'a hingui sä da 'yøzɛhɛ yʉ ją'i, bi 'yɛ̞n'a ra Jesús.

²⁸Nu'a ra Pedro buya, bi 'yɛ̞mbi:

—Nugähe, gätho a mi jaje dá sohmbe nɛ dá tɛn'nahe.

^{29,30}Nu ra Jesús bi 'yɛ̞na:

—Guehma dí xi ahu, gätho to'o bi zoh rá ngu, ogue rá xisu, ogue yú cu, ogue rá ta, ogue rá mbe, ogue yú t'uhni, ngue bin unse di manda rá ts'edi Oją u, Oją di unni man'da xun ngu xinda gue'a mí ja. Pe ne'a ra te mazai buya, bi 'yen'a ra Jesús.

Xø bi ma mahøn'a rán date ra Jesús

³¹Nu ra Jesús, bi zixpʉ ma'ueni gätho 'dɛ'mayoho yʉ́ xädi, nɛ bi 'yɛ̞mp'ʉ:

—Dami 'yøhmbu ya. Ga mbähä bu Jerusalén, nɛ din ja bu 'bɛ'a gätho bi man yu pøngahya maya'bu nanguecä, ngue dán ja'igä ua ja ra ximhäi. ³²Nu yu ja'i di dägä bu ja rá ts'ɛdi u hing yu judío, nɛ nu'u da dengui, nɛ di c'aman'ugui, nɛ da zoxqui. ³³Nɛ da mbɛgbä, nɛ da hyogä. Pɛ ná hyu pa buya ga ndants'i mahøn'a, bi 'yɛn'a ra Jesús.

34 Pε nu'ʉ yʉ́ xädi, him bi badi 'bɛ'a nam bøn'a bi man ra Jesús. Nguetho njo'mitho yʉ́n 'yomfɛ̞ni ʉ.

Nu'a ra Jesús bi hoc'a n'da ra xädä mi haxta'a mi

³⁵Nɛ mi 'yo bu häntho bu ja ra hnini Jericó a ra Jesús, nɛ mi hupu nden'yu n'da zu xädä mi haxta'a mí si. ³⁶Nɛ nu'bu mi 'yø'a ra xädä ngue xun ngu yu ja'i mba bu, bi 'yänni 'bɛ'a øt'u. ³⁷Nɛ bi sifi mba bu ra Jesús ra mɛngu Nazaret. ³⁸Nɛ nu'a ra xädä buya, nts'ɛdi bi mbafi, bi 'yɛ̞na:

—Nu'i gra Jesús, rám bom'beto i ra David, dami huegui ts'u.

³⁹Nε nu'ʉ yʉ jạ'i mi 'bäpʉ, bi xifi din hɛ. Pɛ madague him mi ndepe din ya, pɛ man'da nts'ɛdi bi mbafi, bi 'yɛ̞na:

—Gra Jesús, rám bom'beto i ra David, dami huggui ts'u.

⁴⁰Nu'a ra Jesús bim 'bäh pʉya nɛ bi manda ba ts'inba a ra xädä. Nε nu'bʉ mim 'bähmi ra Jesús a ra xädä, bi 'yän'na ra Jesús bʉya:

41—'Bɛ'a guí nde ga øt'a'i, bi 'yɛmbi.

Nε nu ra xädä bi dati:

—Dín nde ga nu ran nequi.

42—Sä guin nu ya, bi zä ni dä nguetho gá 'yɛc'yɛi i ja ma ts'ɛdi, bi 'yɛmp'a ra Jesús.

43 'Bex bi zä bi nu ran nequi rá dä buya. Ne bi den'na ra Jesús. Bi 'yęspa Oją bu ní mba. Ne'u gätho yu ją'i mi 'bupu, bi 'yęspa Oją buya.

Ra Jesús ne ra Zaqueo

19 Nu'a ra Jesús bi yurpu ja ra hnini Jericó, mi 'yo bu, εna da thogui. ²Nε mi 'bupu n'da ra ngurpa hyacahäi, εmmε ra mɛmbɛti a, í Zaqueo a. ³Nε nu'a ra Zaqueo, εmmε min ndehma da nu'a ra Jesús, pɛ him mi sä nguetho hingui hɛts'i, nɛ εmmɛ du yu ja'i bu mi 'yo'a ra Jesús. ⁴Janangue'a, bin tihi bi ndexa n'da ra za ra sicómoro, ngue da zä da nu ra Jesús 'bu bi thopu. ⁵Nε nu'bu mi zøn'a ra Jesús bu 'bä'a ra za mi huxa ra Zaqueo, bi ndøts'e nɛ bi 'yɛmbi:

—Zaqueo, bá cą n'dihi nguetho ga søm bu ja ni ngu ra pa ya, bi 'yɛ̞mbi.

⁶Nε nu'a ra Zaqueo bin johya, 'dahmantho bi gại, bi mba rá ngu nε bi zimanho a ra Jesús 'bʉ mi zøm bʉ rá ngu. ⁷Pε nu'ʉ yʉ jạ'i him bi numanho nguetho bin säya bʉ ra Jesús bʉ ja rá ngu n'da ra ziyate. ⁸Nε nu'a ra Zaqueo bim 'bäi bi 'yɛ̞mp'a ra Jesús:

—Ma Hmu i, nuya ga undä yu hyoya made 'bɛ'a gätho i jagä. Nɛ nu'bu mi siyagä n'da ra ją'i ngue hin rá 'yu 'bɛ'a mi øt'ä, goho nidi ga cospa a dá siyabi, bi 'yɛn'a ra Zaqueo.

⁹Nε nu'a ra Jesús bi 'yɛmbi:

—Gá päh nin 'yomfεni nε i ja ra punbi ni ts'oqui ya, nε gätho i SAN LUCAS 19 156

'bucua ja ni ngu, gra Zaqueo, rám bom'beto i ra Abraham. ¹⁰Ne gue'a ná ęcä, ngue guecä dán ją'igä ua ja ra ximhäi, ngue gan yanba yú te'u i padi ja yú ts'oqui, ne hin da nu ran unbi mazai, pegue din ja ra te mazai u, bi 'yɛn'a ra Jesús.

Ran t'uti yu 'yehe him bi xand ra mbeti

¹¹Nu ra Jesús bi xih man'da ran t'uti u yu ja'i, nguetho bi bɛn'u yu ja'i ngue nu'bu da zøm bu Jerusalén ra Jesús, 'bex di japi di manda bu rá ts'ɛdi Oja. ¹²Nɛ bi 'yɛmp'u:

—Mi 'bʉ'a n'da ran 'yohʉ, ra ts'ʉt'abi rá ta. Nɛ bi mba bʉ n'danni n'da ra hnini ngue bin nde bín t'un bʉ rá 'bɛfi ngue din ts'ʉt'abi bʉ rá häizɛhɛ. ¹³ Pɛ nu'bʉ mi nɛts'i, bi zon'dʉ 'dɛt'a yʉ 'yɛhɛ, 'da'a n'da bi un ra mbɛti ngue ra oro xʉn ngu di muui. Nɛ bi 'yɛmp'ʉ: "Gui hyomhbʉ 'bɛ'a da zä gui 'yøthʉ ngue di xạnd ma mbɛti," bi 'yɛmbi.

14 Nɛ nu'u yu ja'i mi 'bupu ja rá häi, him mi numanho a ran 'yohu. Janangue bi mbɛhni 'da yúm 'bɛhni ngue m'bɛt'o da zøni da ma ngue hin din t'un rá ts'ɛdi a ran 'yohu.

15 Pɛ nu'a ran 'yohu, bin t'un ran t'ɛdi din ts'ut'abi nɛ bi mbeng bu rá häi buya. Nu'bu mi zøm buya, bi zon'du yú 'yɛhɛ xí un ra mbɛti, nde da badi hangu bi hyuxa rá mbɛti xí un'na n'da ngu n'da u.

¹⁶Nu ra mbudi 'yehe bi 'yemp'a: "Nuya bin ja 'det'a a ni mbeti," bi 'yen'a. ¹⁷Bi 'yemp'a rá hmu buya: "Xun ho gá 'yøt'e, gra 'yehe xun ho, gá xanda zu ts'u dá 'da'i, pe ne ga 'da'a nin t'edi ngue gui manda 'det'a yu hnini," bi 'yembi. ¹⁸Nu ná yoho

ra 'yɛ̞hɛ bi 'yɛ̞mp'a: "Nuya bin ja cut'a a ni mbɛti gá 'daqui ga xa̞ndä," bi 'yɛ̞n'a. ¹⁹"Nu'i, ga 'da'a nin t'ɛ̞di ngue gui manda cut'a yu hnini 'bu," bi 'yɛ̞mp'a rá hmu buya.

²⁰Nɛ xø man'da ra 'yɛhɛ bi 'yɛmp'a rá hmu buya: "I ja ua ni mbɛti gá 'daqui. Dá pɛ'ts'ä xun ho. ²¹Nguetho dí pacä 'bɛ'a nim 'bäi, ngue ya hin'yu nin huɛcate. Guí honi 'bɛpu gdí hyanba rá mbɛti yu ja'i. Nɛ guí hanba yu huahi, janangue dá pɛ'ts'ä ni mbɛti ngue dí su ga 'bɛdi," bi 'yɛn'a. ²²Nu'a rá hmu bi 'yɛmbi: "Nu'a gá ma i udi ngue grá ts'om'bäi. ²³Hanja hin gá hmi'a ma mbɛti n'dahma xtí hyux'i ts'u," bi 'yɛmbi.

²⁴Ne bi 'yemp'u mi 'bäpu: "Dami hyanbahu rá mbeti na ran 'yohu ne gui unhdu a ra mbudi 'yɛhɛ, nu'a to'o bi daha xun ngu," bi 'yembi. ²⁵Pε nu'ʉ mi 'bäpʉ, him bi nde da 'yøt'e 'bɛ'a bi man yú hmu, nguetho xun ngu i ja a ra mbudi 'yɛhɛ. 26Pe nu'a ra hmu bi 'yɛmp'ʉ: "Nu'a to'o i humbi i øt' ma 'bɛfi, hinga hønt'a rán zäbi da daha, pe man'da xun ngu ga unni. Pe nu'a hingui nde da 'yøt' ma 'bɛfi, hin te da daha, nɛ ga hạnba'a dá unni," bi 'yɛna. 27"Nε nu'u him mi ndeje dan ts'ut'abi ua, ba sihu, gui secpahu yú 'yuga ua," bi 'yɛn'a ra hmu buya, bi 'yɛn'a ra Jesús 'bu mi man ran t'uti.

Ra Jesús bi yurpu ja ra hnini Jerusalén

²⁸Nɛ nu'bʉ mi gua'a bi man ra Jesús, bi thopʉya, ní mba bʉ Jerusalén. ²⁹Nɛ nu'bʉ mi ts'ʉtho da zøm bʉ ja ra nyuni guepʉ i ja ra hnini Betfagé nɛ ra hnini Betania, ³0 bi mbɛhni yoho yɨ xädi, bi 'yembi:

—Ní mbɛ bu nán jombu ja ra hnini. Nɛ gui timmi bu n'da ra t'uburu án that'i bu ja ra nden'yu, nɛ xínga n'da ra ja'i ní hyuts'i. Bá xocui nɛ ba siui ua. ³¹Nɛ nu'bu 'bo'o da 'yän'naui: "Hanja gní xocui ra buru," gui 'yɛnui: "Nu'a ra hmu i hon'a ra buru," gui 'yɛnui, bi 'yɛmp'u yoho yú xädi.

³²Nɛ bi mba buya, ne bi din'a 'be'a xi xi'a ra Jesús. ³³Nɛ nu'bu mi xoc ra buru, bi 'yän'na rá mbeti:

—Hanja gní xocui na ra buru, bi 'yɛmbi.

34Bi dạh yu xädi buya:

—Nu'a ra Hmu i honi, bi 'yɛn'ʉ. Nε bi ndepe da zix bʉya.

35 Νε nu'ʉ yʉ xädi bá si ra buru bʉya, nɛ bi gạspa yʉ́ coto bʉ ja rá xʉthä ra buru nɛ bi hyuxa ra Jesús. ³⁶ Νε nu'bʉ mi mba bʉ 'yu ra Jesús, nu'ʉ yʉ jạ'i 'bex bi mbøcua yʉ́ pahni bʉ ja ra 'yu ngue da thopʉ a ra Jesús. ³⁷ Νε nu'bʉ mi gạpʉ ja ra nyuni ní mba bʉ Jerusalén, gätho ʉ min 'yohʉ nts'ɛdi i mbafi, bin johya nɛ bi 'yɛ̞spa Oją nangue yʉn t'øt'e nuixte bi nu. ³⁸ Bi 'yɛ̞n'ʉ:

—Mająpi ra ts'ut'abi bá εhε nangue rá thuhu ra Hmu. Nε din ja rán johya Oją yú mbui yu ją'i. Nuixtetho rá ts'εdi Oją, bi 'yɛn'u.

³⁹Nɛ nu 'da'ʉ yʉ fariseo bi 'yɛ̞mp'a ra Jesús:

—Dami hεcua ni xädi din hε.

40 Pε nu'a ra Jesús bi 'yɛmp'u:

—Nu'bu ga hεcpä yu ngue i εspa Oją, pε go da 'yεspa Oją ya yu do bongua, bi 'yεn'a ra Jesús.

Ra Jesús bin zoni nangue yu ja'i 'bupu ja ra hnini Jerusalén

⁴¹Nε nu'bʉ mi hyän bʉ ra hnini Jerusalén a ra Jesús, bin zoni. ⁴²Nε bi 'yɛn'a:

—Min ndegä ngue xquí pąhmbu a dí yąn'ahu bu ja ran unbi maząi, pɛ hin gán nde gá pąhmbu, pɛ nuya him man zä, nguetho tengu'bu njo'mi ni dähu. ⁴³Nε da zøn ra pa ba εh nin suihu di mbät'a ni hninihu nɛ njon da zä da bøni ngue din yani, nɛ gan tunhdu u buya. ⁴⁴Nε gätho ahu ngue guí 'buhmbu nu, da hyo ahu nɛ da guah ni hninihu. Nɛ da mba nso't'i, nɛ xínga n'da ra jado da gopu. Nguetho nu ahu xíngui ts'u gá pąhmbu a ra pa xtí pø ahu Oją, bi 'yɛn'a ra Jesús.

Nu ra Jesús bi hyøn'a thi yu mbä bu ja ra danija

⁴⁵Nε nu'a ra Jesús buya, bi mba bu ja ra dąniją nε bi hyøn'a thi gätho yu mbä mi 'bupu. ⁴⁶Nε nu'a ra Jesús bi 'yεmp'u:

—I mam bu ja rám hman Oją:
"Í thø'a ma ngu ngue da mba
nthạndegä bu," i επ Oją. Pε nu ahu
gá 'yørpadahu tengu'bu ra hyado
guepu nín 'yạn'u yu bε, bi 'yɛn'a ra
Jesús.

Bi t'ømanho a bi man ra Jesús

⁴⁷ Nu'a ra Jesús thocua thoho min xänbate bu ja ra daniją. Pɛ nu'u yu ngurpa mbäją, nɛ yu xänbate niją, nɛ yu dac'yɛi, min nde da hyo'a ra Jesús. ⁴⁸ Pɛ hin'yu 'bɛ'a da 'yøt'e ngue da hyo. Nguetho gätho yu ja'i bi 'yurpa ra güɛnda 'bɛ'a bi man ra Jesús. Njon bin nde bi u't' yú mbui u 'da.

Rán t'ędi ra Jesús

20 Nε nu ra Jesús n'da ra pa bi xänba yu ja'i bu ja ra danija nangue ran ho ma'da'yo. Nε'u yu ngurpa mbäja nε yu xänbate nija, nε yu dac'yεi, gätho bi zøm bu. ²Nε bi t'än'na ra Jesús:

—Hanja sä guí øt'e 'bɛ'a guí øt'e. To'o bi 'da'a nin t'ɛdi, bi 'yɛmbi.

³Pε nu ra Jesús bi dati:

—Nεcä, ga än'nahu, ⁴to'o bi un rán t'gdi ra Xuua ngue bi 'yøt' ran xixyą, hague Oją uague yu ją'i, bi 'yɛna.

⁵Pε nu'ʉ bin 'yänzεhε ʉ 'bɛ'a dí dąti. Nε bi 'yɛ̞nsɛ:

—Nu'bu ga ɛmfu ngue Oja bi un'na rán t'ɛdi a ra Xuua, nɛ da 'yɛnju buya: "Hanja hin gá 'yɛc'yɛihu 'bu." ⁶Pɛ nu'bu ga ɛmfu, yu ja'i thoho bi un rán t'ɛdi, dí bat'adoju yu ja'i nguetho xun ngu yu ja'i ɛc'yɛi rá pøngahya Oja ra Xuua, bin 'yɛmzɛhɛ u.

⁷Janangue'a bi t'ɛmp'a ra Jesús:
—Hin dí pahmbe to'o bi un rán
t'ɛdi ra Xuua, bi 'yɛntho.

⁸Nɛcä hin ga xi ahʉ to'o bi 'dacä ran t'ɛ̞di ga øt'ä 'bɛ'a dí øt'ä, bi 'vɛna.

Ran t'uti yu ts'ombefi

⁹Nε bi xih man'da ran t'uti a ra Jesús, bi 'yεna:

—Mi 'bʉ'a n'da ran 'yohʉ bi 'yøt'a n'da ra nuandät'o, nɛ bi hmit'i 'da yʉ mbɛfi. Nu'a rá mbɛti bi mba n'danni bʉya, nɛ nya'atho bám 'bʉрʉ. ¹⁰Nɛ nu'bʉ mi zøn yʉ pa da thʉc yʉn dät'o, nu'a rá mbɛti bá pehna n'da rá 'yɛhɛ da duspa 'da yɨn dät'o, ngue'a án yạhu a. Pɛ nu'u bi zocpa a ra nuạndät'o, bi mbɛmba thoho ra 'yɛhɛ nɛ bi 'yɛt'i, xín te bi unni. ¹¹Nɛ ná yoho rá 'yɛhɛ bá pɛhna rá mbɛti ra nuạndät'o, pɛ ngutho bi 'yørpa ra 'yɛhɛ, nɛ'a bi mbɛmba thoho mahøn'a, bi 'yɛr buya nɛ nte bi unni. ¹²Nɛ ná hyu rá 'yɛhɛ xø bi mbɛhni mahøn'a a ran 'yohu, ngutho bi t'ørpe, bi unba yu mbɛfi nɛ bi 'yɛt'i, xíngui ts'u bi unni.

¹³Nɛ nubʉya, nu ra mɛndät'o bi bɛni 'bɛ'a da 'yøt'e. Nɛ bi 'yɛna: "Masque ga pɛhn'na ma ts'ʉnt'ʉ, dadí huɛqui, xøhma da numansu na," bi 'yɛnsɛ. ¹⁴Pɛ nu'bʉ mi nurpa rá ts'ʉnt'ʉ ʉ yʉ mbɛfi, bi mam bʉya ngue da hyo, bi 'yɛn'ʉ: "Mbähä ga hohʉ rá ts'ʉnt'ʉ, janangue da zä ga cosɛhʉ ra nuạndät'o," bi 'yɛn'ʉ. ¹⁵Janangue'a bi zix pʉ ma'ueni, bi hyøn'a thi ra ts'ʉnt'ʉ, nɛ bi hyo bʉ, bi 'yɛn'a ra Jesús.

Ne xø bi 'yän'du yu ja'i mi 'bäpu:
—'Be'a guím bemhbu da 'yøt'a rá
mbeti ra nuandät'o ya, bi 'yena.

16 Pɛ dí xi ahu, ba ɛsɛ nɛ da hyo'u, nɛ n'dan'yo di un'na rá nuạndät'o buya, bi 'yɛn'a ra Jesús.

Nɛ nu'bu mi 'yø'u yu ją'i 'bɛ'a bi man ra Jesús, nu'u bi 'yɛn'u:

—Oją da 'yøt'e hin din ja a guím ma, bi 'yɛn'ʉ.

¹⁷Pε nu'a ra Jesús bi hyεt'ʉ, nε bi 'yɛmbi:

—Pε 'bε'a nam bøn'a rám hman Oją nt'o't'i maya'bʉ 'bʉ, ngue i ε̞na:

Nu'a ra do bi bunt'u yu gado 'bu mi hyøh ra ngu,

gue'a ra do man'da mahyoni, tengu thoho yʉ guangu, i ɛ̞m bʉ ja rám hman Oją. ¹⁸Nɛ tengu'bu da guesɛgä a ra do i hmam bu. Hønt'a go to'o hingui ɛc'yɛigui, din unbazɛhɛ, tengu'bu da dang bu ja ra do din tuni, nɛ go ga sɛmpä a tengu'bu ra do da zɛ'mi nɛ da 'yɛt'i, bi 'yɛn'a ra Jesús.

Bin t'än'na ra Jesús 'bu din jut' ra renta ogue hin'na

19 Nu yu ngurpa mbäja nɛ yu xänbate nija 'bu mi 'yø'a ran t'uti bi man ra Jesús nangue'u yu hyote mbɛfi, min nde da got'a fädi ra Jesús, nguetho bi badi tengu'bu guesɛ u yu hyote mbɛfi u yu mbäja nɛ yu xänbate nija. Pɛ him bi got'i nguetho bi zutho yu ja'i.
20 Janangue bi bɛm mahøn'a buya nɛ bi mbɛhni 'da yun 'yohu ngue da 'yän yun t'änni a ra Jesús, n'dahma din ja 'bɛ'a sä dí fɛnt'a ra Jesús ngue di dä bu 'buh ra ts'ut'abi. 21 Nɛ nu'u yun 'yohu bi xi a ra Jesús:

—Xänbate i, dí pahmbe hønt'a majuani guí ma. Ne dí pahmbe guí xänbi xun ho hønt'a go to'o má ja'i ne hin guí huahni to'o guí xänbi, pe guí xifi xun ho nangue Oja. ²²Dami xije ya, ha din theui man t'edihu bi 'daju Oja 'bu ga juthu ra renta a ra ts'ut'abi Roma, uague hin'na, bi 'yen'u.

²³Pε nu'a ra Jesús mi pądi i ts'ämhyą thoho. ²⁴Nε bi 'yεmp'u:

—Hanja gní 'yängui, xi ni mbεti gní juthu ra renta ra ts'ut'abi, gan nugä, bi 'yεna.

Nε bi un buya.

—To'o rá pøte πε rá thuhu i cuat na ra mbεti, bi 'yɛ̞n'a ra Jesús.

Nε nu'u bi 'yɛn'u:

—Rá pøte nε rá thuhu ra ts'ʉt'abi Roma i cuat na. ²⁵Bi dąh ra Jesús buya ne bi 'yemp'u:

—Nu'a rá mbɛti ra ts'ut'abi Roma, gui un'na. Nu'a xin rá mbɛti Oją, gui un'na Oją a, bi 'yɛ̞mp'u.

²⁶ Janangue nu yʉn 'yohʉ him bi zä xtá hyät'a ra Jesús, pɛ bi hyonya thoho ʉ 'bɛ'a bi man'a ra Jesús.

Ran t'änni 'bu da ndants'u xun du

²⁷Nɛ nu'ʉ 'da yʉ saduceo, bi zøm bʉ 'bʉh ra Jesús, gue'ʉ hingui ɛ̞c'yɛi da ndants'ʉ xøn du. Nu'ʉ bi 'yɛ̞mp'a ra Jesús:

28—Nu'a ra Moisés bi 'daju n'da man t'ɛdihu nɛ bi 'yɛna: "Nu'bu bi du n'da ran 'yohu ngue mi 'buh rá xisu nɛ njo'o yú t'uhni, nu'a rán 'yohu da zinba a rá xisu. Nɛ nu'a rá mbudi t'uhni dim 'bui, da thuspa rá thuhu a ran 'yohu bi du nɛ da'yɛmbi rá ta a," bi man ra Moisés.

²⁹Pε gue'a ga än'nahe. Bim 'bʉ'i yoto yun 'yohu din 'yohu zehe. Nu'a ra mbudi n'yohu bi zin'a n'da ra xisu, ne m'bejua buya bi du a ran 'yohu ne him bim 'buh rá t'uhni. ³⁰Ne nu'bu mi du ran 'yohu buya, ná yoho rán 'yohu bi zin'a ra xisu mahøn'a, ne xø bi du a. 31 Ne xø bi zin'a man'da rán 'yohu buya, 'da'ingu bi 'yøt'u gätho yoto yun 'yohu, gätho bi du ne xínga n'da bim 'buh yú t'uhni. 32 Mbejua buya, bi duse ra xisu, bi 'yen'u. ³³Nuya, dami xije 'bɛ'a din ja a ra pa da ndants'u xun du. To'o da 'yɛmbi rá xisu a ra xisu, nguetho gätho yoto bim 'bʉhmbʉ ra xisu ua ja ra häi, bi 'yɛn'u yu saduceo.

³⁴Nɛ nu'a ra Jesús bi dati:

—Hønt'ua ja ra häi din thạt'u yu jạ'i. ³⁵Nɛ gätho to'o yún sähu da mba bu mahɛts'i 'bu bi ndants'u xun du, nɛ him man ja ran thạti bu. ³⁶Nguetho da gohi tengu tho yúm 'bɛhni Oją u, nɛ him man da du bu. Nɛ ma'da'yo da gohi 'bu bi xoxa Oją u ngue yú t' uhnisɛ Oja u.

³⁷Pɛ nɛ'a ra Moisés bi ma da ndants'ʉ xʉn du 'bʉ mi 'yo't'i 'bɛ'a bin ja, nu'bʉ mi nu mí zø ra za 'bʉ maya'bʉ. Nɛ i mam bʉ ngue nu Oją rá Oją ra Abraham nɛ ra Isaac nɛ ra Jacob, nɛ nu'ʉ, ná ya'a thoho xí du ʉ 'bʉ mi 'yɛmp'a Oją ra Moisés. ³⁸Ngubʉ bi ma nguetho guexta'a i 'bʉh yʉ́ mbʉi. Nubʉ na nu Oją 'da'ingutho 'bʉ i 'bʉ'a n'da ogue xʉn du n'da. Guexta'a i jatho yʉ́ te ʉ xʉn du, bi 'yɛn'a ra Jesús.

³⁹Nɛ nu'ʉ 'da yʉ xänbate niją, bi 'yɛ̞mp'a ra Jesús:

—ξmmε xun ho a gá ma, bi 'yɛn'u.

40 Nε nu'u yu saduceo ya him mi
sä da 'yän mi'da yun t'änni.

To'o rám bom'beto a ra Cristo

4¹Nɛ nubɨya, bi 'yɛn'a ra Jesús:
—Hague nán zä guí ɛmfɨ ra
Cristo rám bom'bɛto ra David a.
4²Nguetho bi mansɛ ra David bɨ ja ra søcua bi 'yo't'a:

Nu'a Oją bi 'yɛmp'a ma Hmu:
"Hyucua ga conhui ma ts'ɛdi,

43 gue'bu go dá tạpä gätho u nin
suihu," i ɛn Oją, bi 'yɛn'a ra
David 'bu mi ma nangue ra
Cristo.

⁴⁴Hanja i ɛmbi rá Hmu, nɛ rám bom'bɛto a, bi 'yɛ̞n'a ra Jesús.

Ra Jesús bi ma hinga gue'a bu nán xänbate u yu xänbate nija

⁴⁵Nu'a ra Jesús buya, ní jat'a nyạhu yú xädi, gätho mi 'bäpu mi øde 'bɛ'a bi man ra Jesús. Bi 'yɛ̞mp' u buya:

46—O guí urpahu masu 'be'a da man'u yu xänbate niją, nguetho i he yú mbapahni xum hmadi ngue da t'ęspi, ne ęmme di ho da mba ma zengua ngue da 'yęspa yu ją'i. Ne ęmme i honi da hyupu ja yun thuts'i xun ho bu ja yu niją, nepu ja yun sihme. 47 Ne i siyabi 'be'a i pe'ts' yu xisu xun du yún ndø, ne i tunba yú ngu, ne ní jat'i nya'a thoho i yahu Oją bu ja yu niją. Pe nu'u, man'da xun utho ran unbi da nu, bi 'yen'a ra Jesús.

Nu'a ran t'unni man'da di muui

Nu'a ra Jesús mi 'bäpu ja ra dąniją ne bi nu yu membeti i cät yú mbeti bu ja ra huada, ngue rán t'unni Oją. ²Ne bi nu n'da zu hyoya xisu bi gärpu yoho yu t'uc'axt'i. ³Nu ra Jesús bi 'yemp'u mi 'bäpu buya:

—Majuani dí xi ahu, nuna ra hyoya xisu man'da di muui bi uni xinda gue'u gätho mi'da. ⁴Nguetho gätho yu membeti 'bu ya bi gät'a n'da ra mbeti ja ra huada, pe ya mbongui thoho yu mbeti, pe nu'a zu hyoya xisu, bi uni gätho mi ja, xíngui ts'u bi bongui 'be'a da hyonse, bi 'yen'a ra Jesús.

Ra Jesús bi ma 'bɛ'a din ja ra danija

⁵Nu'a ra Jesús mi ø'a man yʉ jạ'i: "Mahotho ra dạniją, nɛ mahotho yʉn t'unni i zʉpʉ." Pɛ ra Jesús bi 'yɛmp'ʉ:

⁶—Nuna gätho guín nuhu ya, da zøn ra pa hin te din ja ua, xíngui ts'u da bonga n'da zu xequi ngue hin da yøt'e, bi 'yen'a ra Jesús. 161 SAN LUCAS 21

Ran unbi din ja ua ja ra häi

⁷Nɛ nu'ʉ 'da yʉ ją'i mi ø'a bi man ra Jesús, nɛ bi 'yänni:

—Gra xänbate i, nda'a ní pa din ja a guím ma, 'bε'a ní hmεpya din ja sä ga pąhmbe.

⁸Nε nu ra Jesús bi 'yεmp'u:

—Dami jamansu 'bɛ'a guí ɛc'yɛihu. Nguetho da zøn ra pa ba ɛh yu hyäte da hyä ahu: "Nugä drá Cristogä," da 'yɛn'ahu. Nɛ da 'yɛn'u: "Ya bi zøn ra pa ran zɛgui," da 'yɛn'u. Pɛ o guí ɛc'yɛihu 'bɛ'a da man'u. ⁹Ga xi ahu 'bɛ'a gätho din ja ua ja ra häi gue'bu go ba ɛcä mahøn'a. O guí suhu 'bɛ'a gui 'yøhmbu, nguetho din ja yu dasui, nɛ yu ja'i hinga 'da'angu da bɛni. Pɛ hinga gue'bu ran zɛgui din ja u, bi 'yɛn'a ra Jesús.

¹⁰Nε xø bi 'yɛna:

—Nε 'da'a n'danni yu häi din ja yu sui. Nε din suse n'da ngu n'da yu ts'ut'abi. ¹¹Nε din ja yu 'yamhäi nts'utho, nε din ja ra dathu, nε ra dagεhε, nε din ja yu hmεpya nts'utho bu mahεts'i.

12Pɛ hin nín ja a dím mangä 'bu bim fɛnt'ahu nɛ da mba ma un'ni ahu. Nɛ da ts'ix ahu bu ja yu nija, di un'nahu bu. Nɛ da mba ma dä ahu bu 'buh yu ts'ut'abi nɛpu 'bu'u ja yú ts'ɛdi. Gätho ngubu da t'øt'ahu ngue guí tɛngahu. 13Pɛ nu'bu da ts'ix ahu bu, da zä gui mamhbu bu ran ho ma'da'yo. 14Nɛ 'yo gadín 'yomfɛnihu 'bɛ'a gui mamhbu 'bu bi mba ma juan'ni ahu.

¹⁵Nguetho nugä, ga bɛn'nahu 'be'a da zä gui mamhbu ra ora gam 'bähmbu bu. Nɛ nu'a ga bɛn'nahu, xínga n'da nin suihu da zä da dąti 'bɛ'a gui mamhbu bu.

16Nɛ madague'bu, ni tahu ogue
ni mbehu, ogue ni cuhu, ogue
ni mɛnihu, ogue ni amigohu, pɛ
guemhma di dä ahu bu 'buh yu
ts'ut'abi. Nɛ 'da'ahu da tho ahu
ngue guí ɛc'yɛigahu. ¹⁷Nɛ gätho
da ts'an ahu nanguecä. ¹⁸Pɛ o guín
suhu nguetho xínga n'da ni xtahu
dim 'bɛpu ja ni yahu. ¹⁹Pɛ nu'bu
gui hyäthu yun unbi, Oja di 'da ahu
ra te mazai, bi 'yɛn'a ra Jesús.

Ra Jesús bi ma 'bɛ'a din ja ra dahnini Jerusalén

²⁰Νε man'da bi man ra Jesús, bi 'yεna:

—Nu'bu guin nuhu xí mbät ra hnini Jerusalén yu dofui, gui pąhmbu mi ts'utho da guah ra hnini. ²¹Ne nu'bu bin ja bu Njerusalén, gätho u 'bupu ja ra xequi Judea xun ho 'bu da 'dagui da mba bu dąpo bu ja yu nyuni. Ne'u i 'bupu ja ra hnini, xun ho 'bu da bøni, ne gätho i 'bupu dapo hin da 'yena da mba bu ja ra hnini. ²²Nguetho gue'a ra pa di un rán unbi Oja u, ne gätho din ja tengu tho i mam bu ja rá hman Oja din ja. ²³Nɛ nu'bʉ bin ja a, huɛcate u in hat'uhni, ne'u gätho u 'buh yú 'uɛre. Nguetho ndumbuitho rán ts'embi Oja din ja ua ja ra häi ne xun ngu yun unbi da nu yu ja'i. ²⁴Nɛ nu'u 'da'u dí mba ntho ra juai, ne nu'u mi'da da ts'ixpu n'danni yu häi ne da gohi tengu'bu i ofädi. Gue'u hing yu judío di ts'on na ra dahnini ne di manda ua, gue'bu go da zøn ra pa da hyanba yú ts'edi Oja, bi 'yen'a ra Jesús.

'Bu bi zøn ra pa ba ɛh ra Cristo

²⁵Nε man'da bi man ra Jesús, bi 'yɛ̞na:

—Nu Oją da 'yøt' yu hmɛpya bu ja ra hyadi, nepu ja ra zana nepu ja yu sø. Ne yu ja'i 'bucua ja ra häi emme din su'u 'bu da 'yøde nts'edi da 'yen ran dahi yu deja. 26 Νε εmmε da güent yú mbui nangue ra mbidi din ia. 'Ne da zu 'bu da beni 'be'a din ja gätho ua ja ra ximhäi. Ne gätho 'bɛ'a bí ja bʉ mahɛts'i di 'yani. ²⁷Nɛ nu'bu bin ja a dí xi ahu, 'bex gua εcä, ngue dán ja'igä ua ja ra ximhäi, ba ɛcä bu ja yu güi, ban 'yo'be ma ts'edi xun ngu ngue dán nuixtegä. 28 Ne nu'bu gán nuhu da mbudi din ja, dami hyuthu nzambui ne gui ndøs'hu mahets'i, nguetho ba eh ni pørpatehu da yan ahu, bi 'yɛn'a ra Jesús.

²⁹Nɛ man'da bi man ra Jesús ngue bi man'a n'da ran t'uti, bi 'yɛna:

—Gan 'yomfεnihu ts'u 'be'a di ja ra za ra higo ne'u mi'da yu za. ³⁰ Nu'bu guín nuhu i pøx yú paxi yu za, guí pahmbu 'bex ba εh yu pa xum pa. ³¹ Ngutho 'bu bi mbu'a dí xi ahu, gui pahmbu mi ts'utho di manda rá ts'εdi Oja ua buya.

³²Majuani dí xi ahu, nu yu ja'i 'bucua ya, hinga gätho xtí du 'bu bi mbudi din ja a dí xi ahu. ³³Nu bu mahats'i na ra ximhäi da guadi, pa nu'a mam hmangä hin da gua'a, bi 'yana.

34 Janangue dami jamansu 'bɛ'a guí øthʉ, o guín nde gui 'yøthʉ ni pähä zɛhɛhʉ, nɛ hinga hønt'a guim bɛmhbʉ nin sihmɛhʉ. Dami jamansu a gui 'yøthʉ, hin ga tịn'nahʉ ngue gdí øthʉ a 'bʉ bá pengä. 35 Nguetho njon da bạ'a ra ora ba ɛcä, pɛ gätho yʉ jạ'i 'bʉcua ja ra ximhäi da nu. 36 Dami tøm

thohohu ne thocua thoho gan yahu Oja, n'dahma din ja ni ts'edihu gui hyäthu yun unbi din ja. Nu'bu ngubu gui 'yøthu, hin gui pes' ni sähu 'bu gá 'bähmbu bu ja ma hmigä, nugä ngue dán ja'igä ua ja ra ximhäi, bi 'yɛn'a ra Jesús 'bu mi xih yú xädi 'be'a gätho din ja.

³⁷Nɛ nu'a ra Jesús 'bu mi 'bupu Jerusalén, gätho yu pa mi xänba u yu ja'i bu ja ra danija. Pɛ nu'bu ra xui buya, mi pa bu ja ra nyuni Olivos. ³⁸Nɛ gätho yu xudi mi pa bu yu ja'i bu ja ra danija, da 'yø'a i man ra Jesús.

Bi hma da tho ra Jesús

Nuya mi ts'utho da zøn ra pa da ts'i ra hmɛ hin'yu rá íxi. Gue'u yu pa ra dampɛti ran dabaxjua. ²Nu'u yu ngurpa mbäja nɛ yu xänbate nija, mi honi 'bɛ'a dí hyo ra Jesús. Pɛ mi su'u 'bɛ'a da 'yøt' yu ja'i 'bu da hyo'a.

³Nɛ nu'a ra zithu bi yut' rá mbui ra Judas Iscariote, gue'a n'da rá xädi ra Jesús. ⁴Nu'a ra Judas bi mba, bin yahu yu ngurpa mbäja nɛ yu hmu dofui, nɛ bi xifi 'bɛ'a da 'yøt 'bu di dä'a ra Jesús. ⁵Nu'u bi hyu yú mbui 'bu mi man'a ra Judas 'bɛ'a da 'yøt'e. Nɛ bi xifi da gut rán zäbi ra Judas. ⁶Nɛ nu ra Judas buya, bi dø'ma ra ora 'bu njongui 'bupu yu ja'i ngue di dä'a ra Jesús.

Rán sihme ra Hmu

⁷Nε mi søn ra pa bin ja ra dąnts'ihmε i ts'i ra hmε hin'yʉ rá íxi, nε i ho ra t'ʉdɛ'yo. ⁸Nε nu'a ra Jesús bi mbɛn'na ra Pedro nε ra Xuua nε bi xifi di hoc ran sihmε ran dąbaxjua, da zi 'bʉ bin de. ⁹Nu ra Pedro nε ra Xuua bʉya:

—Нарн guín nde ga hoc'be, ɛn'н. ¹⁰Nu ra Jesús bi 'yɛmp'н:

—Nu'bu gán 'youi bu ja ra ndenhnini nɛ gui nuui n'da ran 'yohu i tu n'da ra xaro ra dehe, dami tɛndui a ran 'yohu, nɛ gui cut'ui bu ja ra ngu da yut'a. ¹¹Nɛ gui xihmi a ra mɛngu bu: "Nu'a ra xänbate bá pɛnga'be ngue gui xic'be hapu i ja ra cuarto ngue ga sägähe ra dansihmɛ," gui 'yɛnui. ¹²Nɛ nu'a ran 'yohu da zix aui bu magats'i hapu i ja ra cuarto xun ndoho. Guepu gui hocui rán sihmɛ ran dabaxjua, bi 'yɛmp'u yú xädi.

¹³Nu ra Pedro nε ra Xuua bʉya bi mba bi dini tengutho bi man'a ra Jesús. Νε bi hocpʉ ran sihmɛ bʉya.

¹⁴Nu'bʉ mi zøn ra ora bʉya, nu'a ra Jesús nε mi'da yʉ́ xädi bi zøm bʉ nε bin sihmɛhʉ. ¹⁵Nu ra Jesús bi 'yɛ̞mp'ʉ yʉ́ xädi:

—Emme dán ndegä ga sihu na ran sihme ran dąbaxjua 'bu di 'bedi ga tugä. ¹⁶Ne dí xi ahu, him man'dandi ga sigä na ran sihme jague'bu bi zøn ra pa ngue gán yamhbu xun ho 'bu gám 'buhmbu bu di manda rá ts'edi Oją.

¹⁷Nu ra Jesús buya bi deca n'da baso ra vino ne bi un ra jamadi Oją, ne bi 'yemp'u yú xädi buya:

—Dami comhbu na po na ra baso, gui sihu. ¹⁸Nguetho dí xi ahu, hin ga sigä mahøn'a asta gue'bu go da zøn ra pa di manda ua rá ts'ɛdi Oja xun ho.

¹⁹Nɛ nubuya, bi hyac ra hmɛ nɛ nu'bu mi gua'a bi un ra jamadi Oja buya, bi xɛni nɛ bi darpa u yú xädi, bi 'yɛna:

—Nuna ra hmε na, ma ngøc'yεigä na, ga ungä nangue ahʉ. Nε n'dandį ngu n'dandį 'bu guí sihu, guim bęnju, bi 'yęn'a ra Jesús.

²⁰Nε nu'bʉ mi guadi bin sihmɛ ʉ, nu ra Jesús bi dɛc'a ra baso ra vino nɛ bi un'dʉ yʉ́ xädi nɛ bi 'yɛmp'ʉ:

—Nuna, ran hoqui ma'da'yo, guehna nam bøni ma jigä ngue bi hoc'a ra 'da'yo'yu bi 'yøt'ahʉ Oja na, bi 'yɛna.

²¹Pɛ dí huhmbu ua n'da di dägä.
²²Nɛ nugä, ngue dán ja'igä ua ja ra ximhäi, da thogä, ngue gue'a bi zänd Oja, pɛ í huɛhi maha a di dägä, bi 'yɛn'a ra Jesús.

²³Nu yú xädi, 'bex bin 'yänzɛhɛ to'o di dä'a ra Jesús.

Ra Jesús bi ma to'o dim 'bet'o

²⁴Nε man'da ran junt'i bi 'yøt'ʉ yʉ́ xädi ngue to'o dim 'bɛt'o nanguesɛ ʉ. ²⁵Pε nu ra Jesús bi 'yɛ̞mp'ʉ:

—Nuua ja ra häi, nu yu ts'ut'abi ne'u i ja yú ts'edi, xun hei i ørpa yu ja'i 'bu di manda u, i øt'e yú 'yehe u, ne i t'embi xun ho a i øt'e. ²⁶Pe nu ahu, hin gan jahu bu. Nu'a to'o dim 'bet'o, da 'yøt'e dim 'bejua thoho. Ne nu'a to'o din ngurpi, da 'yøt'e din 'yehe thoho a. ²⁷Nu yu hmu 'bucua ja ra häi, hin dim pe'u, pe gue i tø'mi da mbep'u yú 'yehe, pe nugä madague dím hmugä, pe dí øt'ä ngue ni 'yehegahu, bi 'yen'a ra Jesús.

²⁸Nε man'da bi xifi, bi 'yεna:

—Pε nu'ahu, dán hyumhbu 'bu má nugä yun unbi ua ja ra ximhäi. ²⁹ Janangue ga 'da'a nin t'εdihu, tengutho bi 'dacä ma Ta. ³⁰ Nε nu'bu bi zøn ra pa ga øt' ran ts'ut'abi, 'darpu dan johyahu, nε gui comhbu ma ts'εdi gui juanbahu ma mi'israelhu, dyú judíohu, bi 'yɛn'a ra Jesús.

Ra Jesús i pądi 'bɛ'a da 'yøt'a ra Pedro

³¹Νε bi t'εmp'a ra Pedro:

—Ma zu Pedro, nu'a ra zithu bi 'yäh ran t'ɛdi ngue da zä'a ni mbuihu, in nde ahu gan 'uɛxthu tengu'bu i 'uɛxt ran dahi yú häi ra trigo. ³²Pɛ nugä, ya dá äp ma Ta him má zä gui pumbɛni ni t'ɛc'yɛihu. Nɛ nu'bu gán 'yomfɛni ts'u, gui 'yɛc'yɛi xun ho mahøn'a, nɛ gui zɛrpa yú mbui ni mi'yɛc'yɛihu, bi 'yɛmbi.

³³Νε nu'a ra Pedro bi dạh puya:

—Nugä, ga tεn'na i madague dan ofädiui ogue ga tuui, bi 'yεna.

³⁴Bi da'a ra Jesús buya:

—Gra Pedro, dí xi'i, nu'bu hin ní mbah ra øni, ná hyundį xquí cøngui, bi t'ɛmp'a ra Pedro.

Ra Jesús bi ma mi ts'utho da nu ran unbi

35 Xø bi 'yɛmp'ʉ yʉ́ xädi bʉya:
—Nu'bʉ ra mbʉdi dá pɛn'nahʉ bʉ
gá mamhbʉ ran ho ma'da'yo, nɛ
hin te gá hyaxhʉ. 'Bɛ'a gá 'yøthʉ,
ha bin ja 'bɛ'a gätho gá hyomhbʉ,
uague hin'na.

Nε gätho yú xädi bi 'yɛ̞na:

-Hin te dá 'bεhmbe.

³⁶Pɛ nuya n'dan'yo gui 'yøthʉ, gui tux ni buxahʉ, nɛ gui hyąx ni mbɛtihʉ. Nɛ nu'bʉ hin'yʉ ni espadahʉ, gui pä ni pahnihʉ gui tämhbʉ n'da. ³⁷Nguetho i jatho din jagä tengu i mam bʉ ja rá hman Oją, i ɛ̞m bʉ: "Yʉ jąli da 'yɛ̞mbi ra ts'om'bäi a," i ɛ̞m bʉ ja rám hman Oją nanguecä, bi 'yɛ̞n'a ra Jesús.

38 Nɛ nu'u yú xädi bi 'yɛmbi:
—Gra Hmu, i jaje yoho yu espada,
bi 'yɛn'u.

—Dí gua'ʉ, bi 'yɛ̞n'a ra Jesús.

Ra Jesús in yaui Oja bu ja ra nyuni Olivos

³⁹ Nu'a ra Jesús buya, bi bøm bu ja ra cuarto mi sihme u, bi mba bu ra nyuni Olivos, bi mbähä yú xädi. ⁴⁰ Ne nu'bu mi zøm bu, nu ra Jesús bi 'yemp'u:

—Dami 'yäfu rá ts'ɛdi Oja gue da zä gui hyäthu yún ts'äte ra zithu, bi 'yɛmbi.

⁴¹Nε nu'a ra Jesús bi 'ue'i ts'ʉ bʉ mí 'bäh yʉ́ xädi, nε bin dạnyahmu, bin yaui Oja. ⁴²Nε bi 'yɛna:

—Ma Ta'i, nu'bu ni pähä, dami japi ngue hin ga sigä a ra mbohi gá sänni ga sigä, pε hin dín nde ma pähäzεhε pε go ni pähä dín nde ga øt'ä, bi 'yɛn'a ra Jesús.

⁴³'Bex bi nɛqui bu n'da rám 'bɛhni Oją mahɛts'i ngue bá hạnba a í zɛrpa rá mbui. ⁴⁴Pɛ nu'a ra Jesús ɛmmɛ bi du rá mbui, nɛ man'da nts'ɛdi bin yaui Oją. Xøgue ra ji a rá xänthe mi täpu häi.

⁴⁵Nε bi ndants'a ra Jesús buya, bi mba bu 'buh yú xädi. Pε nu'u, gätho min ąha nguetho bi güent yú ją'i u nangue ra dumbui mim bɛni. ⁴⁶Nu'a ra Jesús bi 'yɛmp'u:

—Hanja gnán ąhmbu. Dami nuhmbu, gan yạhu Oją janangue'a da zä gui tạhmbu rán ts'äte ra zịthu, bi 'yṣmbi.

Bi fent'a ra Jesús

⁴⁷Nε nu'bu min yąhu yú xädi, 'bex bá ερu n'da nεts'i yu ją'i, nε bá 'bεt'o ra Judas, gue'a n'da rá xädi ra Jesús. Nε nu'a bi zøm bu 'buh ra Jesús nε bi zuspa rá 'yogu 'bu mi zɛngua. ⁴⁸Pε nu'a ra Jesús bi 'yɛ̞mbi: —Grá Judas, ha ran ts'ʉ'ts'i guí dägui, nugä ngue dán ją'igä ua ja ra ximhäi, bi 'yɛ̞n'a ra Jesús.

⁴⁹Nɛ nu'ʉ mi'da yʉ́ xädi 'bʉ mi nu 'bɛ'a bin ja, bi 'yän'na ra Jesús:

—Ha ga japähe ma espadahe, εn'u. ⁵⁰Pε him bi dø'mi 'bε'a da si'a n'da u, 'bex bi zεcua rán 'yεizagu rá 'yεhε ra ngurpa mbäją. ⁵¹Pε nu'a ra Jesús 'bex bi hεcua yú xädi:

—O guí øthu a, bi 'yɛmbi.

Nɛ 'bex bi hocua mahøn'a a rá zagu a ran 'yohu. 52 Nɛ nu'a ra Jesús 'bex bin yahu yu ja'i ngue bá ɛhɛ da zits'i. Min 'yohu yu ngurpa mbäja nɛ yu ngurpa mbädi bu ja ra danija, nɛ mi'da yu ngurpi yu judío. Nɛ bi 'yɛmbi:

—Ha drá bɛgä ngue guá hạhu ni espadahu nɛ ni zahu ngue gui sixcahu, bi 'yɛna. ⁵³ Hanja hin gá bɛntcahu bu ja ra dạnija, nɛ zạnt'a min xänbategä bu. Pɛ nuya bi zøn ra ora din ja a bi zänd Oja nɛ n'da ora thoho gui taju, nɛ'a ra damants'o n'da ora thoho da daqui, bi 'yɛn'a ra Jesús.

Ra Pedro bi gøn'a ra Jesús

⁵⁴'Bex bi fɛnt'a ra Jesús nɛ bi ts'ixpu ja rá ngu ra hmumbäją. Nɛ nu'a ra Pedro bi dɛnni a na 'bɛjua thoho. ⁵⁵Nɛ mi zø bu n'da ra sibi bu mbo rá mbä't'i rá ngu ra hmumbäją. Nɛ nu ra Pedro madin tạspihu bu yu ją'i. ⁵⁶Nɛ mi 'bäpu n'da ra hmute ngue ra 'yɛ̞hɛ bu. Nɛ nu'bu mi nu'a ra Pedro, bi 'yɛ̞na:

—Nuna ran 'yohu hucua, min 'yohu ra Jesús.

⁵⁷ Pε nu'a ra Pedro bin cøni, nε bi 'yɛ̞na:

—Nu'i grá xisu, xøgue hin dí pącä to'o a guí ma, bi 'yɛna.

⁵⁸Nu'bʉ mi tho n'da zʉ t'ʉ ora, n'da ran 'yohʉ bi nu'a ra Pedro nε bi 'yɛmbi mahøn'a:

—Nu'i grán 'yohu, gue'e gmin 'yohu ra Jesús.

Pε nu'a ra Pedro bin cøni:

—Hinga guecä, bi 'yɛna.

⁵⁹Νε nu'bʉ mi thoh man'da ora, xø man'da ran 'yohʉ bi 'yɛ̞mbi:

—Nugä, dí pạcä na ran 'yohu. Guehna n'da rá xädi ra Jesús. Nɛhna ra mɛngu Galilea na, bi 'yɛna.

60 Pε nu'a ra Pedro bi dąti:

—Nu'i grán 'yohu, hin dí pącä 'be'a guím ma, bi 'yɛna.

Ne 'bex bi mbah ra øni buya. 61 Nu'a ra Jesús 'bex bin yɛgui nɛ bi hyant'a ra Pedro. 'Bex bi bɛn'a ra Pedro xí xi'a rá Hmu, ngue bi 'yɛmbi: "Dí pacä nu'bu hin ná mbah ra øni, hyundi xquí cøngui," ngue xí 'yɛmbi. 62 Nɛ nu'a ra Pedro buya, bi mba bu thi nɛ bin zoni, bi bɛnman'u 'bɛ'a bi 'yøt'e.

Ra Jesús bi t'uspi

63 Nɛ nu'u yun 'yohu mi fä'a ra Jesús, bin uspate tho'u. 64 Nɛ bi gorpa rá dä ra Jesús, nɛ bi mbɛmp' puya, nɛ bi 'yɛmp'a ra Jesús:

—Grá pøngahyą, xije to'o bi mbep'a'i, bi 'yembi.

⁶⁵Νε εmmε xʉn ngu ran ts'o bi xi'a ra Jesús.

Ra Jesús bi juanba yú ngurpi yu judío

66 Nɛ nu'bu mi hyax puya, bim peti bu yu dac'yei, nɛ yu ngurpa mbäja, nɛ yu xänbate nija. Nɛ nu'u bi zixpu madím peti gätho yu ngurpi yu judío, ngue di juanba ra Jesús. Nɛ bi 'yɛmp'a:

⁶⁷—Dami xije ya, ha majuąni gue'e grá Cristo, rá Thahni i Oją.

Nε nu'a ra Jesús bi dąti:

—Madague'a ga xi ahʉ, hin gui 'yɛ̞c'yɛigahʉ. ⁶⁸Nɛ ngutho'bʉ ga än'nahʉ n'da ran t'änni, hin gui thạhmbʉ, bi 'yɛ̞n'a ra Jesús. ⁶⁹Pɛ nuya, bi zøn ra ora ga com'be rá ts'ɛdi Oją nui̯xte thoho, nugä ngue dán ją'igä ua ja ra ximhäi, bi 'yɛ̞n'a ra Jesús.

⁷⁰Nε nu'ʉ mi hupʉ bi 'yänni:

—Ha gue'e rá Ts'unt'u e Oja 'bu.Nε nu'a ra Jesús bi dati:

—Gue'a guí mamhbu, bi 'yεna.

⁷¹Pε nu'ʉ bʉya, 'bex bi 'yɛ̞n'ʉ:

—Hingui jatho ga homhbu mi'da yu testigo, nguetho ya bin juanzεhε, nε dá øhmbu a bi ma, bi 'yɛ̞n'u.

Ra Pilato bi juanba ra Jesús

Janangue'a bi ndants'u, bi zix'a ra Jesús bu 'buh ra ts'ut'abi Pilato. ²Nɛ gätho u bi yap'a ra Jesús. Nɛ bi 'yɛ̞mp'a ra Pilato:

—Nuna ran 'yohu i 'bäcua, ɛmmɛ i hät yu ja'i, nɛ bi xih yu ja'i ngue hin din jut yu renta im man ra ts'ut'abi Roma, nɛ bi mansɛ ngue guesɛ ra Cristo, ra hmuts'ut'abi na, bi 'yɛn'u madí yap'a ra Jesús.

³Nε nu'a ra Pilato buya, bi 'yän'na ra Jesús:

—Ha majuani gue'e rá hmuts'ut'abi yu judío.

Ra Jesús bi dąti:

—Gue'a gá ma, bi 'yɛn'a ra Jesús.

⁴Nu ra Pilato bʉya bi 'yɛmb yʉ ngʉrpa mbäją nɛ yʉ ją'i mi 'bäpʉ:

—Xínga n'da ra ts'oqui dá tịnbä na ran 'yohʉ, bi 'yɛ̞na.

⁵Pε εmmε man'da nts'εdi bi man'ʉ yʉ yapate: —Nuna ran 'yohu bi du'ma n'da ran heque nangue 'bɛ'a bi xänba yu jali. Gue'a bi 'yørpu ja ra häi Galilea, nɛpu ra xɛqui Judea, nɛ nuya bi zøcua ja ra hnini Jerusalén, ngue da 'yøt'ua, bi 'yɛn'u.

Ra Herodes bi juanba ra Jesús

⁶Nu'bʉ mi 'yøde 'bɛ'a bi man yʉ jạ'i, nu ra Pilato bi 'yänni:

—Ha ra mɛngu bʉ Galilea na ran 'yohʉ 'bʉ.

⁷Nɛ nu'bʉ mi bądi gue ra mɛngu bu Galilea a ra Jesús, bi manda da ts'ixpu 'buh ra Herodes. Nguetho ra Herodes ra ts'ut'abi bu ja ra häi Galilea, ne gue'a ra pa i 'bʉpʉ ja ra dahnini Jerusalén a. ⁸Nε nu'a ra Herodes, 'bu mi nu'a ra Jesús, bin johya, nguetho mi øde 'be'a gätho mi øt' ra Jesús, ne in nde da nu n'da ran t'øt'e nuixte. ⁹Nε nu'a ra Herodes, xun ngu bi 'yän yun t'änni, pe nu'a ra Jesús him bi 'yurpatho ra güenda, xíngui ts'u bi dądi. ¹⁰Ne hinga yatho mi 'bäh yʉ ngʉrpa mbäją, nɛ yu xänbate nija, ne emme ts'edi bi mbafi, di yap'a ra Jesús. ¹¹Pɛ nu'a ra Herodes nε yú dofui, εmmε bi denthoho a ra Jesús, ne xíngui ts'u bi numansu'a. Ne nu'u yu dofui bi het'a ra pahni tengu yú pahni yu hmuts'ut'abi, ne bi mbenh mahøn'a bu 'buh ra Pilato. 12 Ne madín suhmi a ra Herodes a ra Pilato, pε nu ra pa a, bin amigoui buya.

Nu ra Pilato bi manda dí ho ra Jesús

¹³Ne nu'a ra Pilato bi zon'du yu ngurpa mbäją ne'u mi'da yú ngurpi yu judío. ¹⁴Ne bi 'yembi:

—Guá sihu na ran 'yohu 'bäcua, nɛ gá xiju ra hyäte na. Рɛ xun ngu yun t'änni xtá ändä nɛ xínga n'da ra ts'oqui dá tinbä na, bi 'yɛna.

15 Nɛ xínga gue'a ra Herodes bi ma xtán dinba n'da rá ts'oqui, nɛ bá pɛntho ua mahøn'a. Nɛ hin'yu 'bɛ'a bi 'yøt'na ran 'yohu gue dí nu ran date.

16 Nuya, ga manda da 'bɛi nɛ nubuya ga thøtho, bi 'yɛna.

¹⁷Nguetho nu ra Pilato nzại di thø'a n'da ra ofädi 'bʉ i ja ram pɛti ran dąbaxjua. ¹⁸Pɛ nu yʉ ją'i ɛ̞mmɛ bi mbafi nɛ n'dat'a bi man ʉ:

—Dami hyo na ran 'yohu, nɛ go gui thø'a ra Barrabás, bi 'yɛn'u.

19 Nɛ nu'a ra Barrabás, ra hyodu a, nɛ mi ofädi nguetho bi parpa yu ją'i din suhmbu ra ts'ut'abi. 20 Pɛ nu'a ra Pilato, ɛmmɛ min nde di thø'a ra Jesús, nɛ bi zäpi din yahu yu ja'i mahøn'a. 21 Pɛ nu'u yu ja'i ɛmmɛ i mbafi. Nɛ bi 'yɛ̞n'u:

—Cuarpʉ ja ra pont'i, bi 'yɛn'ʉ. ²²Nɛ ná hyundį bʉya, bi 'yän'na ra Pilato:

—'Bɛ'a ní ts'oqui bi 'yøt'na ra Jesús, xínga n'da ra ts'oqui xtá tịnbä ngue dí nu ran dạte, pɛ 'bɛ da gua'a m'bɛi ga xocä bʉya, bi 'yɛฺn'a.

²³Pɛ man'da nts'ɛdi bi mbah yu ja'i, nɛ n'dat'a bi ma ngue di cuarpu ja ra pont'i ra Jesús. Nɛ bi daha 'bɛ'a min nde buya. ²⁴Nguetho nu'a ra Pilato bi manda da t'øt'a 'bɛ'a go i nde yu ja'i. ²⁵Go bi thø'a ra Barrabás, ngue bi man yu ja'i, madague'a ín ofädi a nam parpate nɛ nɛ'a ín hodu. Pɛ nu'a ra Jesús, go bi däp'u yu ja'i da 'yørpe tengu mim bɛni da 'yørpe.

Nu ra Jesús bin cuatpu ja ra pont'i

²⁶Νε nubʉya, bi ts'ixa ra Jesús bʉ ndehnini. Nε bin c'athʉ n'da ran 'yohu, í Simón, ra mɛngu bu ra hnini Cirene, ngue ní mba bu ja ra hnini Jerusalén. Nɛ bi fɛnt'i nɛ bin japi da duspa rá pont'i ra Jesús. ²⁷Nɛ n'dan nɛts'i yu ja'i bi dɛn'na ra Jesús. Nɛ nu'u 'da yu xisu zom bu ní mba, i tu yú mbui 'bɛ'a da t'ørpa ra Jesús. ²⁸Pɛ nu'a ra Jesús bi hyɛt'u nɛ bi 'yɛmp'u:

—Gyú zu xisuhu, ngue gyú menguhu Jerusalén, o guí zomhbu ngue ga tugä, pε man'da go gui zomhbu nangue 'bɛ'a gui nusɛhu, gyu menguhu Jerusalén, ne ni t'uhnihu. ²⁹ Nguetho da zøn ra pa xun u tho ran unbi guin nuhu. Ne him man gui samhbu u yu xisu him bi din yú t'uhni, pegue guim bɛmhbu mająpi u, nguetho ya njo'o yú t'uhni da nu'a ran unbi xun u tho tengu da nu ni t'uhnihu. 30 Ne da 'yɛn'i 'da: "Man'da xun ho 'bu xtan yøt' yu t'øhø ne yu nyuni xtan gogbahu, xinda gue'bu ga thoqui ga nuhu ran unbi xun u tho," da 'yen i 'da. 31 Ne gui pahmbu, nu'bu xun u tho ran unbi bi t'ørpa n'da ngue hin'yu rá ts'oqui, man'da xun u tho da t'ørpa u ja yú ts'oqui, bi 'yɛn'a ra Jesús 'bu mi xih yu xisu i zoni.

³²Nε'ʉ yoho yʉn 'yohʉ bi ts'its'i ngue 'darpʉ da thohʉ a ra Jesús. Pɛ gätho ʉ yoho mi ja yʉ́ ts'oqui ʉ. ³³Nɛ gätho bi zøm bʉ ja n'da ra nyuni t'ɛmbi ra yaxmu. Guepʉ bi mba ma cuati bʉ ra Jesús nɛ'ʉ yoho yʉn 'yohʉ. N'da a n'da bi guarpʉ ja yʉ pont'i. ³⁴Nɛ nu'a ra Jesús bi 'yɛ̞na:

—Ma Ta'i, dami punba a i ørcä ya yu ją'i, nguetho hingui pądi 'bε'a i øt'e, bi 'yɛ̞n'a ra Jesús.

Ne nu'u yu dofui bi 'yøt'a n'da ran taha to'o da gaxa ra pahni ra Jesús. ³⁵Nε mi hand thoho yʉ ją'i. Nε nu yʉ́ ngʉrpi, ε̞mmε bi den thoho nε bi 'yɛ̞na:

—Nunu ran 'yohu bi pø'i 'da, i sä dim pøse ya gue'bu gue'a ra Cristo rá Thahni Oja nu, bi 'yɛn'u.

³⁶Ne'ʉ yʉ dofʉi ɛmmɛ bi denthoho nɛ di säti di un'na ra vino xʉn ju, ɛmbi da zi a ra Jesús. ³⁷Nɛ bi 'yɛmbi:

—Nu'bu gue'e rá Hmuts'ut'abi yu judío, damim pøsε 'bu, bi 'yεn'u yu dofui.

³⁸Nɛ mán t'o't'i n'da ra xithɛ bʉ ja ra pont'i bʉ ja rá yą ra Jesús. Nɛ nt'o't'i bʉ: "Nuna rá Hmuts'ʉt'abi yʉ judío na."

³⁹Nε nu'a n'da ran 'yohʉ mi cuat rá pont'i mi 'bäpʉ nán ja rá hyo ra Jesús, bin sante thoho. Nε bi 'yɛna:

—Nu'bu majuani gue'e grá Cristo, hanja hin gám pøsɛ, nɛcä'be xquí pøc'be, bi t'ɛmp'a ra Jesús.

⁴⁰Pε nu'a man'da ran 'yohʉ mi cuarpʉ bʉya, bi hεcpa a bin sante nɛ bi 'yɛ̞mbi:

—Ha xíngui ts'ʉ guí su Oją, nɛ 'dat'a man ʉnbihʉ, bi 'yɛ̞na. ⁴¹Pɛ nugüi, ran date rán säui a dá øt'ui. Pɛ nuna ra Jesús, xíngui ts'ʉ ran ts'o bi 'yøt'na, bi 'yɛ̞mbi.

⁴²Pε nubuya, bi 'yεmp'a ra Jesús:

—Dami bɛnc 'bʉ bin ja ni ts'ɛdi ngue gui manda ua, bi 'yɛna.

⁴³Nu ra Jesús bi 'yɛmbi:

—Majuani dí xi'a'i, ga sømmi nám pa ya bu mahets'i, bi 'yembi.

Bi du ra Jesús

⁴⁴Pɛ nu'bu huxyadi, bim 'bɛxui gätho ra ximhäi, asta gue'bu hyunde. ⁴⁵Nɛ nu'bu mim 'bɛxui, bin xɛngui nde ra 'bø't'e i ndam bu mbo ra dąniją. ⁴⁶Ne nu'a ra Jesús nts'edi bi mbafi, ne bi 'yena:

—Ma Ta i, dadí dä'a ma te ya, bi 'yɛ̞na.

Nε 'bex bi du buya.

⁴⁷Nɛ nu ra hmudofui mi 'bäpu, 'bu mi nu 'bɛ'a bin ja, bi 'yɛ́spa Oją, nɛ bi 'yɛ́nsɛ:

—Majuani nunu ran 'yohu hin te mi ja ra ts'oqui, bi 'yɛna.

⁴⁸Nɛ gätho na ngu yu ja'i 'bäpu ngue yu nute, 'bu mi nu 'bɛ'a bin ja, 'bex bi mba yú ngu, bi bɛndumbui nɛ bi hyonya thoho. ⁴⁹Pɛ nu'u yú amigo ra Jesús n'danni ts'u mi 'bäi. Nɛ'u 'da yu xisu mi tɛn'na ra Jesús 'bu mambá nɛxpu ja ra häi Galilea, gätho bi nu 'bɛ'a bi t'ørpa ra Jesús.

Bi t'ä'a ra Jesús

^{50,51}Nε mi 'bu'a n'da ran 'yohu, í José, ra mengu bu ra hnini Arimatea, n'da rá hnini yu judío bu ra xequi Judea. Nu'a, ra hoc'ją'i a, nε mi hnumansu. Nε mi tøm' ra pa di manda ua rá ts'edi Oją. N'da rá ngurpi yu judío a, pe hinga 'da'ingu bi bemhbu u bi juanba ra Jesús. ⁵²Νε nu'a ra José bi mba bʉ bí 'bʉh ra Pilato ne bi 'yäp rá ngøc'yei ra Jesús ngue da 'yägui. 53 Ne bi tong bu ja ra pont'i a ra Jesús. Νε bi mbantpa rá jaji ra Jesús nida ra hoc'bø't'e xun ho, ne bi gärpu ja n'da ra hyądo xínga n'dandį bi 'yo n'da ra du. 54 Ne nu'bu mi 'yägui, gue'a ra pa din sä yu ja'i ngue da nu ra pa ran säya.

⁵⁵Nε nu'ʉ yʉ xisu, mi tɛn'na ra Jesús 'bʉ xí nɛxpʉ ja ra häi Galilea, bi dɛn'na ra José nɛ bi nu hapʉ bi jät'a ra Jesús, nɛ mi nu hapʉ án ja rá ya. ⁵⁶Nɛ nu yʉ xisu bi mba bʉya, di hoc ra 'yɛthi i yʉman'u, nɛ ra aceite da gospa rá jạ'i ra Jesús. Pɛ nu'bʉ mi mbʉ'a ra pa ran säya, bin säya tengu thoho bi mam bʉ ja yʉ́n t'ɛdi.

Bi dąmbęni ra Jesús bu ja rán 'yägui

Nɛ t'uxuditho ra pa ndomingo, nu'u yu xisu bi dux ra 'yɛthi bi hoqui, nɛ bi mba bu ja ran 'yägui ngue ra hyado guepu mi o ra Jesús. ²Nɛ nu'bu mi zøm bu, bi nu, ya xí mba njunni a ra do mi juaxpu ja ra hyado. ³Nɛ 'bex bi yurpu mbo, pɛ him bi dim bu rá ja'i ra Jesús. ⁴Nɛ nu'bu mi 'bäpu nɛ din 'yomfɛni 'bɛ'a bin ja, 'bex bim 'bähmbu yoho yúm 'bɛhni Oja, mi he yú pahni di fɛxni. ⁵Nɛ nu'u yu xisu, ɛmmɛ bin su nɛ bi hyɛ't'u yun 'yohu. Nɛ bi 'yɛmp'u:

—Hanja gní hyomhbu ua n'da ran 'yohu i 'bui, guecua ja ran 'yägui. ⁶Nu'a guí homhbu, bi ndants'a, njo'o ua a. Nde'bu guim bɛmhbu a bi xi ahu 'bu gám 'buhmbu bu ja ra häi Galilea. ⁷Ngue bi ma jatho da nu ran unbi, nɛ da mba ma dä bu 'buh yu ts'om'bäi, nɛ da du bu ja ra pont'i, nɛ nu'bu ná hyu pa da dambɛni, bi 'yɛn'ahu, bi 'yɛn'u yúm 'bɛhni Oja.

⁸Nɛ nu'ʉ yʉ xisu bi bɛm bʉya 'bɛ'a xí man'a ra Jesús. ⁹Nɛ bi nɛxpʉ ja ran 'yägui, bi mba bʉ 'bʉ'ʉ 'dɛ'ma'da yʉ́ xädi ra Jesús nɛ'ʉ gätho mi'da, nɛ bi xi'ʉ 'bɛ'a bin ja bʉ ja ran 'yägui. ¹⁰Nɛ nu'ʉ yʉ xisu, ra María Magdalena a n'da, nɛ ra Juana a man'da, nɛ ra María rá mbe ra Jacobo a man'da, nɛ'ʉ mi'da min 'yohʉ gue' ʉ bi xi'ʉ yʉ́ xädi a ra Jesús 'bɛ'a bi nu bʉ ja ran 'yägui.

¹¹Pe nu'ʉ yʉ́ xädi, him bi 'yɛ̞c'yɛi 'bɛ'a bi man yʉ xisu, nɛ bi 'yɛ̞mbi bi bɛnsɛ 'bɛ'a bi man'ʉ.

¹²Pε nu'a ra Pedro, bi mba n'dihi bu ja ran 'yägui nε bi nu bu mbo. Nε bi nu mi 'bøntho bu ra 'bø't'e má mbant'i ra Jesús. Nε bi mbeng bu ja rá ngu buya, bi hyonya thoho 'bɛ'a bin ja.

Ra Jesús bin 'yohu bu 'yu 'da yú 'yɛc'yɛi

¹³Nε gue'a ra pa bi mba yoho yu 'yεc'yεi bu ja ra hnini Emaús ngue hinga yatho, hyu ora tho ná 'yo.

¹⁴Nε i mam bu ní mba 'bε'a bin ja bu Jerusalén. ¹⁵Nε gätho ná ya'u, bi zupu 'yu a ra Jesús nε bin 'yohu.

¹⁶Nε nu'u bi nu a, pε him bi badi to'o a. ¹⁷Nε nu'a ra Jesús bi 'yän'du:
—'Bε'a guí mammi.

Ne nu'u yoho bim 'bäpu buya, ne emme tu yú mbui.

¹⁸Nɛ nu'a n'da í Cleofas bi dạti, bi 'yɛna:

—Masque høn'a zehe hin guí pądi 'be'a bin ja bu Jerusalén yu pa i ja buya, bi 'yembi.

¹⁹Nu'a ra Jesús bi 'yänni:

—'Βε'a bin ja bʉ.

Ne bi xih puya 'be'a bin ja, bi 'yembi:

—Nu ra Jesús, ra mɛngu Nazaret, n'da rá pøngahyą Oją εmmɛ mi ja rá ts'ɛdi, bi 'yøt' yʉn t'øt'e nui̞xte nɛ bi hoc yʉn zäman'ʉ. Nɛ bi 'yøt' ran ho bʉ na nu Oją, nɛ nu yʉ jạ'i bi numansu a. ²⁰Nɛ nu'ʉ yʉ ngʉrpa mbäją nɛ mi'da ma ngʉrpihʉ, bi dä'a ra Jesús bʉ 'bʉh ra ts'ʉt'abi ngue da tho. Nɛ bi mba ma cuati bʉ ja ra pont'i bʉya. ²¹Nɛ nugähe, dá bɛmhbe gue'a da yạnjʉ dyʉ́ jạ'i

SAN LUCAS 24 170

israelgähu, nɛ xtín jasɛ ma ts'ɛdi zɛhɛhu mahøn'a. Pɛ ya ná hyu pa ya bi tho. ^{22,23}Pɛ nu'u 'da yu xisu ma mi 'yɛ̞c'yɛihe, mán t'uxuditho bi mba bu ja rán 'yägui, guepu bí o ra Jesús, pɛ him bi dim bu a, nɛ bá peng bu ja ra ngu bi xije 'bɛ'a bi nu, nɛ bi man'u bi nu 'da yúm 'bɛhni Oja mahɛts'i, bi xifi i 'bu'a ra Jesús. Nɛ ɛ̞mmɛ dadí hyonya thohe. ²⁴Pɛ nu'u 'da man 'yohe, bi mba bu ja ran 'yägui nɛ ngutho bi man'u ngue hin'yu bu rá ja'i, bi 'yɛ̞n'u yu 'yɛ̞c'yɛi.

²⁵Pε nubʉya, nu'a ra Jesús bi xi'ʉ min 'yohʉ:

—Nu'aui, guí 'yạmbuiui nɛ xíngui ts'u guí ɛhya gui 'yɛc'yɛiui 'bɛ'a gätho bi man yú pøngahya Oja. ²⁶Nguetho gätho u bi ma jatho da nu ran unbi ra Cristo, gue'bu go bi gonhui rá ts'ɛdi Oja, bi 'yɛn'a ra Jesús.

²⁷Nɛ nubʉya, bi xi'ʉ 'bɛ'a gätho bi man yʉ pøngahya ngue din ja, nɛ 'bɛ'a nam bøn'a nt'o't'i bʉ. Bi dʉ'mi bʉ rá mbʉdi rá søcua ra Moisés nɛ bi xifi gätho ʉ mi'da yʉ́ søcua Oja.

²⁸Nɛ nu'bʉ mi ts'ʉtho da zøm bʉ ní mba, nu ra Jesús bi 'yøt'e tengu 'bʉ da thogui. ²⁹Pɛ nu'ʉ yoho min 'yohʉ bi zammi din oxhʉ bʉ, nguetho bin de. Nɛ nu'a ra Jesús bʉya, bi gohmbʉ bʉ ʉ.

³⁰Nε nu'bʉ min sihmɛhʉ, nu ra Jesús bi hyac ra hmɛ, nɛ bi un ra jamadi Oja, bi xɛni, bi un'dʉ mi 'bʉpʉ bʉya. ³¹'Bexgue 'dahmantho bi badi to'o a ra Jesús tengu'bʉ ja bin zø yʉ́ dä. Pɛ nu'a ra Jesús 'bexque bim 'bɛtho bʉ, him bi nu hapʉ í mba. ³²Nɛ nu'ʉ yoho bin yasɛ ʉ, bi 'yɛn'ʉ: —Pε hanja hin dá pąhmi 'bu mán c'athu bu ja ra 'yu. Ha him bin johya ma mbuiui 'bu mí xicui 'bε'a nam bøn'a rám hma Oją, bin 'yεmzεhε u.

33'Bex bi ndants'i, bi mbeng bu Jerusalén, nɛ bi dim bu u 'dɛ'ma'da ngue madím pɛtihu mi'da yu ja'i.
34Nɛ ɛmmɛ madí johya u, nɛ i ma ngue bi ndants'i mahøn'a ra Hmu nɛ bin yaui ra Pedro. 35Pɛ nu'u bi zøhø ngue min 'yohu ra Jesús bu 'yu, bi xi'u mi'da 'bɛ'a bi 'yørpu 'yu. Nɛ bi xi'u ngue gue'a í ba'a ngue bi xɛn ra hmɛ ra Jesús.

Ra Jesús bin 'yuse bu 'buh yú xädi

³⁶Nɛ nu'bʉ gätho na yạ'ʉ yʉ xädi, ya xí 'bäpʉ ra Jesús 'bʉ mi nu. Nɛ bi zɛngua ʉ, bi 'yɛmbi:

—Gan johyahu.

³⁷Nɛ ɛmmɛ bin su, bi bɛni gue i nu n'da ran dahi, ngue him majuani.
³⁸Pɛ nu ra Jesús bi 'yɛmp'u:

—Hanja ngue in jabu nin 'yomfɛnihu, nɛ hingui sä gui 'yɛc'yɛigahu. ³⁹Dami hyɛtcahu, nɛ guin nuhu ma 'yɛ nɛ ma gua, nɛ gui nuhu ngue gueczɛhɛgä. Dami thäqui, janangue da zä gui pahmbu ngue i ja a ma ngøc'yɛi. Pɛ nu'a n'da ran dahi tengu guím bɛmhbu, hinguin 'youi rá ngøc'yɛi a, bi 'yɛn'a ra Jesús.

⁴⁰Nε nubuya, bi 'yut'u yú 'yε nε yú gua. ⁴¹Pε guexta'a him 'bexque bi 'yεc'yεi nguetho bi hyonya thoho, nε xin di johya u. Nu ra Jesús buya, bi 'yäpi 'bε'a da zi. ⁴²'Bex bi un'na n'da xεqui ra huą. ⁴³Bi hyam buya nε bi za, nε gätho yu ja'i mi 'bupu bi nu. ⁴⁴Nε nu ra Jesús bi 'yɛmp'u:

—Nuya bin ja 'bɛ'a gätho dá xi ahu 'bu mám 'buhmbu. Ya dá xi

171 SAN LUCAS 24

ahu gue din ja a nt'o't'i bu ja yún t'ɛdi ra Moisés, nɛpu ja yú søcua yu pøngahya, nɛ'a nt'o't'i bu ja yu thuhu, yu salmo, nɛ ya bin ja, bi 'yɛn'a ra Jesús.

⁴⁵Nu ra Jesús bʉya, bi xocpa yʉ́n 'yomfɛ̞ni ngue da zä da bạ̞'ʉ 'bɛ̞'a nam bøn'a rám Hman Oją. ⁴⁶Nε bi 'yɛ̞mp'ʉ:

—Nt'o't'i bu ja rám Hman Oją gue da nu ran unbi ra Cristo, nɛ da tho, nɛ ná hyu pa da dambɛni. ⁴⁷Nɛ nt'o't'i bu ngue dí mbupu Jerusalén da hman ran ho ma'da'yo, nɛ gätho ná nguni ra ximhäi, nɛ da sih yu ja'i di päh yún 'yomfɛni nɛ da mba ma punbi yú ts'oqui, ngue nangue rá thuhu ra Cristo. ⁴⁸Nu ahu, sä guim mamhbu majuani ran ho ma'da'yo, nguetho gá nuhu 'bɛ'a

gätho bin ja. ⁴⁹Nɛ gua pɛn 'nahʉ rá Hogandąhi Oją bi mam ma Ta di 'da ahʉ. Pɛ jatho gui tømhbʉ ua Jerusalén, gue'bʉ go bá ɛh mahɛ̞ts'i rá ts'ɛdi gan 'yohʉ, bi 'yɛn'a ra Jesús, bi 'yɛm'bʉ min yąhʉ yʉ́ xädi.

Bi ndex mahets'i ra Jesús

⁵⁰ Nu'bu mi gua'a bi man ra Jesús, bi zix u yú xädi bu ja ra 'yu ní mba bu Betania, nɛ guepu bi 'ua'ts' yú 'yɛ nɛ bi jąp'u buya. ⁵¹ Pɛ nubuya bi zopu u yú xädi nɛ bi ndex mahɛts'i. ⁵² Nɛ gätho u mi 'bäpu bi 'yɛspi nɛ ɛmmɛ bin johya yú mbui u. Nɛ bi mbeng bu Jerusalén buya. ⁵³ Nɛ gätho yu pa bin de bu ja ra danija, mi numansu Oja nɛ bi un ra jamadi Oja bu. Nɛ hønt'a dí xi'a ya.

Xuua

Ran ho ma'da'yo bi 'yo't'a ra Xuua rá xädi ra Jesús, ne xin rá 'bäiui a

Nu'a ra Cristo t'embi ram Hma

Nu'a ra Cristo tengu'bu ram hma nguetho di jaju ga pahmbu Oja a. Ne ya xmí 'bu 'bu hin te mí ja ra ximhäi, ne i 'buhmi Oja a, ne nu'a Oja a. ²Ne gue'a mí 'buhmi Oja 'bu rá mbudi thoho. ³Gätho bi 'yøt'e 'be'a i ja. Nu'bu hin xtá 'yøt'a, hin te di ja 'bu. ⁴I jase rá te, ne gue'a ní ja yú te u yu ja'i, ngue di 'yomfenip yú mbui u. ⁵Janangue'a nu'a tengu ran nequi di yorpu ja ra 'bexui. Pe nu'a ra 'bexui hin da zä di hue't'a ran nequi.

⁶Nu Oją bi huahna n'da ran 'yohu gue'a ra Xuua Nxixyą a. ⁷Nu'a ra Xuua Nxixyą bi thahni da ma nangue'a ran nɛqui majuani, ndepe gätho da 'yεc'yεi ran nɛqui yu ja'i, nangue'a bi man'a ra Xuua. ⁸Pε nu'a ra Xuua Nxixya hinga gue'a ran nɛqui a, pɛ bi ma nangue'a ran nɛqui. ⁹Nu'a ran nɛqui majuani, bấ εcua ja ra ximhäi, ndepe gätho din ja ran nɛqui yu mbui yu ja'i.

¹⁰Nu'a ran nεqui majuạni bi 'yøt' ra ximhäi, nε bim 'bucua, pε nu yu ją'i ua ja ra ximhäi him bi bądi gue

gue'a. ¹¹Í zøcua dí 'buhmbe ngue ma mɛngugähe a. Pɛ xun ngu u him bi 'yømanho a. ¹²Pɛ gätho to'o bi zim bu mbo yú mbui a ra Cristo, nɛ bi 'yɛc'yɛi gue yú yạnte a, gue'a í zä bi xạnd mahøn'a Oja u ngue bi 'yøt'e yú t'uhni zɛhɛ u. ¹³Pɛ nu'bu bi xạnd mahøn'a Oja n'da, hinguin ja tengu'bu xum 'bu a n'da ra 'uɛre, ngue bi ndesɛ yu ja'i nɛ nangue yú ja'i zɛhɛ, pɛ bim 'bui mahøn'a nangue Oja.

¹⁴Nɛ nu'a tengu'bu ram hma bin ją'i a, nɛ mí 'buhmbe a. Nɛ dá nuhe rá nuixte nguetho rá 'dats'unt'u Oją a, hin hapu i sɛ a rá mate, nɛ gätho majuani bi ma. ¹⁵Nu'a ra Xuua Nxixya bim pøngahya nangue'a. Nɛ ts'ɛdi bi ma bi 'yɛ̞na:

—Nuna guehna dá mangä 'bu má xi ahu, m'bejua ba εhε, pε man'da nuixte xinda guecä, nguetho ya xmí 'bu 'bu rá mbudi thoho, nε hin'na gä, mí εngä, bi 'yɛn'a ra Xuua Nxixyą.

¹⁶Νε gätho gahu dyu 'yεc'yεihu, dá hạmhbu rá mate xun ndoho, nε thocua thoho di 'daju man'da rá mate. ¹⁷Nu ra Moisés bi xängahu yún t'ṣdi Oją. Pɛ nu ra Jesucristo bi 'daju rá mate ngue majuani dí zingdahu Oja a. ¹⁸ Njo'o n'da ra ja'i da zä da nu Oja ngue xtám base, hinda hønt'a rá 'dats'unt'u dim paseui a rá Ta, nɛ gue'a bi jaju dá pahmbu a.

Ra Xuua Nxixya bi ma to'o a

19 Nu'u ma ngurpihe dyu judíohe dyu israelhe ngue mí 'bupu ja ra dąhnini Jerusalén, bi mba u 'da yu mbäją ne'u 'da yum fäts'ihu, bi zøm bu 'buh ra Xuua Nxixyą da 'yänni to'o a. 20 Ne nu'a bin juanni, him bin cøni, ne bi 'yɛna:

—Hinga guecä dra Cristo gue xu huand Oją, bi 'yɛ̞n'a.

²¹Nε bi t'änni mahøn'a:

- —To'o e, ha gue'e gra Elías.
- —Hin'na, hinga guecä, bi 'yɛn'a.
- —Ha gue'e gra pøngahyą bi man ra Moisés gue ba εhε.

Nε bi dąti:

- -Hin'na, bi 'yεntho.
- ²²Νε bi t'änni mahøn'a:
- —To'o e. Xije. Nu'bu gui xije πε da zä ga xihmbe u bá pɛngähe buya.

²³Νε bi dą'a ra Xuua Nxixyą bʉya:

—Nugä guecä bi man ra pøngahyą Isaías 'bu mi ma: "Dim 'bu a n'da dim 'bäpu ma'ueni ra hnini, nɛ ts'ɛdi da ma di hoc yú mbui yu ja'i gue da 'yømanho ra Hmu 'bu bi zøhø," bi 'yɛ̞n'a ra Isaías, bi 'yɛ̞n'a ra Xuua Nxixya.

²⁴Nε nu'u bi zøm bu, yúm 'bɛhni yu fariseo u. ²⁵Nε bi t'ɛmp'a ra Xıma:

—Hanja gní 'yøt' ran xixya 'bu hinga gue'e grá Cristo, xínga gue'e grá Elías, xínga gue'e man'da ra pøngahya bi man ra Moisés. ²⁶Nu'a ra Xuua bʉya bi dạt'ʉ, bi 'yɛ̞na:

—Nugä, ra dehe thoho ná xixyąba yu ją'i, pɛgue i 'bä inde n'da ran 'yohu ua dí 'bähmbu, ngue hin guí pąhmbu 'bɛ'a di 'yɛt'ui a. ²⁷Nuna guehna dá mangä ngue m'bɛjua di dump' rá 'bɛfi, pɛ man'da nuixte xinda guecä, janangue'a hin dí sucä tengu a, bi 'yɛn'a ra Xuua Nxixya.

²⁸Nɛ guehya gätho yʉn t'änni bi hmam bʉ ja ra xɛqui Betábara, n'danguadi ra dąthe Jordán, guepʉ bi 'yøt' ran xixya ra Xuua.

Tengu ra t'udε'yo ra Cristo

²⁹Nu'bu mi hyats'i, nu ra Xuua Nxixyą bi nu ba ępu ra Jesús, ne bi 'yɛmp'u mí 'bähmbu bu:

—Dami hyanthu ya, tengu'bu ra t'udɛ'yo, nguetho bi zänba Oją dim 'bøts'e zɛhɛ, gue di hocpa yú ts'oqui yu ją'i 'bucua ja ra ximhäi. ³⁰ Nunu guehnu mím mangä nu 'bu má ɛngä: "Ba ε a n'da ran 'yohu m'bejua, nu'a man'da nuixte xinda guecä, nguetho ya xmi 'bu 'bu rá mbudi thoho, nɛ hin'nagä." ³¹Nɛ nugä him mí pacä to'o a t'ɛmbi ra Cristo. Pɛ bi siqui ga xixya ahu nangue ra dehe, ngue gui pahmbu to'o a ni yantehu, ma mi israel ahu, bi 'yɛna.

³²Ne bi ma majuani ra Xuua Nxixya, bi 'yena:

—Dá nugä rá Hogandąhi Oją bá cąh mahɛts'i, tengu n'da ra t'azu, nε bi gohmi ra Jesús 'bu má ørpa ran xixyą. ³³Ja dá pacä buya ngue gue'a. Nguetho nu Oja ngue bi xiqui ga øt' ran xixyą nangue ra dehe, nε bi xiqui: "Nu'bu guin nu ma Hogandąhi da gai nε da gohmi

n'da ran 'yohu, gui padi ngue gue'a di un ma Hogandahi yu ja'i," bi 'yɛngui. ³⁴Nɛ gue'a dá nugä a buya, janangue dím mangä: "Guehna rá Ts'unt'u Oja na," dí ɛngä, bi 'yɛn'a ra Xuua Nxixya.

Yú mbudi yú xädi ra Jesús

³⁵Xø man'dapa buya mí yo'be mi 'bähmbe ra Xuua Nxixyą yú xädigä'be a. ³⁶Nu ra Xuua Nxixyą buya bi hyandi ngue 'yo bu ra Jesús, nɛ bi 'yɛ̞nc'be:

—Dami nuui ya ra t'ʉdε'yo ngue'a rám 'bɛhni Oja, bi 'yɛ̞na.

³⁷Nu'bu má ø'be a bi ma, dá tɛn'be ra Jesús. ³⁸Nɛ nu'a ra Jesús bin yɛ 'bu má tɛn'be nɛ bi 'yänga'be:

—'Βε'a guí hommi, bi 'yɛ̞nc'be. Nɛ dá än'be a:

—Rabí, nde da ma, xänbate i, hapu guí 'bui.

³⁹Νε bi xic'be ra Jesús:

—Ga mbähä gua nuui bu dí 'bucä.

Dá mbähmbe buya nɛ dá nu'be hapu mi 'bui. Nɛ man'da ora dám 'bu'be bu 'bu má sømhbe bu, nguetho mbɛ goho nde 'bu má sømhbe bu.

⁴⁰Nɛ nu'a man'da gue min 'yohe 'bʉ mi xic'be ra Xuua Nxixyą ga tɛn'be ra Jesús, ra Andrés a, rán 'yohʉ ra Simón Pedro. ⁴¹Nuna ra Andrés 'bex bi mba bá xi a rán 'yohʉ.

—Ya dá tim'be ra Mesías, bi 'yɛna. Nu'a nde da ma rá Thahni Oją a, ngue gue'a ra Cristo a.

⁴²Nε nu ra Andrés buya, bi zix'a ra Simón guepu bí 'bä a ra Jesús. Nε nu ra Jesús 'bu min nu, bi 'yɛmbi: —Nu'i gra Simón rá ts'unt'u i ra Jonás. Nuya ga xi a man'da ni thuhu ga hut'a ra Cefas, n'dat'a ra Pedro gue nde da ma, ra do.

Ra Jesús bi zon'na ra Felipe ne ra Natanael

43Xø man'dapa mahøn'a buya bi ben a ra Jesús da mba bu ra häi Galilea. Ne nu'bu má mbähmbe bin timmi ra Felipe.

—Dami tengui, bi 'yemp'a.

⁴⁴Nuna ra Felipe ra mɛngu bʉ Betsaida, nɛ ra Andrés, nɛ ra Pedro. ⁴⁵Nɛ nu'bʉ mi mba ra Felipe nɛ bi dịn'a ra Natanael, bi 'yɛ̞mbi:

—Ya dá tịngähe a gue mi hmam bu ja rá socuą ra Moisés, nɛpu ja yu socuą yu pongahyą Oją mi hma, nɛ gue'a ra Jesús ra mɛngu Nazaret, rá ts'unt'u ra José, bi 'yɛn'a.

⁴⁶Nu ra Natanael buya bi 'yɛna:

—Hague dán zä di nεqui n'da ra hocja'i bʉ Nazaret.

Nu ra Felipe buya bi 'yɛmp'a:

—Ga mbε gua nusε.

⁴⁷Nε nu'bʉ min nu ra Jesús gue ba ερʉ ra Natanael, bi 'yɛ̞nje bʉ mi 'bähmbe:

—Dami nuhu nu ran 'yohu ba ɛhnu ya, gue rán säui njuantho da t'ɛmbi ra israel, nguetho hingui yoho rán 'yomfɛni, bi 'yɛna.

⁴⁸Bi 'yεn'a ra Natanael buya:

—Hanja guí pądi gue hingui yoho man 'yomfenigä ne njąm'bu gá nugui, bi 'yena.

Nu ra Jesús bi 'yɛ̞mp'a:

—Nu'bu hin ní zo a ra Felipe, dí pądi 'bɛ'a gnám bɛm 'bu gmi hupu ja ra za, bi 'yɛmp'a.

⁴⁹Nu ra Natanael buya bi 'yɛmp'a:

—Ma Hmu i, rá Ts'unt'u i Oją, gue'e bi zän'na Oją gam hmuts'ut'abi nanguecähe dyu israelhu, dyu judíohu.

50 Nu'a ra Jesús bi 'yɛ̞mp'a:

—Ha gue'a guí 'yɛc'yɛigä a dá xi i, gue'bu má xi i: "Dí padi 'bɛ'a gnám bɛm 'bu gmi hupu ja ra za." Pɛ man'da nuixte guin nu 'bu m'bɛjua xinda guehna dá xi i. 51 Nguetho majuani dí xi i, guin nuhu da xoh mahɛts'i, ngue guin nuhu yum 'bɛhni Oja ba cah mahɛts'i, nɛ da zøpu hapu gä dan 'yogä, nɛ da ndets'e, gue guecä dán ja'igä ua ja ra ximhäi, bi 'yɛn a ra Jesús.

N'da ran thạti bin ja bu Caná

Nɛ nu'bu mí tho'a nyopa buya bin ja n'da ra dants'ihmɛ 'bu mín thata n'da ra ts'unt'u bu Caná ra häi Galilea. Nɛ bi zøm bu rá mbe ra Jesús, bi mbäx'u bi hoc ran ts'ihmɛ. ²Nɛ ra Jesús nɛcähe yú xädigähe bi ts'oncahe bu ja ran ts'ihmɛ. ³Nɛ nu'bu min theh ra gui'uva dá sihe, bi 'yɛn'a rá mbe ra Jesús:

—Bin the'a ra gui'uva, bi 'yɛ̞mp'a ra Jesús.

⁴Bi dą'a ra Jesús buya:

—Ma mbe i, 'bɛ gám bɛnsɛ 'bɛ'a ga øt'ä, nguetho hinga na søn ra ora ga øt'a n'da ran t'øt'e nuixte, bi 'yɛmp'a rá mbe.

⁵Nε nu'a rá mbe ra Jesús bʉya bi xi ʉ yʉ 'yɛ̞hɛ 'bʉpʉ:

—Hønt'a go 'bε'a da xi ahu ra Jesús, dami 'yøthu, bi 'yεna.

⁶Nε mí høpu 'dato yu xaro ngue yu do, mbε goho 'däte litro i hät'u. Nguetho i ja ran t'ɛdi ma mi judíohe gue i jatho din xut'yɛ. ⁷Nε nu'bu mí zøn ra ora bi man ra Jesús, bi xi u yu 'yɛhɛ 'bupu:

- —Dami yus'hu yu xaro nangue ra dehe.
- —Nε bi yus' pʉya. ⁸Nε bi 'yɛ̞mbi mahøn'a:
- —Dami 'yä i ts'ʉ ra dehe nε gui un'na ra ngʉrpa 'yɛ̞hɛ, bi 'yɛ̞na.

Ne bi un buya. ⁹Ne nu'bu mí zä a ra ngurpa 'yehe gue xín gui'uva a ra dehe, bi zä mancuhi. Pe him bi badi hapu bi nequi, pe nu yu 'yehe gue bi 'yä a ra dehe mi pa u. Janangue'a nu ra ngurpa 'yehe bi ma bá ts'i a ra ts'unt'u da 'yänni nangue ra gui'uva, gue nu'a ra ts'unt'u go din thati. ¹⁰Ne bi t'emp'a:

—Pε hanja 'bε bin niyą u yu ją'i, gá un'na ra gui'uva xun cuhi, nε hinga gue'a ząi øt' yu ją'i a. Pε ząi rá mbudi thoho di un a xun cuhi bu ja n'da ran ts'ihme, nε nu'bu bin niyą yu ją'i din t'un'na hin ε ho, bi 'yɛn'a ra ngurpa 'yɛhɛ. Nε xinga gue'a mí pa a.

¹¹Nɛ guehna rá mbudi ran t'øt'e nuixte bi 'yøt' ra Jesús bu Caná ra häi Galilea, gue bi 'yuh rá ts'ɛdi. Nɛ man'da dá ɛc'yɛihe buya yú xädigähe a.

¹²M'bɛjua bʉya dá mbähmbe ra Jesús bʉ ra hnini Capernaum, nɛ rá mbe nɛ yʉ́n 'yohʉ. Pɛ hinga nya'a dám 'bʉhmbe bʉ.

Ra Jesús bi mbaxt'a ra dąniją

13 Dá mbähmbe ra Jesús bu Jerusalén 'bu ma guepu da dät' ra pa mahøn'a ran dąbaxjua gue 'bu mi hyo ra t'ude'yo bu Egipto mam bombøtahe. 14 Nɛ nu'bu mí yurpu mbo má mbä't'i ra dąniją, bi nu ngue 'bupu yu mbändąni nɛ yu mbäde'yo nɛ yu mbäts'ąha mim pä bu. Nɛ mí 'bupu u yum pämbɛti øt' yú 'befi bu. ¹⁵Ne bi 'yøt'a n'da ram fei gue ra xahi gue í dex'u yu mbä. Ne gätho bi hyøn a thi yu mbä ne yún dani ne yú de'yo. Ne bi 'uenba yú mbeti yum pämbeti, bi ndønba yú mexa. ¹⁶Ne bi t'emp'u yu mbäts'aha:

—Ní mbähä, dami six ni dojahu. Hingui sä gui 'yøthu ra nguntäi ua rá ngu ma Ta, bi 'yɛn'a ra Jesús.

¹⁷Ne 'bex dá bɛmhbe a mán t'o't'i ja rá t'ohni Oją: "Ena da guah ma mbui nangue ra dumbui 'bu má nu a ni ngu, nguetho ɛmmɛ dín ndepe xtán hotho bu," bi 'yɛmp a rá Ta ra Cristo, bi 'yɛn rá t'ohni.

¹⁸Nu'н ma ngнrpihe dyн judíohe bi 'yän bнуа, nɛ bi 'yɛmbi:

—'Bɛ'a ní hmɛpya gui 'yurcahe ya, n'dahma da zä ga pahmbe 'bu i ja nin t'ɛdi gui 'yøt'a gá 'yøt' ya, gue gá hyøn a thi yu mbä, bi 'yɛn'u.

¹⁹Nu ra Jesús bi dąt'u:

—Ga xi ahu ra hmɛpya gá 'yäju. Nu'bu gui xothu ra niją ua, nɛ hyupa thoho dá høh mahøn'a, bi 'yɛmp'u.

²⁰Bi 'yɛn'ʉ ma ngʉrpihe bʉya:

—Pε yote ma 'dato njeya án guahna ra niją, nε guí εna, nhyupa thoho gdí hyøh mahøn'a, bi 'yɛ̞n'ʉ.

²¹Pɛ nu'a ra niją bi man a ra Jesús, bi ma nangue rá ngøc'yęi zehe.
²²Nu'bu mí zøn ra ora bi du nɛ bi dambɛni, 'bexgue dá bɛmhbe 'bɛ'a xí man'a, nɛ man'da dá pahmbe majuani a bi man rá t'ohni Oja nɛ yɨm hman ra Jesús.

Gätho i pase ra Jesús

²³Nɛ nu'bʉ mám 'bʉhmbe bʉ Jerusalén, gue'ʉ yʉ pa ran dąbaxjua, xʉn ngu ɛ̞na bi 'yɛ̞c'yɛi ra Jesús 'bu mín nu yun t'øt'e nuixte bi 'yørpu. ²⁴Pɛ nu'a ra Jesús hinga gätho bi xi u 'bɛ'a mím bɛni, nguetho bi badi 'bɛ'a di ja yúmbui gätho yu ja'i, bi badi hin da 'yømanho u. ²⁵Nɛ hinga hnɛhi tho da sih ra Jesús 'bɛ'a im bɛn yu ja'i nguetho ya i pa a ra Jesús 'bɛ'a di ja yúmbui.

Bin yaui ra Jesús a ra Nicodemo

Mí 'bu a n'da ran 'yohu, n'da ra fariseo, gue'u min ɛhya da 'yøt' yún t'ɛdi Oja, í Nicodemo a. Nu'a n'da rá ngurpi ma mijudíohe.

2N'da ra xui bi zøm bu 'buh ra Jesús, nɛ bi 'yɛmbi:

—Xänbate i, dí pąhmbe Oją bi zän'ni i gui xängahe, nguetho hin xtán zä xquí 'yøt' yʉn t'øt'e nuixte 'bʉ hin di zε a Oją, bi 'yɛna.

³Nu ra Jesús bi dadi, bi 'yɛmp'a:

—Majuani dí xi a i, nu'a hin dim 'bui ma'da'yo, hin da zä da yurpu di manda Oja, bi 'yɛmbi.

⁴Nu ra Nicodemo bi 'yɛm bʉya:

—Hague dán zä dim 'bui ma'da'yo n'da gue'bu xun dạc'yɛi n'da. Ha da zä da yut' mahøn'a bu ja rá mbui rá mbe nɛ dim 'bui mahøn'a.

⁵Nu'a ra Jesús bi 'yɛ̞mp'a:

—Majuani dí xi a i, gue nu'a to'o him bim 'bui ma'da'yo nangue ra dehe nɛ rá Hogandahi Oja, hin da zä da yurpu di manda Oja. ⁶Nguetho nu'bu din xand yu ja'i, xø yu ja'itho yú t'uhni, pɛ nu'u di xand rá Hogandahi Oja, gue'u i ja rá te Oja bu ja yú mbui u. ⁷Janangue'a o gadi hyonya thoho a dí xi a i, jatho gam 'bui ma'da'yo. ⁸Nɛ tengu ran dahi i 'yo hønbu go hapu in nde, nɛ guí øde di hi, pɛ hin guí padi hapu

ní 'yɛhɛ o hapʉ ní mba. Njabʉ i øt' rá Hogandahi Oja 'bʉ bi xand mahøn'a n'da, hingam 'batho ha bin ja 'bʉ mí un ra 'da'yote, pɛ mfadi ngue i ja a, bi 'yɛn a ra Jesús.

9—Hín dí pądi 'be'a nam bøn a guí man ya, bi 'yen'a ra Nicodemo. 10 Nu ra Jesús bi 'yemp'a:

—Nu'i grá xänbate, zại guí xänba rám Hman Oją u ma mi israelhu, hanja hin guí pądi 'bɛ'a dí xi a i. ¹¹ Majuạni dí xi i, dím mangä a dí pącä, nɛ dím ma majuạni 'bɛ'a xtá nugä, pɛ hin guí hạmhbu mam hmangä. ¹² Dá xi'a rá 'bɛfi Oją i øt' ua ja ra ximhäi, pɛ hin gá 'yɛ̞c'yɛi. Pɛ dami 'yɛ̞c'yɛi a, janangue'a da zä ga xi i 'bɛ'a rán 'yomfɛni Oją, ngue 'bɛpu ní nɛqui rá 'bɛfi i øt' ua.

¹³Ne høngdä da zä ga mangä ua a, nguetho drá mengugä bu mahets'i nε bá εcä bu, guecä ngue dán ja'igä ua ja ra ximhäi. Ne njo'o man'da ra ja'i ngue bi yut mahets'i ne bá pengui ngue da mangua 'bɛ'a øt' Oją. 14 Ne tengu thoho bi 'yøt' ra Moisés, gue bi cuarpu magats'i n'da ra pozu nt'øt'e ra t'egui, nu'bu mín 'yo bu ja ra uhäi, ngutho jatho din jacä din cuarcä magats'i, guecä gue dán ją'igä ua ja ra ximhäi. 15NE nu'bu bin jacä tengu a, ne hønt'a go to'o da 'yɛc'yɛi 'bɛ'a dá tugä bu, hin da nu ran unbi mazai, pegue din ja ra 'da'yote mazai a, bi 'yɛn a ra Jesús, bi 'yɛmp'a ra Nicodemo.

Oją di hugc'u 'bucua ja ra ximhäi

16 Nguetho ɛmmɛ di huɛgahu Oją gue dí 'buhmbu ua ja ra ximhäi. Janangue'a bi 'daju rá 'dats'unt'u ngue ma yantehu, n'damhma hin da nu ran unbi mazai to'o gätho di däp rá mbui a, pɛgue din t'un ra 'da'yote mazai. ¹⁷Nguetho in nde Oja da yanju gueju dí 'buhmbu ua ja ra ximhäi, nɛ hinguin nde di 'daju rá muui ma ts'oquihu, nɛ gue'a bí mbɛnhua rá Ts'unt'u ua ja ra ximhäi a.

¹⁸Νε nu'a to'o di däp rá mbʉi a rá Ts'unt'u Oja, hin da nu a rá muui yú ts'oqui. Pε nu'a to'o hin di däp rá mbui a, pε guehma da nu a xí ts'änbi da nu nangue yú ts'oqui, nguetho hingui ec'yei a rá 'dats'unt'u Oja. ¹⁹Ne gue'a bí mben Oja ran nequi ua ja ra ximhäi, gue ní negui 'be'a di ho yu ja'i. Nu'u to di ho ra 'bexui hingui søm bu ja ran nequi, nguetho øt' ran ts'o. Mfadi xun ho din unba u. 20 Nguetho gätho u i øt' ran ts'o hin di ho ran nεqui, nε hingui søm bu ja ran nequi, ngue i su hin da hnumanho 'be'a øt'u. ²¹Pe nu yu ja'i i honi da 'yøt'a ran ho, i pa bu ja ran nequi, n'dahma da hnu gue gue'a Oją di ze u da 'yøt' ran ho.

Nu ra Xuua Nxixyą bi ma mahøn'a nangue ra Jesús

²²M'bejua dá mbähmbe ra Jesús dyú xädihe, dá mbähmbe bu ja ra häi Judea, ne dám 'buhmbe bu 'da yu pa ne dá xixyabahe yu ja'i bu. ²³Ne'a ra Xuua Nxixya mí øt' ran xixya bu Enón 'darpu ra xequi Salim, nguetho xun ngu yu mbøthe i pøpu, ²⁴ngue'bu hin ní jot'a fädi ra Xuua Nxixya.

²⁵Bin junthu 'da u yú mijudíohu u yú xädi ra Xuua, gue bi bɛni man'da di muui rán xixya i øt'a ra Jesús.
²⁶Bi zøm bu 'bä'a ra Xuua Nxixya u yú xädi buya, nɛ bi 'yɛmbi: —Xänbate i, nu'a ran 'yohu gmín 'youi bu 'danguadi ra dąthe Jordán, gue gá xije to'o a, pε nuya i øt' ran xixyą, nε gätho yu ją'i i tɛnni.

²⁷Nu ra Xuua Nxixyą buya bi 'yɛ̞mp'ʉ:

—Guesε Oja bi zänni hangu nangu ra 'bɛfi n'da ngu n'da ngue da zä da 'yøt'a n'da. ²⁸Nu'ehu guí pąhmbu 'be'a gätho dám mangä gue dá xi ahu, hinga guecä drá Cristo, pε nugä bám 'bɛt'ogä, gue dá xih yu ja'i din sä da den ra Cristo. ²⁹Tengu'bu n'da ra hmute din thati, da den'na rá ndø. Ne nu'a rá amigo a ran 'yohu bin thati, i 'bäpu i ø'a i ma, ne di johya gue i ten'na rá ndø a ra hmute. Dín jadä buya, dadín johyagä 'bu dín nu i ten yu ją'i a ra Jesús. 30 Nu'a ra Jesús jatho da daha gue nugă, pe nugă jatho ga 'becă, bi 'yɛn a ra Xuua Nxixya.

Bí 'yeh mahets'i ra Jesús

31 Nguetho nu'a ra Jesús bá ¿h mahęts'i, man'da nuįxte a xinda gue u gäthogahu. Pe nuju dám 'buhmbu nangue yu ja'i ua ja ra ximhäi, dyu menguhu ua ja ra ximhäi, ne hinga gätho da zä ga pahmbu, hønt'a 'be'a da zä da ba'a n'da ua ja ra ximhäi. Pe nu'a bá eh mahets'i man'da xun ho ngue gätho mi'da, ³²nɛ im ma 'bɛ'a bi nu bʉ ne 'be'a bi 'yørpu. Pe hingui ngu bi hyanba rám hman a. ³³Nu'a to'o bi hyanba rám hma, bi badi majuani bi man Oja ngue gue'a rá Ts'unt'u a. ³⁴Nguetho bá penh Oja a, ne guese Oją i yą 'bu i yą a, nguetho nte di 'bɛh rá Hogandahi Oja a. ³⁵Nu'a ra Ta ɛ̞mmɛ in numanho rá Ts'unt'u, janangue'a bi un ran t'edi

gätho di manda rá 'bɛfi. ³⁶Nu'a to'o i ɛ̞c'yɛi rá Ts'ʉnt'ʉ Oją ya i ja ra 'da'yote mazại, pɛ nu'a hingui ɛ̞c'yɛi rá Ts'ʉnt'ʉ Oja̞, hin da nu ra te pɛ guexta'a da nu rá cuɛ Oja̞ mi ja da nu, nɛ gätho yʉ pa mazại.

Nu ra Jesús bi 'yäp ra dehe ra xisu bu Samaria

A Nε nubʉya nu yʉ fariseo bi 'yø a man yʉ jạ'i ngue man'da xʉn ngu i tɛn ra Jesús nɛ man'da xʉn ngu di xixyąbi, xinda gue'a ra Xuua Nxixyaa. ²Pɛ nu ra Jesús him bi 'yøzɛhɛ ran xixya, pɛ høngdähe yʉ xädigähe dá øthe ran xixya. ³Nɛ nu'bʉ mi bạ'a ra Jesús 'bɛ'a mi 'yø ʉ yʉ fariseo, bi bɛni da 'uetho, ngue hin da bɛn yʉ fariseo din sʉhmi ra Xuua. Bi bøm bʉ ja ra häi Judea bʉya, nɛ dá mbähmbe mahøn'a bʉ ra häi Galilea.

⁴Pε guemhma bá thohmbe bu ja ra häi Samaria. ⁵Nε nu'bu má thohmbe bu, dá sømhbe bu ja ra hnini Sicar, mbε häntho ra xεqui bi un'a ra Jacob, bi un'na ra José rá ts'unt'u. ⁶I jabu n'da ra pozo ra dehe gue bi 'yøt'a ra Jacob maya'bu. Nε guepu bin säya ts'u ra Jesús, nguetho bi yäh ra 'yu. Mbε huxhyadi 'bu má sømhbe bu. ⁷Nε bi zøm bu n'da ra xisu ra mɛngu Samaria, da gux ra dehe. Bi 'yɛn'a ra Jesús:

—'Daqui ts'ʉ ni dehe, ga sigä ts'ʉ, bi 'yɛ̞mp'a.

⁸Nɛ gätho gähe dyʉ xädigähe xtá sohmbe bʉ ra Jesús, nɛ dá cʉthe bʉ ja ra hnini ga tämhbe 'bɛ'a gätho ga sihe.

⁹Nu'a ra xisu bi 'yɛna:

—Hanja gní zoqui nε guí äc ra dehe, nguetho nu'i grá judío, nε nugä drá mɛngu Samaria, bi 'yɛ̞mbi. Ngubu bi man ra xisu nguetho nu ma mijudíohe hinguin zomanho yu mɛngu bu Samaria. ¹⁰Nu ra Jesús bi 'yɛ̞mbi:

—Nu'bʉ xquí pą a rá mate Oją in nde di 'da'i, nɛ'bʉ xquí pąqui to'ogui gue dí ä'a ra dehe, xquí 'yäc ra dehe di un ra te, nɛ nugä xcá 'da'a 'bʉ, bi 'yɛna.

¹¹Ne nu ra xisu bi 'yena:

—Nu'i grán 'yohu, hin'yu nin juxthe, nε xun hε ua po na ra dehe. Hapu ja a ra dehe di un ra te guím ma. ¹²Pε nu mam bombøtahu ra Jacob bi zi ra dehe i po ua nε u gätho yú t'uhni nε yún dani. Nε bi zogahe ra pozo ja ua. Ha man'da ja ni ts'εdi ngue guí εna man'da xun ho ra dehe gui 'daje, bi 'yɛn'a ra xisu.

¹³Νε nu ra Jesús bi dąt'a buya:

—Hønt'a go to'o i sithe ua, gue'a nám 'bu u yu pa ja buya, pε i tuthe mahøn'a. ¹⁴Pε hønt'a go to'o da zi ra dehe dadí ungä, njam'bu din tuthe mahøn'a, pε din ja tengu n'da ra mbøthe bu mbo rá mbui njam'bu din thegue, nε gue'a nám 'buh mazai n'da a, bi 'yɛna.

¹⁵Nu'a ra xisu bi 'yɛmbi:

—Grán 'yohu, 'daqui ts'u ra dehe guím ma gue hin dan tuthe mahøn'a, nɛ hin gua ɛcä mahøn'a ua ja ra pozo ga jux ra dehe buya.

¹⁶Nu'a ra Jesús bi dąt'a:

- —Grá xisu, ní mba bá si a ni ndø.
- ¹⁷Nu'a ra xisu bi dąt'a:
- —Njo'o ma ndø, bi 'yɛntho.

Nu'a ra Jesús bi 'yɛmp'a:

—Majuani guím ma, njo'o ni ndø. ¹8 Nguetho ya hin guí 'buhmi 'da μ cut'a yun 'yohu xcán thạthu, pε nu'a guí 'buhmi ya hin ni ndøsε a. Janangue'a majuani njo'o ni ndø, bi 'yɛ̞n'a ra Jesús.

¹⁹Bi dą'a ra xisu buya:

—Nu'i grán 'yohu, masque grá pøngahyą Oją. ²⁰Xiqui ts'u 'bɛ'a ga øt'ähe, nguetho nu ma tahe mí thạnde Oją ua ja ra t'øhø, pɛ nu ahu gyu judío ahu guí εmhbu, jatho da mba n'da bu Jerusalén da dạnde Oja bu, bi 'yɛna.

²¹Nu ra Jesús buya bi 'yɛmp'a:

—Grá xisu, dami 'yec'yei a ga xi i, ε maguepu da zøn ra pa hinga hønt'ua ja ra t'øhø, xínga hønbu Jerusalén din thande ra Ta. ²²Sä guí ena guí thandehu Oja, pe hin guí thandehu tengu bi zän zehe Oją ngue din thande. Nugähe dyu judíohe dí thạndehe a bi zän Oją nguetho bi zän Oją ma t'ęc'yeihe, ne'a ra Yante bi zän'na Oja ra judío a. ²³Pɛ bi zän Oja n'da ra xɛqui bu din thande, guepu ja ní mbui n'da. Ne mi ts'utho da zøn ra ora. pε ya bi zøni, ngue da dande Oja nangue yú mbui u to majuani da dande, ne hin nangue yun t'øt'e ua ja ra ximhäi. Nguetho nu'a Oja i honi to'o da dande nangue yú mbui. ²⁴ Nguetho hin di nequi Oją. Janangue'a hønt'a go to'o da dande Oja, jatho da dande nangue rá mbui ne nangue i ten'na ram hma majuani, bi 'yɛn'a ra Jesús.

²⁵Nu'a ra xisu buya bi 'yɛmbi:

—Dí pạcä ba ε a rá Thahni Oją ngue ra Cristo a. Nε nu'bʉ bá εhε da xängahʉ xʉn ho gätho.

²⁶Nu'a ra Jesús bi 'yɛ̞mbi:

—Guecä drá Cristogä dín zo'a i ya, bi 'yɛmbi.

²⁷Nu'bʉ mí gua'a bi man ra Jesús, ε xø dí sømhbe bʉ dyʉ xädigähe.

Ne dá hyonya thohohe gue nu ra Jesús mi yaui a ra xisu. Pe xínga n'dagähe gue dá änhde hanja bin yaui o 'be'a bin xifi. ²⁸Nu ra xisu buya 'bex bi zopu rá mbamhmi, ne bi mba bu hnini bi xih yu ja'i:

²⁹—Mbähä nɛ gua nuhʉ n'da ran 'yohʉ bi xicä gätho 'bɛ'a xtá øt'ä. Ha hinga gue'a ra Cristo 'bʉ, bi 'yɛ̞mp'ʉ.

³⁰Bi mba yʉ jạ'i bʉya da zøm bʉ 'bä a ra Jesús. ³¹Pε nu'bʉ hin ni zøm bʉ yʉ jạ'i, nugähe dá xihmbe ra Jesús:

—Xänbate i, xi'bu gan sihmε ya, dá εmfe.

32 Pe bi dą'a ra Jesús, ne bi 'yęnje:
—Ja man'da ní niyą ma mbuigä,
pe hinga ná pąhmbu, bi 'yęnje.

³³Dán 'yänzehehe:

—Ha 'bʉi to'o bi 'uini, dán 'yɛmfe bʉya dyʉ xädigähe.

³⁴Nu'a ra Jesús bi 'yɛ̞nje:

—Tengu'bu man ts'ihmegä a ngue ga øt'ä rá pähä a bá pengä ne ga juacä rá 'bɛfi a. Nɛ gue'a man'da ní niya ma mbuigä a. 35 Janangue'a gue'a dí xi ahu a ya, nguetho ya ba şhnu yu ja'i. Ne ha guí şmhbu di 'beh man goho zana din ja ran sofo. Pε dami hyanthu yu ba ɛhnu, tengu'bu n'da ra huahi ya xu 'yot'i gue da mba nsoqui, nguetho 'bexque da zä ga cuthu bu di manda Oją yu. 36 Ne nu'u to i pa ma cu't'i bu din zam bu hønt'bu go njam'bu. Janangue'a nu'u to da xoqui di johya, nε nu'u to bi duhu ne'u bi xoqui 'da dán johya thoho. ³⁷Nguetho majuani rán theui rá 'bɛfi Oją a bi 'yøt'a n'da ra ją'i, "bi zopu rá huahi bi duhu, ne n'dan'yo bi xoqui," ngue i man yu ja'i. 38 Ya

xtá xi ahu gui xoju hapu hin gá tuhmbu, xín gá uafu, pɛ n'dan'yo bi 'yøt' ra 'bɛfi bu, pɛ guehma gui comhbu 'bɛ'a da da u, bi 'yɛngähe ra Jesús.

39 Nɛ nu'bu mí mam bu ja ra hnini ra xisu, xun ngu yú mɛnguhu bi 'yɛ̞c'yɛi gue ra Cristo a ra Jesús, nguetho bi man'a ra xisu gue xí xi a ra Jesús gätho 'bɛ'a xí 'yøt'e.

40 Nu'bu mí zøm bu yu mɛngu Samaria bu 'bäh ra Jesús, bi 'yɛ̞n'u:
—Dami 'bucua ja ma hninihe, bi t'ɛ̞mp'a ra Jesús.

Ne dán dehe bu nyopa buya. 41 Ne emme man'da xun ngu bi 'yec'yei yu ja'i bu, nangue rám hmanse ra Jesús. 42 Bi t'emp'a ra xisu buya:

—Ya dí εc'yεihe ya, pε hinga hønt'a gá xije ná εc'yεigähe ya, pε nε'a dá øsεhe bi man na ra Jesús. Nε dí pąhmbe majuąni ra Cristo na, rám pørpate yu ją'i 'bucua ja ra ximhäi, bi 'yεn'u yu ją'i.

Ná mbähmbe Galilea a ra Jesús

43 Nu'bu mí gua'a nyopa dá pømhbe bu ra hnini Sicar, dá haxhe ra 'yu mahøn'a ní mba bu Galilea. 44 Nɛ bi mansɛ ra Jesús, nubu rá häi zɛhɛ n'da ra pøngahya hin da hnumansu bu. 45 Pɛ nu'bu má sømhbe bu ra häi Galilea, bi numanho ma mɛnguhe bu. Nguetho xí nu yun t'øt'e nuixte bi 'yøt'a ra Jesús bu Jerusalén 'bu mín ja ra dampɛti ran dabaxjua, ngue nɛ'u xí mba bu u.

Bi yan rá ts'unt'u rám fäts'iui ra ts'ut'abi

⁴⁶Nε dá mbähmbe ra Jesús mahøn'a bʉ ra hnini Caná ra häi Galilea, guepu xí päh ra dehe bin gui'uva. Nɛ mí 'bupu n'da rám fäts'iui ra ts'ut'abi xun u rá ts'unt'u, nɛ i 'bɛm bu ja rán oi nubu ja ra hnini Capernaum. ⁴⁷ Nu'bu mí 'yøde gue bi zøh mahøn'a bu ra häi Galilea ra Jesús nɛ i 'bupu ra hnini Caná, nɛ bá ɛpu 'buh ra Jesús buya, bi 'yørpa ra ts'ɛdi da zixpu Capernaum bu ná 'bɛn a rá ts'unt'u, da xospi nguetho nde da du a. ⁴⁸ Nɛ bi da a ra Jesús:

—Pε ha jatho m'bεt'o guin nuhu yu hmεpya nε yun t'øt'e nuixte, ja gui 'yε̞c'yεigahu buya.

⁴⁹Pε man'da i humbi sits'i, nε bi 'yεmbi:

—Pε mbεhma ts'ʉ cuø, xøhma da du ma t'ʉhnigä.

⁵⁰Nε bi dat'a ra Jesús:

—Ní mba bá nu, nguetho hin da du ni t'uhni.

Ne nubuya bi 'yec'yei a rám hman a ra Jesús, ne bi mba buya. ⁵¹Ne bá thạ u 'da yú 'yehe 'bu mím mba bu 'yu bi xifi:

—Bi zä ni ts'unt'u ya, ɛn'u.

⁵²Νε bi 'yänni:

—'Bε'a ma ora bi zä.

Nε bi t'ɛmbi:

—N'dande mande bi bøn ra pa, bi 'yɛ̞n'ʉ.

53 Ne 'bex bi ba'a rá ta gue gue'a ra ora mín yaui ra Jesús 'bu mí 'yɛmbi da yan a rá ts'unt'u. Janangue'a nu'a ran 'yohu bi däp rá mbui ra Jesús buya, ne'u gätho mi'da 'bupu rá ngu.

54 Guehna bi 'yøt' ra Jesús 'bʉ mambá penje bʉ Judea dá sømhbe bʉ Galilea. Ya ná yondị ra hmεpya bi 'yørpʉ ja ra häi Galilea.

Bi yan ran 'yohu bu Betesda

M'bεjua buya bin ja man'da **T** ra dampeti ma mijudíohe. Ne dá mbähmbe ra Jesús bu Jerusalén. ²Nubu Jerusalén mí po bu n'da ra mbothe mbε häntho bu ja rá goxthi yu dε'yo, gue ma ndehe dyu judíohe dí ¿mfe Betesda. Ne jabu cut'a yu 'døzangu midí mbä'ts'a ra dehe. ³Ne xun ngu i 'bom bu yu mbedi, 'da u yu xädä ne u yu dogua ne u bi ts'a yú ja'i. Ne gätho u i tø'mi di 'yan ra dehe. ⁴Nguetho ja'bu bí ɛh mahɛts'i n'da rám 'bɛhni Oja nɛ i an ra dehe. Nε nu'bu xun nu di 'yan ra dehe, nε nu'a rá mbudi da yupu ja ra dehe din ho a rá mbedi i ja. ⁵Ne mí 'bem bu n'da ran 'yohu, ya ná 'däte ma 'de'ma hyato njeya madí ts'a rá ja'i, him mi sä din 'yo. 6Nε nu'bu min nu a ra Jesús, nε bi badi nya'a thoho mi hembi, bi 'yembi:

—Ha guín nde xtán ho i, bi 'yɛmp'a.

⁷Bi dąt'a ra mbɛdi:

—Dín ndehma thạ, n'yø, pε njongui 'bucua da zixcä nu ja ra dehe. N'dandį ngu n'dandį dí εna ga cuhnu ja ra dehe, 'bex go i 'bεt'o u 'da.

⁸Bi 'yɛmp'a ra Jesús buya:

—Dami ndants'i jʉx ni fidi nε gan 'yo, bi 'yɛ̞mbi.

⁹'Bex bin hoh rá ją'i 'bu mí ndants'i, ne bi gax rá fidi ne bin 'yo. Ne nu'a gue'a ra pa ran ts'äya a.
¹⁰Nu'u 'da ma mijudíohe bi 'yemp'a ran 'yohu xín hoh rá ja'i:

—Nuya ra pa ran ts'äya ya, hingui sä gui cax ni fidi, bi t'ɛmp'a.

¹¹Bi dą'a ran 'yohʉ:

—Pε nu'a bi hoga ma ja'i, gue'a bi xiqui nguetho bi 'yɛngui: "Dami ndants'i gui cax ni fidi ne gan 'yo," bi 'yɛngui, bi 'yɛn'a mí ts'a rá ja'i.

¹²Nε nu'ʉ 'da ma mijudíohe bi 'yänni:

—To'o nín 'yohu bi xi i gui cax ni fidi ne gan 'yo, bi 'yɛn'u.

¹³Pε nu'a him mi pądi to'o xí hocpa rá ją'i, nguetho nu ra Jesús bi yut'inde bu 'yo yu ją'i xun ngu.

¹⁴M'bεjua bi mba ra Jesús bu ja ra danija. Nε nu'bu mi din'a ran 'yohu buya, bi 'yɛmbi:

—Bin ho a ya, nde'bu hin gmi 'yøt' mi'da yu ts'oqui. Man'da ts'ɛdi ran unbi guin nu 'bu gui 'yøt' mi'da yu ts'oqui, bi 'yɛmbi.

15 Bex bi mba a ran 'yohu buya, da xi u ma mijudíohe xí 'yänni, gue gue'a ra Jesús bi hoqui.
16 Janangue'a bi dup'u ma ngurpihe dyu judíohe di ucpa ra Jesús, nɛ im bɛni da hyo. Nguetho ɛn'u: "I øt' rá 'bɛfi a ra pa ran ts'äya." 17 Pɛ nu ra Jesús bi 'yɛmp'u:

—Nząi dim pεh ma Ta, janangue'a nεcä jatho dam pεcä, bi 'yɛmp'ʉ.

18Pɛ nanguehna bi man ra Jesús, nu'u ma ngurpihe buya man'da bi bɛni da hyo, nguetho hinga hønt'a bim pɛfi ra pa ran ts'äya í ucpi, pɛ nɛ'a í ma gue gue'a Oja rá Ta, nam bøni 'da i guui Oja.

I ja rá ts'edi rá Ts'unt'u Oją

¹⁹ Janangue'a nu ra Jesús bi 'yɛ̞na:

—Majuani dí xi ahu, nte sä ga øzehegä pe hønt'a 'be'a dín nu øt' ma Ta. Ne gätho 'be'a i øt' ma Ta, gue'a dí øt'ä a. ²⁰ Nguetho nu ma Ta emme in numanhogui ngue rá Ts'unt'ugä a, ne i urqui 'be'a

gätho i øt'e. Nɛ da 'yurcä mi'da yun t'øt'e man'da nujxte xinda gue u gán nuhu, ne gui hyonya thohohu. 21 Nguetho tengu ma Ta i xox'u xun du nε di un ra te mahøn'a, nguthogä, rá Ts'unt'ugä a, dadí un ra te mahøn'a u to'o gätho dín nde ga unni. ²²Nɛ nu ma Ta hingui juanbatese, pe bi 'dacä ra ts'edi go dan juanbategä rá Ts'unt'ugä a. 23 Nguetho in nde ma Ta gätho yu ja'i da numansugui gue rá Ts'unt'ugä a, tengutho ma Ta i hnumansu. Nu'bu 'bu a n'da hingui numansugui, xinga gue ma Ta i numansu a, gue gue'a bá pengä.

²⁴Majuani dí xi ahu, nu'a øh mam hmangä ne i ec'yei ma Ta bá pengä, gue'a i ja ra 'da'yote mazai a. Nε hin da nu rá muui rá ts'oqui ρε tengutho 'bu xí thambeni bu 'bu u xun du, nguetho ya i ja ra 'da'yote mazai a. ²⁵Majuani dí xi ahu, ya bi zøn ra ora da 'yøh mam hmangä u xun du nangue yú mbui, pegue din t'un ra 'da'yote 'bu da 'yømanho mam hmangä rá Ts'unt'u Ojagä. ²⁶Nguetho tengu ra Ta i jase ra te rá mbui, ne bi 'dacä ra ts'edi din jase ra te ma mbuigă, ne gue'a ra 'da'yote dí un yu ja'i. ²⁷Ne bi 'dac ra ts'edi dan juanbategä, nguetho dán ja'igä ua ja ra ximhäi, dí padi 'bɛ'a i sä n'da. ²⁸O gadi hyonya thohohu a dá xi ahu, nguetho da zøn ra ora gätho yu ją'i xu t'ägui da 'yøh ma nde 'bu dá zohni. ²⁹Nɛ da bøx'ʉ bi 'yøt' ran ho, din ja ra 'da'yote mazai. Ne da bøx'ʉ bi 'yøt' ran ts'o, da nu ran unbi mazai.

Di dä majuani nangue ra Jesús

³⁰Νε man'da bi man'a ra Jesús, bi 'yεna:

—Nugä hin te dím mangä nangue man 'yomfɛnisɛ. Pɛ nu'a i xic ma Ta gue'a dím mangä a. Nɛ'a 'bɛ'a dí sändä, xun ho a, nguetho him ma pähä zɛhɛ dí honi ga øt'ä, pɛ hønt'a rá pähä ma Ta bá pɛngä. ³¹Nu'bu høngdä xcá däsɛ majuani gue i ja ma ts'ɛdi, nte di muui a mam hmangä 'bu. ³²Pɛ nɛ a ma Ta di dä majuani ngue rá Ts'unt'ugä a, nɛ dí pacä ngue majuani im ma 'bu im ma nanguecä.

33 Nu ahu gá penhdu 'da da 'yän'na ra Xuua Nxixyą nanguecä. Nε nu'a ra Xuua bi ma majuani a. 34 Ne madague'bu hin xtí dä majuani, pe guemhma ja ma ts'edigä. Pe dadí ben'nahu a bi man ra Xuua Nxixyą ngue man'da da zä gui 'yɛc'yɛigahu nɛ gan yamhbu buya. 35 Νε tengu ra sibi di hyät'i nε i fät yu zu'uε, bin ja bu ra Xuua Nxixyą, gá numanhohu 'da yu pa. ³⁶Nε nu'a ra Xuua Nxixyą bi ma nanguecä. Pe i ja 'be'a gue man'da i udi nanguecä xinda gue'a rám hman ra Xuua, ne gue'a ra 'befi bi 'dacä ma Ta gue ga juacä. Nɛ gue'a ε xø i uh majuąni bá pεngä ma Ta. ³⁷Ne'a ma Ta gue'a bá pengä, di dä majuani nanguecä, pε nu'ahu njam'bu gá 'yømanhohu 'bu mín ya, xín gá 'yørpahu ra güenda 'bu mín 'yuse.

³⁸Mfądi hin gá hyąmhbu rám hma bu ja ni mbuihu, nguetho nu'bu xquí hyąmhbu a, xquí 'yṣc'yɛigahu gue bá pɛngä a. ³⁹Nu ahu thocpa thoho guidín xähmbu yú søcuą Oją, nguetho guí ɛmhbu gue'a gní timhbu ra te mazai a. Pɛ nu'u gätho yu søcua guidín xähmbu gätho im ma nanguecä. ⁴⁰Nu ahu hin guín nde gui xiju gan yạn'na ni tehu, pɛ hinda hønt'bu gui xiju gan yạn ahu din ja ahu ra te mazại 'bu, bi 'yɛn a ra Jesús.

⁴¹Ne xø bi 'yena:

--Pε madague'bu njon da numansugui, pε guexta'a rá Ts'unt'ugä Oją. 42 Pε dí pądi hanja hin guí pąju, nguetho hín guín numansuhu Oja nangue ni mbuihu. ⁴³Bá ɛcä nangue rá thuhu ma Ta, pε nu'ehu hin guín numanhoju. Pε nu'bu ba ε a n'da nangue rá thuhu zehe, man'da guín numanhohu a. ⁴⁴Njam'bu da zä gui 'yɛc'yɛigahu, nguetho guí homhbu da numanho ahu yu ja'i, ne hin guí homhbu da numanho ahu Oja ngue hønt'a i 'bui. 45 Ha guí ɛmhbu guecä ga yap'ahu bu 'buh ma Ta. Pε dí xi ahu gue gue'u yúm hman ra Moisés gue'u dí nequi i ja ni ts'oquihu u, pe sä guím bemhbu gue'u dí yan'ahu u. 46 Pe nu'bu xquí 'yec'yeihu yum hma bi 'yo't' ra Moisés, xquí 'yɛc'yɛigahu ya, nguetho bi ma nanguecä. 47 Pε hin guí ες'yεihu 'bɛ'a bi 'yo't' ra Moisés, janangue'a xín guí ¿c'yeihu 'be'a dí mangä ya, bi 'yɛn'a ra Jesús 'bu min yahu ma ngurpihe dyu judíohe.

Ra Jesús bi 'uin u cut'a mahuahi

6 Nɛ nu'bʉ mí tho i 'da yʉ pa, m'bɛjua bʉya, dá mbähmbe ra Jesús bʉ 'danguadi ra dądehe Galilea, n'dat'a ra dądehe Tiberias.

2Nɛ xʉn ngu yʉ jạ'i bi dɛngähe nguetho bi nu yʉn t'øt'e nuixte bi 'yøt'a ra Jesús nangue ʉ mín zäman'ʉ.

3Nɛ dá mbähmbe ra Jesús bʉ ja n'da ra nyuni, nɛ dá huhmbe bʉ.

4Nɛ nu'ਚ yʉ pa ʉ mí ts'ʉtho da

zøn ra pa ga øt'ähe ra dampeti ran dabaxjua, dyu judíohe. ⁵Ne nu'a ra Jesús bin hanni ne bi hyandi xun ngu yu ja'i ba epu. Nu'a ra Jesús bi 'yemp'a ra Felipe buya:

—'Bɛpʉ dí zä ga tämhbʉ 'bɛ'a da zi yʉ ba ɛhnʉ.

⁶Gue'a bi man ra Jesús nguetho in nde da bądi 'bε'a dí dąt'a a ra Felipe. Pε nu ra Jesús mí pąsε 'bε'a da 'yøzεhε. ⁷Νε bi dąt'a ra Felipe:

—Pε hin dí gua'ʉ yʉ mahuahi tho dá tämhbʉ a da zi yʉ ba εhnʉ 'bʉ di ja, madague'bʉ zʉ ts'ʉtho din t'unni n'da ngu n'da, bi 'yɛna.

8,9 Nɛ nubuya nu'a man'da ma mixädihe ra Andrés, rán 'yohu ra Simón Pedro, bi xi a ra Jesús:

—'Bucua n'da ra ts'unt'u i ha zu ts'u rán zεdi, gue cut'a yu hmε ra cebada, nε yoho yu t'uhua. Pε hin dí gua'u yu ja'i nguetho xun ngu u, bi 'yɛn'a ra Andrés.

¹⁰Νε bi 'yɛ̞ngdahe ra Jesús:

—Jafu din säya yu ja'i, bi 'yɛna. Nguetho mi ja bu ra 'bot'ɛi. Nɛ bi hyupu häi buya, nɛ mí jua i cut'a mahuahi u yun 'yohu. ¹¹Nɛ nu'a ra Jesús bi hyan'a ra hmɛ, nɛ bi 'yäp rán japi Oja nangue ra hmɛ nɛ bi 'daje yú xädigähe. Nɛ nugähe dá darpähe u yu ja'i buya, nɛ u yu hua, nɛ bin niya gätho yu ja'i. ¹²Nɛ nu'bu mín niya yu ja'i, nu ra Jesús bi xicähe:

—Pethu u gätho 'be'a bi bongui, gue nte dim 'bedi, bi 'yenje.

¹³Nɛ nu'bu má pɛthe buya bi yu u gätho 'dɛ'ma yoho ma 'bøts'ehe yu xɛqui, 'bu mín niya yu ja'i nangue cut'a yu hmɛ. ¹⁴Nu'bu mín nu ran t'øt'e nuixte u gue bi 'yøt'a ra Jesús, bi 'vɛn'u buya:

—Masque majuani guehna ra pøngahya mí hma da zøcua ja ra ximhäi, bi 'yɛ̞n ʉ.

¹⁵Pε nu'a ra Jesús bi bądi 'bε'a mbɛn u yu ją'i ngue nde da bɛnt'i, im bɛnbi din ts'ut'abi. Janangue'a bi zoh yu ją'i buya, bi mbasɛ, nɛ man'da bi guam bu ja ra dapo.

Ra Jesús bin 'yo maxøts'e ra dehe

¹⁶Nu'bʉ mín de bʉya dá mbäsɛhe bʉ ja ra dądehe. ¹⁷Nɛ dá hux ma mbosahe, gue ga sømhbe bʉ ja ra hnini Capernaum. Nɛ hin ná nuthe ra Jesús 'bʉ mí zʉje ra 'bɛxui. ¹⁸Nɛ nts'ɛdi bi 'yɛn ran dạhi a ra dehe bʉya. ¹⁹Nu'bʉ mí dạn i ts'ʉ ra mbosa mí huxhe nɛ dá sømhbe made ra dądehe, dá nuhe ba ɛ̞pʉ ra Jesús, ba 'yo maxøts'e ra dehe, ní 'yɛ̞pʉ ja a ra mbosa mí huxhe. Nɛ ɛ̞mmɛ dá suhe nguetho him min nuhe xʉn ho, him mi pąhmbe ngue gue'a ra Jesús. ²⁰Nu ra Jesús bi 'yɛ̞nje:

—Guecä, o guín suhu.

²¹Nɛ bi hyu ma mbuihe, nɛ dá xihmbe a ra Jesús da hyuxpu ja ra mbosa. Nɛ ɛna ya xmí 'bähmbe bu ndenthe ná mbähmbe buya nubu ra hnini Capernaum.

Bi thon'a ra Jesús

²²Nu'bu mí nɛc puya, nu'u yu ja'i 'bupu hapu xí 'uin a ra Jesús, bi bɛm buya gue hønt'a n'da ra mbosa mí høpu a ran de dán sihmehe, nɛ hin dá mbähmbe ra Jesús 'bu má huhe ra mbosa, pɛ dá mbäsehe.

²³Pɛgue m'bɛjua thoho bi zøm bu mi'da yu mbosa bí nɛxpu Tiberias, nɛ bi zøm bu jom bu dán sihmehe 'bu mí 'yäp rán japi Oja ra Jesús.

²⁴Nɛ nu'ʉ yʉ jạ'i 'bʉ mí hyon'a ra Jesús nɛ him bi dim bʉ, xínga guecähe, bi hyux'ʉ mi'da yʉ mbosa bʉya nɛ bi zøm bʉ ja ra hnini Capernaum, i hon a ra Jesús.

Ra Jesús ra hmε dám 'bʉh mazại n'da a

²⁵Nɛ nu'ʉ yʉ ją'i 'bʉ mí dim bʉ ra Jesús bʉ 'danguadi ra dądehe, bi 'yänni:

—Mán jam'bu gá søcua, bi 'ygmp'u.

²⁶Nu'a ra Jesús bi 'yɛ̞mp'ʉ:

—Majuani dí xi ahu, hin gní hyonju gue gui pahmbu a ran t'uti dá ut'ahu, pε nu'a guín niyahu 'bu gmín sihmεhu gue'a gní hyonju a. ²⁷ Pε dami 'yɛs'hu ngue hønt'a gní hyomhbu ra hmε nám 'buhmbu yu pa ja buya. Pε m'bεt'o thoho dami hyomhbu a ra hmε nám 'buh mazai n'da a gue ga 'da ahu, guecä dán ja'igä ua ja ra ximhäi. Nguetho gue'a ran t'ɛdi bi 'dac Oja ma Ta, bi 'yɛna.

²⁸Nu yʉ jạ'i bʉya bi 'yän'na ra Jesús nɛ bi 'yɛ̞mbi:

—'Bɛ'a sä ga øt'ähe gue ga timhbe a guím ma, bi 'yɛ̞n'ʉ.

²⁹Nu'a ra Jesús bi dądi:

—Nu'a in nde Oją gui 'yøthu gui sinju bu ni mbuihu, guecä bá pɛngä Oja, bi 'yɛna.

³⁰Νε bi t'εmp'a ra Jesús:

—'Bε'a ní hmɛpya gui 'yurcähe, ngue da zä ga sin ahe bu ma mbuihe. Ha da zä gui 'yøt'e tengu bi 'yøt'a ra Moisés. ³¹Nguetho nu'u mam bombøtahu bi zi ra maná 'bu mí 'yo bu ja ra uhäi, tengu mán t'o't'i bu ja rá søcua Oja, i εna: "Nu'a ra Moisés, bi un yu ja'i ra hmε

bí 'yɛh mahɛts'i," i ɛna, bi 'yɛn'ʉ yʉ ją'i.

³²Nu'a ra Jesús bi 'yɛ̞mp'ʉ:

—Majuani dí xi ahu, hinga gue'a ra Moisés bi un'a ra hmε bí 'yɛh mahɛts'i, pε Oja bi un a. Nε hinga gue'a ra hmε nám 'buh mazai n'da a ra maná mi si u. Pε nuya, nu ma Ta di un a njuantho ra hmε mahɛts'i gue nám 'buh mazai n'da a. ³³Nε nu'a njuantho ra hmε di un Oja, bí 'yɛh mahɛts'i a, gue dám 'buh mazai u yu ja'i 'bucua ja ra ximhäi, bi 'yɛna.

³⁴Nε bi 'yɛn'ʉ:

—'Daje thocpa thoho a ra hmɛ guím ma, n'yø.

35 Nu'a ra Jesús bi 'yɛmp'u:

—Guecä drá hmε dám'buh mazai n'da a. Nu'a to'o da zingä bu ja yú mbui tengu'bu i sihme, ne njam'bu din tumanthuhu yú mbui ne xín din tuthe buya. 36 Pe tengu dá xi ahu, hin guí ɛc'yɛigahu, madague'bu gá nuhu 'be'a dá øt'ä. 37 Pe nu'u to'o bi 'dacä ma Ta, gue'u di däcä yú mbui u. Ne nu'u di däc yú mbui, njon ga embi hin da zä ga sini. 38 Nguetho bá ęcä mahets'i ngue ga øt' rá pähä a bá pengä, ne him bá ęcä ga øt' ma pähä zehe. 39 Nu'a rá pähä ma Ta bá pengä, gue'a nte ga 'bɛcä gätho bi 'dacä, pɛ ga xoxä u 'bu rán zegui ra pa, ne dim 'bui mazai. 40 Nu rá pähä ma Ta, gue hønt'a go to'o da bądi rá Ts'unt'ugä Oją, nε da 'yεc'yεigui, din ja ra te mazai u. Janangue'a ga xoxä u 'bu rán zegui ra pa, bi 'yen'a ra Jesús.

⁴¹Nε bi mbudi bi ucpa a ra Jesús u ma mijudíohe 'bu mí 'yø a bi ma, gue bi 'yɛna: "Nugä drá hmε majuani gue bá cah mahɛts'i." ⁴²Nε bin 'yɛmzɛhɛ u: —Ha hinga guehna ra Jesús, rá ts'unt'u ra José na, rá ta nɛ rá mbe dí pahmbu. Hanja ní 'yɛna bí 'yɛh mahɛ̞ts'i, bi 'yɛn u.

43 Nɛ nu ra Jesús bi 'yɛmp'u buya:

—O gadí c'aman'uju n'da ngu n'da ahu. 44 Xínga n'da sä da dengui 'bu hin di un ra pähä a ma Ta, gue'a bá pengä, ne ga xoxä 'bu rán zegui ra pa u, ga undä ra te mazai. 45 Tengu mán t'o't'i bu ja yú søcua yú pøngahya Oja, bi 'yɛna: "Gätho yu ja'i da xänba Oja," bi 'yɛn'u. Janangue'a nu'u to'o gätho bi hyani xun ho a bi xänba Oja, ne gue'u di däc yú mbui u.

⁴⁶Pε hin dí εna 'bo'o xun nu Oją, hinda høngdä gue bá nexä bu, dín nugä a. 47 Majuąni dí xi ahu, nu'a to'o ęc'yeigui i ja ra 'da'yote mazai a. 48 Nugä drá hmɛ majuani gue nám 'buh mazai n'da. 49 Nu'u mam bombøtahu bi zi ra maná bí 'yɛh mahɛts'i 'bu min 'yo bu ja ra uhäi, pε guehma bi du u. 50 Pε nugä drá hme majuani, bá nexä bu mahets'i, gue sä da zin'a n'da tengu'bu i sihme, ne njam'bu da du. ⁵¹ Nugä drá hme majuani, bá ecä mahets'i, tengu ra hmɛ i si n'da i ja rán zaqui yu pa i ja bu ya. Pe nu'a ra hme dím mangä, din ja ran zaqui mazai to da zi. Ne gue'a ma ja'igä a gue ga uni, ngue din ja ra 'da'yote u 'bucua ja ra ximhäi, bi 'yɛn'a ra Jesús.

⁵²Bin junzεhε ʉ ma mijudíohe bʉya, bin 'yɛ̞mzεhε ʉ:

—Hague nja ran 'yohʉ sä di 'dajʉ rá ją'i ga sahʉ, bin 'yɛ̞mp'ʉ.

⁵³Nε nu ra Jesús bi dąt'u:

—Majuani dí xi ahu, nu'bu hin gui sihu ma ngoc'yei ne ma ji, guecä dán ja'igä ua ja ra ximhäi, hin'yu

mbo ni mbʉihʉ ra 'da'yote mazai. ⁵⁴Nu'a to'o da za ma ngøc'yɛi nɛ da zi ma ji, i ja ra 'da'yote maząi, ne ga xox 'bʉ rán zɛgui ra pa. ⁵⁵Nguetho nu ma ngøc'yɛi nɛ ma ji njuantho ran ts'ihmɛ ngue dám 'bʉh mazại n'da. ⁵⁶Nu'a to'o da za ma ngøc'yɛi nε da zi ma ji dí ząm bu ja yú mbui, ne i ja ra te nanguecä. 57 Tengu thoho dí øt'be ma Ta, nu'a i jase rá te, ne i jagä ra te nangue'a buya. Nε bá pεngä gue ga thocpa a ra te u to da zingä, tengu'bu i sagä. ⁵⁸Nuna ra hmɛ dí xi ahʉ gue bá cạh mahɛts'i, hinga ngu a bi zi mam bombøtahu, nguetho bi du u. Pe nu'a to'o da zi ra hmɛ dím mangä ya, gue'a dím 'buh mazai a, bi 'ven'a ra Jesús.

⁵⁹Ne guehna ram hma bi man'a ra Jesús 'bu mín xänbate bu ja ra niją bu Capernaum.

Yum hma di un ra 'da'yote mazai

60 Nu'bu mí gua'a bi man ra Jesús, bi 'yɛn'u mí tɛnni:

—Hingui ho a bi xiju nu ya, to'o da hyät'i da 'yøde, xun ngu u bi 'yɛna.

61 Nu ra Jesús bi bądi 'bε'a bi bɛn'ʉ yʉ ją'i, gue him bi numanho rám hma, nɛ bi 'yɛmp'ʉ:

—Ha guím bɛmhbu hingui ho a dá xi ahu. 62'Bɛ'a guim bɛmhbu 'bu gá nuju ga texä bu mahɛts'i guepu bá nɛxä, guecä dán ja'igä ua ja ra ximhäi. 63Pɛ nu'a nam bøn'u yum hma dá xi ahu, hingan juantho gui saju, pɛ gui 'yɛc'yɛihu ngue ga un ma te nangue ahu, nɛ din ja ahu ra te buya. 64Pɛ 'bu i 'da ahu hin guí ɛc'yɛigahu, bi 'yɛn'a ra Jesús.

Nguetho xmí pądi to'o hin da 'yεc'yεi, nε xmí pądi to'o di dä a. ⁶⁵Νε bi 'yεmp'ʉ mahøn'a:

—Janangue'a dá xi ahu, hingui sä n'da ra ja'i ba ɛhɛ da dɛngui 'bu him bi jap'a ma Ta bi däc rá mbui.

66 Nu'bu mí 'yøh mahøn'a u mí tɛnni, xun ngu bi 'ue u nɛ him bin 'yohu mahøn'a. 67 Janangue'a nu ra Jesús bi 'yängahe dí 'dɛ'mayohogähe:

—Ha nε ahʉ gui sogahʉ, bi 'yɛnje. ⁶⁸Nu ra Simón Pedro bi dat'a:

—Ma Hmu i, pε njo'o man'da da zä ga tɛnhde nguetho nu'i ja nim hma di un ra 'da'yote mazại. ⁶⁹Nε nugähe dí εc'yεi ahe nε dí pąhmbe gue gue'e grá Cristo rá Ts'ʉnt'ʉ i Oją i 'bʉi, bi 'yɛ̞na.

70 Bi dą'a ra Jesús:

—Nugä xtá huan'nahu guí 'dɛ'mayohohu, pɛ nu'a n'da ahu i tɛn ra zithu, bi 'yɛ̞nje.

7¹Pɛ nu'a bi man ra Jesús, gue'a ra Judas a, rá ts'unt'u ra Simón Iscariote, nguetho gue'a di dä a. Nɛ gue'a n'da mín 'yohe a, mí 'dɛ'mayohogähe.

Hingui ɛ̞c'yɛi yʉ́n 'yohʉzɛhɛ a ra Jesús

M'bejua buya, bin 'yo bu mi'da yu hnini bu Galilea. Him bi nde bi mba bu ja ra xequi Judea, nguetho nu ma ngurpihe dyu judíohe, dyu israelhe, nde xtá hyo bu. ²Ne ma guepu da dät ra pa ngue zai dim peti ma mijudíohe, 'bu xu hyøh yu t'ungu, im beni 'be'a bi 'yørpa Oja u mam bombøtahe 'bu min 'yo bu ja ra uhäi. ³Nu yún 'yohu a ra Jesús bi 'yembi:

—Nde'bu gui pøngua ní mba bu ja ra xɛqui Judea, ba nu a bu i tɛn'ni i nangue'a guí øt'e. ⁴Nguetho njo'o to da 'yạh rá 'bɛfi 'bu in nde da t'ɛspi. Nu'bu majuani guí øt' yun t'øt'e nuixte bá ut yu ja'i, nɛ gätho ra ximhäi da ba'a i, bi t'ɛmp'a ra Jesús.

⁵Ngubu bi xih yun 'yohu nguetho him mi ec'yei u. ⁶Nu a ra Jesús bi 'yemp'u buya:

—Hinga na søn ra ora bi ts'ängä ga mbagä bu, pε nu'ahu hønt'a go 'bε'a má ora da zä gui mbähä bu. ⁷Nu'u 'bucua ja ra ximhäi hin di uc'ahu nguetho 'da i gu guí øthu u, pε go di ugä u nguetho dím mangä gue hingui ho øt'u. ⁸Ní mbäsɛhu 'bu guín ndehu, nugä hin ga mba ya nguetho hinga na søn ra ora ga mba bu, bi 'yɛna.

⁹Nu'bʉ mí gua'a bi man bʉya bim 'bʉt pʉ mi'da yʉ pa bʉ ra xɛqui Galilea.

Bin xänbate ra Jesús bu ja ra dampeti

¹⁰Nu'bu mí mba bu Jerusalén u yún 'yohu, m'bejua bi mba bu ra Jesús. Mbε bin 'yantho nguetho bi nde him 'bexque da hnu. ¹¹Nε nu ma ngurpihe dyu judíohe i 'bupu, bi hyon'a ra Jesús bu ja ram pεti. Nε bin 'yɛ̞m zɛhɛ u:

—Hapu i 'bui 'bu, bin 'yɛmp'u.

12 Nɛ xun ngu yu ja'i bin yanjo'dre
nangue'a ra Jesús, nu'u 'da im ma
ngue xun ho a, nɛ nu'u 'da i ɛna:

"Häte a."

13Pe xinga n'da bin ya ts'edi nangue'a ra Jesús nguetho i su ma ngurpihe 'bupu. ¹⁴Nu'bu mí tho'i ts'u yu pa, ya bi zo i nde yum peti i t'ørpu, ja bi mba bu ja ra danija ra Jesús buya nε bin xänbate bu. ¹⁵Nε nu ma ngurpihe bu ja ra nija bi hyonya thoho nε bi 'yɛn'u:

—Hague nja i sä da ma xun ho rám hman Oją na ran 'yohu, nε him bi zu'a man xädihu, bin 'yɛ̞m zɛhɛ u.

¹⁶Bi da a ra Jesús:

—Nu'a man xädigä him mam hmansegä a pegue rám hman a to bá pengä. ¹⁷Nu'bu 'bu a n'da gue nde da 'yøt' rá pähä Oją, da bą 'bu rán xädi Oją, o gue da bą 'bu mam hmansegä. ¹⁸Nu'bu 'bu a n'da im ma 'be'a mbɛnsɛ, i honi da hnumansusɛ. Pɛ nu'bu 'bu a n'da i honi da t'ɛspa rá hmu, im ma majuani a nɛ hingui häte a.

19 Ne xø bi 'yena:

—Bi 'daju yun t'ɛdi ra Moisés, pɛ xínga n'da ahu guí øthu nguetho bi ma njon din hote, nɛ guín nde gui hyoju, bi 'yɛn'a ra Jesús.

²⁰Nɛ bi dạ'ʉ yʉ jạ'i thoho:

—Masque bi bɛn'na ra zithu a gám ma, njo'o to in nde da hyo i, bi 'yɛn'ʉ.

²¹Nu ra Jesús bi dąt'u:

—Nugä dá øt'a n'da ra 'bɛfi 'bʉ ra pa ran ts'äya, nɛ gätho ahʉ gá hyonya thohohʉ. ^{22,23}Pɛ nɛ'ahʉ, nu'bʉ din tịn i yoho yʉn t'ɛdi bi man ra Moisés, nu'a n'da bi ma gue gui hyɛcpahʉ yʉ́ ja'i yʉ 'uɛre, nɛ nu man'da bʉya ra pa ran ts'äya, guí huanhdʉ nda'a guí øthʉ, gue guí hɛcpahʉ yʉ́ ja'i yʉ 'uɛre. Nguetho hin guín nde gui fɛstahʉ a rán t'ɛdi ra Moisés. Nɛ hinga hønt'a ra Moisés bi ma da thɛcpa yʉ́ ja'i yʉ 'uɛre, pɛ nɛ'ʉ mam

bombøtahu bi ma. Ne ngutho dá øt' 'bu má hoc'a n'da ra hyenni 'bu ra pa ran ts'äya. Hanja gní suju ne gue'a n'youi bu rán t'edi ra Moisés dá øt'ä. ²⁴Pe damin 'yomfenihu xun ho 'bu guí ena gui juanbahu n'da ra ja'i. Jatho 'be gui pahmbu 'be'a nam bøn'a i øt'a n'da, bi 'yen'a ra Jesús.

Bin 'yän'du 'bu gue'a ra Cristo

²⁵Nɛ nu'ʉ 'da yʉ mɛngu bʉ Jerusalén bin 'yɛ̞mp'ʉ:

—Ha hinga guehna ran 'yohu im ma ma ngurpihu da hyo. ²⁶Pε hague in ja, in xänbate ua bim pεti gätho yu ją'i nε nte i xih ya. Uague bi bɛ̞n'u ma ngurpihu gue majuani ra Cristo na ra Jesús, gue bi huand Oja dim Hmu ua. ²⁷Pε nuna ran 'yohu, dí pa̩hmbu hapu bá nɛxna, pɛ nu'bu bá ɛ a majuani ra Cristo, njo'o to da ba̞di hapu dí nɛx'a, bin 'yɛ̞m zɛhɛ u.

²⁸Nu'bu mín xänbate ra Jesús bu ja ra danija, nts'edi bi 'yena:

—Guím bɛmhbu guí paju nɛ guím bɛmhbu guí pahmbu hapu bá nɛxä. Pɛ hin bá ɛcä nanguesɛgä, pɛgue bá pɛngä a majuani i ja rá ts'ɛdi. Nu'ehu hin guí pahmbu a. ²⁹ Nugä dí pacä a nguetho bá nɛxä bu i 'bu a, nɛ gue'a bá pɛngä a, bi 'yɛna.

30 Ne 'bexque nde da bent puya, pe njom bi zä bi bent'i nguetho hin ní zøn ra ora da bent'i. 31 Ne xun ngu yu ja'i bi 'yec'yei gue majuani ra Cristo a. Ne bi 'yen'u:

—Guehma majuani ra Cristo na ra Jesús gue mí hma ba ɛhɛ, nguetho njon da zä da 'yøt' yʉn t'øt'e man'da nuixte, bi 'yɛn'ʉ.

Bi 'bɛnh yʉ asmayo da bɛnt'a ra Jesús

32 Nu'bu mí 'yøh yu fariseo nɛ yu dambäja 'bɛ'a bi man yu ja'i nangue'a ra Jesús, bi xi u 'da yu asmayo buya da bɛnt'a ra Jesús ngue da got'i. 33 Nu'a ra Jesús 'bu mí thoqui bin xänbate, bi 'yɛna:

—Mi ts'utho dí 'buhmbu ua nguetho ga mba bu bí 'bu a bá pɛngä. ³⁴Nɛ nu'ahu buya gui hyonju pɛ hin da zä gui tinju, nɛ hin da zä gui sømhbu bu hapu dam 'bucä, bi 'yɛna.

35 Ne bin 'yemzehe ma ngurpihe:

—Hapu da mba gue hin da zä ga timhbu. Ha da mba bu n'danni 'bu u ma mijudíohu, nε da xänba u, nε'u n'dan'yo yu ja'i gue yu griego. ³⁶'Bε'a ním bøn'a man'a: "Gui hyonju nε hin gui tinju, nε hin da zä gui sømhbu hapu ga mba," εηju, bin 'yɛmzɛhɛ u.

Tengu n'da ra dathe da nexpu ní mbui n'da

³⁷Nu rán zɛgui ra pa nangue yʉm pɛti mí øt'ʉ, gue'a ra pa ɛmb yʉ jạ'i man'da xʉn ndʉxqui a. Nɛ 'bäpʉ ra Jesús nɛ nts'ɛdi im man'a:

—Nu'a to'o di 'bε a man'da mahyoni thoho rá mbui, tengu'bu i tuthe, ba εhε ga un'na mahyoni thoho, tengu'bu da zi ra dehe. ³⁸Nε nu'a to'o da zi ra dehe dím mangä, din ja tengu n'da ra dathe da nexpu rá mbui gue di un mahøn'a ra 'da'yote, tengu xí man rá t'ohni Oja, bi 'yɛn'a ra Jesús.

³⁹Ne gue'a bi ma nangue rá Hogandahi Oja da hyani to'o gätho da 'yec'yei. Pe hin ní zøh rá Hogandąhi Oją 'bʉ mím ma nguetho hin ní ndex mahɛ̞ts'i ra Jesús gue tpa pɛngahʉ a.

'Dahma 'dan'yo bi ben yu ja'i

⁴⁰Nu'bʉ mí 'yøh yʉ jạ'i 'bɛ'a bi man ra Jesús, bi 'yɛ̞n i 'da:

—Masque majuani rá pøngahya Oja mí hma ba ehe.

⁴¹Nɛ nu mi'da bi 'yɛna:

—Nu'a, ra Cristo gue rá Thahni Oją a.

Pε nu mi'da bi 'yɛna:

—Pε ha dí 'yɛpʉ Galilea ra Cristo.

42 Nguetho bi man rá t'ohni Oją,
gue ra Cristo ba εhε nangue rá 'yʉ
ra David, nɛ di nɛqui bʉ ra hnini
Belén guepʉ mí 'bʉh ra David, ɛn'ʉ.

43'Bex bin hec yu ja'i nangue'a bi man'u, nɛ 'dahma 'dan'yo 'bɛ'a mím bɛni ngue to'o a ra Jesús. 44Nɛ 'da u nde da bɛnt'i ngue da got'i, pɛ xínga n'da bi zä bi bɛnt'i.

Him bi 'yęc'yei yu ngurpi

⁴⁵Nu'bʉ mbenc'ʉ yʉ asmayo bʉ 'bʉ ʉ yʉ dąmbäją nε yʉ fariseo, nu'ʉ bi 'yänni:

—Hanja hin guá sihu a dá xi ahu, bi 'yɛn'u.

⁴⁶Nε nu yu asmayo buya bi dądi:

—Pε him mí 'bʉ a n'da im ma tengu man'a ra Jesús, bi 'yɛ̞n'ʉ.

⁴⁷Nε bi da u yu fariseo buya:

—Ha nε ahu bi hyä ahu. ⁴⁸ Pε xínga n'dagähe dyu fariseohe dí εc'yεihe a, xínga gue'u mi'da ma mingurpihe. ⁴⁹ Pε nu u yu ja'i thoho gue hingui pah yun t'εdi, hønt'u i εc'yεi a ran 'yohu u, pε da nu ran unbi mazai u, bi 'yɛn u.

⁵⁰Νε nubʉya nu ra Nicodemo, gue'a xí zøm bʉ 'bʉh ra Jesús 'bu n'da ra xui, bi 'yɛmp'u yú mifariseohu:

Mu'a man t'ɛdihu, hingui sä ga juanbahu n'da ra ja'i 'bu hin da øhmbu 'be'a da manse, ne'bu hin dí pahmbu majuani 'be'a i øt'e, bi 'yena.

⁵²Νε bi dą ʉ, bi 'yɛ̞mbi:

—Nu'i tengu'bu ne'i guí 'yɛpu Galilea, nguetho ne'i guím ma tengu im man yu 'yambui. Pe dami hyomhbu ja rá søcua Oja gue'bu di nequi bu Galilea n'da rá pøngahya Oja.

⁵³Νε n'da ngu n'da bi mba yú ngu buya.

Ra xisu ra 'yomt'eni

Pɛ nu ra Jesús bi mba bu ja ra nyuni Olivos. ²Nɛ nu'bu t'uxudi tho bi mbeng bu ja ra danija mahøn'a nɛ bi hyupu. Nɛ gätho nan ngu yu ja'i bá ɛhɛ nangue'a nɛ bi xänba u. ³Ya xí ya bu ra Jesús 'bu mí zøm bu yu fariseo nɛ yu xänbate nija, bi zispa n'da ra xisu gue bi nu 'bu mín yaui n'da ran 'yohu hing rá ndø. Nɛ bi mbä'minde bu 'buh yu ja'i. ⁴Bi 'yɛmp'a ra Jesús:

—Xänbate, nuna ra xisu dá tįmhbe bu i øt' ran 'yomt'εni. ⁵Nε nu ran t'εdi bi xiju ra Moisés, tengu na bi 'yøt' ra xisu ya, nε i jatho da mba ma bat'ado gue da du. Xi'e, 'bε go guí xije ya, bi 'yɛn'u yu fariseo nε yu xänbate niją.

⁶Pε guehna bi man u nguetho i sätho ra Jesús, i honi 'bɛpu dí yapi. Nε 'bex bi mbom thoho a ra Jesús nε bi 'yo't' rá saha bu häi tengu'bu hin xtá 'yø'a bi man'u. ⁷Pε man'da bi thoqui bi 'yänni, nu ra Jesús bim 'bäh puya nε bi 'yɛmp'u:

—Nu'bʉ 'bʉ a n'da ahʉ hin'yʉ ni ts'oquihʉ, gue'a di dʉ'mi da 'yɛmba ra do ra xisu a.

⁸Nɛ bi mbo'mi mahøn'a bu häi nɛ bi 'yo't' rá saha bu ja ra häi. ⁹Nɛ nu'bu mí 'yø'u 'bɛ'a bi man ra Jesús, bi du'mi 'dahmi 'datho bi mba, m'bɛt'o bi mba a man'da xín dạc'yɛi asta gue'bu go mín the u yu yapate, nguetho bi basɛ mbo yú mbui i ja yú ts'oqui. Nɛ hønt'a ra Jesús bi gohmbu bu u mí xänbi, nɛ'a ra xisu. ¹⁰Nɛ nu'bu mím 'bä'a ra Jesús nɛ bi nu njo'o bu yu yapate, pɛ hønt'a ra xisu bi gopu, bi 'yɛmbi:

—Grá xisu, hapu bi mba u bi yap'i i. Ha njo'o ua u in nde xtí 'da'a rá muui ni ts'oqui.

¹¹Ne bi da'a ra xisu:

-Grá Hmu, xínga n'da.

Nε nu ra Jesús bi 'yɛ̞mbi:

—Nεcä, xínga guecä ga 'da'a rá muui ni ts'oqui. Ní mba ya, pε hin gui 'yøt' mi'da yʉ ts'oqui.

Rá nyot'i yú mbui yu ją'i

¹²Nu ra Jesús bi thoqui bi xänba yʉ ją'i mahøn'a, bi 'yɛ̞na:

—Nugä, drá nyot'i yú mbui yu ją'i 'bucua ja ra ximhäi. Nu'a to'o da dengui him man 'yo bu ja ra 'bexui, pe din ja ran nequi yú mbui gue ra 'da'yote maząi, bi 'yemp'u.

¹³ Janangue'a nu'bu mi dą u 'da yu fariseo mi 'bupu, bi 'yɛmbi:

—Pɛ nu'i guím mansɛ 'bɛ'a guí øzɛhɛ, janangue'a säti thoho a guím ma, sä bi 'yɛn'ʉ.

¹⁴Nu'a ra Jesús bʉya bi dạt'ʉ nɛ bi 'yɛ̞mp'ʉ:

—Madague'bu dím mansε nanguesεgä, pε di muui a, nguetho dí pącä hapu bá nεxä nε hapu ná

mbagä. Pe nu ahu hin guí pahmbu hapu bá nexä o hapu ná mbagä. ¹⁵Nu'ehu sä gadí juanbahu n'da 'bu hin guí pahmbu xun ho 'be'a øt'a n'da. Pe nugä madague'bu dí padi 'bɛ'a øt'a n'da, pɛ njon dadí juanbä ya. 16 Pe nu'bu dím mangä 'be'a øt'a n'da, majuani dím ma, nguetho hin dí 'dasε pε n'dat'a dím mam'be ma Ta gue bá pengä ua. ¹⁷Nt'o't'i bu ja yun t'edi zai guidín xähmbu, gue nu'bu yoho yun 'yohu 'da'angu da ma 'bu xun juanni, mfadi gue ya majuani a buya. 18 Nugä dí xi ahu to'ogä, n'dahma gui paju, ne'a ma Ta bá pengä di jaqui da faqui, bi 'yɛna.

¹⁹'Bex bi 'yɛn'ម:

—Нарн 'bнh ni ta, bi 'yɛmbi. Nɛ nu ra Jesús bi dat'н:

—Hin guí pąju, xínga gue'a ma Ta guí pąhmbu. Nu'bu xquí pąju, nɛ'a ma Ta xquí pąhmbu 'bu, bi 'yɛna.

²⁰Nɛ guehna bi man ra Jesús 'bʉ mín xänbate bʉ ja ra dạniją guepʉ i pa m'bɛ'ts'i ra mbɛti. Nɛ njom bi bɛnt'i gue xtan got'i nguetho hin ní zøn ra ora dim fɛnt'i.

Him bi zä bi mbähä ra Jesús

²¹Nu ra Jesús bi thoqui bi xih mahøn'a u:

—Nugä ga mbagä, nɛ m'bejua gui hyonju, nɛ gui tuhu 'bu hin nín hotho ni ts'oquihu. Nubu hapu ga mbagä hin da zä gui mbähä bu, bi 'yɛna.

²²Νε bi 'yɛ̞n ʉ ma ngʉrpihe:

—Ha din hyose nanguese nguetho bi ma: "Nubu ga mbagä, hin da zä gui mbähä bu," bi 'yɛnju, bi 'yɛn'u.

²³Νε nu'a ra Jesús bi 'yɛ̞mp'ʉ:

—Nu'ahu i ja ahu rán 'yomfɛni ra ximhäi nguetho gyu mɛnguhu ua ja ra ximhäi. Pɛ nugä 'da'angu dím bɛm'be Oja, nguetho hin dra mɛngugä ua ja ra ximhäi.

24 Janangue'a dí xi ahu, nu'bu hin gui 'yɛc'yɛihu 'bɛ'a dím mansɛ gue to'ogä, gui tuhu nɛ njam'bu din hoh ni ts'oquihu, bi 'yɛna.

²⁵Nε bi 'yän'ndu buya:

-To'o i, bi 'yɛn'u.

Nu'a ra Jesús buya bi 'yɛmp'u:

—Ya xtá xi ahu to'ogä nɛ guexta thohogä. ²⁶I ja man'da xun ngu ga xi ahu 'bɛpu nín ja ni ts'oquihu. Pɛ majuani a dím ma nguetho majuani a bá pɛngä. Nɛ nu'u yum hma di bɛngä a, gue'u dím mangä ua ja ra ximhäi u, bi 'yɛna.

²⁷Pɛ nu'ʉ ma ngʉrpihe 'bʉ mí xi ʉ, him bi bą ʉ gue'a bi ma ra Jesús gue Oją bá pɛnhua. ²⁸Janangue'a xø bi 'yɛ̞n'a ra Jesús:

—Nu'bu gá cuarcahu bu magats'i, guecä dán ja'igä ua ja ra ximhäi, m'bejua buya ja gui pahmbu to'ogä. Ne ja gui pahmbu buya nte dím manse, pe gätho xtá ma bi xänga ma Ta. ²⁹Nu a ma Ta gue bá pengä ua, n'dat'a dím bem'be, ne njam'bu i sogä a nguetho zai gätho dí øt'ä a in numanho, bi 'yen'a ra Jesús.

³⁰Nu'bʉ mí man na, xʉn ngu ʉ mi'da bi 'yɛ̞c'yɛi mahøn'a.

Yú 'yεhε a ra ts'oqui

³¹Nɛ nu ra Jesús bi 'yɛ̞mp'ʉ 'da ma mijudíohe ngue ɛna bi 'yɛ̞c'yɛi a:

—Nu'bʉ gui thoqui gui tɛnhdʉ mam hmangä, majuạni ma 'yɛฺc'yɛi ahʉ 'bʉ. ³²Nɛ da zä gui pҳhmbʉ 'bɛ'a nam bøn'ʉ yʉm hma majuҳni, nɛ gue'a dí yạn ahu gue da zin ahu Oją, bi 'yɛ̞na.

³³Νε bi dą u:

—Pε nugähe, dyum bom'bεtoje ra Abraham janangue'a ya yú t'uhnigähe Oją. Nε njam'bu midí mandagähe man'da ra hmu. Hanja gní xije da mba nhyanigähe gue da zinje Oją, bi 'yɛn'u.

³⁴Νε nu'a ra Jesús bi 'yεmp'u:

-Majuani dí xi ahu, nu'a to'o øt' ra ts'oqui, rá hmu ra ts'oqui a. ³⁵Nehna man'da guim bɛmhbu, hin gui sä gui comhbu ran ho ra Abraham, pε tengu'bu yú 'yεhε thoho ahu a. Pε hønt'u njuantho yú t'uhni da gomhbu ran ho mazai. ³⁶Nugä njuantho rá Ts'unt'u Ojaga. Ne nu'bu guecä ga juc'ahu bu ja yu ts'oqui, majuani da zin ahu ma Ta ne yú t'uhni ahu a 'bu. ³⁷Ne madague'bu bi xant'ahu ra Abraham, tengugä, pε guín nde gui hyoju, nguetho hin hapu da zä da yut' mam hma bu ja ni mbuihu. 38 Hønt'a bi 'yurcä ma Ta dím mangä. Ngutho ahu, hønt'a bi 'yut'a ni tahu guí øthu, bi 'yɛmp'u.

³⁹Nε bi dą u ma mijudíohe mí 'bäpu:
—Ra Abraham ma tahe.

Ne nu ra Jesús xø bi 'yemp'u:

—Nu'bu majuani yú t'uhni ahu ra Abraham xquí comhbu ran 'yomfεni ra Abraham 'bu. ⁴⁰Pε nuya guín nde gui hyoju, guecä dí xi ahu a majuani gue'a bi xänga ma Ta. Pε hinga ngubu bi 'yøt' ra Abraham tengu guín nde gui 'yørcahu.

⁴¹Janangue'a dí xi ahu, guí øthu rá 'bɛfi man'da ni tahu, bi 'yɛna.

Nε 'bex bi 'yɛ̞n'ʉ:

—Hin dyʉ 'bɛtat'ʉhni gähe, pɛgue n'datho ma tahe 'bʉi, Oją a, bi t'ɛmp'a ra Jesús. 42 Nu'a ra Jesús bi dạt'u:

—Nu'bu da gue'a Oja ni tahu, xquí numanhoju 'bu, nguetho bá εcä bu bí 'bu Oja. Nε hin bá εcä nangue ma ts'edi zehe pe gue'a Oja bá pengä ua. 43 Hanja hingui sä gui pahmbu 'be'a dím mangä. Nguetho hin guín nde gui pahmbu a. 44 Nguetho ra zįthu ni tahu, ne guí honi gui 'yøthu rá pähä a. Ne nu'a, rá mbudi thoho bi du'mi bin hote, ne guet'u yu pa i ja bu ya i øthoho. Nε nu'a, him bin ząmmi a majuąni nguetho him bi numanho a. Ne hønt yu fehni man'a nguetho rám 'bäi a. Ne in ta nangue gätho yu fehni. 45 Pe nugä dím ma majuani, janangue'a hin guí ɛc'yɛigahu. 46 To'o ahu da ma majuani dí øt' ran ts'o o gue dím man ra fehni. Pε nu'bu gätho majuani a dí xi ahu, hanja hingui sä gui 'yɛc'yɛihu. ⁴⁷Nu'a to'o bim 'bui nangue Oja, i ømanho rám hman Oja a, pe nu'ahu hin guí ømanho rám hman a nguetho hin gám 'buhmbu nangue Oja, bi 'yɛn'a ra Jesús.

Ya xmí 'buh ra Cristo 'bu hin ním 'buh ra Abraham

48 Bex bi dą'u ma mijudíohe buya:

—Ha him majuani dím mamhbe, gue nu'i grá mengu bu Samaria, gue him majuani grá mbom'beto ra Abraham. Ne guí 'buhmi n'da ra zithu, sä bi 'yen'u.

49 Nu ra Jesús bi dąt'u:

—Nugä hin dí 'bʉ'be n'da ra zithu pε dí numansu ma Ta. Nu'ahʉ hin guí numansujʉ. ⁵⁰Nε hin dí honi gue da hnumansugui pε i 'bʉ a n'da gue i honi da hnumansugui, nε di ʉnbi to'o hingui numansugui.

⁵¹Majuani dí xi ahu, nu'a to'o da 'yec'yei a dím mangä hin da nu ran date a, bi 'yena.

52 'Bex bi dą'u ma mijudíohe:

—Nuya dí pąhmbe go gue'e guí 'buhmi a ra zithu, nguetho bi du ra Abraham nɛ gätho yú pøngahyą Oją, pɛ sä guí ɛna, hin da du to'o da 'yɛc'yɛi i. ⁵³Ha guí ɛna man'da guín nuixte xinda gue'a ma tahe ra Abraham nɛ u yu pøngahya, nɛ maya'bu xun du u. To'o guí ɛna gue gue'e 'bu, bi 'yɛn'u.

⁵⁴Nu'a ra Jesús bi dąt'u:

—Nu'bu xcá honi dan nuixte zehegä, säti thoho 'bu. Pe nangue a rá ts'edi ma Ta, gue'a nán nuixtegä a, gue'a guí ɛmfu ni Ojahu. ⁵⁵Pe njam'bu gá pahmbu a. Pe nugä dí pacä a, ne nu'bu xcá mangä hin dí pacä a, xcám fehnigä 'bu, tengu ahu. Pe majuani dí pacä a ne dí øt'a im man a. ⁵⁶Nu a ra Abraham, zai guí ɛmfu ni tahu, pe bin johya 'bu mi badi da zøn ra pa ba ɛcä ua. Ne bi t'uti gue ga søcä ua, ne bin johya 'bu mi nugui, bi 'yɛna.

⁵⁷Nε sä 'bex bi 'yεmp'ʉ ma mijudíohe:

—Hin guí pe'ts'i yote ma 'det'a njeya ne guí ena gá nu ra Abraham, bi 'yen'u.

⁵⁸Νε nu ra Jesús bi 'yɛ̞mp'ʉ:

—Majuani dí xi ahu, nu'bu hin ním 'buh ra Abraham, xmí 'bucä, nguetho zai dí 'bui, bi 'yɛmp'u.

59'Bex bi gux yu do u, ɛna di bat'i, pɛ nu ra Jesús 'bex bi yut'i nde bu 'buh yu ja'i, bin 'yani nɛ bi bøm bu ja ra danija buya.

Ra xädä 'bu mim 'bui bi yani

Nu'bu má mbähmbe bu 'yu ra Jesús, dá nuhe n'da ran 'yohu, ra xädä gue'bʉ go mim 'bʉi. ²Nε nugähe dyʉ xädihe dá änhde:

—Xänbate i, to'o bi 'yøt' ra ts'oqui, ha gue'a rá ta o gue rá mbe, uague rá ts'oqui zεhε gue bin xädä, dí εmfe.

³Nu'a ra Jesús bi 'yɛ̞ngähe:

—Xínga guehna ran 'yohu nε xinga gue'a rá ta nε xínga gue'a rá mbe, pε hønt'a ran t'øt'e nuixte da 'yørpa Oją gue da nu yu ją'i. ⁴Nuju i jatho ga humbi ga ørpahu rá 'bɛfi Oją ya tengu'bu ma patho ya, nguetho da zøn ra pa ga tuhu, nε hin man da zä ga øthu ra 'bɛfi ua ja ra ximhäi buya. ⁵Nu'bu dí 'bucua ja ra ximhäi dí xänba yu ją'i, tengu'bu dí xocpa yu dä da nu ran nεqui, bi 'yɛnje.

⁶Nu'bʉ mí jua'a bi ma, bi zoh rá jịni bʉ häi, nɛ í 'yøt' ra bøhäi rá jịni nɛ gue'a í gospa rá dä ra xädä a bʉya. ⁷Nɛ bi 'yɛmp'a ra xädä:

—Ní mba bán xudä nu ja ra mbothe Siloé.

Bi mba nɛ bán xudä. Nɛ nu'bu mam bá pengui in nu ran nɛqui buya. ⁸Nɛ nu'u din tøt'am'buihu nɛ'u mi'da yu ja'i gue zai mín nu 'bu mín xädä, nu'bu mín nu u, bin 'yɛmp'u:

—Ha hinga guehnu ra xädä nu mí haxta'a 'bɛ'a mí si.

⁹'Da'u bi ma:

—Guehnu.

Nε nu'ʉ mi'da bi 'yɛ̞na:

–Ęna ngunu a pε hinga guehnu.

Pε nu ra xädä bi dądi:

—Guecä, bi 'yɛ̞n'a.

¹⁰Νε bi 'yän'dʉ bʉya:

—Hague nja bi xoh ni dä.

¹¹Ne nu ra xädä bi dądi:

—Nu'a ran 'yohʉ rá thuhu ra Jesús bi 'yøt' ra bøhäi nɛ bi gosca ma dä. Ne bi 'yengä: "Ní mba bu ja ra mbothe Siloé ne guan xudä bu," bi 'yengä a. Ne dá mba dán xudä, ne bi zä dá nu ran nequi ma dä buya, bi 'yena.

¹²Νε bi t'εmp'a:

-Hapu i 'bu a.

Nε bi dąh puya:

—Hin dí pądi, bi 'yɛntho.

Bi t'ørpa ran t'änni a mí xädä

¹³Nɛ bi zix bu 'buh yu fariseo buya. ¹⁴Nu'a ra pa bi 'yøt' ra bøhäi ra Jesús nɛ bi xocpa rá dä ra xädä, ra pa ran ts'äya a. ¹⁵Nu yu fariseo bi 'yänni mahøn'a:

- —Hague nja bi nu ran nεqui ni dä.Nε bi 'yεmp'u:
- —Bi gosca ra bøhäi ma dä, nε bán xudä, nε nuya dín nu ran nεqui, bi 'yɛna.
- ¹⁶ Janangue'a bi 'yɛn'н 'da yн fariseo:
- —Nu'a ran 'yohu guím ma, hingui numansu Oją nguetho hingui numansu ra pa ran ts'äya, sä bi 'yɛn'u.

Pε nu'u mi'da u bi 'yɛna:

—Pε nu'bu ra ts'om'bäi hin xtán zä da 'yøt' yun t'øt'e nuixte gue i øt'a.

'Bex bin hec'ʉ bʉya. ¹⁷Nε bi t'än'na ra xädä:

—'Bɛ'a guím ma nangue'a bi xoc'a ni dä.

Nε bi 'yɛ̞na:

—Nu'a, n'da rá pøngahyą Oją a, bi 'yṣna, nɛ bi bøm buya.

¹⁸Pε nu'ʉ him bi 'yɛ̞c'yεi gue gue'a mí xädä, jague'bʉ mí zonpa a rá ta nɛ rá mbe. ¹⁹Nε bi 'yän'dʉ:

—Ha gue'a ni ts'unt'uui gue mí xädä a. Hague nja in nu ran nequi ya, bi 'yɛn'u. ²⁰Bi dạ'a rá mbe nε rá ta:

—Dí pạ'be gue gue'a ma ts'unt'u'be gue mí xädä 'bu mim 'bui. ²¹Pε hin dí pạ'be hague in ja in nu ran nεqui ya, hin dí pạ'be to'o bi xocpa rá dä. Nu'a xun dạn'yohu ya, dami 'yänhdu, da mansε to'o.

²²Ngubu bi man rá ta nε rá mbe nguetho i su ma ngurpihe dyu judíohe. Gue bi zän'na n'da ra nde, gue da hyøn'a thi bu ja ra niją u to'o da ma bá pɛnh Oją a ra Jesús, nε ma zä hin da hnumanho bu ja yú hnini. ²³Janangue'a bi 'yɛntho rá ta nɛ rá mbe: "Xun dạn'yohu ya, dami 'yänhdu," bi 'yɛntho u.

²⁴ Janangue'a bi zonh mahøn'a ran 'yohu mí xädä, ne bi 'yemp'a:

—Pε dami ma majuani gue gue'a Oja bi xoc'a ni dä. Pε nu'a ran 'yohu gá ma, dí pahmbe ra ts'om'bäi a, bi 'yɛn'u.

²⁵Nɛ nu'a mí xädä bi dądi:

—Hin dí pącä 'bu ra ts'om'bäi a, o gue hin'na, pε hønt'a dí pądi mí xädägä, nε dín nu ran nεqui ya.

²⁶Νε bi 'yɛmbi mahøn'a:

—'Bɛ'a bi 'yøt'a'i 'bʉ mí xoc'a ni dä.

²⁷Nε bi dą'a:

—Nugä ya xtá xi ahu ne hin gá 'yec'yeihu. Ha gui 'yec'yeihu 'bu ga xi ahu mahøn'a. Ha ne ahu guín nde gui tenhdu a 'bu, bi 'yena.

²⁸'Bex bin sante thoho u 'bu mí 'yɛmp'a:

—Nu'i rá xädi i a ra ts'om'bäi. Pɛ nugähe yú xädigähe a ra Moisés.

²⁹Dí pąhmbe Oją bin yaui ra Moisés, pɛ nu'a ran 'yohu guí ɛspi hin dí pahmbe hapu bi nɛx'a rán t'ɛdi a, bi 'yɛn'u.

30 Bi dą'a mín xädä buya:

—Nugä dadí hyonya thoho nangue'a gá mamhbu, gue hin guí pahmbu hapu bí 'yɛ a rán t'ɛdi, nɛ ya bi xoga ma da a. 31 Nɛ dí pahmbu hin da 'yømanho Oja 'bu da 'yäp rá ts'ɛdi n'da ra ts'om'bäi, pɛ nu'bu 'bu a n'da i thande Oja nɛ ørpa rá pähä, i Ø Oja 'bu i äp rá ts'ɛdi. 32 Nɛ gätho yu jɛya xu thogui njam'bu bim 'bu a n'da bi xocpa rá dä n'da mi xädä 'bu mím 'bui. 33 Nu'a ran 'yohu dím ma, nu'bu hin di fäx Oja a, hin te sä da 'yøt yu nuixte 'bu, bi 'yɛn'a mí xädä.

³⁴Nε bi t'εmp' mahøn'a:

—Nu'i grá dądits'oqui, janangue'a guí xädä 'bu gmím 'bui. Ha go gui xängahe, bi 'yɛ̞n u.

Nε bi hyøn a thi gue ma zä hin da numanho ma mijudíohe bʉya.

I xädä yú mbui u 'da

³⁵Nu'bu mí 'yø'a ra Jesús gue bi thøn'a thi ra xädä, bi dini nɛ bi 'yänni:

—Ha guí εc'yεi rá ts'unt'u Oją, bi 'yεmbi.

³⁶Νε bi dąt'a:

—Ma Hmu, to'o a guím ma. Dami xiqui ts'ʉ, ga ɛ̞c'yɛi a, bi 'yɛ̞na.

³⁷Νε nu ra Jesús bi 'yɛ̞mp'a:

—Guecä guín nug ya, nε dí yaui ya. ³⁸Nε bi 'yɛ̞mbi:

--Ma Hmu i, dí εc'yεi a ya.

Ne bin danyahmu bu ja rá hmi buya. ³⁹Ne nu ra Jesús bi 'yena:

—Janangue'a dám 'bucä ua ja ra ximhäi, gue ga japi di nequi 'be'a mbɛni n'da ngu n'da. Nɛ nu'u i xädä da nu ran nequi, nɛ nu'u in nu ran nequi din xädä, bi 'yɛna.

⁴⁰Nɛ nu'ʉ 'da yʉ fariseo bi 'yøh rám hman a, bi 'yɛn'ʉ:

- —Ha necähe dí xädähe, bi 'yen'u.
- ⁴¹Nε nu ra Jesús bi 'yɛ̞mp'ʉ:
- —Nu'bu xquí pạhmbu gue guí xädähu, xtán zä xtím pun'nahu 'bu nɛ njon xtá xi ahu gue ja ni ts'oquihu buya. Pɛ guí ɛnsɛhu guín nuhu ran nɛqui, janangue'a hin dim pun'na ni ts'oquihu, bi 'yɛn'a ra Jesús.

Ran t'uti nangue rá mbä't'i yu de'yo

—Majuani dí xi ahu, bi yɛn'a ra Jesús, nu'u hin dí yurpu ja rá goxthi a rá mbä't'i yu de'yo, ne dí dons pu ja ra mbä't'i, yu bε u. ²Pε nu'u dí yurpu ja ra goxthi, njuantho yu mbande'yo u. ³Ne da xocpa a ra mbängoxthi ne da yut'ambo ra mbände'yo buya. Nε nu'u yú dε'yo i ørpa rá nde a rá mbädi ne i øt'a i xifi. Ne i ndønba yú thuhu nguetho i pą u yú mbɛti a. Ne i sixpu ja yu 'bot'ei. 4Ne nu'bu mí guc pu thi gätho u yú de'yo, di 'bet'o 'bu i sits'i, ne nu'u yú de'yo i tenni nguetho i parpa rá nde 'bu im mba't'i. ⁵Hingui tenna n'dan'yo n'da ra ją'i, pε i 'dagui, nguetho hingui parpa rá nde a n'dan'yo, bi 'yɛna.

⁶Nu'a ran t'uti bi man'a ra Jesús, pε hingui pą ʉ 'bɛ'a nam bøn'a bi si ʉ.

Ra Jesús ra hogambände'yo

⁷Janangue'a 'bex bi 'yɛ̞mbi mahøn'a:

—Majuạni dí xi ahu, nugä drá goxthigä a ra mbä't'i guepu i 'buh yu dε'yo. ⁸Pε gätho u im bɛni dim 'bɛt'o zɛhɛ xinda guecä, nɛ gue'u yu bɛ u. Pε nu'u yu dɛ'yo hingui ørpa yú nde u. ⁹Nugä drá goxthigä, nu'a

SAN JUAN 10 196

to'o da yut'i nanguecä, ma zä da ts'imanho bu. Nɛ da bądi gue rá ngu bu, janangue i 'yo nɛ da dini 'bɛ'a dí zɛrpa yú mbui, tengutho ra dɛ'yo i tin yu t'ɛi.

¹⁰Nu'u yu bɛ ní 'yɛhɛ dim pɛ nɛ din hodu ne di ts'onbi gätho rá 'befi Oją. Pε nugä ná εhε gue dí tịn ra te n'da nε din ja ra te i juadi xʉn ho. ¹¹Nugä drá hogambände'yo ne ga 'bεh ma te gue gan yan u ma dε'yo. ¹²Pe nu'u 'da yu mbefi, hønt'u yún zäbi nde da dąha, ne him majuąni yu mbände'yo, gue hin yú mbeti u yu dε'yo. Janangue'a nu'bu in nu ba ερu n'da ra zate, i sopu yu dε'yo nε i 'dagui. Ne nu ra zate buya im bent'u yu de'yo ne im maxt'i. ¹³Nu'u yu mbefi i 'dagui nguetho hin'yu yun hugcate nangue yu de'yo, ne hønt'u yún zäbi ní hyu yú mbui.

14 Nugä drá hogambändɛ'yo, nɛ dí pah ma dɛ'yo nɛ nu'ʉ i paqui.
15 Tengu thoho dí øt'be ma Ta, i paqui nɛ dí pacä a. Nɛ ga ungä ma te ngue gan yan ʉ ma dɛ'yo.
16 I 'bʉh mi'da ma dɛ'yo gue hinga guecua i 'bʉcua. Nɛ'ʉ jatho gua sigä. Nɛ da 'yø 'bʉ dá mba't'i.
Janangue'a 'darpʉ din 'yo gätho ma dɛ'yo. Nɛ gätho ga fäh pʉya nguetho høngdä drá mbändɛ'yogä.

¹⁷ Emme numanho ma Ta 'be'a ga øt'ä gue ga ungä ma te nangue ma de'yo. Pe ga thambenigä mahøn'a.
¹⁸ Xínga n'da ra ja'i da zä da hyogui, pe nugä ga unse ma te. Ja ma ts'edi ga uni ne ja ma ts'edi ga thambeni, nguetho gue'a bi xic ma Ta, bi 'yen'a ra Jesús.

¹⁹Nangue'a bi man ra Jesús, bin hec ma mijudíohe mahøn'a. ²⁰Xun ngu u bi 'yɛna: —Nuna 'buhmi ra zithu nɛ ran gat'i na. Hanja gní 'yøhmbu 'bɛ'a man na, bi 'yɛ̞n'u 'da.

²¹Pε nu'ʉ mi'da bi 'yɛ̞na:

—Pε hinguin jabu rám hman a in 'youi ra zithu. Nε mfądi hin'yu rá ts'εdi ra zithu da xocpa yú dä yu xädä, bi 'yɛn'u mi'da.

Him bi hnumanho a ra Jesús

²²Nu yʉ pa xʉn sɛ bin ja ran ts'ihmɛ bʉ Jerusalén ngue ra dampɛti bi 'yøt' ma mijudíohe. ²³Nu ra Jesús mí 'yo bʉ ja rá ngun'yu ra danija ní hu ra Salomón. ²⁴Nu'ʉ 'da ma mijudíohe bʉya bi mbä'ts'a ra Jesús, nɛ bi 'yɛmp'a:

—Hanja gní jacthohohe dan 'yänhde nangue'e, pε dami xije njuantho 'bu gue'e grá Cristo, bi 'yɛn'u.

²⁵Nε nu ra Jesús bi dąt'u:

—Ya xtá xi ahu pε hin gá 'yɛc'yeigahu. Ne'a ra 'befi dí øt'ä nangue rán t '¿di ma Ta, i udi to'ogä. 26 Pe nu ahu hin guí ec'yeihu nguetho him ma dε'yo ahu, tengu xtá xi ahu. ²⁷Nu'u ma dɛ'yo i ømanho ma nde, ne dí pąrpa yú mbui u ne i tengui. 28 Ne dí un ra 'da'yote mazai u ne njam'bu dim 'bedi. Ne njo'o to'o da zä da hua'ts'u i o ma 'yɛ. ²⁹Nu a ma Ta bi 'dacä ʉ, man'da nuixte a, ne njo'o man'da tengu a. Ne njo'o to da zä da huą'ts'u i o rá 'yε ma Ta. 30 Nugä nε ma Ta n'datho dí com'be, bi 'yɛn'a ra Jesús.

³¹'Bex bi gux yu do mahøn'a εna di bat'i ngue da hyo. ³²Pε nu ra Jesús bi 'yεmp'u:

—Xun ngu yu 'bɛfi xun ho xtá ut'ahu ngue bi xic ma Ta. Nda'a

ní 'bɛfi guín nde gdí bajʉ yʉ do, bi 'yɛna.

33 Ne bi 'yemp'u yu judio:

—Hin nangue yu 'bɛfi xun ho dí ɛna ga ba ahe, pɛ nangue hin guí ɛspa Oja gue gá 'yɛna, n'datho guí cohmi Oja, nɛ grá ja'i thoho, bi t'ɛmp'a ra Jesús.

34 Nu ra Jesús bi dąt'u:

—Ha hinga nt'o't'i bu ja yun t'ɛdi gadín xähmbu, gue bi 'yɛn Oja: "Nu ahu tengu'bu gyú ojahu," i ɛm bu ja ra t'ohni. 35 Gue bi 'yɛmbi tengu'bu yu oją u bi un rán t'ędi Oja. Ne hingui sä dim 'beh rá T'ohni Oja. ³⁶Pε hanja gní 'yεnju hin dín numansugä Oja 'bu dím mangä, rá Ts'unt'u Ojagä, guecä gue bi huangä ma Ta ne bá pengä ua. ³⁷Nu'bu hin dí øt'ä tengu øt'a ma Ta, hin gui 'yɛc'yɛigahu 'bu. ³⁸Pε nu'bʉ dí øt'ä tengu øt'a ma Ta, dami pahmbu ngue hønt'a Oja sä i øt'u yu nuixte dí øt'ä. Janangue'a da zä gui 'yɛ̞c'yɛihʉ gue n'datho ran 'yomfɛni dí com'be ma Ta, bi 'yɛna.

³⁹ Janangue'a bi 'yɛna da bɛnt'i mahøn'a u ma mijudíohe mí 'bäpu. Pɛ nu ra Jesús bi 'uegue.

⁴⁰Nε bi mbeng mahøn'a bu
'danguadi ra dąthe Jordán, guepu rá
mbudi mí øt' ran xixya ra Xuua, nε
bim 'bupu 'da yu pa. ⁴¹Nε xun ngu
yu ja'i bá ερu 'buh ra Jesús. Nε bi
man u:

—Madague'bu nte man t'øt'e nuixte bi 'yøt' ra Xuua Nxixyą, pɛgue gätho majuani a bi mam 'bu mi xiju nanguehna ra Jesús, bi 'yɛn'u.

⁴²Nε xʉn ngu ʉ bi mba bʉ, bi 'yɛ̞c'yɛi a ra Jesús.

Bi du ra Lázaro

Mí 'bមpម Betania n'da ran 'yohម in zäman'u, í Lázaro. Nε mí 'buhmbu yoho yún ju, ra María nε ra Marta. ²Nε nuna ra María, guehna bi xispa ra 'yɛthi rá gua ra Jesús εmmε yuman'u nε bi 'yonbi nangue yú xtą. Guehna rán ju ra Lázaro na, gue xun u. ³Janangue'a nu'u yún ju bi mbɛhna n'da ra nde bu 'buh ra Jesús nε bi 'yɛmp'a:

—Ma Hmu a'be, xiya 'bɛ'a ga øthu ya, xun u a guidí huɛqui, bi 'yɛmbi.

⁴Nε nu'bʉ mí 'yøh ra Jesús, bi 'yɛ̞na:

—Nu'a ran u hing ran date a pe hønt'a gue da hnu rá ts'edi Oja nuixte thoho, necä rá Ts'unt'u Ojagä, bi 'yena.

⁵Nu ra Jesús ɛmmɛ madi huɛc'a ra Marta nɛ rá juhuɛ nɛ'a ra Lázaro. ⁶Pɛ nu'bʉ mí 'yøde xʉn ʉ ra Lázaro, him 'bex bi nde da mba, 'bɛ bi døm' man yopa guepʉ mí 'bʉhmbe. ⁷M'bɛjua bʉya bi xije dyʉ xädigähe a:

—Ga mbähä bu Judea mahøn'a, bi 'yɛ̞nje.

⁸Pε dá εmfe buya:

—Xänbate i, ha gui mba bu mahøn'a, nguetho nu ma mijudíohu 'bupu him maya'bu gue nde di bat'a do i, dá ɛ̃mfe.

⁹Nu ra Jesús bi xije n'da ran t'uti buya:

—Ha hinga gue'a 'dɛ'mayo ora n'da pa. Nu'bʉ ma pa i 'yo n'da ra jạ'i, hin di fet rá gua nguetho in nu hapʉ i pa. ¹⁰ Pε nu'bʉ 'yoxui n'da, di fet rá gua nguetho hinguin nu hapʉ

i pa. Nu'a bi ma gue hingana søn ra ora da du.

¹¹Νε m'bεjua bi 'yɛ̞nje mahøn'a:

—Nu'a ma amigohʉ ra Lázaro i ąha. Nε ga mbähä ga ents'ä a, bi 'yɛ̞na.

¹²'Bex dá ɛ̞mbähe a bʉya:

—Ma Hmu ahe, nu'bu i aha da yam 'bu, dá ɛmfe.

¹³Pɛ nu ra Jesús bi ma gue bi du 'bu mí ma i ąha. Pɛ dá bɛmhbe gue i ątho. ¹⁴'Bexque njuantho bi man ra Jesús:

—Ya bi du ra Lázaro. ¹⁵Pε nangue ahʉ, xʉn ho gue hin dá nugä 'bʉ mín hyɛn'na, gue man'da gui 'yɛc'yɛigahʉ 'bʉ guin nuhʉ 'bɛ'a ga øt'ä ya. Nuya ga mbähä ba nuhʉ.

¹⁶Pε nu'a ra Tomás nε i t'εmbi ra Go, ma mixädihe, bi 'yεnje:

—Mbähmahu 'bu, madague'a 'darpu ga tuhu.

Nu ra Jesús di un ra te u xun du

17 Nu'bu má sømhbe bu ra Jesús buya, ya ná goho pa xí t'ä a ra Lázaro. 18 Nu bu Betania hinga ya bu Jerusalén, mbε made ora na 'yo. 19 Janangue'a xun ngu ma mijudíohe bi mba bu rá ngu ra Marta nε ra María gue da hyurpa yú mbui u, nangue'a rá ida bi du. 20 Nu'bu mí 'yøh ra Marta gue ba ερu ra Jesús, bi mba nε bin c'at'ui bu 'yu. Pε nu ra María bi gotpu ja rá ngu. 21 Nε nu'a ra Marta bi 'yṣmp'a ra Jesús:

—Ma Hmu i, nu'bu xquím 'buque ua, hin xtán du ma įda. ²²Pε madague'bu ya bi du ya, pε dí pącä di 'da'a Oją hønt'a go 'bε'a gui 'yäpi, bi 'yɛna.

²³Nu a ra Jesús bi dąt'a:

—Nu'a ni įda da ndants' mahøn'a, bi 'yɛ̞na.

²⁴Nu ra Marta bi 'yɛ̞na:

—Dí pạcä da ndants'a rán zegui ra pa a, ne u gätho xun du, bi 'yena.

²⁵Νε nu ra Jesús bi 'yɛ̞mp'a:

—Nugä guecä dadí un ra te u xun du. Nu'a to'o da 'yɛc'yɛigui, madague'a da du, pɛ ga japi da ndants'i nɛ din ja ra 'da'yote mazại. ²⁶Nɛ nu'a to'o 'bui nanguecä nɛ εc'yɛigui, njam'bu da du a. Ha guí εc'yɛi a dí xi i, bi 'yɛmbi.

²⁷Nε bi 'yεmp'a:

—Hạha ma Hmu i, dí ɛc'yɛi gue gue'e grá Cristo, rá Ts'unt'u i Oją, gue'e mí hma gua ɛcua ja ra ximhäi, bi 'yɛna.

Bin zon'a ra Jesús

²⁸Nε nu'bʉ mí gua'a bin yaui ra Marta a ra Jesús, bi mbeng bʉ rá ngu nɛ bin yajodreui a rá juhuɛ ra María, nɛ bi xi a:

—Bí 'bäpʉ ra xänbate nε in zon'na i, bi 'yɛ̞na.

29 Nɛ nu'bu mí 'yø a 'bɛ'a bi sifi, bi ndants'a nɛ bi mba n'dihi guepu 'bäh ra Jesús. 30 Nu ra Jesús him 'bex bi zøm bu ja ra hnini, pɛ bim 'bätho bu ndehnini guepu xín yaui ra Marta. 31 Nu ma mijudíohe mí hupu mbo rá ngu ra María gue i hurpa rá mbui, nu'bu mí nu bi ndants'a ra María nɛ bi mba n'dihi, bi dɛn'du ma mijudíohe buya, nɛ bi 'yɛn u: "Masque ní mba ban zom bu ja ran 'yägui na."

³²Nu'bu mí zøm bu ra María bu bí 'bäh ra Jesús, bin danyahmu bu ja rá gua, ne bi 'yemp'a:

—Nu'bu xquím 'buque ua, hin xtán du ma ida 'bu, bi 'yɛna.

³³Nu'bu mín nu ra Jesús gue i zon'a ra María, nɛ u ma mijudíohe zoni gue'u bi dɛnni, bin gąs' puya nɛ bi hyundumbui. ³⁴Nɛ nu ra Jesús bi 'yänni:

—Hapu bi t'ä a ra Lázaro.

Nε bi t'ɛm bʉya:

—Ma Hmu ahe, ga mbähä gua nu, bi t'ɛmbi.

³⁵Νε a ra Jesús bin zom bʉya. ³⁶'Bex bin 'yɛ̞m zɛhɛ ma mijudíohe bʉya:

- —Nunu ya mfądi ɛmmɛ madi huɛc'a, bin 'yɛmp'u. ³⁷Nɛ nu'u 'da bi 'yɛn'u:
- —Nuna guehna bi xocua yɨt dä ra xädä. Ha hin xtán zä xtí japi hin xtán du ra Lázaro 'bɨt.

Nu ra Jesús bi xox'a ra Lázaro bu ja rán 'yägui

³⁸Nu'bʉ mí zøm bʉ ja ran 'yägui ra Jesús, bin gą'ts' mahøn'a. Nu ran 'yägui n'da ra hyądo a nε bi juaspa n'da ra xįndo. ³⁹Nε nu ra Jesús bi 'yεmp'ʉ:

—Dami 'uejʉ ts'ʉ na ra xindo. Pɛ nu ra Marta, rán ju a xí du, bi 'yɛmbi:

—Ma Hmu i, masque xun xą ya nguetho má goho ma pa ya bi du, bi 'yɛ̞na.

⁴⁰Nu ra Jesús bi 'yɛ̞mp'a:

—Pɛ dí xi i mahøn'a, nu'bu gui 'yɛc'yɛi gue i ja ma ts'ɛdi, guin nu rá ts'ɛdi Oją nui̯xte, bi 'yɛmbi.

⁴¹'Bex bi mba ma 'ueque ra do buya. Nε nu ra Jesús bi ndøts'e nε bi 'yɛ̞na:

—Ma Ta i, dadí 'da a ra jamadi, nguetho gá 'yøh ma nde 'bu má äp'i'i nanguehna ra Lázaro. ⁴²Nɛ dí padi thocpa thoho guí øh ma nde.

Pε nu'a dí xi a ya, ngue dí ndepe da 'yøh ya i 'bäcua ya, n'dahma da 'yεc'yεi gue gue'e bá pɛngä ua.

⁴³Νε nu'bʉ mí jua'a bin yaui Oja

bin yą nts'edi:

—Lázaro, bá pøni.

44 Nɛ nu'a xí du bá pøm bu ja rán 'yägui buya, nsøt'e thoho ra 'bø't'e rá 'yɛ nɛ rá gua, nɛ nu rá yą n'dan'yo ra 'bø't'e mán søt'e. Nu ra Jesús bi 'yɛ̞mp'u:

—Xothu, da zä din 'yo buya, bi 'yɛ̞n'a ra Jesús.

I hma da fent'a ra Jesús

⁴⁵Nε xun ngu ma mijudíohe ngue xí dɛn'na ra María, bi 'yɛ̞c'yɛi ra Jesús 'bu mí nu a bi 'yøt'e. ⁴⁶Pɛ nu mi'da bi mba bá xih yu fariseo 'bɛ'a bi 'yøt' ra Jesús. ⁴⁷Janangue'a bi man yu dambäja nɛ yu fariseo ngue 'darpu dim pɛtihu u yú mi ngurpihu, nɛ bin 'yɛ̞m zɛhɛ u:

—'Be'a sä ga øthu, nguetho nu'a ran 'yohu i øt'e xun ngu yun t'øt'e nuixte. ⁴⁸ Nu'bu hin ga hɛcpahu, gätho yu ja'i da 'yɛmbi yú ngurpi. Nɛ nubuya nu yu romano da zuju ngue da bɛni ya dá tɛnhdu man'da ra Hmu, nɛ hinga hønt'u dí tɛnhdu u, nɛ di juarca ma duxca nijahu nɛ di juaju buya.

⁴⁹Nɛ nu'a n'da í Caifás, ra dambäja a ra jeya a, bi 'yena:

—Ha hin guí pạhmbu 'bɛ'a da zä ga øthu ya. ⁵⁰Ha hin guí pạhmbu man'da xun ho 'bu n'datho da du n'dahma hinga gätho na nguju ga juahmbu, bi 'yɛna.

5¹Pɛ him bi bɛ̞nsɛ a bi ma, pɛ nangue'a ra da̞mbäja̞ a ra jɛya a, janangue'a bi jap Oja̞ da ma 'bɛ'a da t'ørpa ra Jesús, gue da du da yanje dyu judíohe. ⁵²Pɛ nu ra Jesús 'bu mí du, hinga høngdähe in nde da yanje, pɛ nɛ u gätho mi'da i 'bui hønbu go bi zä gätho na ndoho ra ximhäi, 'darpu dam 'buhmbu a. ⁵³Nɛ nangue'a xí man ra Caifás, 'da'angu bi bɛ̞n u gätho ma ngurpihe buya. Nɛ gue'a ra pa bi ma njuantho da hyo ra Jesús.

54 Janangue'a m'bɛt'o bi 'uetho ts'u bu 'buh ma ngurpihe, nɛ bi mba bu ja rá nyạni n'da ra uhäi, nɛ dám 'buhmbe bu 'da yu pa bu ja ra hnini Efraín.

⁵⁵Nε mi ts'utho da zøn ra pa ran dąbaxjua, n'da ra dąnts'ihmε bi zängahe Oją maya'bu dyu judíohe. Janangue'a xun ngu yu ją'i 'da'a n'danni bi nɛts'i bi mba bu Jerusalén. Nguetho bi sije m'bɛt'o thoho ga hoc ma ją'ihe bu, nangue ra dehe. ⁵⁶Nε nu'bu mí zøm bu ja ra dąniją u 'da ma mijudíohe, bi hyom bu a ra Jesús nɛ bin 'yän'du n'da ngu n'da u:

—'Bɛ'a guím mamhbu, ha ba ɛh ra Jesús da nu ram pɛti ua uague hin'na, bin 'yɛmp'u.

⁵⁷Nu yʉ dambäja nɛ yʉ fariseo bi 'yɛn'ʉ:

—Nu'bu 'bui to i padi hapu i 'bui, jatho da ma, n'dahma da zä gam benthe, bi 'yemp'u yu ja'i.

Pa nsispi ra 'yęthi rá gua ra Jesús

12 Di 'bɛh man 'dato pa din ja ra dants'ihmɛ bu Jerusalén nangue ran dabaxjua, nɛ bi mba mahøn'a bu Betania a ra Jesús, nguepu rá ngu a ra Lázaro, gue'a xí jap ra Jesús bi dambɛni bu ja rán 'yägui ngue xí du. ²Nu'bu mín de, nu ra Marta bi 'yørpa n'da ran

ts'ihmɛ ra Jesús. Nɛ'a ra Lázaro 'darpʉ bin sihmɛhʉ bʉ ja ra mɛxa.

³Nɛ bi mba ra María bʉ mí huh ra Jesús, bi xispa rá gua made litro ra 'yɛthi ɛmmɛ yʉman'u nɛ xʉm hmadi, nɛ í 'yonba ra 'yɛthi nangue rá xtą. Nɛ gätho ra ngu bi yʉn'a ra 'yɛthi. ⁴Nɛ mí 'bʉpʉ rá ts'ʉnt'ʉ ra Simón, ra Judas Iscariote a, n'da ma mixädihe a, nɛ gue'a bi dä a ra Jesús. Nɛ nu'bʉ mín nu a bi 'yøt'a ra María, bi 'yɛna:

⁵—Hanja him bi 'bä a ra 'yɛthi, yʉ mahuahi thoho xtín ja rá muui gue xtín t'un yʉ hyoya, sä bi 'yɛn a ra Judas.

⁶Ngubʉ bi man a nguetho ra bɛ a, nɛ him majuani di huɛc yʉ hyoya. Pɛ rá 'bɛfi a gue ní mbɛsca ma mbɛtihe dyʉ xädihe nɛ'a rá mbɛti ra Jesús. Nɛ nzại hac zɛhɛ ra mbɛti 'bʉ in nde. ⁷'Bex bi 'yɛn'a ra Jesús:

—O guidí hεcpa na ra xisu, nguetho bi 'yørca a rán säui da 'yørque, nguetho mi ts'ʉtho ga tu ngue da t'ägagui. Janangue'a mí pɛsta'a ra 'yɛthi na, xtí jacä ma ją'i 'bʉ dá tu. ⁸ Pε thocpa thoho gam 'bʉhmbʉ yʉ hyoya, pɛ nugä hinga thocpa thoho dam 'bʉhmbʉ ua, bi 'yɛn'a ra Jesús.

I hma da tho ra Lázaro

⁹Nu'bu mi 'yøde xun ngu ma mijudíohe, gue 'bupu ja rán ngu ra María a ra Jesús, bi mba bá nu, pɛ hinga hønt'a ra Jesús in nde da nu, pɛ nɛ'a ra Lázaro gue xí xox ra Jesús bu ja ran 'yägui. ¹⁰ Janangue'a nu yu dambäja bi bɛni nɛ'a ra Lázaro da hyo. ¹¹ Nguetho gue'a ra Lázaro í japi man'da xun ngu bi 'yɛc'yɛi a ra Jesús u ma mijudíohe.

Bi t'ɛspa ra Jesús 'bʉ mí yʉt'a Jerusalén

12 Nu'bu mi hyax buya dá mbähmbe ra Jesús bu Jerusalén. Nɛ nu'u yu ja'i xun ngu xí zøm bu Jerusalén gue in nu ra dampɛti, bi 'yøde da mba bu ra Jesús. 13 Janangue'a bi gax yu xi yu jaxiza nɛ bi mba bá thapu 'yu. Nɛ nts'ɛdi bi 'yɛ̞n'u:

—Nuixte tho rá ts'ɛdi Oją di jąp na ma Hmuts'ʉt'abihʉ dyʉ israelhʉ, dyʉ judíohʉ, bi zøcua ya nangue rá thuhu Oją, bi 'yɛ̞n ʉ.

¹⁴Nu'a ra Jesús i hux'a n'da ra t'uburu xí dini, tengu mán t'o't'i bu ja rám hman Oja. ¹⁵Gue mán t'o't'i:

Him man gan suhu ya gyu menguhu ua Sión, nguetho ba ɛh ni hmuts'ut'abihu, da hyux'a n'da ra t'uburu, mí ɛn rá t'ohni maya'bu.

¹⁶Pɛ nuje dyu xädihe him 'bexque dá pąhmbe 'be'a nám bøn na bin ja, pɛ nu'bu mí mbeng mahɛts'i ra Jesús dá bɛmhbe buya gue guehna bi t'ørpa ra Jesús gätho mán t'o't'i maya'bu.

¹⁷Nu'ʉ yʉ jạ'i mí 'bʉhmbʉ ra Jesús 'bʉ mi xox'a ra Lázaro, xí ma gue xí xox'a ra Lázaro. ¹⁸Janangue xʉn ngu yʉ jạ'i bi mba bá thạ a ra Jesús, nguetho bi 'yø a xin ja. ¹⁹Janangue'a nu yʉ fariseo bin 'yɛ̞mzɛhɛ ʉ:

—Nte ts'u ní mbatho 'bu dadí hɛcpahu yu ją'i. Ha hin guín nuhu ya gätho ra ximhäi i tɛnnu ra Jesús, bin 'yɛmp'u.

I hon ra Jesús ʉ yʉ mεngu bʉ Grecia

²⁰Nɛ nu'ʉ 'da bi mba bʉ Jerusalén da nu ram pɛti bʉ, yʉ mɛngu bʉ ja ra häi Grecia u. ²¹Nɛ bin timhbu ra Felipe u 'bu mám 'buhmbe bu Jerusalén. Nɛ nu ra Felipe, ma mixädihe a, ra mɛngu bu Betsaida ra xɛqui Galilea. Nɛ nu yu mɛngu bu Grecia bi 'yɛn'u:

—Hague n'yø, dín nde dan yahe ts'u ra Jesús, bi 'yɛn'u.

²²Nu'a ra Felipe bʉya bi xi a ra Andrés, nε nu'ʉ bʉya bi xi a ra Jesús. ²³Nε nu ra Jesús bi dạt'ʉ:

—Ya mi ts'utho da zøn ra pa dan uixtegä 'bu dá tu, guecä dán ją'igä ua ja ra ximhäi. 24 Majuani dí xi ahu, tengu n'da ra hmudä, nu'bu hin da thupu ja ra häi ngue dim 'bɛpu, hin din xandi. Pe nu'bu da thuhu, da zä din xandi xʉn ho. ²⁵Nu'a to'o i su din unba 'bu da dengui, da mba ma unbi rá te a, pε nu'a hingui su din unba 'bu da dengui guecua ja ra ximhäi, din ja ra te mazai a. ²⁶Nguetho nu'bu 'bu a n'da in nde din 'yɛhɛ nanguecä, jatho da bɛni tengu dím bengä, ne ga com'be ma ts'edi bu mahets'i buya. Nu'bu 'bu a n'da din 'yɛhɛ nanguecä, nu'a ma Ta da numanho a.

Ra Jesús im ma da tho

²⁷—Pɛ nuya ɛmmɛ tu ma mbui, bi 'yɛn'a ra Jesús. 'Bɛ'a sä ga xih ma Ta. Ha sä ga äpi di 'uegä 'bɛ'a din jacä ya. Pɛ hingui sä, nguetho gue'a bá ɛcä ngue gan nu'a i jatho gan nugä ya, bi 'yɛn'a ra Jesús.

²⁸Νε nubuya bin yąui rá Ta:

—Ma Ta a i, dami jaqui gan nugä hønt'a go nda'a dí t'ɛ̞s'i i, bi 'yɛ̞mbi.

'Bexque bi t'ø'a n'da ra nde bu mahɛts'i, bi 'yɛ̞na:

—Pε ya dí ja'i guín nu, nε guin nu mahøn'a, bi 'yɛna.

²⁹Nɛ nu'ʉ yʉ ją'i mí 'bähmbʉ bʉ, bi 'yøh rá nde Oją nɛ bi 'yɛ̞n'ʉ 'da:

—Bin gäni.

Nε nu'u mi'da:

—Masque n'da rám 'bεhni Oją mahεts'i bi zofo, bi 'yεn ʉ.

³⁰Pε nu'a ra Jesús bi 'yɛ̞mp'ʉ:

—Nu'a ra nde gá 'yøhmbu, nts'ɛdi bi zocä Oja, hin nangue ga pacä bi 'yøh ma nde, pɛ guepu gui pahmbu ya i øh ma ndegä a. ³¹Nuya mi ts'utho ga øt'ä a dí fadi nda'u da mba ma unbi, nɛ nda'u hin da mba ma unbi. Nɛ mi ts'utho ga tap ra zithu, gue in ts'ut'abi ua ja ra ximhäi a, nɛ da ts'änba ya da t'ɛrbu ja ran unbi. ³²Nu'bu dá cuat'ä bu ja ra pont'i, gue'a dá zohn'du gätho yu mbui yu ja'i ga xifi di däc yu mbui gan yan'u, bi 'yɛn'a ra Jesús.

³³Ne guehna mi man na, ngue mi ndepe xtám bạh yu jali 'be'a nín date dí tho a. ³⁴Ne nu yu jali buya bi dat'a:

—Nugähe ya dá øhmbe im mam bu ja rán t'ɛdi Oja, i 'bui mazäi a ra Cristo. Nɛ guí ɛnsɛ jatho gui tu bu ja ra pont'i, gán ja'i ua ja ra ximhäi. To'o e ngue guí ɛnsɛ gán ja'i ua ja ra ximhäi. Masque hinga gue'e gra Cristo 'bu.

35 Nu ra Jesús 'bex bi 'yɛmp'u:

—Him min ngu yu pa ga xän'nahu ya, ngue drán nɛquigä. Nde'bu gan 'yohu bu ja ran nɛqui ya, nɛ hin da zu ahu ra 'bɛxui. Nguetho nu'a to'o i 'yo bu ja ra 'bɛxui hingui padi hapu i 'yo. 36 Dami hyamhbu ran nɛqui ya, janya i ja ya, nɛ din ja ran nɛqui ni mbuihu buya, bi 'yɛmp'u.

Nε nu'bʉ mí jua a bi man ra Jesús bi mba, bin 'yansε.

Hinguin nde da 'yɛ̞c'yɛi u ma mijudíohe

³⁷Pε guexta'a him bi 'yεc'yεi xun ngu ma mijudíohe, madague'a xun ngu yun t'øt'e nuixte bi nu bi 'yøt' ra Jesús. ³⁸Pεgue bin ja tengu thoho bi man ra pøngahya Isaías 'bu mí ma 'bε'a din ja, bi 'yɛna:

Ma Hmu i, to'o maha bi 'yɛ̞c'yɛi a dá mamhbe

ne to'o bi bą 'bu gmí 'yuh ni ts'edi, bi 'yena.

39 Him bi zä bi 'yɛɛ'yɛi u 'da nguetho nu'bu him mín nde u, bi mba njapi tengu bi man ra Isaías 'bu mí ma mahøn'a:

⁴⁰ Nu'a Oją bi gomba yú dä u ne bi mep yú mbui u,

gue din ja tengu'bu din xädä, ne hin din ja yún 'yomfeni yú mbui.

ne hin da zä di päh yú mbui gue xtí punba Oją u, bi 'yɛn a ra Isaías.

⁴¹Guehna bi man ra Isaías 'bʉ mí 'yut Oją din ja rá ts'ɛdi nui̯xte ra Cristo, nɛ bi mam bʉya 'bɛ'a da 'yøt'a ra Cristo.

⁴²Pε xun ngu ma ngurpihe mim bɛnsɛ ngue εc'yɛi ra Jesús. Pɛ him bi ma gue εc'yɛi u, nguetho i su xtá hyøn a thi yu fariseo bu ja yú niją, gue má zä da zan'u. ⁴³Nguetho man'da bi bɛni 'bɛ'a da man yú mija'ihu, gue da 'yɛmbi xun ho u, xinda gue'bu go xtá 'yɛmp Oja xun ho u.

Dí mba ma juanbi n'da u yum hman ra Jesús

44Pe nu ra Jesús nts'edi bi ma:

-Nu'a to'o i ęc'yeigui, i ęc'yei a bá pεngui. 45 Nguetho nu'u to'o i paqui, i pa a bá pengä. 46 Nu'a bá gcä gue ga yorba yú mbui u 'bucua ja ra ximhäi. Nu'a to'o da dengui hin din 'yo bu ja ra 'bexui a. 47 Nu'a to'o da 'yøh mam hmangä nε hingui εc'yεi, pε hinga guecä ga juanbä a, nguetho hin ná ecä ga øt' ran juanbate, pε ná εcä ua gan yan u 'bucua ja ra ximhäi. 48 Nu'a to'o hin da 'yɛc'yɛigui nɛ hin da 'yø a dím mangä ya, nu'a mam hma dá mangä ya, gue'a dí juanba u 'bu rán zegui ra pa. 49 Nguetho him mam hmanse a dá ma, pe nu'a ra Ta gue bá pengä bi xiqui 'be'a dá mangä ne 'bepu ná xänba yu ja'i. ⁵⁰Ne dí pącä da din ra te maząi u to'o da hyạn rám hma ma Ta. Nε gue'a i xicä a ne dí mangä a buya, bi 'yen'a ra Jesús.

Ra Jesús bi xuguaba yú xädi

Nu'bu mi ts'utho da mbuh ra dampeti nangue ran dabaxjua, ne mí pah ra Jesús ya mi ts'utho da zøn ra ora da bøngua ja ra ximhäi, da mbeng bu bí 'buh rá Ta. Ne gätho yu pa mi 'bucua, midí huec'u to gätho bi 'yec'yei a, ne nuya man'da di huec'u di huequi.

²Nɛ nu'bʉ mán sihmɛhe ra Jesús 'bʉ bin de, nu'a ra zithu bʉya bi bɛnba ra Judas rá ts'ʉnt'ʉ ra Simón Iscariote gue di dä a ra Jesús. ³Nu ra Jesús i pądi bí nɛxpʉ 'bʉh rá Ta nɛ da mbeng bʉ mahøn'a, nɛ i pądi gue rá Ta bi unni gätho 'bɛ'a i ja gue di manda zɛhɛ. ⁴Pɛ guehma bin 'yɛhɛ nanguecähe. Nguetho bi ndants' 'bʉ mín sihmɛ nɛ bi mbø'a n'da rá pahni, in nde nte di hɛni. Nɛ

bi dut' rá foho n'da ran thu'yɛ. ⁵Nɛ nu'bʉ mí xit' ra dehe ra ximbo, bi dʉ'mi bi mberca ma guahe nɛ bi dugahe nangue'a ran thu'yɛ mim bongui bʉ rá foho.

⁶Nɛ nu'bʉ mí zøm bʉ huh ra Simón Pedro, nu ra Pedro bi 'yɛmp'a bʉya:

—Ma Hmu i, ha gui perca ma gua, bi 'yɛna.

⁷Nu ra Jesús bi dąti nε bi 'yεmbi:

—Majuani hingui sä gui pah ya 'be'a nam bøn'a dí øt'ä, pe m'bejua da zä gui padi, bi 'yembi.

⁸Nu ra Pedro xø bi 'yɛmp'a:

—Njąm'bʉ dan uni gui perca ma gua.

Pε nu ra Jesús bi dąt'a:

—Nu'bu hin ga pe't'ä ni gua, nte man jaui 'bu, bi 'yɛna.

⁹Nu ra Simón Pedro buya bi 'yɛ̞mp'a:

—Ma Hmu i, hinga hønt'a ma gua 'bʉ, nε'a ma 'yε nε'a ma yą, bi 'yεmbi.

¹⁰Nu ra Jesús bi 'yεmp'a:

—Pε ya ma zä bi bo ahu nangue ni ts'oquihu, nguetho nu'a to'o bin hi ya bi bo rá ją'i. Pε hønt'u ni guahu zại da 'be't'e ngue pärpu yu fonthäi hapu guí 'yohu. Pε nu n'da ahu him bin hi, bi 'yɛna.

¹¹Ngubu bi ma nguetho bi bądi i hupu a di dä a. Janangue'a bi ma hinga gätho dán hihe.

¹²Nu'bʉ mí jua a bi xʉguagahe, bi hye mahøn'a rá pahni nε bin säya. Bi 'yɛ̞nje bʉya:

—Ha guí pạhmbu 'bɛ'a nam bøn'a dá øt'ahu ya. ¹³Nu ahu guí ɛnju drá xänbategä nɛ guí ɛnju drá Hmugä. Xun ho guím mamhbu nguetho gue'a dí øt'ä a. ¹⁴Dá pe't'ä ni guahu, SAN JUAN 13 204

guecä ni xänbateju nɛ ni Hmuju. Janangue'a nɛ ahu gam perpa ni guahu n'da ngu n'da ahu, ngue gui 'yøthu gui cohmbu häi nɛ 'da gdám fäxtahu. ¹⁵ Nuya dá ut'ahu 'bɛ'a gui 'yøthu nguetho dín nde ahu gui 'yøthu tengu dá øt'ahu. ¹⁶ Majuani dí xi ahu, man'da nuixte n'da ra Hmu xinda gue'u yú mbɛfi, man'da nuixte a i pɛhnate xinda gue'a ram 'bɛhni. ¹⁷ Nu'bu guí pahmbu a dím mangä ya nɛ thocpa thoho gui 'yøthu a, gan johyahu nangue Oja 'bu.

¹⁸Pɛ hín dím mangä gätho ahu da zä gan johyahu nangue Oją, nguetho dí pąt'a ni mbuihu n'da ngu n'da ahu gue dá huan'nahu. Pɛ guehma dá huahni gätho ahu, n'dahma din ja 'bɛ'a bi man rá t'ohni Oją ngue bi 'yɛna: "Nu'a n'da dí sihmɛ'be, gue'a di dägä a." ¹⁹M'bɛt'o dí xi ahu 'bɛ'a da t'ørcä, janangue'a da zä gui thoqui gui 'yɛc'yɛigahu gue drá Cristogä 'bu ya bin ja. ²⁰Majuani dí xi ahu, nu'a to'o da 'yømanho a im man a n'da mam 'bɛhnigä, i simanhogä a nɛ i simanho a bá pɛngä, bi 'yɛnje.

Ra Jesús i pądi di dä a ra Judas

²¹Nu'bʉ mí jua a bi man ra Jesús, bi du rá mbʉi, nɛ bi xije mahøn'a:

—Majuani dí xi ahu, i 'bu a n'da ahu di dägä, bi 'yɛnje.

²²Nugähe buya dyu xädigähe, dán hyɛthe n'da ngu n'daje nɛ dán 'yänhde: "To'ogahu di dä 'bu," dán 'yɛmfe. ²³Nɛ nugä 'darpu mi hu'be ra Jesús nguetho ɛmmɛ midí huɛgä. ²⁴Nu ra Simón Pedro buya bi uanga rá 'yɛ, ndeque ga änni nda'a di dä a. ²⁵Nugä buya gue 'darpu mí hu'be ra Jesús, dá änni: —Ma Hmu i, to'o a guím ma, dá embi.

²⁶Bi 'yɛ̞ngä a ra Jesús bʉya:

—Nu'a ga cärpa a ra hmɛ ra tuhu gue ga unni, gue'a di dägä a, bi 'yɛngä a buya.

Ne 'bex bi un'na ra hme a ra Judas Iscariote rá ts'unt'u ra Simón. ²⁷Ne nu'bu mí zi ra hme, 'bex bi yut' ra zithu rá mbui. Ne nu ra Jesús bi 'yembi:

—Nu'a guí nde gui 'yøt'e dami 'yøt'a n'dihi ya, bi 'yɛ̞na.

²⁸Nε xínga n'dagähe mi huhmbe bu ja ra mɛxa gue dá pahmbe 'bɛ'a nám bøn a bi xifi. ²⁹Pɛ 'dagähe dím bɛmhbe gue gue'a bi xih ra Judas da mba da däi 'bɛ'a ga homhbe 'bu bin ja ra dants'ihmɛ. Nɛ nu mi'da gähe dím bɛmhbe gue bi xih ra Judas da mba di unni ts'u ra mbɛti yu hyoya, nguetho mí ha ra buxa i o ma mbɛtihe. ³⁰Nɛ nu'bu ya xí zi ra hmɛ, 'bex bi mba n'dihi. Ya bin xui buya.

Ra 'da'yont'gdi

³¹Nu'bʉ ya xí mba ra Judas, nu ra Jesús bi 'yɛ̞ngähe:

—Nuya di nεqui dan uixtegä guecä dán ją'igä ua ja ra ximhäi. Nε nu'a ga øt'ä ya, gue'a man'da dí nεqui gue xun hotho Oją. ³²Ga udi nuixte xun hotho Oją, nε nu Oją da 'yudi gue nuixte xun hogä guecä ngue dán ja'i ua ja ra ximhäi. Nε mi ts'utho ya din ja a dím mangä. ³³Ma zu t'uthni ahu, man'da zu ora dam 'buthmbu ya. Nε m'bejua guim bɛnju. Nε ga xi ahu ya tengu dá xi u ma ngurpihu, hingui sä 'darbu ga mbähä hapu ga mbagä. ³⁴Nuya ga xi ahu n'da ran t'ɛdi ma'da'yo, gue

'da xtín huɛctahu n'da ngu n'da ahu. Tengu thoho bu dá huɛc'ahu, ngubu gan 'yørpahu n'da ngu n'da ahu. ³⁵Nangue 'da gdín huɛctahu n'da ngu n'da ahu, gätho yu ja'i da badi guí tɛngahu, bi 'yɛnje.

Ra Jesús i pądi din cøn'a ra Pedro

³⁶Nu ra Simón Pedro bi 'yɛmp'a:

—Ma Hmu i, hapu gui mba.

Nu ra Jesús bi dąt'a:

—Hingui sä 'bex gui tengä ya hapu ga mba. Pe m'bejua da zä gui mba bu ga mbagä.

³⁷ Janangue'a nu ra Pedro bi 'yɛ̞mp'a:

—Hanja hingui sä 'darpu ga mbɛ ya, madague'a nɛcä da thogä nangue'a ga tɛn'ni i, bi 'yɛna.

³⁸Nu ra Jesús bi dąt'a:

—Ha majuani gui tengui madague'bu da tho i, nguetho ná hyundi xquí cøng 'bu bi mbah ra tamfø, bi 'yembi.

Ra Jesús ra 'yu ní zøm bu bí 'buh rá Ta

Pε o di tu ni mbuihu. Guí εc'yεihu Oją janangue'a necä dami 'yεc'yεigahu. ²Nubu rá ngu ma Ta bí ja bu xun ngu yu ngu mahotho. Nu'bu hin te di ja bu, xcá xi ahu 'bu. Pegue i ja bu, janangue'a nu'bu dá mbagä gua hoc'ahu hapu dam 'buhmbu. ³Nε nu'bu dá mbagä ba hoc'ahu bu dam 'buhmbu, ne ba pengä mahøn'a ga six ahu bu ngue 'darpu dam 'buhmbu buya. ⁴Nubu ga mbagä guí pąhmbu ne guí pąhmbu ra 'yu, bi 'yɛnje.

⁵Pɛ nu'a ra Tomás bi 'yɛ̞mp'a:

—Ma Hmu i, hin dí pahmbe hapu gui mba, xín dí pahmbe a ra 'yu, bi ' yena.

⁶Nu ra Jesús bi 'yɛmp'a:

—Nugä drá 'yugä nɛ guecä ní fa a majuani nɛ dadí ungä ra 'da'yote mazai. Njon da zä da zøm bʉ 'bʉh ma Ta hinda hønt'bʉ da 'yɛc'yɛigui. 7 Nu'bʉ majuani xquí pajʉ nɛ'a ma Ta xquí pahmbʉ 'bʉ. Pɛ ja gá pahmbʉ ya nguetho ya guín nuhʉ a ya, bi 'yɛnje.

⁸Pε nu ra Felipe bi 'yɛ̞mp'a:

—Ma Hmu i, pε hin dín nuhe a ni Ta, dami jaje gan nuhe nε nte ga 'bɛhmbe, bi 'yɛ̞na.

⁹Nu ra Jesús bi dąt'a:

—Ha guexta'a hin guí pąqui ne nya'a tho xtám 'buhmbu. Nu'a to'o xun nugui, ya xun nu ma Ta. Hanja gní 'yɛngui: "'Yurcahe ni Ta." ¹⁰Ha hin guí εc'yεi gue n'datho dí com'be ma Ta. Nu'u yum hma dí xi ahu him mam hmansegä u, pε yɨm hman a ma Ta i 'bucua ja ma mbuigă, ne gue'a di jacă ga øt'ä a dí øt'ä. 11 Dami 'yɛc'yɛigahu gue n'datho dí com'be ma Ta. Pe nu'bu xun hei gui pahmbu, dami pąhmbu gue hønt'a Oją sä i øt'u yu nuixte dí øt'ä. Janangue'a da zä gui 'yɛc'yɛihʉ gue n'dat'a dí com'be ma Ta. 12 Majuani dí xi ahu, nu'bu gui 'yɛc'yɛigahu, nu ra 'bɛfi dí øt'ä, ne ahu da zä gui 'yøthu 'bu. Ne man'da nuixte yu 'befi da zä gui 'yøthu nguetho ga mba bu bí 'buh ma Ta. ¹³Nguetho hønt'a go 'bɛ'a gui 'yähmbu 'bu 'da angu dím bɛmhbu, ga øt'ä, janangue'a da t'espa ma Ta nangue a ga øt'ä, rá Ts'unt'ugä a. 14 Hønt'a go 'be'a gui

'yäqui 'bʉ n'dat'a dím bɛmhbʉ, ga øt'ä.

Ra Jesús bi ma ba pεnpa rá Hogandahi Oja

¹⁵Νε man'da bi man ra Jesús, bi 'yεna:

—Nu'bu majuani høngdä guín numanhoju, dami pes'hu 'be'a gätho dí xi ahu. 16 Ne ga äp ma Ta ba pen'nahu man'da nim fäts'ihu da mbäx ahu tengu dá øt'ahu, ne gam 'buhmbu mazai a buya. ¹⁷Gue'a rá Hogandąhi Oją a, nε di ja ahu gui pahmbu a majuani. Pe nu'u di ho ra ximhäi hin da zä da zini, nguetho hin'yu 'be'a dí ba a, xíngui padi 'be'a rá 'befi a. Pe nu ahu guí pahmbu a nguetho dí 'buhmbu a, nε da zøn ra pa din zam bu mbo ni mbuihu. 18 Hin gan jahu tengu yu hyoya t'uhni 'bu dá mbagä, nguetho ba pengä dam 'bucä bu mbo ni mbuihu. 19 Mi ts'utho ya him man da nuc'u di ho ra ximhäi. Pε nu ahu da zä guin nuju nangue ni mbuihu, ne zai gam 'buhmbu nguetho zai dí 'bucä. 20 Ne nu a ra pa da zøh rá Hogandahi Oja, da zä gui pahmbu gue dam 'bupu mbo ni mbuihu, ne gam 'buhmbu bu ja ma mbuigă buya. Ne da ză gui pahmbu dí 'bui nangue ma Ta. ²¹ Hønt'a go to'o i øt' man t'edigä ne pe'ts'a mam hmangä, gue'a majuani høngdä i numanhogä a. Ne nu'a ma Ta necä ga huɛc'be a, nɛ ga japi da badi xun ho ma ts'edi, bi 'yenje.

²²Nu'a ra Judas, pε hinga gue'a ra Judas Iscariote, bi 'yän'na bʉya:

—Haguen ja høngdähe gui jaje ga pahmbe xun ho ni ts'ɛdi, nɛ hin'na u di ho ra ximhäi, bi 'yɛ̞na. ²³Nu ra Jesús bi dạt'a:

—Nu'bu i 'bu a n'da ahu majuani høngdä i numanhogui, da mbɛsca mam hmangä a 'bu. Nɛ di huɛc'a ma Ta buya, nɛ ba ɛ'be, nɛ dan zam'be bu mbo rá mbui a. ²⁴Pɛ nu'a to'o hingui numanhogui, hingui pɛ'ts' mam hmangä a. Nɛ nu'a mam hmangä, him mam hmansɛgä pɛ rám hma ma Ta gue'a bá pɛngä ua, bi 'yɛna.

25 Ne xø bi 'yena:

—Nuya yum hma dá xi ahu gätho yu pa dám 'buhmbu ua ja ra ximhäi. ²⁶Pε nu'a nim fäts'ihu rá Hogandahi Oja gue ba pɛnh'nahu ma Ta, tengu'bu da guecsɛgä a, nu'a di bɛn'nahu yum hma xtá xi ahu, nɛ da xän'nahu 'bɛ'a gätho mi'da.

²⁷Dadín 'yɛhmbu ya, dami hyamhbu ran t'unni ngue ran johya dadí 'da ahu ya, nɛ thocpa thoho din ja ahu. Hinguin ja tengu rán johya ra ximhäi. O di tu ni mbuihu nɛ hin din su ni mbuihu. ²⁸Nɛ nu'bu majuani guín numanhoju, din johya ni mbuihu nanguehna dí xi ahu: "Ga mba bu bí 'buh ma Ta." Nɛ man'da ja rá ts'ɛdi xinda guecä. ²⁹Nugä xtá xi ahu 'bɛ'a gätho din ja guepu da zä man'da gui 'yɛc'yɛigahu 'bu ya bin ja.

30 Nuya him ma nya'a dan yahu ya, nguetho ba ɛpu rá ngurpi ra ximhäi. Pɛ njam'bu bi dacpä a, janangue hin'yu rá ts'ɛdi da dacpä a ya. 31 Pɛ jatho ga øt'ä a ma 'bɛfi ga øt'ä ya, n'dahma da ba u 'bucua ja ra ximhäi hønt'a ma Ta dín numanhogä, nɛ zai dí øt'a i xiqui. Janangue'a ga ndanshu ya ga mbähä, bi 'yɛnje ra Jesús.

Rá za ra uva majuani ne'u yú 'ye

15 Nu ra Jesús bi 'yɛna:
—Nugä drá za majuạni,
ngue i zuh yún dät'o. Nɛ nu'a ma

207 SAN JUAN 15

Ta di jamansu a. ²Nɛ nu'ʉ yʉ́ 'yɛ hingui ja yʉ́n dät'o, nu'a ma Ta da hyɛqui, nɛ da mbøgue. Pɛ nu'ʉ yʉ 'yɛ i ja yʉ́n dät'o, di hoqui gue din ja mi'da yʉ́n dät'o. ³Nu'ahʉ ya mahoqui ahʉ nangue mam hmangä dá xi ahʉ. ⁴Dami thojʉ ngue thocpa thoho dam 'bʉhmbʉ. Nguetho hingui sä gui 'yøthʉ rá 'bɛfi Ojạ 'bʉ hin gui thoqui gui hyạmhbʉ ma tegä, tengu n'da rá 'yɛ ra za hingui sä din jasɛ yʉ́n dät'o 'bʉ hin da nɛxpʉ rá te a rá za.

⁵Nugä tengu'bu drá za, nu ahu tengu'bu yú 'yɛ ahu ra za i zuh yún dät'o. Nu'a to'o da guat'i nanguecä, da hyanga ma ts'ɛdi nɛ din zudi xun ngu yún dät'o. Pɛ nu'a hin da guat'i nanguecä nte din ja. ⁶Nu a to'o da hyɛgä din ja tengu n'da ra 'yɛza 'bu bi däsɛ, da 'yot'i, da mba ma bunt'i nɛ i pa ma pɛti da t'upu ja ra sibi.

⁷Nu'bu gui thoqui gui cuathu nanguecä ne'bu din zam bu ja ni mbuihu mam hmangä, dami 'yähmbu 'bɛ'a guín nde gui 'yähmbu nε din ja buya. ⁸Nε nu'bu din ja xun ngu nin dät'ohu, gue'a dí 'yu a rá nuixte ma Tahu a, nε gue'a dí fądi majuąni ma 'yęc'yei ahu a. ⁹Tengu thoho bu ni huggä ma Ta, ngubu na huɛc'ahu. Dami thoqui guin ndehu man hugcate. ¹⁰Nu'bu gui pespu ni mbuihu gätho dí xi ahu ne gui 'yøthu a, da zä thocpa thoho gui pahmbu man hugcate 'bu. Tengu bu na pe'ts'ä rám hma ma Ta, janangue'a thocpa thoho dí pah rán huccate.

¹¹Gätho ya dí xi ahʉ n'dahma ga comhbʉ a man johyagä, nɛ da yupʉ ni mbʉihʉ nɛ da bonts' thoho

buya. 12 Nu'a man t'ɛdi dí xi ahu, gan hugju n'da ngu n'da ahu, tengu bu na huɛc'ahu. 13 Nu'a ran huɛcate man'da xun ho, gue di un rá te n'da nangue u yú amigo da yani. ¹⁴Nu ahu ma amigo ahu 'bu guí øthu 'bɛ'a gätho dí xi ahu. 15 Him ma xi ahu ma 'yεhε ahu, nguetho nu a ra 'yɛhɛ hingui padi 'bɛ'a i øt' rá hmu. Pε nuya dí xi ahu ma amigo ahu, nguetho ya dá xi ahu gätho bi xicä ma Ta. ¹⁶Nu'ahu hin gá huangahu, pε go dá huan'nahu nε dá sän'nahu din zuh nin dät'ohu, nangue gui 'yøthu ma 'befigä ne da hyät' mazai. Janangue'a hønt'a go 'bɛ'a gui 'yähmbu ma Ta nangue n'dat'a dím bemhbu, din ja buya. ¹⁷ Nuna man t'ędigä dí xi ahu, gan hugju n'da ngu n'da ahu.

Nu ra ximhäi di ucpa ra Jesús ne'u i tenni

¹⁸Ne xø bi 'yen'a ra Jesús: -Nu'bu di uc'ahu u di ho ra ximhäi, dami pahmbu m'bet'o thoho bi ugä. 19 Nu'bu da 'da angu guí øthu u di ho ra ximhäi, nu'u da numanho ahu u 'bu. Pe hin guí øthu tengu øt'u nguetho dá huan'nahu. Janangue'a di uc'ahu ya. 20 Pε guim bɛmhbu a ram hma dá xi ahu: "Ps man'da rán säui da hnumanho n'da ra Hmu xinda gue'u yú mbɛfi." Nɛ nugä hingui hnumanhogui, janangue'a ha ma gue'adahu, da hnumanho ahu. Ne him bi t'ømanho a dá ma, janangue'a ngutho hin da t'ømanho a guim mamhbu. ²¹Ne din ja bu da t'øt'ahu nangue guí tengahu. Nguetho nu'u di ho ra ximhäi hingui pa a bá pengä.

22 Nu'bu hin xcá søcä ua gue xcá zofo, hin xtám bądi gue ja yú ts'oqui 'bu. Pɛ nuya hingui sä da gøn yú ts'oqui u ya. 23 Nu'a to i pøh rá cuɛ nanguecä, nɛ a ma Ta i numan'u. 24 Nu'bu hin xcá øt' yun t'øt'e njo'o sä da 'yøt'e, hin xtám bądi gue ja yú ts'oqui 'bu. Pɛ nuya ya bi nu man t'øt'e nuixte. Pɛ bi cuɛcthohogä u. Pɛ nu'u bi ugä gue'a ma Ta bi up'u. 25 Pɛ gue'a mán t'o't'i bu ja rán t'ɛdi Oja maya'bu, bi 'yɛna: "Din ja ra cuɛ nanguecä, pɛ hin'yu 'be'a dín cuɛ u," mí ɛn ra t'ohni zai din xä u.

²⁶Pegue ga xicä ma Ta ba pen'nahu rá Hogandahi, ne da mbäx ahu di ja ahu gui pahmbu a majuani ne da xi ahu nanguecä. ²⁷Ne ahu da zä guim mamhbu majuani nanguecä, nguetho gätho yu pa xtám'buhmbu gue'bu go má tum' ra 'befi ne guehya, bi 'yɛn'a ra Jesús.

16 Νε man'da bi man ra Jesús bi 'yɛ̞na:

—Guehya dí xi ahu n'dahma hin gui hyɛgahu 'bu gá nuhu yun unbi. ²Nguetho da hyøn ahu thi bu ja yú niją ma mijudíohu, nɛ da zøn ra pa da hyo ahu nɛ da bɛni gue'a ní 'yørpa rá 'bɛfi Oją a. ³Nɛ din ja bu da 'yøt'ahu, nguetho him bi bạcä, xínga gue'a ma Ta. ⁴Pɛ nuna dí xi ahu, janangue'a nu'bu bin ja, guim bɛmhbu buya gue gue'a xtá xi ahu. Nɛ nuna dí xi ahu ya, hin dá xi ahu mám'bɛt'o, nguetho hin ní zøn ra ora ga mba.

Nu rá 'befi rá Hogandahi Oja

⁵—Nuya ga mbagä bu bí 'bu a bá pɛngä. Nɛ xínga n'da ahu

guí ängahu ya hapu ga mbagä. ⁶Nguetho i tu ni mbuihu ngue dá xi ahu ga mbagä. ⁷Pε guehma majuani dí xi ahu, man'da xun ho nangue ahu ngue ga mbagä. Nguetho nu'bu hin ga mbaga, hin da zä ba ɛh nim fäts'ihʉ 'bʉ. Pɛ nu'bu dá mbagä, ba pen'nahu nim fäts'ihu gue rá Hogandąhi Oją. ⁸Ne nu'bu bi zøcua ja ra ximhäi rá Hogandahi Oja, di jap yu ja'i ua ja ra ximhäi da badi i ja yú ts'oqui, ne di japi da bądi drá 'yugä nangue ran ho, ne di japi da bądi din ja rá muui ran ts'o. ⁹Nu rá Hogandahi Oja di benba yu ja'i gue i jatho yú ts'oqui nguetho him bi xiqui gan yanba yú te. ¹⁰Nɛ di bɛnba yʉ ja'i gue drá 'yugä nangue ran ho. Da fądi nguetho ga thąmbęni ne da zingä ma Ta bu bí 'bui, ne hin da hnugä ua ja ra ximhäi. ¹¹Ne nu rá Hogandahi Oja di benba yu ja'i ngue din ja ran unbi rá muui ran ts'o, nguetho da ts'änba rá muui a rá 'bɛfi ra zithu gue nu'a rá ngʉrpi ra ximhäi.

¹²Guexta'a i jagä xʉn ngu dín nde ga xi ahu, pe hin gui hyäthu gui 'yøhmbu mi'da 'bu ga xi ahu. ¹³Pe nu'bu bi zøcua rá Hogandąhi Oją, da xän'nahu gätho a majuani. Ne nte da manse nanguese, pe hønt'a 'bɛ'a da xi Oja, gue'a da xi ahu a. Ne da xän'nahu 'bepu gdí 'yøthu rá 'bɛfi Oją, nɛ da xi ahu 'bɛ'a gätho man'da din ja. 14 Ne di japi da fadi i ja ma ts'edi xun ho, nguetho ga un mam hma da xän'nahu nanguecä. ¹⁵Nu'a nam bøni n'dat'a ra ts'ɛdi i jac'be ma Ta, janangue'a dá xi ahu, ga un mam hma da xän'nahu nanguecä.

209 SAN JUAN 16

Ni dumbuihu dim pommi ran johya

¹⁶—Nɛ hin guin nuju man'da pa o gue manyopa, pɛ sä guin nuju mahøn'a mi'da yu pa, nɛ m'bɛjua ga mba bu bí 'buh ma Ta, bi 'yɛna.

¹⁷'Bex bin 'yän'du 'da ma mixädihe:

—'Bε'a ní mba bi ma, nε εna:

"Hin guin nuju man'da pa o gue
manyopa, pε sä guin nuju mahøn'a
'da yu pa, nε m'bεjua ga mba bu
bí 'buh ma Ta," bi 'yɛnju. ¹8'Bε'a ní
mba gue bi xiju na, 'bε'a da 'yøt'e
'da yu pa. Hingui sä ga pahmbu
'bε'a man na, bin 'yɛmzεhɛ ma
mixädihe.

¹⁹Nu ra Jesús mi pądi 'bɛ'a nde da 'yänni, gue 'bɛ'a nam bøn'a xí man a, nɛ bi 'yɛnje:

—Ha gadín 'yänzehehu 'be'a nám bøn'a dám mangä 'bu má xi ahu: "Hin guin nuju man'dapa o manyopa, pe sä guin nuju mahøn'a mi'da yu pa," gue dá ɛngä. 20 Majuani dí xi ahu, da du ni mbuihu ne gan zomhbu, pe nu'u yu ja'i i ten ra ximhäi din johya u. Pe m'bejua buya nu ni dumbuihu dim pommi ran johya. ²¹Tengu n'da ra xisu 'bu bi zøn ra ora dim 'buh rá t'uhni, i tu rá mbui nguetho in nu ran unbi, pe m'bejua din johya 'bu bim 'buh rá t'uhni buya, ne him mam ben a ran unbi min nu. 22 Ne ngutho ahu i tu ni mbuihu ya. Pe gan nu ahu mahøn'a ne da hyu ni mbuihu, ne njon da zä da hyac'a nin johyahu buya.

²³Nɛ nu'bʉ bi zøn ra ora a dím mangä ya, nte gui 'yängahʉ. Pɛ majuani dí xi ahʉ, hønt'a go 'bɛ'a gui 'yäfʉ ma Ta 'bʉ 'dat'a dím bɛmhbu, nɛ din ja buya. ²⁴Nte ganá äfu ma Ta nangue ma thuhugä, pɛ nuya dami 'yäfu ya nɛ din ja ahu, janangue'a da yuh ni mbuihu ran johya.

Nu ra Jesucristo bi 'bɛrpa rá ts'ɛdi ra ximhäi

²⁵—Nuya yʉm hma dá xi ahʉ, yun t'uti u, bi 'yɛn'a ra Jesús. Pe da zøn ra ora hin ga xi ahu mi'da yun t'uti, pe njuantho ga xi ahu xun ho nangue Oja. ²⁶Nε nu'bu bi zøn'a ra pa dím mangä, da zä gui 'yäpzehehu ma Ta nangue ya guí paju, ne him man ga thocpä a guí äfu ma Ta. ²⁷ Nguetho guese ma Ta di huɛc'ahu nangue guín numanhoju, ne gá 'yęc'yeihu gue guepu bí 'buh ma Ta bá nexä. 28 Nugä bá nexä bu 'buh ma Ta, ne dá søcua ja ra häi. Ne ga pøngä mahøn'a ua ja ra häi, ga mba bu bí 'buh ma Ta, bi 'yεnje.

²⁹—Nuya mfądi 'bɛ'a guí xije ya, nguetho hin guí xije n'da ran t'uti ya, dá ɛmfe buya. ³⁰Nuya dí pąhmbe nte guídí 'bɛdi gui pądi, nguetho m'bɛt'o thoho guí pądi 'bɛ'a dím bɛmhbe 'bu ya ja a dín nde ga än'nahe. Nɛ gue'a ná pąhmbe gue guepu bí 'bu Oją gbí 'yɛque, dá ɛmfe.

3¹Nu ra Jesús bi 'yɛnje mahøn'a:
—Ha majuani guí ɛc'yɛigahu. ³²Pɛ
nuya bi zøn ra ora gan 'uɛxthu,
gui 'dahmbu, n'da an 'danni gui
mbähä. Nɛ gätho ahu gui sogahu.
Pɛ hin dan 'dasɛ nguetho dí 'bu'be
ma Ta. ³³Nuya yum hma dá xi ahu,
n'dahma guexta'a gan johyahu
nanguecä, madague'bu guin nuhu
ran unbi nangue ra ximhäi. Pɛ o di

tu ni mbuihu, pe guim bemhbu dá tạpä ra ximhäi.

Bin yaui rá Ta ra Jesús

17 Nu'bʉ mí jua a man ra Jesús, bi ndøts'e, nε bin yaui rá Ta:

—Ma Ta a i, ya bi zøm ma oragä din ja a gá sängui. Dami jap ya ɛmmɛ da bømanho 'bɛ'a ga øt'ä ya, ni ts'unt'ugui, nɛ gue'a dí fadi nuixte xun ho i buya. ²Nguetho ya xcá 'dac ra ts'ɛdi ga unni 'bɛ'a xcá sänba u gätho i 'bucua ja ra ximhäi, janangue'a ga un ra 'da'yote mazai u gätho gá 'daqui. ³Nɛ nu'a to'o i ja ra 'da'yote mazai, majuani dím pahmbu u, gue gue'e høn'a thoho i majuani grá Oja, nɛ nugä drá Jesucristogä gue guá pɛngä dan yantegä ua.

⁴Ya ní mba bu ga juacä ra 'bɛfi gá 'daqui, guepu da bah yu ja'i ua ja ra ximhäi emme xun hotho i. 5Ma Ta i, nu'bu ya dá juacä, dami jaqui ga conhui ni nuixte bu guí 'bui, tengu tho mín jaui 'bu má hin'yu ra ximhäi. 6 Nuya dá xih yu ja'i nangue e, gue nu'u gá huanhua ja ra ximhäi. Ni mbeti u, ne gá 'daqui, nε bi mbε'ts'a nim hma dá xänba u. ⁷Ne i pą u ya gue gue'e gá 'dac ra ts'edi dá øt' ra 'befi dá øt'e, ne u yum hma dá mangä. ⁸Nguetho bi hyạn'a ram hma gá xiqui dá xifi. Janangue'a i padi majuani bá nexä bu guí 'bui, ne bi 'yec'yei gue gue'e guá pengä dan yantegä ua.

⁹Nugä dí äp'a ya gui fäx'i ts'u u, nɛ hin dí ä a nim fäts'i nangue u i tɛn ra ximhäi. Pɛ hønt'u gue gá 'daqui nguetho ni mbɛti u. ¹⁰Nɛ nu'u gätho ma mbɛti ni mbɛti u, nɛ nu'ʉ gätho ni mbɛti ma mbɛti ʉ. Nɛ gue'ʉ i udi nuixte xʉn hogä ʉ.

11 Nuya him man dam 'bucua ja ra ximhäi. Ga mbagä bu guí 'bui. Pɛ nu'u go di thoqui dim 'bucua u. Janangue'a, ma Hogata i, dami jamansu u gätho gá 'daqui nangue ni ts'edi zɛhɛ, gue da gohi tengu'bu n'danja'itho tengu gaui. 12 Gätho yu pa dám 'buhmbe u gá 'daqui, dá jamansu u nangue ni ts'edi gá 'daqui. Nɛ xinga n'da bim 'bedi, hønt'a n'da nts'änni dim 'bedi, tengu mán t'o't'i bu ja ni søcua maya'bu ngue ngubu din ja.

¹³Ne nuya mi ts'utho ga mba bu guí 'bui, pε nuna dím mangä ya ngue dí 'bucua ja ra ximhäi, janangue'a da yuh yú mbui u i øh ya nangue man johyagä. 14 Nugä dá un'na nim hma ne bi hyam buya. Janangue'a di ucpa ra ximhäi u, nguetho hing yú mengu ua ja ra ximhäi u, tengugä hind rá mengugä ua ja ra ximhäi. 15 Hin dí ä'a i gue gui 'uec'u nanguecua ja ra ximhäi u,ρε dí ä'a i gui jamansup yú mbui hin da dap ra zithu u. 16 Nu'u hing yu mengu ua ja ra ximhäi u, tengu thohogä. ¹⁷Dami xänbi xun ho a nim hma majuani, janangue'a da 'uegue xun ho nangue yun ts'o i ja ua ja ra ximhäi. ¹⁸Tengu tho bu guí 'dac ra 'befi dá jap yu ja'i ua ja ra ximhäi da bą i, nguthogä dí un ra 'bɛfi u, di jap yu ja'i ua ja ra ximhäi da ba'a i. 19 Dan unse janangue'a ne'u tengu'bu da du nangue yú nyombui, ne da zä da den'na ram hma majuani.

²⁰Nɛ nu'bʉ bi mam mam hmammi ʉ i ɛ̞c'yɛigä ya, nɛ nu'bʉ bi 'yɛ̞c'yɛigä ʉ da sifi, nɛ'ʉ

dí äp'a nim fäts'i nangue gätho н bнya. ²¹ Janangue'a gätho da gohi tengu'bu n'danja'itho, tengu thohogaui ma Ta i, n'datho dí conhui. Dami japi n'dat'a da ben u, nguetho n'dat'a man 'yomfɛniui dá unui gätho u. Janangue'a da 'yɛc'yɛi u i tɛn ra ximhäi, gue gue'e guá pengä dan yantegä ua ja ra ximhäi. 22 Nu ra ts'edi gá 'daqui dá undä u, gue da zä da gohi tengu'bu n'danja'itho, tengu gaui. ²³Nugä dí 'buhmbe u, ne'e dí 'buhmi, janangue'a majuani da zä gätho 'dat'a gam bemhbu. Ne da nu u i ten ra ximhäi, da badi gue gue'e guá pengä dan yantegä ua ja ra ximhäi, nε da bą ʉ i tεn ra ximhäi gue şmme guidí huşc'u tengu bu gní huęgagui.

²⁴Ma Ta i, dín nde 'darpu dan zamhbu u gá 'daqui, gue da nu mazai a ran ho tate thoho gá 'daqui. Nguetho zai guidí huggä ng gue'bu go má hin'yu ra ximhäi. ²⁵Ma Hogata a i, nu ra ximhäi hingui pa'a i. Pe nugä dí pa'a i, ng'u 'da gá 'daqui i padi gue gue'e guá pengä. ²⁶Nugä dá japi bi ba'a i, ng man'da man'da ga japi da badi gätho nin ho, gue da zä din ja xun ho nin hugcate bu mbo yú mbui u, tengu tho bu nan jagä nin hugcate. Ng dan zam bu ja yú mbui u, bi 'ygmp'a rá Ta.

Bi fent'a ra Jesús

Nu'bu mí jua'a bin yaui rá
Ta, dá mbähmbe ra Jesús
buya dyu xädihe, dá 'daxhe n'da ra
t'uhyg gue ra Cedrón, ne dá cuthe
bu ja n'da ra nuandät'o. ²Nu'a ra
Judas, gue'a di dä a ra Jesús, mí
papu ja ra nuandät'o nguetho zai

mí pähmbe bu ra Jesús. ³Nu yu fariseo nɛ yu dambäja bá pɛhn'du 'da yu dofui nɛ mi'da yun 'yohu gue bán 'yohu ra Judas. Gätho i ha yu sibi nɛ yu juai. ⁴Nu ra Jesús i padi gätho 'bɛ'a din ja ngue da t'ørpe. Janangue'a bi mba bin c'athu, nɛ bi 'yän'du:

- —To'o guí homhbʉ, bi 'yεmbi.
- ⁵Nε bi da u:
- —Dí homhbe ra Jesús ra mεngu bu Nazaret, bi 'yɛ̞n'u.
 - —Guecä, bi 'yɛ̞n'a ra Jesús bʉya.

Ne i 'bähmbu bu ra Judas gue di dä. ⁶ "Guecä," 'bu mí 'yɛn'a ra Jesús, 'bex bi goh yú xutha u yun hyonte ne bi 'ya u buya nangue ra mbidi. ⁷ Nu ra Jesús bi ma mahøn'a:

- -To'o guí homhbu.
- Nε bi dą u:
- —Dí homhbe ra Jesús ra mεngu bu Nazaret, bi 'yɛ̞n'u.
 - ⁸Nu ra Jesús bi dąt'u buya:
- —Ya dá xi ahʉ, guecä. Pε nu'bʉ høngdä guí honjʉ, hinga nɛhya ma xädi gui sixhʉ, bi 'yɛ̞na.

⁹Nɛ guehna bi man na ra Jesús bin thɛui a bi xih rá Ta 'bu mín yaui, ngue xí 'yɛmbi: "Gätho gá 'daqui xínga n'da ga 'bɛdi," xí 'yɛmbi. ¹⁰Nu ra Simón Pedro buya bi gux a rá juai mí ha nɛ bi 'yespa rán 'yɛizagu a rá 'yɛhɛ ra dambäja, rá thuhu Malco a. ¹¹Pɛ nu'a ra Jesús bi 'yɛmp'a ra Pedro:

—Fo'ts' ni juai a nin t'ojuai. Nuna ra mbohi xʉn zänga ma Ta ha hin ga sigä na, bi 'yɛ̞mbi.

Bi ts'ix bu 'buh ra hmumbäja a ra Jesús

12 'Bex bi bɛnt'u yu dofui nɛ'u yu hmu nɛ yu policía bi mbɛn ma

mijudíohe, nɛ bi du't'i. ¹³M'bɛt'o bi zixpʉ 'bʉh ra Anás rá ndøhyą a ra Caifás, nɛ nu'a ra Caifás, ra dạmbäją a ra jɛya a. ¹⁴Guehna ra Caifás ngue xí xi ʉ yʉ́ mi ngʉrpihʉ, gue man'da xʉn ho 'bʉ n'datho da du, xinda gue'bʉ gätho ga juahmbʉ.

Nu ra Pedro bi gøn'a ra Jesús

¹⁵Nu ra Simón Pedro, nεcä buya, dá tɛn'be ra Jesús. Nε madím pa'be a ra dambäja, janangue'a bi zä dá cut'ä bu bi mba ma cu't'i a ra Jesús bu mbo rá mbä't'i a rá ngu ra dambäja. ¹⁶Pε nu ra Pedro mí 'bäpu thi bu ja ra goxthi. Pε dá pøngä buya gue dá äp ra mate a ra mbängoxthi, janangue'a bi zä bi yut'ambo ra Pedro buya. ¹⁷Nu'a ra mbängoxthi buya, gue n'da ra xisu, bi 'yɛmp'a ra Pedro:

—Nu'i ha hinga gue'e rá xädi'i nu ran 'yohu, bi 'yɛmbi.

Nu ra Pedro bi dat'a:

—Hin'na, hinga guecä, bi 'yɛna.

¹⁸Madín tạspihu u yú 'yệhê ra dạmbäją ne yu policía a ra Pedro, nubu ja ra sibi xí 'yudi, nguetho xun se.

Nu ra hmumbäją bi juąnba ra Jesús

¹⁹Nu ra dambäja bi 'yänna ra Jesús to'o gätho i tɛnni, nɛ bi 'yänni 'bɛ'a ním hma im ma 'bu in xänbate. ²⁰Nu ra Jesús bi da'a:

—Nugä zại dá mam bu ja ma nijahu nɛpu ja ra danija, guepu zại dim pɛti gätho ma mijudíohu. Njam'bu dá mangä bu njongui 'buh yu ja'i. ²¹Nɛ ndetho guí ängui 'bɛ'a dá mam 'bu mán xänbate. Nde'bu gui 'yän'du bi 'yøh mam hmangä. Nu'u i padi 'be'a dá mangä u, bi 'vena.

²²Nɛ nu'a ra Jesús 'bu mí dat'a ra dambäja, nɛ nu'a n'da ra ngurpa dofui bi mbɛmp'a rá hmi, bi 'yɛmbi:

—Hanja ngubu gá xih ra dambäja, bi 'yembi.

²³Nu ra Jesús bi 'yɛ̞mp'a:

—Nu'bu ja 'bε'a dá mangä gue hingui ho, dami ma. Pε nu'bu nte dá mangä, hanja gní pɛgbi, bi 'yɛmbi.

²⁴Nu ra Anás buya bi mbenhna ra Jesús bu 'buh ra Caifás, rá mi dambajaui.

Nu ra Pedro bi gøm mahøn'a ra Jesús

²⁵Nɛ mí 'bäpʉ ra Simón Pedro madín tạspi a. Nɛ än'dʉ i 'bähmbʉ:

-Ha nε'e rá xädi'i nu.

'Bex bin cøni:

-Hinga guecä, εna.

²⁶Nu'a n'da rá 'yɛhɛ ra dạmbäją bʉya, gue dim mɛniui a ra 'yɛhɛ xí 'yespa rá zagu ra Pedro 'bʉ mí 'yɛna da yạn'a rá Hmu, bi 'yɛmbi:

—
çna gue'e dá nu a bu ja ra nuandät'o, bi t'emp'a ra Pedro.

²⁷Nɛ bin cøm mahøn'a ra Pedro. 'Bex bi mbah ra tamfø.

Nu ra Pilato bi juanba ra Jesús

²⁸T'+xuditho bá ts'i bu ja rá ngu ra Caifás a ra Jesús, nɛ bi ts'ix bu ja ra nguts'+ut'abi. Pɛ nu ma ngurpihe dyu judíohe dyu israelhe, him bi yuzɛhɛ bu mbo nguetho ɛn yun t'ɛdi din ts'on yun judío, nɛ hin da zä da zi ran ts'ihmɛ nangue ran dabaxjua 'bu xtán yurpu mbo.

²⁹Janangue'a nu ra ts'+ut'abi Pilato,

bi mba bu thi gue da zo u yu yapate, nɛ bi 'yan'du:

—'Bɛ'a gní yąfʉ a ran 'yohʉ, bi 'yɛ̞na.

³⁰Nε bi dą u ma ngurpihe:

—Nu'bu hin gra ts'om'bäi, hin xcá dä ahu 'bu, bi 'yɛn'u.

³¹Νε nu ra Pilato bi 'yεmp'ʉ:

—Dami sixhu 'bu, nε gui juanbahu nangue nin t'εdi zεhεhu, bi 'yɛna.

Nε nu ma ngurpihe bi dąt'a:

—Pε hin'yʉ man t'ɛdizεhεhe gue'a ga hohe n'da, bi 'yɛn'ʉ.

32 Nu'a bi man'ʉ bin thɛui a bi man a ra Jesús 'bʉ mí ma 'bɛ'a mán date dí du a, gue da mba ma cuati bʉ ja ra pont'i. 33 Nu ra Pilato bi mbeng mahøn'a bʉ ja ran ts'ɛmbate nɛ bi 'yänna ra Jesús:

—Nu'i ha gue'e grá hmuts'ʉt'abi yʉ judío, bi 'yɛ̞mbi.

34 Nu ra Jesús bi dąt'a:

—Ha guím bɛ̞nsɛ 'bɛ'a guím ma, uague n'dan'yo bi xi i nanguecä, bi 'yɛ̞mbi.

³⁵Nu ra Pilato bi 'yɛm bʉya:

—Hin drá judíogä. 'Bε'a gá 'yøt'e thą, ngue bi dä'a ua ni mijudíohu nε ni dąmbäjąhu.

³⁶Nu ra Jesús bi dąt'a:

—Hin dám hmuts'ut'abigä ua ja ra ximhäi. Nu'bu xcám hmuts'ut'abigä ua, xtín tunhdu u ma ja'igä u bi bendgui 'bu, ne hin xtí dägä ua 'bu. Pe nu ma ts'edigä him bi nequi ua ja ra ximhäi a, bi 'yena.

³⁷Nu ra Pilato bi 'yɛmbi mahøn'a:

—Ha majuani grá hmuts'ut'abi 'bu, bi 'yembi.

Nu ra Jesús bi dat'a:

—Majuani guím ma gue drá hmuts'ut'abigä ne gue'a dám 'bucä ua ja ra ximhäi, ne gue'a ná ecä ua gue ga u'a majuani. Nu'u to'o in nde da ba'a majuani, da 'yømanho a dím mangä u, bi 'yɛna.

³⁸Nu ra Pilato i ɛna:

—'Bε'a maha a majuani, njon da zä da badi nda'a a majuani, bi 'yεmthoho.

Bi ts'änba rán unbi ra Jesús

Ne nu'bu mí jua'a bi man ra Pilato, bi mba bu thi din yahu u yú yapate mahøn'a, ne bi 'yemp'u:

—Nte mán ts'o dá tịnbi. ³⁹Pɛ nu'ahu zại guí xiju ga thợc'ahu n'da ra ofädi 'bu bi dät' ra pa ran dąbaxjua. Ha guín ndehu ga thợc'ahu ni hmuts'ut'abihu, bi 'yɛna.

⁴⁰Nε bi mbudi bi mbafi nts'εdi u, bi 'yɛn'u:

—Hin'na, hinga gue'a, pε nu'a ra Barrabás, gue'a gui thøgahe a, bi 'yɛn'ʉ ma ngʉrpihe.

Nu ra Barrabás, n'da ra hyote a.

19
Nu ra Pilato bi manda dí fɛi a ra Jesús. ²Nu yu dofui buya bi 'yørpa n'da ra corona gue yu 'yu'uini, nɛ nts'ɛdi bi huspa rá ya ra Jesús. Nɛ bim pärba n'da ra 'bø't'e xun jupoi tengu dim pät' yu hmuts'ut'abi. ³Nɛ bi den buya nɛ bi 'yɛnspa yú biba, bi 'yɛmbi:

—Biba, grá hmuts'ʉt'abi yʉ judío, bi 'yɛ̞mbi. Nɛ bi mbɛ'mi bʉya ngue yʉ́ 'yɛ.

⁴Bi mba bu thi mahøn'a a ra Pilato, bin yahu ma ngurpihe:

—Nuya ga dä ahʉ na ran 'yohʉ, dami pahmbʉ nte dá tinba n'da ran ts'o gue xʉ 'yøt' na, bi 'yɛ̞na.

⁵Bi ts'ix bu thi ra Jesús buya, ya i hu'ts' ra corona ngue nt'øt'e yu 'yu'uini, ne he ra 'bø't'e xun jupoi.

—I 'bäcua na ran 'yohʉ ya, bi 'yɛ̞n'a ra Pilato.

⁶Nu'ʉ yʉ dạmbäją nɛ ma ngʉrpihe 'bʉ mín nu a ra Jesús, nts'ɛdi bi mbafi, nɛ xʉn ngu yʉ nidi bi 'yɛ̞na:

—Dá du, dá 'døm'pu ja ra pont'i.

Nu ra Pilato bi 'yɛ̞mp'ʉ bʉya:

—Dami sizεhεhu 'bu guín nde gui cuathu bu ja ra pont'i, nguetho nugä hin te dá tịnbä n'da ran ts'o xu 'yøt' na, bi 'yεmp'u.

⁷Nu'u ma ngurpihe bi dapuya:

—Nugähe i jaje n'da man t'ɛdihe gue da du n'da im ma tengu im ma na, nguetho bi mansɛ guesɛ rá Ts'unt'u Oja, bi 'yɛn'u.

⁸Nu'bʉ mí 'yø a ra Pilato mí ɛn'a ra Jesús gue rá Ts'ʉnt'ʉ Oja a, man'da bi zu a. ⁹Nɛ bi zix pʉ mbo ja ran ts'ɛmbate mahøn'a a ra Jesús, bi 'yänni:

—Hapu ε majuani guí nεts'i. Pε nu ra Jesús him bi dati. ¹⁰Nu ra Pilato bi 'yεmp'a:

—Hanja hin gní tharcagui. Ha hin guí padi ja ma ts'edi ga cuat'a bu ja ra pont'i, ne ja ma ts'edi ga xoc'a bu, bi 'yembi.

¹¹Nu ra Jesús bi dądi:

—Hin xtín ja ni ts'edi ne nte sä gui 'yørque 'bu hin xtán zän Oją 'be'a gui 'yørque. Pe nu'u bi dägä ua, man'da ja yú ts'oqui u xinda gue'e, bi 'yen'a ra Jesús.

¹²Nɛ nubʉya nu ra Pilato ɛmmɛ bi hyoni 'bɛpʉ dí hyɛtho a ra Jesús. Pɛ nu ma ngʉrpihe nts'ɛdi bi mbafi, bi 'yɛ̞n'ʉ:

—Nu'bu gui hyɛt na, nin suiui a ma hmuts'ut'abihu ra César 'bu. Nguetho nu'bu 'bo'o da ma gue im hmuts'ut'abi zɛhɛ din suhmi a ra César 'bu, bi 'yɛn'u.

¹³Nu'bʉ mí 'yøhna ra Pilato, bá si bʉ thi mahøn'a a ra Jesús bʉ ja rá ngun'yu ran juanbate magats'i, dí amfe ma ndehe Gabata. Na bi hyux ra Pilato bu ja rá maxa ran juanbate. ¹⁴Nu'a ra pa a, i pa ma hoqui yun ts'ihma da ts'i 'bu bi hyats'i, nangue ran dabaxjua. Na di 'bah mits'u da zøn i huxhyadi. Na nu ra Pilato bi 'yamp'u ma ngurpihe:

—Nuya 'bäcua na ni hmuts'ʉt'abihʉ, bi 'yɛ̞mp'ʉ.

¹⁵Pε nts'εdi bi mba u:

—Dá du, dá duhma, dá 'døm'pu ja ra pont'i, bi 'yɛn'u.

Nε nu ra Pilato bi 'yɛ̞mp'ʉ:

—Hanja gní 'yɛnju gam ma da 'døm'pu ja ra pont'i ni hmuts'ut'abihu, bi 'yɛmbi.

Pε nu yu dąmbäją bi dądi:

—Njongui 'bucua man'da ma hmuts'ut'abihe, hønt'a ma hmuts'ut'abihu bu Roma ngue ra César, bi 'yɛn'u.

¹⁶Nu ra Pilato buya bi 'yøt'a bi nde yu mbäja, bi manda dí cuati bu ja ra pont'i ra Jesús. Ne bi ts'ix buya.

Bi mba n'dø'mi bu ja ra pont'i ra Jesús

¹⁷Nɛ bi zix yu dofui a ra Jesús buya, nɛ i tuzehɛ rá pont'i bu ní mba, da zøm bu ja n'da ra nyuni t'ɛmbi Gólgota, nde da ma ra Nyuni nyaxmu. ¹⁸Nɛ nu'bu mí zøm bu, bi mba n'dø'mi ra Jesús bu ja ra pont'i. Bim 'bä inde rá pont'i, nɛ n'da an 'danguadi bim 'bä u mi'da yu pont'i, bi guarpu u mi yoho. ¹⁹Nu ra Pilato, bi 'yo't'a n'da ram hma bi 'yɛna: "Nuna ra Jesús ra mɛngu bu Nazaret, rá hmuts'ut'abi yu judío na," bi 'yo't'i. Nɛ nu'a ra t'ohni bi mba n'dø'mi bu ja ra pont'i. ²⁰Xun ngu

ma mijudíohe dyu israelhe bi nu buya 'bɛ'a nt'o't'i bu, nguetho mbɛ ndehnini tho bu. Nɛ nt'o't'i nangue ma ndesɛhe ra hebreo, nɛ yú nde yu mɛngu bu Grecia gue ra griego, nɛ yú nde yu mɛngu bu Roma gue ra latín. ²¹Nu'u yu dambäja buya bi 'yɛmp'a ra Pilato:

—Hanja gá 'yo't'i gue ma hmuts'ʉt'abihe. Pɛ dami hoqui da ma: "Bi mansɛ: Nugä drá hmuts'ʉt'abi yʉ judío," da 'yɛ̞na, bi 'yɛ̞n'ʉ.

²²Pε nu ra Pilato bi dąt'u:

—Ya nt'o't'i 'bɛ'a dá o't'ä, dá guet'a, bi 'yɛmthoho.

²³Nu'bu mí cuar bu ja ra pont'i ra Jesús, nu yu dofui buya bi gąspa yú he, goho munts'i bin ja yú he, n'da ngu n'da yu dofui n'da n'da munts'i bi gąx'u. Pɛ nu rá pahni rám 'bɛxøts'e hin hapu ma zøte a.
²⁴Janangue'a bin 'yɛmzɛhɛ u:

—Nde'bu ga øthu n'da ran taha to'o da bøni din theui ra pahni na.

Ne nu'a bi man'u bin theui a mán t'o't'i bu ja rá t'ohni Oją gue njabu da 'yøt'u, mi ena: "Bi mba ma darqui ma he, n'da a n'da munts'i bi gax'u 'da. Pe nu'a mam 'bexøts'e bi t'øt'a n'da ran taha to'o da gats'i," mí en rá t'ohni. Gue'a bi 'yøt' yu dofu a.

²⁵Nuya mí 'bäpʉ ja ra pont'i rá mbe ra Jesús nɛ a rá juhuɛ, nɛ'a ra María rá bømbe a ra Cleofas, nɛ'a ra María ra mɛngu bʉ Magdala a. ²⁶Nɛ nu'a ra Jesús 'bʉ mín nu a rá mbe, nɛcä gue madí huɛ̞gä, bi xi a rá mbe bʉya:

—Ma mbe i, dami 'yɛmbi ni ts'unt'u nu ma xädi guí 'bähmi, bi 'yɛmbi. ²⁷Nε bi 'yɛngä ra Jesús bʉya:

—Dami bɛni tengu'bʉ ni mbe nʉ ma mbegä, bi 'yɛngui.

Nε 'bex dá sixä bʉ ja ma ngu bʉya, nε dá jamansu a.

Bi du ra Jesús

²⁸Nɛ nu'bu mí man a ra Jesús bi bah puya gue bi juah rá 'bɛfi mí mam bu ja rá T'ohni Oja gue din ja. Nɛ bi 'yɛm buya:

—Dí tuthe, bi 'yεna.

Ne'a bin theui a mán t'o't'i a bi ma. ²⁹Ne mí høpu n'da ra t'uxaro i po ra guindät'o xun ju. Nu'u mí 'bäpu buya bi gärpu ja ra guindät'o a n'da ena ra funjo gue bi zinni, bi fospa rá ya ra xithi buya ne bi hyurpa rá nde ra Jesús da zu'ts'i. ³⁰Nu'bu mí zu'ts'a ra Jesús:

—Ya bi guah ma 'bɛfi, bi 'yɛna.
'Bex bin ye'mahäi rá yą, nɛ bi unsɛ rá te bi du bʉya.

Bin sunba rá 'bøts'e ra Jesús

31 Nu ma ngurpihe hingui ndepe da guathoho bu ja yu pont'i u yu ja'i 'bu ya xu hyats'i, nguetho gue'a ra pa a ya man'da tate nangue ra dampeti. Janangue'a bi t'äp ra mate ra Pilato da mba n'uacpi yú juangua gue da du n'dihi u, ne da mba ma tongui buya. 32 'Bex bi mba u yu dofui, ne bi 'uacpa yú juangua u yoho mí cuarpu ja yú pont'i guepu mí 'bäh rá pont'i ra Jesús. 33 Pε nu'bu mi zøm bu cuat'a ra Jesús, bi nu gue ya xí du, janangue'a him bi 'uacpa yú juangua a.

34Pe nu'a n'da ra dofui bi sunba
rá 'bi'bøts'e ra Jesús a ra ts'ąt'egui.
'Bex bi bøn ra ji ne ra dehe. 35Ne

nugä gätho dá nusɛ 'bɛ'a bi t'ørpa ra Jesús. Janangue'a majuani na dí o't'ä ya. Nɛ guehna dí o't'ä na n'dahma da zä gui 'yɛc'yɛihʉ. ³⁶Nɛ nu 'bɛ'a gätho bin ja, bin thɛui a mán t'o't'i bʉ ja rá søcua Oja gue din ja. Nɛ man t'o't'i: "Xínga n'da rá do'yo da mba n'uacpi," mi ɛn ra t'ohni. ³⁷Nɛ man'da bi hmam bʉ ja rá T'ohni Oja, bi 'yɛna: "Nu'ʉ di ਚcpi da nu gue gue'a bi mba ma sਚnbi ra ts'aṭ'egui rá 'bøts'e," mí man'a ra T'ohni.

Bi t'ä'a ra Jesús

³⁸Ne nubuya nu ra José ra mengu bu Arimatea, nu'a n'da rá 'yɛc'yɛi ra Jesús, pε him mi ma gue mí εc'yεi nguetho mí su ma ngurpihe, pε nuya bi 'yäp ran t'εdi ra Pilato di tongba rá ngợc'ygi ra Jesús bu ja ra pont'i da 'yägui. Ne nu'bu min t'un ran t'ɛdi ra José, bi mba bʉya nε bi tongba rá ngợc'yεi ra Jesús. ³⁹Νε bá εh ra Nicodemo buya, gue gue'a xí zøm bu mí 'buh ra Jesús n'da ra xui. Ne i tu ra 'yethi emme i yuman'u, mbe 'däte ma 'det'a kilo nan hyu, ma thąspi ra mirra a ra áloes. 40 Nu'bu mi mbantpa rá ngøc'yei ra Jesús ra hoc'bø't'e xun ho, ne bi 'yurpa ra 'yethi guepu ním fix ra 'bø't'e, tengu zại dí øthe dyu judíohe 'bu dí ähmbe n'da ra du. 41 Ne i ja bu n'da ra mba'ye jombu ja ra pont'i xí 'døm'ma ra Jesús, ne nubu häi oqui bu n'da ra hyado ngue ran 'yägui, mahoqui pe njon ní 'yo bu n'da ra du. Νε jabu n'da ra nuandät'o bu rá goxthi a ra hyądo gue ran 'yägui. 42 Ne nu'a ra pa man'da tate thoho nangue ran dabaxjua ε ma guepu da mbudi.

Janangue'a bi cu't'a n'dihi bu ja ra hyado a rá ngoc'yɛi ra Jesús, nguetho hinga yatho bu.

Bi dambeni a ra Jesús

T'uxuditho domingo hin ní nec ra häi nu ra María ra mengu bu Magdala bi zøm bu ja ran 'yägui. Bi nu gue xí mba njunni a ra xindo mi juax bu ja rá goxthi ran 'yägui. Bá pengui ne bán tihi, bi zøm bu mí 'bu'be ra Simón Pedro ne bi 'yenc'be:

—Bin juc ma Hmuhu. Ne hin dí padi hapu bi thux ya, bi 'yenc'be.

³Dá mbɛ'be bʉ ja ran 'yägui bʉya. ⁴Emmε dán ti'be, bin ts'ogui ts'u ra Pedro, ne m'bet'o go dá søngä bu ja ra hyado. ⁵Dá c'a't'ä bu mbo dá nu hønt'u yu 'bø't'e cax bu ngue xí 'bant'i. Pɛ him 'bex dá cʉt'ä mbo. ⁶Nε nu'bʉ mí zøm bʉ ra Simón Pedro, 'bex bi uɛntho bu mbo, nɛ'a bi nu cax bu yu 'bø't'e. ⁷Nε nu'a n'da ra 'bø't'e xí 'banba rá ya ra Jesús n'danni mí cats'i, ma do'mi a. 8Necä dá cut'ä mbo buya, madague'bu m'bet'o dá søngä bu. 9Ne nu'bu má nu 'bɛ'a di ja bʉ, dá ɛc'yɛigä gue majuani bi dambeni a ra Jesús. 10 Dá peng'be bu ma ngu'be buya.

Nu ra Jesús bi nequi bu mi 'bä a ra María

¹¹Pε nu'a ra María bi gotho bu ja rá goxthi ra hyądo nε i zoni nε di c'ąrpu mbo. ¹²Nε bi nu yoho yúm 'bεhni Oją mahεts'i i he yu t'axcahe. I hupu n'da bu mí ja rá yą ra Jesús nε hupu man'da bu mí ja yú gua. ¹³Nε bi xi a ra María:

—Grá xisu, hanja gná zoni, bi 'yɛmp'a. Nε nu ra María bi dạt'u:

—Nguetho bin juc'a ma Hmu nε hin dí padi hapu bi thuts'i, bi 'yɛna.

¹⁴Nɛ nu'bʉ mín hanni ra María, bi nu ra Jesús i 'bäpʉ. Pɛ him mi pądi gue gue'a. ¹⁵Nu'a ra Jesús bi 'yɛ̞mp'a:

—Grá xisu, hanja gná zoni, to'o guí honi, bi 'yɛmbi.

Pe nu ra María mím beni gue gue'a ran 'yohu di jamansu ra nuandät'o. Janangue'a bi 'yembi:

—Nu'bu gue'e gá juga ma Hmu, dami 'yurqui ts'u hapu gá pegui ne ga tuxä, bi 'yembi.

¹⁶Nε nu ra Jesús bi ndønba rá thuhu:

-María, bi 'yɛmbi.

Nu ra María 'bex bi 'bä't'i xun ho buya, bi nu nɛ bi 'yɛna:

—Raboni, nde da ma, "Xänbate i," bi 'yɛmbi.

¹⁷Νε nu ra Jesús bi 'yɛ̞mbi:

—Pε hingui sä 'bexque gui thäcä ya nguetho di 'bɛh mi ts'u ga mba bu bí 'buh ma Ta. Janangue'a 'bɛ ní mbahma bá xi u ma cuui ga pengbu bí 'buh ma Tagä, nɛ ahu ni Tahu a, nu'a ma Ojagä a, nɛ ahu ni Ojahu a, bi 'yɛmbi.

¹⁸Nu'a ra María ra mɛngu bu Magdala bi mba buya, nɛ bi xije dyu xädihe gue bi nu ra Hmu nɛ bi xije 'bɛ'a bi man'a.

Nu ra Jesús bi nequi bu mí 'bu u yú xädi

¹⁹Nε nu'bʉ mín de guet'a ra pa domingo, nthʉ't'i yʉ́ jut'i ra ngu bʉ dám 'bʉhmbe nguetho dá su ma ngʉrpihe, nɛ nu'bʉ má nuhe, 'bä inde bʉ dí 'bʉhmbe ra Jesús. Nɛ bi 'yɛna: —Daman johyahu, bi 'yɛnje.

²⁰Nε nubʉya bi 'yurcahe yʉ́ 'yɛ guepʉ xí 'dømbi, nɛ rán zʉ'bøts'e guepʉ xín sʉnba ra ts'ąt'ɛgui. Nɛ nu'bʉ má nuhe, dá pąhmbe majuani ma Hmuhe a, nɛ ε̞mmɛ dán johyahe bʉya. ²¹Nɛ bi ma mahøn'a ra Jesús:

—Daman johyahu. Ne tengu tho bu í 'dac ra 'befi ma Ta dá jap yu ją'i ua ja ra ximhäi da bądi, nguthogä dí 'da ahu ra 'befi gui jafu yu ją'i ua ja ra ximhäi da bądi, bi 'yɛnje.

²²Nε nu'bʉ mí jua a bi man na, bi huigähe ran dąhi n'da ngu n'dagähe bʉya.

—Dami hyạmhbu rá Hogandạhi Oja, bi 'yɛnje. ²³Nu'a to'o di päh yú mbui nangue yú ts'oqui, i ja nin t'ɛdihu gui xihmbu ma punbi a. Pɛ nu'a hin di päh yú mbui nangue yú ts'oqui, i ja nin t'ɛdihu gui xihmbu him ma punbi a, bi 'yɛnje.

Bi hyąxanjuąni a ra Tomás

²⁴Pɛ nu ra Tomás gue'a i t'ɛmbi ra Go a, n'da ma mixädihe, njo'o bʉ 'bʉ mí nɛqui ra Jesús. ²⁵M'bɛjua bʉya dá xihmbe ra Tomás:

—Nugähe dá nuhe ra Hmu. Pε nu ra Tomás bi 'yɛna:

—Pε nugä dí εna him majuani a guí xiju hinda hønt'bu gan nuse hapu bim fospa yu clavo yú 'ye, ne ga fospa ma saha hapu bim fox yu clavo ne ga fot ma 'ye bu ja rá 'bi'bøts'e, sä ga εc'yεi 'bu, bi 'yɛnje.

²⁶Nu'bu mí dät'an hyato pa buya dám petihe mahøn'a. Ne'a ra Tomás. Ne nthu't'i yu jut'i tengu mam'bet'o, pe xø bi nequi bu ra Jesús mahøn'a, bim 'bä inde bu dí 'buhmbe.

—Daman johyahu, bi 'yɛnje mahøn'a.

²⁷Nu'a ra Jesús buya bi xi a ra Tomás:

—Dami fos' ni saha ua bim foscä yu clavo nε guin nu ma 'yɛ, nɛ bá 'uạt ni 'yɛ gui fo'ts'ua ja ma 'bøts'e. O guí ɛna him majuạni pɛ dami 'yɛ̞c'yɛi, bi 'yɛ̞mbi.

²⁸Nu ra Tomás bi 'yɛmp'a:

—Ma Hmu i, ma Oją i, bi 'yεna.

²⁹Nu'a ra Jesús bi 'yɛ̞mp'a:

—Tomás, guí εc'yεi ya nguetho ya gá nugui. Pε nu'ʉ to da 'yεc'yεigui 'bʉ nte ní nu, man'da di jąp Oją ʉ, bi 'yɛmbi.

'Bepu án t'o't' na ra søcuą

30 Pɛ nu'ʉ yʉ hyonya nt'øt'e dá nuhe bi 'yøt' ra Jesús, hinga gätho dá o't'ä ua ja ra søcuą. 31 Pɛ hønt'ʉ 'da dá o't'ä dí ja ahʉ gui 'yɛฺc'yɛihʉ gue majuani ra Cristo a ra Jesús rá Ts'ʉnt'ʉ Oja a. Nɛ nu'bʉ gue'a gui 'yɛ̞c'yɛihʉ din 'da ahʉ ra 'da'yote mazai.

Bi nequi ra Jesús bu ndenthe

M'bejua buya dá nuhe ra Jesús mahøn'a, bi jaje dá pahmbe man'da xun ho bu ja ra dadehe Tiberias, n'dat'a ra dadehe Galilea. Ne ga xi ahu gätho bin ja. ²Mín 'yohe ra Simón Pedro ne ra Tomás i t'embi ra Go, ne ra Natanael ra mengu bu Caná ra xequi Galilea, ne man 'yohugä yú ts'unt'u gä'be ra Zebedeo, ne mí yoho ma mixädihe. ³Ne nubuya bi 'yenje ra Simón Pedro:

—Nugä ga mba na 'bahuą, bi 'yεnje.

—Ga mbähä 'bu, dá εmfe. Dá mbähmbe buya 'bex dá huhe n'da ma mbosahe. Pε gätho ra xui nte dá thehe yu huą. ⁴Ne nu'bu mí hyax buya mí 'bäpu ndenthe a ra Jesús. Pe nugähe him 'bexque dá pąhmbe gue gue'a. ⁵Bi 'yɛ̞nje ra Jesús:

—Gyu ts'unt'uhu, ha nte gá thɛhu yu huą.

-Hin'na, dá εmfe.

⁶Nu ra Jesús bi 'yɛ̞nje bʉya:

—Pɛ dami 'yɛnt ni xit'ahu bu ja rán 'yɛi ra mbosa, nɛ 'bex gui thɛhu buya.

Dá øthe a bi xije ra Jesús, nɛ ɛmmɛ xun ngu dá thɛhe yu huą, him mí sä ga juxhe ra xit'a. ⁷Nɛ nugä gue madi huɛgä ra Jesús, dá ɛmp'a ra Pedro:

—Guehnu ma Hmuhu nu.

Nu'bu mí 'yøh ra Simón Pedro gue gue'a ra Hmu a, 'bex bi hye rá he nguetho xí mbøgue. Nɛ bin säcpu ja ra mbosa gue bi zøn'a n'dihi bu i 'bäh ra Jesús. ⁸Pɛ nuje dá cohmbe bu ja ra mbosa, zun jante dá sømhbe bu ndenthe nguetho dí jut'ähe ra xit'a nɛ yupu yu hua. Nɛ hinga yatho ndenthe, mbɛ n'da ciɛnto metro. ⁹Nɛ nu'bu mí zøm bu ndenthe ra mbosa mí huhe, dá nuhe n'da ra sibi i zø bu, nɛ n'da ra hua i oxpu ja yu dɛspi, nɛ mí oxpu ra hmɛ. ¹⁰Nɛ nu ra Jesús bi 'yɛnje:

—Bá cu 'da ni huạhu xcá thehu.

11 Nu ra Simón Pedro buya, bi
mba bá jut'a ra xit'ą bu ja ra häi i
yuh yu huą, n'da ciento ne yote ma
'de'ma hyu yu huą xun ndoho. Pe
hin hapu bi xet'a ra xit'ą.

12 Nu ra
Jesús bi xije:

—Ba ɛhmbu dan sihmɛhu, bi 'yɛnje. Pɛ xínga n'daje xcá änhde to'o a, nguetho dá pahmbe gue gue'a ma Hmuhe. ¹³Nε bi mba bʉ zø ra sibi a ra Jesús bi hyąc ra hmε, nε bi 'daje, nε ra huą.

¹⁴Nε ná hyundị dá nuhe ra Jesús buya gue bin 'yusε, gue'bu go mí dạmbɛni bu ja rán 'yägui.

I yaui ra Jesús a ra Simón Pedro

¹⁵Nu'bʉ mán niyąhe, nu ra Jesús bi 'yɛ̞mp'a ra Simón Pedro:

—Simón rá ts'unt'u i ra Jonás, ha man'da guí numanhogui xinda guehya 'da.

Nu ra Pedro bi 'yεmp'a:

—Hạha ma Hmu i, guí pạdi gue dí numanho i.

Nu ra Jesús bi 'yɛmb buya:

—Dami 'uįn ʉ ma t'ਚdε'yo, nangue mam hmangä gui xänba yਚ ją'i i εc'yεigui.

16 Ná yondi xø bi 'yemp'a:

- —Simón rá ts'unt'u i ra Jonás, ha majuani guí numanhogui.
- —Hąha ma Hmu i, guí pądi gue dí numanho i, bi 'yɛ̞mbi.

Nε nu ra Jesús bi 'yɛ̞mp'a:

- -Dami fäh ma dε'yo 'bu.
- ¹⁷Nε ná hyundį buya bi 'yεmbi:
- —Simón rá ts'ʉnt'ʉ i ra Jonás, ha guí numanhogui, bi 'yɛ̞mbi.

Ne bi du rá mbui ra Pedro, nguetho ya ná hyundį bi 'yän 'bu i numanho. Ne bi dati:

—Ma Hmu i, gätho guí pądi, guí pądi dí numanho i.

Nε nu ra Jesús bi 'yɛ̞mbi mahøn'a:

—Dami 'uịn'ʉ ma zʉ dɛ'yo dadí huṣcä. ¹⁸Nu'bʉ gmín ts'ʉnt'ʉ zại gán 'yosɛ hønbʉ go hapʉ guín nde gui mba, nɛ guí tuzɛhɛ rá ngʉt'i ni foho. Pɛ nu'bʉ gán dac'yɛi gui ing

ni 'yɛ nɛ n'dan'yo da tut'i i, nɛ da zix'i i hapʉ hin guín nde gui mba, bi 'yɛ̞mbi.

¹⁹ Guehna bi man ra Jesús, gue da bah ra Pedro 'be'a nín date da nu a, ne gue'a dí 'yudi xun hotho Oja a. Ne nu ra Jesús bi 'yemp'a ra Pedro mahøn'a:

—Dami tengui gui thoc'a ma 'befigä, bi 'yɛmbi.

Bi t'än'na ra Jesús nangue a ra Xuua

²⁰Nɛ nu'bʉ mí dʉ'mi bi dɛn bʉya bi nyɛgui, bi nugä gue nɛqui dí tɛt'i, guecä madí huɛgä ra Jesús, ngue 'darpʉ xtá hu'be bʉ ja ra mɛxa 'bʉ mán sihmɛhe gue'bʉ má änni to'o di dä a. ²¹Nɛ nu'a ra Pedro 'bʉ mín nugui dí tɛt'i, bi 'yän'na ra Jesús:

—Ma Hmu i, 'bɛ'a nín dạte xin da nu na ra Xuua, bi 'yɛ̞mbi.

²²Nu ra Jesús bi dati:

—Nu'bu ma pähä di 'butho ua gue'bu go dá søcä mahøn'a, hin ni 'bɛfi gui 'yängui. Pɛ nu'a ni 'bɛfi gui tɛngui gui thoc'a ma 'bɛfi, bi t'ɛ̞mbi.

²³Pe janangue'a mi manse yu 'yɛc'yɛi gue njam'bu ga tugä. Pe hinga ngubu bi man ra Jesús, pe bi 'yɛna: "Nu'bu ma pähä di 'butho ua gue'bu go dá søcä mahøn'a, hin ni 'bɛfi gui 'yängui," xí 'yɛmp'a.

²⁴Guecä rá xädigä gue bi man ra Jesús, nε guecä xin dí o't' na ra søcuą 'bɛ'a dá nu gue majuani bin ja. Nε dí pahmbe majuani na dí o't'ä ya. ²⁵Nε xun ngu mi'da yun t'øt'e bi 'yøt'a ra Jesús. Pε nu'bu gätho xcá o't'ä, hinga xøt'a gätho xtín ja ua ja ra ximhäi 'bu. Nε hønt'a dí xi ahu ya.

HECHOS

Yún t'øt'e yú 'bäihu ra Jesucristo

Bi man ra Jesús ba ɛh rá Hogandahi Oja

Nu'i Teófilo, rá mbudi ra søcua dá o't'a'i mám'bet'o, dá xi'i gätho bi 'yøt' ra Jesús nu'bu mi dump' rá 'befi. Ne dá xi'a'i gätho ngue bi ma 'bu mín xänbate. ²Ne dá xi'a'i gätho bi 'yøt'a ra Jesús asta gue'bu mi mba mahɛts'i. Nɛ nu'bu mi 'bucua ja ra häi, nu rá Hogandahi Oja bi xih ra Jesús 'bε'a da xih yú 'bäihu gue da 'yøt'e. Nu'u yú 'bäihu, gue'u yun 'yohu bi huanh ra Jesús ngue man yú xädi u. ³Nu ra Jesús bi nu ran unbi nε bi du. Nε gätho nyote pa 'bu mí ndants'i mahøn'a, bin 'yusɛ bʉ 'bʉh yʉ́ 'bäihʉ, ja'bʉ bi hnu, ja'bu hin'na. Ne bi 'yuti xun ngu yun t'øt'e guepu bi nde da fądi gue i 'bui. Ne bi xi'u nangue rá 'befi i øt' Oja ua ja ra ximhäi, ne 'bepu dí manda Oją u gätho dim 'bui.

⁴Nu'bu mím 'buhmbu yú 'bäihu mahøn'a a ra Jesús, nɛ bin sihmɛhu, bi xi'u da dømp'u Jerusalén 'bɛ'a bi ma majuani rá Ta gue ba ɛhɛ. Nɛ ɛn'a ra Jesús:

—Ya xcá 'yøhmbu dá mangä mam'bɛt'o ngue ba pɛnh Oja rá Hogandąhi. ⁵Nu'a ra Xuua bi 'yøt'ahʉ ran xixyą nangue ra dehe thoho, pε mi ts'ʉtho ya ga 'da ahʉ rá Hogandahi Oja, bi 'yɛn'a ra Jesús.

Bi ndex mahɛts'i ra Jesús

⁶Nu'bu mim peti u, bi 'yänni:

—Ma Hmu ahe, hague guehya yu pa jabuya gui 'yøt'e din ja ma ts'edi zɛhɛhu mahøn'a, dyu israelhu.

⁷Bi da'a ra Jesús:

—Hingui sä gui pahmbu nda'a ní pa xun zän ma Tahu da 'yøt'a 'be'a gätho da 'yøzehe. Hin ni 'befihu gui pahmbu.

Pe nu'bu bá eh rá Hogandahi Oja, ne gam 'buhmbu, din ja ni ts'edihu. Ne nu'bu bin ja, gui xihmbu yu ja'i ua ra dahnini Jerusalén nanguecä, ne gätho ua ra häi Judea, nepu ra häi Samaria, ne gätho na nguni ra ximhäi.

⁹Nu'bu mi gua'a man ra Jesús bi mba mahɛts'i. Nu yú 'bäihu bi nu nu'bu mi ndex mahɛts'i. Nɛ n'da ra güi bi go'mi nɛ him bi nu yú 'bäihu mahøn'a. ¹⁰Nɛ mi 'bäpu, mi ndø'ts' mahɛts'i, 'bex mi 'bähmbu yoho yúm 'bɛhni Oja mahɛts'i, i he yu t'axca pahni. ¹¹Nɛ bi 'yɛmbi:

—Nu'ahu gyu mɛnguhu Galilea, hanja gní 'bähmbu ua ya nɛ gni 221 HECHOS 1, 2

ndøs'hu mahɛts'i. Nu ra Jesús bi ndex ua guí 'bähmbu, nɛ tengutho bu á ndets'e, ngutho 'bu bá cah mahøn'a, nɛ guet'a ra Jesús a.

Bi thahn'na ra Matías rám poniui ra Judas

¹²Nu yú 'bäihu ra Jesús bi nɛxpʉ ja ra nyuni Olivos buya, bi mba bu ra hnini Jerusalén, ne hinga yatho, ndehnini. ¹³Ne nu'bu mi yurpu ja ra hnini bi ndexpu n'da ra cuarto magats'i guepu i 'bu'u. Gue'u i 'bupu u, ra Pedro, nε ra Xuua, nε ra Jacobo, ne ra Andrés, ne ra Felipe, nε ra Tomás, nε ra Bartolomé, nε ra Mateo, ne ra Jacobo rá ts'unt'u ra Alfeo, ne ra Simón gue t'embi ra Zelote, nε ra Judas rán 'yohu ra Jacobo. ¹⁴Gätho ya 'darpu bim peti nε zai min yahu Oja. Nε bi zøpu 'da vu xisu nε ra María rá mbe ra Jesús, ne'u yún 'yohu ra Jesús.

¹⁵'Darpu madím pɛti u n'da ciɛnto nɛ 'däte nją'i. Nɛ nu'u yu pa'u bi ndants'a ra Pedro nɛ bi 'yɛna:

¹⁶—Ma cu ahu nangue ra Cristo, nu rá Hogandahi Oja maya'bu bi jap'a ra David da 'yo't' ra søcua, nε bi ma 'bε'a da 'yøt' ra Judas, nguetho mí pą Oją 'be'a da 'yøt'a. Gue'a ra Judas ngue bi dä'a ra Jesús nu'bu mi fɛnt'i. Nɛ gue'a bin ja nguetho gätho 'bɛ'a mán t'o't'i bu rám hman Oją din ja. 17 'Dat'a ra 'bɛfi dá øthe ra Judas nguetho ra Jesús bi huahn'na ra Judas tengu bu á huancähe. 18 Nε bi thän'a n'da ra häi nangue'a í mbä'a ra Jesús. Nu'bu mi zohäi ra Judas, bi nyepu häi, ne bi føh rá foho, ne bi bøni gätho yú xgfo. 19 Gätho yu ja'i mi 'bupu Jerusalén bi 'yøde 'bɛ'a bin

ja. Jananjabu bi mba ma huti ra häi ngue yú nde'u, Acéldama, gue nde da ma bim fäm bu ra ji. ²⁰Nguetho nt'o't'i bu ja rá søcuą ra Salmos:

Din häitho ra häi nɛ njon dim 'bʉpʉ, nɛ nt'o't'i ngue n'dan'yo da hyạn rá 'bɛfi mi ja xtá 'yøt'a.

21 Janangue'a jatho ga huahndu a dam pɛhmbe. Jatho ga huahndu n'da rám poniui ra Judas, gue'a n'da madí hyunje gätho yu pa mí 'buhmbe ra Hmu, ra Jesús. 22 Nɛ ga huahndu n'da bi nu 'bu mi xixyaba ra Jesús a ra Xuua, nɛ madí hyunje gätho yu pa dám 'buhmbe ra Jesús, gue'bu go mí mba mahɛts'i, bi nu, nguetho n'dat'a ga mamhbe ngue bi ndants' mahøn'a ra Jesús 'bu mi du, bi 'yɛn'a ra Pedro.

²³Nɛ nubuya bi ndønba yú thuhu to'o da thahni, gue yoho yun 'yohu bi hndøni. Nu'a n'da ra José Barsabás nɛ í Justo, nɛ nu'a man'da ra Matías. ²⁴Nɛ nu'u yu ja'i bin yahu ra Hmu buya, nɛ bi 'yɛna:

—Ma Hmu ahe, guí parpa yú mbui gätho, dami 'yurcahe ya yoho nda'a xcá huahni. ²⁵Nu'a ga comhbe ra 'bɛfi ngue ma 'bäigähe ra Jesucristo, ngue'a xtá 'yøt'a ra Judas. Nguetho xí 'uepu ja rá 'bɛfi nangue rá ts'oqui, bi mba da nu'a rán säui da nu, bi 'yɛm 'bu min yahu Oja.

²⁶Nu yʉ 'yɛc'yɛi bʉya bi 'yøt'e tengu'bʉ n'da ran tąha, ngue nde da bạ'ʉ nda'a bi nde Oją. Bi bøni gue gue'a ra Matías. Nɛ nu yʉ 'yɛc'yɛi bʉya bi huanh ra Matías, nɛ bi gomhbʉ yʉ́ 'bɛfi ʉ 'dɛ'ma'da yʉ́ 'bäihʉ ra Cristo.

Bi zøh rá Hogandąhi Oją

Pε guexta'a di thoqui dim peti gätho yʉ 'yɛ̞c'yɛi, din

HECHOS 2 222

ja'a mí tø'mi, gue bá pɛnh Oją a rá Hogandahi, ne bin theui n'da ra dąmpeti mí sänba Oją u yu israel, t'ɛmbi Pentecostés. ²'Dahmantho bi zøpu di hi, tengu'bu n'da ra ndønthi gue bí 'yɛh mahɛts'i a. Nɛ nu'a ní hị bu, bi yus'pu ja ra ngu guepu mi hu'u. 3Bi nequi tengu yu t'usibi nε 'da'i ts'u bi zox yú yą yu ja'i n'da ngu n'da u mi 'bupu. ⁴Ngue n'da ngu n'da mi 'bupu, gätho bin t'un rá Hogandahi Oja, ne bi hạt ra ts'edi xun ho u. Ne bi mbudi 'dahma 'dan'yo bu án ya'u n'da ngu n'da'u nangue rá ts'edi rá Hogandahi Oja in 'yohu.

⁵Nε nu'ʉ yʉ pa'ʉ bi zøm bʉ Jerusalén ʉ yʉ judío, da 'yøt'a ra dampɛti mí xi Oja maya'bʉ, ngue bá nɛxpʉ gätho yʉ häi ua ja ra ximhäi. ⁶Nε nu'bʉ mi 'yø'a di hi ʉ yʉ ja'i, bim pɛti bʉ, nɛ n'da ngu n'da ʉ bi zo'ʉ yʉ 'yɛ̞c'yɛi nangue yẃ ndesɛ, nɛ him bi zä bi bɛ̞ni ha bin ja. ⁷Nɛ bi hyonya thoho nɛ him bi badi 'bɛ'a nam bøni, nɛ bin 'yɛ̞mb zɛhɛ ʉ:

—Hague án zä bin ja bu, bin 'yɛmp'ʉ. Ha hinga gue'ʉ yʉ mɛngu bu Galilea gätho i ya ua ya. 8 Hanja sä i siju ma ndesehu n'da ngu n'daju. ⁹Ne nuju n'da'a n'danni bá nexhu, ne 'daju, 'bu'i 'da bá nexpu Partia, пери Media, пери Elam, пери Mesopotamia, nepu Judea, nepu Capadocia, nepu Ponto, nepu ra häi Asia. ¹⁰Nepu Frigia, nepu Panfilia, nepu ra häi Egipto, nepu ra häi Africa jom bu Cirene. Nε nu'u mi'da yu romanos u, madague'bu gätho yu judío u, ne nu mi'da u gue ec'yei tengugahu dyu judíohu, ne 'buh mi'da bá nexpu Creta, nepu Arabia.

¹¹Nɛ dí øhmbʉ i mam ma ndehʉ nangue yʉ́n t'øt'e gue i øt' rá ts'ɛdi Oją, bin 'yɛ̞mp'ʉ.

¹²Nε gätho madi hyonya thoho, nε hingui pądi 'bε'a da bɛni. Nε n'da ngu n'da bi mansε u:

—'Βε'a ní mba na in ja ya.

13 Pε nu'ʉ mi'da bi ma:

—Iti u.

Bi zoh yu ją'i ra Pedro

¹⁴Nɛ nu ra Pedro bʉya 'darpʉ mí 'bähmbʉ ʉ mi 'dɛ'ma'da yʉ́ 'bäihʉ ra Cristo, nɛ nts'ɛdi bin yą, bi 'yɛ̞na:

—N'yohu ahu dyu judíohu nε gätho ahu guí 'buhmbu ua Jerusalén, dami 'yøhmbu xun ho 'bɛ'a ga xi ahu ya. ¹⁵Nuje hin dí itihe tengu guím bɛmhbu, nguetho ja guto ya. ¹⁶Pε nuna guehna gue bin ja ya, gue'a bi man ra Joel rá pøngahyą Oją, bi 'yɛna:

¹⁷ Din ja bu n'da ra pa ba ɛhɛ, ɛn Oja,

gue ga pɛn'nahʉ ma Hogandahi gätho nangu yʉ ja'i 'bʉcua ja ra ximhäi.

Nε nu'ʉ ni ts'ʉnt'ʉhʉ nε ni t'įxuhʉ dim pøngahyą.

Nε ni ts'ʉnt'ʉhʉ da nu'ʉ yʉn t'uti tengu yʉ t'i̞

nε ni dąc'yεihʉ da 'uį yʉ t'į.

¹⁸ Nu'bu bin ja, nu'u ma 'yɛhɛ, yun 'yohu ne yu xisu, ga penpä ma Hogandahi u,

nε dim pøngahyą nanguecä.

¹⁹ Ne ga uh yʉ hmepya bʉ magats'i,

перн ja ra häi, ун hmepya ra ji, ne ra sibi ne ra 'bifi.

Ne nu'a ra hyadi ya hin din ja rán nequi,

nε ra ząna xtan thεni tengu ra ji.

M'bɛt'o nja bʉ din ja, m'bɛjua da zøn ra pa dua ɛ̞h ra Hmu mahɛ̞ts'i,

nε nu'a ra pa a, nuixte thoho nε nts'utho 'bε'a din ja.

²¹ Nɛ nu'a ra pa dua ɛhɛ, din ja gue hønt'a to'o xí mba't'a ra Hmu da yạn Oją a. Ngubʉ bi 'yo't'a ra Joel 'bʉ

maya'bu, bi 'yɛn'a ra Pedro.

²²Nu ra Pedro xø bi 'yɛmp'u

mahøn'a:

-N'yohu ahu dyu israelhu, dami 'yøhmbu ma nde. Dím mangä nangue ra Jesús ra mengu Nazaret. Oja bi japi ngue bi 'yøt' yun t'øt'e nuixte nangue rá ts'edi Oja, ne yu hyonya nt'øt'e, ne yu hmepya, guepu da zä gui pahmbu ngue Oja bi ze'a. ²³Ne maya'bu Oja mi padi 'bɛ'a gá 'yørpahu rá Ts'unt'u. Nε Oja mi sänni gue gá cuathu bu ja n'da ra pont'i nangue yú 'yɛ yu tonto, nε gá hyohu. 24 Pε nu'a Oja bi xox 'bu mí du, ne bi hyącua ran dąte, nguetho hin'yu rá ts'edi ran dąte xtán zä xtán zam'ma ra Jesús. ²⁵Nguetho bi man ra David gue 'bɛ'a da nu ra Jesús, 'bu mí 'yɛna:

Nugä thocua thoho dí nugä Oją bu ja ma hmi.

Nε di 'dac ra ts'εdi, janangue'a njon da zä di 'uegagui.

²⁶ Janangue'a i hu ma mbui, ne dadín johya 'bu dím mangä nangue'a.

Nɛ nu'bu din sunya ma ja'i bu ja ran 'yägui, dí tøp'ma ran ho da t'ørcagui.

²⁷ Nguetho hin gui hyεgä ma te da gopu guepu o'u xun du,

Nɛ hin gui japi da 'ya ma ngøc'yɛi, guecä, ni Hoga t'ʉhnigui. ²⁸ Nε gá 'yurqui 'bɛpʉ dám 'bʉhmi mazại mahøn'a,

ne nu'i gui jaqui ngue din ja ran johya ma mbui nu'bu dá nut'a ni hmi,

bi 'yɛ̞n ra Pedro tengu bi man ra David.

²⁹Νε xø bi 'yɛ̞n'a ra Pedro:

-N'yohu ahu, da zä ga xi ahu majuani nangue ma ngurpa mbombøtahu ra David mi 'bui maya'bu, him bi manse nanguese 'be'a da t'ørpe, nguetho bi du, ne guexta'a i o bu rán 'yägui i ja ua dí 'buhmbu. 30 Pε nu ra David bim pøngahya 'bu mí man na, ne mí padi majuani 'bɛ'a bi xi'a Oja, gue n'da rám bom'beto ra David din ts'ut'abi nangue yu israel tengu ra David, ne guehna ra Cristo na. ³¹Nɛ mi pah ra David 'bɛ'a din ja, janangue'a bi ma nangue da ndants' mahøn'a ra Cristo, ne hin da ts'opu nidu rá te, ne xín da 'ya rá ngợc'yei a. 32 Nguehna ra Jesús, Oją bi xox 'bu mi du, ne nu'a dí pahmbe majuani gätho gahe, ne dí mamhbe nguetho dá nuhe 'be'a bi t'ørpe. 33 Oją bi xots'i ne bi zixpu ja rá ts'edi, ne bi un'na rá Hogandahi tengu xí man Oją, janangue'a bi 'dacähe buya. Gue'a rá Hogandahi i øt'e 'bɛ'a gätho guín nuhu ya, nɛ guí øhmbu ya. ³⁴Nguetho ra David him bi ndex mahεts'i, pε gue'a im manse a:

Nu'a ra Hmu bi xi'a ma Hmu: "Dami hyucua ja ma ts'ɛdi,

35 asta gue'bu ga tahui man suiui,"
bi 'yan'a ra David, bi 'yan'a ra Pedro.
36 Na xø bi 'yana:

pahmbu ya majuani bi jap Oja dim

—Gätho ahu ma mi israel ahu, gui

hmu a gá cuathu bu ja ra pont'i, ne guehna ra Jesús, ne gui pąhmbu gue bi huan Oją a, bi 'yɛn'a ra Pedro.

37 Nu'bu mi 'yøh yu ją'i 'bɛ'a bi man'a ra Pedro, ɛmmɛ bi du yú mbui, 'bu mí 'yøde gue rá Ts'unt'u Oją a xí hyo. Nɛ bi t'än'na ra Pedro nɛ yún 'yohu:

—Man 'yohʉ ahʉ, 'bε'a da zä ga øthe ya, εn'ʉ.

³⁸Nu ra Pedro bi dąti:

—Gui päh nin 'yomfɛnihu nangue ran ts'o, nɛ gan xixyahu n'da ngu n'da ahu nangue rá thuhu ra Jesucristo. Nɛ din ja ra punbi ni ts'oquihu, nɛ di 'da ahu rá Hogandahi Oja. ³⁹Nguetho bi man Oja di 'da ahu ran t'unni gue'a rá Hogandahi Oja, nɛ ni t'uhnihu din t'unni, nɛ gätho u hønbu go hapu i 'bui din t'unni, gue hønt'a go to'o da zohn'na Oja ra Hmu, bi 'yɛn'a ra Pedro.

⁴⁰Nε nu ra Pedro man'da xʉn ngu bi xifi nε bi hεcui, nε bi 'yɛ̞mbi:

—Damin yamhbu nangue'a ran unbi da nu'u yu ts'om'bäi i 'bucua ya, bi 'yɛ̞n'a ra Pedro.

⁴¹Nε gätho to'o bi 'yømanho a bi man ra Pedro bi mba ma xixyąbi. Nu ra pa gue bi man ra Pedro, mbε hyu mahuąhi yʉ ją'i bi 'yɛ̞c'yεi. ⁴²Nε nu'ʉ bi thocta'a bi xänba yʉ́ 'bäihʉ ra Cristo ʉ, nɛ bi hyu yʉ́ mbʉi nguetho 'da'angu im bɛ̞ni. Nɛ thocua thoho bim pɛti gue din yạhʉ Oją, nɛ da zi ra xɛcahmɛ, ngue bi bɛ̞n rán dạte ra Hmu.

Yúm 'bui u mbudi bi 'yec'yei

⁴³Gätho yu ją'i bi numansu Oją ne ęmme bi hyonya thoho 'be'a bin

ja nangue yʉn t'øt'e nuixte nε yʉ hmεpya bi 'yøt' yú 'bäihu ra Cristo. 44Nɛ gätho gue bi 'yɛ̞c'yɛi n'dat'a in numanho n'da ngu n'da, ne nu'a 'be'a mí pe'ts'i n'da ngu n'da, 'da nan gomthoho. 45 Ne nu'bu n'da mí honi 'be'a madí 'bedi, nu'a man'da buya bi mbä 'be'a mí pe'ts'i, bi un'na buya. 46 Ne mpa 'bu mpa 'bu madím peti bu ja ra danija. Ne nu'bu xun sihmε, bin sänbi bi mba bu ja yú ngu yú mi'yec'yeihu, ne bin johya yú mbui, nε 'dat'a im bεni. 47 Nε bi 'yεspa Oją, nε bi hnumansu u nangue gätho yu ja'i. Nε nu Oja bi japi n'dapa ngu n'dapa i curpu ja rá ts'edi mi'da yu ją'i, gue bi zin'u.

Bi zä ra dogua

N'da ra pa 'bu hyunde, gue'a ra ora 'bu nzại mí yạhu Oją yu jạ'i, bi mba bu ra dạniją ra Pedro nɛ ra Xuua. ²Mi 'bupu n'da ran 'yohu ra dogua gue'bu go mim 'bui. Nɛ nzại bi thuxpu ja rá goxthi ra dạniją. Nu ra goxthi t'ɛmbi mahotho. Nu ran 'yohu da 'yäp yun t'unni yu jạ'i i thopu mbo. ³Nuna, nu'bu min nu ra Pedro nɛ'a ra Xuua ní mba bu ja ra dạniją, bi 'yäp ran t'unni. ⁴Nu ra Pedro n'youi ra Xuua, nu'bu min nu i hupu, bi 'yɛmbi:

—Hyandgä'be.

⁵Nu ra dogua bi hyant'ʉ, mi tø'mi da hyani 'bɛ'a di un'dʉ. ⁶Pɛ nu ra Pedro bi 'yɛmbi:

—Xíng ra t'axi xíng ra c'axt'i dí hạgä, pɛ nu'a i jagui dadí 'da'a'i. Nangue rá ts'ɛdi ra Jesucristo mɛngu bu Nazaret, damí ndants'i nɛ gan 'yo, bi 'yɛ̞mbi.

⁷Nu ra Pedro bi bentpa rán 'yei, bi xots'i. 'Bex bin hats'edi rá gua, 225 HECHOS 3

nɛ rá hyudi xingua. ⁸Nɛ n'da sägui thoho bi 'yøt' 'bʉ mi ndants'i nɛ bin 'yo. Nɛ'a bi yʉthʉ bʉ ja ra dạniją, sägui nɛ 'yo, nɛ ɛspa Oją. ⁹Gätho yʉ jạ'i bi nu ran 'yohʉ ngue bin 'yo nɛ bi 'yɛspa Oją. ¹⁰Nɛ mi pądi gue nu'a mi hupʉ ja ra goxthi mahotho bʉ ja ra dạniją mi äh ra mbɛti. Nɛ gätho bi hyonya thoho 'bɛ'a bin ja ran 'yohʉ.

Nu ra Pedro im mam bu ja ra ngun'yu t'embi Salomón

¹¹Nu'a mi dogua hingui nde da hyɛ'a ra Pedro nɛ ra Xuua, nɛ bá ɛpʉ xʉn ngu yʉ jạ'i guepʉ ja ra ngun'yu mi 'bä ʉ, t'ɛmbi Salomón, nɛ madí hyonya tho'ʉ. ¹²Nu'bʉ mí hyant'ʉ yʉ jạ'i a ra Pedro, bi 'yɛmbi:

—N'yohu ahu dyu israelhu, hanja gadí hyonya thohu nanguehna ra dogua, ne hanja gní hyandga'be. Ha guí ɛmhbu gue ma ts'ɛdisɛ'be nε man hose'be gue xtá jap'be bin 'yo na. ¹³Hin'na maha, pε ga xi ahu hague bin ja. N'dat'a Oja gue mí ɛspa mam bombøtahu ra Abraham nε ra Isaac nε ra Jacob, bi zixpu mahets'i a rá Ts'unt'u, ne bi un rá ts'edi. N'dat'a ra Jesús gue gá dähu bu ja rá hmi ra Pilato ne gá cømhbu bu. Nu ra Pilato mim ma xtá mba nthegui. ¹⁴Pe nu'ehu gá cømhbu n'da xun ho, ne gue'a rá Thahni Oją a. Ne gá 'yähmbu n'da ra hyodu da soc'ahu. 15 Ne gá mamhbu gue da mba ntho ra Hmu gue di un ra te. Pε Oja bi xoxpu 'bu'u xun du, gue'a dá nuhe nε dadín juanhde. ¹⁶Bi zä na ran 'yohu nguetho bi 'yɛc'yɛi ra Jesús. Ne guehna ran 'yohu guín nuhu ya, ne guí pahmbu to'o na.

¹⁷Pε nuya, n'yohʉ ahʉ, dí pącä ngue hin gmí pahmbu 'bɛ'a xcá 'yøthu 'bu gmí hyohu ra Jesús, ne ximangutho ni ngurpihu. ¹⁸Pe Oja bi japi bin ja 'bɛ'a gätho bi ma maya'bu, gue bi man yu pøngahya nangue ran unbi bi nu ra Cristo rá Thahni Oją. 19 Janangue'a nuya, damí päh nin 'yomfenihu ne gui däp ni mbuihu Oja. Ne nu Oja buya da zä da duc'a ni ts'oquihu nε di 'da ahu ran johya ni mbuihu. ²⁰Ne nu Oją ba penhua mahøn'a ra Jesús ne gue'a ra Cristo xa ts'änni di jacuahu. ²¹Nu ra Jesús jatho da gopu mahɛts'i jague'bu da zøn ra pa da mba ma hoqui gätho ua ja ra ximhäi, tengu bi man Oja maya'bu, nangue yú nde yú hoga pøngahyą. ²²Pε bi 'yɛnsε a ra Moisés: "Nu'a ra Hmu ma Ojahu, da zänna n'da rám 'behni ngue gue'a nin 'yohuhu tengugä. Damí 'yøhmbu 'bɛ'a gätho da man'a. 23 Ne din ja, hønt'a go to'o má ja'i hin da 'yømanho a, da mba ma 'ueque nangue yú t'uhni Oja, ne da mba ma 'bepi rá te," bi 'yɛn'a ra Moisés.

²⁴Nε majuani, gätho bi man yɨ pöngahya Oja gue'bɨ mí man ra Samuel nɛ gätho mi'da yɨ pöngahya m'bɛjua mí 'bɨi, gätho bi ma 'bɛ'a gätho da 'yöt' Oja, nɛ gue'ɨ dí nuhɨ yɨ pa jabɨya. ²⁵Guejɨ dyɨm bom'bɛtojɨ yɨ pöngahya Oja, nɛ ndejɨ Oja ga comhbɨ rán hogui bi 'yörpa ma ngɨrpa bötahɨ nu'bɨ mi t'ɛmp'a ra Abraham: "Nangue n'da nim bom'bɛto dim 'bɨh niya'bɨ, dí mba ma japi gätho yɨ ja 'i guecua ja ra häi," bi t'ɛmp'a. ²⁶Janangue'a nu'bɨ mi xoxa Oja a rá Ts'ɨnt'ɨ gue bi du, m'bɛt'o thoho bá pɛnhua dí

'buhmbu, ngue nde di 'uegahu n'da ngu n'daju nangue ma ts'oquihu, bi 'yɛ̞n'a ra Pedro.

Pa ma juanbi ra Pedro ne ra Xuua

Nu'bu mi xänba yu ja'i ra
Pedro nɛ ra Xuua, bá ɛh yu
mbäja nɛ'u yu hmu bu ja rá danija
yu judío, nɛ yu saduceos. ²Nu'u
ɛmmɛ bin cuɛ u, nguetho bi xänba
yu ja'i gue bi ndants'a ra Jesús
bu 'bu'u xun du. ³Nu'u bi bɛnt'a
ra Pedro nɛ ra Xuua, nɛ bi got'a
fädi, jague'bu mi hyats'i bi juanbi,
nguetho xun de 'bu mi got'i. ⁴Pɛ
xun ngu u xí 'yøh ram hma bi
ma, bi 'yɛc'yɛi. Mbɛ í jua'i cut'a
mahuahi yun 'yohu ngue bi 'yɛc'yɛi.

⁵Nu'bu mi hyats'i bim pɛti bu Jerusalén yu ngurpa mbäja nɛ yu da̞c'yɛi nɛ yu xänbate nija. ⁶Mi 'bupu ra Anás ra da̞mbäja a, nɛ ra Caifás, nɛ ra Xuua, nɛ ra Alejandro, nɛ gätho mi'da yú mɛni ra da̞mbäja, bim pɛti ngue di jua̞nba ra Pedro nɛ ra Xuua. ⁷Nɛ bi manda da ts'ispa ra Pedro nɛ ra Xuua, nɛ bim 'bäpu ja yú hmi nɛ bi 'yänni:

—'Bɛ'a má ts'ɛdi o gue to'o rán t'ɛdi ngue xcá 'yøt'ui na.

⁸Nu ra Pedro buya n'youi xun ngu rá ts'edi rá Hogandahi Oja, bi 'yembi:

—Gyé ngurpihu yu ja'i ne gyu dac'yeihu dyu ja'i israelhu. ⁹Ha guí ängahe nam pa ya nangue ran ho bi t'ørpa na ran 'yohu, ne hague nja bi zä na ran 'yohu ngue mi u. ¹⁰Nu'bu majuani guí ängahe, gui 'yøhmbu ya, ne gätho ma mi'israelhu, ngue nangue rá ts'edi ra Jesucristo, gue'a í zä ín 'yo na ran 'yohu ya. Gue'a ra Jesús ra mengu bu Nazaret, gue

gá cuathu bu ja ra pont'i, nɛ nu Oją bi xoxpu 'bu'u xun du. ¹¹ Guehna ra Jesús hin gá nde gá pąhmbu, ngue tengu'bu gyu gądohu gá samhbu n'da ra do. Pɛ nuya Oją bi japi ngue tengu'bu n'da ra do man'da mahyonidą bu pa nthøe ra ngujądo. ¹² Njo'o man'da da zä di pø'a n'da hinda hønt'a ra Jesús. Nguetho him bi zän Oją man'da ra ts'edi ua ja ra ximhäi gue da zä di pøju, hinda hønt'a ra Jesús, bi 'yɛn'a ra Pedro.

13 Nε madi hyonya thoho u yu juanbate 'bu mí badi him bi zu din yahu ra Pedro nε ra Xuua, gue mí padi him bin xädi. Pε bi bɛm buya, bin 'yohu ra Jesús ra Pedro nε ra Xuua. 14 Nε nu'bu min nu ran 'yohu xí zä gue mi 'buhmbu u, hin'yu 'bɛ'a man'da sä da xifi. 15 Nε bi mbɛhn bu thi u yoho n'da zu ora, ngue nde din 'yän'du 'bɛ'a da zä da 'yørpe. 16 Nε bin 'yän'du:

—'Bɛ'a sä ga øthu nangue yun 'yohu, nguetho majuani n'da ran t'øt'e nuixte bi 'yøt'u. Nɛ gätho 'bucua Jerusalén i padi, hingui sä ga cømhbu. ¹⁷ Pɛ guehma nde'bu ga suhmbu n'dahma njon da xifi nangue ra Jesús, gue him man'da di thoc ram hma bu 'buh yu ja'i, bi 'yɛn'u.

¹⁸Bi zohn mahøn'a u, bi xih puya, gue him man'dandi da ma, xin da xänba yu ja'i nangue ra Jesús. ¹⁹Bi dah ra Pedro ne ra Xuua, bi 'yembi:

—'Bε'a go guím bɛnsɛhu ngue i nde Oją ga øt'be, ha gue'a guím mamhbu o gue'a man Oją a ga øt'be. ²⁰Nguetho jatho ga mamhbe 'bɛ'a xtá nuhe nɛ 'bɛ'a xtá øhmbe, bi 'yɛ̞n'u.

²¹Nu'bʉ man'da mi damhya ʉ, bi hyɛgui nguetho him mi tini 'bɛ'a

dí unba u. Nu'u i supi din cue yu ja'i 'bu xtí unba ra Pedro ne ra Xuua, nguetho gätho yu ja'i mí espa Oja nangue'a xín ja. ²²Nguetho nu ran 'yohu mi ponga nyote njeya mi pe'ts'i, ngue bi t'ørpa ran t'øt'e nuixte, gue bi zä.

Nu yu 'yec'yei bi 'yäp Oją hin din su

²³Nu'bu mi theh ra Pedro ne ra Xuua, bá ępu guepu mi 'buh yu 'yęc'yei. Ne bi xifi gätho xí xi'u yu mbäją ne yu dąc'yei. ²⁴Nu'u, nu'bu mí 'yøde, bi zo Oją, n'dat'a im bęni, ne bi 'yęn'u:

—Ma Oją ahe, gue gra Hmu, gá 'yøt' mahɛ̞ts'i nɛcua ja ra häi nɛ ra deją nɛ gätho u i jabu. ²⁵Νε nu ní Hogandąhi bi bɛ̞nba mam bombøtahe ra David, ni 'yɛ̞hɛ̞, 'bu mí 'yɛ̞na:

Hanja nín 'yo'ts'u yu ją'i gue hingui tɛn'na Oją, nɛ im bɛn'u gue him majuani.

26 Yú hmuts'ut'abi yu häi ya bi du'mi bi zä bi dump' ra sui.
Nɛ yu ts'ut'abi bim pɛti din suhmbu ra Hmu Oja nɛ ra Cristo rá Thahni Oja, bi 'yɛn'a ra David.

²⁷Nguetho majuani bim peti ua ja ra hnini ra Herodes, nε ra Poncio Pilato, nε yʉ ja'i ngue hing yʉ judío, nε ma mi'israelhe, nε bi zʉh ni hoga Ts'ʉnt'ʉ Jesús, gue'a gá huahni. ²⁸Nu'ʉ bi 'yøt'ʉ gätho 'bɛ'a xcá sän mam'bɛt'o gue bin ja. ²⁹Nuya ma Hmu ahe, damí nu'ʉ gue nde di ʉnje, nɛ damí 'daje ni ts'ɛdi, ni 'yɛ̞hɛgähe, ga huthe ran zambʉi ga mamhbe nim hma. ³⁰Nɛ

ga uthe yu ją'i ni ts'edi gue da zä'u

yun zäman'u. Ne gui 'yut yun t'øt'e

nuįxte ne yu hmepya nangue ni Hoga ts'unt'u ra Jesús, bi 'yem 'bu min yahu Oją u.

³¹Nɛ nu'bu mí jua'a bin yahu Oja, nu ra ngu guepu xím pɛti bin huani, nɛ gätho u man'da bi hya yú ts'edi nangue rá Hogandahi Oja. Nɛ gätho yu 'yɛc'yɛi bi hyut'an zambui, bi mamp'a rám hman Oja.

Bi gohmi 'be'a gätho mi ja

³²Gätho yʉ 'yɛc'yɛi i 'bʉi tengu n'danja'i tho, 'dat'a i øt'e, 'dat'a im bɛni. Xínga n'da bi ma gue jase yú mbeti, ne gätho 'be'a mi ja mi cohmi. 33 Ne nu yú 'bäihu ra Cristo, nu'bu mí thoqui bi ma gue bi ndants'a ra Hmu Jesús 'bʉ mi du, ne bi jap Oją bin ja rá ts'edi yúm hma, ne xun ngu rá mate Oją bin t'un'ndu n'da ngu n'da u. 34 Gätho yu 'yec'yei nte madi 'bedi 'be'a gätho mi honi, nguetho xun ngu bi mbä yú häi o gue yú ngu mí ja, ne bi un ra mbɛti yɨ 'bäihɨ ra Cristo. ³⁵Nɛ nu'ʉ bi darpa ʉ to'o di 'bɛ a da hyoni. ³⁶Ne gue'a bi 'yøt'a n'da ra 'yɛc'yɛi, ra José na, ra mɛngu Chipre, rá 'yu ra Leví, pe nu'u yú 'bäihu ra Cristo bi zänba man'da rá thuhu gue dí Bernabé, nde da ma i hurpa rá mbui n'da. ³⁷Nε gue'a bi 'yøt'e, bi mbä n'da rá huahi mi ja, ne bá ha ra mbeti, ne bi dä bu 'buh yú 'bäihu ra Cristo, ngue di un'du nte mi ja.

Rá ts'oqui ra Ananías ne ra Safira

Pε nu'a man'da ra 'yεc'yεi í Ananías mi 'bʉpʉ, nε rá xisu, bi mbä yʉ́ häi. Nu'a rá xisu ra Safira a. ²Nε bi gøn'i ts'ʉ ra mbɛti nɛ 'dat'a bi bɛ mmi rá xisu. Nɛ bá HECHOS 5 228

hạc made ra mbɛti, bi gäpʉ 'bʉ'ʉ yʉ́ 'bäihʉ ra Cristo. ³Pε nu ra Pedro bi 'yɛ̞mp'a:

—Nu'i grá Ananías, hanja guí cu't' ni mbui ra zithu, ra Satanás, gue di 'bɛp'i'i gui xih ra fɛhni rá Hogandahi Oja, ngue gá hyac'i ts'u ra mbɛti guí pä ni häi. ⁴Nu'bu hin xquí pä ni häi, ha hin xquí cohmi gue ni mbɛti zɛhɛ. Nɛ nu'i gá pä ni häi, ha hinga gue ni 'bɛfizɛhɛ xquí 'yøt'e nangue ni mbɛti. Hanja ngubu guím bɛni. Hinga gue'u yun 'yohu gá xih ra fɛhni, pɛgue Oja gá xih ra fɛhni, bi 'yɛn'a ra Pedro.

⁵Nɛ nu'bʉ mí 'yø'a ra Ananías 'bɛ'a bi man'a ra Pedro, 'bex bi du. Nɛ gätho to'o bi 'yøde nangue'a ɛmmɛ bin ja ra mbidi yʉ mbʉi ʉ. ⁶Nu'ʉ yʉn 'yohʉ mi 'bʉpʉ bi ndants'i, bi mbant'a ra ánima Ananías, bi duts'i, bi 'yägui.

⁷Nɛ nu'bʉ mi tho'i ts'ʉ nhyu ora, bi zøh ra Safira, rá xisu ra Ananías, nɛ him mi pądi 'bɛ'a bi thogui. ⁸Nu ra Pedro bi 'yän'na ra xisu:

- —Xiqui hangu guí päui ni häi, tengu man ni ndø, bi 'yɛn'a ra Pedro.
- —Hạha ngubu rá muui, bi 'yɛntho ra Safira.

⁹Nu ra Pedro bi 'yεmp'a buya:

—Hanja 'dat'a gá bɛmmi, hanja sä gá cøn rá Hogandahi Oja. Nuya 'bäcua ja ra goxthi u gue bá äc'a ni ndø, nɛ'e da dux'a ya, bi 'yɛmbi.

¹⁰Nε 'bex bi yørpu ja rá gua ra Pedro, nε bi du. Bi yut'u yun 'yohu, bi nu, ya xí du, nε bi duts'i, nε bi 'yägui, 'darpu thoho bi 'youi rá ndø. ¹¹Nε εmmε bi mbidi gätho u yu 'yεc'yεi, nε'u gätho mi'da bi 'yøde bi mbidi.

Xun ngu yun t'øt'e nuixte bi 'yøt' yú 'bäihu ra Cristo

¹²Xun ngu yu hmepya, ne yun t'øt'e nuixte bi 'yøt' yú 'bäihu ra Cristo bu 'buh yu ja'i. Ne gätho madim peti bu ja ra danija guepu t'embi rá ngun'yu ra Salomón, ne 'dat'a im bɛn'u. 13 Nɛ nu'u mi'da u gue hingui ɛc'yɛi, bi zu din uans'hu yu 'yεc'yεi, nε bi hnumansu yu 'yɛc'yɛi. ¹⁴Pɛ man'da man'da xʉn ngu bi 'yɛc'yɛi ra Hmu, yʉn 'yohʉ ne yu xisu. ¹⁵Ne nangue bi 'yøt' yun t'øt'e nuixte yú 'bäihu ra Cristo, jananjabu i ts'opu ja 'yu yu hyenni guepu da tho'u, i oxpu ja yú t'ots'i nε yú fịdi. Nε nu'bu da thopu rá xudi ra Pedro da yani. ¹⁶Ne xun ngu bi bøm bu ja yu hnini guepu hän bu Jerusalén, bi mba bu Jerusalén, bi zix'u yun zäman'u, ne'u min 'yohu yu zithu. Gätho bi zä.

Ra Pedro nε ra Xuua bi hnuman'u

17 Janangue'a yu dambäja ne gätho min 'yohu, nu'u embi yu saduceos, emme bin ja yun ts'eya yú mbui u. 18 Janangue'a bi bent'u yú 'bäihu ra Cristo ne bi got'a fädi. 19 Pe nu'a n'da ram 'behni bí 'yeh mahets'i 'bu min xui, bi xocua ra jut'i yu ofädi ne bi zixpu thi. Ne bi xifi:

Ní mba, damam 'bähmbu bu ja ra danija, dami xihmbu yu ja'i gatho nangue ram 'bui ma'da'yo, bi 'yɛna.

²¹Nu'ʉ, nu'bʉ mí 'yøh na, bi yʉrpʉ ja ra dạniją 'bʉ mi t'ʉxuditho, nɛ bi xänba yʉ ją'i.

Ne nu'bu mí peti yu hmumbäją bu ja n'da ra ngu, ne'u min 'yohu, ne madin zohni yu ngurpi ne yú dąc'yei yu israel, ne sä bi mbenpu fädi yu asmayo gue ba si yú 'bäihu ra Cristo. ²²Pe nu'bu mi zøm bu ja ra fädi yu asmayo, njom bi dim bu u. Bi mbeng mahøn'a bu bí 'buh yu hmumbäją, ²³ne bi 'yɛmbi:

—Dá tim'be ra goxthi xø man thu't'i thoho nε yu mbädi mi 'bäpu thi ja ra goxthi. Nε nu'bu ma xoc'be, njo'o to'o dá tim'be bu mbo, bi 'yɛn'u.

²⁴Nɛ nu'bu mi 'yø'a rá hmu yu mbädi bu ja ra danija, nɛ yu hmumbäja, bi hyonya thoho. Emmɛ bi du yú mbui: "Hapu maha nín sɛ'a øt'u," din 'yɛmp'u. ²⁵'Bex bi zøn'a n'da, bi xifi:

—Nu'u yun 'yohu gá cothu fädi bí 'bäpu ja ra danija ya, ne i xänba u yu ja'i, bi t'emp'u.

²⁶Nɛ bi mba rá hmu yu mbädi buya, nɛ in 'yohu yu mbädi. Nɛ xø bá si yú 'bäihu ra Cristo, nɛ him bi unbi, nguetho mí su xtí mba ma bat'ado. ²⁷Nɛ nu'bu bá ts'i bu ja ra junta, bi 'yän yun t'änni a ra hmumbäją. Bi 'yɛmp'u:

²⁸—Ha hin dá hεc'ahʉ gue hin gui xänbahʉ yʉ jạ'i nangue ra Jesús. Pɛ hin guí øhmbʉ 'bɛ'a dá mangähe. Nuya gätho yʉ jạ'i 'bʉcua Jerusalén i pạh ram hma guí mamhbʉ. Ha guí ɛnje go ma ts'oquihe bi du ra Jesús.

²⁹Nu'a ra Pedro nɛ'ʉ mi'da yʉ́n 'yohʉ bi dạti:

—Jatho ga øthe 'bɛ'a i xije Oją xinda gue i xije yu ją'i. ³⁰Nu Oją gue bi dąnde ma ngurpa bøtahu, bi xox'a ra Jesús, nu'a gue'a gá hyohu 'bu gmí cuathu bu ja ra za. ³¹Pɛ Oją bi zixpu bi gonhui rá ts'ɛdi, ngue dim hmu nɛ dim pørpate. Nɛ da japi di päh yú mbui yu ja'i israel nɛ di punba yú ts'oqui. ³²Nɛ nugähe dí mamhbe majuani nanguehna. Nɛ'a rá Hogandahi Oja im ma majuani nanguehna. Nɛ nu Oja bi un rá Hogandahi to'o gätho bi 'yɛ̞c'yɛi, gue da ba̞sɛ gue majuani a, bi 'yɛ̞n'a ra Pedro.

33 Nɛ nu'bʉ mí 'yø'ʉ hupʉ, ɛ mmɛ bi dɛ ra cuɛ, nɛ min nde xtá hyo ʉ. 34 Pɛ bi ndants'a n'da ran 'yohʉ mi hupʉ ja ra junta, nuna n'da ra fariseo rá thuhu ra Gamaliel. Gue'a n'da ra xänbate yʉn t'ɛdi yʉ judío. Nɛ gätho yʉ jạ'i in numansu a. Nu'a bi manda da ts'ixpʉ thi n'da zʉ ora ʉ i pa ma juạnbi. 35 Nɛ bi 'yɛna:

—N'yohu ahu, dyu israelhu, dami jamansu 'bɛ'a guí ørpahu ya yun 'yohu. ³⁶Nguetho hin ε hua maya'bu bi ndants'a n'da ran 'yohu ra Teudas, mi ɛna mi jasɛ rá ts'ɛdi. Ne xun ngu yu ja'i bi denni, mbe goho ciento. Ne nte dá ørpahu pe bi tho, ne gätho mi tenni bin 'uext'i 'da'a n'danni bi mba. 37 M'bejua buya, bi ndants' ra Judas ra mengu ra häi Galilea. Nu yu pa bin ja ra pede bin tɛt'i 'da yʉ ja'i. Pɛ nɛ'a bi mba ntho, ne gätho mi tenni bin 'uɛxt'i. 38 Janangue'a dí xi ahu, dami hyehmbu ya yun 'yohu, nguetho nu'bu rá ts'edi zehe gue ra 'befi i øt'e, da mba ma juadi 'bu. 39 Ρε nu'bu rá 'bɛfi Oją i øt'e, hingui sä gui hecpahu. Nu'bu guí ena gui hecpahu, gan suhmbu Oja 'bu, bi 'yɛn'a ra Gamaliel.

⁴⁰ Nu'ʉ, bi 'yømanho 'bɛ'a bi man ra Gamaliel, nɛ nu'bʉ mí xifi da yʉt'a mbo mahøn'a yʉ́ 'bäihʉ ra Cristo, bi mba m'bɛi, nɛ bi xi'ʉ hin HECHOS 5, 6 230

din xänbate nangue ra Jesús, nɛ bi hyɛtho buya. ⁴¹Nu'bu mí bøm bu ja ra junta u, bin johya yú mbui, nguetho ya bi nu ran unbi nangue ra Jesús. ⁴²Nɛ xínga n'da ra pa mi ɛ't'i gue him mi mamp'a ra hogam hma nangue ra Jesucristo, nɛ bi xänba yu ja'i nubu ja rá danija yu judío, nɛpu ja yu ngu.

Bi thahni yoto má 'yohu ngue dim fäxte

6 Nu'u yu pa u man'da xun ngu bi 'yɛc'yɛi. Nu'u 'da buya gue i ya ra griego, bi du'mi bi zu'u i ya ra hebreo, i ɛna hingui pa ma pɛti xun ho u 'da yú mɛnguhu, gue yu xisu xun du yú ndø, gue'bu pa ma dat'i yun ts'ihmɛ n'da pa ngu n'da pa. ²Nu'u 'dɛ'mayoho yú 'bäihu ra Cristo bi ma gue dim pɛti yu 'yɛc'yɛi buya, nɛ bi xifi:

—Hingui sä yoho ga øt'ähe, hingui sä ga thoqui ga unhde yun ts'ihmε yu ja'i, nguetho jatho ga mamhbe rám Hman Oja. ³ Janangue'a ma zu cu ahu nangue ra Cristo, dami huahndu 'da gue gue'ahu yoto yu hogan'yohu gue i ha ra ts'ɛdi xun ho nangue rá Hogandahi Oja in 'yohu, nɛ xun ho yún ' yomfɛni, di darpa yún ts'ihmɛ yu ja'i ngue nte i ja. ⁴Pɛ nugähe ga thoje dan yahe Oja nɛ ga mamhbe rám Hman Oja.

⁵Nε gätho ʉ gue madi peti bʉ, bi 'yømanho ʉ 'bɛ'a bi man'ʉ yẃ 'bäihʉ ra Cristo. Nɛ bi than'na ra Esteban, n'da ran 'yohʉ ɛmmɛ ε̞c'yɛi xʉn ho nɛ in 'youi xʉn ho rá Hogandahi Oja. Nɛ bi than'na ra Felipe, nɛ ra Prócoro, nɛ ra Nicanor, nɛ ra Timón, nɛ ra Parmenas, nɛ ra Nicolás, nu'a mí tɛnba yẃ t'ɛc'yɛi yʉ judío 'bʉ hin

ní 'yɛc'yɛi ra Cristo, nu'a bá nɛxpu ja ra hnini Antioquía. ⁶Nɛ gätho bi ts'ixpu 'buh yú 'bäihu ra Cristo. Nɛ nu'u bi gäspa yú 'yɛ yú ya u buya, nɛ bin yahu Oja ngue da mbäx'u nangue ra 'bɛfi bin t'un'du.

⁷Nɛ man'da man'da bi hman rám hman Oja, janangue'a man'da xun ngu yu ja'i bu Jerusalén bi 'yɛc'yɛi. Nɛ'u yu mbäja bu ja yú nija yu judío, xun ngu bi 'yɛc'yɛi nɛ bi denni.

Bi fent'a ra Esteban

⁸Nuna ra Esteban, xun ngu rám fäts'i Oja bi unni ne rá ts'edi, ne bi 'yøt' yun t'øt'e nuixte ne yu hmepya nangue rá ts'ɛdi Oją bu 'buh yu ją'i. ⁹Pε nu'u 'da yun 'yohu bi du'mi bin junthu ra Esteban, gue'u i pa bu ja n'da rá nija yu judío guepu i pa yu ja'i min 'yehe, ne'u 'da yu mengu bu ra häi Cirene, пери ja ra hnini Alejandría, nepu ja ra häi Cilicia, ne 'da yu mengu bu ra häi Asia, gätho bin junthu ra Esteban. ¹⁰Pε him bi zä bi dap'a ra Esteban, nguetho xun ngu rán 'yomfeni mi ja, ngue mi ya con rá ts'edi rá Hogandahi Oją. 11 Janangue'a nt'ągui thoho bi 'bep'i 'da da man ra fehni, da 'yena: "Dá øhmbe a bi ma, bi c'aman'u ra Moisés gue bi 'dac man t'ɛdihʉ, ne bi c'aman'u Oja," bi t'emp'u 'da. 12 Bi parpa yu ja'i buya, ne yu dąc'yei, ne yu xänbate niją, bi fent'a ra Esteban nε bi ts'ixpu bí ja ra junta nguepu i ja rán juanbate yu hmumbäją. 13 Nε bi mba nthoni 'da da man yʉ fɛhni, nɛ bi 'yɛna:

—Hingui ɛ'ts'a ní c'ạman'ʉ na ra dạniją nɛ'ʉ yʉ́n t'ɛdi ra Moisés. ¹⁴Nguetho dá øhmbe bi man na ran 'yohu, bi 'yɛna: "Nu ra Jesús ra mɛngu Nazaret da xo't' ra danija nɛ di päh yun t'øt'e gue bi xiju ra Moisés," bi 'yɛn na ra Esteban, sä bi 'yɛn'u.

15 Gätho mi hupu ja ra junta bi hyand ra Esteban, nɛ bi nu ngue majuani in 'youi xun ngu rá ts'ɛdi Oja.

Din juan ra Esteban

Nu'a ra dambaja bi 'yan'na ra Esteban:

—Ha majuąni 'bɛ'a si'a ya. ²Nu ra Esteban bi dadi:

—N'yohu ahu, gyu ta ahu, dami 'yøhmbu ya 'bu majuani guecä dí øt'ä a i sicä. Nu'a Oją nuįxte thoho bin yaui ma ngurpa bøtahu ra Abraham, nu'bu mí 'bupu Mesopotamia, ne hin ní mba bu ra häi Harán. ³Oją bi xifi: "Dami pøngua ni häi, ne gui socua ni meni, ne gua ępu n'da ra häi ga ut'a'i," bi 'yɛmbi. 4Janangue'a bi bøm bu ra häi Mesopotamia, ne i t'embi Caldea, ne bim 'bupu ra häi Harán. Nu'bu ya bi du rá ta, bi nexpu Harán nε Oją bá si ua ja ra häi dí 'buhmbu ya. ⁵Pε nu ra Abraham hinga gue'a ra ora bi xi Oją di un'na ra häi, xínga n'da xequi da ma gue rá häi zehe. Pe majuani bi xifi di un ra häi gue da gomhbu yúm bom'beto. Nu'bu mi xifi, mán jo'o yú t'uhni ra Abraham.

⁶Nu'a Oją bi 'yɛmbi: "Nu nim bom'bɛto ban 'yɛhɛ bu n'danni ra häi, nɛ da mba ma unbi goho ciento njɛya." ⁷Nɛ xø bi 'yɛmbi: "Nugä ga unbä u yu ją'i 'bupu ja ra häi guepu din 'yɛhɛ, nɛ m'bɛjua buya nu'u ba pøm bu guepu min 'yɛhɛ,

ne ba ęcua ja ra häi, ne guecua da dandegui," bi 'yɛn Oja. ⁸Oja bi 'yøt'ui ran hoqui ra Abraham, nu rá hmɛpya a gue da mba nthɛqui rá xifani, ne'u yú xifani yú ts'unt'u. Bin jabu 'bu mim 'buh ra Isaac rá ts'unt'u ra Abraham, ná hyato pa bi mba nthɛqui rá xifani. Ne nu'bu mín dan'yohu ra Isaac, bim 'buh ra Jacob rá ts'unt'u, ne nu'bu min te ra Jacob bim 'bu'i 'dɛ'mayoho yú ts'unt'u, nu'u gue'u ma ngurpa bøtahu u, bi 'yɛn'a ra Esteban.

⁹Nε xø bi 'yɛna:

—Nu'a n'da rá ts'unt'u ra Jacob, ra José a. Nɛ nu yún 'yohu ra José bi sɛyabi, nɛ bi mbä. Nɛ nu'a to'o bi däi bi zixpu ja ra häi Egipto. Pɛ Oją min 'youi ra José. ¹º Nu Oją bi zɛh ra José nangue gätho yun unbi bi nu, nɛ bi un rám fäts'i nɛ bi un rán 'yomfɛni xun ho. Nɛ nu'a ra Faraón, ra hmuts'ut'abi bu ja ra häi Egipto, bi numanho a ra José, nɛ bi japi di manda gätho ra häi bu nɛpu ja rá ngu.

¹¹Νε bin ja n'da ra dąthu bʉ gätho ra häi Egipto, nepu ra häi Canaán, ne nu yu ja'i bi nu ran unbi nguetho xø ma hin'yu 'be'a da zi ma bøtahu bu mí 'bupu. ¹²Ne nu'bu mi 'yøh ra Jacob gue mi pa m'be'ts'i bu 'be'a da ts'i bu ja ra häi Egipto, bi mbɛn'du 'da yú ts'unt'u, gue'u ma bøtahu u. ¹³Nɛ nu'bu mi mba mahøn'a yén 'yohu, guexta'a him mi pą'a ra José. Nu ra José bi 'yɛmp'u: "Dadín 'yohuhu." Ne nu'a ra José bi xi'a ra Faraón gue gue'u yún 'yohu u. ¹⁴Nu ra José buya bi ma din zohni rá ta, ra Jacob, nε gätho ná ngu mi 'bupu ja rá ngu, gue í jua'i hyate ma'dɛ'ma cut'anja'i. HECHOS 7 232

15 Janangue'a nu ra Jacob bi mba bu ja ra häi Egipto nɛ bi du bu. Nɛ'u yú ts'unt'u mam bombøtahu bá tu bu u. 16 Pɛ nu'u, him bá t'äpu, pɛ bi thuxpu Siquem nubu ra häi mí 'bui, nɛ bi t'äpu ja n'da ra jado. Nu ra jado gue'a bi dän'a ra Abraham gue bi mbä yú ts'unt'u ra Hamor, ra mɛngu Siquem.

¹⁷Nu'bu mi ts'utho da hyän yu pa tengu bi xi Oja ra Abraham, gue di un rá häi yúm bom'beto, emme bin xand yu ja'i buya, gue ma mi'israelhu, nubu ja ra häi Egipto. ¹⁸Nε nubuya bi ndants' man'da ra Faraón bu Egipto, nguetho gätho ní huti yu Faraón yu ts'ut'abi Egipto. Nε nuna man'da ra Faraón him mí pah ra José. ¹⁹ Janangue'a bi ucpi nε bi unba u mam bombøtahu. Nε bi manda da mba ma bunbi gätho yú ts'unt'u a ra pa dim 'bui, gue da du, nguetho in ndepe him man'da din xạnd yu jạ'i israel. 20 Nu'u yu pa'u bim 'bu'a ra Moisés. Nu'a, n'da ra t'uhni madi nequi din hocją'i, ne mi numanho Oja. Nhyuzna bi jamansu rá ta ne rá mbe bu ja yú nguse. ²¹Pe nu'bu mi thøn'a thi ra 'uere Moisés. nu rá t'ixu ra Faraón bi dini. Nε bi zini nε bi tede tengu'bu ε rá t'uhni zehe. 22 Nu'a ra Moisés buya gätho mi sänbi 'be'a mí pah yu mengu Egipto. Ne gätho i pømanho 'be'a mi ma, ne xun ngu mi sä da 'yøt'e.

²³Nɛ nu'bu mi mbɛ'ts'a nyote njɛya, bi bɛni da mba bí zɛngua hapu madím pɛh yú mɛnguhu gue yu ja'i israel. ²⁴Nu'a n'da u, bi nu ran unbi ngue bi unba n'da ra ja'i egipto. Nu'bu mi nu'a ra Moisés, bi yani, bi cospa ra pengui bi hyo ngue bi du ra ja'i egipto. ²⁵Nu ra

Moisés mim beni gue mi pa'u yu ją'i israel 'bɛ'a da 'yøt' Oją, gue ra Moisés da yan'u, di japi him man da nu ran unbi. Pe him mi pa'u yu ja'i. ²⁶Man'da pa buya bi nu mahøn'a ra Moisés gue bin tuhni yoho yun 'yohu israel, ne nu ra Moisés bi zä bi hocua yú mbui, bi 'yɛmbi: "N'yohu aui gadı́n cuui, 'be'a guí enui a guí øt'ui gadín suhmi," bi 'yεmbi. ²⁷Pε nu'a gue mi ja rá ts'oqui bin cue, ne bi ndøn'na ra Moisés, bi 'yɛmp'a: "Ha i ja nin t'ɛdi gui hegä'be, to'o bi xi'i gan ts'ut'abi ngue gui hogä'be. 28 Ha guí ena gui hyogui tengu'bu gmí hyo ra mengu Egipto mán de," bi 'yembi. ²⁹Nu ra Moisés nu'bu mi 'yøde 'bɛ'a bi man'a ran 'yohu, bi 'dagui,bi mba bu 'danguadi ra häi Madián. Nε mí 'bupu tengu bu nam 'bu'u yu 'dan'yo ja'i, ne guepu ja bim 'bupu yoho yú ts'unt'u.

³⁰Ne nu'bu mi tho'a nyote njeya ngue mi 'bupu, bi nequi n'da rám 'bεhni Oją mahεts'i bu ja ra t'uza mi zø ra sibi, nubu ja ra uhäi, jombu ra t'øhø t'ɛmbi Sinaí. ³¹Nu'bʉ mín nu ra Moisés, madi hyonya thoho, bi mba bi hyän'i ts'u bu ja ra t'uza εna da nu 'bε'a i ja bu. Bi 'yørpa rá nde ra Hmu mahɛts'i buya, 32 bi 'yɛmbi: "Nugä drá Oja gue i thande ni ngurpa mbombøtahu. Nugä dra Oja gue i thande ra Abraham, ne ra Isaac, ne ra Jacob," bi 'yembi. Pe nu ra Moisés bi fet'i ne bin su, him bi hyanzambui gue xpi hyandi. 33 Nu'a ra Hmu bi 'yɛmbi: "Dami c'oc ni thixfani nguetho nuua guí 'bäi, xun ho ua, ngue ya dí 'bäcä ua," bi 'yɛn Oja. 34 Ne xø bi 'yen Oja: "Dá nu ma t'uhni 'bupu ra häi Egipto ngue i

233 HECHOS 7

pa ma unbi. Ne dá øcä yú hmbafi u. Bá ęcä ya gue ga japi da thegui. Ne nuya gui mba bu Egipto," bi 'yen Oja, bi t'emp'a ra Moisés, bi 'yen'a ra Esteban.

³⁵Nu ra Esteban xø bi xi'ʉ yʉ juạnbate mahøn'a, bi 'yɛ̞na:

-Guehna ra Moisés bi ts'u 'bu mí 'yɛna xtí hecua yoho yʉn 'yohʉ ma mi'israelhμ, nε bi t'ɛmbi: "Ha i ja nin t'ɛdi gui hegä'be, to'o bi xi'i gan ts'ut'abi." Guehna ra Moisés, Oja bi mbɛnpu ngue din ts'ut'abi nangue yu ja'i israel, ne bi japi bi mba nthegui. Ne nu'a 'be'a bi 'yøt'a ra Moisés, bi 'yøt'e nangue rám 'behni Oja mahets'i bi nequi bu, nu'bu mi dε ra t'uza. ³⁶Nuna ra Moisés bi 'yøt' yun t'øt'e nuixte ne yu hmepya nubu ja ra häi Egipto. M'bejua buya bi gucpu thi yu ja'i bu ja ra häi Egipto, nepu ja ra thenga deja bi 'yøt'a n'da ran t'øt'e nuixte, nepu ma'ueni nguepu bin 'yo yote njeya yu ją'i. ³⁷ Guehna ra Moisés bi xih yu ją'i israel: "Oją da huan'nahu n'da ra pøngahya guepu 'buh nin 'yohuhu, tengutho bu bi huancä. Nu'a jatho gui 'yøhmbu 'be'a da man'a," bi 'yena, bi 'yen'a ra Esteban.

³⁸Nu ra Moisés gue'a bin 'yohu yu ja'i bu ma'ueni. Nɛ nubu ja rá ya ra t'øhø Sinaí bin yaui rám 'bɛhni Oja mahɛts'i, 'bu mi gopu ja rán dui ra t'øhø mam bombøtahu. Nɛ bi hyanba rám hman Oja ra Moisés gue njam'bu da guadi, nɛ gue'a bi thogahu a ya.

³⁹Pɛ nu'ʉ mam bombøtahʉ him bi nde bi 'yɛ̞c'yɛi a ra Moisés, him bi nde bi dɛnni xʉn ho, pɛ bi numan'ʉtho nɛ bi goh yʉ́ mbʉi, mím bem bu Egipto. 40 Nu'u bi 'yemp'a ra Aarón, ra hmumbäją: "Dami 'yørcahe 'da yu oją da zixcahu. Nguetho hin dí pahmbe 'be'a bi ja a ra Moisés gue bá jugähe bu ja ra häi Egipto," bi 'yen'u. 41 Nu'u bi 'yøt'a n'da ra t'undani buya, embi yú oja, ne bi hyo yun dani ne bi mbøx yú 'bøts'e. Ne madín johya a bi 'yøt'e nangue yú 'yese. 42 Pe nu Oją bi 'uegue nangue'u, ne bi hyegui da dande ra hyadi, ra zana, ne yu sø, nguetho nt'o't'i bu ja rá søcua yu pøngahya:

Pe hanja hinga guecä gá pøscahu 'bu gmí hyohu yun dąni 'bu gmí 'buhmbu nyote njeya bu ma'ueni,

i ɛn Oją, bi 'yɛn'u yu pøngahya.
43 Pɛ hinga guecä gá thandegahu pɛ guá tuhu n'da ra ngu'bø't'e guepu gá thandehu a gá sänba zɛhɛ rá thuhu, gá ɛmfu ra Moloc.

Ne guá tuhu n'da rá hmite ra sø gá 'yɛ̞mb zɛhɛhu ra oją Renfán,

ngue gá nde gá thạnde zɛhɛhu.
Janangue'a ga un'nahu nɛ ga
pɛn'nahu man'da yatho xínda
guepu ra häi Babilonia,
i ɛn Oja, bi 'yɛn'u yu pøngahya.

44Pɛ guehma mi tu n'da ra ngu'bø't'e gue mí sänba Oją u ma ngurpa bombøtahu 'bu mín 'yo bu ma'ueni, guepu da dande Oja u, bi 'yøt'e tengu xí xi Oja ra Moisés, nu'bu min yaui bu ja ra t'øhø. Bi xifi da 'yøt'e tengu ra hmɛpya xí nu. 45M'bɛjua buya, nu'bu mí ngurpi

ra Josué, pe guexta'a ra ngu'bø't'e bá tu'u ma ngurpa bombøtahu 'bu mí zøm bu ja ra häi xí xi Oja. Ne mí 'bupu mi'da yu ja'i gue hing yu israel. Nu Oja buya bi hyøn'a thi yu 'dan'yo ja'i ne bim 'bupu yu israel buya. Nε guexta'a mí jatho ra ngu'bø't'e nu'bu min ts'ut'abi ra David. 46 Nu'a Oja emme mí numanho ra David, gue 'dat'a Oją mí thande ra Jacob. Nu'a ra David bi 'yäp rán t'ędi Oją da hyømba rá ngu gue rám poniui ra ngu'bø't'e. ⁴⁷Pε nu ra Salomón rá ts'unt'u ra David a, gue'a bi hyømba rá ngu Oją. ⁴⁸Pε nu'a Oją nuįxte thoho hingui 'bupu ja yu ngu nt'øt'e ngue yú 'yε yun 'yohu. Ngubu bi man ra pøngahya 'bu mi thocpa rám hma ra Hmu mahɛts'i, nɛ bi 'yɛna:

⁴⁹ Nuua mahɛts'i i ja ma ts'ɛdi, nɛcua ja ra ximhäi ja ma ts'ɛdi, 'bɛ'a ní ngu guín nde gui hyøguahu,

o hapu guí εmhbu ja ma säya. ⁵⁰ Ha hinga guesεgä dá øt'ä gätho ja ua ya,

ɛn Oją, bi 'yɛn'a ra pøngahyą, bi 'yɛn'a ra Esteban.

⁵¹Nε bi thoc'a ra Esteban bi xi'u yʉ mbäją i ørpa ran juanbi:

—Nu'ahu xíngui ts'u guí øhmbu 'bu ja'a si ahu, nɛ xum mɛ ni mbuihu, xíngui ts'u di cu't' ni zaguhu.

Thocua thoho guí säman'uhu rá
Hogandahi Oja tengutho mam
bombøtahu, guín jahu bu. ⁵² Xínga
n'da rá pøngahya Oja gue him bi
hyo mam bombøtahu, n'dat'u yu
pøngahya gue bi ma dua ɛh ra Hoga
Cristo, gue'a gá dähu nɛ gá yafu nɛ
xin gá hyohu. ⁵³ Nu'u yúm 'bɛhni Oja
mahɛts'i bi 'daju rán t'ɛdi Oja, pɛ hin
guí urpahu ra güɛnda a 'bɛ'a bi ma,
bi 'yɛn'a ra Esteban 'bu mi 'yɛmp'u
yu ngurpi.

Bi tho ra Esteban

54 Nɛ nu'bu mí 'yøh ya 'bɛ'a bi ma ra Esteban, bi dɛ ra cuɛ yú mbui nɛ bi yɛxpa yú ts'i. 55 Pɛ nu ra Esteban mí hạ ra ts'ɛdi xun ho rá mbui nangue rá Hogandạhi Oją in 'youi, nɛ bi ndøs' mahɛts'i nɛ di nɛc thoho hapu 'bu Oją. Nɛ bi nu ra Jesús 'darpu 'buhmi Oją nɛ i ja rá ts'ɛdi. 56 Nɛ bi 'yɛna:

—Pɛ dami ndøs'hu nu dín nugä, n'yø, nsoqui mahɛts'i nɛ dín nugä a bin ja'i ua ja ra ximhäi, i 'buhnu ja rán 'yɛi Oja, bi 'yɛna.

57 Pε nu'u buya man'da bi got yú zagu, nε bi mbafi nangue yú cuɛ, gätho bi muxpu 'bäh ra Esteban. 58 Nε bi gucpu ja ra hnini nε bi bat'ado bu ma'ueni. Nε nu'u gue bim bate, bi mbøh yú coto nguetho in nde nte di hɛn'u. Bi mbøpu ja rá gua n'da ran 'yohu ní huti ra Saulo, nε bi 'yɛn'u:

- —Gui jamansu ts'u ma cotogähe, bi t'ɛmp'a. ⁵⁹Nɛ nu'bu gätho ní mba ma bat'ado ra Esteban, bi zo'a Oją, bi 'yɛmbi:
- —Nu'i ma Hmu Jesús, dami hyạnga ma te ya.
- ⁶⁰Nε bin dąnyahmu, nts'edi bi mbafi, bi 'yεna:
- —Ma Hmu i, o guí urpa ra güenda nanguehna ra ts'oqui bin ja ya.

Nε nu'bu mi man na, bi du buya.

Nu ra Saulo bi un ran unbi yu 'yec'yei

bi mamhbu u bi hyo'a ra
Esteban. Janangue'a nu ra pa ngue
bi nu ran unbi ra Esteban, nu yu
'yɛc'yɛi mi 'bupu Jerusalén bi mba

ma ucpi. Ne xun ngu u bi mba bu mi'da yu hnini bu ra häi Judea, nepu ra häi Samaria, pe bi gopu u 'de'mayoho yú 'bäihu ra Cristo. Ne 'da'u yu 'yec'yei bi 'yäh ra Esteban, ne emme bin zoni nangue'a. Nu ra Saulo emme madi ucpa yu 'yec'yei, ne mi curpu ja yu ngu mi six yun 'yohu ne yu xisu, ne bi got'a fädi.

I hman ran ho ma'da'yo nubu ra häi Samaria

⁴Pε nu'ʉ bi 'dagui, bi mamp'a rán ho ma'da'yo ra Cristo bʉ n'danni ním pa. ⁵Nu'a ra Felipe bi mba bʉ ja n'da ra hnini ra häi Samaria, nɛ bi xih yʉ jạ'i nangue ra Cristo. ⁶Gätho yʉ jạ'i bi 'yømanho 'bɛ'a bi man na ra Felipe 'bʉ mi nu yʉn t'øt'e nuixte bi 'yøt'a. ⁷Nguetho xʉn ngu yʉ jạ'i bi hyønba thi yʉ zithu, nɛ nts'ɛdi bi mba 'bʉ mí bøn'ʉ. Nɛ nu'ʉ mí 'uɛ'ts' yʉ́ jạ'i nɛ'ʉ yʉ dogua gätho bi zä. ⁸Janangue'a ɛ̞mmɛ bin ja ran johya bʉ ja ra hnini.

⁹Nɛ mí 'bupu n'da ran 'yohu í Simón, mi øt' ran thäte, nɛ nu'u yu mɛngu Samaria madi hyonya thoho. Nu ra Simón min ndep yu ja'i da bɛni jasɛ rá ts'ɛdi. ¹⁰Nɛ gätho na ngu'u, yu t'uhni nɛ yu dac'yɛi, nu'bu mi 'yø'u 'bɛ'a bi man a, bi 'yɛna:

—Nuna ran 'yohu na, ja ra ts'ɛdi tengu Oja, ɛn yu ja̞'i.

¹¹Nu'ʉ mi numansu ra Simón nguetho nya'a thoho mi häte. Nε bi hyonya thoho ʉ 'bɛ'a bi 'yøt'a. ¹²Pε nu yʉ jạ'i bi 'yɛ̞c'yɛi 'bɛ'a bi man'a ra Felipe nu'bʉ mí ma ra Hogamhma 'bɛpʉ ní manda rá ts'ɛdi Oją, ngue bi ma nangue ra Jesús. Nɛ bi mba ma xixyạbi yʉn

'yohu ne yu xisu. ¹³Ne'a ra Simón ęna bi 'yɛ̞c'yɛi, ne nu'bu mín xixyą, bi den'na ra Felipe. Ne nu'bu mín nu yu hmɛpya ne yun t'øt'e nuixte bi 'yøt' ra Felipe, bi hyonya thoho ra Simón.

14Nɛ nu'bu mi 'yø'u yú 'bäihu ra Cristo 'bupu Jerusalén gue bi 'yɛc'yɛi yu mɛngu Samaria, bi mbɛnpu ra Pedro nɛ ra Xuua u mi'da yú 'bäihu ra Cristo. 15 Nu'bu mi zøm bu buya, bin yahu Oja, bi 'yäp rá ts'edi ngue da hyan rá Hogandahi Oja yu 'yɛc'yɛi 'bupu. 16 Nguetho hin ní zøh rá Hogandahi Oja bu ja yú mbui u, pɛ hønt'a nangue rá thuhu ra Hmu Jesús bin xixya u. 17 Nu ra Pedro nɛ ra Xuua buya, bi gäspa yú 'yɛ yú ya yu 'yɛc'yɛi, nɛ bi hyan rá Hogandahi Oja buya.

¹⁸Pɛ nu ra Simón, nu'bʉ mi nu bi hyạn rá Hogandạhi Oją ʉ bi gäx yʉ́ 'yɛ yʉ́ 'bäihʉ ra Cristo, bi 'yut ra mbɛti bʉya. ¹⁹Bi 'yɛ̞mbi:

—Dami 'dac ma ts'ɛdi gue hønt'a to'o ga cäx ma 'yɛ da hyạn rá Hogandạhi Oją tengu guí øt'ui, ma gá jut'aui, bi 'yɛna.

²⁰Pε nu ra Pedro bi 'yɛ̞mbi:

—Di jua Oją ni mbɛti, nɛ'e, nguetho guím bɛni nangue ra mbɛti sä gui tän'a 'bɛ'a di un Oją. ²¹Nguetho hinga gue'e ga comhbʉ na ra 'bɛfi, mfądi ya him mahoqui ni mbʉi bʉ ja rá hmi Oją. ²²Dami päh ni mbʉi nangue ran ts'o. Dami 'yäp rá punbi ra Hmu, nɛ da zä di pun'na'i nangue ran ts'o gá bɛni. ²³Nguetho dí pądi ɛmmɛ ja ran ts'eya ni mbʉi, nɛ ɛmmɛ xʉn ngu ran ts'o ja ni mbʉi guím bɛni.

²⁴Nu ra Simón bi dąti:

—Nu'aui gui 'yähmi ts'u rá ts'ɛdi ra Hmu nanguecä, ngue hin gan nugä a guí mammi, bi 'yɛ̞mp'u.

²⁵Nu'bu mim 'bu'i ts'u bu ra Xuua nε ra Pedro, nε xí mamp'a rám hma ra Hmu mahεts'i, bi mbeng bu Jerusalén. Pε him 'bex bi zøm bu, nε m'bεt'o gätho ná ngu ra häi Samaria bi man'a ran ho ma'da'yo bu bi thogui.

Nu ra Felipe nε ra mεngu Etiopía

²⁶Nu'a n'da rám 'bɛhni Oją mahɛts'i bi zøm bu bí 'bu'a ra Felipe, nɛ bi 'yɛmbi:

—Ní mba 'danguadi guepu bí thoh ra 'yu ní mba Gaza, gue ní bøm bu Jerusalén. Nuna ra 'yu ní mba bu ra huɛnhäi na, bi 'yɛ̞mp'a rám 'bɛɦni Oja.

²⁷Bi ndants'a ra Felipe 'bex bi mba bu. Bi nu, i 'yo bu 'yu n'da ran 'yohu xun hɛts'i rá 'bɛfi, di jamansup rá mbɛti ra xuts'ut'abi Candace bu ra häi Etiopía. Janangue'a i t'ɛmbi ra eunuco, ngue nde da ma, m'boqui. ²⁸Nu'a xpí mbeng bu Jerusalén guepu bá thạnde Oją. ²⁹Nu rá Hogandąhi Oją bi 'yɛmp'a ra Felipe:

—Gui mba gui su'a ran 'yohu i hux ra carro.

30 Nu ra Felipe bin tih puya nε bi zudi. Nu'bu mí zøm bu, bi 'yøde gue mi nεh ra søcuą ran 'yohu, gue rá søcuą ra Isaías rá pøngahyą Oją. Ra Felipe bi 'yän buya:

—Ha guí pądi 'be'a nam bøn'a ra søcuą gadín xäh ya.

31 Bi dą'a ran 'yohu:

—Hague dán zä ga pącä nu'bu njon da xängui.

Nε bi xih ra Felipe da ndets'e din hyʉmmi bʉ.

³²Νε nu'a ra søcuą madin xäh ran 'yohʉ mim ma gue:

I ts'ix'a n'da ran 'yohu tengu n'da ra dε'yo i ts'its'i ngue da hyo.

Ne tengu n'da ra t'ude'yo nu'bu i axpa rá xingu, hin di c'uehe, ne ngutho a ran 'yohu hin din ya.

33 Nɛ nu'bʉ mín nu ran ʉnbi, njom bi yani, njom bi mbäts'i.

Ne njon da zä da ma hangu da denni,

nguetho bi thacua rá te ua ja ra ximhäi.

Gue'a bi man ra søcuą bi nu ran 'yohu.

³⁴Nu ran 'yohu buya bi 'yän'na ra Felipe:

—Dami xiqui ts'u to'o nín 'yohu na da nu ran unbi, uague guese na ra pøngahyą bi nu, uague n'dan'yo, bi 'yɛmbi.

35 Nu'a ra Felipe buya, bi du'mi bi ma 'bɛ'a nam bøn'a ra søcua nubu madín xäh na ran 'yohu, nɛ bi xifi nangue ra Jesús bi t'ørpa na im man ra søcua, nɛ bi thoqui bi xifi xun ho. 36 Nɛ nu'bu mí zøm bu po ra dehe, nu'a ran 'yohu bi 'yɛmp'a ra Felipe:

—Ha hin da zä dan xixyągä 'bʉ, nɛ po ua ra dehe ya, bi 'yɛ̞n'a.

³⁷Bi da'a ra Felipe:

—Da zä, nu'bʉ guí ε̞c'yεi a dí xi'i nangue ra Jesús, gue gätho ni mbʉi.

Bi dą'a ran 'yohu:

—Dí εc'yεi gue gue'a ra Jesucristo rá Τs'ʉnt'ʉ Oją a.

³⁸Nε bi säyabi rá carro bʉya. Nε bi gạpʉ ja ra carro nε bi mba bʉ mi po ra dehe. Nu ra Felipe bʉya bi 'yørpa ran xixyą a ran'yohʉ. ³⁹Nε nu'bu mi boxpu mí po ra dehe, 'dahmantho bi 'bɛrpu ra Felipe gue bi zix rá Hogandahi Oja. Nɛ nu ra mɛngu Etiopía him man'danda bi nu'a. Nɛ nu'bu mí thogui, bin johya rá mbui. 40 Pɛ nu ra Felipe ní nɛqui mahon'a bu ra hnini Azoto. Nɛ nu'bu mambá thopu ja yu hnini, bi mam bu ran ho ma'da'yo asta gue'bu mi zom bu ja ra hnini Cesarea.

Nu'a ra Saulo bi päh rán 'yomfeni

Pε nu'a ra Saulo mim man yun ucuate, nε ran date nangue yu 'yec'yei, gätho ná 'yøt'a bi 'yøt' ra Felipe. Nε bi mba bu bí 'buh ra hmumbäja. ²Ne bi 'yäp ra søcua ngue ran t'ɛdi da mba bu ja yú niją yu judío nubu ra hnini Damasco. Νε nu'bu 'bo'o da dim bu gue i ten ra Cristo, ogue ran 'yohu ogue ra xisu, da bent'i ne da zixpu Jerusalén nthu't'i din ofädi bu. ³Ne nu'bu mí mba bu 'yu, mí ts'utho da zøm bu Damasco, 'bex bí 'yɛh mahɛts'i n'da ra nyot'i emme bi hyärpu i 'bä'a ra Saulo. ⁴Bi dang bu häi ra Saulo buya, nε bi 'yø'a n'da ra nde bi 'yɛna:

- —Saulo, Saulo, hanja gní ungui. ⁵Bi da'a ra Saulo:
- —To'o i, gra Hmu.

Nu ra Hmu bi dat'a:

—Nugä dra Jesús, guecä gadí ungui, nɛ xun hɛi guí øt'e tengu n'da ra mbundani i pa ma suni ra t'o ndepe dim pɛfi xun ho, nɛ i nɛte thoho.

⁶Nu'a ra Saulo ɛmmɛ bin su nɛ bi fɛt'i, bi 'yɛna:

—Ma Hmu, 'bɛ'a guín nde ga øt'ä. Nu ra Hmu bi 'yɛmbi: —Dami ndants'i gui mba bu ja ra hnini, nubu, da si'i 'bɛ'a gui 'yøt'e, bi t'ɛmbi.

⁷Nε nu'ʉ gätho mín 'yohʉ him mi sä din yą nguetho bin su. Nu'ʉ mí øh ra nde pɛ him min nu to'o min yą. ⁸Nu'bʉ mi ndants'a ra Saulo bi zøt' rá dä pɛ him mi nu, mi xädä thoho. Nu'ʉ mín 'yohʉ bi bɛntpa rá 'yɛ bi zixpʉ Damasco. ⁹Nɛ hyupa bám 'bʉpʉ, nɛ mi xädä, nɛ him mi sihmɛ, xing ra dehe mi si.

¹⁰Nɛ mi 'bʉpʉ Damasco n'da ra 'yɛ̞c'yɛi rá thuhu ra Ananías. Nu ra Hmu mahɛ̞ts'i bin 'yusɛ bʉ nɛ bi zofo tengu'bʉ bin 'uɨ̯.

—Ananías, bi 'yɛmbi.

Nu ra Ananías bi dądi:

- —Dí 'bucä ua gra Hmu.
- ¹¹Nu ra Hmu bi 'yɛmp'a:
- —Dami ndants'i gui mba bu ja ra 'yu t'ɛmbi xun juani, nɛ gui hyom bu n'da ran 'yohu ra Saulo, ra mɛngu Tarso, i 'bupu ja rá ngu ra Judas. Nuya in zocä ya. ¹²Nɛ'a ra Saulo in nu tengu'bu ra t'i ngue guí mba bu nɛ guí cäx ni 'yɛ, nɛ da nu ran nɛqui mahøn'a, bi 'yɛn Oja.

¹³Bi dąt'a ra Ananías:

—Ma Hmu i, xun ngu yu ja'i bi xiqui 'be'a øt'na ra Saulo, xun ngu yun ts'o xu 'yørpa yu 'yɛc'yɛi 'bupu Jerusalén. ¹⁴Nɛ nuna bá äp rán t'ɛdi yu hmumbäja da bɛnt'i nɛ da got'a fädi gätho to'o da ndøn'na ni thuhu, bi 'yɛna.

¹⁵Pε nu'a ra Hmu bi xi'a ra Ananías:

—Ní mbahma nguetho dá huahndä da ma nanguecä bu 'bu'u hing yu judío, nɛ yu hmuts'ut'abi, nɛ yu ja'i israel ngue yu judío. ¹⁶Nɛ ga xifi xun ngu yun unbi da nu nanguecä, go bi 'yɛn Oją. HECHOS 9 238

¹⁷Bi mba ra Ananías buya, ne nu'bu mi yurpu ja ra ngu, bi gäx rá 'ye rá ya ra Saulo ne bi 'yembi:

—Ma cu'i Saulo, nu ra Hmu Jesús, nu'a gue gá nu bu 'yu 'bu guá ɛhɛ, bá pɛncä ua ya gue di ja i da xoh ni dä. Nɛ di ja i gui hya ra ts'ɛdi xun ho nangue rá Hogandahi Oja gan 'youi, bi 'yɛna.

¹⁸Ne 'bex bi hyø'u mi comba yú dä tengu ra xihua. Ne 'bex bi hyand ran nequi yú dä ra Saulo, 'bex bi ndants' puya ne bin xixya. ¹⁹Ne nubuya, bin sihme ne bi zac mahøn'a rá ja'i. Ne bám 'bu'i ts'u bu bí 'bu'i 'da yu 'yec'yei bu ra hnini Damasco.

Nu'a ra Saulo bi mam bu rám Hman Oja bu Damasco

²⁰Nε nu ra Saulo bʉya 'bex bi dʉ'mi bá mam bʉ rám Hman Oją bʉ ja yʉ́ niją yʉ judío. Nε bi xifi gue nu ra Jesús rá Ts'ʉnt'ʉ Oją a. ²¹Gätho mi øde bi hyonya thoho nε bi 'yɛ̞na:

—Ha hinga guehna ran 'yohu na mi cot'a fädi gätho mi ndønba rá thuhu ra Jesús bu Jerusalén. Nε ha him bá εcua ngubu da 'yøt'e, nε da zits'i nthu't'i bu 'buh yu hmumbäją, bin 'yεmp'u.

²²Pε nu ra Saulo man'da bi hyą ra ts'edi bi ma xʉn ho. Nε nu yʉ judío 'bʉpʉ Damasco nte mi sä da ma, nguetho bi xifi, nu 'bɛ'a gätho mán ts'änni da'yøt'a rá Thahni Oją gue ra Cristo, pɛ gue'a bi 'yøt'a ra Jesús, guepʉ bi 'yuti n'dat'a.

Nu'a ra Saulo bi 'dagui, ɛna xtám bɛnt yʉ judío

²³Νε nu ra Saulo 'bʉ mím 'bʉpʉ nya'a ts'ʉ yʉ pa, n'dat'a mí man'ʉ yu judío hing yu 'yɛc'yɛi, ngue da hyo. ²⁴Pɛ nu ra Saulo mi øde 'bɛ'a mbɛn'u yu judío. Nu'u mí fäh yú goxthi bu ja ra ndehnini, guepu ma mbä't'i ra jado. Ma pa nɛ ra xui mí fäh yu goxthi ngue nde da hyo. ²⁵Pɛ nu yu 'yɛc'yɛi bi zix ra Saulo gue ra xui, í ca'ma n'da ra 'bøts'e bu thi bu ja ra jado ngue ma fø't'e ra hnini. Gue'a í 'da'a.

Ra Saulo 'bupu ja ra hnini Jerusalén

²⁶Nu'bʉ mí zøm bʉ Jerusalén ra Saulo, mim beni gue xtín 'yohu yu 'yɛc'yei. Pe nu'u mín su'u ne him mi ęc'yei gue ra 'yec'yei ra Saulo. ²⁷Pε nu ra Bernabé bi zix'a ra Saulo guepu 'buh yú 'bäihu ra Cristo. Ne bi xifi ngue bi nu ra Hmu bu 'yu, ne bin yaui ra Hmu. Ne bi xifi bi hyut' ran zambui bu Damasco nu'bu mím ma nangue ra Jesús. 28 Nu yu 'yɛc'yɛi bi zim buya, nɛ bin 'yohu bu Jerusalén. 29 Nε nu ra Saulo bi hyut' ran zambui bi mamp'a rám Hman Oją nangue ra Jesús. Pe nu'u 'da yú mijudíohu gue i ya ra nde ra griego, madin junthu ra Saulo, ne'u nde da hyo'u. 30 Nu'bu mí 'yøh yu 'yɛc'yɛi gue nde da tho ra Saulo, bi zixpu Cesarea ne bi mbenpu Tarso.

31 Nuya bin hệ yến tinh yệt 'yệc'yêi gặtho ra hải Judea, nê ra hải Galilea nê ra hải Samaria. Nê bin te yết mbui nangue Oją. Bi numansu ra Hmu nê bi nu rấm fặts'i rấ Hogandạhi Oją. Nê man'da xun ngu bi 'yệc'yêi.

Bi zä'a ra Eneas

32 Nu'a ra Pedro mí 'yo mi nu u yu 'yɛ̞c'yɛi 'bupu ja yu hnini, nɛ bi zøm bu ja ra hnini Lida gue da nu yu 'yɛ̞c'yɛi 'bʉpʉ. ³³Nɛ bi dim bʉ n'da ran 'yohʉ ní hu Eneas, nhyato njɛya xí 'yoi gue xʉn ʉ, xín t'ɛ'ts' rá ja'i. ³⁴Nu ra Pedro bi 'yɛ̞mp'a:

—Eneas, da zä'i nangue ra Jesús, dami ndants'i pants' ni fidi, bi 'yembi.

'Bex bi ndants'a ra Eneas buya.

35 Nɛ gätho ngue 'bupu Lida nɛpu Sarón bi 'yṣc'yɛi ra Hmu 'bu mín nu'a bin ja, nɛ bi hyɛsɛ yú t'ṣc'yɛi.

Nu'a ra Dorcas bi dambeni 'bu mi du

³⁶Nɛ nu'ʉ yʉ pa ʉ, mí 'bʉpʉ ja ra hnini Jope n'da ra xisu gue ra 'yɛc'yɛi, í Tabita, nε í Dorcas ngue rá nde yʉ griego. Nuna ra xisu ɛmmɛ xʉn ngu ran huşcate mí ørpa yú mija'ihu. ³⁷Pe nuya bin zäman'u, ne bi du. Nu'bu mi 'berpa rá ją'i, bi jäxpu bí ja n'da ra t'ots'i magats'i. 38 Nu ra hnini Lida mí hän bu Jope. Nu'bu mí 'yøh yu 'yɛc'yɛi,gue 'bʉpʉ Lida ra Pedro, bi mbεhn'du yoho yun 'yohu gue ba ørpa ra ts'edi ba ehe. 39 Nu ra Pedro buya 'bex bán 'yohu u. Nu'bu mí zøhø, 'bex bi ts'ixpu magats'i ja a ra cuarto guepu mí 'bä'u yu hyoya xisu mí zoni. Nε bi 'yut yú he xí t'ørpabi, gue bi 'yørpa ra Dorcas 'bu mi 'bui. 40 Pe nu ra Pedro bi xifi:

—Dami pømhbu ts'u n'da zu ora gätho ahu.

Ne bin danyahmu ne bin yaui Oja. Ne bi hyant'a gue bi du, bi 'yembi:

—Tabita dami ndants'i, bi 'yɛ̞mbi.
'Bex bi zøt' rá dä, nɛ nu'bʉ mín nu
ra Pedro, bi hyudi. ⁴¹Nu ra Pedro
bʉya bi bɛntpa rá 'yɛ nɛ bi xots'i,
bim 'bäi. 'Bex bi zohn'dʉ yʉ 'yɛ̞c'yɛi
nɛ yʉ hyoya xisu bʉya:

—Dami nuhu na xí du, ne bi dambeni ya, bi 'yemp'u.

⁴²Nu'bu mí 'yø'u gätho ra hnini Jope, xun ngu bi 'yεc'yεi ra Hmu. ⁴³Nε nu ra Pedro xun ngu ts'u yu pa bá copu Jope, bám 'bupu rá ngu ra Simón. Nu ra Simón ra hoca xindani a.

Ra Pedro ne ra hmudofui Cornelio

10 Mí 'bមpម n'da ran 'yohe í Cornelio, nube ra hnini Cesarea. Gue nuna ran 'yohe im hmu nangue'u n'da munts'i yu dofui gue'a ní t'ɛmbi Italiano u. ²Nuna ra Cornelio madague'bu hing ra judío a, pɛ nu'a nɛ gätho 'bupu rá ngu mi thạnde Oja nɛ mí numansu a. Nzại mi un yun t'unni yu hyoya nɛ nzại min yahu Oja. ³N'da ra pa mbɛ hyunde, tengu'bu bi 'ui 'bu mí nu n'da rám 'bɛhni Oja mahɛts'i, bi yurpu ja ra cuarto mí 'bäi, bi zofo:

—Cornelio, bi 'yεmbi.

⁴Nɛ nu'bʉ mí hyandi, bin su nɛ bi dadi:

-'Bε'a ma Hmu.

Nu ram 'bɛhni bi 'yɛmbi:

—Nu'a Oją im bɛn'i, nε i ø'bu guí yąui, nε in nu Oją 'bu gdí un yun t'unni yu hyoya. ⁵Nuya, gui pɛhn'du 'da yun 'yohu bu Jope da dim bu n'da gue ra Simón, nɛ guet'a ra Pedro a, nɛ gua pɛnhua. ⁶Nu'a ra Pedro i 'buhmbu n'da ran 'yohu í Simón gue ra hoca xindani a, nɛ i 'bupu ndendeja. Nu'a da xi'a'i 'bɛ'a gui 'yøt'e, bi 'yɛn'a rám 'bɛhni Oja.

⁷Nu'bu mí gua'a im ma, 'bex bi mbeng mahɛ̞ts'i ram 'bɛhni. Nu ra Cornelio buya bi zohni yoho yú 'yɛ̞hɛ nɛ n'da ra dofui ngue i numansu Oja̞, ngue rá 'yɛ̞hɛ a. ⁸Nɛ nu'bu mi xifi gätho 'bɛ'a bi xih rám 'bɛhni Oją mahɛ̞ts'i, bi mbɛnpʉ Jope ʉ bʉya.

⁹Man'da pa bʉya mbε huxyadi nu'bu bá ¿pu 'yu yúm 'behni ra Cornelio, häntho Jope, nu ra Pedro bi ndexpu thi bu ja ra ze'ts'angu bu mí 'bui, guepu din yaui Oja. 10 Nu'a ra Pedro εmmε bin tumanthuhu, nε gätho ní mba mahoqui ran ts'ihme, nu ra Pedro buya bi nu n'da ran t'uti, tengu'bu bi 'ui. ¹¹Ne bi nu nsoqui mahets'i, ne bá cai tengu n'da ra the'bø't'e xun ndoho gue mfent'i yú ts'at'i. ¹²Ne ba 'yo bu ja ra 'bø't'e hønt'a go 'bɛ'a má zu'uɛ i ja goho yú gua, ne yu zate, ne yu pozu, nε yu doja. ¹³Nu ra Pedro bi 'yø'a n'da ra nde, bi t'ɛmbi:

—Dami ndants'i gui hyo gue gui sa.

¹⁴Bi da'a ra Pedro:

—Hin'na ma Hmu, nguetho njạm'bu xtá sagä xun ts'o, gue'a i man nin t'gdi hingui ho 'bu ga sa.

¹⁵Νε bi 'yɛ̞mbi mahøn'a:

—'Yo guí ɛna hingui ho 'bɛ'a dá sändä da ts'a, ngue gätho dí hocä u, bi 'yɛmp'a ra nde.

16 Ná hyundį bi sifi, bi ndex mahøn'a mahɛts'i ra 'bø't'e. ¹⁷ Nu ra Pedro, nu'bu gätho madí hyonya thoho nɛ im bɛni 'bɛ'a ní mba'a xí nu tengu ra t'i, 'bex bi zøh yúm 'bɛhni ra Cornelio. Nɛ mí 'bäpu thi ja ra goxthi rá ngu ra Simón, nɛ xí 'yänni hapu ja'a ra ngu. ¹⁸ Nu'bu mí zøm bu, bi 'yänni:

—Ha 'bucua ra Simón Pedro.

¹⁹Ne gätho nín 'yomfeni ra Pedro 'be'a ní mba a xí nu, nu'a rá Hogandahi Oja bi 'yembi:

—'Bupu hyu yun 'yohu i hon'i. ²⁰Dami ndants'i, gui cai nɛ gui mbähä u yun 'yohu, gui tenni ne hin gan su, nguetho nugä bá penhdä u, bi 'yembi.

²¹Nu ra Pedro bʉya bi gapʉ mi 'bäh yʉn 'yohʉ gue bá pɛnh ra Cornelio, nɛ bi xifi:

—Nugä guecä guí hongui. 'Bɛ'a gní hyonjʉ.

²²Bi dą'u:

—Nu ra Cornelio ra ngurpa dofui bá pɛncähe. Nu ra Cornelio n'da ra hocją'i gue i numansu Oją. Nɛ gätho yu judío i ndømanho nangue'a. Nɛ n'da ram 'bɛhni mahɛts'i bi xi'a da zonh'na'i, gue gui mba bu rá ngu, nɛ da t'ømanho 'bɛ'a gätho gui xifi, bi 'yɛn'u.

²³Nu ra Pedro bi xifi da yнгрн mbo ra ngu, bin охрн bнуа. Nu'bн mi hyats'i bi mbähä ra Pedro. Nɛ'н 'da yн 'yɛฺс'yɛi mí 'bнрн Jope bi mbähä.

²⁴Man'da pa bʉya bi zøm bʉ ra hnini Cesarea. Nu ra Cornelio xí zohni gätho 'bʉpʉ ja rá ngu nɛ yʉ́ amigo, ngue dim pɛti bʉ ja rá ngu. Gätho i tøm'bʉ. ²⁵Nu'bʉ mí zøm bʉ ja ra goxthi ra Pedro, bá pøn ra Cornelio, bi dądi nɛ bin dạnyahmu bi dąnde. ²⁶Pɛ nu ra Pedro bi gʉ'ts'i nɛ bi 'yɛmbi:

—Dami ndants'i nguetho nugä dran 'yohu thohogä tengutho i, bi 'yɛ̞na.

²⁷Ne i yaui gätho án yut'a mbo rá ngu. Ne bi nu xun ngu xím peti bu. ²⁸Nu ra Pedro bi 'yemp'u buya:

—Guí pąhmbu hin 'yu man t'ędihe dyu judíohe gue dan uąns'hu o gue ga cuthe bu ja ni ngumhbu, nguetho hin gyu judío ahu. Pe Oją xu 'yurcagui gue xínga n'da yu ją'i ga ęmhbe hin da zä dan

241 HECHOS 10

yamanhohe, ogue ga amfe hingui ho. ²⁹ Janangue'a nu'bu gmí zoncagui, bá acä na nte mán t'änni dá änni. Nuya dín nde ga padi hanja gá zoncagui, bi 'yan'a.

³⁰Nu ra Cornelio bi 'yεm bʉya:

—Ná goho pa tengu ra ora jabuya, dá ε't' man ts'ihmε 'bʉ mán yagä'be Oją, 'bex bi zø'a n'da ran 'yohu ua dí 'bui, mí he ra pahni di fexni. ³¹Nɛ bi 'yɛngui: "Cornelio, Oją bi 'yøde 'be'a gám ma ne bi nu yun t'unni gá un yu hyoya, ne im ben'a'i. ³²Nuya guin zohna ra Simón Pedro 'bupu Jope bu ja rá ngu ra Simón ra hoca xindani a, ne i ja rá ngu bu ndendeja. Nε nu'bu da zøcua gan yaui," en'a ram 'behni mahets'i 'bu min zoqui. 33 Jananjabu dá zonh'na 'i ne xun ho guá ehe. Nuya gäthogähe dí 'buhmbe ua ngue da nuje Oja, ga øhmbe 'bɛ'a gätho da xije Oja, gue gui xije, ɛn'a ra Cornelio.

Bi sih ran ho ma'da'yo a ra Cornelio

³⁴Nu ra Pedro bi 'yɛmp'ʉ:

—Nugä dí pacä ya hingui huahna Oją to'o da numanho gue'bu ra judío o hing ra judío. 35 Nu Oją da zini hønt'a go nda'a ní nde i yą, ngue to'o gätho da numansu'a, ne to'o i øt' ran ho. ³⁶Guí pahmbu ram hma bá pencähe Oja dyu israelgähe, dyu judíogähe, bi ma nangue ra Jesucristo, gue nu'a di hocpa ní mbui n'da, guehna rá Hmu u gätho hønt'a go 'be'a ní nde i ya. ³⁷Ne guí pahmbu ram hma nangue ra Jesucristo bi hmam bu gätho ra häi Judea, bí mbupu Galilea, gue'bu ya xí juah rá 'bɛfi ra Xuua Nxixya gue bi ma di xixyaba yθ ja'i. 38 Νε

guí pahmbu Oja bi un rá ts'edi rá Hogandahi Oja ra Jesús, ra mengu bu Nazaret. Nu ra Jesús hønbu go hapu bin 'yo mí øt' ran ho, ne gätho u mín 'yohu ra zithu bi hyønba thi ra zithu. Gätho bi 'yøt'u nguetho min 'youi Oją. ³⁹Νε nugähe ma 'bäigähe a ra Jesús, dí mamhbe majuani, nguetho dá nuhe 'bɛ'a gätho bi 'yøt' ra Jesús nubu ma häihe dyu judíohe, nepu ma ngurpa hninihe Jerusalén. Ne m'bejua bi tho, bi guarpu ja ra pont'i. ⁴⁰Pe Oja bi xox'a ná hyupa, ne bi japi dá nugähe xun ho. 41 Pe njom mi'da bi nu, høngdähe gue xí huancähe Oją. Janangue dí mamhbe majuani, gue ya majuani dán sihmegähe ra Jesús 'bʉ mi ndants' 'bʉ mi du. 42 Ne nu'a bi mbencähe gue ga xihmbe yu ja'i ne ga mamhbe, gue gue'a bi huahn'na Oja da 'yørpa ran juanbi yu ja'i 'bui ne'u xun du. ⁴³Ne guehna mím man'u gätho yú pøngahyą Oją, gue gätho to'o da 'yɛ̞c'yɛi nangue ra Jesús, da hya̞n ra punbi nangue yú ts'oqui, bi 'yɛn'a ra Pedro.

Nu'u hing yu judío bin t'un rá Hocandahi Oja

⁴⁴Nε i yą ra Pedro, 'bex bá εh rá Hogandahi Oją, gätho bi gohmbu yu ją'i i øh rám hma ra Pedro. ⁴⁵Nε nu'u yu judío min 'yohu ra Pedro madí hyonya thoho 'bu mí badi bin t'un rá Hogandahi Oją u hing yu judío. ⁴⁶Nguetho bi 'yøde bin ya 'da yu nde hing yú ndesε u, gue bi 'yɛspa Oją 'bu mí ya. ⁴⁷Nε bi 'yɛn'a ra Pedro, bi 'yänni:

—Ha sä da mba ma hɛcpi ya 'bucua gue hin din xixyą, nɛ ya хи hyan rá Hogandahi Oja tengugahu, bi 'yɛna.

⁴⁸Ne bi ma di xixyąbi nangue rá thuhu ra Jesucristo. M'bejua buya bi 'yäp ra mate ra Pedro da gohmbu bu mi'da yu pa.

> Nu ra Pedro i xih yu 'yɛɛ'yɛi bu Jerusalén hague án zä bi 'yɛɛ'yɛi u hing yu judío

Nɛ nu'u mi'da yú 'bäihu ra Cristo nɛ yu 'yɛc'yɛi bu ra häi Judea mí øde gue yu ja'i hing yu judío bi hyan rám hman Oja.

Pe nu'bu mí mbeng bu Judea ra Pedro, nɛ bi zøm bu Jerusalén, nu'u 'da yu judío yu 'yɛc'yɛi bu, bi zu'a ra Pedro.

Nu'u bi xi'a ra Pedro, bi 'yɛmbi:

—Hanja gá mba bu yú ngu yu ją'i ngue hing yu judío, ne gán sihmehu u.

⁴Nu ra Pedro bʉya bi xifi 'bɛ'a gätho xín ja, gue'bʉ mí dʉ'mi bi xi Oją gue da zøm bʉ rá ngu ra Cornelio. Bi 'yɛ̞na:

⁵—Mí 'bucä bu ra hnini Jope, ne mí yągä'be Oją. Dá nugä tengu'bu dá 'ui, bá cah mahets'i tengu n'da ra the bø't e. Ne bá cại mfent i goho yú ts'ąt'i, ne bi zøpu dí 'bui. 6 Nu'bu má handi dá nu hønt'a go 'be'a má zu'uɛ 'bucua ja ra häi. Dá nu'u ja goho yú gua, yu zu'uɛ nɛ yu zate nɛ mi'da. Ne dá nu yu pozu ne yu doja. ⁷Nε dá ø'a n'da ra nde bi xiqui: "Pedro, dami ndants'i gui hyo gue gui sa," bi 'yɛngui. 8"Hin'na ma Hmu," dá ¿mbi, "nguetho njam'bu dá sagä a man nin t'ɛdi ngue hin ga sahe." 9Pe nu ra nde mahets'i bi xiqui mahøn'a: "Pε 'yo guí εna hingui ho 'be'a dí sändä da ts'a,

ngue gätho dá hocä yu," bi 'yɛngä a ra nde. ¹⁰Nhyundį bi 'yøt'e njabu, bi mba ra 'bø't'e bu mahɛts'i buya. ¹¹Νε 'bexque gue'a ra pa bi zøpu hyu yun 'yohu bu ja ra goxthi guepu dám 'bucä, gue yum 'behni bá nexpu Cesarea, ne bi hyongui. ¹²Νε nu'a rá Hogandąhi Oją bi xiqui ga tenni, ne nte mán t'änni ga änni. Nε 'bäcua ya 'dato yu 'yεc'yεi ngue dá mbähmbe. Ne dá cuthe bu ja rá ngu n'da ran 'yohu í Cornelio. ¹³Νε nu'a bi xije gue bi nu n'da rám 'behni Oja mahets'i mí 'bäpu ja rá ngu, gue bi xifi da mbenpu ja ra hnini Jope 'da yun 'yohu, da 'yänni nanguecä. ¹⁴Nɛ bi xifi gue ga xifi hague dán zä dim pøhø, ne'u 'bupu rá ngu. ¹⁵Ne nu'bu mí jua'a bi xic ra Cornelio, dá du'mi dá zocä buya. Ne nu'bu má du'mi dá mangä, nu rá Hogandahi Oja bá ehe ne bi gohmbu u mí 'bupu buya, tengutho bi 'yørcahu rá mbudi thoho. ¹⁶Νε nubuya dá bɛngä rám hma ra Hmu Jesús nu'bu mim ma: "Nu ra Xuua bi xixya ahu ra dehe, ρε nugä ga 'da ahu rá Hogandahi Oja," bi 'yɛngähe ra Jesús, bi 'yɛn'a ra Pedro.

¹⁷Ne xø bi 'yena:

—Nu'bu n'dat'a ran t'unni bi un Oją u, tengutho bi 'daju 'bu ya xtá εc'yεihu ra Hmu Jesucristo, ha da zä ga sεrpä a in nde da 'yøt' Oją, bi 'yεn'a ra Pedro.

¹⁸Nu'bu mí 'yø'u yu 'yɛc'yɛi 'bupu Jerusalén 'bɛ'a bi man ra Pedro, him mam bi zui pɛ bi 'yɛspa Oja, nɛ bi 'yɛn'u:

—A, njabu øt Oją 'bu, gue nɛ'u yu ją'i hing yu judío di japi di päh yún 'yomfɛni nangue yú ts'oqui, ngue nɛ'u din ja ra temazai u, bi 'yɛn'u.

Nu yu 'yec'yei dim peti bu Antioquía

19 Nu'u 'da yu 'yɛc'yɛi ngue bi nu ran unbi bu Jerusalén 'bu mí mba ntho ra Esteban, bin 'uɛxt'u. Nu'u 'da bi mba bu n'danni yu häi Fenicia nepu Chipre nepu ja ra hnini Antioquía. Bi man rán ho ma'da'yo ra Cristo bu bim 'bui, pe hønt'u yú mijudíohu bi xifi. ²⁰Pe nu'bu mí zøm bu Antioquía 'da yu mengu bu Chipre nepu Cirene, bi zo'u hing yu judío, gue ne'u bi xifi nangue ra Hmu Jesús. 21 Nu'u mí ja ra ts'edi xun ho nangue Oja u, janangue'a xun ngu yu ja'i hing yu judío bi 'yec'yei, bi hyese yú t'ec'yei, nε bi dεn'na ra Hmu.

²²Ne bi 'yø'ʉ yʉ 'yɛc'yɛi 'bʉpʉ Jerusalén gue bi 'yɛc'yɛi u 'da hing yu judío bu Antioquía. Janangue'a bi mbεnpu a ra Bernabé. ²³Νε nu'bu mí zøm bu, bi nu ngue i nu rá mate Oją yu ją'i i 'bupu. Bin johya rá mbui ra Bernabé buya, ne bi zofo,bi xifi hin da hyegui, pe din 'yomanho bu ja rá 'yu Oja, ne da 'yørpa rá 'bɛfi Oja ngue gätho yú mbui. ²⁴Nuna ra Bernabé n'da ra hocja'i na, ne mí ha rá ts'edi xun ho rá mbui nangue rá Hogandąhi Oja in 'youi, ne mí ec'yei xun ho. Janangue'a xun ngu mi'da yu ja'i bi 'yɛc'yɛi ra Hmu.

²⁵Nubuya, bá pøm bu ra Bernabé, bi mba bu Tarso bi hyom bu ra Saulo. Nɛ nu'bu mi dini, bi zixpu Antioquía. ²⁶Nɛ n'dajɛya bám 'buhmi bu, nɛ mi pa bu ja ram pɛti nɛ bi xänbi xun ngu yu ja'i. Guepu ra mbudi bi t'ɛmbi yu cristiano u yu 'yɛc'yɛi, gue mí nde da ma, i tɛn ra Cristo u.

²⁷Nu'u yu pa u, bá nexpu Jerusalén 'da yu pøngahyą, bi mba bu Antioquía. 28 Nu'a n'da í Agabo, bi ndants'i bim 'bäpu madím peti yu 'yec'yei, ne bi ma con rá ts'edi rá Hogandąhi Oją. Bi ma gue din ja ra thuhu gätho ra ximhäi. Ne nuna bin ja 'bu mim hmuts'ut'abi bu Roma a ra Claudio. 29 Νε nu'bu mín ja ra thuhu, nu'u yu 'yɛc'yɛi bu Antioquía bi zänni hangu na ngu ts'u ra mbeti da badi n'da ngu n'da, gue da 'benpa u yú mi 'yɛc'yɛihu 'bupu ra häi Judea, ngue da mbäx'i ts'u. 30 Ne ngubu bi 'yøt'e, bi mbenpa ra mbeti u yú ngurpi yu 'yɛc'yɛi bu Judea, bi hyax'a ra Bernabé ne ra Saulo.

Bi tho ra Jacobo ne bi mba mfent'i ra Pedro

Herodes bi manda da mba Nu'u yu pa u, nu ra ts'ut'abi mfent'i yu 'yec'yei, bi du'mi di unba u. ²Nε bi manda ngue bi tho ra Jacobo rán 'yohu ra Xuua, ra juai í tho a. ³Nu'bu mi bạh ra Herodes gue i numanho yu judío hing yu 'yɛc'yɛi gue bi hyo ra Jacobo, bi bent'a ra Pedro, ne bin theui n'da ra dąmpeti mí sänba Oją u yu israel, t'embi dabaxjua. 4 Janangue'a him 'bex bi tho ra Pedro, pε bi jot'a fädi. Nε bi manda 'dε'ma 'dato yú dofui ra Herodes di jamansu ra goxthi, 'da'i goho n'da cut'i. Mím bɛn'a ra Herodes xtán zixpu 'buh yu ja'i, mí ena xtá hyo bu 'bu mí gua'a ram peti ran dabaxjua. ⁵Nu ra Pedro guexta'a mí pa m'bädi xun ho bu ja ra fädi, pε nu yú mi 'yεc'yεihu bim peti, ne emme bin yahu Oja nangue ra Pedro.

HECHOS 12 244

Oją bi guc'a ra Pedro nu'bu mí ofädi

⁶Nu ra xui a gue mi εn'a ra Herodes xtán guc 'bu mí hyats'i, nu ra Pedro mi cät'inde yoho yu dofui, nε nu'a, nthu't'i yoho yu cadena, nε bin ąha. Nε xø mí 'bäpu mi'da yu dofui bu ja rá goxthi ra fädi. ⁷N'dahmantho bi zøpu 'buh ra Pedro n'da rám 'bɛhni ra Hmu mahɛts'i. Nε bi nɛcpu mbo ra fädi. Nu ram 'bɛhni bi 'yạnba rá hyo ra Pedro, bi 'yä'a, nε bi 'yɛmbi:

—Ndants'a n'dihi, bi 'yɛmbi.

Nu yu cadena bi xose gue'a mán thu't'i rá 'ye. ⁸Ne nu ram 'behni bi 'yemp'a mahøn'a:

—Dami tu't' ni ngu't'i nɛ gui 'yu't' ni thixfani.

Nu ra Pedro bi 'yøt'e tengu bi si'a. Nɛ xø bi 'yɛmbi:

—Hye ni dąpahni nɛ gui tɛngui.

⁹Nu ra Pedro bi dɛn'na ram
'bɛhni, bi bøm bʉya. Pɛ him mí pą
'bʉ majuani gue'a rám 'bɛhni Oja
bi zits'i, uague tengu'bʉ bi 'uitho.

¹⁰Nɛ nu'bʉ mi thopʉ bí 'bäh rá
mbʉdi yʉ mbädi, nɛ bi thopʉ ná
yoho 'bäh yʉ mbädi, bi zøm bʉ bí
ja ra jut'it'ɛgui bʉ ja ra 'yu ní mba
bʉ hnini. Bi xosɛ ra jut'i nɛ bi bøm
bʉya. Nɛ nu'bʉ min 'yo bʉ 'yu, bi
'ue'a rám 'bɛhni Oja, bi ts'o'a ra
Pedro bʉya. ¹¹Nu'a ra Pedro, nu'bʉ
mi bądi 'bɛ'a gätho bin ja, ngue
majuani nɛ hing ra t'i¸ bi 'yɛnsɛ:

—Dí pasegä ya gue ra Hmu mahets'i bá pehna n'da rám 'behni, ne bá jugä bu ja rá ts'edi ra ts'ut'abi Herodes, ne bi yangä nangue 'be'a nde xtá 'yørcä ma mijudíohe, bi' yense ra Pedro.

¹²Νε nu'bʉ mín 'yomfɛni ts'ʉ, bi mba bʉ ja rá ngu ra María, rá mbe ra Xuua Marcos, nε xun ngu madím peti bu, i yahu Oja nangue ra Pedro. ¹³Nε nu'bu madí jät ra jut'i bu thi ja ra mbä't'i, bi mba bu n'da ra hmute, ra 'yɛhɛ, í Rode, gue da badi to'o i 'bäpu. ¹⁴Nε nu'bu mí 'yørpa rá nde ra Pedro, bi badi to'o, nε εmmε madí johya. Pε him 'bex bi xocuabi nguetho in nde m'bɛt'o bi xi'a n'dihi yu ja'i 'bupu, gue 'bäpu ra Pedro bu ja ra goxthi. ¹⁵Nu yu ja'i bi 'yɛmbi:

-Guí häte.

Pε nu'a ra hmute guexta'a mi ma gue gue'a ra Pedro. Nε nu'ʉ bi ma:

—Gue'a rán dạhi a.

¹⁶Pε nu ra Pedro bi thoc thoho di jät ra jut'i, nε nu'bʉ mi xocpi nε bi nu gue gue'a ra Pedro, bi hyonya thoho ʉ. ¹⁷Pε nu'a ra Pedro bi uạnba rá 'yɛ, ndepe din hɛ. Nɛ bi xifi ha án zä bi gʉcpʉ ja ra fädi ra Hmu. Nɛ bi 'yɛ̞mp'ʉ yʉ ją'i:

—Dami xihmbн a man'da ra Jacobo, gue ra Santiago a, nɛ'н mi'da ун 'yɛฺс'yɛi 'bɛ'a bin ja, bi 'yɛ̞па.

Nε bi bøn'a ra Pedro bi mba n'danni.

¹⁸Nu'bu mi hyats'i, εmmε bin ja ran cui, gue'da xnin 'yänthoho yu dofui, nguetho him bi bądi 'bε'a bin ja ra Pedro. ¹⁹Nε nu ra Herodes bi manda dí honi pε him bá thịni. Nε nubuya bi 'yän'du yu mbängoxthi hague bin ja, nε bi manda ngue da tho'u buya. M'bεjua bi bøn'a ra Herodes ra häi Judea, bi mba bu ja ra hnini Cesarea, nε bám 'bupu.

Bi du a ra Herodes

²⁰Nɛ nu ra Herodes ɛmmɛ mí numan'ʉ yʉ jạ'i 'bʉpʉ ra hnini Tiro nɛpʉ Sidón. Pɛ nu yʉ jạ'i bim pɛti, pɛ m'bɛt'o bin amigohʉ ra Blasto, rám fäts'iui ra ts'ut'abi Herodes. Nɛ bi sih ra Blasto din hocpahu a ra Herodes, nguetho jatho dí nɛxpu 'bɛ'a da zi yu ją'i bu bí ja rá häi ra Herodes. ²¹ Janangue'a bi zän man'da ra pa buya, nu yu ją'i bim pɛti. Nu ra Herodes bi hye rá pahni ɛmmɛ xun ho, nɛ bi hyupu ja rá mɛxa, nɛ bin høt'ahyą. ²²Nɛ ɛmmɛ bi mbahni yu ją'i nɛ bi 'yɛn'u:

—Hing rá nde n'da ran 'yohu bu na yą nu, pεgue rá nde n'da ra oją, sä εn'u.

²³'Dahmantho n'da rám 'bɛhni Oją mahɛ̞ts'i bi japi 'bex bin zäman'ʉ ra Herodes, nguetho him bi ma ngue hinga gue'a Oją a, him bi 'yɛ̞spa Oją. 'Bex bi nɛqui yʉ zu'uɛ̞ mbo rá foho, bi du bʉya.

²⁴Pε nu rám Hman Oją bi thoqui bi hma, gätho bʉ n'danni bi 'yøh rám Hman Oją yʉ jạ'i.

²⁵Nu ra Bernabé nɛ ra Saulo, nu'bu mi guah yú 'bɛfi, gue bi sifi da hyax ra mbɛti bu Jerusalén, bá peng buya, bán 'yohu ra Xuua Marcos, bi zøpu Antioquía mahøn'a.

Nu ra Bernabé nε ra Saulo bi dump' yu 'bεfi ngue bi mamp rám hman Oją bu n'danni yu häi

Nubu ra hnini Antioquía mi 'bupu yu 'yɛc'yɛi ngue nzại dim pɛti. 'Da'u yu pøngahya, nɛ 'da'u yu xänbate. Mí 'bupu ra Bernabé, nɛ Simón t'ɛmbi Negro, nɛ ra Lucio ra mɛngu bu Cirene. Nɛ mí 'bupu ra Manaén, nu'a 'darpu bi mba ma tedeui ra Herodes rá ts'ut'abi ra häi Galilea, nɛ mí 'bupu ra Saulo.

N'da ra pa nu'bu mí 'yøt' ram pɛti u, nɛ mí ɛ't' yún ts'ihmɛ, nɛ nu'a rá Hogandahi Oja bi 'yɛmp'u:

—Dami 'ueju ya yoho yun 'yohu, ra Bernabé nε ra Saulo, nguetho xtá huanhdä u da 'yøt' ra 'bɛfi dá xifi, bi 'yɛmbi.

³Nu'bu mí 'yɛ't' yún ts'ihmɛ mahøn'a, bi 'yäp rám fäts'i Oja 'bu mí dospa rá ya ra Bernabé nɛ ra Saulo.

Bin 'yɛ̞hmbʉ bʉya:
—Oja da zix ahʉ, bi 'yɛ̞mbi.

Nu'ʉ bi 'bεhni bi mam bʉ rám Hman Oja bʉ Chipre

⁴Nubuya nu rá Hogandąhi Oją bi zix'a ra Bernabé nε ra Saulo, bi mba bu ra hnini Seleucia. Nu'bu mí nexpu, bi hyu ra barco, bi mba bu ra häi Chipre, ra t'uhäi i ja bu made ra deja. ⁵Nε nu'bu mi zøm bu ra hnini Salamina, bi mam bu rám Hman Oja bu ja yú nija yu judío. Ne ra Xuua Marcos mín 'yohu nε bim fäxpu. ⁶Nu'bu mi thopu gätho ra häi Chipre, bi zøm bu ja yú hyodi ra hnini Pafos. Ne bin timhbu n'da ra judío gue ra bądi, ęna rá pøngahya Oja pegue ra hyäte a, nu rá thuhu í Barjesús. ⁷Nu'a mín 'youi bu ja rá 'bɛfi ra Sergio Paulo, rá ts'ut'abi ra häi bu. Nu'a ra Sergio Paulo n'da ran 'yohu ɛmmɛ mí ja rán 'yomfeni xun ho. Nu'a bi zohna ra Bernabé ne ra Saulo nguetho nde da 'yøh rám Hman Oja. ⁸Pe nu ra badi Barjesús, n'dat'a ra Elimas, bi 'yu't'a ra ts'ut'abi, nguetho hingui ndepe da 'yεc'yεi a i sifi, nε bin junthu a ra Bernabé ne ra Saulo. ⁹Nu ra Saulo, n'dat'a ra Pablo a, n'youi xun ngu ra ts'edi nangue rá Hogandahi Oja a, emme bi hyet'a ran 'yohu ngue ra bądi. 10 Nε bi 'yemp'a:

HECHOS 13 246

—Nu'i gra ndøhyäte ɛmmɛ guín 'youi gätho 'bɛ'a xun ts'o. Nu'i gra ts'unt'u i ra damants'o. Nu'i gadí ucua 'u gätho xun ho. Ha njam'bu gui 'yɛ'ts'a gní xih yu ja'i hingui ho 'bu da dɛn Oja. 11 Nuya da 'yøt'a'i ran unbi ra Hmu mahɛts'i. Gan xädä gue hin da zä gui nu ran nɛqui 'da yu pa, bi 'yɛmp'a ra Pablo.

'Bex bin xädä, bi gą 'bɛxui rá dä, nɛ bi hyoni to'o da gurpa rá 'yɛ'a buya. ¹² Nu'bu mí nu'a ra ts'ut'abi 'bɛ'a bin ja, bi hyonya thoho, 'bex bi 'yɛc'yɛi buya, nguetho ya bi badi majuani a rán xädi ra Hmu mahɛts'i ngue mím man'a ra Pablo.

Ra Pablo ne ra Bernabé nubu ra hnini Antioquía, gue ra häi Pisidia

¹³Nu ra Pablo ne'ʉ mín 'yohʉ bi hyu ra barco, bi nexpu Pafos ne bi zøm bu Perge bu ja ra häi Panfilia. Pε nu ra Xuua Marcos bá ε'a, bá sotho u mín 'yohu, ne bá peng mahøn'a bu Jerusalén. ¹⁴Nu ra Pablo ne'a ra Bernabé mín 'youi, bi nexpu Perge bi mba bu man'da ra hnini Antioquía bu ra häi Pisidia. Nε nu'bu mi zøn ra pa ran säya, bi yurpu ja rá niją yu judío nε bi hyupu u. 15 Nu'bu mi gua'a man'u 'bupu, ngue rá søcua yún t'edi yu judío ne rá søcua yu pøngahya, nu'u di jamansu bu ja ra nija bi xi'a ra Pablo ne ra Bernabé:

—N'yohu aui, nu'bu ja aui ts'u n'da ran zofo, dami xije ts'u.

¹⁶Bi ndants'a ra Pablo bʉya, bim 'bäi, bi uạn rá 'yε ngue ndepe da 'yøh yʉ jạ'i, nɛ bi 'yɛ̞mbi:

—N'yohu ahu ma mi'israelhu, nε gätho ahu guín numansuhu Oją, dami 'yøhmbu ya. ¹⁷Nu'a Oją gue

dí tenhdu dyu israelhu, bi huan'du mam bombøtahu ne bi japi bin xandi xun ngu nu'bu mí 'bupu ra häi Egipto, ne mí 'bupu tengu yu n'dan'yo ją'i. Ne nu Oją buya bá juc'u nangue rá ts'edi bu mi 'bui. ¹⁸Nɛ madague'a him madí däp Oją yú mbui u 'bu min 'yo mbε nyote njεya bu ma'ueni u, pε guehma bin ja rá yembui Oja. ¹⁹Nε bi un'na ra häi Canaán u ma mi'israelhu gue di manda zehe, 'bu mí jua'a bi hyo'u yoto yu nde xmí 'bupu. Nε bin zam bu ma mi'israelhu buya. ²⁰Nu Oja buya bi japi bim 'buh yú ze'mi, ne goho ciento ne vote ma'det'a njeva madí manda ma mi'israelhu, asta gue'bu go mím 'buh ra pøngahya Samuel. ²¹ M'bejua bi ndese yu ja'i n'da ra hmuts'ut'abi di manda u. Νε bi jap Oja a ra Saúl dim hmuts'ut'abi buya. Nu ra Saúl, rá ta a ra Cis, gue rám bombøta ra Benjamín mí 'buh maya'bu. Ne nu'a ra Saúl bim hmuts'ut'abi yote njeya. ²²Nu'bʉ mi 'uec Oją ra Saúl bʉya, bi japi bim hmuts'ut'abi ra David. Nε mi man Oja, bi 'yεna: "Nuna ra David, rá ts'unt'u a ra Isaí, emme dín numanho, nguetho da 'yørca a ma pähä nɛ 'bɛ'a gätho dín nde," bi 'yɛn Oja, bi 'yɛn'a ra Pablo 'bʉ mín zo'u yú mijudíohu bu ra hnini Antioquía, ra häi Pisidia.

²³Νε bi thoqui bi man ra Pablo, bi 'yɛ̞na:

—Nε gue'a ra David rám bom'beto na ra Jesús gue bá pεncahu Oją, ma pørpatehu dyu israelhu, dyu judíohu, tengu mí man Oją maya'bu. ²⁴Ya ma guepu di dump'rá 'befi ra Jesús, nu ra Xuua mí xih ma mi'israelhu gue din xixyą to'o gätho 247 HECHOS 13

bi päh yú mbui nangue yú ts'oqui. ²⁵ Nu'bu mi ts'utho da du a ra Xuua, nu'a mí mam buya: "Nu'a gá bɛmhbu gue guecä pɛ hinga guecä. Pɛ m'bɛjua ba ɛhɛ, nɛ hin dí sucä tengu a, nguetho ɛmmɛ xun hɛts'i rá ts'edi a," mí ɛn'a ra Xuua, bi 'yɛn'a ra Pablo.

²⁶Νε bi thoqui bi man ra Pablo, bi 'yɛ̞na:

—Man 'yohu ahu, yúm bom'betoju ra Abraham, ne mi'da ahu gue ne'ahu guí numansuhu Oją, gueju bá pencahu na rám hma Oją, ne i ma hague dán zä di pøju. ²⁷Pε nu ma menguhu mí 'bupu Jerusalén, nε yú ngurpi u, him mi padi gue gue'a ra Jesús mí o't' yu pøngahyą, madague'bu i hmam bu ja ma nijąhu gätho yú pa ran säya. Janangue'a bi 'yørpa ra Jesús tengu mán t'o't'i 'bu mí yapi gue da hyo. ²⁸Nu ra Jesús nte min dupate, pε bi si'a ra Pilato gue di manda da tho. ²⁹Nɛ nu'bu mí 'yørpe 'bɛ'a gätho mán t'o't'i bu ja rám hman Oją, ne m'bejua buya bi mba ma ca'mi bu ja ra pont'i, ne bi t'ägui. 30 Pe nu Oją m'bejua ts'u bi xoxpu 'bu'u xun du. 31 Nε nu yun 'yohu mín 'yohu mam'bet'o a ra Jesús 'bu mí nexpu ra häi Galilea, nε bi mba bu ra dąhnini Jerusalén, nε guet'ʉ i xih yu ja'i u ya.

32 Nɛcä'be dí xi ahu ya nangue ra Jesús, ran ho ma'da'yo gue'a mí xi Oją u ma bøtahu 'bu mí ma gue 'bɛ'a majuani din ja. 33 Nɛ gue'a bin ja a ya. Gue bi jacuahu 'bu mí xox'a ra Jesús, gue gueju dyum bom'bɛtoju u bi xi Oja majuani. Tengu mán t'o't'i bu ja rám Hman Oja, ná yoho ra Salmo, i ɛna: "Nuya

nam pa ya, dí ɛ̞'ts'i'i, da nu'ʉ yʉ ja̞'i ya gue majuạni ma Ts'ʉnt'ʉ i," mí ɛ̞n Oją 'bʉ mi 'yɛ̞na, bi 'yɛ̞n'a ra Pablo.

34Ne xø bi 'yɛn'a ra Pablo:

—Ne bi xox Oją a ra Jesús 'bu mí du, ne hin da du mahøn'a. Ne gue'a bi man Oją, 'bu mi 'yɛna: "'Dat'a ra hoganjąpi ga 'da'i tengu dá xih majuani ra David," bi 'yɛn Oja, bi 'yɛn'a ra Pablo.

35 Ne xø bi 'yena:

—Nε gue'a bi mam bu man'da ra Salmo gue bi 'yo't'a ra David, bi xi Oja: "Hin gui jap'a ni Hoga Ts'unt'u da 'ya a rá ngợc'yei," bi 'yembi. ³⁶Pε nu ra David nu'bʉ mí jua'a rá 'befi ngue bi 'yørpa rá pähä Oją gätho mí 'bucua ja ra häi, bi du. Ne 'darpu yún 'yägui yú bøta bi t'ägui, ne bi 'ya bu rá ngợc'yei a buya. ³⁷Pe nu'a rá ngợc'yei ra Jesús, bi xox Oja a, him bi 'ya a. 38 Ma cu ahu, dín nde ahu gui pąhmbu, nangue ra Jesús i jaju ra punbi nangue ma ts'oquihu, ne gue'a dí xi ahu a ya. ³⁹Hønt'a go to'o gahu ga däp ma mbuihu a ra Jesús, din jaju ra punbi gätho ma ts'oquihu. Ne madague'a dí øthu yún t'gdi ra Moisés bi xi Oją, pε hinga gue'u dí punga ma ts'oquihu u. 40Dami 'yɛc'yɛihu ra Cristo ya, janangue'a hin gui nuhu 'be'a bi man yu pøngahya bu ja rám Hman Oja, nu'bu mí ma:

⁴¹ Damin 'yomfɛnihu ts'u a gnán thennate thohu, nguetho dí øt'ä n'da ra 'bɛfi nuixte yu pa jabuya guí 'buhmbu.
Pɛ nu'bu hin gui 'yɛc'yɛihu 'bu 'bo'o i xi ahu, gui hyonya thohohu 'bu bi mba ma un'ni ahu, nɛ gui tuhu buya.

Gue'a mí man yʉ pøngahyą 'bʉ mí 'yɛ̞n Oją, bi 'yɛ̞n'a ra Pablo.

42 Nɛ nu'bu mí bøm bu ja ra niją ra Pablo nɛ'a mín 'youi, nɛ nu'u 'da gue madim pɛti bu bi 'yäp ra mate gue da xih mahøn'a 'bu ni yoto u, tengu xí xih ya. 43 Nɛ nu'bu mí gua'a ram pɛti bu ja ra nija, xun ngu yú mijudíohu nɛ'u i ɛc'yɛi tengu yu judío, bi dɛn'na ra Pablo nɛ ra Bernabé. Nu ra Pablo nɛ ra Bernabé bi xifi ngue di thoqui da 'yɛc'yɛi ra Jesús, gue dí 'daju rá mate Oja a.

⁴⁴ Janangue'a nu'bu mí zøn'a hyąto pa buya, ngue ra pa ran säya, mbɛ gätho na ngu yu ja'i 'bupu ja ra hnini bim pɛti bu, ngue da 'yøh rám Hman Oja mahøn'a. ⁴⁵Pɛ nu'bu mi nu'u yu judío ngue ní mba bu ja yú nija gätho yu ja'i, nɛ bin sɛya u buya. Nɛ bin junthu ra Pablo nɛ mí ɛn'u him majuani a bi ma, nɛ bi c'aman'u a. ⁴⁶Nu ra Pablo nɛ ra Bernabé bi hyut'ran zambui nɛ nts'ɛdi bi ma:

—Bi zän Oją m'bεt'o thoho bi siju rám Hman Oją dyu judíohu, nε hin gá hyąmhbu. Janangue'a hin nin sähu gui hyąmhbu ra temaząi. Pε ga mbähmbe ga xihmbe yu ją'i hing yu judío ya. ⁴⁷Nguetho ra Hmu mahεts'i bi mbɛncähe nɛ mi ma:

Ya dá pɛnh'nahu gui xihmbu yu ja'i hing yu judío, din ja ran nɛqui yú mbui.

Ne gätho ra ximhäi gui mamhbu hague dán zä ga yanba yú te yu jali,

ne gue'a bi xije ra Hmu a, bi 'yɛ̞n'a ra Pablo.

⁴⁸Nɛ nu'bʉ mí 'yøh yʉ jạ'i ngue hing yʉ judío 'bɛ'a bi man ra Pablo, bin johya yʉ́ mbʉi, nɛ bi 'yɛ̞na:

—Xun ho rám Hman Oja, bi 'yɛn'u. Nε bi 'yęc'yεi to'o gätho mán thahni gue din t'un'na ra temazai. 49 Ne nu rám Hman Oja, ya gätho bu ja ra häi Pisidia bi hma. ⁵⁰ Pε nu'u 'da yu judío bi parpa u 'da yu xisu, gue'ʉ 'da mí søm bʉ ja yʉ́ nija ne mí pa nt'espi bu ja ra hnini, ne'u mi'da yun 'yohu gue yu ngurpi bu ja ra hnini. Ne nu'u bi ucpa ra Pablo nε ra Bernabé buya, nε bi xifi da bøm bu ja yú häi. 51 Janangue'a nu ra Pablo nε ra Bernabé bi huac yú gua yu fonthäi, ngue n'da ra hmepya nde da ma, da nu rán theui a bi 'yøt'ʉ. Nɛ bi mba bʉ ja ra hnini Iconio bʉya. 52 Pε nu yʉ 'yεc'yεi bu Pisidia εmmε bin johya, nε bi hya ra ts'edi xun ho nangue rá Hogandahi Oja.

Ra Pablo nε ra Bernabé nubu ra hnini Iconio

Nubu Iconio, bi yurpu ra Pablo ne ra Bernabé bu ja yú niją yu judío, ne bi mam bu a rám Hman Oja. Ne bi ma xun ho, janangue'a xun ngu yú mijudíohu bi 'yɛc'yɛi, nɛ'ʉ yʉ jạ'i gue hing yʉ judío. ²Pe nu'u 'da yu judío ngue him bi 'yec'yei emme madin 'yuthu u hing yu judío, bim parbi da zu'u yu 'yεc'yεi. ³Pε nu ra Pablo nε ra Bernabé nya'a bim 'bupu, nguetho xun ngu bi 'yɛc'yɛi bu, nɛ bi hyut' ran zambui bi ma nangue ra Hmu mahɛ̞ts'i. Nu ra Hmu bi un yɨ ts'edi u ngue da 'yøt' yu hmepya ne yun t'øt'e nuixte, guepu da bah yu ja'i, Oja in 'yohu ra Pablo ne ra Bernabé. ⁴Pɛ nu yʉ ja̞'i bʉ ja ra hnini bin heque. 'Da'u bi den yu judío hing yu 'yec'yei, ne 'da'u bi den ra Pablo

249 HECHOS 14

nɛ ra Bernabé. ⁵ Janangue'a, nu yu ngurpi bu ja ra hnini bi un ran t'ɛdi u hing yu 'yɛc'yɛi, yu judío u'da, hing yu judío u'da, gue da zu'u, nɛ di bat'ado u. ⁶Pɛ nu ra Pablo nɛ ra Bernabé, 'bu mí badi 'bɛ'a nde da 'yørpe, bi 'dagui, bi mba bu ja ra hnini Listra, nɛpu ra hnini Derbe nubu ra häi Licaonia. Nɛ bin 'yo gätho ra xɛqui bu. ⁷Nɛpu bá mam bu rán ho ma'da'yo ra Cristo bu u.

Bi mba ma bat'ado ra Pablo bu Listra

⁸Nubu ja ra hnini Listra mí 'bupu n'da ran 'yohu, ra dogua, ngue ya xín jabu 'bu mim 'bui. Nɛ mí hurpu nguetho hin jam'bu bin 'yo. ⁹Nu ran 'yohu i øde 'bɛ'a bi man ra Pablo. Nu'bu mí hyɛt a ra Pablo, mí padi 'bɛ'a mím bɛn'a zu dogua, ngue ya i ɛc'yɛi gue dí hocpa rá gua ya. ¹⁰Janangue'a nu ra Pablo nts'ɛdi bi ma:

-Ndants'i gam 'bäi.

Nu ran 'yohu buya 'bex bi zägui bin 'yo. ¹¹Nɛ nu'u yu jali, nu'bu mín nu 'bɛ'a bi 'yøt'a ra Pablo, nts'ɛdi bi mbafi, nɛ bin ya yu nde 'u licaonia, bi 'yɛna:

—Nuya yʉ oją ya, pε bi nεqui tengu'bʉ yʉn 'yohʉ, bi zøcua ja ra häi dí 'bʉhmbʉ, bi 'yɛ̞n'ʉ.

12 Nu ra Bernabé bi 'yṣmbi tengu rá thuhu yú oją zɛhɛ ra Júpiter, ximangutho a ra Pablo bi 'yṣmbi tengu rá thuhu yú oją zɛhɛ ra Mercurio. Nguetho man'da mi yạ'a ra Pablo, nɛ i ṣmbi rá pøngahyą ra Júpiter a ra Mercurio. ¹³ Nu'a ra mbäją buya, ngue mí pɛp'a yú oją Júpiter, mí ja bu n'da ra ngu bu ndehnini, guepu mí thạnde ra Júpiter yu jạ'i. Nu'a ra mbäją nɛ'u

'da yu ja'i bá si yun dani guepu
'buh ra Pablo ne ra Bernabé, ɛmbi ra
Mercurio ne ra Júpiter, gue da hyo
yun dani da mbøspe. Ne bá ca yu
døni, gätho da mbøspe. 14Pe nu'bu
mí bah ra Bernabé ne ra Pablo 'be'a
i nde da 'yøt'u yu ja'i, bi yurpu 'buh
yu ja'i, bi dun yú pahni, ndepe da
bah yu ja'i hingui numanho 'be'a
nde da 'yøt'u, ne bi 'yɛmbi:

¹⁵—N'yohu ahu hanja ngubu gní 'yøthu. Nguetho dyún 'yohu thoho'be, pε bá ε'be ua gue dín nde ga xi a'be gui 'yɛs'hu 'bɛ'a guí øthu, nguetho säti thoho 'bɛ'a guím bemhbu. Nde'bu gui 'yes'hu gní thandehu u guí ɛmfʉ yʉ oja ua ja ra häi, ne gui thandehu majuani Oja. Nguetho gue'a bi 'yøt' mahɛts'i necua ja ra häi ne ra deją ne gätho i ja ua. ¹⁶Nu'u yu pa bi thogui, Oja bi hyetho yu ja'i da 'yøzehe yú pähä zehe. ¹⁷Pe nu Oja buya zai i urcahu rá hogan 'yomfeni i ørcahu, gue bí pɛnh ra 'ye nɛ di japi din ja ma huahihu, ne di 'daju 'be'a dí sihu ne di 'daju ran johya ma mbuihu, bi 'yɛn'a ra Pablo.

19 Pɛ bi zøm bʉ 'da yʉ judío bá nɛxpʉ ra hnini Antioquía bʉ ja ra häi Pisidia, nɛpʉ Iconio, nɛ nu'ʉ bi parba yʉ jạ'i da zʉh ra Pablo nɛ ra Bernabé. Nu yʉ jạ'i bʉya bi bat'ado ra Pablo nɛ bi gʉrpʉ häi, bi hyøn'a thi bʉ ja ra hnini, nɛ ɛmbi gue ya bi du. 20 Pɛ nu'bʉ mí zøh yʉ 'yɛ̞c'yɛi bʉ 'bɛn'a ra Pablo, bi ndants' pʉya, nɛ bi mba mahøn'a bʉ ja ra hnini. Nu'bʉ mí hyax bʉya bi mbɛ ra Bernabé bʉ ja ra hnini Derbe.

²¹Nubu ja ra hnini Derbe bi mamp'a rán ho ma'da'yo ra Cristo, nε xun ngu bi 'yęc'yεi. Nε nubuya, nu ra Pablo nε ra Bernabé bá nεxpu, bi thoh mahøn'a bu ja yu hnini Listra ne Iconio nepu Antioquía bu ra häi Pisidia. ²²Guepu bi thoqui bi hạt ra ts'edi yú mbui yu 'yec'yei, nε bi xifi di thocta a dí 'yεc'yεi, nguetho gätho to'o da yurpu di manda rá ts'edi Oja, jatho da nu xun ngu yun unbi. ²³Νε nubuya nu ra Pablo nε ra Bernabé bi 'yε't' yún ts'ihme 'bu mí huan'du din ngurpi n'da ngu n'da bu ja yum peti. Ne bi 'yäp Oja ngue da mbäx'u yu ngurpi. Nε bi däp'a Oja u gätho na ngu u yu 'yɛc'yɛi gue di jamansu, nguetho bi 'yęc'yei Oją u.

Bá peng bu ra Pablo ne ra Bernabé bu Antioquía ra häi Siria

²⁴Ne nubuya ra Pablo ne ra Bernabé bi thopu ra häi Pisidia ne bi zøm bu ra hnini Perge nubu ra häi Panfilia. ²⁵Nε guepu bi mamp'a rán ho ma'da'yo ra Cristo. M'bejua buya bi mba bu ra hnini Atalia. ²⁶Guepu bi hyu ra barco bi mba bu Antioquía bu ra häi Siria, guepu ra mbudi xí un Oją yú 'befi u, ne xí t'äp rám fäts'i Oja u. Ne nuya bi juah ya. ²⁷Nu'bu mi zøm bu, bi ma dim peti yu 'yec'yei, ne bi xifi gätho bi 'yøt'e ngue bi zɛ'a Oją, nɛ bi xifi ne'u hing yu judío bi jap Oją bi 'yεc'yεi. ²⁸Nε nu ra Pablo nε ra Bernabé, nya'a bim 'buhmbu yu 'yɛc'yɛi bu buya.

Bim peti yu ngurpi bu Jerusalén

Nu't yt pa t bi zøm bt Antioquía 'da ytn 'yoht

bi nɛxpu ra häi Judea. Nɛ sä bi xi'u yu 'yɛc'yɛi hing yu judío ngue hingui sä dim pø'a n'da 'bu hinga nthɛqui yú xifani, tengu bi xänba ra Moisés u yu judío. ²Nu ra Pablo nɛ ra Bernabé nts'ɛdi bin junthu u, janangue'a bi t'ɛmbi da mba bu Jerusalén, nɛ'u mi'da yu 'yɛc'yɛi, din yahu bu yú 'bäihu ra Cristo nɛ'u mi'da yu ngurpi bu, nangue 'bɛ'a bi man'u yun 'yohu.

³ Janangue'a nu'u yu 'yɛc'yɛi bu Antioquía bin 'yɛhmbu buya, bi mbɛnpu ja ra 'yu u. Nɛ nu'bu mi hyax ra 'yu ní mba Jerusalén, bi thopu ja ra häi Fenicia nɛpu ra häi Samaria. Nɛ nubu bi thogui, bi xih yu 'yɛc'yɛi ngue bi hyɛ'u yú t'ɛc'yɛi zɛhɛ u hing yu judío, nɛ bi dɛn ra Cristo. Nɛ nu'bu mí 'yø'u yu cu nangue ra Cristo 'bɛ'a bi man ra Pablo, bin johya buya.

⁴Nu ra Pablo nε ra Bernabé nε'u mín 'yohu buya, bi zøm bu Jerusalén. Nε nu yú 'bäihu ra Cristo nε'u mi'da yu ngurpi mi 'bupu, nε gätho mi'da yu 'yεc'yεi, bin johya 'bu mín nu'u, nε bim pεtihu. Nε nu ra Pablo nε ra Bernabé bi ma gätho 'bɛ'a bi 'yøt'e, ngue bi zɛ'a Oja 'bu mí xi'u hing yu judío. ⁵Pε 'da'u yu judío, yu fariseo u ngue mí εc'yεi, bim 'bäi nε bi 'yɛna:

—Jatho da mba nthɛqui yɨ xifani yɨ 'yɛc'yɛi gue hing yɨ judío, nɛ da sifi da 'yøt' yɨn t'ɛdi ra Moisés, bi 'yɛn'ɨ.

⁶Nu'u yú 'bäihu ra Cristo buya, nɛ'u mi'da yu ngurpi, bim pɛti ngue bin 'yän'du 'bɛ'a man'da xun ho da 'yøt'e. ⁷Nɛ nu'bu nya'a thoho madín 'yomfɛni u, bim 'bä'a ra Pedro, nɛ bi 'yɛna:

—N'yohu ahu, guí pahmbu gue maya'bu ts'u bi xicä Oja n'dandi gue ga xi'u 'da yu ja'i hing yu judío ran ho ma'da'yo. Ne nangue dá mangä, bi zä bi 'yøde nε bi 'yεc'yεi. ⁸Nu Oją gue i parpa yú mbui yu ją'i, bi jaju ga pahmbu i sin'u hing yu judío, nguetho bi un rá Hogandąhi Oją u, tengu bi 'daju dyu judíohu. ⁹Nu Oja him bi 'yøt'a n'da ran heque nangueju dyu judíohu ne'u hing yu judío, pε nε'u bi japi bi bo yú mbui ngue bi 'yɛc'yɛi. 10 Nuya hanja guí çmhbu hin da zin Oją u gue him bi 'yøt' yún t'edi ra Moisés, ρε ya bi zin Oja u. Nguetho guí emhbu i jatho da 'yøt'u yun t'edi, tengu'bu gui hyøspahu n'da ra 'bɛni, gue hin dá häthu, xínga gue'u mam bombøtahu xtá hyät'i, bi 'yɛn'a ra Pedro.

¹¹Νε xø bi 'yɛna:

—Pε nuju dí εc'yεihu ngue da mba ma pøhøgähu nangue rá mate ra Hmu Jesús, ngutho'u hing yu judío, bi 'yɛ̞n'a ra Pedro.

¹²Nɛ nubʉya bi ya ra Bernabé
nɛ ra Pablo, nɛ bi xi'ʉ 'bɛ'a gätho
bi 'yøt'e nangue rá ts'ɛdi Oja, yʉ
hmɛpya nɛ yʉn t'øt'e nuixte ngue bi
'yørpʉ 'bʉh yʉ ja'i hing yʉ judío. Nɛ
gätho ná ya'ʉ njom bin ya. ¹³Nu'bʉ
mí gua'a bi ma ra Pablo nɛ ra
Bernabé, nu ra Jacobo Santiago bi
'yɛmp'ʉ madim pɛti bʉ:

—N'yohu ahu gui 'yøhmbu ya 'bɛ'a dí mangä. ¹⁴Nu ra Simón Pedro ya bi xiju ha ín ja Oją ra mbudi bi huahn'ni 'da yu ją'i hing yu judío ngue da 'yɛɛ'yɛi. ¹⁵Nɛ ngutho bi man yu pøngahyą 'bu maya'bu, 'bu mi 'yo't'i 'bɛ'a bi man Oją.

¹⁶ Bi 'yɛna:

M'bɛjua gua pengä mahøn'a, nɛ ga japi din thandegui mahøn'a tengu mi thandegui nu'bu mí 'buh ra David. Tengutho 'bu di hoc mahøn'a n'da ra nija gue xun yøt'e.

¹⁷ Nɛ gätho mi'da yʉ jạ'i da hyongui, guecä dra Hmu mahɛ̞ts'i.

Gätho to'o yʉ jạ'i hing yʉ judío ngue ma mbɛti ʉ, da hyongui.

Niabʉ bi man Oia maya'bʉ nɛ

¹⁸ Njabu bi man Oja maya'bu ne bi japi bi fahya gue'bu go maya'bu.

¹⁹Janangue'a dí xi ahʉ ya, ɛ̞n'a ra Jacobo, nde'bu hin te ga xihmbu da 'yøt'a xun hei u hing yu judío, gue nu'u xí hyese yú t'ęc'yei ne i ten'na Oją. 20 Pε ga othu n'da ra søcuą, nε ga xihmbu u da hyegui gätho yún t'øt'e yu hmite, ne hin da 'yøt' yun 'yomt'ɛni, nɛ hin da za ra ngø gue him bi bøn rá ji 'bʉ mí tho, nɛ hin da zi ra ji. ²¹ Janangue'a hin di unba yú mbui to i ten yún t'ędi ra Moisés, nguetho xun ngu yu jeya xí thogui i hmam bu ja yú nija yu judío yún t'ędi ra Moisés, gätho yu hnini i hma 'bu ra pa ran ts'äya, bi 'yɛn'a ra Jacobo.

²²Gätho yu 'yɛc'yɛi nɛ yú 'bäihu ra Cristo nɛ mi'da yu ngurpi bi numanho 'bɛ'a bi man'a ra Jacobo. Nɛ mi ɛn'u gue da thanh'ni 'da da 'bɛhni da mbähä ra Pablo nɛ ra Bernabé bu Antioquía. Nɛ bi thanh'na ra Judas t'ɛmbi Barsabás nɛ ra Silas, nɛ gue'u 'da yú ngurpi yu 'yɛc'yɛi u. ²³Nɛ nu ra søcua ngue bi gats'i bi ma:

"Nugähe, ma 'bäigähe a ra Jesucristo, nɛ mi'da gähe gue dyú ngurpigähe, nɛ gätho ni cuje

nangue ra Cristo, dí pen'nahu ra søcua, ma cu ahu, ne dadí zengua ahe. Dadín cuhu nangue ra Cristo gyu ja'ihu ngue hin gyu judíohu guí 'buhmbu bu Antioquía, nepu gätho ra häi Siria nepu ra häi Cilicia. ²⁴Nugähe dá øhmbe ngue 'da yʉn 'yohu bi nexua bi mba bu, ne bi pat'ahu ne bi xi ahu ngue jatho da mba nthequi ni xifanihu ne gui 'yøthu rán t'edi ra Moisés. Pe nu'u hin dá penhdähe u. ²⁵Nugähe dám petihe ne dá sänhde 'da yun 'yohu da mbähä ra Pablo ne ra Bernabé. ²⁶Nu ra Pablo nε ra Bernabé εmmε dí numanhohe, nguetho hingui su din 'yo bu hapu ena da tho, ngue da ma nangue ma Hmuhu ra Jesucristo. ²⁷Ne dá penhde ra Judas nε ra Silas da xi'asεhu 'bε'a dá othe. ²⁸Nguetho rá Hogandahi Oja bi xije, ne dá numanhohe, ngue hin ga 'da ahʉ mi'da yʉn t'ɛdi xʉn hɛi gui 'yøthu nangue yún t'ɛdi ra Moisés. Hønt' ya zu ts'u yun t'gdi dá ot'ahe. ²⁹Nuya dí xi ahe ya, ngue hin gui sihu 'be'a bi 'bøspa yu hmite, xínga gue ra ji gui sihu, xínga gue gui sahu ra ngø gue him bi bøn ra ji 'bu mi tho. Nε hin gui 'yøthu yun 'yomt'eni. Nu'bu gui hyehmbu gätho 'bɛ'a dí xi ahe, xun ho 'bu. Oja da mbäx ahu. Ne hønt'a dí xi ahe ya," bi 'yɛn'a ra søcua bi 'yo't'a ra Jacobo Santiago 'bu mi ja ram peti bu Jerusalén, bi gax ra Pablo.

³⁰Nɛ nubuya, bi mbähä ra Pablo, ra Bernabé, nɛ ra Judas, nɛ ra Silas bu ja ra hnini Antioquía. Nu'bu mí zøm bu, bi ma dí pɛti yu 'yɛc'yɛi nɛ bi dä ra søcua buya. ³¹Nɛ nu'bu mí nu'u 'be'a mí mam bu ja ra søcua, bin johya yú mbui nangue ran zofo

bi sifi, ngue bi hyurpa yú mbui.

32 Nu ra Judas nɛ ra Silas, nɛ'u, yu
pøngahya u. Nɛ nangue rán zofo u
bi hyurpa yú mbui yu 'yɛc'yɛi. Nɛ
bi mbäts'i da 'yɛc'yɛi xun ho.

33 Nu
ra Judas nɛ ra Silas bim 'bupu
Antioquía 'da yu pa. M'bɛjua bin
'yɛte yu 'yɛc'yɛi, bi mbɛhni da
mbeng bu 'bu'u ngue bá pɛnh'du.

34 Nɛ m'bɛjua him bi nde bi mbeng
bu ra Silas, nɛ bá copu Antioquía.

35 Nɛ ra Pablo nɛ ra Bernabé bi gopu
Antioquía. Nu'u nɛ'u gätho mi'da
yu xänbate bin xänbate bu, nɛ bi
mamp'a rám Hman ra Cristo.

Ná yondį bi mba n'danni ra Pablo, bi man rám Hman Oją

³⁶Nu'bʉ mí tho'i 'da yʉ pa, ra Pablo bi 'yɛ̞mp'a ra Bernabé:

—Ga mbɛ bu ja n'da ngu n'da yu hnini xtán 'youi xtám mammi rám Hman Oją. Ga nuui ma cuhu nangue ra Cristo 'bɛ'a di ja'u.

37 Nu ra Bernabé bi nde da zix'a ra Xuua Marcos. 38 Pɛ nu ra Pablo him mi nde da zix'a, nguetho nu'a bi 'dapu Panfilia, nɛ him bi thoc rá 'bɛfi bu. 39 Nɛ hinga 'da'angu bi bɛmmi nɛ bin heque. Nu ra Bernabé bi zix'a ra Marcos bi hyu ra barco í mba bu ra t'uhäi Chipre. 40 Nu ra Pablo bi huanh'na ra Silas ngue da mbɛ. Nɛ nu yu 'yɛc'yɛi bu Antioquía bin yahu Oja, bi 'yäp rá mate Oja nangue'u. Bi mba buya. 41 Nɛ nu'u bi thopu ra häi Siria nɛpu Cilicia, nɛ nya'a ts'u bim 'bupu hapu bi thogui, gue bi hat ra ts'ɛdi xun ho yu 'yɛc'yɛi bu.

Nu ra Timoteo bin 'yohu ra Pablo ne ra Silas

Nu ra Pablo nε ra Silas bi mba bʉ ra hnini Derbe 253 HECHOS 16

nepu Listra. Ne bin timhbu bu n'da ra 'yɛc'yɛi, ra Timoteo na. Nu rá mbe ra judío, nε ra 'yεc'yεi a, pε nu rá ta, ra mengu bu Grecia a. ²Nu yu 'yɛc'yɛi bu Listra nepu Iconio bi mamanho nangue ra Timoteo. ³Nε nu ra Pablo bi nde din 'youi a, janangue'a bi hyecpa rá xifani, gue hin di u't' yú mbui yu judío. Nguetho gätho yu judío 'bupu i padi ngue rá ta ra mengu bu Grecia a. ⁴Ne gätho yu hnini bu bi thogui bi xih yu 'yɛc'yɛi da 'yøt'e 'bɛ'a bi man ra Jacobo nε yú 'bäihu ra Cristo ne yú ngurpi yu 'yec'yei bu Jerusalén, ngue 'bɛ'a xun ho da 'yøt'u hing yu judío. ⁵Ne gätho yu 'yɛc'yɛi bi thoctatho bin te yú mbui nangue 'be'a bi 'yec'yei. Ne mpa 'bu mpa 'bu man'da i hux'a ná ngu yu 'yec'yei.

Nu ra Pablo bi 'uį tengu'bu n'da ra mɛngu Macedonia

⁶Nu'u bi thocpu ra häi Frigia nepu ra häi Galacia buya, nguetho him bi jap'a rá Hogandahi Oja xtá man ram hma bu ra häi Asia. ⁷Nu'bu mi zøm bu ra häi Misia ena xtá mba bu ra häi Bitinia, pε nu rá Hogandahi Oja xínga guepu bi japi da mba bu. ⁸Bi thorpu ja ra häi Misia buya, bi mba bu ra hnini Troas bu ndendeja. ⁹Nε nubuya nu ra Pablo bi nu n'da ran t'uti 'bu mín xui, tengu'bu ra t'i, ɛna gue'bu n'da ran 'yohu ra mengu Macedonia mí 'bäpu ja rá hmi, ne bi 'yembi: "Ba εcua ja ra häi Macedonia nε gui zεje ts'u," bi 'yɛna. 10 Nɛ nugä dra Lucas, dí o't'ä ra søcua i ja ua, dín nde ga mbähmbe bu ra Pablo. Ne nangue'a bi t'ut'a ra Pablo, janangue'a 'bex

dán sähe ga mbähmbe bu ja ra häi Macedonia, nguetho dá haxhe njuani ngue'a Oja bi zoncähe bu, in ndeje ga mamhbe bu ran ho ma'da'yo dí yanju a.

Bi zøm bu Filipos ra Pablo ne ra Silas

¹¹Nu'bu má pømhbe bu Troas dá huhe n'da ra barco nε njuantho dá uenthe bu ja ra t'uhäi Samotracia gue i jabu made ra deja. Nu'bu mi hyats'i dá thohmbe bu Neápolis. ¹²Dá nexhe bu Neápolis buya ne dá sømhbe bu ra dahnini Filipos, rán guat'i ra häi Roma. Nu ra hnini Filipos man'da ja rá ts'edi xinda gue mi'da yu hnini bu ra häi Macedonia. Nε dám 'buhmbe bu 'da yu pa. ¹³Nε nu'bu ra pa ran säya dá pømhbe bu ja ra hnini, dá mbähmbe bu ja ra ndendathe guepu zant'a min yahu Oja vu ja'i. Ne dá huhmbe bu, dá xihmbe rám Hman Oją u yu xisu ngue madím peti bu. 14 Ne nu n'da ra xisu í Lidia ra mengu bu Tiatira, bi 'yøde 'bε'a dá mamhbe. Nu'a ra Lidia ra mbä'bø't'e na, i pä ra 'bø't'e xun jupoi ngue xun ho. Nu'a i ɛc'yɛi nε mi numansu Oją, janangue'a bi xocua rá mbui da 'yøde xun ho 'bε'a bi man'a ra Pablo. ¹⁵Nu ra Lidia bin xixya buya ne gätho 'bupu rá ngu. M'bejua bi xicähe:

—Nu'bu guí εna majuani dí εc'yεi ra Hmu mahεts'i, ba εhmbu ua ja ma ngu gam 'buhmbu ua 'da yu pa, bi 'yεnje.

Ne bi 'yørcahe ts'edi janangue'a dá mbähmbe.

16 N'da ra pa nu'bu má mbähmbe bu zại bi yạhu Oją yu ją'i, dán c'athe n'da ra hmute ra 'yɛ̞hɛ. Nu'a man ra 'yøde nangue ra zithu min 'youi, nɛ mí tạha xʉn ngu ra mbɛti di un'dʉ yʉ́ hmu. ¹⁷Nu'a ra hmute mi tɛn'na ra Pablo nɛcähe. Bi mbafi bi 'yɛ̞na:

—Nuya yun 'yohu, yú mbɛfi Oją nuixte thoho, i xängahu hague dán zä dam pøhmbu, bi 'yɛ̞na.

¹⁸Ne xun ngu yu pa ngubu mi øt' ra hmute. Madí xømbui ra Pablo ne bi xi'a ra zithu min 'youi ra hmute:

—Nangue rá thuhu ra Jesucristo dami pøm bu rá mbui na ra hmute, bi 'yɛ̞mbi.

'Bexque bi bøn ra zįthu buya.

¹⁹Nu'bu mí pạh yú hmu ra hmute gue him man zä da dạp rán zäbi, bi bɛnt'a ra Pablo nɛ ra Silas, nɛ bi zixpu ja ra täi guepu 'buh yu zɛ'mi. ²⁰Nɛ nu'bu mi dä bu 'buh yu zɛ'mi, bi 'yɛ̞n'u:

—Nuya yun 'yohu 'bucua, yu judío ya. Nɛ in nde di ts'on yu ją'i 'bucua ja ma hninihu. ²¹Nɛ i man yun t'øt'e gue hingui sä ga øthu, nguetho nuju dyu romanohu. Nɛ hin'yu man t'ɛdi ga øthu a i xiju, sä bi 'yɛn'u yu yapate.

²²Nɛ bi munts' yu ja'i ngue nde da zu'u. Nu yu ze'mi buya, bi manda da 'bøcua yú pahni, da mba m'bei ra Pablo nɛ ra Silas. ²³Nɛ nu'bu mi juadi ngue ɛmmɛ xí 'bei, bi mba njot'i bu ja ra fädi. Nɛ bi sih ra mbängoxthi da mbädi xun ho. ²⁴Nu'bu min t'un ran t'ɛdi ra mbädi bi zixpu man'da mbo. Nɛ bi zɛmba yú gua bu ja ra fädiza.

²⁵Nu'bu mi zøm made ra xui buya, nu ra Pablo nε ra Silas min yahu Oja nε bin tuh yú thuhu Oja. Νε gätho mi'da yu ofädi mi øde. ²⁶Νε 'dahmantho 'bu mi mbudi bin ja n'da ra 'yanhäi, gue'bu go mi guhni yú guangu ra fädi. Gätho yu jut'i bin xozehe ne gätho yu t'egui man thạt'i yu ofädi bin xozehe. ²⁷Ne nu'bu mi nuh rá mbängoxthi ra fädi, bi nu gätho nsoqui yu goxthi, bi gux rá juai buya gue nde xtín hyose, nguetho mim beni ngue embi gätho xí 'da'u yu ofädi. ²⁸Pe nu ra Pablo nts'edi bi mba't'i, bi 'yembi:

 —O gadín unba zεhε nguetho gätho dí 'bucähe ua.

²⁹Nɛ nu'a ra mbängoxthi buya bi 'yä'a n'da ra sibi, bi yurpu mbo, nɛ ɛmmɛ di fɛt'i nguetho min su. Nɛ bi yørpu ja rá gua ra Pablo nɛ ra Silas. ³⁰Nɛ bi gucpu thi u, nɛ bi 'yänni:

—N'yohu aui 'bɛ'a sä ga øt'ä nguepu da zä dam pøcä, bi 'yɛ̞na.

³¹Nu ra Pablo ne ra Silas bi 'yembi:

—Dami däp ni mbui ra Hmu, ra Jesucristo, di pun'na ni ts'oqui, nɛ da zimanho i, nɛ'u gätho 'bupu ni ngu, 'bu di däp yú mbui a, bi 'yɛmbi.

³²Nubuya bi xih rán ho ma'da'yo ra Cristo ne gätho 'bupu rá ngu.
³³Ne nu'a ra mbängoxthi ne gätho 'bupu ja rá ngu bin xixya a ra xui a.
³⁴Nu'a ra mbängoxthi buya bi zix'a ra Pablo ne ra Silas bu ja rá ngu, ne bi 'uini. Ne'a, ne gätho 'bupu ja rá ngu emme bin johya nguetho bi 'yec'yei Oja.

35Nu'bu mí hyats'i, nu'u yu ze'mi bi mbenh'du yu asmayo da xih ra mbängoxthi da bøm bu ja ra fädi ra Pablo ne ra Silas. 36Ne nu'a ra mbängoxthi bi xi'a ra Pablo buya:

—Nu yu zɛ'mi bá pɛnh ra nde ga xoc'aui. Nuya sä gui pømmi nɛ nte gui jaui, bi 'yɛmbi.

³⁷Pε nu ra Pablo bi 'yɛ̞mbi:

—Nugä'be dí cạ'be ran t'ɛdi bi bøm bu Roma, pɛ guehma bi 'bɛnzagä'be bu 'buh yu jạ'i, nɛ him 'bɛ bi juangä'be pɛ bi goctä'be. Nuya ha ɛn'u gui jugä'be ngue njon da nu. Hin'na, hingui sä. Bá xifi ba ɛsɛ da xogä'be, bi 'yɛna.

³⁸Nu yu asmayo buya bi mba bi xih yu zε'mi 'bɛ'a bi ma ra Pablo. Nu yu zɛ'mi nu'bu mi 'yøde ngue i ca yun t'ɛdi bu Roma a ra Pablo nɛ ra Silas buya, ɛmmɛ bin su. ³⁹Nɛ nu'bu bá ɛh yu zɛ'mi buya, bi xocuabi nɛ bi 'yäp ra punbi, nɛ bi xi'u:

—'Yørcahe ra mate gui pømmi ua ja ra hnini, bi 'yɛ̞mbi.

⁴⁰Pε nu ra Pablo nε ra Silas 'bʉ mí bøm bʉ ja ra fädi, bi mba bʉ ja rá ngu ra Lidia. Nε nu'bʉ mi nu yʉ cu nangue ra Cristo, bi hạt ra ts'ɛdi yʉ́ mbʉi ʉ, nɛ bi mba bʉya.

Ran 'yo'ts'i bu Tesalónica

Nu'a ra Pablo nε ra Silas bi thopų ja ra hnini Anfípolis nερυ Apolonia nε bi zøm bų ja ra hnini Tesalónica. Guepu Tesalónica bí ja bų n'da rá niją yų judío. ²Nε nhyu semana bim 'bųpų, nε nu'bų xun dät yų pa ran säya, bi mam bų rám Hman Oją a ra Pablo. ³Nε jante thoho bi xifi xun ho nangue ram hma mán t'o't'i maya'bų, gue gue'a ra Cristo jatho da nu ran unbi nε da du, nε m'bεjua da ndants' mahøn'a bų 'bų'ų xun du.

—Nε gue'a bi nu ra Jesús a mán t'o't'i tengu dí xi ahu, janangue'a ga pąhmbu gue gue'a ra Cristo rá Thahni Oją a, bi 'yɛ̞m 'bu mi xänbi.

⁴Nε nu'ʉ 'da yʉ judío bi däp yʉ́ mbʉi ra Cristo, nɛ bi dɛn'na ra

Pablo ne ra Silas. Ne emme xun ngu yu mengu bu Grecia ngue mi numansu Oją bi 'yęc'yei. Ne xun ngu yu xisu yu mengu bu grecia gue mí hnumansu, bi 'yɛc'yɛi. ⁵Pɛ 'da yu judío ngue him mí ɛc'yɛi bin seya, ne bi zonh'nu yu ts'om'bäi bi xifi di parba yu ja'i, asta gue'bu gätho ra hnini bi parbi. Ne nu'u bi mba bu rá ngu ra Jasón, bi 'uɛxpa bu rá ngu, i hon'a ra Pablo nε ra Silas, ena da guqui gue di dä bu 'buh yu ja'i. 6Ne nu'bu him mi din ra Pablo ne ra Silas, bi zix'a ra Jasón, nts'edi bi guts'i, ne mi'da yu 'yɛc'yɛi, bi zixpu 'buh yu zɛ'mi bu ja ra hnini. Bi mbafi ne bi 'yena:

—Guehna n'dat'a mbɛmhbu u yun 'yohu gue ya bi ts'oni gätho ra ximhäi, nε bi zøcua ya. ⁷Nε nuna ra Jasón bi säyaba bu rá ngu. Nε nu'u hingui numansu rán t'ɛdi ma ts'ut'abihu bu Roma, nguetho ɛn'u i 'buh man'da ra ts'ut'abi guehna ra Jesús, bi 'yɛn'u yu ts'om'bäi.

⁸Nu yu ja'i ne yu ze'mi bin cue 'bu mí 'yøde 'be'a bi man'u. ⁹Ne nubuya nu ra Jasón ne'u mi'da bi thacua ra mbeti gue da bøm bu ja ra hnini ra Pablo ne ra Silas, ne bi mba ma thøgue buya.

Bi zøm bu Berea ra Pablo nε ra Silas

10 'Bexque guet'a ra xui a bin 'yɛhmbu yu 'yɛc'yɛi a ra Pablo nɛ ra Silas. Bi mba bu ja ra hnini Berea. Nɛ nu'bu mí zøm bu, bi mba bu ja rá niją yu judío. 11 Nu yu judío gue 'bupu, man'da xun ho yú mbui xinda gue'u 'bupu Tesalónica. Nguetho 'bexque bi xoc yú mbui, mí ja ra pähä ngue da hyạn a bi man ra Pablo. Nɛ gätho yu pa bi

HECHOS 17 256

neh yú søcua Oja maya'bu, ngue nde bu da badi 'bu din theui u i man'a ra Pablo. 12 Ne xun ngu u bi 'yɛc'yei. Ne yu xisu, yu mengu bu grecia, ngue mi hnumansu, xun ngu bi 'yęc'yei, ximangut yun 'yohu bi 'yɛc'yɛi. ¹³Nɛ nu yu judío bu Tesalónica nu'bu mi badi gue i man ran ho ma'da'yo bu Berea a ra Pablo, bi mba bu buya ngue di parba yu ja'i. ¹⁴Pe nu yu 'yec'yei 'bex bi zix'a ra Pablo bu ndendeja. Pε nu ra Silas nε ra Timoteo bi gopu Berea. ¹⁵Nu'u min 'yohu ra Pablo bi zixpu ja ra hnini Atenas buya. Nε bi mbeng bu, nε bi xi'a ra Silas nε ra Timoteo gue ra Pablo ndepe da mba bu n'dihi bu 'bui.

Bi zoh yu mengu Atenas a ra Pablo

16 Nɛ nu'bʉ min dø'mate ra Pablo bʉ Atenas, ɛmmɛ bi du rá mbʉi 'bʉ mín nu gätho ra hnini xí muns' yʉ nyogui. 17 Janangue'a nu ra Pablo bin yạhʉ yʉ judío bʉ ja ra niją, nɛ'ʉ mi'da ngue mi thạnde Oją. Nɛ gätho yʉ pa mi yạhʉ yʉ jạ'i ngue gätho mi tim bʉ ja ra täi. 18 Nɛ'ʉ 'da yʉn 'yohʉ gue i tɛnba yʉ́ t'ɛ̞c'yɛi zɛhɛ yʉ Epicúreos, nɛ mi'da i tɛnba yʉ́ t'ɛ̞c'yei zɛhɛ yʉ Estoicos, bin yạhʉ ra Pablo. Nu'ʉ 'da bi ma:

—'Bɛ'a ní mba i man na ra ndemhyą n'yohʉ.

Ne'u mi'da bi ma, bi 'yɛna:
—Masque im ma ngue 'buh mi'da
yu oja, bi 'yɛn'u.

Ngubu bi ma nguetho bi man ra Pablo nangue ra Jesús, nɛ bi ma ngue bi ndants' 'bu mi du. ¹9 Nu'u bi zix'a ra Pablo bu ja ra nyuni t'ɛmbi Areópago bu ja ra hnini guepu zại i hman yun zofo. Nɛ bi xi'a ra Pablo: —'Bɛ'a ním hma guín nde gui xije, dín nde ga pąhmbe. ²⁰Nguetho guí xije 'dan'yo yʉm hma ngue hin dí pąhmbe, nɛ dín nde ga pąhmbe 'bɛ'a nám bøn'a, bi 'yɛn'ʉ.

²¹Nguetho yu mɛngu bu Atenas nɛ'u mi'da yu 'damhnini mí 'bupu, hønt'a numanho da 'yøt'a, gue da 'yøde 'bɛ'a gue ma' da'yo, nɛ da ma.

²²Nε nu ra Pablo bi 'bä'inde bu ja ra junta guepu Areópago. Nε bi xi'u:

—N'yohu ahu gyu mɛnguhu ua Atenas, dá nugä ɛmmɛ guí thạndehu yu oją. ²³ Nu'bu mán 'yogä bu ja ni hninihu dá nugä 'bɛ'a guí thạndehu. Nɛ dá nugä n'da ra mɛxado guepu guí thạndehu man'da ra Oją, nɛ man t'o't'i bu: "Ra Oją ngue njongui pądi to'o a." Nuya ga xi ahu ya nangue ra Oją guí thạndehu pɛ hin guí pąhmbu to'o.

²⁴Nu'a Oją ngue bi 'yøt' ra ximhäi nε gätho 'bɛ'a i ja ua, nu'a gue'a ra Hmu mahɛts'i nεcua ja ra häi. Nu'a hingui 'bʉpʉ ja yʉ ngu i høh yʉ ją'i. ²⁵Nε nte di 'bɛdi, hingui jatho da hyạni 'bɛ'a da 'yørpa yʉ jạ'i nguetho gue'a di un ra te nɛ di un ran zaqui gätho to'o i 'bʉi. Nɛ gätho mi'da mahyoni di uni.

²⁶Nɛ 'dat'a ra ji bi 'yøt' Oją gätho yu ją'i ngue gätho yu nde, ndepe dim 'bui gätho na nguni ra ximhäi, nɛ bi zänba yu pa dim 'bucua ja ra häi, nɛ bi zänbi hapu dim 'bui. ²⁷Njabu bi 'yøt' Oja, ndepe gätho yu ja'i da hyon'a Oja nguepu da dini. Pɛ majuani hinga yatho i 'bu Oja 'bu ga homhbu ga pahmbu a. ²⁸Nguetho nu Oja bi jaju dám 'buhmbu, nɛ bi jaju dí 'yohu, nɛ dadí 'yamhbu. Tengu bi man'i 'da

ni 'yosøcuahu nu'bu i ɛna: "Nuju yú ją'igähu Oją nguetho bi zänni dám 'buhmbu ua," bi 'yɛn'u. 29 Nu'bu gue'a Oja di 'daju ma tehu, hanja gní 'yɛmfu Oja a ra hmite ra c'axt'i o gue ra t'axi o gue ra do nt'øt'e ngue yú 'yε yun 'yohu, nangue yún 'yomfenise. 30 Pe nu Oja him bi 'yurpa ra güenda 'be'a mim bense u yu ja'i 'bu him mi ba Oja mam'bet'o. Pε nuya Oja bi ma ngue gätho yu ja'i di päh yún 'yomfeni. 31 Nguetho xun zän Oja n'da ra pa din ja ran t'änni nangue ra ximhäi. Da 'yøt'ran t'änni xun ho n'da ran 'yohu ngue bi huanh Oja. Nuna ran 'yohu, Oja bi xox 'bu mi du, janangue'a da bah yu ja'i hingui hei da 'yøt' ran juanbi, bi 'yɛn'a ra Pablo.

³²Nε nu'bʉ mí 'yø'ਚ yਚ ją'i 'bɛ'a mí man'a ra Pablo, gue bi ndans' 'bʉ mi du, 'da'ਚ bin thennate nɛ 'da'ਚ mí ɛ̞na:

—Ga øhmbu mahøn'a nanguehna bi ndants'i.

33 Nu ra Pablo bi 'uepu buya. 34 Pɛ nu'u 'da bi dɛn'na ra Pablo nɛ bi 'yɛc'yɛi. Nuna n'da, ra Dionisio na, gue n'da ra zɛ'mi bu guepu madím pɛti yu ja'i bu Areópago. Nɛ n'da ra xisu, ra Dámaris, nɛ'u mi'da bi dɛn'na ra Pablo.

Bi zøm bu Corinto ra Pablo

M'bejua buya nu ra Pablo bi bøm bu Atenas, bi mba bu ra hnini Corinto. ²Ne bin timmi bu n'da ra judío í Aquila, ra mengu ponto. Ja ní søhø bí 'yepu Roma bu ra häi Italia ra Aquila ne rá xisu Priscila, nguetho nu ra hmuts'ut'abi Claudio bá høn'a thi gätho yu judío bu ra dahnini Roma. Nu ra Pablo

bi mba bá nu'a ra Aquila nɛ ra Priscila buya. ³Nɛ bin zam bu yú ngu, nguetho 'dat'a ra 'bɛfi i øt'e, i øt' yu ngu'bø't'e. ⁴Nɛ gätho yú pa yun säya mí pa bu rá nija yu judío a ra Pablo, nɛ bi mam bu rám Hman Oja nɛ bi hyoni 'bɛpu dí 'yɛ̞c'yɛi yu judío nɛ'u hing yu judío.

⁵Nu'bu bá εpu ra häi Macedonia ra Silas nε ra Timoteo, bi nu ra Pablo gue gätho yu pa εmmε mi mam rám Hman Oją. Mí xänba yu judío ngue gue'a ra Jesús majuani ra Cristo mí tø'bu yu judío ngue din yante a. ⁶Pε nu yu judío bi du'mi bi ucpa a, nε bi man yu ts'ore nangue ra Pablo. Nε nu ra Pablo buya bi huac rá pahni, n'da ra hmεpya gue hingui numanho 'bɛ'a i øt'u. Bi 'yɛmbi:

—Ya ni ts'oqui zεhεhu ngue hin gá hyan ra te mazai, tengu'bu gán hyosehu. Nuya hingui pa ma güɛndagä, nguetho ya dá xi ahu. Pε nuya ga mbagä ga xih yu ja'i hing yu judío, bi 'yɛn'a ra Pablo.

⁷Nɛ má zä bi bøm bu ja rá niją yu judío a ra Pablo, bi mba bu ja rá ngu ra Justo. Nu'a, n'da ran 'yohu ngue i thạnde Oją, nɛ nu rá ngu, 'darpu jaui rá niją yu judío, nɛ guepu din xänbate bu mahøn'a. ⁸Nu ra Crispo, n'da ra ngurpi bu ja rá niją yu judío, bi 'yɛc'yɛi nɛ gätho 'bupu rá ngu. Nɛ xun ngu yu mɛngu corinto mi øh ran ho ma'da'yo, nɛ bi 'yɛc'yɛi, nɛ bi mba ma xixyabi. ⁹Nu ra Hmu mahɛts'i bi zo'a ra Pablo buya, nu'bu min xui, tengu'bu bi 'ui n'da ra t'i. Nɛ bi xifi:

HECHOS 18 258

ne xun ngu i 'bucua ja ra hnini da 'yec'yeigui, bi 'yen Oja.

¹¹ Nubuya nu ra Pablo bi gopu ja ra hnini Corinto n'da jɛya made, nɛ bi xänba rám Hman Oją u yu jạ'i.

12 Pɛ nu'bʉ mín ts'ʉt'abi ra Galión nubʉ ra häi Acaya, nu 'da'ʉ yʉ judío bim pɛti ngue nde da zʉ'a ra Pablo. Nɛ bi zix'a ra Pablo bʉ 'bʉh ra ts'ʉt'abi. 13 Bi 'yɛmbi:

—Nuna ran 'yohu na bi xänba yu ją'i ngue da dande Oja, pε n'dan'yo im ma, hinga gue'a tengu man t'εdihu, εn'u.

¹⁴Nɛ nu ra Pablo in nde din yą, pɛ nu ra ts'ʉt'abi ra Galión 'bex bi 'yɛ̞mp'ʉ yʉ judío:

—Nu'bu xcuá sihu na ran 'yohu nangue n'da ran ts'o xtá 'yøt na, xcá øcä a guim mamhbu. ¹⁵Pɛ guín cuɛhu nangue rá t'ɛc'yɛi na, ngue nde da xi ahu to'o gui thạndehu, nɛ nangue nin t'ɛdi zɛhɛhu. Hin dí nde dan juạnbate nangue nin t'ɛdi zɛhɛhu, janangue'a dami hocpa zɛhɛhu, bi 'yɛn'a ra Galión.

¹⁶Bi 'yɛt'i, bi hyøn'a thi buya.
¹⁷Nubuya gätho yu mengu bu ja ra hnini gue hing yu judío bi bent'a ra Sóstenes, ra ngurpi bu ja rá niją yu judío, ne bi 'benza bu ja rá hmi ra ts'ut'abi. Pe nu ra ts'ut'abi ra Galión him bi 'yørpamasu.

Bi mbeng bu ra häi Siria a ra Pablo

18 Nu ra Pablo buya bi thoqui bim 'bupu nya'a ts'u yu pa mahøn'a bu Corinto. M'bejua bí 'yɛ'u yu 'yɛc'yɛi, bin 'yohu ra Aquila nɛ ra Priscila, nɛ bi hyu ra barco bi mba ra häi Siria. Nɛ nu'bu mí jua'a ra hmepya gue bi te rá xta, bi 'yax rá ya buya, gue'a bi 'yørpu Cencrea.

N'da ra hmɛpya nangue ram hma xí man ra Pablo gue bi xi Oją di ją'ts'i. ¹⁹ Nu'bu mi zøm bu ra hnini Éfeso ra Pablo, bi zopu ra Priscila nɛ ra Aquila nɛ bi mba bu rá niją yu judío. Nɛ bi xih yu judío bu rán ho ma'da'yo ra Cristo. ²⁰ Nu yu judío mi ndepe xtán gopu 'da yu pa, pɛ nu ra Pablo him bi nde. ²¹ Bin 'yɛ̞te nɛ bi 'yɛ̞mbi:

—Jatho ga mba bu Jerusalén ga nu bu ra dampeti da 'yøt' ma mijudíohu. Pe nu'bu rá pähä Oja gua pengä mahøn'a, bi 'yena.

Bi nɛxpu, bi hyu n'da ra barco buya.

Ná hyundi bi mba n'danni ra Pablo

²²Nubu Cesarea bi gapu ra Pablo bu ja ra barco, nɛ bi mba bu Jerusalén, bi zɛngua yu 'yɛc'yɛi bu ja ra nija, nɛ 'bex bi mba bu Antioquía. ²³Nu'bu mim 'bupu 'da yu pa, bi mba bu ja n'da ngu n'da yu hnini bu ja ra häi Galacia nɛpu Frigia, bi hat ra ts'ɛdi yu mbui yu 'yɛc'yɛi 'bupu.

Ra Apolos bi mamp rám Hman Oja bu Éfeso

²⁴Nu'ʉ yʉ pa ʉ bi zøm bʉ Éfeso n'da ra judío, rá thuhu Apolos, ra mɛngu bʉ ra hnini Alejandría. Nu'a bi bạdi xʉn ho rám Hman Oją maya'bʉ. ²⁵Nɛ bi sänbi zʉ ts'ʉ nangue ra Hmu, ra Jesucristo. Nɛ ɛmmɛ bin johya nɛ nts'ɛdi bi ma xʉn ho 'bʉ min xänbate, bi ma majuạni nangue ra Jesús. Pɛ hønt'a rám hma ra Xuua Nxixyą mí padi, nɛ rán xixyą. ²⁶Nɛ nu ra Apolos bi hyut'an zambʉi him bi zu bi mam bʉ ja rá nija yʉ judío. Pɛ nu'bʉ

mí 'yøh ra Priscila nε ra Aquila 'be'a man'a, n'danni bi zits'i ne bi xänbi man'da xun ho ngue rá 'yu Oją. ²⁷Nε nu'bʉ mí nde da mba ra Apolos ra häi Acaya, guepu Corinto, nu yu cu nangue ra Cristo bi xifi ngue xun ho da mba. Bi 'yørpa n'da ra søcuą da gąts'i, bi xih yu 'yęc'yei bu ngue da zini. Νε nu'bu mi zøm bu, bi hat ra ts'edi yú mbui yu 'yɛc'yɛi bu, nɛ bi mbäts'i gätho bi 'yɛc'yɛi rá mate ra Cristo. ²⁸Nguetho nu'bu min yahu yu judio gue hing yu 'yɛc'yɛi, bi daha, ngue ya mí ya con rá ts'edi Oja. Bi 'yuti nangue rám Hman Oja maya'bu, gue gue'a ra Jesús ra Cristo mí hmam bu, gue mí tơ'bu.

Bi zøm bu Éfeso ra Pablo

- Nu'bu mí 'bupu Corinto ra Apolos, nɛ nu ra Pablo buya i 'yo gätho yu hnini maxøts'e, nɛ bi zøm bu ra hnini Éfeso. Nɛ bin timhbu bu 'da yu 'yɛc'yɛi. ²Nu ra Pablo bi 'yän buya:
- —Ha bin 'da ahʉ rá Hogandahi Oja nu'bʉ gmí 'yɛ̞c'yɛihʉ, bi 'yɛ̞na. Nu'ʉ bi dati:
- —Hin'na, njam'bu dá øhmbe gue i 'buh rá Hogandahi Oja, bi 'yɛn'u.
 - ³Nubuya bi 'yän'na ra Pablo:
- —'Bɛ'a ním hma gá hyamhbu 'bu gmín xixyahu, bi 'yɛmp'u.

Nε bi 'yɛ̞n'ʉ bʉya:

- —Tengu thoho bi man ra Xuua Nxixya, bi yɛn'ʉ.
 - ⁴Nε nu ra Pablo bi 'yɛ̞mbi:
- —Guim bɛmhbu 'bɛ'a bi man ra Xuua, nguetho nu'a ra Xuua bi xixya yu ja'i to'o bi päh yún 'yomfɛni nangue yú ts'oqui, nɛ bi xih yu ja'i da 'yɛc'yɛi n'da ba ɛhɛ

m'bejua, gue ra Jesús ra Cristo na, bi 'yɛ̞na.

⁵Nε nu'bu mí 'yøh rám hman ra Pablo, nu'u bi mba ma xixyąbi nangue rá thuhu ra Hmu Jesús. ⁶Nε nu'bu mí dospa yú yą yu ją'i ra Pablo, bi hyạn rá Hogandahi Oja u. Nε n'dan'yo yu nde bin ya'u buya, nε bim pøngahya bi man rám Hman Oja. ⁷Nε nu'u yu ja'i gue bi 'yεc'yεi, í jua'i 'dε'mayoho u.

⁸Nu ra Pablo bim 'bupu nhyuzna bu Éfeso buya. Bi hyut'an zambui bin yą bu ja rá niją yu judío, bi xih yu ja'i hague dán zä di manda Oja bu ja vú mbui, ne bi hyoni 'bepu dí 'yec'yei yu ja'i. ⁹Pe nu'u 'da bi u't' yú mbui, hingui nde da 'yεc'yεi, nε bi man ra ts'ore nangue rá 'yu Oją, guepu madím peti yu ja'i. Janangue'a bi 'ue'a ra Pablo buya ne bi mbähä yu 'yec'yei bu ja n'da ra nguxädi, nu'a ra Tiranno ra xänbate bu. Nu'bu xum pøn yú xädi, i cut'a ra Pablo buya ne gätho yu pa mín xänbate bu. 10 Nyo jeya njabu bi 'yøt'a ra Pablo. Ne gätho yu ja'i 'bupu ja ra häi Asia, yu judío ne'u hing yu judío mí øh ran ho ma'da'yo nangue ra Hmu, ra Jesús. ¹¹Nɛ xʉn ngu yʉn t'øt'e nui̞xte bi 'yøt'a ra Pablo, ngue bi 'yøt' Oja. ¹²Nguetho bi dä'ʉ yʉ bayu o gue yʉ 'bø't'e a ra Pablo, gue'u bi mbɛnpa u yun zäman'u buya, ne gätho bi zä, nε bi bøn'u yu zįthu min 'yohu.

¹³Nubuya 'da yu judío ngue zại yu mbonni, ɛna padi da hyơn'a thi yu zịthu, nɛ sä i ndơnpa rá thuhu ra Jesús. Bi du'mi bi xih yu zịthu:

—Dami pøni nangue rá thuhu ra Jesús, gue'a ra Jesús i man ra Pablo, sä ɛn'ʉ. HECHOS 19 260

14 Nɛ nuya guehya yoto, yɨt ts'ɨnt'ɨ n'da ra judío, ra Esceva, ra hmumbäja a. Nɛ nu'ɨ yɨt ts'ɨnt'ɨ
ɛna da hyøn'a thi n'da ra zɨthu. 15 Pɛ nu ra zɨthu bi dadi:

—Nu ra Jesús dí pącä ngue ja rá ts'εdi, nε ra Pablo dí pącä ngue ja rá ts'εdi, pε nu'ehʉ, to'o ehʉ, bi 'yɛn'a ra zithu.

¹⁶Nε nuna ran 'yohu min 'youi ra zithu, bi zäspa maxøts'e guepu mi 'bä'u yoto má 'yohu, bi daha bin tunhdu ne bi unbi, gätho di dunba yú pahni. Nε bi bøm bu thi yun 'yohu, ya xí unbi gätho, nte he yú he. ¹⁷Nε nu'a bin ja, gätho bi t'øpu ja ra hnini Éfeso. Gätho yu judío nε'u hing yu judío bi 'yøde nε gätho mí ja ra mbidi. Nε gätho bi 'yεspa ra Jesús, ra Hmu buya.

¹⁸Nɛ xun ngu u gue mí ɛc'yɛi, bi zøm bu, bi nde da gomanho yú mbui, nɛ bi dä ra güɛnda a xí 'yøt'e. ¹⁹Nɛ'u 'da mím badi bá ca yú søcua, ngue yu libro yún xädi yu badi, nɛ bi hyøspu ja ra sibi, gätho da nu'u mí 'bupu. Nɛ nu'bu mi mbede hangu gätho di muui, mbɛ mí jua'a yote ma 'dɛt'a mahuahi yu mbɛti gue ra t'axi. ²⁰Nɛ man'da xun ngu bi 'yɛc'yɛi rám hman Oja yu ja'i bu Éfeso, man'da bi fadi ja rá ts'edi Oja.

²¹M'bɛjua bʉya bi bɛ̞n'a ra Pablo da mba bʉ Jerusalén, pɛ m'bɛt'o da zøm bʉ ra häi Macedonia, nɛpʉ ra häi Acaya. Nɛ bi 'yɛ̞na:

—Dam 'bucä ts'u bu Jerusalén, m'bejua ga mbagä bu ja ra dąhnini Roma, bi 'yɛna.

²²Nε bi mbɛnpʉ Macedonia ʉ yoho y̞̞̞̞̞m fäts'ihʉ, ra Timoteo nɛ ra Erasto, pɛ guesɛ ra Pablo bim 'bupu mi'da yu pa bu Éfeso gue ra häi Asia.

Ran 'yo'ts'mahyą bu Éfeso

²³Nu yu pa u, xun ngu bi ndesui nangue rá 'yu Oją bu Éfeso,
²⁴Nguetho nu'a n'da ran 'yohu í
Demetrio, rá 'bɛfi da 'yøt' yu zu
t'ungu ngue ra t'axi, ngue yú pøte
ra danija guepu i pa nthande ra oja
Diana. Nu'a, nɛ'u madím pɛhmbu,
xun ngu bi daha nangue ra 'bɛfi
i øt'u. ²⁵Nu ra Demetrio buya bi
zonh'du 'da'angu ra 'bɛfi mí øthu,
nɛ bi xifi:

—N'yohu ahu guí pahmbu nangue ma 'befihu xun ngu ra mbeti dí tahmbu. ²⁶Dí nuhu ne dí øhmbu hinga hønt'ua ra hnini Éfeso pe gätho ra häi Asia, 'bɛ'a øt' na ra Pablo, i xih yu ja'i gue nu'u yu oja nt'øt'e yú 'yɛ yun 'yohu ɛmbi ngue hing yu oją u. Ne xun ngu yu ją'i bi päh yún 'yomfeni ne bi 'yec'yei a bi man ra Pablo. 27 Nuya dán thehu n'da ra 'yanthi, ngue nu ma pøte dí øthu njon da däi. Ne dim 'beh rá ts'edi rá ngu ra oją Diana, ngue i nuixte. Ne da t'embi nte di muui. Pε nu'a ra Diana gue'a oją a, nε gätho yʉ ja̞'i 'bʉcua ja ra häi Asia nε gätho ra ximhäi i thande a, sä bi 'yɛn'a ra Demetrio.

²⁸Nɛ nu'bu mí 'yø'u, ɛmmɛ bi dɛ ra cuɛ. Nɛ nts'edi i mbafi:

—Xun ngu rá ts'edi ra Diana gue ma ojąhu dyu menguhu ua Éfeso.

²⁹Ne gätho bi yuntonto gue 'bupu ja ra hnini. Ne gätho bin tihi 'darpu ní muxpu ja n'da ra ngu xun ndoho, ne bá bent' ra Gayo ne ra Aristarco, bi zixpu, ne nu ra Gayo ne ra Aristarco, yu mengu bu Macedonia

min 'yohu ra Pablo bu 'yu. 30 Ne'a ra Pablo nde xtá mba bu 'buh yu ją'i, pe nu yu 'yęc'yei bi japi hin da mba. 31 Nɛ 'da'ʉ gue mi ja yʉ́ ts'ɛdi bu ja ra häi Asia madin amigohu ra Pablo, bi mbenpa ra nde gue hin da mba bu bí mux yu ja'i. 32 Ne 'dahma 'dan'yo bi man'u n'da ngu n'da nguetho gätho bi yuntonto. Ne xun ngu u hingui padi hanja bim peti bu. ³³Nu ra Alejandro mi 'bä'inde bu 'buh yu ja'i, bi mba njuqui bu ja yú hmi yu ja'i buya, nguetho ndep'u yú mijudíohu din yą. Nu'a ra Alejandro buya bi uanba rá 'yε ndepe din he yu ja'i, nguetho nde da xifi nte mán ts'o mí øt' yu judío. ³⁴Pε nu'bʉ mi nu yʉ ją'i ngue ra judío ra Alejandro, mbε ma nyo ora bi mbafi, ne 'da'ingu bi ma:

—Xun ngu rá ts'edi ra Diana ma ojahu dyu menguhu ua Éfeso.

³⁵Nu ra secretario bu ja ra hnini buya, bi japi ngue bin hɛ yu ja̞'i, bi xifi:

—Dyun 'yohuhu, dyu mɛ'efesohu, hingui 'bucua n'da ran yohu gue hingui padi dí jamansuhu ra oja Diana, gueju dyu mɛ'efesohu, nɛ gätho dí ɛspahu ra do bi däh mahɛts'i, gue rá pøte ra Diana.

36Nɛ nuna njo'o da zä da gøni. Janangue'a daman 'yomfɛnihu ts'u nɛ hin gui 'yøthu a hin da bømanho.

37Nu yun 'yohu ngue guá sihu ua, him bim pɛ bu ja rá nija ra oja Diana. Nɛ him bi man ra ts'ore nangue'a ma ojahu ra Diana, bi 'yɛna.

³⁸Nɛ xø bi 'yɛn'a ra secretario: —Nuna ra Demetrio nɛ'u mi'da gue dim pɛhmbu, nu'bu i ja 'bɛ'a i nde dí yapa n'da, nde'bu gue din yaui bu ja ra dangu n'dahma n'da ngu n'da da zä din yase. ³⁹Ne nu'bu ja man'da guí nde gui 'yøthu, dami xihmbu ra ze'mi da 'yøt'a n'da ra junta, guepu da mba ma hoqui. ⁴⁰Nguetho dí su da hnercahu häi 'bu da t'ängahu nangue ra mbahni dá øthu ra pa jabuya, nguetho hin'yu 'be'a sä ga mamhbu nangue'a dá øthu ya, bi 'yena.

⁴¹Nɛ nu'bʉ mi gua'a im ma, bi 'yɛt' yʉ ja'i.

Nu ra Pablo bi mba bʉ ra häi Macedonia nɛpʉ ra häi Grecia

Ne nu'bu min he nín **∠U** 'yo'ts'mahyą bʉ ra hnini Éfeso, nu ra Pablo bi zonh'du yu 'yec'yei. Ne nu'bu mí un ran zofo, bin 'yɛ̞te bʉya, bi mba bʉ Macedonia. ²Ne gätho bi zengua yu'yɛc'yɛi gätho ra häi Macedonia, bi hąt ra ts'ɛdi yʉ́ mbʉi nangue rám hman Oją bi xi'u. Ne m'bejua bi zøm bu ja ra häi Grecia mahøn'a. ³Hyuzna bim 'bʉpʉ, ɛ̞na xtá hyu ra barco, gue xtá mba bu ra häi Siria, pε nu'ʉ 'da yʉ judío ɛ̞na xtán däqui. Ne nu'bu mí bądi 'be'a nde xtá t'ørpe, bin 'yomfεni nε bá peng bu ja ra häi Macedonia. ⁴Nε min 'yohu ra Pablo ra Sópater ra mengu berea a, ne'a ra Aristarco ne ra Segundo, yu mengu tesalónica u, ne nu ra Gayo ra mengu derbe a, ne nu'a ra Timoteo nε ra Tíquico nε ra Trófimo, yu mengu asia u. 5 Nu'u bim 'bɛt'o bi mba ní tøguahe bu ra hnini Troas, ne nugä dra Lucascä, dí o't' ra søcuą jaua, dín hyunbahe u. 6Nu'bu mí guah yum peti nangue ran dąbaxjua, dá huhe ra barco dá nexhe bu ra hnini Filipos, ncut'a

HECHOS 20 262

pa dán 'yohe dá sømhbe bu Troas guepu i tøguahe u mi'da. Nɛ nyoto pa dám 'buhmbe bu.

Nu ra Pablo i 'bupu Troas

⁷Nu'a ra pa domingo dám petihe yu 'yɛc'yɛi bu ja ra hnini Troas, dá sihe ra xɛcahmɛ, gue dá bɛmhbe rán date ra Hmu. Ne nu'a ra Pablo bi man rám Hman Oja. Ne nya'athoho bin ya gue'bu go mi zøm made ra xui, nguetho da mba 'bu bi hyats'i. ⁸Ne emme xun ngu ra sibi mí zø bu ja ra cuarto magąts'i guepu bim peti yu ja'i. 9Ne huxpu ja n'da ra ventana n'da ra ts'unt'u í Eutico, nε εmmε bi ndet'aha, nguetho ra Pablo nya'a bin ya. Nu ra ts'unt'u bi dop ra t'aha, bi dägui, ná hyu toque ra ngu bu bi dägui. Ya xí du 'bu mi thạts'i. 10 Ne bi gạh ra Pablo, ní nyexpu 'ben'a ra ts'unt'u nε bi hyufi, nε bi xi'u buya:

—O di tu ni mbuihu, ya bi dambeni na.

¹¹Nu ra Pablo bi ndex mahøn'a bu ja ra cuarto buya, nε dán sihmεhe. Nε nya'a thoho bin ya ra Pablo mahøn'a, gue'bu go mi bøx ra hyadi, ja bi mba buya. ¹²Nε nu'bu mí ts'ix'a ra ts'unt'u gue bi dägui, nε i te 'bu mí zøm bu rá ngu, gätho bin johya u.

Bi mba bu Mileto ra Pablo

13 Nugähe dá hugähe ra barco nɛ dá mbähmbe bʉ ra hnini Asón nguetho nubʉ dan c'athe ra Pablo, ngubʉ bi xije mam'bɛt'o, gue xí 'yɛ̞n ra Pablo din 'yogua thoho. 14 Nɛ nu'bʉ mán ti̞mhbe bʉ Asón a ra Pablo, dá sixhe dá huhe ra barco nɛ dá sømhbe bʉ ja ra hnini Mitilene.

¹⁵Nε dá nexhe bu, ne man'da pa dá sømhbe bu ní hẹ't'a ra t'uhäi Quío gue i jabu made ra deją. Ne man'da pa buya dá sømhbe bu ra t'uhäi Samos gue i jabu made ra deją. Ne dán säyahe ts'u bu ra hnini Trogilio, ne man'da pa buya dá sømhbe bu ra hnini Mileto. ¹⁶Nguetho nu ra Pablo bi nde bi thoctho bu ra hnini Éfeso, hingui nde din säya bu ra häi Asia. Nguetho di xøni da zøn'a n'dihi bu Jerusalén, ya dí 'bupu 'bu ra pa ra dampeti t'embi Pentecostés.

Nu ra Pablo bi zonh'du yú ngurpi yu 'ygc'ygi bu Éfeso

¹⁷Nɛ nu'bu má sømhbe bu Mileto, ra Pablo bi ma dín zonh'du yu dạc'yɛi, ngue yú ngurpi yu 'yɛc'yɛi dim pɛti bu ra hnini Éfeso. ¹⁸Nɛ nu'bu mi zøpu u, bi 'yɛmp'a ra Pablo:

—Nu'ehu guí pahmbu 'be'a gätho mam 'bʉi dá øt'ä ua ra häi Asia. asta gue'bu go rá mbudi dá søcä ua. ¹⁹Gätho yu pa dám 'bucä ua dá ørpa rá 'befi ra Hmu mahets'i, ne hin dadín 'yɛts'i. Nɛ xʉn ngu ma guidä dá fäni gue'bu má hah ma mbui dá äp Oją nangue ahu. Ne xun ngu ran unbi dá nu ngue bi 'yørcä yu judío. ²⁰Pe nugä hin te dá cøn'nahu pe dá xi ahu gätho 'be'a da mbäx ahu. Ne dá xän'nahu bu dim peti yu ja'i, ne dá xän'nahu bu ja ni ngumhbu. ²¹Ne dá xifi xun ho yu judío ne'u hing yu judío, ngue di päh yún 'yomfeni nangue Oja, gue da 'yɛc'yɛi ma Hmuhu ra Jesucristo. ²²Pe nuya, rá Hogandahi Oja i ørca ra ts'edi ga mbagä bu Jerusalén, ne hin dí padi 'be'a gua thocä bu. ²³Pe hønt'a dí pącä gue dan ofädi bu

Jerusalén, ne ga nugä xun ngu yun unbi, nguetho guese rá Hogandąhi Oją bi xiqui hønbu go hapu dá thocä bu ja yu hnini. ²⁴Pe hinga guet'a dím ben'a, hin te di muui ma tesegä nanguec zehegui. Hønt'a ran johya dí nde ga nu 'bu dá juah ra 'befi bi 'dacä ma Hmuhu ra Jesús, gue'a ga mangä ran ho ma'da'yo nangue rá mate Oją.

25 Ne gätho ahu dá xi ahu rám Hman Oja gue 'bɛpu ní mandagahu Oja, ne dí pacä xínga n'da ahu gui nurcahu ma hmi mahøn'a. ²⁶Nuya nam pa ya dí xi ahu, hingui pa ma güendagä 'bu gui 'behmbu rán ho Oja ya. ²⁷Nguetho hin te dá cøn'nahu, gätho dá xi ahu 'be'a nde Oja gui pahmbu. ²⁸Nuya gui jamansu 'be'a gui 'yøthu, ne da zä bu gui jamansufu yú mbui ni mi 'yɛc'yɛihu buya. Ne gue'a ra 'bɛfi bi 'da ahu rá Hogandahi Oja, gue gui jamansufu yú 'yɛc'yɛi ra Hmu, gätho ná ngu'u i 'buhmbu ra Cristo, nguetho rá jise ra Cristo í gurpa yú ts'oqui 'bu mí du. 29 Pe nu'bu dá mbagă, dí pacă m'bejua ba e'i 'da tengu yu zate, nde da za'u yu de'yo, din jabu da 'yøt'ahu gue di un'na ni mbuihu gyu 'yec'yeihu. 30 Ne 'da'u gue guese ahu da ndants'i, nε hinga njuantho da man rám Hman Oja, gue da ndep'a dí ten'du mi'da. ³¹ Janangue'a gui jamansu ni mbuihu ngue hin da hyä ahu u. Ne guim bemhbu gue nhyu jeya, ma pa nε ra xui, dá xän'nahʉ n'da ngu n'da ahu, ne emme dán zoni nangue ahu.

³²Nuya dadí dä ahu Oją. Ne ga soc'ahu rám Hman Oją, nu'a i ma nangue rá mate Oja, gue'a ram hma di zɛt'a ni mbuihu, nɛ gue'a dín ja ahu gätho i ja Oja, tengu tho u gätho mi'da i pa nthahni. 33 Nugä hin dá nde a ni mbɛtihu, xínga gue ni pahnihu. 34 Pɛ guí pahmbu dám pɛpzɛhɛ nɛ dá undä 'bɛ'a gätho mí hon'u dán 'yogähe. 35 Dá øt'ä gue dá honsɛ man ts'ihmɛ, dá ut'ahu gue dam pɛhmbu nɛ ga fäxhu u hin 'yu 'bɛ'a da hyoni. Nɛ gam bɛmhbu 'bɛ'a bi ma ma Hmuhu ra Jesús 'bu mí 'yɛ̞na: "Man'da di johya ní mbui n'da 'bu di uni, xinda gue'bu din t'unna n'da," ngubu bi man ra Hmu, bi 'yɛ̞n'a ra Pablo.

³⁶Nɛ nu'bu mi gua'a rám hma ra Pablo, bin dạnyahmu gätho mí 'bupu, nɛ bin yahu Oja. ³⁷Nɛ nu'u gätho bin zoni, nɛ bi hyu'a ra Pablo nɛ bi zuspa rá 'yogu. ³⁸Nu'u ɛmmɛ bi du yú mbui, nguetho ra Pablo bi xi'u him man'dandi da nu mahøn'a. Nɛ nu'u bi zix'a ra Pablo bu ja ra barco buya.

Bi mba bu Jerusalén ra Pablo

Nε nu'bu mán hyεhmbe yu 'yεc' yεi, dá huhe ra barco, ne njuantho 'bex dá sømhbe bu ja ra t'uhäi Cos ngue i ja bu made ra deją. Nε man'da pa buya dá thohmbe bu ja ra hnini Pátara. ²Nubu, dá timhbe n'da ra barco ní mba bu ra häi Fenicia, dá huhe buva dá mbähmbe. ³Nε nu'bu má thohmbe nthandi thoho ra t'uhäi Chipre i ja bu made ra deją, ngąha dá mbähmbe dá sømhbe bu ra häi Siria nubu ra hnini Tiro, guepu da zoh rá 'beni ra barco. Ne dá cahmbe buya, dá mbähmbe bu ja ra hnini. ⁴Nu'bu má timhbe bu yu 'yɛc'yɛi buya, dám 'buhmbe

HECHOS 21 264

nyoto pa. Nɛ nu rá Hogandạhi Oją bi bɛnba yʉ 'yɛc'yɛi 'bɛ'a da thoh ra Pablo 'bʉ da mba bʉ Jerusalén. Janangue'a bi xifi hin da mba. ⁵Nɛ nu'bʉ mí gua'a nyoto pa, dá pømhbe bʉ. Nɛ gätho yʉ 'yɛc'yɛi , yʉn 'yohʉ nɛ yʉ xisu nɛ yʉ t'ʉhni, dá mbähmbe asta gue dá pømhbe bʉ ja ra hnini. Dán dạnyahmuhe bʉ ja ra ndendeja bʉya, nɛ dán yahe Oja. ⁶Nubʉya dán 'yɛhmbe nɛ nugähe dá huhe ra barco, pɛ nu'ʉ bi mbeng bʉ ja yʉ́ ngu.

⁷Bá nexhe bu Tiro, dá mbähmbe nε dá cąhmbe 'bu má sømhbe bu Tolemaida. Nu'bu má zenguahe yu cu, dán tehe bu n'da pa. ⁸Nu'bu mi hyats'i, gätho gahe ngue dín 'yohe ra Pablo dá thohmbe bu ra dahnini Cesarea. Ne dán säyahe bu ja rá ngu ra Felipe. Nu'a ra Felipe zai mi mam bu rán ho ma'da'yo Oja. Nu'a, n'da gue'u yoto má 'yohu nthahni mín 'yohu ra Esteban. ⁹Νε nu ra Felipe mi 'bui goho yú t'įxu him bin thạti, ne nu'u, yu pongahya u, bi man rám Hman Oją. 10 Nε nu'bu mám 'buhmbe bu 'da yu pa bi zø'a n'da rá pøngahyą Oją í Agabo, bá nexpu ra häi Judea. 11 Nu'bu mi zøm bu dí 'buhmbe a, bi gaspa a rá ngut'i ra Pablo ne bi duzehe yú gua nε yú 'yε ra Agabo, nε bi ma:

—Nu rá Hogandąhi Oją bi bɛngä ngue ngubu da 'yørpa yu judío a rá mbɛti na ra ngut'i bu Jerusalén, nɛ din dä bu 'buh yu ją'i ngue hing yu judío.

¹²Nu'bʉ má øhmbe 'bɛ'a bi man ra Agabo, gätho gahe nɛ yʉ mɛngu bʉ, dá ørpahe ra ts'ɛdi hin xtá mba ra Pablo bʉ Jerusalén. ¹³Nu ra Pablo bi 'yɛm bʉya: —'Bɛ'a guí øthu guí zomhbu. O gadí ungahu ma mbui. Nugä dadín sägä hønt'a go 'bɛ'a da t'ørcagui, o gue da thurqui o gue da thog bu Jerusalén nangue ra Jesús, ma Hmu.

¹⁴Nε him bi zä dá sąmhbe, dá hεthe bʉya nε dá εmhbe:

—Nu'a rá pähä Oją da t'øt'e.

15 Nε m'bɛjua buya dán sähe nε dá mbähmbe ra Pablo bu Jerusalén.
16 Nε 'da'u yu 'yɛ̞c'yɛi bu Cesarea dá mbähmbe. Nε nu'bu má sømhbe bu Jerusalén, nu'u bi zixcähe bu rá ngu ra Mnasón, ra mɛngu chipre. Nε maya'bu thoho mí ε̞c'yεi ra Mnasón. Guepu rá ngu dán säyahe.

Bi zengua ra Jacobo ra Pablo bu Jerusalén

¹⁷Nu'bu má sømhbe bu Jerusalén, nu yu cu nangue ra Cristo bu, bi hyu yú mbui 'bu mi nuje, nε bi zimanhoje. 18 Man'da pa buya dá mbähmbe ra Pablo dá nuhe ra Jacobo Santiago, ne'u gätho mí 'bupu, yú mingurpihu, yu dąc'yei. ¹⁹Nu ra Pablo bi zengua u ne 'bex bi du'mi 'dahmi'datho bi ma 'be'a gätho bi 'yøt' Oją nangue rá 'bɛfi ra Pablo, nubu 'buh yu ja'i ngue hing yu judío. 20 Ne nu'bu mi 'yø'u 'be'a bi man ra Pablo gue bi 'yømanho 'bu mí sih rám Hman Oja, ɛmmɛ bin johya ne bi 'yespa Oja. Pe nu'u, bi 'vembi:

—Pε guí pądi, ma zu cu'i Pablo gue yu mahuahi thoho yu judío i εc'yεi ya, nε gätho i εna jatho da 'yøt' yún t'εdi ra Moisés. ²¹Νε nu'u bi sifi 'bε'a gätho gá 'yøt'e. Νε sä εn'u gá xänbi gue gätho da hyεh yún t'εdi ra Moisés u yu judío gue 'bupu 'buh yu ja'i hing yu judío, nε

265 HECHOS 21

gá xifi ngue hin da mba nthequi yú xifani, ne hin da 'yøt' yún t'øt'e yu judío, ɛn'u. 22 Nuya 'bɛ'a sä ga øthu ya, guehma dim peti u ma mi 'yɛc'yɛihu yu judío, gue da gohmahya'a'i, nguetho da 'yøde ya gá søhø, bi 'yɛmbi. ²³Nuya nde'bu gui 'yøt'e 'bɛ'a ga xi ahe. Nuya 'bucua goho yun 'yohu ngue bi ma da 'yøt'a n'da ran hogui nangue Oja, nε jatho da 'yøt'e. Nuya gui 'yøt'e 'be'a da 'yøt'u. ²⁴Nu'i gue'e gui six buya yun 'yohu, nε gui 'yøt'e tengu jatho da 'yøt'u, ngue mí ma n'da ran hogui nangue Oja. Ne gätho gui jurpa yú gasto u, gui tämb yu de'yo ngue da mbøts'e. Nε nubuya sä gui 'yax ni yahu tengu i øt' yu ja'i nu'bu xun guah yu pa yun hogui. Νε gätho yu ja'i sä da badi ngue him majuani'be'a bi man'u 'da nangue'e. Ne da bah puya ne'e guí ten'na rán t'edi ra Moisés. ²⁵Pe nangue yu ja'i hing yu judío ngue bi 'yεc'yεi, ya dá penpahe n'da ra søcuą, ne dá xihmbe hin da zi 'bɛ'a bi 'bøspa yu hmite, xín da za'a ra ngø ngue him bi bøn rá ji, xín da zi ra ji. Ne hin da 'yøt' yun 'yomt'eni, bi 'yen'a ra Jacobo Santiago.

Bi mba mfɛnt'i ra Pablo bu danija Jerusalén

²⁶Nu ra Pablo bi zix'ʉ yʉn 'yohʉ bʉya, nɛ bi 'yøt'e tengu bi 'yøt'ʉ. Nɛ bi mbähä bʉ mbo yʉ́ dạniją yʉ judío, ngue da ma nda'a ní pa da guah yʉ́ pa ran hogui. Nɛ bi ma nda'a ní pa di un yʉ 'bøts'e.

²⁷Hin ε ní zøn'a yoto pa mi juah ran hogui, nu yʉ judío gue hing yʉ 'yṣc'yɛi, yʉ mɛngu ra häi Asia, bi nu bʉ mbo ra dạnija ra Pablo. Nu'ʉ bi parba yu ja'i ne bi bent' ra Pablo. ²⁸Bi mbafi:

—N'yohu ahu dyu israelhu, dami zeje gam benthu na ran 'yohu 'bäcua, i xänba yu ja'i hønbu go hapu i pa ngue hingui hoju, ne ena nte di muui yun t'edi ra Moisés ne nte di muui ma danijahu. Ne hinga hønt'a bi 'yøt'e, pe man'da, bá si ua mbo ra danija yu ja'i ngue hing yu judío. Janangue'a bi ts'on'a ra hoganija ngue majapi, sä en'u.

²⁹ Nguetho mi nu min 'youi ra Pablo bu ja ra hnini n'da ra mɛngu éfeso í Trófimo. Nɛ mi mansɛ ngue ɛmbi bi zixpu mbo ra dạniją.

³⁰Ne nubuya gätho ra hnini bin ja n'da ran 'yo'ts'i, ne gätho ní muxpu 'bäh ra Pablo, bi bent'i, bi gucpu thi ra danija. Ne 'bex bi gut' yú nija. 31 Ne nu'bu mí zäpi ena xtá hyo ra Pablo, nu ra hmudofui mí øde ngue gätho ra hnini Jerusalén bin 'yo'ts'i. ³²Nu'a 'bex bi zix'u yu dofui ne gätho yu hmudofui, ne bi mba n'dihi bu 'buh yu ja'i. Ne nu'bu mi nu yu ja'i gue mba bu yu dofui ne yu hmudofui, 'bex bin he ním 'benza ra Pablo. ³³Ne nu'a ra hmudofui buya bi bent' ra Pablo εna da got'i, nε bi manda ngue da mba nthat'i yoho yu cadena. M'bejua bi t'än'du, ne bi t'emp'u:

—To'o na, 'bε'a bi 'yøt'na.

³⁴Pɛ nu yu ja'i ɛmmɛ madí mbahni nɛ gätho 'dahma 'dan'yo bi ma. Janangue'a nu ra hmudofui him mi sä da badi hanja bin 'yo'ts'i. Bi manda ngue da zixpu ja ra ngundofui a buya. ³⁵Nɛ nu'bu mí zøm bu ja rá 'dede ra ngu, bi dux'u yu dofui a ra Pablo, nguetho nu yu ja'i man'da nde da bɛnt'i mahøn'a. ³⁶Nguetho xun ngu yu ja'i bi denni bi mbafi:

—Dami hyohu, ɛn'u.

Nu ra Pablo bin juan zehe bu ja yu hmi yu ja'i

³⁷Nε nu'bʉ manguepʉ da zixpʉ mbo ja rá ngu ra Pablo bi 'yän'na ra hmudofʉi:

—Dami 'yørqui ts'ʉ ra mate dan yaui ts'ʉ, bi 'yɛ̞na.

Nu ra dofui bi dądi:

- —Ha guí pa'a rá nde yu griego.
- 38—Oh, ha hinga gue'e gra mɛngu Egipto, ngue gá dʉp'a n'da ran 'yo'ts'i nɛ gá sixpʉ ma'ueni goho mahuạhi yʉn 'yohʉ ngue yʉ hyodu, bi 'yɛ̞mbi.

39 Nu ra Pablo bi dadi:

—Hin'na, hinga guecä. Nugä dra judíogä ne dra mengu Tarso, n'da ra dąhnini ngue ja rá ts'edi bu ja ra häi Cilicia. Nuya dí ä'a n'da ra mate ngue ga xicä ts'u yu ją'i.

⁴⁰Nu ra hmudofʉi bi un ran t'ɛdi. Nubʉya, nu ra Pablo bí 'bäpʉ ja ra 'dede, nɛ bi uạ'ts' rá 'yɛ ndepe din hɛ yʉ jạ'i. Nɛ nu'bʉ min hɛ, bi zofo nangue yʉ́ ndesɛ ʉ, gue yʉ́ nde ra hebreo, bi 'yɛna:

22 —N'yohu ahu, gyu ta ahu, gui 'yøhmbu 'bɛ'a ga xi ahu ya, bi 'yɛ̞n'a ra Pablo 'bu mi du'mi bin yą.

²Nε nu'bʉ mi 'yø'ʉ ngue bi ts'ofo nangue yʉ́ ndesɛ ra hebreo, man'da bin hɛ̞. Nu ra Pablo bi 'yɛ̞m bʉya:

³—Nugä dra judíogä, dám 'bucä bu Tarso, nubu ra häi Cilicia, nɛ bi mba ma tedegä ua Jerusalén. Nɛ dán xäcä rán xädi ra Gamaliel, nɛ dán xäcä xun ho yún t'ɛdi u

ma ngurpa bøtahu. Ne ɛ̞mmɛ mi ehyagä nangue rá 'befi Oja ngue gätho ma mbui, tengutho ahu ya. ⁴Nɛ madí undä ran unbi to'o gätho mi εc'yεi ra Jesús, nε 'da'u dá ho ne'u mi'da, yun 'yohu ne'u yu xisu dá sixpu fädi. ⁵Nu ra hmumbäja ne yu dąc'yci da zä din juąnni 'bc'a xtá øt'ä, nguetho dá cąnba yú søcuą bi 'dacä, gue mí ɛna xcá un yu ngurpi bu ja yú nija ma mijudíohu bu Damasco. Nε dá hax ra 'yu dá mba bu Damasco. Nu ra søcua dá jucä ngue'a ran t'edi ga cot'a fädi yu 'yec'yei, ne dí ena xcuá si ua Jerusalén, ngue xtá nu ua ran unbi.

Nu ra Pablo bi ma ha bin jabu í 'yɛ̞c'yɛi

⁶Nε nu'bu mán 'yogä bu 'yu hänbu Damasco, tengu'bu mbe huxyadi, bá ca n'da ra nyot'i mahets'i, ngue nts'edi bi hyärpu dí 'bäi. ⁷Nugä dá tạng bu häi, ne dá ø'a n'da ra nde bi xiqui: "Saulo, Saulo, hanja gní ungagui," bi 'yɛngui. ⁸Ne dá thạti: "To'o i ma Hmu." Ne nu'a bi xiqui: "Nugä dra Jesús, dra mengu nazaret, guecä gadí ungagui." 9Ne nu'u 'da min 'yogähe bi nu'a ra nyot'i, pε him bi 'yø'a ra nde ngue bi zocä. 10 Ne dá änni: "Ma Hmu 'bɛ'a sä ga øt'ä." Nɛ nu ra Hmu bi 'yɛngui: "Dami ndants'i ní mba bu Damasco, nubu, da si'a bu 'be'a gätho dá sän'ni'i gui 'yøt'e." ¹¹Nɛ nugä 'bex dán xädä nangue'a ra nyot'i, ne nu'u mín 'yogähe bi gurca ma 'yɛ, nɛ dá sømhbe bu ja ra hnini Damasco.

¹²Nɛ mi 'bʉpʉ n'da ra hocją'i í Ananías, ngue mi tɛnni xʉn ho yʉ́n t'ędi ra Moisés. Nɛ gätho yʉ judío mi 'bupu mi numanho a. ¹³Nu ra Ananías bi zøpu dám 'bucä, ne bi xiqui: "Ma cu'i Saulo, dami hyand ran nequi ni dä ya." Ne 'bex bi zø ma dä, ne bi zä dá nu a ran 'yohu buya. 14 Ne bi xiqui: "Nu'a Oja mi thande ma ngurpa bøtahu bi huahn'na'i ngue gui padi 'bɛ'a rá pähä a. Ne bi ja'a'i gá nu rá Hoga Ts'unt'u, nε bi ja'a'i ngue gá 'yørpa rá nde a. ¹⁵Nuya gui mam bʉ 'bʉh yʉ ja̞'i 'bɛ'a gá nu ne 'be'a gá 'yøde. ¹⁶Ne hin'yu 'be'a man'da gui tø'mi, dami ndants'i gan xixyą, gui 'yęc'yei majuani a ra Hmu ngue di 'uec'a'u ni ts'oqui nangue rá thuhu a ra Hmu," bi 'yɛngä ra Ananías, bi 'yɛn'a ra Pablo.

Bi man ra Pablo hanja bi mba bu 'bu'u hing yu judío

¹⁷Nε xø bi 'yɛna:

—Nε nu'bu jambá pengä ua Jerusalén, dán ya'be Oja bu mbo ra dąniją, ne nu Oją bi jacä dá nu tengu n'da ra t'į. ¹⁸Nɛ dá nugä ra Hmu, bi 'yɛngui: "'Dahmantho dami pøngua Jerusalén, nguetho hin da t'ørpamasu 'be'a gui ma nanguecä." 19 Ne dá xi'a: "Ma Hmu, nu'u ma menguhe ua gätho i pądi 'bɛ'a gätho dá øt'ä, dá mba bu gätho ma nijąhe, ne dá unba u gätho bi 'yɛc'yɛi i, nɛ dá cot'a fädi u. 20 Nɛ nu'bu mi mba ntho ra Esteban mi 'bäcä bu, nɛ 'da'angu dá bɛmhbe u bin hote, nε dá jamansup yú pahni u." ²¹Pe nu ra Hmu bi xiqui: "Ní mba, nguetho ga penh'na bu yabu guepu 'buh yu ja'i ngue hing yu judío," ngubu bi xiqui, bi 'yɛn'a ra Pablo.

Nu ra Pablo bi mba ma dä bu 'buh yu hmudofui

²²Nu'ʉ bi 'yømanho 'bɛ'a bi man'a ra Pablo, asta gue'bʉ mí ma da mba bu 'buh yu ja'i hing yu judío. Nubuya bin cuɛ'u yu judío i 'bäpu gue hing yu 'yɛ̞c'yɛi, bi mbafi nɛ bi 'yɛ̞na:

—Dá tho na ran 'yohu, man'da xun ho 'bu hin di thoqui dim 'bui, bi 'yɛn'u.

²³Man'da bi mbafi bi hua't' yé pahni ne bi 'yents' ye fonthäi. ²⁴Nu ra hmudofei bi manda da ts'ixpe mbo ra Pablo, ne bi manda da mba m'bei, ngue ndep'a dín juan'na ra Pablo hanja ná mba'e ye ja'i. ²⁵Ne nu'be i pa nthat'i ra Pablo ngue ra xifani, bi 'yän'na ra dofei ngue mi 'bäpe:

—Ha i ja nin t'ɛ dihʉ gui fɛ'a n'da ra romano nu'bʉ hin ní t'ørpa ran juanbi, bi 'yɛn'a ra Pablo.

²⁶Nε nu'bʉ mi 'yø'a ra dofʉi a bi man ra Pablo, bi mba bá xi'a rá hmu nɛ bi 'yɛmbi:

—Dami jamansu 'bɛ'a guí ørpa na ran 'yohu, n'da ra romano na.

²⁷Νε bá ε'a ra hmudofʉi bʉya, bi 'yän'na ra Pablo:

—Ha majuani gue'e gra romano. Nu ra Pablo bi dadi:

—Haha, bi 'yɛna.

²⁸Nu ra hmudofui bi 'yɛmp'a:

—Xun ngu ra mbɛti dá jut'ä ngue dán romanogä.

Nu ra Pablo bi xi'a:

—Pε nugä mbudi thoho ma ta bin t'un ran t'ɛdi gue din romano, janangue'a man'da dra romanogä.

²⁹Nɛ nu'a ra hmudofʉi bin su nguetho ya xí du't'i nɛ nu'a ra Pablo ra romano na. Janangue'a nu'ʉ nte bi 'yørpa ra Pablo, ɛna xtá mbɛi.

Nu ra Pablo mi 'bäpu ja rá junta u yú hmumbäja yu judío

³⁰Νε nu'bʉ mi hyats'i, nu ra hmudofʉi nde da badi hanja í yap'ʉ yu judío, bi xocta'a ra Pablo mán thu't'i, ne bi manda dim peti yu hmumbäją ne yú ngurpi yu judío. Ne bi zix'a ra Pablo bu dim peti.

Nu ra Pablo ɛmmɛ madín hyɛthu bu, nɛ bi xifi:

—N'yohu ahu, nugä zại dí øt'ä'a i xicpa ma mbui Oją, asta gue ra pa jabuya, bi 'yɛm 'bu mí du'mi din yą.

²Pε nu ra Ananías, ra dạmbäją, bi xi'ʉ gue 'darpʉ mi 'bähmbʉ ra Pablo, da mbɛrpa rá nde. ³Nu ra Pablo bi xi'a ra Ananías bʉya:

—Oją da mbεp'a'i nguetho yoho ni mbui. Sä guí εmhbu hin dá øt' yun t'εdi, pε go gue'ahu hin guí øthu yun t'εdi, ngue gadí manda da 'bɛrca ma nde.

⁴Nɛ nu'ʉ 'darpʉ mi 'bähmi bi 'yɛ̞mbi:

—Hanja gní thạt'a ra dạmbäją ngue bi huahn'na Oją.

⁵Ra Pablo bi dądi:

—Cu ahu, hin dí pacä ngue ra dambäja a, nu'bu xcá pacä hin xcá thatä 'bu, nguetho nt'o't'i gue hin ga c'aman'u ma ngurpihu, bi 'yɛmbi.

⁶Nε nu'a ra Pablo 'bʉ mí nu'ʉ 'da gue hupʉ ja ra junta, bi badi hinga 'da'ingu yʉ́ t'ɛ̞c'yɛi ʉ, nguetho 'da'ʉ bi dɛn'dʉ i man yʉ saduceo nɛ nu mi'da bi dɛn'dʉ i man yʉ fariseo. Janangue'a nu ra Pablo bi 'yɛ̞mp'ʉ 'bʉpʉ ja ra junta:

—N'yohu ahu, nugä dra fariseogä, nɛ xin rá ts'unt'ugä n'da ra fariseo. Nugä dí 'bäcua nɛ guí ørcahu ran juanbi nguetho dí ɛc'yɛi gue i ndants' mahøn'a u i tu, bi 'yɛn'a ra Pablo.

⁷Nε nangue'a xí man na ra Pablo bin junthu yu fariseo u yu saduceo, nε gätho bin hecpu ja ra junta. ⁸Nguetho i man'u yu saduceo gue hingui ndants' mahøn'a u i tu, nɛ i ma ngue njo'o yúm 'bɛhni Oja mahɛts'i, nɛ i ma ngue njo'o yun dahi. Pɛ nu yu fariseo gätho i ɛc'yɛi. ⁹Bin ja n'da ra mbahni, nɛ nubuya bin ndants'i 'da'u yú xänbate u yu fariseo, bi 'yɛn'u:

—Nuna ran 'yohu 'bäcua, nte mán ts'o bi 'yøt'e. Xi'bu majuani n'da ran dahi o gue n'da rám 'bεhni Oja mahɛ̞ts'i bin yaui, nde'bu hin ga suhmbu Oja, bi 'yɛ̞na.

¹⁰Pɛ nu'u 'bupu ja ra junta, ɛmmɛ bin su'u, asta gue'bu mí zu ra hmudofui da sɛn'inde ra Pablo. Bi xih yú dofui buya gue ba jucpu 'buh yu ja'i, nɛ da zix mahøn'a bu ja ra ngundofui.

¹¹Nɛ nu'bʉ min xui, ra Hmu mahɛ̞ts'i bim 'bähmi ra Pablo nɛ bi 'yɛmbi:

—O di tu ni mbui Pablo, nguetho ngutho gui ma bu ja ra dahnini Roma nanguecä, tengutho gá mangua Jerusalén.

Mi ena xtá tho ra Pablo

¹²Nu'bʉ mi hyats'i, 'da'ਚ yਚ judío 'da'ingu bi bɛn'ਚ da hyo ra Pablo, nɛ bi ma jatho di ja'ts'a bi man'ਚ. Nɛ bi 'yɛn'ਚ ngue hin din sihmɛ, xíng ra dehe da zi, asta gue'bਚ go bi hyo. ¹³Nɛ mi pongui yote má 'yohਚ ਚ 'da'angu bi ma ngue da hyo ra Pablo. ¹⁴Nu'ਚ bi mba bਚ 'bਚh yਚ hmumbäja nɛ yਚ dạc'yɛi, nɛ bi xifi:

—Nugähe dá mamhbe majuani 'bε'a ga øthe, nε hin dan sihmεhe asta gue'bu go dá hohe ra Pablo.

15 Janangue'a nu ahu nε'u mi'da guín 'yohu bu ja ra junta, nu'bu nixudi gui xihmbu ra hmudofui ba si'a ra Pablo,

gui 'yɛmbi gue gui 'yanhdu mi'da yun t'anni. Janangue'a nugahe buya, dan sahe gua tacuahe bu ja ra 'yu, ga hohe, bi 'yɛn'u.

¹⁶Pɛ nu rá 'bɛ'ue ra Pablo bi 'yøde 'bɛ'a nde da 'yørpa yʉn 'yohʉ. Bi mba bʉ ja ra ngundofʉi nɛ bi xi'a ra Pablo. ¹⁷Nu ra Pablo bi zonh'na n'da ra dofʉi bʉya, bi 'yɛmbi:

—Dami six na ra ts'unt'u bu bí 'buh ra hmudofui, nguetho i ja 'bɛ'a da xifi.

¹⁸Nu ra dofʉi bi zixpʉ 'bʉ'a rá hmu, nɛ bi xifi:

—Nu'a ra Pablo ngue i ofädi, bi zoncagui ne bi 'yäc ra mate gua siua na ra ts'ʉnt'ʉ, nguetho ja 'bɛ'a da xi'i.

¹⁹Nu ra hmudofʉi bi bɛntpa rá 'yɛ ra ts'ʉnt'ʉ, n'danni bá änni:

—'Βε'a guín nde gui xiqui.

²⁰Nu'a ra ts'ʉnt'ʉ bi xi'a ra hmudofʉi bʉya:

—Nu'u 'da yu judío bin yase'u, bi ma da 'yä'a ra mate 'bu nixudi, ngue gui sixpu mahøn'a bu ja ra junta ra Pablo, nguetho da 'yɛn'i, da 'yän mi'da yun t'änni. 2¹Pɛ 'yo guí øt'e 'bɛ'a da xi'i, nguetho i pongui yote má 'yohu yu judío ngue xun jot' ra 'yu, i täcua bu ra Pablo. Nu'u, 'da'angu xum ma ngue xín din sithe xín din sihmɛ asta gue'bu go bi hyo ra Pablo. Nɛ i tøp'a thoho 'bɛ'a go gui ma, bi t'ɛmp'a ra hmudofui.

²²Nu ra hmudofθi bi hεcua ra ts'θnt'θ ngue njon da xifi, ngue ya xí xi'a ra hmudofθi. Nε nubθya bi xifi da mba.

Nu ra Pablo bi mba m'bεhni bʉ 'bʉh ra Félix

²³Nubuya nu ra hmudofui bi zohn'du yoho yu ngurpa dofui, bi xifi din sä yociento ndofui da mba bu ra hnini Cesarea 'bu guto nxui. Ne da mbähä mi hyate ma 'det'a yu dofui ngue din tøgue, ne da mbähä mi yociento yu dofui ngue i cu yun ts'at'egui. ²⁴Ne bi manda da thøspa yu fani ngue da hyux a ra Pablo. Ne bi xifi di jamansu xun ho bu 'yu, asta gue'bu go bi dä bu 'buh ra ts'ut'abi Félix. ²⁵Ne bi 'yo't'a n'da ra søcua ra hmudofui, bi mbenpa ra ts'ut'abi Félix.

²⁶Νε bi 'yɛn'a ra søcuą:

"Nugä dra Claudio Lisias, dadí zengua'i, gra Félix, gra hoga ts'ut'abi. ²⁷ Nuna ran 'yohu na, nu'bu mi bent' yu judío, nde xtá hyo. Pε dá yamhbe nangue xun ngu yu dofui, nguetho dá øcä ngue ra romano na. 28 Nugä him mí padi hanja bi mba ma yapi, dá sixpu ja rá junta yu judío. ²⁹Pe nubuya dá øde ngue hønt'u yún t'ɛdi zɛhɛ yʉ judío ngue í mba ma yąpi, nε hin'yu 'be'a dí tho, o gue dín ofädi. 30 Ne nu'bu mi sicä 'be'a nde da 'yøt' yu judío, ngue nde da hyo, 'bex dá penh'na bu guí 'bui. Ne dá xi'u yu nyapate gue da xi'i 'bɛ'a ní mbɛspa ra hnuman'u. Ne hønt'a dá xi'a ya," bi 'yɛn'a rá søcua ra hmudofui.

31 Nu yu dofui buya bi 'yøt'e tengu bi xi'u yú hmu. Nu'u bi zix'a ra Pablo 'bu min xui, asta gue'bu mí zøm bu Antípatris. 32 Nu'bu mí hyax buya, bá peng bu yu dofui gue him madín tøgue. Pɛ nu'u gätho madín tøgue bi thoqui bi zix'a ra Pablo u. 33 Nu'bu mí zøm bu ra hnini Cesarea, bin däp ra søcua ra ts'ut'abi, nɛ bi mba ma dä bu ra Pablo. 34 Nɛ nu'bu mi nu'a ra ts'ut'abi a ra søcua, bi 'yän'na ra Pablo:

—Hapu ni häi.

Ne nu ra Pablo bi xifi gue ra mengu bu ra häi Cilicia. ³⁵Nu ra ts'ut'abi buya bi xi'a ra Pablo:

—Nugä ga øcä 'bɛ'a gui mam 'bʉ bi zø'ʉ di yąp'i'i.

Ne bi manda da mba m'bädi bu ja rá nguts'ut'abi ndudan Herodes.

Nu ra Pablo bin juạn zεhε bu 'buh ra Félix

Nɛ nu'bu mi jua'a cut'a pa, bi mba bu ra Ananías, ra hmumbäją, nɛ 'da yu dạc'yɛi, nɛ ra Tértulo ran hocpate. Nɛ bi xi'a ra ts'ut'abi 'bɛ'a í mba ma yąpi ra Pablo. ²Nu'bu mí ts'onh ra Pablo, bi du'mi bin yapate a ra Tértulo. Nu'a bi xi'a ra Félix:

—Nugähe dí pąhmbe ngue nangue'e i ja ran johya ua ra häi dí 'buhmbe. ³Ne gäthogähe man'da dí 'buhmbe xun ho nangue 'be'a guí øt'e. Ne gätho yu pa dí xi'ahe ra jamadi nangue'e. ⁴Nuya hingui ngu 'bε'a ga xi'a'i, pε gui 'yørca ra mate gui 'yøde 'bɛ'a dí xi ahe. ⁵Nuna ran 'yohu, emme ra ts'om'bäi na, ne εmmε di parba yu judío hønbu go hapu 'bui ngue gätho ra ximhäi. Ne nuna, rá ngurpi 'da'u yu ją'i t'embi yu nazareno. ⁶Nu'a mí nde xtí ts'on ra danija bu Jerusalén, pε nugähe dá benthe, ne dí embe xcá juanbahe tengu im mam bu ja man t'edihe. ⁷Pε nu ra hmudofʉi, ra Lisias a, con rá ts'edi bá jucpu mi 'buhmbe. 8Ne bi xije dan yafe ua. Nuya, nu'bu gui 'yän zehe a, gui pądi gue majuąni 'bε'a gätho ní mba ma yąpi, bi 'yɛmp'a ra ts'ut'abi a ra Tértulo.

⁹Nε nu'ʉ yʉ judío min 'yohʉ, 'da'angu bi man'ʉ. ¹⁰Nε nu ra ts'ʉt'abi bi un ran t'ɛ̞di ra Pablo gue din ya̞ bʉya. Nu ra Pablo bi ma, bi 'yɛ̞na:

—Nugä i hu ma mbui ngue sä dan juandä ua, nguetho guí padi 'be'a nám 'buhmbe dyu judíohe, gue xun ngu yu jeya guín ts'ut'abi ua. ¹¹Nu'bu guí nde gui pądi, sä gui pądi, ja mán 'dɛ'mayo ma pa ya gue dá mba bu Jerusalén, dá thande Oja bu. ¹²Nε nu'u ma mijudíohe him bi nu 'bu 'bo'o xcán junthe, xím bi nu 'bu 'bo'o xcá parbi, xínga guepu ja ma dąnijąhe, xínga guepu ja ma t'unijahe, xínga guepu gätho ra hnini. ¹³Nuya hingui sä din juanni xun ho nguetho him majuani 'bε'a ní yącpä ya. ¹⁴Pε nuya dadín juandä gue dí tendä ra 'yu ma'da'yo, nε gue'a εmbi him majuani u. Pε guet'a ra 'yu mí ten'du ma ngurpa bøtahe, gue mí numansu Oja nguetho dí ɛc'yɛi 'bɛ'a gätho mán t'o't'i bu ja rá søcua yún t'edi ra Moisés ne yú søcuą yu pøngahyą. ¹⁵Ne nugä dí tø'mi 'be'a nín ho da 'yøt' Oja, tengu i tømp' ya i 'bäcua. Nugähe dí ec'yeihe ngue gätho xun du da ndants'i, ne'u bi 'yøt' ran ho, ne'u bi 'yøt' ran ts'o. 16 Janangue'a gätho dí øt'ä 'bɛ'a di bɛngä Oja n'dahma hin hapu da thinga ma ts'oqui, xínga guepu 'bu Oja xínga guepu 'buh yu ja'i, bi 'yɛna.

¹⁷Νε xø bi 'yɛna:

—Nε nu'bu mi thogui xun ngu yu jɛya, bá pengä bu Jerusalén ngue ga un yun t'unni ma mɛnguhe, nɛ ga un yun t'unni bu ja ma dạnijahe.

18 Nε ngubu dá øt'ä bu danija, dá thande Oja. 'Da'u yu judío, yu mɛngu bu ra häi Asia dán timhbe bu buya. Nɛ njom mí 'bupu xun ngu

yu ją'i, xíng ra sui mi ja bu. ¹⁹Nu'u gue dán tingähe bu, nde'bu gue'u xtambá 'yɛcua u, xtá mangua 'bu ja 'bɛ'a dá øt'ä bu. ²⁰O gue guehya yun 'yohu 'bäcua da ma 'bu ja 'bɛ'a bi nurcä 'bu má mbagä bu ja ra junta. ²¹Hønt'a nts'ɛdi dá mangä bu, nɛ dá ɛmbä u: "Nu ahu guí ørcä ran ts'ɛmbi nam pa ya nguetho dí ɛc'yɛi ngue i ndants'u i tu," dá ɛngä, bi 'yɛn'a ra Pablo.

²²Nɛ nu'bʉ mi 'yø'a ra Félix 'bɛ'a bi man ra Pablo, 'bex bi ma da guah ra junta, nguetho xʉn ngu ts'ʉ mi pạ'a ra Félix nangue rá 'yu Oją. Nɛ bi xi'ʉ:

—Nu'bu dambá ¿cua ra hmudofui, ra Lisias, sä ga pącä 'bɛ'a gätho bin ja.

²³Nɛ nu'a ra Félix bi manda da thoqui da mba m'bädi ra Pablo. Nɛ bi manda ngue da t'ørpa ran ho nangue'a, nɛ nu'u yu amigo sä da mba bu nɛ di unni 'bɛ'a gätho da hyoni.

²⁴Nu'bʉ mí tho'i ts'ʉ 'da yʉ pa, nu ra Félix bá peng bʉ ja ra hnini Cesarea, bán 'youi rá xisu í Drusila, nu'a ra judío a. Nɛ bi zon'na ra Pablo, ndepe da ma hague dán zä n'da da 'yɛ̞c'yɛi ra Jesucristo. ²⁵Nɛ nu'bʉ mi man ra Pablo nangue ram 'bʉi njuạntho, nɛ bi ma ngue di jamansu 'bɛ'a da 'yøt'a n'da, nɛ bi ma din ja ran t'änni 'bʉ ran zɛgui nangue yʉ ts'oqui, nu ra Félix bin su bʉya, nɛ bi xifi:

—Hønt'a gá xic ya, 'bɛ ním 'bähma bʉ ja ra fädi mahøn'a, nɛ nu'bʉ da bongui ga zon'na'i mahøn'a, bi t'ɛmp'a ra Pablo.

²⁶Nu ra Félix mí ɛna xtán gu't'i ts'ʉ, n'dahma xtí thø'a ra Pablo.

Janangue'a njant'a thoho min zohni ne min yaui. ²⁷Ne nu'bu mi gua'a nyojeya bi mba ma poni a ra Félix, ne bi hyu'a ra Porcio Festo. Nu ra Félix 'bu mí bøm buya, bi zopu ra Pablo bu ja ra fädi, nguetho mí su da numan'u yu judío 'bu xtí hocpi.

Nu ra Pablo din juan bu 'buh ra Festo

Nu ra Festo bi mba bu ra häi guepu din ts'ut'abi, ne hyupa bim 'bupu ra hnini Cesarea, bi mba bu ra hnini Jerusalén buya. ²Nubu Jerusalén, yu hmumbäja ne yú ngurpi yu judío bi xi'a ra Festo, bi nyapi nangue ra Pablo. ³Nɛ bi 'yørpa ts'ɛdi bi 'yäp ra mate ngue da zohna ra Pablo ngue da zøm bu Jerusalén, nguetho im bɛn'u da gorpa bu 'yu, gue nde da hyo. ⁴Pɛ nu ra Festo bi xifi ngue ofädi bu Cesarea ra Pablo, nɛ "mi ts'utho ga mbagä ya," bi 'yɛmbi.

⁵Nε bi xifi:

—Nde'bu ga mbähä 'da ahu gue ja ni ts'ɛdihu, nɛ nu'bu ja mán ts'o bi 'yøt'a, sä gui yafu.

⁶Nu ra Festo, masque mbε man 'dɛt'a pa bim 'bʉpʉ Jerusalén, bi mba bʉ Cesarea bʉya. Nu'bʉ mí hyax bʉya, bi mba bʉ ja rán juanbate, nɛ bi manda ba ts'i ra Pablo. ⁷Nɛ nu'bʉ mi zøm bʉ ra Pablo, nu yʉ judío ngue bá nɛxpʉ Jerusalén bi mbä'ts'i. Nɛ ɛ̞mmɛ xʉn ngu 'bɛ'a xʉn ts'o í ya̞pi. Pɛ hingui sä da bøm majuani 'bɛ'a bi man'ʉ. ⁸Nu ra Pablo bi ma nanguesɛ bʉya:

—Nte dá øt'ä ngue hingui ho nangue man t'ɛdihe dyu judíohe, xínga gue'a ra danija, xínga gue'a rán t'ɛdi ra hmuts'ut'abi bu Roma, bi 'yɛn'a ra Pablo. ⁹Nu ra Festo nde da 'yøt'a dí numanho u yu judío, janangue'a bi 'yän'na ra Pablo:

—Ha guí nde gui mba bu Jerusalén, guepu ba øt'a ran juạnbi bu, nangue 'bɛ'a í yąp'a yu judío.

¹⁰Nu ra Pablo bi dadi:

—Hin'na, guecua rán säui da t'ørcä ran juanbi ua, nguetho bi 'da'a ran t'gdi ra hmuts'ut'abi 'bupu Roma gue gui 'yørcä ran juanbi ua. Nɛ nte mán ts'o xtá ørpa yu judío, gue gui sixcä bu. Nu'i guí padi xun ho ngue te dá øt'ä. 11 Pɛ nu'bu xtá øt'ä n'da ran ts'o gue i man nin t'gdi gui hyogui, jatho ga tu 'bu, hin ga 'dagui nangue man date. Pɛ nu'bu him majuani 'bɛ'a ní yacpä u, njo'o n'da i ja rán t'gdi di dägä bu ja yú 'yɛ u. Nugä dí ä'a ran t'gdi gui thocä bu 'buh ra hmuts'ut'abi bu Roma, bi 'yɛn'a ra Pablo.

¹²Nu'bʉ min yahʉ yʉ́m fäts'ihʉ a ra Festo, bi xi'a ra Pablo:

—Nu'bu guí ɛna ga dä ahe bu Roma, da zä 'bu, bi 'yɛmbi.

Nu ra Festo i yaui ra ts'ut'abi Agripa

13 Nu'bu mi tho'i 'da yu pa, n'da rá ts'ut'abi yu judío, ra Agripa na, nɛ'a rán ju, Berenice, bi zøm bu Cesarea di zɛngua a ra ts'ut'abi Festo. 14 Nɛ nu'bu mi 'bupu 'da yu pa, nu ra Festo bi xi'a ra Agripa nangue ra Pablo, bi 'yɛmbi:

—O bu n'da ran 'yohu, i ofädi, ngue bi zocua ra Félix, í Pablo a. ¹⁵Nε nu'bu má mbagä bu Jerusalén, nu yu hmumbäją nε yu dąc'yεi ngue yu judío bi xicä nangue ra Pablo. Nu'u mi äp ran unbi nangue'a. ¹⁶Nε nugä dá xi'u: "Pε nugähe dyu romanogähe hingui sä ga hohe n'da

'bu hinda nadí juanbähe u, ne dim 'bäpu ja yú hmi to'o di yapi, din yase." Ngubu dá xifi. ¹⁷Ne nu'bu mi zocua yun yapate, nu'bu mi hyats'i, 'bex dá mba bu ja man juanbate ne dá manda da ts'ixpu a ra Pablo. ¹⁸Nu'bu mí 'bähmbe bu u yun yapate, pe xínga n'dare bi ma gue yu ts'oqui tengu mím bengä ngue xtá ma. ¹⁹Pe hønt'a n'da ram hma madín junthu nangue 'be'a mi ec'yei zehe u yu judío. Ne nangue n'da ran 'yohu í Jesús nín junt'u, ngue bi du, pe nu ra Pablo nts'edi bi ma ngue i 'bui, bi 'yena.

²⁰Nu ra Festo bi thoqui bi ma:

—Nε nugä hin dí pącä ga øt'ä ran juąnbi nangue 'bɛ'a εc'yεi yʉ judío. Janangue'a dá än'na ra Pablo 'bʉ nde da mba bʉ Jerusalén, da mba ma juạnbi bʉ. ²¹Pε nu ra Pablo bi 'yäc ran t'ɛdi, nde ga dä bʉ 'bʉh ra hmuts'ʉt'abi Augusto bʉ Roma. Dá manda bʉya da 'bädi asta gue'bʉ bi zä ga pɛhndä bʉ 'bʉh ra hmuts'ʉt'abi, ɛn'a ra Festo.

²²Nu ra ts'ʉt'abi Agripa bʉya, bi xi'a ra Festo:

—Nugä dín nde ga øde 'bε'a da man'a ran 'yohʉ.

Bi dą'a ra Festo buya:

—Nixudi da zä gui 'yøde.

rá ngu ran juạnbate ra Agripa nε ra Berenice. Nε bi mba bu mbo gätho ja yú ts'ɛdi, min 'yohu yu hmudofui nε yu ngurpi bu ja ra hnini Cesarea. Nε bi ts'ini xun ho nguetho i ja yúts'ɛdi. Nε nu'a ra Festo bi manda da ts'ixpu ra Pablo. ²⁴Nε nubuya bi 'yɛn'a ra Festo:

—Nu'i gra ts'ʉt'abi Agripa, nε ahʉ gyʉn 'yohʉhʉ gätho guí 'bʉhmbʉ

ua ya, guí nuhu na ran 'yohu. Ne gätho yu judío 'bupu Jerusalén ne'u 'bucua Cesarea madín yapi nanguehna. Nu'u njam'bu mi ε't'a mi xiqui ngue mi ädi da mba ntho. ²⁵Pε nu'bu má pacä ngue nte bi 'yøt'a rán säui dí tho, dá ɛngä ga penpu 'buh ra hmuts'ut'abi bu Roma, nguetho mí manse da mba ma dä bu. 26 Pe hin'yu 'be'a sä ga o't'ä a xu 'yøt'e ngue ga penpa ma hmu. Janangue'a dá zonhdä na ran 'yohu, gui 'yøhmbu ts'u 'be'a da man ya, ma ts'ut'abi Agripa i. Nε nu'bu gá 'yøhmbu, masque da zä gui xiju buya 'bɛ'a da zä ga o't'ä nangue ran yapi. ²⁷Nguetho dí ɛna hingui ho ga penpu n'da ra ofädi, ne nte má søcuą da jąts'i ngue da mam bu hanja i ofädi, bi 'yɛn'a ra Festo buya.

Nu ra Pablo bin juạn zehe bu 'buh ra ts'ut'abi Agripa

Nu'a ra Agripa bi xi'a ra Pablo:

—Da zä gui mansε nangue'a zεhε, bi 'yɛ̞mbi.

Nu ra Pablo bi uạn rá 'yε nε bi ma nanguesε. Bi 'yɛ̞na:

²—I jagä ran johya, nguetho sä dam 'bäcä ua ja ni hmi, gra ts'ut'abi Agripa, nɛ sä gam mangä nangue 'bɛ'a í yacpä ma mijudíohe. ³Nguetho guí padi xun ho 'bɛ'a gätho yun t'øt'e yu judío, nɛ guí padi 'dahma 'dan'yo ma t'ɛc'yɛihe dyu judíohe. Janangue'a dí ä'a ra mate, gui 'yø'i ts'u xun ho 'bɛ'a gam mangä.

Rám 'bui ra Pablo 'bu hin ní 'yęc'yei

⁴Nu'ʉ gätho ma mijudíohe i pądi 'bɛ'a ním 'bʉi dá øt'ä bʉ 'bʉh ma

menguhe, 'bu mán t'uhnigä ne'bu mám 'bucä bu Jerusalén, asta guehya. ⁵Nu'u hin'yu ra pähä da ma, pε maya'bu mi padi ngue nya'a thoho dá tenni xun ho tengu man yu fariseo. Nu yu fariseo man'da εhya da 'yøt' man t'εdihe dyu judíohe xinda gue'u mi'da. ⁶Nuya dí 'bäcua ja ran juanbate, nangue'a 'be'a dí ec'yei. Nugä dí ec'yei 'be'a bi xi'a Oja ma ngurpa bombøtahe, ngue da xox'u xun du. ⁷Nugähe yúm bom'beto u 'de'mayoho yú ts'unt'u ma ngurpa bombøtahe ra Jacob, dí shyahe ma pa ne ra xui nangue rá 'bɛfi Oja. Nɛ nugähe dí tømhbe 'bɛ'a bi man Oja, gue da xox'u xun du. Nugä dí ɛc'yɛi gue majuani bi du'mi bi 'yøt'a, ne gue'a ní yącpä ya ma mijudíohe, ma ts'ut'abi Agripa i. ⁸Hanja gní bemhbu ngue hingui sä Oja da xox'u xun du, bi 'yɛn'a ra Pablo.

Bi man ra Pablo madí unba yu 'yęc'yei

⁹Nε xø bi 'yɛm mahøn'a:

—Guec zεhεgä, nya'a thoho dá bɛngä ngue mi ɛngä xun ho 'bu ga sucä ra Jesús, ra mɛngu Nazaret.

10 Nubu Jerusalén xun ngu yu 'yɛc'yɛi dá cot'a fädi, nguetho bi 'dacä ran t'ɛdi yu hmumbäja. Nɛ nu'bu mi t'ɛna da mba ntho, 'da'angu dá bɛmhbe.

11 Nɛ xun ngu yu nidɨ dá unba u yu 'yɛc'yɛi bu ja ma nijahe dyu judíohe. Nɛ dá säpi dá sɛrpa yú t'ɛc'yɛi. Nɛ nugä ɛmmɛ min cuɛgä nangue'u, nɛpu ja yu hnini yatho dá mbagä, dá un ran unbi u, bi 'yɛna.

Bi mam mahøn'a ha bin jabu bi 'yɛ̞c'yɛi

12 Ne xø bi 'yem mahøn'a:

HECHOS 26 274

—Nε dá caxä ra søcua, ngue rán t'ɛdi yʉ hmumbäja, ngue ga unba yu 'yec'yei. Dá hạ ra 'yu ná mba bu ra hnini Damasco. ¹³Nu'i ma ts'ʉt'abi Agripa i, nu'bʉ mbε huxyadi dá nu bu 'yu n'da ra nyot'i bí 'veh mahets'i, ne man'da madí hyät'i xínda gue ra hyadi. Ne nu'a bi hyärpu dí 'bähmbe. ¹⁴Nɛ nu'bu gätho má tạnje bu häi, dá øcä n'da ra nde ngue ma ndesε í ts'oqui, ra hebreo, i ena: "Saulo, Saulo, hanja gní ungui. Xun hei guí øt'e, tengu n'da ra mbundani i pa ma suni ra t'o hndepe dim pefi xun ho, ne i nete thoho," bi 'yengui. 15 Ne nugä dá änni: "To'o i, ma Hmu." Nu ra Hmu bi dadi: "Nugä dra Jesús, guecä gadí ungui. 16 Nuya dami ndants'i, gui 'bäi. Nuya dán 'yusegä ua n'dahma gui ma ne gan juanni nangue gätho 'bɛ'a gá nu ya, nɛ gätho 'be'a ga ut'a m'bejua." ¹⁷Ne bi 'yengui: "Nuya ga pehn'na'i bu 'buh yu ja'i hing yu judío, nε ga jamansu i nangue 'bɛ'a da nde da 'yøt'a'i yu judío, ne yu ja'i ngue hing yu judío. ¹⁸Nε nangue nim hma, ga japi da xoc yú mbui yu ja'i ne him man din 'yo bu ja ra 'bεxui, pε din ja ran nequi yú mbui. Ne ga japi da 'uepu ja rá ts'edi ra zithu, ne din 'yo bu ja rá ts'edi Oja ma Ta. Ne din ja ra punbi yú ts'oqui. Ne da nu ra te mazai u, ne gätho ran japi ga unni, tengu mi'da dá 'uecä," bi 'yɛngä ra Jesús, bi 'yɛn'a ra Pablo.

Ra Pablo him bi mbesta a bi man ra Hmu 'bu mín 'yuse

¹⁹Νε nu ra Pablo bi thoqui bi xi'a ra ts'ʉt'abi Agripa:

—Nugä hin dá festhoho 'be'a bi xicä ra nde gue bá ɛh mahɛts'i. ²⁰Rá mbudi dá xi'u 'bupu Damasco, gue di päh yún 'yomfeni ne din 'yo bu rá 'yu Oja. Nε dá xifi da 'yøt' ra 'bɛfi xun ho nguepu da fadi xu päh yún 'yomfeni. Ngutho dá mangä bu Jerusalén, nepu gätho ra häi Judea, nε dá xicä yʉ jạ'i ngue hing yʉ judío. ²¹Pe nangue'a 'be'a dá mangä, nu'u 'da yu judío bi bentcä bu ja ra danija, mi nde xta hyogui. ²²Pe asta gue yu pa jabuya i fäxcä Oja. Ne dí xi'u ja yú ts'edi, ne dí xi'u hin'yu yú ts'edi. Ne hønt'a dí xänbi 'be'a bi man ra Moisés ne 'be'a bi man yu pøngahya, ngue bin ja. ²³Nu'u, bi ma ngue jatho da nu ran unbi ra Cristo, ne gue'a ra mbudi da mba nsots'i bu 'bu'u xun du. Da mba nsots'i guepu da zä di un ran nequi yú mbui u yu judío, ne'u hing yu judío, bi 'yɛn'a ra Pablo.

Ra Pablo ndepe da 'yε̞c'yεi ra ts'ʉt'abi Agripa

²⁴Νε nu'bʉ ngubʉ mi man ra Pablo, nu ra Festo nts'εdi bi mbafi:

—Nu'i gra Pablo, guín gạt'i, ɛmmɛ xʉn ngu guí pạh ra søcuą janangue'a guín gạt'i.

²⁵Bi da'a ra Pablo buya:

—Hin dí jąt'ä, gra hoga ts'ut'abi gra Festo. Pε gätho dí mangä majuani a. ²⁶Nu ra Agripa in ts'ut'abi bu 'buh yu judío, i 'bucua, i padi nangue 'bε'a gätho dím mangä. Janangue'a hin dí su ga mangua ja rá hmi. Nε dí haxa njuani ngue i padi, nguetho him bi t'agui 'bε'a bin ja, bi 'yɛn'a ra Pablo.

²⁷Ne xø bi xih ra ts'ʉt'abi Agripa:

—Ma ts'ut'abi Agripa i, ha guí ɛc'yɛi 'bɛ'a bi man yú pøngahyą Oją. Nugä dí pącä gue guí ɛc'yɛi, bi 'yɛmbi.

²⁸Nu ra Agripa buya bi dat'a ra Pablo:

—Nu'i, guí nde 'bex ga päcä man 'yomfɛni, ngue ga ɛc'yɛi ra Cristo.

²⁹Nu ra Pablo bi 'yɛmp'a:

—'Bexgue guehya, ogue niya'bu ts'u, Oja i padi 'be'a dín ndegä. Dín nde gue gui 'yɛc'yɛi, nɛ ahu gätho guí 'buhmbu ua guí øhmbu 'be'a dím mangä ya. Nɛ dín nde gui cohmbu tengugä, pɛ hønt'u yu cadena hin'na u, bi 'yɛmbi.

³⁰Nε nu'bu ngubu mi man ra Pablo, ra Festo nε ra Agripa bim 'bäi, nε'a ra Berenice nε'u mi'da mi hupu. ³¹Nε nu'bu mi mba bu thi, n'da ngu n'da bin yąsε u:

—Nu'a ran 'yohu ra Pablo, nte bi 'yøt'a ngue da du, xínga gue'a din ofädi, bin 'yε̞mzεhε u.

³²Nu ra Agripa bi 'yɛ̞mp'a ra Festo:

—Nu'bu hin xtá ma din dä bu 'buh ra hmuts'ut'abi bu Roma, sä da mba nso'ts'i 'bu, bi 'yɛmbi.

Bi 'bεnpʉ Roma a ra Pablo

Nu'bu ya xí hma ngue ga huhe ra barco, nɛ ga mbäcähe bu Roma, ra häi Italia, nu ra Pablo nɛ mi'da yu ofädi bi mba ma däpi a ra ngurpadofui, rá thuhu ra Julio, rá ngurpadofui ra hmuts'ut'abi Augusto bu Roma. ²Dá huhe ra barco ngue bi nɛxpu ra hnini Adramitio, nɛ ɛn'u da thopu ja yu hnini bu ja ndendeją bu ra häi Asia. Dá nɛxhe bu buya, nɛ dá mbähmbe ra Aristarco, ra

mengu ra hnini Tesalónica bu ra häi Macedonia. ³Nu man'da pa dá sømhbe bu ra hnini Sidón, dán säyahe bu. Nu ra Julio min yamanhoui ra Pablo, ne bi un ran t'ɛdi da mba bʉ 'bʉh yʉ́ amigo. Nɛ nu yú amigo bi un ran säya. ⁴Ne nu'bu má nexhe bu, dá thohmbe bu nthɛ't'i ra t'uhäi Chipre i ja bu made ra deja. Dá thothe bu n'danguadi nguetho emme ts'edi ran dahi bu njombu. ⁵M'bejua dá thohmbe bu ja ra häi Cilicia ne ra häi Panfilia ja bu ndendeja. Dá sømhbe bu ra hnini Mira bu ra häi Licia.

⁶Guepu bi dim bu n'da ra barco a ra hmudofui ngue bá nexpu Alejandría, ní mba bu ra häi Italia. Nε nu'a ra hmudofui bi jaje dá huhe ra barco. ⁷Ne xun ngu yu pa zu njante thoho dán 'yohe bu ja ra deja, ne xun hei dá thohmbe bu gätho rá nyani ra t'uhäi Gnido. Nu ran dąhi him bi jaje njuąntho dá uɛnthe, janangue'a yabu dá cäthe njombu ja ra t'uhäi Creta, guepu nthe't'i ra t'uhäi Salmón. 8Ne xun hei dá thohmbe bu gätho rá nyani ra t'uhäi Creta, ne dá sømhbe bu ja yún säya yu barco, t'embi Buenos Puertos. Ne hinga yabu ja ra hnini Lasea.

⁹Nɛ xun ngu yu pa ya dá 'bɛhmbe nangue ran dąhi, nɛ nts'utho bu dín 'yo ra barco bu ja ra dehe, nguetho yu pa ya i ja yun dąhi. ¹⁰Nu'a ra Pablo bi xi'u min 'yohu:

—N'yohu ahu dí xi ahu, nu'bu ga thohmbu, ga nuhu n'da ra 'yanthi nguetho xun hei thoho bu dí mba ma 'yoni ra barco. Ne hinga hønt'a ra barco ne ra 'beni ga 'behmbu, pe HECHOS 27 276

ts'urpu thoho necähu ga tuhu, bi 'yemp'u.

11 Pε nu ra hmudofʉi man'da mi εc'yεi 'bɛ'a bi ma rá mbɛti ra barco nɛ ra hmu ngue madí 'yoni, xinda gue'a 'bɛ'a mi man ra Pablo.

12 Nubʉ Buenos Puertos hingui ho ngue da gopʉ ra barco yʉ pa xʉ sɛ. Janangue'a nu'ਚ mbɛ gätho ਚ mi ɛna xcá sømhbe bਚ ra hnini Fenice, guepਚ xcám 'bਚhmbe yਚ pa xਚ sɛ. Nubਚ Fenice, ra hnini bਚ ra t'ਚhäi Creta, man'da ja yਚ́n säya xਚn ho bਚ yਚ barco, nguetho hin ɛ ts'ɛdi thopਚ ran dahi.

Ran dąhi bi 'yen ra deją

¹³Nε n'da ra pa bi pom bu bí 'yɛh ran dahi, nɛ hinga nts'ɛdi i 'yo. Ne en'u xun ho 'bu da thogui. Janangue'a bi gux'a ra t'egui mi o bu mbo ra dehe, ngue rán ts'ammi ra barco. Dá thohmbe buya, zu njante thoho á tho'a ndendeja ra barco bu ra t'uhäi Creta. 14 Ne 'bex bá ¿'a n'da ran dahi ¿mmɛ nts'ɛdi, bá nexpu Creta. ¹⁵Ne nu'bu mí mbudi bi ndøn ra barco ran dahi, him mí sä da mba ma 'yoni buya, dán unthe buya, ne dá tendahe ran dahi bu í mba. 16 Ne dá cäthe bu herpu ja ra t'uhäi Clauda i ja bu made ra deja, nguetho bi täc'i ts'u ran dahi ra häi. Ne xun hei bu dá juxhe bu mbo a n'da zu t'ubarco ngue mí jut'a ra barco. ¹⁷Ne nu'bu mi curpu mbo ra t'ubarco, bi mba m'bänba yu xahi a ra barco ngue hin da xø'ts' yu xithe. Ne nu'u buya mí supi da 'yɛn ran dahi ra barco bu ja ra 'bomu, ne da dontpu guepu t'embi Sirte. Janangue'a bi gacua yún thäcan dahi ra barco. Nε bi

duxtho ran dąhi ra barco bu ja ra dehe. ¹⁸ Man'da pa buya bi du'mi bi hyørpu ja ra dehe yu 'bɛni mi høpu mbo ra barco, ndepe hin di hyu ra barco, nguetho ɛmmɛ nts'ɛdi mi ɛnje ran dạhi. ¹⁹ Nɛ ná hyu pa buya dá sosɛgähe, dá hømhbe thi 'bɛ'a gätho mí honi 'bu di 'yon ra barco. ²⁰ Nɛ xun ngu yu pa ɛmmɛ mi ja yu güi, nɛ nya'a him bin c'a ra hyadi, xínga gue yu sø 'bu xun xui. Nɛ dá nuhe n'da ran datendahi ɛmmɛ nts'utho. Nɛ dí su ga tuhe.

²¹Νε nya'a thoho njom bin sihmε. Nu ra Pablo bim 'bäi bi 'yεna:

—N'yohu ahu nde'bu xquí 'yøde 'be'a dá mangä. Nde'bu xcambán säyahu bu Creta, ne hin xcá nuhu ran unbi ya, ne hin xquí 'beh ni 'benihu. ²²Pe nuya, o di tu ni mbuihu, nguetho xínga n'da ahu gam 'behmbu, pe hønt'a ra barco dim 'bɛdi. ²³Nguetho dám 'bä'be n'da rám 'behni Oja mahets'i má xui, gue nugä rá mbetigä Oją ne dí thande a. ²⁴Nɛ nu'a ram 'bɛhni bi xiqui: "O guín su Pablo, nguetho jatho da mba ma dä'i bu 'buh ra hmuts'ut'abi bu Roma. Ne nu'a Oja hin di japi da du u guí 'buhmbu ua ja ra barco, tengu gá 'yäpi," ¿n'a rám 'behni Oja mahets'i. 25 Nuya, n'yohu ahu, dan johyahu, nguetho dí ec'yei gue majuani da 'yøt' Oja tengu bi xic rám 'bɛhni. 26Pɛ nu ran dahi da 'yenju bu ja n'da ra t'uhäi i ja bu made ra dehe, bi 'yɛn'a ra Pablo.

²⁷Nɛ nu'bʉ ya xí gua'i 'dɛ'ma goho ma pa dí 'yohe, nubʉya bi 'yɛngähe ran dạhi bʉ ja rá xɛqui ra deją t'ɛmbi Adria, 'bʉ min xui. Nɛ nu'ʉ yʉ mbɛfi gue di 'yon ra barco,

mím beni hinga yabu ja n'da ra häi. 28 Ne bi 'yeni hangu nan he ra dehe, 'däte ma 'dɛ'ma'dato metro nan hɛ. Nɛ bi dạn'i ts'u ra barco, bi 'yeni mahøn'a, ne nuya hønt'i 'däte ma yoto metro nan he ra dehe. Janangue'a bi badi him ma yatho bu ndenthe. ²⁹Nu'u mi supi da zøm bu ndenthe ra barco, gue din thehu yu do. Janangue'a bi 'yɛnt'i goho yu t'egui ngue yún ts'ammi ra barco, bi 'yentpu ja rá xuthä ra barco, ndepe hin din 'yo. Ne emme mi xønni din nequi. ³⁰Nu yu mbefi di 'yon ra barco mim beni xtá 'dagui, bi ca'ma man'da ra t'ubarco bu ja ra dehe. Pe bin häte, nguetho ena gue'u yu t'egui xtá 'yent' mi'da bu ja rá yą ra barco, gue yún ts'ammi. ³¹Pe nu ra Pablo bi 'yemp'a ra hmudofui, ne'u yu dofui:

—I nde da 'dah yu di 'yon ra barco, pε nu'bu da 'dah yu, hin da zä gui ponju 'bu.

³²Nu yu dofui buya bi hyɛcua yún that'i ra t'ubarco, nɛ bi dux ra dehe, janangue'a njom bi 'dagui.

³³Nɛ nu'bu t'unɛqui tho nu'a ra Pablo bi xifi nde'bu din sihmɛ. Bi 'yɛna:

—Nuya, ná 'dɛ'magoho ma pa ya ngue mí tutho ni mbuihu, nɛ hin gán sihmɛhu. ³⁴Nuya dí øt'ahu ra ts'ɛdi gui sihu ts'u ra hmɛ. Nu'a dí zac ni ja'ihu a, nɛ guepu da zä xínga n'da gam 'bɛhmbu nɛ njon din unbi, xíngui ts'u.

³⁵Nɛ nu'bʉ mi jua'a bi man'a ra Pablo bi hyaca n'da ra thuhmɛ, bi un ra jamadi Oja bʉ ja yʉ́ hmi gätho mí 'bʉpʉ, nɛ bi xɛni bi dʉ'mi bi zi. ³⁶Nu'a bi man ra Pablo bi hyurpa yʉ́ mbʉi ʉ, bin sihmɛ ts'ʉ buya. ³⁷Nɛ nugähe í juaje yociento nɛ hyate ma 'dɛ'ma 'dato nja'i mi 'buhmbe bu ja ra barco. ³⁸Nɛ nu'bu mi juadi bin sihmɛ u, nu'a ra trigo mi høpu ja ra barco bi hyøm bu ja ra dehe, ndepa dí cah nan hyu ra barco.

Bi xen ra barco ra dehe

³⁹Ne nu'bu mí hyats'i, him mi padi 'bɛ'a rá thuhu ra häi bi hyandi. Nu'bu mi nu mi ja bu n'da ra 'yethe gue him mí ja yu do, guepu mim beni mi sä xtí cu't' ra barco. 40 Bi hyecua yun that'i yun ts'ammi buya, bi zopu dehe. Ne bi xocua yún thu't'i yún thäcadehe ngue yúm 'bä't'i ra barco. Nε bi 'yɛspa mahøn'a n'da ran thäcandahi. Nu ran dahi buya bi 'yon ra barco, ne bi du'mi bi hyäm bu ja ra ndendeją. ⁴¹Pε nu'bu má sømhbe hapu hingui he ra dehe, dán timbe bu yoho yu 'yɛthe, n'da n'danni ní yɛhɛ. Nu'a rá yą ra barco bi yurpu ja ra 'bomu ne bin du bu, ne him mi sä da thogui. Pe nu rá xuthä buya bi mbudi bi xen ra dehe, nguetho nts'edi din the bu yu dehe. 42 Nu yu dofui buya, ena da hyo yu ofädi, ngue mi supi din xaha, da 'dagui. ⁴³Pɛ nu ra hmudofʉi him mi ndepe gue nε ra Pablo da tho, him bi japi da 'yøt'e 'bɛ'a mim bɛn'ʉ yʉ dofui buya. Bi manda ngue to'o pah nan xaha, ra mbudi da zo bu ja ra dehe ne din xaha, da zøm bu ja ra häi. 44Ne'u mi'da ngue him mi pah nan xaha, bi 'yoxpu ja yu xithe o gue yu xeca barco. Ne gätho bi zømanho bu ja ra häi.

Bi zøm bu ra häi Malta a ra Pablo

Ne nu'bu má søhmbe bu ja ra häi, bi sije ngue rá thuhu

HECHOS 28 278

ra t'uhäi Malta, i ja bu made ra dehe. ²Nu yu mɛngu bu ɛmmɛ bi 'yørcahe ran ho, nguetho bi 'yurcahe n'da ra sibi nguepu dán tạspihe. Bin 'ye bu nɛ xu sɛje. ³Nu ra Pablo bi pɛt yu 'yont'o, bi 'yuspu ja ra sibi, 'bex bi bøn'a n'da ran dạte pozu bu ja ra t'o, nu'bu mi zä ra sibi. Nɛ nuna ra pozu bi zap rá 'yɛ ra Pablo, nɛ bin zurpu. ⁴Nu'bu mi nu yu mɛngu bu ngue i zurpu ja rá 'yɛ ra Pablo ra pozu, bi 'yɛn'u:

—Masque ra hyodu na ran 'yohu, masque him bi du bu ja ra dehe, pɛ nuya m'bɛjua da gut'a 'bɛ'a xí 'yøt'e.

⁵Pε nu ra Pablo bi huạc rá 'yɛ, nɛ bi däh ra pozu, nín so bu ja ra sibi, nɛ nte mán unbi bi nu ra Pablo. ⁶Nɛ nu'u 'bäpu, mi tø'mi nde da nu 'bu da nden bu bi zapi, o gue da 'yagui nɛ 'bex da du. Nɛ nu'bu ná nya'a mi tø'mi, hin te bi ja, bi pä'a mim bɛn'u. Nɛ ɛn'u: "Masque n'da ra oja na."

⁷Nu'a rá ts'ut'abi ra t'uhäi Malta, í Publio a, mí jase n'da xequi rá häi jombu dán tąspihe. Nε bi xije ga mbähmbe bu rá ngu. Ne hyu pa dám 'buhmbe bu, ne emme xun ho bi 'yørcähe. 8Nu rá ta a ra ts'ut'abi Publio ya xmí u 'bu má sømhbe bu, mi ja ra pa nε ra mbøni. Nu ra Pablo bi mba bu da nu, bin yaui Oja nε bi gäx rá 'yε, nε 'bex bi zä buya. ⁹Ne nu'bu min ja 'be'a bi 'yøt'a ra Pablo, gätho mi 'bupu ja ra häi ngue mín zäman'u bi zøm bu, ne gätho bi hoqui, bi zä buya. 10 Ne xun ngu yun t'unni bi 'daje, ne nu'bu má mbäcähe, xø bi 'daje gätho 'bɛ'a ga homhbe bu ja ra barco.

Bi zøm bu Roma ra Pablo

¹¹Nhyuzna dám 'buhmbe bu ja ra t'uhäi Malta, dá huhe n'da ra

barco buya. Nu ra barco mi hø bu gätho yu pa xu se, ngue bá nexpu Alejandría. Nu rá thuhu ra barco t'embi yu gon'yohu Cástor ne Pólux. ¹²Nε dá huhe ra barco, dá nexhe bu ra t'uhäi Malta buya, nε dá sømhbe bu n'da ra hnini Siracusa, ngue 'dan'yo ra häi, ne hyupa dán dehe bu. 13 Dá nexhe bu, ne dá cäthe bu ja ndendeja asta gue'bu go má sømhbe bu ra hnini Regio. Νε man'da pa buya bin 'yo xun ho ran dahi, ne ná vopa dá sømhbe bu ra hnini Puteoli, gue ra häi Italia, ne dá cacähe buya. 14 Nubu, dá timhbe 'da'u yu cu nangue ra Cristo. Nu'u bi xije dan säyahe bu nyoto pa. M'bejua buya dá haxhe ra 'yu í pa bu ra dahnini Roma. ¹⁵Nε nu'u yu cu nangue ra Cristo mi 'bupu Roma, mi øde ba εhmbe bu 'yu. Bá εh puya, bi daje bu ja ra hnini Foro de Apio, nε bi daje mi'da bu ra hnini Tres Tabernas. Ne nu ra Pablo 'bu mí nu, bi xi Oją jamadi, ne nu Oją bi hyurpa rá mbui buya. 16 Ne nu'bu má sømhbe bu ja ra dahnini Roma, nu ra hmudofui bi dä bu yu ofädi bu 'buh rá hmu yu mbädi. Pe nu'a ra Pablo bin t'un ran t'ɛdi dim 'buse bu ja n'da ra ngu, nε hønt'a n'da ra dof#i da mbädi.

Bi man rám Hman Oją ra Pablo bu Roma

¹⁷Nɛ nu'bʉ mi tho'an hyupa, nu ra Pablo bi zon'dʉ yʉ ngʉrpi yʉ judío ngue mí 'bʉpʉ. Nɛ nu'bʉ mim pɛti bʉ 'bʉ'a ra Pablo, bi 'yɛ̞mbi:

—Man 'yohu ahu, nte man ts'o dá ørpä u ma mijudíohu, xín dá fɛsta yún thạnde bi thocta u ma ngurpa bombøtahu, pɛ guehma bi mba ma dägä bu 'buh yu romano bu Jerusalén. ¹⁸Nɛ nu'bu mi 'yørcä ran juanbi, nu'u mi nde xtá hyɛga thoho, nguetho nte dá øt'ä ngue da thogui. ¹⁹Pɛ nu ma mijudíohu him mi nde xtá hyɛga thoho, janangue'a dá äh ran t'ɛdi di dägä ua Roma. Pɛ hin'yu 'bɛ'a dím bɛni dá yapä u ma mijudíohu. ²⁰ Janangue'a dá zohn'nahu dan nuhu nɛ dan yahu. Nuju dyu israelhu, dí tømhbu din ja 'bɛ'a bi man Oja gue din ja. Pɛ dí ɛc'yɛi ngue ya bi du'mi bin ja 'bɛ'a bi man Oja, jananjabu nthu't'igä ra t'ɛgui ja ua, bi 'yɛn'a ra Pablo.

²¹Nu'u bi xi'a ra Pablo:

—Nugähe nte má søcuą bi 'bɛngähe ní 'yɛpʉ Judea nangue'e. Xínga n'da man 'yohʉhʉ bí nɛxpʉ, bi man ran ts'o nangue'e, njo'o to'o bi yąp'a'i. ²²Pɛ dín nde gui xije ts'ʉ 'bɛ'a guím bɛni, nguetho hønbʉ bi zä i hma hingui ho 'bɛ'a guí εc'yεihʉ, bi 'yɛn'ʉ.

²³Nɛ nu'ʉ bim pɛti man'da ra pa nangue'a xí ma, nɛ xʉn ngu ʉ bi zøm bʉ mi 'bʉ'a ra Pablo. Nu ra Pablo bʉya gätho ra pa bi xifi nangue rá 'bɛfi i øt' Oją ua ja ra ximhäi, nɛ 'bɛpʉ ní manda Oją ʉ yʉ ją'i. Bi hyoni 'bɛpʉ dí 'yɛ̞c'yɛi ra Jesús, nɛ bi 'yuti hapʉ nt'o't'i nangue ra Jesús bʉ ja rá søcuą ra Moisés, nɛ yʉ́ søcuą yʉ pøngahyą.

²⁴Nu'ʉ 'da bi 'yɛ̞c'yɛi 'bʉ mí man ra Pablo, pɛ 'da'ʉ him bi 'yɛ̞c'yɛi. ²⁵Nɛ nu'bʉ him mí sä'ʉ ngue 'da'angu da bɛ̞ni, bi mbʉdi bi mba. Pɛ nu ra Pablo man'da ram hma bi xi'ʉ:

—Nuna rá Hogandahi Oja majuani bi ma nu'bu mim pøngahya ra Isaías, ne bi xi'u ma ngurpa bombøtahu. ²⁶Nɛ bi t'ɛmp'u:

Ní mba bu 'buh ni mijudíohu, ne gui 'yembi:

"Nu ahu zại guí øhmbu nangue ni zaguhu, pɛ hin guí pąhmbu 'bɛ'a guí øhmbu.

Ne guín nuhu nangue ni dähu, pe hin guí pąhmbu 'be'a guín nuhu."

ngubu bi 'yemb yu ja'i.

Nguetho nu yu ja'i xum me yu mbui,

nε xíngui ts'ʉ cʉ't' yʉ́ zagu 'bɛ'a øde.

Ne tengu'bu di ts'ant' yú dä, nguetho su da nu, su da 'yøde, nguetho hingui nde di päh yú mbui

guepu da zä xcá hocpa yú mbui, ɛn'a rá Hogandahi Oja 'bu mím pøngahya ra Isaías, bi 'yɛn'a ra Pablo.

²⁸Νε bi thoqui bi 'yεmbi:

—Dami pąhmbu ngue nuya da si'u hing yu judío 'bɛpu da zä dí zin Oją u, ne gätho yu pa dí mba bu. Ne nu'u, man'da da 'yø'u, bi t'ɛmp'u yu judío.

²⁹Nɛ nu'bʉ mí gua'a bi ma ra Pablo, nu yʉ judío bi mba, nɛ bin junzɛhɛ ʉ 'bʉ mí mba'ʉ, nangue 'bɛ'a bi man'a ra Pablo.

30 Nε nu'a ra Pablo bim 'bʉpʉ nyo jɛya bʉ ja ra ngu xí mihi. Nɛ gätho to'o bi mba bʉ, bi numanho. 31 Nε nu ra Pablo bi ma 'bɛpʉ dí manda Oją ʉ, nɛ bi xänbi nangue ma Hmuhʉ ra Jesucristo. Nɛ nu'a ra Pablo him mi supi to'o da 'yøde, nɛ njo'o to bi hɛcpi.

ROMANOS

Ra søcuą bi 'yorba ra Pablo u yu 'yęc'yei bu ja ra ngurpa dąhnini Roma

Ran zengua

Nugä drá Pablogä, drá 'yehegä ra Jesucristo. Ne bi xic Oja ma 'bäigä'be ra Cristo, ne bi huangui gam mangä rán ho ma'da'yo Oją. ²Ne guet'a ram hma mi man Oja bu ja rá hoga t'ohni bi 'yo't'u yú pøngahya maya'bu. ³Ne n'dat'a ram hma im ma nangue ra Jesucristo rá Ts'unt'u Oja a, ne nangue'a bim 'bucua ja ra ximhäi, rám bom'beto ra David a. 4Pe nu'bu mi dambeni bu 'bu u xun du, ja bi 'yu Oja xun ho gue rá Ts'unt'u Oja a buya nte hembi nangue rá Hogandahi in 'youi. Gue'a ma Hmuhu a. 5Ne rá mate zehe bi xiqui ma 'bäigä'be ra Cristo, ga japi da'yɛc' yɛi yʉ ja'i gätho yʉ hnini, ne gue'a dí hnumanho ra Cristo a buya. ⁶ Janangue'a in ndec Oją ga mba ga fäx'a ni t'ęc'yeihu, nguetho bi zon'nahu Oją bi ja'ahu yú mbeti ahu ra Jesucristo. ⁷Guehna dí ot'ahu na ya gätho ahu guí 'buhmbu bu ja ra dahnini Roma, ngue bi huɛc'ahu Oja nɛ bi zon'nahu, ne bi 'uec'a ni mbuihu

in nde ahu hønt'a guim bɛmhbu a. Dí äp Oją ma Tahu nɛ ra Jesucristo ma Hmuhu da hyut'a ni mbuihu nangue rá mate zɛhɛ.

Emme in nde da zøm bu Roma a ra Pablo

8M'bet'o thoho dí xi ahu emme dadí johyagä, nguetho dí ø'a man yu ją'i hønbu go hapu dí 'yo ngue guí ɛc'yɛihʉ xʉn ho. Janangue'a dí xi Oja jamadi nangue gätho ahu. Ne di thocpa ra jamadi ma Ojahu ra Jesucristo. ⁹Nε i pą Oją hin dí ε'ts'a ná ya'be nangue ahu. Νε dí hạh ma mbui dí ørpa rá 'bɛfi 'bu dím man a ran ho ma'da'yo nangue rá Ts'unt'u. ¹⁰Νε dí äp rá mate Oją ngue hin da ya'a ga mbagä bu guí 'buhmbu. Ne hin dí padi 'be'a da zä dá søm bu, pε go pa Oja, nε xømhma thoho da nde Oja ga mba bu. ¹¹Nguetho εmmε dín nde gan nu ahʉ, ga fäx ahu din ja ahu man'da xun ngu rá ts'edi Oją, ne man'da gam 'bähmbu xun ho buya. ¹²Necä da zä gui fäxcahu, janangue'a da zä 'da xtám fäxtahu nangue ma t'ɛc'yɛihʉ dí comhbʉ. 13 Ma zi cu

281 ROMANOS 1

ahu dín nde gui pahmbu ngue xun ngu yu nidi mí ɛna xcá mba bu, pɛ hinga na sä. Pɛ guehma dín nde ga mbagä bu nɛ da hnurca ma 'bɛfi bu guí 'buhmbu, tengu bu mi'da yu hnini xtá mba. ¹⁴Nguetho i 'yo ma güɛnda ga xänba yu ja'i, nɛ u 'bupu ja yu hnini nɛ u yum 'bundapo ja'i, nɛ'u pah ra søcua nɛ u hingui padi, gätho ga xänbi. ¹⁵Janangue'a nɛ ahu ɛmmɛ jag ra pähä ga xän'nahu rán ho ma'da'yo ra Cristo, gätho ahu guí 'buhmbu bu ja ra dahnini Roma.

Nu ran ho ma'da'yo ní yan u to'o gätho da hyan a

16 Nɛ hin dí pɛs' ma sä gam mangä ran ho ma'da'yo, nguetho gue'a ram hma rá ts'ɛdi Oją a dí yạn u to'o gätho da hyạn a. Nɛ mbudi bi sije dyu israelgähe, nɛ xø bi si u mi'da buya. 17 Nguetho nu ran ho ma'da'yo i xiju 'bɛ'a ní hogahu, gue ga hạnthohu rá mate, nɛ hin'yu 'bɛ'a man'da dí zinju Oją a. Tengu mán t'o't'i: "To'o bi 'yɛ̞c'yɛi rá mate Oją, bi hocpa yú ts'oqui, bin t'un ra 'da'yote buya."

Gätho yu ją'i in dupate yu ts'oqui

¹⁸Nguetho nu'bʉ hin da yạn Oją yʉ ją'i i jatho di ʉnbi, nangue'a 'dan'yo thoho i thạnde, nɛ i øt'e 'bɛ'a gä má ts'oqui. Nɛ nu'a majuạni nde di bɛnba Oja ʉ, pɛ di hɛcpada ʉ, nguetho man'da in numanhosɛ yʉ́ ts'oqui. ¹⁹Pɛ i pạhma 'bɛ'a sä da fądi nangue Oja, nguetho guesɛ Oja di bɛnbi. ²⁰Nɛ madague'bʉ hin di nɛqui Oja, pɛ da zä da bạh yʉ jạ'i gue maguesɛ Oja nɛ i ja rá ts'ɛdi mazai a, nguetho in nu 'bɛ'a gätho

bi 'yøt'ua ja ra häi. Νε gue'bu go rá mbudi ra ximhäi mi sä xtá fadi xun ho. Ne mi sä xtám bạh yu jạ'i xtá numansu Oja. Janangue'a njon da zä da xi Oja nte in dupate. ²¹Νε mi sähma xtám ba Oja, pε him mi nde xtá numansu a ne him bi xifi jamadi 'bɛ'a gätho bin t'un'dʉ. Pɛ bi du'mi bi ben a n'da ran 'yomfeni nte ní mba tho. Janangue'a bi 'bεh ra hogan'yomfeni. Ne njam'bu bi zä da beni 'be'a xun ho da 'yør puya. ²²Sä ɛna pasɛ ʉ, nɛ guepʉ í 'bɛpʉ ra hogan 'yomfeni buya. ²³Nu Oja tate xun ho a, gue i 'bui mazai. Pε nu'u bi 'yøzehe yu ja'i bi bøni tengu yú pøte yu ja'i dim 'bɛdi, nɛ yu doja nε yu zate nε yu pozu, man'da bi 'yɛmbi oja u. 24 Janangue'a bi hyɛ Oją u. Ne man'da bi 'yøzehe 'be'a gätho bi numanhose buya gue ran 'yomt'eni. Ne bi ts'onse yú ja'i n'da ngu n'da u. ²⁵Bi hye a majuani Oja ne go bi 'yęc'yei u him majuani Oją. Bi dande gätho bi 'yøt' Oja ua ja ra ximhäi xinda gue'a Oją gue bi 'yøt'u. Pe hønt'a Oja mixte xun ho a gätho yu pa mazai. Janangue'a hønt'a ga εspahu a. 26 Nε gue'a í hyε Oją u. Nε nubuya bi zä bi 'yøt' ran ts'o, gue'bu go mí 'yøt' man'da xun ts'o, ne yu xisu bi pä a bi zänba Oja xtá 'yøt'e, gue bi 'yasäba yú mixisuhu tengu'bu ran 'yohu zehe. ²⁷Ne yun 'yohu bi hyeh yun t'edi mi sän Oją xtín thạt'u yu xisu ngue xtí manda, nguetho εmmε in nde di 'yasäba yú min'yohuhu, nu'a him mi sä xtá 'yøt'e. Pε bi hyonsε ran unbi gue yú ja'i zehe u 'bu mí 'uegue. ²⁸Nɛ nu'bʉ him mi numanho a ran 'yomfeni majuani nangue Oja, ngutho bi hye Oja u, ne man'da bi

ben u yú ts'on 'yomfeni ne bi 'yøt' yun ts'o him mi sä xtá 'yøt'e. 29 Ne εmmε di yus' yú mbui gätho yu ts'oqui, ran 'yomt'eni, ra ts'om'bäi, ran ts'iyate, ra nexmate, ran ts'eya, ran thote, ran sui, ran thäte, ran ucpate, ran c'ate. 30 Nε yu zänfεhni θ, nε i san Oja, nε hingui su n'da ra ją'i, ne din 'yęx'u, ne ma maguese u, thocpa thoho i honse mi'da yu ts'oqui hingui padi da 'yøt'e, ne i festa'a 'be'a man yú ta ne yú mbe. ³¹Ne hingui nde din 'yomfeni u, ne hin di ja'ts'a man θ, nε hin'yθ yθn huεcate, nε hin'yu yú yembui. 32 I pahma di unba Oja u gätho yu pa mazai, gue'a yún sähu a nguetho i øt' ya i hmangua. Pε man'da guexta'a i øt'e ne man'da di johya 'bu xun ngu u 'da'angu øthu u.

Di unba Oją u to'o di ho yu ts'oqui

Janangue'a hingui sä ga **ε**mhbu him man sähu a ran unbi hønt'a go to'o gahu. Nguetho nu'bu dí numan'uhu u 'da nangue yú ts'oqui, ne dí emhbu go yún sähu da nu ran unbi u, pe gue'a nán juanba zehehu a 'bu gue n'dat'a dí øthu. 2Pe dí pahmbu gue yún sähu 'bu di unba Oja u øt' yu ts'oqui. 3Pe sä dí emhbu ngue go ga ponju rán juanbi Oja, ngue go dí ɛmfu hingui ho øt'u 'da, ne ya 'da'angu dí øthu u. ⁴Ha hin dí pahmbu hanja him 'bexque di ungahu Oją nangue ma ts'oquihu. Pe gue'a ní jaju ga päh ma mbuihu xun ho a. Pe nuju dí festahu rá vembui i ørcahu. 5Pe nu'bu xum me ní mbui n'da, ne xíngui ts'u coh rá mbui nangue yú ts'oqui, pe emme di pet yun unbi da t'ørpa 'bu bi zøn ra pa, ngue rá

muui a bi 'yøt'e, ne da zemp Oja a. ⁶Ne n'da ngu n'da din t'un'na rán theui 'be'a bi 'yøt'e. 7Nu Oją di unt'a ra temazai 'bu 'bo'o zai øt'a ran ho, nguetho honi dim 'buhmi Oja, ne i honi da 'yøt'a i numanho Oja, ne i honi da t'ørpa ran ho njam'bu din thegue. ⁸Pe nu'bu dadín suhmbu Oja, ne hin dí numanhohu a ra 'yu majuani pe hønt' yu ts'oqui go dí numanhohu, pε gue'a dí 'daju ra cuε Oja a 'bu, ngue ɛmmɛ nts'utho. ⁹Nts'ɛdi yʉn unbi ne 'be'a gätho má dumbui da nu'u n'da ngu n'da to'o gätho nzai øt' yu ts'oqui, neje dyu israelhe, ne ahu hin gyu israelhu. 10-11 Pε hønt'a go to'o da hyoni da 'yøt' ran ho, di japi 'darpu dim 'buhmi Oja ne da numanho Oją a, ne da hyurpa rá mbui thocpa thoho, necähe dyu israelgähe, ne ahu hing yu israelhu. Nguetho gätho 'da'anguju bu na nuju Oja. 12 Ne nu'u hing yu israel him bi sih yún t'ɛdi Oją. Nɛ madague'bu him bi sifi, pe guehma da nu yun unbi to'o di thocta yu ts'oqui. Ne ngutho u yu israel ngue bi sih yún t'ɛdi Oja, nɛ gue'ʉ yún t'edi Oja dí juanba u to'o di thocta yu ts'oqui. ¹³Nguetho nu'bu da batho yún t'edi Oja n'da, hin da numanho Oja a 'bu, hinda hønt'bu da 'yøt'a hmam bu. ¹⁴Nu'u hing yu israel, him bin t'un yún t'ɛdi Oją ngue ran hocją'i xtá 'yøt'e. Pe guehma i pąse mbo yú mbui nda'a xun ho, nguetho ja'bu i øt'a rán theui u yún t'edi Oja ngue ran hocja'i. ¹⁵Ne madague'bu him bi sih yún t'ɛdi Oja u 'da, pɛ tengu 'bu mán t'o't'i bu ja yú mbui u yún t'ɛdi Oja, ne guese vú mbui i xifi ngue

hingui ho a bi 'yøt'e, o ja'bu xun ho. ¹⁶Nɛ gue'a dí juanba Oja u gätho yu ja'i, nangue ra Jesucristo 'bu bi zøn ra pa. Nɛ di juanba u nangue u i asɛ mbo yu mbui u. Nɛ gue'a i mam bu ja ran ho ma'da'yo ngue dím mangä.

Sä ín 'yɛx'u 'da yu israel u yún t'ɛdi Oja

¹⁷Pε nu ahu ma mi'israel ahu, guidín 'yexhu nguetho gyu mengu israelhu, ne, "hønsegahu i numanhoju Oja, nguetho bi 'daju u yún t'edi," sä guí emhbu. 18 Ne gá pahmbu rá pähä Oja, nguetho gán xähmbu yun t'edi, ne gá pahmbu nda'a xun ho da zä da 'yøt'a n'da. ¹⁹Ne guím bensehu guí uthu ra 'yu u yu xädä, guím bemhbu yú nyot'i ahu u i 'yo bu ja ra 'bεxui. 20 Nε sä guí emhbu ja nin t'edi gui xänbahu yu 'yambui, nguetho guí pahmbu u yún t'edi Oja ngue majuani, ngue di un ran 'yomfeni n'da. 21 Pe nu'bu gue'a guí øthu ma mi'israel ahu guí xänbahu mi'da, hanja hin gán xäschu tha. Guí xihmbu mi'da ngue hin dim ρε, ρε hanja go guím pesehu tha. ²²Guí xihmbu mi'da ngue hin din 'yomt'ξni, pε hanja go guí 'yomt'eni zehehu. Guí xihmbu mi'da hin da 'yespa u yu hyäte oja, pe ha hin guím bemhbu ngue go guí cuzehehu bu i thande yú ojąse u, ne guí pęfu 'be'a guí numanhohu bu. 23 Gná vathu a ngue'a guí ɛmhbu guí pạhmbu yún t'edi Oja. Pe man'da gadí jafu hin da numansu Oja u mi'da, nguetho guí festahu u yún t'edi bi ma. ²⁴ Janangue'a bin ja tengu mán t'o't'i, ngue di c'aman'u Oja u hing yu israel 'bu i nu a ran ts'o

guí øthu, gyu israelhu. ²⁵Pe nu'bu xcá øthu yún t'edi Oja bi man ra Moisés, xun ho ngue am hmepya ma ja'ihu, ngue dyu israelhu. Pe nu'bu hin dí tenhdu u, säti thoho am hmεpyagahu 'bu, nε nte ja bu a uh ma hmepyahu. 26 Ne nu'u hing yu israel ngue him bi mba ma hmepyabi yú ją'i, nu'bu øt' yún thehu u yún t'edi Oja, nu'u i numanho Oja u, tengu'bu xtá hmεpya bu na nu Oja u. ²⁷Nε nu'u hing yu israel ngue nte ma hmepya i ja, pε nu'bʉ i øt' yʉ́n t'εdi Oją, gue'u dí jaju din c'a ma ts'oquihu u, dyu israelhu. Nguetho sä dá mεpya ma ja'ihu, tengu man'a ran t'edi, ne hin dá øthu a rán säui ma hmεργahu. ²⁸Nε madague'bu n'dat'a mam bombøtahu ra Abraham, ρε hinga gue'a ní 'yøt'e rá t'uhni Oja n'da a. Ne xín nangue'a am hmepya maxøts'e rá ja'i n'da. ²⁹Pε hinda hønt'bu hmεpya ma mbuihu nangue rá Hogandahi Oja, nu'a njuantho ra hmepya i nu Oja a. Ne nu'bu njabu ma mbuihu, hin gam bemhbu ngue da numanhoju ma mija'ihu, pe hønt'a Oja gam bemhbu da numanhoju.

Nu'bu 'bo'o da 'yɛngui: "Pɛ hanja bi huand Oją u yu israel tha, nɛ 'bɛ'a nam bøn'a ra hmɛpya bi si u," gue'bu 'bo'o da 'yɛngui.

Pɛ xun ngu 'bɛ'a í huand Oja u.

M'bɛt'o thoho gam bɛmhbu bin t'un rám hman Oja maya'bu u ndu mam bombøtahu. Nɛ gue'a ga xi u to'o da 'yängui.

Pɛ xun ngu u him bi nde. Pɛ ha gam bɛmhbu bi zɛpu a mí ɛna xtá 'yørpa Oja yu ja'i 'bu.

Hin'na maha, pɛ guehma guesɛ Oja di ja'ts'a rám hma, madague'bu

ROMANOS 3 284

gätho xtín hetho yu ja'i nangue rá 'bɛfi. Nɛ tengu bi man rá t'ohni Oja, gätho di ja'ts'a bi ma, ne hin hapu ga timhbu ngue him bi 'yøt' Oja a mí ma, 'bu ga änhdu. 5Pε sä ɛn u 'da hingui øh rám hman Oją: "Hingui ho 'bu di ungahu Oją nangue ma ts'oquihu, nguetho man'da di necmanho rán ho Oja 'bu gätho xun ts'otho ga øthu," ɛn'u yu ja'i. ⁶Pε hingui sähma ngubu ga mamhbu, ne xun ho 'bu di ungahu Oja nangue ma ts'oquihu, nguetho jatho da 'yøt' ran ts'ut'abi nangue gätho ra ximhäi. 7Ne sä en u 'da: "Man'da dí ɛspahu Oja nangue ma fehnihu dí mamhbu. Pe hanja di ungahu 'bu, tengu'bu dyu 'yøt'a ts'oquihu, ne man'da dí uhmbu ngue njam'bu dim fehni Oja," sä ɛn u 'da. 8"Nɛ mbähä ga øthu ran ts'o, n'dahma di negui a ran ho," i ɛnju dí ɛmhbu u 'da 'bu dí ɛna hin ní yanju Oja u yún t'edi, gue'u to i sanju. Pegue da ts'emba u nangue yúm hman u.

Gätho dín dupatehu yu ts'oqui

⁹Pε ha gam bɛmhbʉ man'da xun hoju dyu israelhu. Pε hin'na, tengu thoho dá xi ahu 'bu rá mbudi, nguetho 'da'angu dyu 'yøt'a ts'oquihu, nε'u yu israel nε'u hin yu israel. ¹⁰Nε mán t'o't'i:

Njo'o n'da xun ho, xinga n'da.

11 Njo'o n'da i ja rán 'yomfɛni,
nɛ njo'o i hon Oja ngue nde da
dɛnni.

 Gätho gahu dá 'uethohu, nɛ 'da án ts'ontho 'bɛ'a dá øthu.
 Xínga n'daju dí øthu ran hocja'i.
 Emmɛ xun ts'o ma ndehu, tengu'bu n'da ra hyahäi bu ja ran 'yägui ngue hingan jo'mi, xun xa, in jabu ma ndehu.

Nguetho ɛ̞mmɛ dí mamhbʉ yʉ fɛhni,

nε ran dąte i pøm ma ndehu, tengu'bu dyu pozuhu.

14 Nu ma ndehu çmme yupu ran ts'ante ngue xun ju.

¹⁵ Nu ma guahu, ɛmmɛ i ɛhya na 'dihi ngue dan hotehu.

¹⁶ Pε í hughi thoho u 'bupu hapu dí 'yohu, ngue xun ts'o 'bε'a dí ørpahu u.

¹⁷ Nɛ hin dadí hocpahu yú mbui ma miją'ihu, xínga gue'a ma mbui zehehu.

18 Nɛ xíngui ts'u dím bɛmhbu
ngue ga numansuhu Oją.
Nɛ gue'a bi man rá t'ohni Oją 'bu
maya'bu a. 19 Nɛ nu'a mí hmam bu
ja ram hma maya'bu ngue bi xije
Oją dyu israelgähe, ga pąhmbu
gätho i ja ma ts'oquihu bu na nuju
Oją. Janangue'a gätho ra ximhäi
din hɛtho 'bu bi 'yørpa ran juanbi
Oją. 20 Nɛ nu'u yún t'ɛdi Oja, xínga
n'da ra ja'i dí 'yɛmbi xun ho u ngue
bi xiju ran hocja'i xcá øthu. Pɛ nu'u
yun t'ɛdi, ja ga timhbu bu 'bɛ'a dá

Da yanju Oja 'bu ga hamhbu rán hoqui

²¹ Janangue'a nuya bi t'urcahu man'da ran hoqui ngue dí 'yɛnju xun hoju Oja, nɛ hin nangue u yún t'ɛdi ngue bi xiju xcá øthu ran ho, madague'bu midí nɛqui ts'u bu ja ram hma maya'bu a ran hoqui dí xi ahu ya. ²² Gue ga hanthohu a rán hoqui Oja nangue ra Jesucristo di hoga ma ts'oquihu hønt'a go to'o gahu. ²³ Nguetho njo'o gahu dá jąs'hu gätho ran ho nguepu xtá numanhoju Oją, pɛ gätho dá øthu yu ts'oqui bu án nuju. ²⁴ Janangue'a bi zänni di hogazɛhɛhu Oją ngue rán t'unni thoho, nguetho bi gurca ma ts'oquihu ra Cristo Jesús. ²⁵ Nguetho bi zän Oją a ra Cristo ngue bim 'bøts'e zɛhɛ, bi gurca ma ts'oquihu nangue rá ji. Nɛ gue'a ní yan u to'o da hyan'a bi 'yørpe.

Nε ngutho nangue u mí 'buh maya'bu, nu'bu mi du ra Cristo, ja bi nequi a í punba yú ts'oqui u to'o mí nde rá punbi Oją. Ne ja bi 'yu Oja buya 'be'a í thøtho u. ²⁶Ne ja bi 'yu Oja a rán jut'i ma ts'oquihu, janangue'a da zä di hogahu ya, ne da zimanhoju ngue gueju dá ęc'yeihu rá mate ra Jesús. ²⁷Pε xiya, hapu bi go'a man 'yɛts'ihu. Bi mba ma 'berquigahu. Pe hague nja. Nguetho hin dá jąs'hu yún t'εdi Oją, pε bin 'dactahu rá mate 'bu má ¿c'yɛihu a. ²⁸Nε dí pąhmbu ngue bi hogahu Oją 'bu má hạnthohu rám hma nangue rán hoqui. Ne hin da 'yängahu 'bu xcá jas'hu, o hin'na. 29 Pe sä dí emhbu dyu israelhu høngdahu i numanhoju Oją. Pε i jatho ga pąhmbu ngue nε'u hin yu israel in nde da numanho Oją. ³⁰Nguetho n'datho a Oją, ne gätho to'o da hyan rá mate gätho 'da ni hocpada Oja u ne da zimanho, ne u yu israel, nε u hing yu israel. ³¹ Pε ha dí en ahu nte di muui yun t'edi Oją ngue dí ɛn ahu ga hạnthohu rá mate. Pe hin'na, pe man'da dí jąs'hu yún t'edi Oja ya, nangue ra Cristo rá mate Oja i fäxcahu.

Ran t'uti nangue ra Abraham

Xi a mam bombøtahu ra Abraham ngue dyu israelhu, 'be'a í hocpa yú ts'oqui Oja a tha, ne 'bε'a í 'yɛmbi xʉn ho a. ²Pε hinga gue'u 'be'a gätho bi 'yøt'e í t'embi xun ho a, nguetho nu'bu da gue u, ya mí ja 'be'a xtín 'yezehe 'bu. Pe hin te ín 'yɛx'a ra Abraham bu án nu Oja a. ³Pε tengu man rá t'ohni Oją, nu ra Abraham bi 'yęc'yei tho a ram hma 'bʉ mí xifi 'bɛ'a da 'yørpa Oja. Ne gue'a í 'yembi xun ho a buya. 4Nu'bu xtá xiju Oją ngue gue'a rá 'bɛfi ga øthʉ dí 'yɛnjʉ xʉn hoju a, pε hing ra mate thoho a dí 'yɛnju xun hoju 'bu, pɛ tengu'bu man zäbithohu a 'bu. ⁵Pε nu Oja hingui xiju n'da ra 'befi dí 'yenju xun hoju, nguetho hinguin zaqui ma mbuihu nangue ma ts'oquihu. Janangue'a i xiju ga hanthohu a rá mate di hoga ma ts'oquihu, ne gue'a dí 'yɛnju xun hoju a buya. ⁶Ne'a ra David ngubu bi 'yorpu ja rá t'ohni Oja maya'bu ngue:

> Emme di johya n'da ra ją'i ngue da 'yemp Oją xun ho, ne hin da 'yurpa ra güenda 'bu xun ho xtá 'yøt'e o hin'na.

⁷ Nguetho bi mba ma punbi yɨ ts'oqui, nɛ him man din c'a, bi 'yṣna.

⁸Ne ena:

Di johya u to'o bi mba ma hoqui yú ts'oqui nɛ nte da thịnba 'bu bi mba ma juanbi, bi 'yɛn'a ra David. ⁹Pɛ ha guím bɛmhbu ngue hønt'u am hmɛpya yú ja'i da nu na ran johya i hmangua. Ha hin guím bɛmhbu ngue nɛ u hin gam hmɛpya, da zin Oja, ngue'bu 'da'angu im bɛmhbu a ra Abraham 'bu mi hyantho a ra mate bi man Oja, nɛ gue'a í t'ɛmbi xun ho a buya. ¹⁰Pɛ ga än'nahu, ha m'bejua

ROMANOS 4 286

bi t'embi xun ho a ra Abraham, 'bu mi hmepya rá ja'i. Uague m'bet'o thoho bi t'ɛmbi xun ho. Pɛ hinga m'bεjua maha, pε 'bexque bi t'ɛmbi xun ho 'bu hin ní hyec rá ja'i. 11 Ne m'bejua bi sifi da hyec rá ja'i, ngue ra hmepya ya xí 'yemp Oja xun ho a. Pe bi 'yembi xun ho 'bu mi hyantho a ram hma 'bu hin ní hyec rá ja'i. Janangue'a i embi rá ta ra Abraham u to'o gätho i ɛc'yɛi tho a bi man Oja. Ne'u hing yu israel, ngue him bi mba nthequi yú ją'i, ne'u da t'embi xun ho u. ¹²Neju dyu israelhu gue dá hɛc ma ja'ihu, da'igu bu na 'yɛnju xun hoju Oja a ra Abraham, 'bu 'da'angu dím bemhbu ra Abraham 'bu hin ní hyec rá ja'i.

Ga hạmhbu rám hma Oją nangue ran jạpi i xiju

¹³Nε nu Oja bi mam majuani a da 'yørpa ra Abraham, ngue bi 'yembi: "Ga 'da'a ran jąpi ne'u nim bom'beto gätho ná ndoho ra ximhäi, ne ga 'da ahu ra 'da'yo häi," bi 'yemp Oja a ra Abraham. Pe hin nangue n'da ra 'bɛfi nín t'un na ran japi na, pε nangue bi t'εmbi xʉn ho 'bu mí hyantho na ram hma bi sifi. ¹⁴Pε nu'bu dím bɛmhbu gue gue'u yún t'εdi dí jap Oja n'da, pε dím bemhbu nte ní mba tho a man'da ran hogui 'bu, ngue ga hanthohu a rám hma, ne hin da zä di jacpahu Oją 'bu. 15 Nguetho nu'bu dí gna gue gue'u yún t'ɛdi Oja ga homhbu, o gue'u dí pasehu xcá øthu, pe dí festahu u, ne hønt'a ran unbi ga nuhu 'bu. Pε nu'bu hin xtín ja yun t'edi, o gue'bu hin xcá pasehu mbo ma mbuihu, hin xtí negui yu ts'ogui 'bu. ¹⁶Pε hingui ma nangue yún t'ędi dí jącpahu o gue'u dí pąsehu, nguetho hin xcá nuhu ran ho 'bu. Pε i ma ga hanthohu rám hma nangue rá mate, ne nubuya da zä majuani gätho gahu ga nuhu ran ho bi sih ra Abraham da nu yúm bom'beto. Ne madague'bu njuantho dyum bom'betoju ra Abraham o hin'na, pε 'da'angu dím bɛmhbu ra Abraham. Janangue'a ma tahu ra Abraham bu nam ben Oja. 17 Ne gue'a nam bøn'a mí xi Oja ra Abraham 'bu mí 'yɛmbi: "Nu'i grá Abraham, ga øt'e'e ngue grá ta xun ngu nim bom'beto gätho nan ndoho ra ximhäi." Ne nu'a ra Abraham bi hvan'a ram hma bi sifi, nguetho bi bądi jase rá ts'edi Oją, gue da zä di un ra ts'edi u xun dac'yei ne u xun du. Νε tengu'bu ya bin ja 'bu mí ma Oja, nguetho majuani da 'yøt'e. Nε gue'a bi bεn'a ra Abraham. ¹⁸Νε nu ra Abraham him mi sä xtín ta nangue u yúm bom'beto dim 'bui. Pε bi hyạn a ram hma 'bu mi sifi: "Xʉn ngu nim bom'bɛto dim 'bʉi gätho nan ndoho ra ximhäi." Ne bi dø'mi din ja, janangue'a bin ja buya. 19 Nε madague'bu xí thoh yu pa i 'bui ngue xtím 'buh yú t'uhni, nguetho ya xí ndø, xí mbe'ts'a n'da ciento njeya, ne 'da'angu xín dac'yeiui a rá xisu ra Sara, him mí sä xtím 'buh yú t'uhni, pe him bi 'beh rá ts'edi rá t'ec'yei, bi badi majuani dim 'buh rá t'uhni. ²⁰Νε xingui ts'u bi bɛni ngue hin da 'yøt' Oja a bi ma, nguetho bi badi hingui hemp'a da 'yøt' Oja. Janangue'a bi hyan rá ts'edi Oja a buya, ne gue'a í 'yɛspa Oją a. 21 Ne n'dat'a mim beni ngue jase rá ts'edi Oja di ja'ts'a bi ma. ²²Nɛ nu'a bi hyantho a ram hma 'bu mí sifi 'bɛ'a da 'yørpa Oja, nɛ gue'a í hocpa Oja a, nɛ bi 'yɛmbi xun ho, i ɛm bu ja rám hman Oja. ²³Pɛ hinga hønt'a ra Abraham bi t'ɛmbi xun ho 'bu mi hyantho a ram hma bi man Oja. ²⁴Pɛ nɛju, bi hogahu Oja nɛ bi 'yɛnju xun hoju 'bu má hanthohu a ram hma bi xiju Oja, ngue bi xox'a ma Hmuhu ra Jesús 'bu mi du. ²⁵Nu'a bi un rá te bi gurca ma ts'oquihu, nɛ bi t'ägui. Nɛ bi xox Oja a, janangue'a dí pahmbu majuani bi daha bi xogahu.

Dí yamanhohu Oja nguetho bi pungahu rá Ts'unt'u

Bi hogahu Oją 'bu má hạmhbu rán hoqui bi ma. Midín suhmbu Oja, pe nuya dí yamanhohu, ngue bi hogahu ma Hmuhu ra Jesucristo. ²Nε bi zixcahu ra Jesucristo bu i ja rá mate Oją, nguetho dá hąmhbu rán hogui, ne dí 'buhmbu bu. Ne dadín johyahu gue dí tømhbu a ran ho tate thoho da 'yørcahu. ³Ne hinga hønt'a ran ho dí tømhbu nán johyahu ya, pe ne u yun unbi dín nuhu ya, guexta'a dadin johyahu. Nguetho nu'u yun unbi ní jaju ga häthu xun ho u. 4Ne nu'bu dí häthu xun ho, gue'a dín te ma mbuihu a. Nε nu'bu bin te ma mbuihu, gue'a ná tømhbu a ran ho di 'daju Oja buya. ⁵Nε dí pahmbu hin da hyäju Oja nangue ran ho dí tømhbu, nguetho di huggahu. Ng nu'a rá Hogandahi bi 'daju, di jaju dí sähu rán hugcate Oją gmmg xun ngu. 6Ng him mí sä xcán yanse ma tesehu, nguetho bi güendga ma mbuihu

nangue ma ts'oquihu. Pe bi du ra Cristo 'bu mi zøn ra pa bi man Oja, ngue bi yanju dyu ts'om'bäihu. ⁷Pe hinga ngubu rán hugcate n'da ra ja'i, hønt'bu ra hocja'i rá amigo, da nde di 'bɛh rá te ngue xtán yan a, pe nu'bu ra ts'om'bäi, hin da nde di 'bɛh rá te 'bu. 8Pɛ nu Oja i urcahu tạte thoho xun ho rán hugcate, nguetho hin dyu hocjąlihu, ρε bi du ra Cristo bi yanju 'bu man dyú ts'om'bäihu. 9Nuya bi hoga ma ts'oquihu nangue rá ji ra Jesucristo, ne bi zimanhoju Oja. Janangue'a dí pahmbu majuani da vanju ra Jesucristo nangue rá cue Oja 'bu rán zegui. 10 Ne nu'bu midín suhmbu Oja, pe bi hogahu rá Ts'unt'u zehe 'bu mi du. Ne i 'buh ya, janangue'a bi zä di thoqui di 'daju ra hogambui ya, ne da xoxcahu 'bu rán zegui. 11 Pe ne a i ørcahu ya dadín johyahu nangue dadín amigohu Oją ya. Nguetho bi 'uegahu 'bɛ'a midín suhmbu Oja a ma Hmuhu ra Jesucristo.

Ra Adán bim pommi ra Jesucristo

12 Pε n'datho maha ran 'yohu bi dump' ra ts'oqui ua ja ra ximhäi, gue nu ra Adán. Nε bi dump' ran date nangue rá ts'oqui a buya. Nε gue'a gätho ran date bi thoc'u yu ja'i a buya. Nguetho tengu'bu 'dat'a dá øthu ra ts'oqui ra Adán. 13-14 Nε ngutho bin ja u bi xand ra Adán, guehma bi du nangue yú ts'oqui, madague'bu him bi si'a n'da ran t'ɛdi tengu bi sih ra Adán. Gue gätho yu ja'i mi 'bu 'bu him mi hman yún t'ɛdi Oja, gue hin nám 'buh ra Moisés, pɛ bi du, nguetho yú hmu a ra Adán. Pɛ bi zøh man'da ra

hmu ngue rám poniui ra Adán, nu'a ra Jesucristo a, gue mí hma ba ɛhɛ. ¹⁵Pε n'dan'yo thoho bi 'yøt' ra Adán nε ra Jesucristo. Nu'a ra Adán, bi un ran date gätho yu ja'i, nangue rá ts'oqui a. Pε nu ra Jesucristo emme man'da xun ngu rá ts'edi, nguetho rá mate zehe bi punga ma ts'oquihu hønt'a go to'o da hyan a. Ne gue'a rán t'unni Oja bi 'daju. ¹⁶N'dat'a rá ts'ogui ra Adán, ín unba yu ja'i. Pe nu ra Cristo bi gut'i xun ngu yu ts'oqui nangue rá mate zehe, janangue'a da zä da xocpa yu ja'i. ¹⁷Ne nangue ra ts'oqui bi 'yøt'a n'da ra ja'i ngue ra Adán, gue'a án ja rá ts'edi ran date a nangue gätho yu ja'i a buya. Pε nu to'o gätho da hyạn rá mate Oją, da mba ma hoqui yú mbui, 'darpu dim hmuhu a ra Jesucristo, ne din ja bu dim 'buhmbu gätho yu pa mazai. ¹⁸Nu'u bi xant'a ra Adán gätho bi ts'änba ran unbi nangue rá ts'oqui ra Adán. Pε nu ran ho bi 'yøt'a ra Jesucristo, da zä da xocpa yu ją'i, ne di un ra temazai. ¹⁹ Nu'a ra Adán bi mbesta'a rám hman Oja, gue'a ín ts'om'bäi gätho u bi xandi. Pe nu ra Jesucristo 'bu mi 'yøt'a bi man Oja, gue'a ín hocją'i u to'o gätho bi xant'a. 20 Nu Oja bi un yún t'edi, da fadi emme xun ngu yu ts'oqui i ja. Nguetho nu'bu dí pahmbu ngue emme xun ngu yu ts'oqui i jaju, ga pahmbu buya, emme man'da xun ndoho rán huscate Oją ngue di pungahu. ²¹Tengu thoho a ra ts'oqui bim hmu, nε mí nde xtí 'daju ran date. Νε ngutho a rá mate Oja, bim hmu ne gue'a bi pungahu, ne bi 'yenju xun hoju, nε di 'daju ra te mazai nangue ma Hmuhu ra Jesucristo.

Bi 'berca man 'yomfenisehu a rán dạte ra Cristo

'Be'a maha gam bemhbu buya, ha ga thoqui ga øthu yu ts'oqui 'bu, n'dahma man'da xtán ndoho rán hugcate Oja di pungahu. ²Pe hingui sähma ngubu gam bemhbu, ngue xø ga thoqui ga øthu yu ts'oqui. Pegue dín jahu tengu n'da ra du hingui ø 'bu sifi da 'yøt' yu ts'oqui. Hague dán zä ga thoqui ga øthu yu ts'oqui 'bu. ³Ha hin dím bɛmhbʉ 'bɛ'a nám bøn'a ran xixya dí øthu. Nám bøni bi 'berca ma ts'on 'yomfenihu 'bu mí du ra Cristo. ⁴Nε nu'a ran xixva nam bøni bi t'ä a ma ts'on 'yomfenihu 'bu mí t'ä a ra Cristo. Nε bi 'daju ran 'yomfεni ma'da'yo 'bu mi xoxa rá Ta nangue rá ts'edi mixte. Janangue'a bi zä 'darbu dí 'buhmbu bu ja ra 'da'yote ne dí øthu yún thehu a. 5 Nu'bu mí du ra Cristo, ne'a ma ts'on 'yomfenihu bi du buya. Janangue'a nu'bu mi xox Oja a ra Cristo, dám 'buhmbu ma'da'yo ne ma'da'yo dim bemhbu ya. 6Ne dí pąhmbu tengu'bu mi mba ma cuati ma ts'on 'yomfenihu bu ja ra pont'i 'bu mi du bu ra Cristo. Janangue'a bi thacpa rá ts'edi man 'yomfenisehu, ngue hin di mandagahu yu ts'oqui. ⁷Nguetho tengu'bu n'da ra du, ya him ma 'yøt' ra ts'oqui, pε ya bi mba ma thøgue bu ja rá ts'edi ra ts'oqui. 8Bi du ma ts'on 'yomfenihu nangue bi du ra Cristo, janangue'a dí pahmbu 'darbu dí 'buhmbu ra Cristo ya. ⁹Ne dí pahmbu ngue bi ndants' mahøn'a ra Cristo 'bu mi du, nε him man'dandi da du

mahøn'a, him man ja rá ts'edi ran dąte mahøn'a nangue ra Cristo. ¹⁰Nguetho má zät'a n'dandį bi du ra Cristo nangue ma ts'oquihu, nε nuya nám 'bui di japi da fạh rá ts'edi Oją ya. ¹¹ Janangue'a i jatho ga pahmbu tengu'bu dá tuhu nguetho bi thągahu rá ts'edi ra ts'oqui nangueju, nε hin dín nde ga øhmbu yu ts'oqui ya. Νε nuya nám 'buhmbu dí jafu da fah rá ts'edi Oja, nangue ra Cristo Jesús dí 'buhmbu. 12 Janangue'a hingui sä dan hyehmbu ngue di mandagahu ra ts'oqui mahøn'a, ngue di 'becpahu ga øthu 'be'a im mam man 'yomfenisehu. ¹³Ne hingui sä ga un ma ja'ihu da 'yøt' yúm pefi ra zįthu, ngue ga øthu yu ts'oqui. Pegue dan unsehu bu 'bu Oja ngue bi 'daju ra 'da'yote 'bu mí du man 'yomfenisehu. Ne ga un ma ją'ihu da 'yøt' yúm pefi Oją, ngue ga øthu ran ho. 14 Nε hin man sähu di mandagahu ra ts'oqui ya, nguetho dín 'yohu a rá mate Oją ngue di zerca ma mbuihu. Ne hin di mandagahu yún t'ɛdi Oją, nu'u hingui sä di zerca ma mbuihu u.

Hin ga ɛc'yɛihu yu ts'oqui, pɛ ga ɛc'yɛihu Oja

15Pɛ nu'bu rá mate thoho Oją dín 'yohu ya, nɛ hin di mandagahu yun t'edi Oja, ha da zä ga øthu yu ts'oqui 'bu. Pɛ hingui sä ngubu gam bɛmhbu. 16Ha hin dí pahmbu nu'bu dadí däp ma mbuihu a n'da ra hmu ngue ga ørpahu rá 'bɛfi, ma hmuhu a 'bu, nɛ dí tɛnhdu a buya. Nu'bu gue'a ra ts'oqui ma hmuhu, hønt'a ran unbi mazai di 'daju a. Pɛ nu'bu da gue'a Oja ma hmuhu, dí øthu a

i xiju, nε di 'daju ra hogambui, nε dam 'bumanhohu a Oja gätho yu pa buya. ¹⁷Pε jamadi Oją nangue ahu. Nε madague'bu gá pεp ni hmuhu ra ts'oqui mám'bet'o, pe nuya i ja ni pähä gui thoctahu 'bɛ'a bi 'yut'ahu 'bu gmín dähu bu ja rán xädi Oją. ¹⁸Ne bi mba njuc'i ahu nangue rá ts'edi ra ts'oqui, janangue'a guín 'yɛhɛhu rá ts'edi ran ho ya. 19 Dí xi ahu yun t'uti, n'dahma hingui hei bu dí pahmbu. Ngue tengu bu dán dähu bu ja yu ts'oqui, gue dá øthu gätho yun ts'o dím bemhbu. Pε ngutho ya, mbähä dan dähu bu ja ran ho, gue dam 'buhmbu ga øthu gätho rá hoga'befi Oja. ²⁰Pe nu mám'bɛt'o xíngui ts'u mí ndehu ran ho 'bu mín 'yehehu yu ts'oqui. ²¹Pe nte mán ho bi bøn'a ma 'befi dá øthu. Ne nuya dí pes' ma sähu 'bu dím bemhbu 'be'a dá øthu mam'bɛt'o, nɛ gue'u mí sixcahu bu ja ran unbi mazai u. 22 Ne nuya bi mba njuguigahu nangue rá ts'edi ra ts'oqui, ne dín 'yehehu bu 'bu Oją ya. Janangue'a man'da da hnurca ma hoga 'befihu bu. Ne i ts'ixcahu bu dan zamhbu bu, gätho yu pa mazai. 23 Nu'a rán zäbi da da u to'o øt' yu ts'oqui, ran unbi mazai a. Pe nu'u to'o i 'buhmbu ra Cristo Jesús ma Hmuhu, di unda Oją ra te maząi u, ne hingui jut'u.

Tengu'bu dán thạthu ra Cristo

Ma zi cu ahu, ga xi ahu n'da ran t'uti ya. Guim bɛmhbu hague in ja u yun t'ɛdi, di manda n'da 'bu i 'bui, pɛ nu'bu bi du, ya ma hin'na. ²Tengu'bu n'da ran 'yohu i 'buh rá xisu. Nɛ nu rá xisu i jatho din zammi a rá ndø gätho

ROMANOS 7 290

yu pa i 'bui. Pε nu'bu bi du rá ndø, him man zä di manda a rá xisu. 3Pe nu'bu hinga na tu rá ndø, ne nu'bu dim 'buhmi man'da ran 'yohu ra xisu, da t'embi ra 'yomt'eni 'bu. Pe nu'bu bi du rá ndø, bi mba ma thøgue bu mi 'buhmi rá ndø. Nuya da zä dim 'buhmi a man'da ran 'yohu, ne hin da t'embi ra 'yomt'eni buya. 4N'da ran t'uti nangueju, ngue bi mba ma thøguegahu nangue ma hmuhu mí 'buhmbu, ngue yún t'edi Oja, nguetho tengu'bu dá tuhu 'bu mi du ra Cristo. Nε gue'a ma hmuhu dán thathu 'bu mí xox Oja a ya. Ne 'darbu dí 'buhmbu a ya, pe gue'a ní zä ga øthu xun ho rá 'befi Oja ya. ⁵Pε nu'bu mi 'buthohu a man 'yomfenisehu emme xøt yu ts'oqui midí hohu. Janangue'a nu'bu mi xiju u yún t'ɛdi Oja ngue hin ga øthu u dí numanhosehu, man'da dá øthu u buya. Ne nu'u bin ja ma 'befihu, ran date ne ran unbi a buya. 6Pε nuya ma thøguegahu nangue u yún t'edi Oja nguetho bi du man 'yomfenisehu mi pa ma hecpi. Janangue'a dí ørpahu rá 'befi Oją ya, nangue ma'da'yo ra ts'ɛdi, nε gue'a rá Hogandahi Oja a. Νε hin dí tenthohohu u maya'bu nt'o't'i nangue yún t'edi Oja.

Nán c'ą ma ts'oquihu u yún t'ędi Oją

⁷'Bɛ'a gam bɛmhbu buya, ha ga ɛmfu hingui ho u yún t'ɛdi Oją. Hin'na maha, xun ho yún t'ɛdi Oją, nguetho gue'a dá pacä ngue i ja ma ts'oquigä. Nugä hin jam'bu xcá pacä gue dí øt' ra ts'oqui ngue ran ts'ɛya. Pɛ nu'bu má bɛngä a ran t'ɛdi ngue i ɛna: "O gadí sɛyaba ni mija'iui," ja

dá pacä i ja ma ts'oqui. ⁸Pe nu'bu má bengä 'be'a man na rán t'edi Oja, man'da dá øt'ä ran ts'eya mí o ma mbuigä buya. Pε nu'bu hin xcá cu't' ma mbui a ran t'edi, hin xtí nequi xun ho yu ts'oqui o ma mbuigä 'bu. 9 Janangue'a nu'bu him ma ná bengä nangue rán t'edi Oja, him mi pacä ngue drá ts'om'bäigä. Xø mi 'butho, dá bεnsε ngue xun hogä. Pε nu'bu má bengä nangue'a ran ho xcá øt'ä, dá festä a. Ne ja dá pacä buya ngue ran date mazai a man zäbi. ¹⁰ Janangue'a nu yú hogant'edi Oja, ngue xtí 'dac ra te 'bu xcá ja'ts'ä u, pe nangue hin dá ja'ts'ä u, mí ja xtí 'dac ran date. ¹¹Nɛ mí ɛngä xcám 'bumanho nangue yún t'edi Oja. Pe bi mu't'u yun t'edi a ma ts'oqui, janangue'a mí ja xtí ungä u yún t'edi Oja buya. ¹²Pe xun hohma u yún t'edi Oja, ne n'da ngu n'da ran t'ɛdi gätho xʉn hotho u, ne i ma nangue rá pähä Oją u, nε hin hapu di 'bεdi. 13 Pε ha gue'a rá hogant'ędi Oją í zixcä bu ja ran date 'bu. Hin'na. Pe nu'u yun t'edi nán c'a ma ts'oqui i o ma mbuigä, ngue n'dan'yo thoho dí øt'ä. Ne mí ja xtí 'dac ran unbi nangue a. Da zä ga pahmbu buya ngue majuani xun ts'o u ma ts'oquihu, nguetho di jap'a rá hogant'edi Oja da 'yørcahu ran unbi.

I ørcahu ran sui a man 'yomfenisehu

¹⁴Dí pąhmbu bi man yún t'ędi Oją a rá Hogandahi. Pɛ n'dan'yo thoho dím bɛmhbu. Nugä dán däsɛ bu ja ra ts'oqui, nɛ dá øt' ma hmu a. ¹⁵Pɛ xíngui ts'u dí pacä 'bɛ'a dí øt'ä, nguetho hin dí øt'ä a majuani dín nde. Pɛ nu'a xíngui ts'u dí numanho,

go dí øt'ä a. 16 Ne dín juan zehegä 'bu hin dí øt'ä yún t'edi Oja, pe nu'a nán juan zehegä gue'a ná pącä xun ho yún t'ɛdi Oja a bʉya. ¹⁷Pɛ hinga guecä dí øt'ä 'bu dí øt'a xun ts'o, pegue ma nyon 'yomfenigä i 'bupu mbo ma mbuigă gue'a di 'becpi ga øt'ä a. 18 Ne dí pacä ngue nu ma nyon 'yomfenigä, hin te manho i ja. Dín ndehma thocpa thoho ga øt'ran ho, pε ja'bu hingui sä. ¹⁹Dín nde ga øt'ä ran ho, pe hin dí øt'ä a, ne hin dín nde ga øt' ran ts'o, pε go dí øt'ä a. 20 Nubuya, dí pądi ngue hinga guecä dá øt'ä a him ma pähä 'bu dí øt'e, pegue gue'u yu ts'oqui o ma mbuigä. 21 Νε njabu dí øt'ä, ngue nu'bu dín nde ga øt'ä ran ho, pe man'da hingui hei ga øt'ä yu ts'oqui. ²²Νε nu'a ε ma mbʉigä, gue εmmε dadí hohma a rán t'εdi Oja. ²³Pε dín nugä man'da ran t'ɛdi gue rán t'ędi ra ts'oqui i o ma ją'igä, ngue din suhmi a rá hogant'ędi Oją ngue dí numanhogä. Nguetho ne'a xø in nde da xiqui ga ørpa rá pähä. 24Pe í hughi mahagä nangue ma nyon 'yomfenisegä, i ørca ran sui, in nde da zixcä bu ja ran date, ngue gätho yu dumbui gätho yu pa mazai. To'o maha da zä da yangui. ²⁵Pɛ jamadi Oja, da yangui nangue ma Hmuhu ra Jesucristo. Ne nuya dí ørpa rán t'edi Oja nangue ma 'da'yon 'yomfenigä, madague'bu numanho ra ts'oqui a ma nyon 'yomfenigä.

Hønt'a rá Hogandahi Oja nám 'bʉhmbʉ ya

Janangue'a, nuya, hin te da gugbahu a rá muui a ma ts'oquihu, nguetho dí 'buhmbu ra Cristo Jesús, ne hin dím bemhbu

man 'yomfenisehu ya, pe dím bemhbu rá Hogandahi Oja. ²Dí comhbu ra 'da'yote ra Cristo Jesús nangue rá ts'edi rá Hogandahi Oja. Nε gue'a í thøgahu bu ja rá ts'εdi ra ts'oqui, ngue mí ena xtí 'daju ran unbi mazai. ³Nu yún t'ɛdi Oja hin dá hät'i dá øthu, janangue'a him bi zä bi 'daju ra hogambui u guepu xtá numanhoju Oja. Pegue bi 'dactahu ra hogambui Oja 'bu mam bá penhua rá Ts'unt'u zehe, ngue bin ją'i a, tengu'bu n'da ma mi ts'om'bäihu, bin däse, bi nu ran unbi nangue ma ts'oquihu. Ne gue'a í yanju nangue ra ts'oqui midí mandagahu. ⁴Ne gue'a í zä bi 'daju ra hogambui tenguthoho 'bu dá jąs'hu yún t'ędi bu án nuju Oja. Janangue'a hin dím bɛmhbu man 'yomfenisehu ya, pe nuya hønt'a rá Hogandahi Oja dím bemhbu ya. ⁵Pε nu'a to'o 'bʉi nangue rán 'yomfenise, im beni da 'yøt'e 'be'a i numanhosε, pε nu'a to'o i 'bui nangue rá Hogandahi Oja, im ben a rán 'yomfɛni Oja di un'na rá Hogandahi. ⁶Ne nu'a to'o i ten'na rán 'yomfenise, ra dumbui a ngue gätho yu pa ne ran unbi mazai. Pe nu'a to i ten rá Hogandahi Oja, ra te a ne ran johya gätho yu pa mazai. ⁷Nguetho nu man 'yomfɛnisɛhʉ rán suiui Oja a, ne hin jam'bu da hyät'i da 'yøt'u yún t'edi Oją, ne hingui nde da 'yøt'u. ⁸Janangue'a nu'u to'o i ten thoho yún 'yomfenise, hingui hät'i da 'yøt'a i numanho Oja u. ⁹Pe nuju hin dím bemhbu a man 'yomfɛnisɛhu ya, nguetho 'bupu mbo ma mbuihu a rá Hogandahi Oja. Pe nu'bu 'bu a n'da hingui 'buhmi rá Hogandahi ra Cristo, hin

ROMANOS 8 292

te rán jaui ra Cristo a 'bu. 10 Νε madague'bu o tho ran u ne ran date ma ją'ihu nangue ma ts'oquihu, pε nangue ra Cristo i 'bupu mbo ma mbuihu, dí 'bumanhohu ngue ya bi hogahu Oja. 11 Ne nu'bu 'bupu mbo ma mbuihu rá Hogandahi Oja, gue n'dat'a rá Hogandahi bi xox'a ra Cristo Jesús 'bu mi du, janangue'a ne'a ma ja'ihu di un ra 'da'yote 'bu bi xoxcahu. 12 Janangue'a ma zi cu ahu, hin'yu ran t'edi ga tenhdu a man 'yomfenisehu ngue rá pähä ma ngøc'yeihu. ¹³Nguetho nu'bu dí øthu rá pähä man 'yomfenisehu, ga tuhu 'bu. Pe nu'bu thocpa thoho dan samzehehu nangue rá Hogandahi Oja, tengu'bu ga hosehu man 'yomfenisehu, ne dam 'buhmbu 'bu. ¹⁴Nguetho nu'u din uni di manda rá Hogandahi Oja, hønt'u yú t'uhni Oja u. ¹⁵Nɛ nu rá Hogandahi Oja dá hamhbu hin di jaju dan suhu mahøn'a. Ne hinga ngu 'bu min 'yehehu bu ja yu ts'oqui min suhu bu. Pe bi zinju yú t'uhnigahu a, nangue rá Hogandahi. Janangue'a, "ma zi Ta ahe," dí ɛmfu Oja ya. ¹⁶Ne nu rá Hogandahi Oja di benga ma mbuihu, gue majuani yú t'uhnigahu Oją. ¹⁷Nε nangue yú t'uhnigahu Oja, ga comhbu rá herencia Oja bin t'un ra Cristo. Nguetho nu'bu ga comhbu rán unbi ra Cristo, ne ga comhbu rá herencia bu bí ja rá ts'edi buya.

Ne'a ma ngoc'yeihu di pärcahu Oja

¹⁸Pe gam bemhbu emme zi ts'utho ran unbi dín nuhu ya, pe nu'u yun ho gan nuhu m'bejua emme mixte thoho. ¹⁹Ne gätho 'be'a bi 'yøt' Oją emme i tø'mi 'be'a da t'ørpa u 'bu

bi zøn ra pa din t'un yun ho mixte thoho u yú t'uhni Oją. ²⁰Nguetho nu 'bɛ'a gätho bi 'yøt' Oją, gätho him bi gohi xun ho, pε hin yú ts'oquizehe u, pe nangue rá ts'oqui ra Adán. Pe bi zänd Oja gue hin da gohi xun ho ra ximhäi, nguetho ndep'u yu ja'i da hyon'a ran ho da 'yørpa 'bʉ m'bɛjua. ²¹Nguetho nu yʉ ximhäi bi 'yøt' Oja, gätho da mba ma hoqui nangue'a ran ts'oni bin ja, ngue him man ja yu 'yanthi ne yun unbi, ne 'be'a gä i ja. Ne gätho u 'dat'a da mba ma hoquigahu yú t'uhnigahu Oja, 'bu bi pärca ma ja'ihu. ²²Nguetho dí pahmbu gätho 'bɛ'a bi 'yøt' Oja, tengu'bu gätho 'da na mbahni thoho gue'bu go maya'bu ne asta guehya, tengu'bu xun u, ne tu yú mbui, tengu'bu in nde dim 'buh rá 'uɛre n'da ra xisu. ²³Nesegahu tengu thoho 'bʉ 'da na mbahni thohohu gätho 'bɛ'a i ja, madague'bu bi du'mi bi ts'inju ya, gue dí 'buhmbu rá Hogandahi Oja, gue'a rá mbudi a ran ho da 'yørcahu Oja. Pe dí sähu ran u nangue ma mbuihu gätho yu pa dín dø'matehu ua, gue'bu go ne'a ma ngøc'yeihu da yangahu. 24Ne gue'a dá pąhmbu 'bu mí zinju, ngue him 'bex da mba mahoqui gätho ma ngøc'yɛihʉ. Janangue'a dí tømhbʉ ya. Ρε nu'bʉ 'bexque xcá nuhu a dí tømhbu, ya hin di tømhbu a ya 'bu, ne hingui jatho ga tømhbu a ya bin ja. 25 Pe nuya dí tømhbu a hinga nan ja, ne dí häthu yun unbi, gue'bu go bi päju xun ho Oja. 26 Νε gätho yu pa dín dømthohohu, di zeju rá Hogandahi Oja, nguetho xun güent'igahu, gue hin dí pahmbu dan yahu Oja xun

ho, ja'bu dí cąstahu bu nam bɛn Oją. Pɛ guesɛ rá Hogandąhi i yaui a Oja bu ja ma mbuihu 'bu dí yahu a. ²⁷Nɛ nu Oja di asca ma mbuihu 'bu dí yahu a. Nɛ i padi 'bɛ'a dí äfu, nguetho din thɛui rá pähä zɛhɛ a bi bɛngahu rá Hogandahi Oja.

Pε dí tạfʉ xʉn ho yʉn ʉnbi nangue ra Cristo

²⁸Nε dí pahmbu di jap Oja dí 'yørcahu ran ho a 'bɛ'a gä dí thohmbu ua, ngue nuju emme dí numanhohu a Oją. Nguetho ya bi zänni 'bepu dá cohmbu m'bejua. ²⁹Ngue nu'u to'o bi huanh Oja mam'bɛt'o, guet'u bi zänni da gohi tengu rá Ts'unt'u zehe. Janangue'a dim 'bɛt'o rá Ts'unt'u zehe ngue xun ngu yú cu dim 'bejua. 30 Ne nu'u bi zänd Oja mám'bet'o, ne guet'u in zonh Oja u ya ngue da yurpu bí 'bui. Ne nu'u in zonh Oja, gue'u i ɛmbi xun ho u ya, ngue bi hocpa yú ts'oqui. Nε guet'u da gohi tengu rá Ts'unt'u zehe. 31 'Be'a gam bemhbu buya, nguetho guese Oja i numanhoju. To'o maha da zä da 'yørcahu ran ts'o. 32 Nu Oją xínga gue rá Ts'unt'u zehe bi huegui, pe bi däp ran date nangueju. Janangue'a gätho di 'daju 'bɛ'a i ja, nte da gøngahu. 33 Pe nuju to'o maha a da xi Oja ngue hingui ho dí øthu, ngue yú thahnigahu Oją. Nguetho guese Oją thocpa thoho di hoga ma ts'oquihu. ³⁴To'o gue da zä da xi Oja ngue dan unbahu nangue ma ts'oquihu, nguetho guese ra Cristo bi du, bi nu ran unbi nangueju, ne xø bi xox Oja buya, ne bí 'bupu guepu i conhui rá ts'edi Oją. Ne thocpa thoho i äp rá mate Oja

nangueju. ³⁵'Bɛ'a maha da zä di 'uegahu, gue hin gan nuhu a rán huɛcate ra Cristo. Ha gue'u yun unbi, uague yu dumbui, uague yun ucpi, uague ra thuhu, uague ra 'yahe, ua gue'bu nts'utho hapu dí 'yohu, uague da thoju nangue ra juai. Ha gam bɛmhbu ngue hin di huɛgahu ra Cristo 'bu dín nuhu u. ³⁶Pɛ hin'na, nguetho ya nt'o't'i:

Thocpa thoho t'ena da thoju nangue Oją dí ęc'yeihu, nε im bęni tengu'bu dyu de'yohu gue nts'änni da tho. ³⁷Pε nu gätho yʉn ʉnbi, dí tafʉ xʉn ho, nangue ra Cristo di huggahu. 38 Ne dí pąhmbu majuąni hin'yu n'da ra ts'ɛdi da zä di 'uegahʉ gue hin ga nuhu a rán hugcate ra Cristo. Xínga guehya gue dí 'buhmbu, ne xínga gue'bu dá tuhu. Ne xínga gue'a n'da rám 'bɛhni Oja mahɛts'i, ne xínga gue'a n'da rám 'behni ra zithu, xínga gue man'da ra ts'edi. Nε xínga gue'a 'bε'a gätho i ja ya, o din ja nixudi o nimani, da zä di 'uegahu. 39 Ne xínga gue'u 'bupu mahets'i, ne xínga gue'u 'bucua ja ra häi, ne hin'yu 'be'a gätho i ja ngue da zä di 'uegahu gue hin ga nuhu rán hugcate Oją i ørcahu ra Cristo Jesús ma Hmuhu, nguetho gätho bi 'yøzehe Oja u.

Bi huand Oją yu israel maya'bu

9 Nu ra Cristo dí 'bʉ'be, i pądi majuąni dí xi ahʉ ya, ngue εmmε dadí huɛcmahagä ma mijudíohe yʉ israel. Pε nε'a rá Hogandąhi Oją i xicpa ma mbʉi ngue majuạni dím mangä. ²Nε thocpa thoho dín nu ran ʉnbi ngue ma mbʉi nɛ εmmε tu ma mbʉi

ROMANOS 9 294

nangue ma mijudíohe. ³'Be'a sä ga øt'ä ngue xtím pø'u ma mi'israelhe. Ha ga xi Oją di 'berca ma te ngue njam'bu ga nu ra Cristo. Ngue gue'a ga øt'ä 'bu gue'a dí pø u. 4Nguetho nuje dyu israelhe bi thahn ma ngurpa bøtahe ngue bi nde dyu t'uhni Ojąje, ne bi nu rá Thai Oją ma bøtahe nε bi bąh pʉya ngue Oją mí 'buhmbu. Ne gue'u bi 'yøthu ran hoqui a Oja u, ne gue'u bin t'un yún t'edi Oja nangue 'bepu dám 'bumanhohe. Nε bi sih yun t'øt'e dí dạnde Oją. Ne bi sih majuạni nangue 'bɛ'a gä da 'yørpe. ⁵Nɛ nu'ʉ ma mi'israelhe i 'buh ya, yú t'uhni ndu ma ngurpa bombøtahe ngue bin yaui Oja maya'bu. Νε guet'u yu israel bu ám 'bu'a ra Cristo 'bu min ją'i ua ja ra ximhäi. Pegue Oja a, rá Hmu ngue gätho 'bɛ'a i ja, janangue'a gätho yʉ pa mazại ga numansuhu a. Ne hønt'a gam bεmhbu a ya. 6Pε xun ngu hingui εc'yεi u ma mijudíohe yu israel. Pε hin gam bemhbu ngue bi zepu a bi man Oja, ngue hin di ja'ts'a ran hoqui bi ma. Pegue gam bemhbu ngue'a hinga gätho majuani yu israel u yú t'uhni ra Israel bu nam ben Oją, gue'bu mí ma di jąp yu israel. ⁷Ne hinga gätho yú t'uhni ra Abraham bu nam ben Oja u bim 'bui, pe hønt'a bi xi a Oja ngue dim 'bui. Tengu bi man Oją: "Pε hønt'u di xant'a ra Isaac, ngue ni ts'unt'u, ga ɛmbi ni t'uhni," bi 'yɛmp Oją a. ⁸Nu'a in nde da 'yurcahu ngue njo'o n'da rá t'uhni Oja bim 'bui nangue rá ta o gue rá mbe. Pe hønt'u bim 'bui nangue'a bi man Oją, da 'yεmbi yú t'uhni. 9Nε guehna bi xi a Oja a ra Abraham:

"Ni jeya, tengu ya, ga ut'aui ma ts'edi ne din ja a dí xi i, gue dim 'bu a n'da rá ts'unt'u ra Sara," bi 'yɛmp Oja a. 10 Nɛ ngutho nangue yú ts'unt'u ra Isaac, Oja bi ma nda'a da numanho. Bin ja ngue bim 'bʉ i yoho yú ts'unt'u ra Rebeca, nangue a ra Isaac a rá ta u. 11 Pe nu'bu hin ním 'bu u yoho, hin ní 'yøt' ran ho, nε xín ni 'yøt' ran ts'o, pε Oja mí sänni 'bɛ'a din jap'ʉ. Janangue'a bi zä bi japi nda'a bi nde di japi, nangue bi ndese, ne hin nangue yún t'øt'e bi 'yøt'u. ¹²Nɛ nu'bʉ hin ním 'buh yú t'uhni, bi xi Oja a ra Rebeca: "Nu'a m'bɛt'o dim 'bʉi, din 'yɛhɛ nangue'a m'bejua dim 'bʉi." ¹³Nɛ tengu nt'o't'i, man'da ram hma i ena: "Dá numanho a ra Jacob ngue ra Israel, pε nu ra Esaú hin dá numanho," bi 'yɛn Oja. 14 Xiya, ha gam bemhbu hingui ho 'be'a bi 'yøt' Oja, ngue bi huahna n'da, ne hin'na a man'da. Pe hingui sä ga emhbu hingui ho øt' Oją. 15 Pε tengu bi xi Oją a ra Moisés: "Ga un ra mate to'o dín nde ga unni, ne ga huequi to'o dín nde ga huɛqui," bi 'yɛn Oja. ¹⁶Dí pąhmbu ya, nangue in ndesε Oja di un rá mate ne hin nangue bi ndesε n'da, o gue bi 'yøt' yʉn t'øt'e ngue bi beni dí dah rán japi Oja. ¹⁷Nε tengu bi man ra t'ohni, bi sih ra ts'ut'abi bu Egipto, ngue ra Faraón: "Dá sän'ni i ngue gan ts'ut'abi, ne ga mep'a ni mbui ngue hin gui 'yøt'a ga xi i. N'dahma da zä ga ut'a ma ts'edi 'bu ga penh yu 'yanthi bu ja ni häi. Ne da farca ma ts'edigä gätho na ngʉni ra ximhäi buya," bi 'yɛn Oją. 18 Janangue'a ga pahmbu ya, Oja di un rá mate to'o in ndese di unni, ne guese Oja

295 ROMANOS 9

di mep rá mbui n'da to'o in nde di mep rá mbui, tengu thoho bi 'yørpa a ra Faraón. 19 Pε ha 'bo'o da 'yängä buya: "Nu'bu in jabu i øt' Oja, hague dán zä da 'yena i ja rá ts'oqui n'da 'bu, ne njon da zä da zerpa a in nde Oja gue xtám bęni 'bε'a xun ho xtá 'yøt'e." 20 Pε hingui sä ngubu gui mamhbu, gyu ja'ihu, to'o ahu ngue guí xihmbu hingui ho øt' Oja. Xi'bu n'da ra ts'øe ngue ra jahäi, ha da zä da 'yänni to'o bi 'yøt'e: "Hanja ngubu gá 'yørque," ha da zä da 'yɛ̞na. ²¹Ha hin'yu rá ts'edi a to i øt' ra ts'øe, ha hingui sä da zän zehe 'be'a da 'yørpa n'da ra bøhäi 'bu, ngue da zän'na n'da mahotho, ne'a man'da him mahotho, ne n'dat'a ra bøhäi ní 'yøt'e. 22 Nguetho in ndesε Oją da 'yuh rá cue nangue u to yún sähu di unbi. Ne madague'bu i hät'i set rá mbui nangue u to di unbi. Pε nu'bu hinguim beni 'bepu nan dø'ma Oją, gue'a man'da dí nequi xun ho rá cue Oją ne rá ts'edi 'bu bi unba u buya. ²³ Janangue'a da fadi tate xun ho rá mbui Oja 'bu bi un rá mate u mi'da yu ja'i, madague'bu ne'u yún sähu xtí unbi, tengu thohogahu. Nε nuya m'bεt'o thoho di hogahu Oja, ngue da zä ga comhbu rán ho. ²⁴Ngue gueju bi zongahu Oja, nangue ma 'yuhu 'dahma 'dan'yo, ne u yu judío, ne u hin yu judío, pe hønt'u bi numanhose bá si. ²⁵Ne gue'a bi mam bu ja rá søcuą ra Oseas, bi 'yɛna:

Nu'u him mi ɛmbä ma t'uhni, gue'u ga ɛmbi ma t'uhni u ya. Nɛ nu'u him madí huɛcä, pɛ nuya ga huɛcä u ya, bi 'yɛn Oja. Ne mi en ra t'ohni: Nubu hapu bi t'en ahu: "Him ma t'uhni ahu," guepu da t'en ahu buya ngue yú

t'thni aht Oją i 'bti.

27 Pɛ nangue yt israel bi man ra
Isaías: "Madague'bt ɛmmɛ xtá
ngu t ytm bom'bɛto ra Israel,
tengu yt 'bomu bt ja ra deją, pɛ
hønt't zi yoho dim pøhø," bi 'yɛna.

28 Nguetho Oją di juanba ra ximhäi,
nɛ di jua'a n'dihi rán ts'ɛmbi bi ma.

29 Nɛ tengutho mi ma mam'bɛt'o ra
Isaías, bi 'yɛna:

Nu'bu hin xtá 'yɛ Oją 'da
yu hmudä nangueju, dyu
israelhu,
gätho xtí juaju 'bu, tengu ra
hnini Sodoma, nɛ ra hnini
Gomorra, ngue bi jua Oją, bi
'yɛna.

Xun ngu yu israel him bi nde bi hyạn rá mate Ojạ

³⁰Pε xiya, hague bin ja nangue yu ją'i hin yu judío. Bi t'ęmbi xun ho nguetho bi hyantho rá mate Oja ngue bi hocpa yú ts'oqui, madague'bu him mím beni xtá 'yøt' ran hocją'i i mam bu ja yún t'ędi Oja. 31 Pε nu yu israel gue mí honi xtá 'yøt' ran hocja'i i mam bu ja yún t'ɛdi Oja, pɛ him bi zøni ngue xtá t'εmbi xʉn ho ʉ. ³²Pε hanja him bi t'ɛmbi xun ho u yu israel. Nguetho him bi nde bi hyantho rá mate Oją nguepu xtá t'embi xun ho u. Pe bi beni xtá hnumanho 'bu mi 'yøzehe yún t'edi Oja u. Ne nu ra Cristo buya tengu'bu n'da ra do 'bem bu ja ra 'yu, guepu di fet rá gua n'da, ne bi dang bu yu israel 'bu mi 'yena xtán dah ra 'dihi. ³³Ne

gue'a mán t'o't'i bu rám hman Oją, i ɛna:

Dami bɛmhbu, dí høpu n'da ra do bu Sión, nguepu da dang bu n'da, nɛ dim 'bɛdi.

Pε nu'a to'o da 'yɛ̞c'yɛi a, hin da mbɛs' yʉ́ sä, pɛ guehma da hnumanho.

Ma zi cu ahu, emme dí hah ma mbui dí äp rá mate Oja di pø u ma mi'israelhe. ²Νε dí padi ngue majuani εmmε εhya u nangue Oja, pegue hingui padi ndana majuani rá 'yu Oja u. 3 Nguetho hingui nde da badi 'bɛpu dí 'yɛmp'a Oja ngue xtán ho. Im beni din hoc zehe nangue yún hose, nguetho im beni dí numanho Oja 'be'a øt'u. Janangue'a hingui nde din uni xtí hoc Oją u, nangue ran hoqui bi zänd Oją. ⁴Pe gätho to'o bi 'yɛɛ'yei ngue gue'a ra Cristo bi hoqui, bi 'yɛ'ts'a ní hyoni ngue xtín hoqui nangue yun t'edi.

To'o gätho da 'yäp rám fäts'i ra Hmu, da yạn ʉ

⁵Nu ra Moisés bi 'yo't'i 'bɛ'a da 'yøt'a n'da nangue yʉn t'ɛdi nguepʉ xtán zøni xtá numanho Oja n'da. Ngue bi 'yɛna: "Nu'u yu ja'i 'bu di ja'ts'u yun t'ɛdi, gue'u dí japi dim 'bu'u," bi 'yεna. ⁶Pε nu'a ran hoqui ga hamhbu rá mate Oja, o guí emhbu xun hei bu dá timhbu a, gue ba sønsehu bu mahets'i ba sisehu ua ra Cristo. ⁷Ne o guí emhbu ga mbähä bu 'bu u xun du ngue ba sisehu bu a ra Cristo. 8Pe 'be'a i man'a ran hoqui 'bu. Pe hingui hẹi bu đá tịmhbu a. Ne ẹna: "Gui hyanthohu rá mate Oja, ne da zä da 'yo ni mbuihu buya, ne da zä da

'yo ni ndehu buya." Nε gue'a ram hma dím mamhbe a. ⁹Ngue nu'bu ga ɛmhbʉ ma Hmuhʉ ra Jesús, nɛ ga ɛc'yɛihʉ mbo ma mbʉihʉ ngue bi xox Oja a 'bu mi du, da yanju Oja 'bu. ¹⁰ Nguetho gue'a ní 'yɛnju xun hoju Oja a ga ęc'yeihu mbo ma mbuihu, ne gue'a ní pøju Oja a gam mamhbu nangue ma ndehu. ¹¹Ne mí εn rá t'ohni Oja: "Το'o gätho da 'yɛc'yɛi a bá pɛnh Oja, hin da thäda u," bi 'yɛna. 12Nɛ hin gam bemhbu ngue n'dan'yo yú hmu i 'bu u yu judío nε u hing yu judío. Ρε n'dat'a yú hmu ngue gätho yu ja'i i 'bui, ne 'da dí unthoho xun ngu to'o gätho da 'yäp rám fäts'i. ¹³Nguetho nu'u to'o gätho da 'yäp rám fäts'i ra Hmu, di pø u, mi en ra t'ohni maya'bu. ¹⁴Pε hague dán zä da 'yäp rám fäts'i ra Hmu 'bu him bi ba a rá mate bu ja rá mbui. Ne hague dán zä da hyan rá mate 'bu him bi 'yøde. Ne hague dán zä da 'yøde 'bu njon da xifi nangue ra Cristo. 15 Ne hague dán zä da mba n'da da xifi 'bu hingam 'bɛhni. Janangue'a i ɛn rám hman Oja: "Mahotho i øt'a n'da 'bʉ i man ran ho ma'da'yo di 'daju ran johya, hapu i 'yo," bi 'yɛna. ¹⁶Pε hinga gätho i ømanho ʉ i sih ran ho ma'da'yo. Tengu bi man ra Isaías, bi 'yɛna: "Ma Hmu i, nda'a u bi 'yømanho a dá mamhbe ya." ¹⁷Pε nu'bʉ 'bʉi to'o da sih ram hma nangue ra Cristo, da zä da hyan rá mate Oją 'bu. 18 Pe dí än 'bu hin xtamá 'yø u yu judío. Pe haguen ja ngue him bi 'yɛc'yɛi ra Cristo. Bi 'yøhma, nguetho hønbu go hapu bi mba rám hman Oją, bin 'yo gätho ná nguni ra ximhäi. ¹⁹Ne xø dí än'nahu, ha him mí pa u yu israel

ngue man'da da t'ɛmbi yú t'uhni Oja u hing yu israel. Bi bahma, nguetho nubu ja rá søcua ra Moisés mí ɛn Oja:

Ga ja ahu gan sɛyahu 'bu ga simanho 'da yu ja'i him mí ɛmbä ma t'uhni.

Ne ga ja ahu gan cuehu 'bu ga simanho 'da yu 'yambui ja'i, bi 'yemp Oja u yu israel.

20 Ne bi xifi xun ho bu ja rá søcua ra Isaías, bi 'yen Oja: "Bi dingä u 'da him mí hongui, ne dá japi da bac'u him mi ängui," bi 'yena.

21 Pe nangue yu israel bi 'yen Oja, "Gätho ra pa dá 'uarpa ma 'ye, dá zon'ndu, pe bi mbesca thoho ma 'ye, ne bi ugä thoho u," bi 'yen Oja.

'Da u yu israel bim pøh ya

Pε ga än'nahu mahøn'a, ha gätho bi hyɛ u yú t'uhni Oja, gue nu u yúm bom'beto ra Israel. Pe hin'na. Nguetho gueczehegä drá me'israel, ngue mam bombøtagä ra Abraham, nε ra Benjamín. ²Pε Oja hingui he u njuantho yú t'uhni ngue'u bi huan 'bu mam'bɛt'o. Ha hin guím bemhbu 'be'a bi man rá t'ohni Oją, gue bi sih ra Elías 'bu mí yąp'u yú mi israelhu. Ne bi 'yena: ³"Ma Hmu i, bi hyo ni pøngahyą u yu israel, ne bi xot'a bu ja ni mexa mí pa m'bøts'e ni 'bøts'e, ne høngdä dá pongä, nequi nde da hyogui," sä bi 'yɛn a ra Elías. ⁴Pɛ ha hin guím bɛmhbu 'bɛ'a í da Oja buya ngue bi t'emb ra Elías. "Pe hin'na, hin guí 'dase," bi 'yembi. "Pe dá jamansup yú mbui u yoto mahuahi yun 'yohu israel, gue'u him bin danyahmu bu 'bäh ra pøte ra Baal," ngue mi t'embi oja. ⁵Ne ngutho ya, 'bu i

'da yu israel him bi 'uegue nangue Oją, ngue gue'u to bi huand Oją nangue rá mate thoho. 6Ne gam bɛmhbu nu'bu rá matethoho Oja bi huan'ndu, ga pahmbu buya hin nangue yun t'øt'e i øt'a n'da ní huan'na n'da. Nguetho nu'bu xtá hnumanho nangue yun t'øt'e bi sifi, hin xtín ja rá mate tho Oją 'bʉ, nε nte nam bøn'a rá mate Oja 'bu. ⁷Xiya, 'bɛ'a gam bɛmhbʉ nangue yu israel, ne hinguin ngu u bi dini 'be'a mí honi, gue da t'embi xun ho. Pe hønt'u nthahni bi dini, ne bim pøhø. Pe nu'u mi'da bi mep yú mbui u. 8Ne gue'a mán t'o't'i: "Oja bi pumbenip yú mbui, tengu'bu bin ąha. Ne bi japi him bi zä bi nu ne him bi zä bi 'yøhnahyą. Ne guexta u yu pa i jabu ya," bi 'yen rá t'ohni Oja. ⁹Ne ngutho bi man ra David:

Da mbøspa Oją, pɛ hin da bɛni 'bɛ'a nam bøn u yu 'bøts'e da 'yøt'u,

nε gue'a dán unba u.

Nε din xädä, hin da nu ran nεqui.

Ne nu yú xutha dim mboqui ma zä, nangue yú ts'oqui xun ngu i tuts'i, bi 'yɛ̞n a ra David.

Ne'u 'da hing yu israel bim pøh ya

11Pɛ dí än'nahu mahøn'a, nu'bu mí 'ue'u yu israel, ha bi bɛn Oją him man'dandi da 'yɛnspa rán japi u 'bu. Pɛ hin'na. Pɛ nangue'a bi zan rá mate Oją u yu israel, nɛ gue'a í zä bim pø u hing yu israel buya. Pɛ gue'a bi 'yøt' Oja, n'dahma din sɛya yu israel 'bu bi nu u bi hyan rá mate Oja, nɛ da hyon Oja mahøn'a.

12Nu Oja bi zä bi jap'u 'da yu ja'i hing yu israel gätho ná ndoho ra

ROMANOS 11 298

ximhäi, nangue bi 'ue'u yu israel. Nε bi dịn rá mate Oja u hin yu israel 'bu mi thạcpa rán jạpi Oja u yu israel. Janangue'a man'da xun ngu ran jąpi da nu u hing yu israel 'bu bá peng bu 'bu Oją u yu israel mahøn'a. ¹³Guehna dí xi ahu na ya, ngue hin gyu israel ahu, nguetho drám 'bɛhnigä nangue ahu. Nɛ dín nde ga ja ahu gui pømanhohu nangue ra Cristo, 14n'dahma din 'yomfeni u ma mijudíohe yu israel 'bu bi nu a ran ho gá timhbu, janangue'a man'da xtá ngu dim pø u buya. ¹⁵Ne nu'bu mí hye Oja u yu judío, bi zä bi hocpa u hing yu judío 'bucua gätho ua ja ra ximhäi. Pε εmmε man'da xun ho din ja ua gätho ra ximhäi 'bu bi ts'im mahøn'a xun ngu u yu judío. Nε din ja tengu'bu ya bi ndants'u yu du. ¹⁶Nu mam bombøtahe mí yahu Oja maya'bu, yú mbeti Oja u, tengu'bu yú 'bøts'e Oja u. Ne tengu'bu mí 'bøspa Oją ra mbudi thuhme 'bu øt ra thuhme, janangue gätho a ra juni rá mbeti Oja buya. Ne nu'bu mí huand Oja a ra Abraham, ne gue'a í than'ndu yú 'yu a buya, tengu'bu n'da ra za xun zaqui rán dui, ne'u yú 'yɛ xun zaqui u. 17 Pɛ bi ts'ecpa 'da u yú 'yese a ra hogaza. Ne nu ahu hing yu israel ahu ne tengu'bu bá ts'ec'ahu bu gmí tøhmbu tengu n'da ra za hingui ho. Ne bi t'es'ahu bu bi ts'εcpa u 'da yú 'yε ra hogaza. Nε gá comhbu rán zaqui a ra za, gue bá nexpu rán dui, ngue nu ra Abraham bi huand Oja maya'bu. ¹⁸Pε hingui sä gdá yathu a ngue bi t'es'ahu bu bi ts'ec u 'da yú 'ye ra za. Dami bemhbu ngue hinga gue ahu guidí unhdu rán zaqui a rán dui ra

za, pe gue'a rán dui ra za i øt'ahu rán ho Oja bu guí tøhmbu. 19 "Pε man'da xun hoje, nguetho bi ts'ec'u 'da yu 'yɛ, nɛ go bi t'ɛscähe ua," masque guí ɛmhbu. 20 Majuani bi ts'ec'u 'da yu israel nguetho him bi nde rá mate Oją. Bi beni xun hose. Nε guí tøhmbu bu 'da ahu ngue hing yu israel ahu, nguetho guí pahmbu hønt'a rá mate Oja nán ho ahu. Pe o guím bemhbu gán tøsehu bu, pε gan jamansuhu. ²¹Damí bemhbu him bi yan Oja u 'da yú 'yese ra za. Ha má gue'adahu da yan ahu 'bu guím bemhbu xun hose ahu. 22 Pε nu'bu 'bo'o hinguin nde rá mate Oja, pe da nuse a rán säui a to'o da 'uepu ja rá mate. Pε nu ahu gui nuhu rá mate Oja 'bu gui thoqui guim bembbu a. Pe nu'bu hin'na, ne ahu da ts'ec'ahu mahøn'a bu ja ra za 'bu. ²³Ne nu'u yú 'yese a ra hogaza, ngue yu israel, nu'bu da 'yɛc'yɛi rá mate Oja, da t'ɛs' mahøn'a bu ja yú zase. Nguetho ja rá ts'edi Oja da 'yes' mahøn'a bu bi zegui. 24 Nu'bu mam bá ts'ec'ahu bu gmi tøhmbu ja n'da ra za hingui ho, ne bi t'es'ahu bu ja man'da ra za ngue hin ni zasehu, pe man'da hingui hei da ndøpu mahøn'a u yú 'yese nguetho rá zase.

Da zøni n'dat'a dim pøhø xun ngu yu israel

²⁵Ma zi cu ahu, dín nde ahu gui pahmbu a ja bi t'uhya, n'dahma hin gan 'yɛzɛhɛhu hing yu judío ahu. Dín nde gui pahmbu, 'da yu patho bi mɛh yú mbui u 'da u yu israel, ja gue'bu bi zøn ra pa xtí cuthu xun ngu ahu hønt'a go to'o hing yu judío ahu. ²⁶Nɛ m'bɛjua buya, xun

ngu dim pø u yu israel. Ne gue'a bi man rá t'ohni Oja, bi 'yɛna:

Di nɛqui n'da yú yante ngue yú mi'israelhu bu Sión, da yan'a ra Jacob nangue yú ts'oqui. Ngue ra Israel a ra Jacob.

²⁷ Ne ja gue'bu ga ją'ts'a dá xifi, ga punba yú ts'oqui, bi 'yɛm bu ja rá t'ohni Oja maya'bu. ²⁸Nu'u yu israel i øt'e ngue yún suihu Oja ya, ngue'a hingui ɛc'yɛi ra hogamhma. Pe gue'a í zä bi zin ahu Oją a. Pe guehma di huęc Oją u yu israel, nguetho bi than 'bu maya'bu u yú ngurpa bombøta. ²⁹Nguetho njąm'bu da goh rá mbui Oją nangue u to xí zohni, pe majuani di un'na bi ma, tengu'bu ya xí um 'bʉ mí ma 'bɛ'a di unni. 30 Ne nu ahu hin gyu israel ahu gmí øthu ram fe'ts'i nangue Oja mam'bet'o. Ne m'bejua ne u yu israel bi mbesthoho Oją. Janangue'a bi zä gá tịmhbu rá mate Oją. ³¹Νε gue'a in ja ya, ngue i festa a rá mate Oja u yu israel, ne guí timhbu rá mate Oją ya. Pε gue'a dí dịn rá mate Oją mahøn'a u yu israel. 32 Oja bi ma, njo'o n'da ra ja'i bi 'yec'yei a nguetho ja yú ts'oqui. Ne bi 'yøt' Oja buya gue njon da hyät'i din hoc zehe, nguetho in nde gätho di un rá mate di hoqui to'o gätho in nde dim pøhø. 33 Emme xun ngu rá mate Oją, ne emme xun ndoho rán 'yomfeni. Ne hin'yu ngue hingui pa Oja. Njo'o n'da ra ja'i da badi 'be'a nam bøn'a i øt' Oja, ne njongui sä da bądi 'be'a gätho i sänd Oją da 'yøt'e. 34 Njo'o n'da ra ja'i da badi da 'yøt'e tengu rán t'øt'e Oją, ne njon da 'yut Oja 'bɛ'a da 'yøt'e.

35 Νε njo'o n'da ra ją'i da hyoni 'bε'a di un Oją nε ngue'a dí 'yεmbi dín dupate Oją a. 36 Nguetho gätho bí 'yερμ 'bμ Oją, nε gätho di 'yonsε Oją μ, nε gätho bi 'yøt'μ gue di ρερεεhε μ. Janangue'a nde'bμ ga εspahμ Oją gätho yμ pa maząi. Νε hønt'a gam bεmhbμ a ya.

Dam 'buhmbu ngue hønt'a Oja gam bemhbu

Ma zi cu ahu, ts'edi dí xi'ahu, nu'bu dí pąhmbu rá mate Oja, pε nde'bu gätho ma ja'ihu dan umhbu bu 'bu Oja gue ga ørpahu rá 'bɛfi. Nɛ gue'a majuani ná thandehu Oja a, ne gue'a ra 'bøts'e in numanho Oją a. ²Ne hin gam bemhbu ga hombbu 'be'a gätho xun ho nangue yu pa i jabu ya, tengu i øt'u 'bucua ja ra ximhäi. Pegue thocpa thoho ga päh man 'yomfenihu gam bemhbu ma'da'yo. Janangue'a thocpa thoho ga homhbu ga pahmbu nda'a rá pähä Oją, ngue nda'a xun ho ga øthu, ne nda'a numanho Oja buya. ³Bi 'dacä rá ts'ɛdi Oja ga ørpa rá 'bɛfi nangue rá mate. Janangue'a dí xi ahu, ngue 'ne ahu gätho n'da ngu n'da ahu bin tat'ahu rá mate Oja nangue rá 'bɛfi. Janangue'a hin gan 'yexhu, pegue gui pasehu nda'a ní 'befi bi zän'nahu n'da ngu n'da ahu, nangue rám fäts'i Oją. 4Tengu ní ją'i n'da, ngue an ts'änni xun ngu yú xequi. Ne hinga gätho 'dat'a ra 'bɛfi øt'e, pɛ 'dahma 'dan'yo yú 'bɛfi u yu xequi. Ngutho dí øthu. ⁵Ne madague'bu xun nguju, pε tengu'bu n'danja'itho ma ja'i dí comhbu ra Cristo. Ne tengu ní ja'i n'da, 'da nam fäxta n'da ngu n'da yu xequi,

ngutho dí øthu ngue dí comhbu rá 'befi ra Cristo. ⁶Bi 'daju ra ts'edi Oja gue ga øthu rá 'bɛfi 'dahma 'dan'yo, nangue rá mate zehe. Pe nde'bu ga øthu xun ho. O nu'bu n'da dim pøngahya da hyoni 'bepu dí ma xun ho a di benba Oja, nangue rám fäts'i. ⁷O nu'bu n'da bin t'un ra 'bɛfi dim fäxte 'bɛ'a di 'bɛ a n'da, pɛ di ja'ts'i xun ho, ngue da mbäx yú cu. O nu'bu n'da bin t'un ra 'befi din xänbate, din xänbate 'be'a nam bøn'a rám hman Oja. 8O nu'bu n'da ra zote, pegue da xifi nda'a xun ho da 'yøt'u yú cu. O nu'bu n'da bin t'un ra 'befi di un rá mbeti, pe hin da beni da hnumanhose. O nu'bu yu ngurpi ngue di manda rá 'bɛfi Oja, di ja'ts'i xun ho nangue ra ts'edi bin t'unni. O nu'bu n'da bin t'un ra 'bɛfi da mbäx u yu hyoya nε yun zäman'u, mpähä thoho da mbäts'i.

Gam bemhbu nda'a xun ho dá tenhdu Oja

⁹Ne hingui yoho gam bemhbu 'bu ga huɛju n'da, pɛ majuani ga øthu ran hugcate. Ng xingui ts'u gam bemhbu ga øthu a hingui ho, pe dan ehyahu ga øthu a 'be'a gätho xun ho, ne nzai ga øthu a. ¹⁰Dan huɛjʉ n'da ngu n'dajʉ nguetho dadín cuhu. Ne n'da ngu n'da man'da da beni da 'yespa rá miją'iui, xinda gue'bu da t'ęspa zehe. 11 Ne hin ga cuthu ran danhyei ma mbuihu, pe dan ehya ga ørpahu rá 'befi ma Hmuhu. 12 Dan johyahu nangue'a ran ho dí tømhbu, ne hin dan xømbuihu nangue yun unbi. Nε thocpa thoho yu ora thoho dan yahu Oja. 13 Ga fäxhu yu 'yec'yei

'bu ja 'be'a di 'bedi. Ne mpähä thoho ga säyabahu yu ja'i bu ja ma ngumhbu. 14Pe ga äfu ran jąpi nangue u to di ugahu, ne hin ga äfu ra 'yanthi. ¹⁵Nɛ 'dat'a dan johyahu to'o di johya, o nu'bu 'bo'o tu rá mbui, 'da dán du ma mbuihu buya. ¹⁶Nɛ gätho 'dat'a gam bɛmhbʉ. Ne hin da ben'a n'da man'da xun ho xinda gue rá mija'iui, pε din amigohu u yu ja'i hin'yu yú ts'edi. Nε hin gam bεmhbu ngue jasε man 'yomfɛnihʉ. ¹⁷Nu'bʉ 'bo'o ørcahu ran ts'o, hin ga cospahu ran ts'o. Pe gam bemhbu nda'a xun ho ga ørpahu, ngue 'bɛ'a gätho i hnumanho. Ne nubuya da nu gätho yu ja'i ngue xun ho ma mbuihu. 18 Ne dam 'bumanhohu u gätho yu ja'i 'bu da zä. 19 Ma zi cu ahu, hin ga cos'hu ra pengui 'bu ja'a da t'ørcahu. Pe 'be ga tømhbu ts'u di unba Oja 'bu gue'a in nde di unba u. Nguetho nt'o't'i: "Ma 'bɛfi zehegä ngue ga unba n'da ne ga un rán theui a bi 'yøt'e," bi 'yen Oją. ²⁰ Janangue'a nu'bu tumanthuhu man suihu, ga 'uimhbu. Ne nu'bu tuthe, ga sithebahu. Nguetho nu'bu njabu dí ørpa man suihu, xun u da beni ngue'a midí ugahu, ne xøhma thoho da goh yú mbui buya. 21 Hin ga cos'hu ran ts'o pe ga ørpahu ran ho, gue'a dá tafu a ran ts'o a buya.

Ga øthu yún t'ędi yu ts'ut'abi

Gätho gahu ga εc'yεihu ra ts'ut'abi ua ma häihu. Nguetho njo'o n'da ra ts'ut'abi ua ja ra häi ngue bi zän zεhε yún t'εdi. Pε Oją bi zänni ngue din ja yú ts'εdi. ²Janangue'a nu to din suhmi ra ts'ut'abi, din suhmi a to

bi zänba rá ts'edi a, ne i honse rán use. ³Nguetho nu'u yu ts'ut'abi ua ma häihu, hin ga suhu 'bu dí øthu ran ho, hinda hønt'bu ga øthu ran ts'o ga suhu 'bu. Pε nu'bu dín nde hin ga suhu ra ts'ut'abi, pε ga øthu ran ho, ne da numanhoju buya. ⁴Nguetho nu'u yu ts'ut'abi, Oja bi zänni da mbäxcahu. Pe nu'bu dí øthu ra ts'oqui, ga suhu 'bu, nguetho i ja rán t'ɛdi di unba n'da. Ne Oja bi un yun t'edi di unba u to'o øt' ra ts'oqui. ⁵Janangue'a i jatho ga ęc'yeihu yún t'edi u yu ts'ut'abi, n'dahma hin di ungahu. Ne gue'a di bengahu Oja 'bu in zoc ma mbuihu. ⁶Nε janangue'a ga juthu 'be'a gätho i äju yu ts'ut'abi, n'dahma di thoqui da 'yøt' yú 'befi ngue bi zänba Oją, ne i tąh yún zäbi u. ⁷Mpähä thoho ga juthu xun ho to'o gä i ja yún t'ɛdi da 'yädi 'bɛ'a gä da 'yäju. Ga jut'a ma häihu, nε ga juthu yu puesto, nε mi'da yu cota i äh ra ts'ut'abi. Ne ga numansuhu yún t'ędi u to'o gätho i ja yún t'ɛdi.

Ga ørpahu ran ho ma miją'ihu

⁸Nɛ ga juthu 'bɛ'a gätho dín dupatehu, nɛ hin te gam bɛmhbu ngue dín dupatehu buya. Pɛ gam bɛmhbu ngue dan huɛju n'da ngu n'daju. Nguetho nu to gätho ja yún huɛcate bi ja'ts'i gätho yún t'ɛdi Oja u. ⁹Nguetho gue'a bi man'u yún t'ɛdi Oja bi 'yɛna: "O guí 'yomt'ɛnihu, nɛ o guí hacpahu rá te ni mija'ihu, nɛ o guím pɛhu, nɛ o guidí sɛyabahu 'bɛ'a pɛ'ts' ni mija'ihu." Nɛ nu 'bɛ'a gätho mi'da yun t'ɛdi i man yun t'ɛdi, nu'u gätho n'dat'a i ma: "Gui huɛc ni

mija'ihu tengu bu gní hugczehe ni ją'ihu." 10 Nu'a øt' ran huɛcate, hingui ørpa ran ts'o rá mija'iui a. Janangue'a di ja'ts'u yún t'ɛdi Oja a ran huɛcate i øt'a n'da. 11 Nɛ man'da ga humbi ga øthu na, nguetho dí pahmbu ya bin de, ya bi thoh yu pa. Damin 'yomfenihu xun ho ya ngue daná hämhbu yu pa gan nuhu ra Hmu, xinda gue'a dá øthu 'bu ja má du'mi dá ɛc'yɛihu. 12 Ya bi thoh ra xui, ya maguepu da hyats'i. Mbähä ga bunthu yún t'øt'e ra 'bεxui, ga he man thäquihu, ngue dan samzehehu janangue'a da dah ran nequi. 13 Mbähä ga øthu a rán säui ran negui, hin dan itihu, ne hin dam muns'hu bu ja yún johya zehe yu ja'i. Ne xín dan 'yomt'enihu, xínga gue'a ma pähä zehehu ga øthu, xín ga øthu yu sui, xín ga øthu yun ts'eya. 14 Pe jatho gam bemhbu ga hamhbu rá ts'edi a ma Hmuhu ra Jesucristo, ngue ga øthu tengu bi 'yøt'e, ne him ma gam bemhbu ga øthu rá pähä ma ngøc'yeihu.

'Dahma 'dan'yo bu na ec'yeihu

Nu'bu 'bu a n'da ra 'yεc'yεi gue hin ε pądi xun ho, pε ga simanhohu bu ja mam petihu u. Nε hin dan junthu nangue 'be'a im bɛni ngue xun ho da 'yøt'e. ²Nguetho 'dahma 'dan'yo im bɛnsɛ 'bɛpu ní 'yɛc'yεi Oją. Nu'u 'da im bɛni xun ho da zi gätho 'bɛ'a i ts'i. Pɛ nu mi'da im bɛni hingui ho 'bu da za u 'da yu ngø. ³Nɛ nu ra 'yɛc'yɛi gue i si nɛ i sa gätho 'bɛ'a i ja, pɛ hin da zan'a n'da to'o mbɛni hingui ts'i. Nɛ ximangutho a n'da to'o hingui si, pɛ hin da 'yɛmbi hingui ho øt'a i

ROMANOS 14 302

si gätho 'bɛ'a i ts'i. Nguetho Oja 'da nan zintho. ⁴Nu'i, to'o e, gue guí embi hingui ho øt' ni mi'yehehu. Nu rá hmuse n'da da mam 'bu xun ho 'be'a øt'a n'da rá 'yehe, o hin'na. Pe guehma da bømanho n'da ngu n'da ra 'yɛc'yɛi, nguetho i ja rá ts'ɛdi ra Hmu di japi da bømanho. ⁵Ne i 'bʉ i 'da yu 'yec'yei im beni din säya 'da yu pa. Nε nu mi'da buya im bɛni xun ho 'bu hin din säya 'da yu pa. Pegue n'da ngu n'da da bense 'be'a xun ho da 'yøzehe. ⁶Nguetho nu to din säya 'da yu pa, din säya nangue da ben Oja. Ne ngutho 'bu hinga gä i si yun ts'ihme u 'da, njabu øt'e nguetho im ben Oja, ne i xifi jamadi Oja nangue u 'da i si. Ximangutho a to gätho i si, njabu i øt'e nguetho im beni Oja bi un'na, ne di un ra jamadi Oja. ⁷Njo'o gahu gue gam bɛmhbu dyú hmusehu. Pe yú mbetigahu a ma Hmuhu. Ne ngutho 'bu dí 'buhmbu nε ngutho 'bu dá tuhu. ⁸Nguetho dán däsehu bu 'bu Oją gätho yu pa dí 'buhmbu. Ne ngutho 'bu dá tuhu, dan dähu bu 'buh ma Hmuhu ne guexta'a yú mbetigahu a. 9Ne gue'a í du nε í ndants'a ra Cristo mahøn'a. ngue dim hmu nangue u xun du ne'u i 'bui. ¹⁰Pe 'da ahu hanja gní numan'u a ni cuhu ngue guí xihmbu hingui ho 'be'a i si. Ne nu mi'da ahu guí pahmbu xun ho 'be'a gätho i ts'i, pε hanja gní numan'u 'da ni cuhu guí ɛmfu nte di muui 'bu hingui nde da zi 'da yun ts'ihme. Nguetho gätho gahu dam 'bähmbu bu ja rá hmi ra ze'mi ngue'a ra Cristo. 11 Nguetho nt'o't'i 'be'a bi man Oja gue'bu mí 'yena:

> Guehma majuani din ja a dím ma, ngue gätho yu ja'i din danyahmu bu dí 'bui,

ne gätho din juạn bu ja ma hmi ngue guecä drá Oją, bi 'yɛn Oją.

¹² Janangue'a dí pąhmbu, gätho gahu ga däfu ra güɛnda Oją nangue man t'øt'e zɛhɛhu.

Hin ga jafu da dang bu ja ra ts'oqui n'da ma cuhu

¹³Him ma numan'ʉhʉ n'da ngu n'daju. Pe hønt'a gam bemhbu hin ga jafu n'da ma cuhu di fet rá gua bu ja yu ts'oqui. ¹⁴Dí pacä nangue ran 'yomfeni bi 'dac ma Hmuhu ra Jesús, gue hin'yu 'bɛ'a da ts'i ngue hingui ho. Pe nu'bu mbense n'da hingui ho da ts'i, ra ts'oqui a 'bu da zi 'bu. ¹⁵Pɛ nu'bu 'da ni cuhu hingui numanho nin ts'ihme zehehu, nde'bu hin gui thoqui gui sihu, nguetho hin guí ørpahu ran hugcate 'bu guidí thoqui gui sihu. Pε o guí øthu nangue ran ts'ihmε dí 'ue u 'da ni cuhu bi pøh ra Cristo 'bu mi du. 16 Pe gui 'yes'hu a ní jafu da ts'an'a guí pahmbu xun ho. ¹⁷Ne hin gam bemhbu nangue ran ts'ihme ná øthu rá 'befi Oja. Pe nu rá 'bɛfi Oją, ga øthu ran hocją'i, ne 'dat'a gam bemhbu, ne dan johyahu nangue rá Hogandahi Oja dí 'buhmbu. Gue'a nam bøni gue rá 'befi Oja a. 18 Ne nu'bu njabu i øt'a n'da, majuani i ørpa rá 'befi ra Cristo a 'bu. Ne Oja da numanho a, ne'u yú mija'ihu da numanho a. ¹⁹Mbähä dan ɛhyahʉ dan hocpa ma mbuihu n'da ngu n'daju, ne 'da dám fäxtahu din te ma mbuihu n'da ngu n'daju. ²⁰Ne hin ga ts'onbahu rá 'bɛfi Oja nangue man ts'ihmɛhu. Mfadi gue gätho xun ho da ts'i. Pe hingui ho 'bu dadí unbahu rá mbui

n'da ma cuhu nangue 'be'a dí sihu. ²¹Man'da xun ho 'bu ga ɛs'hu a na unbahu yú mbui 'da ma cuhu nangue ra ngø dí sahu, o ra vino o 'bɛ'a gä ní dehe dí sihu. ²²Nu'bu bi ben'nahu Oja ne guí pahmbu gue xun ho 'be'a guí sihu, xun ho a 'bu. Ne'a Oja in numanho. Pe hin dá yathu a. Ne di johya n'da 'bu xise rá mbui xun ho 'bɛ'a gätho i øt'e, nε hin te mbεm buya. 23 Pε nu'bu n'da im beni hingui ho da ts'i 'be'a gätho i ja, pe nu'bu bi zi buya, ya ra ts'oqui a bi 'yøt' 'bu. Nguetho 'bexque bi bɛni bi mbɛsta'a rá pähä Oja 'bu mi zi. Ne'u 'be'a gätho dí øthu, nu'bu hin dí pahmbu majuani rá pähä Oja a, ra ts'oqui 'bu dí øthu a 'bu.

Ga homhbu 'bepu dí zac yú mbui ma cuhu

Pε nuju 'bu dí pąhmbu xun Pe חוון יש מו אַקווווטש איי ho 'be'a da zä da 'yøt'a n'da, pε nde'bu man'da gam bεmhbu ga fäxhu u hin ε pądi xun ho, xinda gue'bu ga øthu 'be'a gätho dím bensehu xun ho. ²Pe n'da ngu n'daju ga øthu 'be'a i numanho ma mi 'yɛc'yɛihu gue 'bɛ'a dín te yú mbui u. ³Tengu ra Cristo, him bi 'yøt'e 'bε'a di hosε ρε bi 'yøt'e 'bɛ'a bi numanho Oja. Janangue'a bi 'yɛmp'a rá Ta: "Go dá tuxä yʉn ts'ante bi si i," bi 'yɛn a ra Cristo. ⁴Ne 'be'a gätho bi t'o't' maya'bu bu ja rám hman Oją, bi t'o't'i ngue da xängahu, ne di zerca ma mbuihu, di jaju ga tømhbu rám fäts'i Oja, hin dan xømbuihu. 5Oją di jaju dan zamhbu bu, ne di zerca ma mbuihu. Nε dí äp rá mate di ja ahu 'da'angu guim bemhbu n'da ngu n'da ahu,

nguetho 'darbu guí 'buhmbu ra Cristo Jesús. ⁶Nɛ janangue'a da zä n'dat'a guim bɛmhbu 'bu guí thạndehu Oją, ngue nu rá Oją nɛ rá Ta ma Hmuhu ra Jesucristo.

Gä da sih ra hogamhman u hing yu judío

⁷ Janangue'a n'da ngu n'da ahu gan numanhohu, nε u yu judío nε u hing yu judío, tengu thoho ra Cristo 'da nan zimanhogdahu n'da ngu n'daju. Nε gue'a ná εspahu Oją a. ⁸ Nguetho bí 'yɛh ra Cristo ngue din 'yɛhɛ nangue yu judío. Nε bi ja'ts'a mi man Oja maya'bu ngue bi sih yúm bombøta yu judío ba ɛh ma yantehu. Janangue'a bi fadi majuani bi man Oja. ⁹Pɛ nɛ u hing yu judío nɛ u yu judío bi jap ra Cristo 'darbu bi 'yɛspa Oja u nangue rá mate. Tengu mán t'o't'i 'bɛ'a bi xih rá Ta ra Cristo:

Ga xi u hing yu judío nangue ni mate,

ne ga xifi ɛmmɛ xʉn ho i, bi 'yɛmb rá Ta a ra Cristo.

NE man'da bi man ra t'ohni: Gan johyahu ya gyu ja'i gue hin gyu judío ahu, gan 'yohu u bi huand Oja ngue yu judío.

¹¹Nε man'da bi mam bu:

Dami 'yɛspahu ra Hmu Oją gyu ja'ihu ngue 'dahma 'dan'yo bu gná yahu gätho ná nguni ra ximhäi,

gätho gui numansuhu Oją.

12 Ne bi 'yen a ra pøngahyą Isaías:

Dim 'bu a n'da rám bom'beto ra

Isaí gue ne'u hing yu judío da

'yembi rá Hmu,

ngue da dø'bʉ rám fäts'i a, bi 'yɛna.

ROMANOS 15 304

13 Nu'a Oją di jaju dí tømhbu ran ho bi xiju. Janangue'a dí äp Oją da hyut'a ni mbuihu nangue guí ¿c'yɛihu a. Nɛ xíngui ts'u nte guim bɛmhbu, pɛ thocpa thoho gui tømhbu da mbäx ahu rá Hogandahi Oją nangue rá ts'ɛdi.

I man ra Pablo hanja bi 'yo't' na ran zofo

¹⁴Ma zi cu ahu, dí pacä gue xun ngu ni hogambuihu, ne i ja nin 'yomfenihu xun ho, ne guí pahmbu 'da gdín xänba thohohu n'da ngu n'da ahu. ¹⁵Pε guehma dá hut'anzambui dá ot'ahu na, ngue dadí ben'nahu 'be'a gá pahmbu. Nguetho gue'a ran t'ɛdi bi 'dacä Oja nangue rá mate. 16 Nguetho rá mbefigä ra Cristo Jesús bu 'bu u hing yu judío, dím mangä ran ho ma'da'yo. Ne tengu'bu drá mbäja dadí hocpa rá 'bøts'e Oja, nu'a nám bøni dadí hoc'a ni mbuihu ngue hing yu judío ahu n'dahma da numanho ahu Oją. Ne mahoqui ahu nangue rá Hogandahi Oja guín 'yohu. 17 Janangue'a ɛmmɛ i hu ma mbuigä nangue 'bɛ'a gätho bi 'yørpa u hing yu judío a ra Jesucristo, bi jaqui bi bømanho rá 'befi Oja dá øt'ä bu i 'bu u. 18 Pe hingui sä gam mangä 'bɛ'a bi 'yøt'a ra Cristo nangue u mi'da yú mbefi. Pe hønt'a da zä gam mangä 'be'a bi 'yørpu dám pecä. Ne bi jap u hing yu judío da den'na ra Cristo nangue ram hma dá xifi ne nangue yun t'øt'e bi 'yuti. ¹⁹Nguetho bi 'yøt' yu hmepya, ne yun t'øt'e mixte nangue rá ts'edi rá Hogandahi Oja. Nε dá ją'ts'ä ma 'bεfi dá mangä ran ho ma'da'yo nangue ma yantehu

ra Cristo. Dá du'mi dá mangä bu Jerusalén, nɛ dá mangä gätho yu xɛqui nán zant'i ra häi gue'bu go má søm bu Ilírico, gätho dá mangä bu ram hma. ²⁰Nɛ guehna dá nde ga øt'e, gue dá mba dá mamp'a ram hma guepu him mi farpa rá thuhu ra Cristo. Ngue hin dá nde dá mba bu ja yú 'bɛfi u mi'da bi mbɛn'na ra Cristo. ²¹Pɛ dá øt'ä tengu bi mam bu ja rá t'ohni, ngue i ɛ̞na:

Nu'ʉ 'da gue njam'bʉ mi sifi pε nuya da bah ya.

Nɛ nu'ʉ 'da njam'bʉ mi øde da zøni da badi nangue rá 'yu Oja.

Im beni da mba bu Roma a ra Pablo

²²Ne janangue'a him 'bexque bi zä dá mba bu guí 'buhmbu. Nguetho guexta'a mi ja ma 'bɛfi ua bí ja ra xεqui ua nán jongua. ²³Pε nuya ya nte mi ja ua ma 'bɛfi ya. Nɛ xun ngu yu nidi mín nde xcá mba bu guí 'buhmbu bu Roma. ²⁴Nɛ mí ts'utho ya ga mbabu ga zengua ahu ne dam 'buhmbu bu 'da yu pa. Ne nu'bu dá thopu España, da zä dan hyumhbu ts'u bu ja ra 'yu ní mba bu. ²⁵Pε 'bε ga mba bu Jerusalén, ne ga dä bu a ra mbeti dí mbäx u yu 'yɛc'yɛi bí 'bupu. ²⁶ Nguetho bi ben u yu cu bí 'bupu Macedonia nepu Acaya ngue da mbäx'i ts'u yu hyoya 'yɛc'yɛi bí 'bupu Jerusalén, ngue ga hax 'bʉ dá mba bʉ. ²⁷Νε gue'a bi zänni da 'yøt'u hing yu judío, nguetho in nde di co'ts'a ra mate bi t'ørpe. Nguetho bi gomhbu rán jąpi Oją u hing yu judío u yu judío gue yú mi 'yɛc'yɛihu 'bupu Jerusalén, Janangue'a nde da mbenbi ts'u ra mbeti u. 28 Ne nu'bu

ya dá dä a 'bɛ'a bi 'bɛhni, ja ga mba bu Roma ga nu ahu bu, ne ga thocä bu España buya. 29 Ne nu'bu dá søngä bu guí 'buhmbu, dí pacä da 'yenscahu rán japi xun ngu a ra Cristo nangue dí pahmbu rám hma. 30 Ma zi cu ahu 'yørcahu ts'u ra mate şmmɛ gui 'yäfu rám fäts'i Oją nanguecä, nangue 'dat'a ma Hmuhu ra Jesucristo nε nangue rá Hogandahi Oja bi jaju dan hugju. ³¹Dami xihmbu Oja da yangui nangue u hing yu 'yɛc'yɛi bu ra häi Judea, guet'a ra xεqui bu Jerusalén. Nε dami 'yäfu rá mate Oja nangue u yu cu bí 'bupu Jerusalén, ngue da hyamanho a ra mbeti ga hax bu ga unni, ngue bi mben'ndu hing yu judío bu Macedonia nepu Acaya, ngue'u yú cu. ³²Nɛ nu'bu da nde Oja dan johyagä 'bu dá mbagä bu, dan säya ts'u bu guí 'buhmbu. ³³Nɛ nu Oja nzai i hurpa rá mbui n'da, pε nε ahu da hyut'a ni mbuihu. Nε hønt'a gam bemhbu a ya.

Nu ra Pablo i penba ran zengua yú amigo

Nuna man juhu ra Febe, mi ts'utho da mba bu guí 'buhmbu ya ne di zengua ahu na. Nuna, rá 'befi im fäxte ram peti bu Cencrea. ²Ne dami simanhohu na, nangue rá thuhu ma Hmuhu, ngue nuju dyu 'yec'yeihu gue'a man sähu ga øthu. Ne dami fäxhu 'be'a gätho ní 'befi da 'yøt'a ra Febe, nguetho guese bi mbäx u xun ngu mi'da, necä bi mbäxqui. ³Dami zenguagui ts'u bu ra Priscila, ne ra Aquila rá ndø, ma mimbefihe nangue rá 'befi ra Cristo Jesús. ⁴Ne nugä 'bu mi t'ena xtá thogä,

ne u mi t'ena xtá tho u 'bu mí yangä 'bu n'dandi. Gue'a ná undä ra jamadi Oja nangue μ. Pε hinga høngdä pe ne u gätho yúm peti yu 'yɛc'yɛi ngue hing yu judío, 'da xna undähe ra jamadi Oja nangue u. 5Ne dami zenguagui ts'u u gätho dim peti bu rá nguse ra Aquila. Ne'a ma amigogä ra Epeneto dami zenguagui ts'u bu a. Nu'a ra mbudi 'yɛc'yɛi bu ja ra häi Acaya a. 6Ne'a ra María, dami zenguagui ts'u bu. Nu'a emme xun ngu ra 'bɛfi bi 'yøt'e nangue ahu. ⁷Nε a ra Andrónico nε ra Junias ma mijudíohe, nε 'darbu dá sähe ran unbi. Nu'u gätho yú 'bäihu ra Cristo i numanho u, ne m'bet'o bi 'yɛc'yɛi ra Cristo u xinda guecä. ⁸Ne a ra Amplias dami zenguagui ts'u bu. Dadí huɛcä a nangue rá thuhu ra Hmu. ⁹Nɛ dami zɛnguagui ts'u bu ra Urbano, ma mimbefi'be nangue ra Cristo, ne ra Estaquis ngue dadí huεqui. ¹⁰Nε a ra Apeles dami zenguagui ts'u bu. Nu'a emme bi ts'ä rá t'ɛc'yɛi, nɛ bi bømanho. Nε u 'bupu ja rá ngu ra Aristóbulo dami zenguagui ts'u bu. ¹¹Ne a ra Herodión ma mijudío'be, ne u 'bupu ja rá ngu ra Narciso, gue nu yu 'yɛc'yei 'bupu, dami zenguagui ts'u bu. ¹²Νε a ra Trifena nε ra Trifosa dim pefi nangue ra Hmu, gätho dami zenguagui ts'u bu. Ne a ra Pérsida mahugqui a, ne a xun ngu ra 'bɛfi bi 'yøt'e nangue ra Hmu. ¹³Ne dami zenguagui ts'u a ra Rufo, an thahni da 'yørpa rá 'bɛfi ra Hmu, nε a rá mbe tengu'bu ma mbegä a. ¹⁴Nε a ra Asíncrito, nε ra Flegonte, nε ra Hermas, nε ra Patrobas, nε ra Hermes, ne u yun 'yohu bi 'buhmbu

ROMANOS 16 306

u, dami zenguagui ts'u bu. 15 Ne a ra Filólogo, ne ra Julia, ne ra Nereo ne a rán ju a, ne'a ra Olimpas, ne'u gätho mi'da yu 'yec'yei bí 'bupu. 16 Ne damín zenguahu n'da ngu n'da ahu nangue ran huecate. Ne gätho yum peti yu 'yec'yei ja ua i pen'nahu ran zengua.

N'da ran zofo rán zegui bi man ra Pablo

¹⁷Pε dí xi ahʉ ma zi cu ahʉ, damim fäsehu nangue u to'o in nde di hec'ahu gue di 'uec'ahu nangue a ra hogamhma gán xänbahu. Pe hin gui 'yʉrbahʉ ra güɛnda ʉ. ¹⁸Nɛ nu'u yu 'yu't'ate, hingui ørpa rá 'bεfi ma Hmuhʉ ra Jesucristo ʉ. Νε i häte thoho nangue emme xun ho 'be'a mma ne i sixmanho ahu. Pε i härpa yú mbui u 'da hingui padi dim fäse. Ne gue'u yú 'befi zehe i øt'u. 19 Pe nu'u mi'da gätho i padi hin guí festahu rám hman Oją. Janangue'a i hu ma mbuigä. Pε dadí hεc'a thohohu ngue'a dín nde ahu gui pahmbu gätho 'be'a xun ho, pε nu'a hingui ho hin dín nde ahu gui pahmbu a. ²⁰Nε nu Oja ngue'a nzai di hoc ra sui, nu'a di ja ahu 'dahmantho gui 'yethu bu häi ra zithu nangue u to in nde di hec'ahu. Janangue'a gui comhbu rá mate ma Hmuhu ra Jesucristo. Ne hønt'a gam bemhbu a ya. 21 Nuna ra Timoteo i pen'nahu ran zengua, ma mimbefi'be na. Nehna ra Licio

nehna ra Jasón, nehna ra Sosípater, ma mijudíohe ya, gätho i pen'nahu ran zengua. ²²Nugä dí Terciogä rá 'yosøcuągä ra Pablo, dí o't'ä ra søcuą ja ua, dadí zengua ahu nangue ma Hmuhu. ²³Nehna ra Gayo, i pen'nahu ran zengua, nuna di säyagui ua rá ngu drá Pablogä, ne u gätho yu 'yec'yei di säyabi ua rá ngu. Nehna ra Erasto i ja rá 'befi i hax ra mbeti ua ja ra hnini, nehna man 'yohuhu ra Cuarto, gätho i pen'nahu ran zengua. ²⁴Dami comhbu rá mate ma Hmuhu ra Jesucristo gue gätho ahu.

Hønt'a Oją ga ęspahu gätho yu pa maząi

²⁵Ząi ga ęspahu Oją, nu'a i ja rá ts'edi di zet'a ni t'ec'yeihu 'bu guím bemhbu ran ho ma'da'yo ngue 'bɛ'a bi 'yøt' ra Jesucristo, tengu dím mangä. Nguetho nuya i si ahu ram hma ngue maya'bu thoho him mí fadi. 26 Pe nuya i pa mhman ya, ne i sifi gätho yu ja'i hønbu go hapu i 'bui gätho ra ximhäi. Ne nu'a ram hma i hman ya, guet'u yúm hman u yú pøngahyą Oją maya'bu. Ne i hman ya nangue rán t'ędi Oją gue i 'bui mazai, in ndepe gätho yu ja'i da 'yɛc'yei ra hogamhma. 27 Emme xun ho rá 'yu Oja bi 'daju, janangue'a ga ɛspahu Oją gätho yu pa maząi nangue ga ɛspahʉ ra Jesucristo. Nɛ hønt'a dí xi ahu ya.

1 CORINTIOS

Ná n'da ra søcuą bi 'yorba ra Pablo u yu 'yec'yei bu ja ra dahnini Corinto

Ran zengua

Ma zi cu ahu guí 'buhmbu bu ra dahnini Corinto, dí ot'ahu ra søcua i jaua. Dí zengua ahu gätho gyu 'yɛc'yɛihu Oja. Nɛ nugä drá Pablogä, bi huangä Oja, ne rá pähä zehe bi xiqui gam mangä rám hman ra Jesucristo hønbu go hapu. Nε'a man 'yohuhu ra Sóstenes dí 'bu'be ua, di zengua ahu. ²Nu'a ra Cristo Jesús bi 'uec'a ni mbuihu bu ja ra ts'oqui. Ne bi zon'nahu gui 'yørpahu rá 'bɛfi Oją. Nɛ tengu'bu 'darpu guí 'buhmbu u mi'da to'o gätho i thande ma Hmuhu ra Jesucristo, ngue n'dat'a ra Hmu dí comhbu u. ³Ne dí äpä Oja ma Tahu nε ma Hmuhu ra Jesucristo ngue di 'da ahu yún japi, ng'a rán johya gui hyamhbu a.

Bi dịn yún jạpi Oją nguetho i 'buhmbu ra Cristo

⁴Bi 'da ahu yún jąpi Oją nguetho 'darpu guí 'buhmbu ra Cristo Jesús. Gue'a ná undä ra jamadi Oją a ya. ⁵Nɛ nte di 'bɛpu ja nim pɛtihu, nguetho 'darpu guí 'buhmbu ra

Cristo. Pe gä i ja ahu ran 'yomfeni da zä gui pahmbu xun ho a ya, ne da zä guim mamhbu xun ho rá 'bɛfi Oja ya. 6Nɛ gue'a rám hman ra Cristo gá hyamhbu, gue'a gní bømanhohu a ya. ⁷Janangue'a i juadi xun ho rá ts'edi bi 'da ahu Oja nangue rá 'bɛfi guí øthu gätho gní tømhbu dí 'yɛh mahøn'a ma Hmuhu ra Jesucristo. ⁸Nɛ di ja ahʉ Oja gan zamhbu bu gue'bu go rán zegui yu pa, janangue'a nte ma ts'oqui da dịn'nahu 'bu bá peng ma Hmuhu ra Jesucristo. 9 Nguetho dí pahmbu nzai di ja'ts'a im man Oja, ne guese Oja bi zoncahu dam 'buhmbu rá Ts'+nt'+ ma Hmuh+ ra Jesucristo.

Bin suh yu 'yec'yei

¹⁰Dí äcä ra mate n'dat'a guim bɛmhbu, nguetho guí tɛnhdu a ma Hmuhu ra Jesucristo. Nɛ 'yo guidín heju, pɛ jatho n'datho guim bɛmhbu nɛ n'dat'a gui 'yøthu.

¹¹Gue'a dí xi ahu a, ma zi cu ahu, nguetho bi xicä 'da yu cu ngue yú mɛnguhu ra Cloé, bi xiqui 'bɛ'a guí øthu. ¹²Nguetho guí ɛmhbu 'da ahu guí tɛngahu, nɛ ɛn'i 'da tɛn ra

1 CORINTIOS 1 308

Apolo, ne em mi'da ten ra Pedro, nε εm mi'da ngue tεn'na ra Cristo. ¹³Pe ha guím bemhbu gá xemhbu ra Cristo. O xigä ha dá tugä bu ja ra pont'i nangue ahu. Uague guím bemhbu ngue gán xixyahu nangue ma thuhugä. ¹⁴Pe jamadi Oja ngue njo'o to dá xixya ahu, hønt'a ra Crispo ne ra Gayo. 15 N'damhma njon da zä da ma bin xixya nangue ma thuhugä. 16 Nε hønt'u gätho 'bupu rá ngu ra Estéfano dá xixyabi. Pe hin dím bengä 'bu 'bo'o xcamá xixyabi mi'da, uague hønt'u. ¹⁷Nguetho hinga gue'a ra 'bɛfi bi xicä ra Cristo ga øt' ran xixya, ρε bi xiqui gam mangä ran ho ma'da'yo. Pε nu'bu dím mangä a, pε hin dí yą tengu bu na yą yum bamhya, nguetho hønt'a dí honi da bah yu ja'i ma ts'oquihu í du ra Cristo bu ja ra pont'i. Janangue'a din ja ra ts'edi ram hma di hocpa yú ts'oqui u.

Gue'a ra Cristo ní 'daju ran 'yomfeni Oją

¹⁸Pε nu'a ram hma ngue ra Cristo bi du bu ja ra pont'i, εmbi nte ní mbatho u ní mba bu ja ran unbi mazai. Pε nuju ná mbähä bu ja ra temazai, dí pahmbu gue'a ram hma ní zinju Oja ngue bi du ra Cristo bu ja ra pont'i, bi hoga ma ts'oquihu. ¹⁹Nε i εm bu rá t'ohni Oja:

> Ga uti ngue nte ní mbatho u im ma jase yún 'yomfeni, ne ga hạcpa yú ts'edi zehe yu ją'i, ga em bu ma'ueni, bi 'yen Oja.

20 Nguetho bi zän Oją hin te ní mbat u to'o ena jase yún 'yomfeni, ne'u emme bin xäse yúm hmanse yu ja'i, ne'u ena padi da dah yum hma.

Nguetho hingui sä da yan a n'da u nangue yɨm hman u. 21 Ne bi bense Oją, bi zän buya ngue hin dí bą Oją n'da u yún 'yomfenise. Pe bi zänni da yạn u to da hyạn'a rám hma nangue ra Cristo bi du, madague'bu t'ɛmbi nte ní mbatho. ²²Nguetho nu ma mijudíohe im beni gue'u yʉn t'øt'e mixte da nu 'bʉ gue'a n'da ram hma ngue majuani. Ne nu'u 'da ni menguhu ngue hing yu judío ahu nzai i honse n'da ram hma ngue i emb zehe majuani. ²³Ρε nu'a ram hma dím mamhbu ngue bi du bu ja ra pont'i ra Cristo, njonguin numanhose a. Ne'u yu judío i san tho 'bu i sifi, ne'u hing yu judío i embi nte ní mbatho 'bu i sifi. ²⁴Pɛ nujʉ ngue bi zoncahʉ Oją, madague'bu dyu judíohu ogue hin dyu judíohu, pe n'dat'a dí pahmbu i ja rá ts'edi Oja di hoga ma ts'oquihu nangue'a ra Cristo bi du. Janangue'a bi nequi emme xun ndoho rán 'yomfeni Oją. 25 Ne nuna ra 'yu bi zän Oją, pε man'da di muui na, madague'bu t'ɛmbi hin te ní mbatho, xinda gue'u yú 'yusɛ bi zän zehe yu ją'i. Ngue gue'a í t'embi hin'yu rá ts'edi Oją a, ngue bi du ra Cristo, pε man'da xʉn ngu bu ní negui a, xinda gue'u gätho yún t'øt'e zεhε yu ja'i. ²⁶Ma zi cu ahu ngue bi zoncahu Oja, gam bemhbu hague din jahu bu na nuju ra ximhäi, ngue xun nguju dyú 'yambuihu, ne xun nguju hin'yu ma ts'edihu, ne xun nguju ngue bin hyoya ma tahu. ²⁷Ρε bi huan Oją u i t'embi yu 'yambui, n'damhma da mbe'ts' yú sä u i jase yún 'yomfeni. Pe gue'a í huan Oja u hin'yu yú ts'edi bu na nu ra

ximhäi, janangue'a da mbɛ'ts' yú sä н i jase yн ts'edi. 28 Ne bi huan Oją u nte di muui bu na nu ra ximhäi, nε'u to'o i pa nts'ani, pε man'da in numanho Oja u, ne gue'a dí 'berpa yú ts'edi u to'o ena i ja se yún t'edi. ²⁹ Janangue'a njon di jap Oją din 'yɛzɛhɛ. 30 Ne bi jaju Oja 'darpu dám 'buhmbu ra Cristo Jesús, ne gue'a ní 'daju ran 'yomfeni Oja a, nε nangue'a ra Cristo ní zimanhoju Oja, ne gue'a í 'yørcahu Oja ngue yú t'uhni gahu a, ne gue'a ní yanju bu ja ran ts'o. 31 Nguetho i mam bu ja rá t'ohni Oja, hin'yu 'bɛ'a man'da ran ho da zä da man'a n'da, hinda hønt'a ran ho bi 'yørpa Oja.

Hønt'a ram hma 'be'a í du ra Cristo i ja rá ts'edi

Ma zi cu ana, ...
bu guí 'buhmbu, ngue dá xi Ma zi cu ahu, nu'bu má mbagä ahu rám hman Oja majuani, pe hin dá huan thohogä yum hma guepu da numanhogä ra ximhäi, ne hin te dá ma nangue man 'yomfɛnisɛ. ²Ne nu'bu má beni ga mba bu guí 'buhmbu, pe dá beni hønt'a ga xi ahu 'bɛ'a ín unba ra Jesucristo 'bu mí du bu ja ra pont'i. ³Ne nu'bu mám 'buhmbu bu, dá øt'ä hin'yu ma ts'edi, nguetho dá su Oja hin da numanho 'bu xcá uaspa mam hmanse, ne dá fet'i. ⁴Ne nu'bu mán yahu bu ngue dá xi ahu ram hma, hinga gue'a mam hmanse ngue mahotho bi pät a ni mbuihu, pe hønt'a rá ts'edi rá Hogandahi Oja bi zä bi hoc a ni mbuihu. 5 Janangue'a hinga gue'u yún 'yomfɛni 'da yʉn 'yohu bi ja ahu gá 'yɛc'yɛihu Oją, pɛ hønt'a rá ts'edi zehe Oją bi ja ahu gá 'yec'yeihu.

Rá Hogandąhi di japi dí fą Oją

⁶Pε nu'a ram hma dím mamhbu nangue ra Cristo, go i pa u xun ho yú t'ec'yei, ngue ran 'yomfeni majuani a. Ne hinga gue'a rán 'yomfeni ra ximhäi bi bą u xun ho yú t'ec'yei, xinga gue'u yúm hmanse u yú ngurpi ra ximhäi, ne nu'u mi ts'utho di 'bɛh yú ts'ɛdi. ⁷Pɛ nu ran 'yomfeni dím mamhbu him mám fadi, pegue urcahu Oja ya, nangue ra Cristo mi sänni da yanju 'bu him mani 'yøt' ra ximhäi, ne da zixcahu bu mahets'i ní comhbu rán ho buya. ⁸Pe xinga n'da ʉ i ɛna jase yʉ́ ts'edi ua ja ra ximhäi ngue i parpa rán 'yomfeni Oja. Nu'bu xtám ba'u 'da, hin xtí cuarpu ja ra pont'i a ra Hmu mixte. ⁹Pe tengu mán t'o't'i bu ja rá t'ohni Oja:

Hin da zä da base n'da a ran ho bi zän Oja da 'yørpa u to'o hønt'a Oja im beni, ne njam'bu da zä da 'yøse n'da, ne njam'bu da zä da nuse n'da, bi 'yen rá t'ohni Oja.

¹⁰Pε nuju dí pahmbu a, nguetho bi xiju rá Hogandahi Oja. Ne nu rá Hogandahi Oja di ats'i xun ho bu ja rán 'yomfɛni Oją, ne gue'a i xiju a buya. ¹¹ Tengu yu ja'i hin jon da zä da barpa rá mbui rá mija'iui, pe hinda hønt'a rá mbui zehe n'da i padi. Ne in jabu Oja, njon da barpi 'be'a mbeni, pe hinda hønt'a rá Hogandahi zehe i padi. Ne di bengahu a. 12 Nguetho bi 'daju rá Hogandahi Oja, ne hinga gue'a rán 'yomfeni ra ximhäi, ngue in nde di bengahu rán 'yomfeni Oja, ne gätho yú hogant'unni bi 'daju nangue rá mate xun ndoho. ¹³Pε nu'bu dím

mamhbu rán 'yomfeni Oja, pe hin dí uaspahu yum hma nangue man 'yomfeni sehu, pe hønt'u yum hma bi xängahu rá Hogandahi Oja, ne da zä dí xihmbu xun ho u to'o bin t'un rá Hogandahi Oja. 14 Pe nu'a hingui 'buhmi rá Hogandahi Oja, hingui sä da hyạni 'be'a gätho i xängahu rá Hogandahi Oja, ne embi rám hman a n'da ra 'yambui. Ne njam'bu sä da badi, hinda hønt'bu dim 'buhmi rá Hogandahi Oja. 15 Pe nu'a ra ja'i ngue 'buhmi rá Hogandahi Oja da zä da badi 'be'a nam bøn'a 'be'a gä i ja, ngue nda'a da numanho ne nda'a hin da numanho. Pe nu'a hing ra 'yɛc'yɛi hin da zä da barpa yún 'yomfeni u yu 'yec'yei. ¹⁶Njon da 'yense da barpa rán 'yomfeni Oja ra Hmu, njo'o da xifi xun ho 'be'a da 'yøt' Oja. Pe nuju dí comhbu a rán 'yomfeni a ra Cristo.

I comhbu Oją rá 'befi u yú mbefi

Ma zi cu ahu, nu'bu mám 'buhmbu bu him bi zä dá xi ahu u xun hei tengu i si u in 'youi xun ho rá Hogandahi Oja. Pe dá xi ahu tengu'bu gmí 'yothohu ua ja ra ximhäi, uague tengu'bu ja gním 'bʉhmbʉ nangue ra Cristo. ²Pε dá xi ahu a hingui hei tengu'bu ra xi'ba thoho dá 'da ahu, nguetho tengu'bu hin ní zä gui sihu xun ho ra hme. Nε ngutho ya, guexta'a hønt'a ra xi'ba da zä gdín sihmehu. ³Nguetho hin guín zac ni mbuihu. Ne guín nde gam mixte zehehu, jananjabu gadín suhmbu. Pe ha hin guí øthu tengu'bu gyu ja'i thohohu ua ja ra ximhäi. ⁴Nguetho guím mamhbu to'o guí tenhdu, ne 'da'ahu guí emhbu guí tengahu, ne mi'da ena

tεn ra Apolo. Pε gue'a gní 'yøthu tengu'bu gyú ja'i thohohu. 5'Be'a dadí mu'be a ra Apolo. Ha hin guí pahmbu ngue yú mbefi thoho gä'be Oja, ngue dá fäxa'be gá 'yɛc'yɛihu ra Hmu, nangue ra 'bɛfi bin 'dac'be n'da ngu n'da gä'be. ⁶Nugä dá tuh ra hmudä bʉ, nɛ nu'a ra Apolo bi uąpi, pε nu'a Oją bi japi bin te ne bi bøx u yu hmudä. ⁷Janangue'a hin'yʉ rá ts'ɛdi a bi duh ra hmudä, xinga gue'a bi uapi, pε hønt'a Oja i ja rá ts'εdi ngue bi japi bin te yu hmudä a. ⁸Ne nugä dí comhma'befi'be a ra Apolo, ne nugä dá tuhu, ne nu'a ra Apolo bi uapi. Ne di 'dac'be Oja 'be'a in nde di 'dac'be nangue ra 'bɛfi dá øt'be n'da ngu n'da gä'be. ⁹Nɛsɛ Oja dí comhbe rá 'bɛfi. Nɛ nu'ahu tengu'bu yú huahi ahu Oja ngue bi thuhu.

Nε nu'ahu tengu'bu n'da ra ngu ngue i hø a Oja. 10 Ne nugä tengu'bu n'da drá ngurpagado nangue rá mate zehe Oją, ngue dá fä'mi xun ho yú guangujądo a ra ngu. Ne nu man'da ρε di thoqui dim ρερυ ja a ra ngu. Pe n'da ngu n'da ra mbefi 'bʉ dim pepʉ ja a ra ngu, pe i jatho dim pefi xʉn ho. ¹¹Ne njon da zä di pärpa a rá guangujądo ra ngu, ne hønt'a ra Jesucristo ngue rá guangu n'da rá ngu Oja. ¹²Ρε nu'u to'o di thoc'a ra ngu, sä da huahni xun ho 'be'a da japi. Xun ho 'bu xøtho yu do dí fø't'a ra ngu, ne nu rá 'bet'e, xøtho yu t'egui u. Pε 'bo'o im bɛni dí fø't' yu za, o gue yu 'yox'yo, ne 'bo'o im beni dí mbet' yu paxi. ¹³Ne nu yú 'befi n'da ngu n'da yu 'yec'yei da hnu hangu nangu di muui 'bu bi zøn ra pa din ja ran juanbi. Nguetho da

zøn ra pa da ts'ä nangue ra sibi, ne da fah puya gue'bu xun ho bi 'yøt rá 'befi n'da ngu n'da yu 'yec'yei. ¹⁴Ne nu'bʉ n'da ra mbefi bi hyät' ra sibi a rá ngu bi hyøe, da dah rán zäbi buya. 15 Pε nu'bu bin zø a ra ngu bi hyøe, ne nte da dah rán zäbi buya nangue rá 'bɛfi bi 'yøt'e. Nɛ maguepu hin xtám bongui, tengu u 'da bi 'da 'bu min zø yú ngu. 16 Pε ha hin guí pahmbu ngue gue ahu yú ngu ahu Oja, ne nu rá Hogandahi Oja i 'bupu mbo ni mbuihu. ¹⁷Ne nu'a to'o da 'yɛna di ts'onba rá ngu Oja, emme xun ngu yun unbi da 'yørpa Oja. Nguetho nu rá ngu Oja xun nduxqui a, ne guese ahu rá ngu ahu Oja. ¹⁸Ne hin da zä gui thoqui gan hyäzehehu ngue guim bemhbu jase nin 'yomfenihu. Pe jatho gam pumbenihu a guím bensehu, janangue'a da zä gui timhbu a njuantho ran 'yomfeni xun ho. 19 Pe nu rán 'yomfeni ra ximhäi nte di muui bu na nu Oją. Nε gue'a mán t'o't'i bu rám hman a, ngue nu'a nín 'yomfenise n'da 'bu i ena dim mixte, pe di jap Oja dim 'bese bu n'da buya. ²⁰Nε man'da bi man ram hma, ngue nu'a to'o ena jase yún 'yomfeni, pe go i pą a ra Hmu ngue nte di muui u yun 'yomfeni. ²¹Janangue'a hin guim bɛmhbʉ man'da di muui n'da ra ja'i. Pe Oja bi 'da ahu gätho ni ngurpihu ngue da mbäx ahu. Ne gätho u i jaua ja ra ximhäi ne'u 'be'a gä i 'bui, ne bi zän Oja di ze ahu u. 22 Necä ngue drá Pablogä dí fäx ahu, ne ra Apolo, nε ra Pedro. Pε nε'a 'bε'a gätho dín nuhu ua ja ra ximhäi i fäxcahu ga pahmbu Oja, ne ra te i fäxcahu, ne ran date, ne ra pa i jabu ya, ne ra

pa ba ɛhɛ. Nɛ janangue'a gätho ni mbɛtihʉ ʉ. ²³Nguetho yú mbɛti ahʉ ra Cristo nɛ nu ra Cristo rá mbɛti Oja a.

Yú 'befi i øt' yú 'bäihu ra Cristo

Pε nugä nε ra Apolo, nε jatho guim bemhbu ngue yú 'yehe gä'be ra Cristo, bin 'dac'be ra 'bɛfi ngue ga xi a'be rám hman Oja him mám fadi. ²Pe damím bemhbu, n'da ra 'yɛhɛ thoho 'bu bin t'un ra 'bɛfi, i jats'edi tho di ja'ts'a sifi. ³Pe hin dí urpä a ra güenda a guím bemhbu, ximangutho u mi'da yu ja'i engui hin dí ja'ts'i. Ne xínga guecä i sä ga pase 'bu dí ja'ts'i uague hin'na. ⁴Pe nu ma mbuigä dím beni hin dá soh ma 'bɛfi. Pɛ madague'bu ngubu dím bεnsε, pε jatho ga tø'mi gue'bu go da nuse Oją 'be'a dá øt'ä. 5Pe hin go m'bet'o gui 'yemfu hingui ho bi 'yøt'a n'da. Pε 'bε gui tømhbʉ ba ɛh ra Hmu, nɛ gätho di nɛqui buya 'be'a mim bemhbu mbo ma mbuihu n'da ngu n'daju. Ne di un Oja buya 'bɛ'a rán säui a bi 'yøt'a n'da ngu n'da ra 'yɛc'yɛi. 6Nu ram hma dí xi ahu, ma zi cu ahu, nanguecä'be ra Apolo, pε n'da ran zofo ngue hin da donts'i 'bɛ'a gui 'yøthu. Ne him man guim bemhbu i ja rá ts'edi n'da ra xänbate, ne xín guim bemhbu n'datho xun ho xinda gue'u mi'da. Janangue'a hin gui thoqui gan 'yɛxhu. 7Pe to'o bi ja ahu ngue xun ho ahu xinda gue'u mi'da. Gätho 'bɛ'a i ja ahu bi 'da ahu Oja. Ne nu'bu guí pahmbu bin 'da'adahu 'be'a gä i ja ahu, pe hanja gnán 'yɛzɛhɛhu, tengu'bu gá tinsehu a ran ho i ja ahu. ⁸Pe guí øthu tengu'bu gám hmusehu, ngue

hin te guidí 'bɛhmbu, nɛ tengu'bu ya bin 'da a ni ts'ɛdihʉ ngue guidí mandahu gätho mi'da. Pe nuya tengu'bu ya gá sogahe. Pε hyøcta hmaha 'bu xquí søni ngue xtín ja ni ts'edihu, nguetho necähe n'dat'a xtín 'dac ma ts'edihu 'bu. 9Pe nugähe ngue ma 'bäihe ra Cristo, dím bemhbe Oją bi 'yørcähe ngue i hnuhäigahe xinda gue gätho mi'da. Nε tengu'bu dyú ofädihe i pε'ts'i da thoje. Ne i pa ma unguigahe 'bu i thengahe ra ximhäi. Ne'u yúm 'bɛhni Oją mahɛ̞ts'i di hyonya thoho nangue 'bɛ'a dí sähe. ¹⁰Nɛ nuje t'enje dyú 'yambuihe, nguetho dí tenhde ra Cristo. Pe nu'ahu emme guí homhbu da t'en ahu i ia nin 'yomfɛnihu nguetho guí ɛna guí tenhdu ra Cristo. Pε nugähe hin'yu ma ts'εdihe bu na hnuje, ρε nu bu na hnu ahu tengu'bu ɛmmɛ i ja ni ts'edihu. Ne emme i pa nt'e'ts'i ahu, pε nugähe i pa nts'ani gähe. ¹¹Nε gätho yu pa xu thogui, ne gätho yu pa i jabu ya, εmmε dí sähe ra thuhu, nε ra tuthe, nε dyú 'yahehe, nε pa m'be'migahe, ne hin hapu pøni i ja ma ngumhbe. 12 Νε εmmε dí yähmbe ngue dadím pesehe nangue ma 'yεhe. Νε εmmε i ts'anje, pε man'da dí äfe rán japi Oja nangue u i sante. Nε εmmε pa ma ungui gahe, pe mpähä thoho dí häthe 'bε'a i t'ørcahe. ¹³Νε di c'aman'ʉje, pε man'da dín zomanhohe. Nε ngutho yu pa jabu ya, i t'ørcahe tengu'bu dyú ngohäihe ra ximhäi ngue hin'yu 'be'a dadí muje. ¹⁴Pe hin dín nde ahu gui pe'ts' ni sähu nanguehna dí xi ahu. Pe dadí 'da ahu n'da ran zofo, nguetho tengu'bu ma t'uhni ahu ɛmmɛ dadí

huɛc'ahu. 15Pe madague'bu xquín nuhu 'det'a mahuahi ni ngurpihu i xän'nahʉ nangue ra Cristo, ρε hønt'a n'datho ni tahu i 'bui, ngue guecä, nguetho rá mbudi thoho dá xi ahu nangue ra Cristo, jananjabu gá 'yɛc'yɛihu buya. 16 Janangue'a dí ä'ahu ra mate ngue gui 'yøthu tengu dí øt'ä. ¹⁷Nɛ gue'a dá pɛhndä bu ra Timoteo, ngue di ze ahu. Ne nu'a tengu'bu majuani ma ts'unt'u ngue emme dadí huequi, ne di jatsi xun ho, nguetho ec'yei xun ho a ra Hmu. Ne di ben'nahu ngue 'be'a dí øt'ä ngue dí tɛnni xun ho ra Cristo Jesús. Ne ngutho dím mangä bu hapu gätho i ja yúm peti yu 'yec'yei. ¹⁸Nu bu guí 'buhmbu, i 'bupu 'da im beni jase yú ts'edi, im beni ngue hin ga mba bu. ¹⁹Pe mi ts'utho ga mba bu gan nu'ahu 'bu da nde Oja. Ne ga padi to'o gätho i ena i jase yú ts'edi. Ne hinga hønt'u yúm hma ga øts'e, pε gan nu 'bʉ majuạni i ja yú ts'edi nangue Oją. ²⁰ Nguetho nu'bu majuani di manda Oja bu ja rá mbui n'da, hinga høntho da badi din ya xun ho, pe din ja ra ts'edi njuantho. ²¹Ha guín ndehu ga femhya ahu 'bu dá mbagä bu, uague guín nde ga hugc'ahu 'bu dá søngä bu.

Da thøn'a thi n'da ra 'yɛ̞c'yɛi bi 'yøt'e tengu'bʉ ran 'yomt'ɛ̞ni

Ne dí øcä bin thạtui rá hømbe n'da ra cu. Pe n'da ran thạti gá 'yøthu emme xun ts'otho, tengu'bu ran 'yomt'eni. Ne njo'o to'o numanho tengu a, xínga gue'u yu ja'i hingui ec'yei Oja. ²Ne sä emme guídín 'yexhu guí emhbu nte guídí 'behmbu. Pe xingui ts'u tu

ni mbuihu nangue 'bɛ'a bi 'yøt'a. Hanja ngue hin guí hømhbu thi a. ³Pɛ madague'bu njo'ogä bu guí 'buhmbu, pe tengu'bu 'darpu dí 'buhmbu, ngue dá sändä a ran unbi da nu a bi 'yøt' ra ts'oqui, tengu tho 'bu ya dí 'bucä bu. 4Pe i jatho gätho gam petihu nangue rá thuhu ma Hmuhu ra Jesucristo. Ne tengu thoho 'bu necä dí 'bucä bu, janangue'a dá 'da ahu ran t'ɛdi i ja ua. Pɛ gan 'yohʉ rán t'ɛdi ma Hmuhu ra Jesús. ⁵Νε nu'a ran 'yohu, dami hyømhbu thi da bent'a ra zithu, di unba rá ngoc'yei, n'damhma da 'yäp rá punbi Oja nangue rá ts'oqui. Ne da zä da yan Oja nangue rá mbui 'bu bi zøn ra pa bá peng ra Hmu buya. ⁶Pe hingui sä gan 'yexhu. Ha hin guí pahmbu n'da ram hma, ngue ts'utho ra íxi pe i sinni gätho ra juni. ⁷Dami hyømhbu thi a ra nyo'ixi ngue ran ts'o guí 'buhmbu di ts'on'na nim petihu. Janangue'a xtán ho ahu, tengu ra thuhme an t'øt'e nangue ra juni ma'da'yo ngue nte ma íxi da mbe, i ts'i 'bu ndabaxjua. Ne i jatho dan hoju, gue'a bi nde a ra Cristo 'bu mim 'bøts'e zehe bi hoga ma ts'oquihu. Nε gue'a ra hmεpya mi u u yu ja'i 'bu ndabaxjua mi pøxa n'da ra t'ude'yo. ⁸Janangue'a thocpa thoho hønt'a xun ho ga øthu, ne hønt'a ra 'yu majuani ga tenhdu. Ne gue'a ra thuhme a ngue hin'yu ra íxi. Pe hin ga øthu tengu ra nyo'ixi, ngue 'be'a gätho dín numanhose nangue man 'yomfenisehu, ne 'be'a gätho mi'da xun ts'o. ⁹Pe nu ra søcua dá pen'nahu mam'bet'o, ne hin gá pahmbu 'bɛ'a dín nde xcá xi

ahu, ngue dá xi ahu hin gan 'yohu n'da ra 'yomt'εni. 10 Pε hin dí εn ahu him man zohmbu u hinga na padi, madague'bu yu 'yomt'eni, ne yu ziyate, ne yu be, ne'u thande yu hyäte oja. Nguetho nu'bu gui sothohu u, nε gui 'uehmbu ua ja ra ximhäi 'bu. Pe hinga gue'a dá xi ahu a. 11 Pe nu'a mi nde xcá xi ahu, ngue hin gui 'yɛmfu ni cuhu u 'da, ne xín gui comhbu rá 'befi Oja n'da 'bu ɛmbi ra cu 'bu guexta'a ran 'yomt'eni øt'e o gue'bu bin thatui a him mi sä xtín thạtui, o ran ts'iyate, o i thande yu hyäte oja, o ne'u yu ucuate, o gue ra iti, o gue ra bε. Pε o guín 'yohu u tengu u, xínga 'darpu gan sihmehu u. 12-13 Nguetho ni 'bɛfihu gui juanbahu ni mi'yec'yeihu 'bupu ja nim petihu. Janangue'a gui hyømhbu thi a bi 'yøt' ra ts'oqui bu guí 'buhmbu. Pe nu'u hinga ná ec'yei, hingui sä ga juanbahu u, hønt'a Oja di juanba u.

Sä din hocpa zehe yu 'yec'yei

Hanja gnín yap zehehu bu 'buh ra ze'mi, nu'a hing ra 'yɛc'yɛi. Hanja hinga gue'u ni mi'yec'yeihu guí xihmbu di hoc'ahu. ²Ha hin guí pąhmbu ngue ga juanbahu ra ximhäi 'bu rán zegui yu pa, nguetho yú t'uhni gahu Oja. Hague má guet'u yun sui dí øthu hin ga hoju, nguetho man'da hingui hei dan hocpahu. 3Ne asta gue'u yúm 'bɛhni Oją mahɛ̞ts'i ga juanbahu. Ha má guet'u yun junt'i dí øzehehu yu pa i jabu ya ngue hin da zä ga hoju. ⁴Janangue'a nu'bu ja n'da ran junt'i, pε hin ga xihmbu n'da ra ze'mi, nguetho hin dí comh ma 'befihu a. ⁵Gue'a dí xi

ahu a, janangue'a jatho gui pɛ'ts' ni sähu 'be'a guí øthu. Ha njo'o n'da ahu i ja ts'u ran 'yomfɛni ngue'a di hoc'ahu nangue ran sui guí øthu. ⁶Ha i jatho da zix rá cu bu 'buh ra ze'mi n'da ra 'yec'yei, ne hing ra 'yɛc'yɛi a ra zɛ'mi. ⁷Nɛ nu'a gní 'yøthu yun junt'i, ne gue'a gním 'bɛhmbʉ a. Hanja hin gní hyäthʉ a ran ts'o i t'øt ahu, ne hin guídí jafu da fɛ ahu 'bɛ'a guí pɛshu. 8Hin guí häthu, nguetho guese ahu guí ørpahu ran ts'o ni cuhu, ne guí pɛfu 'bɛ'a i pɛ'ts'i. ⁹Pɛ ha hin guí pahmbu ngue hin da zä da yurpu di manda Oja n'da ra ts'om'bäi. Ne o sä guim bemhbu da zin Oja u yu 'yomt'eni, o gue'u i thande yu hyäte oja, o gue'u in nutonto yú xisu yú mim 'yohuhu, o gue'u di 'yasäba yú mim 'yohuhu tengu'bu ra xisu. 10 Νε hin da yurpu di manda Oja u yu be, o yu ziyate, o yu iti, o yu ucuate, o yu nexmate. 11 In jabu gá 'yøthu 'da ahu, pε bi mba m'be't'e ni ts'oquihu, nε guesε Oją bi 'yøt'e yú t'uhni ahu. Nε bi hoc'ahu nangue a guí εc'yεihu ra Hmu Jesús, ne nangue a guí 'buhmbu rá Hogandahi ma Ojahu.

Rá mbeti Oją ma ją'ihu

12 Majuani a ram hma ngue i ja man t'ɛdihu ga øthu 'bɛ'a gätho dín ndehu. Pɛ m'batho a da bømanho ga øthu. Majuani ngue i ja man t'ɛdihu ga øthu 'bɛ'a gätho dín ndehu. Pɛ hin gan nde ga øthu a da dacpa ma mbuihu. 13 Nɛ majuani a ram hma nangue ran ts'ihmɛ, ngue nu'bu in ndehmɛ ma fohohu, dan sihmɛhu. Pɛ hin'yu 'bɛ'a man'da nts'änni nangue ma fohohu, nɛ da zøn ra pa ngue da man Oja him

man dan sihmehu. Pe nu'bu in nde ran 'yomt'ɛni ma ja'ihʉ, hingui sä ga øthu a, nguetho nu ma ja'ihu bi zän Oja dim 'bupu ra Hmu. ¹⁴Nɛ da xox Oja ma ja'ihu nangue rá ts'edi, tengu thoho a ra Cristo bi xox 'bu mi du. ¹⁵Ha hin guí pahmbu ngue nu ma ja'ihu, gue'a rá ja'i ra Cristo a. Ha da zä ga hạju n'da xequi rá ja'i ra Cristo, ngue ga øt' ran 'yomt'eni, tengu'bu n'danja'i tho ga øt'be n'da ra xisu ra 'yomt'ɛni. Pε hingui sä ga øthu tengu a. ¹⁶Pε gue'a i øt' ra 'yomt'ɛni bʉ na nu Oja, tengu bi mam bu ja rá t'ohni, ngue nu'u mi yonja'i, pegue bi 'yøt'e tengu'bu n'danja'i tho bi gohi. ¹⁷Pe nu'a ra ja'i 'bu in 'youi ra Cristo, tengu'bu n'danja'i tho da 'yøt'ui. ¹⁸Janangue'a da zä gui 'dahmbu buya nangue'a ran 'yomt'eni. Nguetho nu mi'da yu ts'oqui di ts'onba bu maxøts'e rá ngu Oja, pe nu ran 'yomt'ɛni di ts'onba bu mbo rá ngu Oją. 19 Ha hin guí pąhmbu ngue nu ni ją'ihu rá nguse rá Hogandahi Oja a, nguetho 'bupu mbo ma ja'ihu a, gue'a bi 'daju Oja a. Ne nu ni ja'ihu hin ni mbeti zehehu a. 20 Nguetho Oja bi 'yøt'e rá mbeti ahu, ne tengu'bu xum hmadi bi gut'i. Janangue'a ga ørpahu rá 'befi Oja nangue ma ja'ihu ne nangue ma mbuihu.

Ran zofo nangue ran thạti

Pε nuya ga xi ahu a guí ängahu. Nε ya dí xi ahu ngue xun ho 'bu da zet'a n'da ran 'yohu, hin da hyon rá xisu. ²Pε εmmε xun ngu ran 'yomt'ɛni i ja. Janangue'a man'da xun ho 'bu dim 'buh rá xisu n'da ran 'yohu, nε dim 'buh rá ndø

315 1 CORINTIOS 7

n'da ra xisu. ³Nu ran 'yohu i jatho dim 'buhmi xun ho rá xisu. Ne ngutho ra xisu, i jatho dim 'buhmi xun ho rá ndø. 4 Nguetho nu n'da ra xisu hin di manda zehe a rá ja'i zehe, pegue di manda a rá ndø. Ne ngutho n'da ran 'yohu hin di manda zehe a rá ja'izehe, pegue di manda a rá xisu, nguetho n'dat'a ram 'bui øt'e. ⁵Pe hin da 'ue'a n'da nangue rá xisu, ne xín da 'ueh ra xisu nangue rá ndø. Pε hinda hønt'bu gá bemhbu gan yahu Oja 'da yu pa da zä gui sethu. Pe i jatho 'da'angu guim bemhbu ni xisuhu. Ne m'bejua buya da zä gan yahu ni xisuhu mahøn'a. Nguetho nu'bu nya'a ts'u yu pa hin gui yahu ni xisuhu, xømhma thoho da hyä ahu ra zithu 'bu hingui sä gui sethu. ⁶Nu'a dí xi ahu, tengu'bu n'da ran t'ɛdi. Pɛ hin dadí hɛc'ahu 'bu guín nde gan thathu o xin guín nde gam 'busehu. ⁷Pe dí ensegä ngue xun ho 'bu gätho dim 'buse tengugä. Pe hingui sä, nguetho n'da ngu n'da bin 'daju ra ts'edi nangue Oja, ngue 'dahma 'dan'yo ga øthu n'da ngu n'daju. 8Pe dí xi ahu, nu'u to'o hinga na din thạti, ne'u xun du yú xisu, ne'u xun du yú ndø, man'da xun ho 'bu ya hin gan simhbu, tengu thohogä. ⁹Pe nu'bu hingui sä da zethoho n'da, man'da xun ho da hyon rám pepiui, ngutho n'da ra xisu, ne ngutho n'da ran 'yohu. Nguetho εmmε di xømbui ngue njongui 'buhmi. 10 Ne dí xi u to'o i 'buhmi yú ndø, hingui sä da zogui. 11 Ne nu'bu bi zoh rá ndø n'da ra xisu, i jatho dim 'buse, o gue dim 'buhmi mahøn'a a rá ndø. Nε ximangutho n'da ran 'yohu, hingui sä din xummi a rá xisu. Ne

nuna ran t'ɛdi i jaua dí xi ahu, him mam hmansegä, pegue rám hma ma Hmuhu ra Jesucristo 'bu mi'bucua ja ra ximhäi. 12 Νε nu man'da ram hma dí xi ahu him bi man'a ma Hmuhu 'bu mi 'bucua. Nε nu'a ram hma dí xi ahʉ, nu'bʉ n'da ra cu, ngue hing ra 'yɛc'yɛi a rá xisu, pe nu ra xisu 'bu in nde ma zä dim 'bupu, pe man'da xun ho 'bu di thoqui dim 'buhmi. 13 Ne ngutho n'da ra xisu 'bu ra 'yɛc'yɛi, nɛ hing ra 'yɛc'yɛi a rá ndø, pɛ nu rá ndø 'bu ma zä in nde dim 'buhmi a rá xisu, pe man'da xun ho 'bu di thoqui dim 'buhmi. ¹⁴Ne nu Oja di jamansu n'da ran 'yohu ngue hing ra 'yɛc'yɛi, ngue'bu ra 'yɛc'yɛi a rá xisu. Ne ngutho n'da ra xisu ngue hing ra 'yεc'yεi, pε Oją di jamansu ngue'bu ra 'yɛc'yɛi a rá ndø. Nu'bu hin xtan jabu, ya hin xtí jap Oja ni t'uhnihu 'bu. Pegue ya majapi nangue Oja μ. ¹⁵Pε nu'a ran 'yohu hing ra 'yεc'yεi, o gue n'da ra xisu, nε nu'bu in nde da zo a ra 'yεc'yεi mi 'buhmi, man'da xun ho 'bu di thøtho da mba. Ne hingui sä da 'yørpa ra ts'ɛdi dim 'bʉhmi 'bʉ ya hingui nde. Nguetho Oją bi zängahu dam 'bumanhohu ngue nte man sui din ja. 16 Ne nu'bu guí 'buhmbu u hing yu 'yec'yei, xømhma thoho da yan yu mbui 'bu gui fäxhu da din ra 'yu, ne'ahu gyú xisuhu, ne'ahu gyun 'yohuhu. 17 Pe jatho gui 'yøthu a dí bømanho a rá ts'edi bi 'da ahu Oja, n'da ngu n'da ahu, ngue nda'a bi zän Oja gdám 'buhmbu, tengu gmí øthu 'bu hin ní zon'nahu Oja. Ne ngutho dí xicä mi'da ngue hønbu go hapu i ja yúm peti yu 'yec'yei. ¹⁸Ne nu'u to'o

1 CORINTIOS 7 316

nthequi yú xifani 'bu mi 'yec'yei Oją, pε i jatho guexta'a rá hmεpya yú ją'i nguetho yu judío. Ne nu'bu n'da ngue him mán thequi rá xifani, pε hin da bεni ngue m'bεjua tho da hyequi. ¹⁹ Nguetho nte ni mba tho 'bu am hmεpya uague hin'na. Pε man'da i jats'editho ga øthu a i xiju Oją. 20 Pε n'da ngu n'da da 'yøt'e nda'a da zä dám 'bui, tengu mi øt 'bu hin ní 'yɛc'yɛi. ²¹ Nu'bu gmín 'yehehu bu 'buh yu ja'i 'bu gmí däp ni mbuihu Oja, pe hingui jatho gui päh ni 'befihu. Pe nu'bu da xi a ni hmuhu ngue gui pømhbu, pe man'da xun ho 'bu gui pømhbu buya. ²²Ne nu'bu n'da ra 'yehe, 'bu mi däp rá mbui ra Cristo, bi mba ma thøgue bu na nu Oja. Νε ximangutho n'da ra ja'i ngue him bin 'yehe, pe bin 'yehe nangue ra Cristo. ²³Ngue nu Oja bi 'yøt'e yú t'uhni gahu, ne tengu'bu xum hmadi bi gut'i. Janangue'a 'yo guí tenthohohu 'be'a di 'bep ahu gui 'yøthu yu ja'i 'bu i xi ahu gui 'yøthu yu ts'oqui. ²⁴Ne n'da ngu n'da ahu, ma zi cu ahu, gui thoqui gui 'yøthohohʉ ni 'bɛfihʉ, tengu gmí øthu 'bu hin gní 'yɛc'yɛihu Oją. Pɛ man'da gui thoqui gui 'yøthu xun ho guepu da numanho Oja. ²⁵Nε nu man'da ram hma guí ängahu nangue'u njo'o yú xisu o yú ndø, pε hin'vu n'da ram hma bi mansε a ma Hmuhu ra Jesucristo 'bu mim 'bucua ja ra häi. Pɛ ga xi ahu a dím bengä. Ne xun ho 'bu gui 'yøthu a dím mangä, nangue a rá mate ma Hmuhu bi 'dac ran 'yomfeni. ²⁶Ne nu mam hmangä dí xi ahu ya, nangue njo'o yú xisu o njo'o yú ndø, xun ho 'bu din jatho tengu in ja ya.

Nguetho nu'u yu pa jabu ya, xun heitho 'bu gan nuhu yun unbi 'bu dán simhbu. ²⁷Ne nu'bu n'da i 'buh rá xisu, hin da beni ngue da hyegui, nε nu'bu n'da njo'o rá xisu, hin da beni da hyoni. 28 Pe nu'bu guín ndehu gan simhbu, hin guim bɛmhbu ngue ra ts'oqui a. Nɛ ngutho 'bʉ n'da ra hmute da bɛni din thạti, pε hin da 'yɛmbi ra ts'oqui a. Pegue nu'bu gan simhbu, man'da xun hei ram 'bui gui 'yøthu, xinda gue'bʉ njon xtím 'bʉ ahʉ. Νε dín nde gan yan ahu nangue u xun hẹi. ²⁹Ma zi cu ahʉ, nu'a nam bøn a dí xi ahu, him min ngu yu pa dam 'buhmbu ua ja ra ximhäi. Janangue'a i jatho ga humbahu ga juahmbu n'dihi rá 'bɛfi Oją yu pa ní mba bu. Ne nu'u to'o i 'buh yú xisu buya, ne xingui ts'u da beni da 'yɛ'ts'a rá 'bɛfi Oja nangue a rá xisu. 30 Ne hingui sä nya'a ga eshu rá 'befi Oja 'bu ya dín nuhu ra dumbui, nguetho dí xønhdu ga juahmbu n'dihi rá 'bɛfi Oją. Nɛ xíngui sä nya'a dan johyahu nangue ma amigohu, xínga gue'u dí tämhbu nya'a gan numanhohu. 31 Ne ngutho u to'o gätho i øt' yú 'befi zehe ua ja ra ximhäi, pe man'da zi ts'utho da beni. Nguetho mi ts'utho da guadi 'be'a gätho dín nuhu ya. ³²Janangue'a dín nde ahu ngue man'da ts'utho guim bemhbu 'be'a di hɛn ahu ua ja ra ximhäi. Nɛ nu'bu n'da ran 'yohu ngue njo'o rá xisu, pe man'da emme da ben a rá 'befi Oja, nguetho 'buse, ne i honi 'be'a da numanho Oja. ³³Pe nu'bu ya i 'buh rá xisu, ne hinga hønt'a rá 'bɛfi Oją da hyom buya, nɛ'a rá xisu da numanho ne da hyonbi 'be'a

gätho da hyoni. 34Ne nu'a n'da ra xisu ngue njo'o rá ndø, pε man'da da zä hønt'a rá 'bɛfi Oja da bɛni da 'yøt'e. Pe ne'a rá ja'i ne'a rá mbui hønt'a rá 'bεfi Oją øt'e. Pε nu'a ra xisu 'bu ya i 'buh rá ndø, ne da 'yøt'e dí numanho a rá ndø. 35 Ne nuna dí xi ahu dín nde ga fäx ahu, nε hin dín nde ga ʉn'nahʉ. Nε dín nde ahu gui 'yøthu a xun ho, ngue hin di hei ni mbuihu 'bu gui 'yøthu rá 'befi Oja. ³⁶Pe nu'bu n'da ran 'yohu ngue i 'bu a n'da rá t'ixu, ne ya bi zøn ra ora din thati. Ne im beni hingui ho 'bu da zammi, ne emme in nde rá t'ixu din thati, xun ho 'bu di tharpa a rá t'ixu, nε hin da 'yɛmbi ra ts'oqui a. 37 Pɛ nu'bu n'da ran 'yohu hin te im bɛn rá mbui ngue din thạt'a rá t'ịxu, ne nu'bu ja rán t'ɛdi rá ta da zä da xifi, pegue man'da xun ho 'bu dim 'butpu. Ne n'dat'a im beni ngue gue'a xun ho da 'yøt'a. Ne da bądi xun ho a bi 'yør buya. 38 Janangue'a nu'u to'o di tharpa yú t'ixu, xun ho i øt'e, pε nε'u to hingui nde di tharpa yú t'ixu, pe man'da xun ho i øt'u. 39 Pe nu'bu n'da ra xisu bi hyon rá ndø, pε i jatho dim 'buhmi gätho yu pa i 'bu a rá ndø. Ne nu'bu ya bi du a rá ndø, 'bu in nde din that mahøn'a, xun ho ngue din thati, pegue n'da rá mi'yec'yeiui din thatui mahøn'a. 40 Pe dí ensegä ngue man'da din johya 'bu hin din thạti mahøn'a. Ne dím beni ngutho di bengä rá Hogandahi Oja.

'Da yun t'änni nangue yu 'bøts'e

Nɛ nuya dín nde ga xi ahʉ a gá 'yängahʉ, 'bʉ da zä gui sahʉ a ra ngø xí 'bøspa ʉ yʉ hyäte

oja, uague hin'na. Νε majuani guím mamhbu ngue gätho gahu dí pahmbu xun ho a. Pe nu'a gní pahmbu, gue'a gnín 'yextahu a. Pe man'da gue'a ran hugcate nan te rá 'befi Oja a. ²Pe nu'bu guí ensehu guí pahmbu ran 'yomfeni, pe guepu na fapu buya ngue hinga ná pahmbu xun ho, nguetho guidín 'yɛxhu. 3Pe nu'bu majuani din numanhohu Oja, ne dí comhbu rán 'yomfeni Oja 'bu. 4Nuya, nu'u 'be'a gätho bí 'bøspa u yu hmite, pε dí pąhmbu hing yu oją u embi n'youi. Ne dí pahmbu n'datho Oja 'bui, ne hønt'a i ja rá ts'edi a. 5-6 Ne madague'bu t'ɛmbi 'bʉh yʉ oja ua ja ra häi nepu mahets'i, ne t'embi xun ngu yu oją ne yu hmu, pe nuju, hønt'a n'datho a Oją dí 'buhmbu, ngue ra Ta, ne bi zänni 'be'a gätho i ja, neju bi zängahu ga ørpahu rá 'befi. Nε hønt'a n'datho a ra Hmu dí 'buhmbu, ngue gue'a ra Jesucristo a, ne gue'a í 'yøt' Oją 'be'a gätho i ja, nε gue'a bi 'dajʉ ra te xʉn ho ma mbuihu a. 7Pe hinga gätho yu cu guí 'buhmbu i padi xun ho nangue u yu hyäte oją, ne ząi mi thąnde u, janangue'a ɛna guexta'a im bɛm 'bu ya bi za a ra ngø xí 'bøts'e. Νε i ense ngue'a ra ts'oqui a 'bu ya bi za, nguetho hinguin zaqui yú t'ec'yei. ⁸Pe hinga gue yun ts'ihme dí sihu nan numanhoju Oją. Xín gam bɛmhbu ngue'a nan numanhoju a 'bu dí sihu o hin dí sihu. ⁹Pe i jatho gui jamansufu yú mbui ni cuhu. Ne mamí jafu da dang bu ja ra ts'oqui, nguetho hinga na padi 'be'a guí øthu 'bu guí øthu a guí pąhmbu xun ho. 10 Pε xi'bu da nu ahu 'da ni cuhu gue'a guí sihmehu bu ja

yú nija yu hmite. Ne guí pahmbu xun ho 'bε'a guí sihu. Pε nu'u ni cuhu im bense gue'a ra ts'oqui a 'bu da ts'i. Ne xi'bu sä da 'yena da hyut'an zambui da zi u xí 'bøx buya. ¹¹Jananjabu nu nin 'yomfɛnihʉ gue'a nam 'bɛh ni cuhu a, nguetho hinga na padi xun ho. Pε nu'u ni cuhu, gue'a í du ra Cristo a ngue da yanba yú te. ¹²Janangue'a nu'bu ngubu guí øthu, pe guí ørpahu ra ts'oqui ra Cristo 'bu, nguetho guí ørpahu ra ts'oqui ni cuhu ngue hinguin zaqui yú t'ęc'yei, ne guidí ts'onbahu yú mbui. ¹³Ne nugä drá Pablogä, nu'bu gue'a ra ngø dí sagä nin unba rá mbui n'da ma cu, ρε man'da xun ho 'bu him man ga sagä ra ngø 'bu, janangue'a hin ga japi da mbeng bu ja yu ts'oqui n'da ma cu.

Da beni nda'a xun ho da 'yøt' yú 'bäihu ra Cristo

Ne nugä man'da ja man t'edi xcá øt'ä 'be'a gätho dín numanho ga øt'ä, nguetho majuani ma 'bäigä'be a ra Cristo, ngue dá nusegä a ra Hmu. Ne mfadi majuani bin 'dac man t'ɛdi nguetho dá ja ahu gá 'yɛc'yɛihu Oją nangue rám fäts'i ra Hmu. ²Ne masque i 'buh mi'da engui him ma 'bäigä'be ra Cristo, pε nu'ahu guí pąhmbu, nε mfadigui nangue ahu. ³Ne gue'a ga xicä u to'o da 'yängui nangue man t'ɛdi. ⁴Nɛ i ja man t'ɛdi xcá tạh man zäbi o xtín 'dac man ts'ihme. ⁵Ne i ja man t'ɛdi xcán thạt'be n'da ra xisu, ngue ma mi'yɛc'yɛi'be, nɛ xcá sits'i hønbu go hapu dí 'yo, tengu i øt'u yún 'yohu ra Cristo, nε ra Pedro, ne mi'da yú 'bäihu ra Cristo.

⁶Pe ha guím bemhbu hin'yu man t'ɛdi'be a ra Bernabé ngue xcá ε'ts' ma 'bɛfi zɛhɛ'be ngue'a ná tạh man ts'ihme'be. ⁷Nguetho njo'o n'da ra dofui i juzehe yú gasto zehe. Ne n'da ra ja'i 'bu i øt' ran uandät'ä i jant'ędi da zi. Ne yu ją'i 'bu di 'yeh yú de'yo, i jant'ędi da zip yú xi'ba u yú dε'yo 'bu in nde. ⁸Pε hinga hønt'u yu ja'i im ma tengu na dí xi ahθ, ρε nε'a Oja im ma tengu na, ne gue'a mán t'o't'i bu ja rán t'ɛdi Oja a. 9Nguetho nu'a rán t'ɛdi Oja bi 'yo't'a ra Moisés: "Pe nu'bu n'da ra mbundani i pu, hingui sä da thurpa rá nde, n'damhma da zä da za u yu xi'yømpøhø i jabu," bi 'yena. Pe ha gam bemhbu hønt'u yun dani in nu Oja. 10 Ha hin dí pahmbu ngue neju da t'ørcahu a i hmangua, nguetho n'da ran t'uti a, man t'o't'i nangueju. Ne tengu'bu dadím pehmbu bu ja ra häi, ngutho u yu duju ne'u yu mbeju, ne xun ho 'bu da beni da dah yun zäbi nangue yú 'bɛfi øt'e. 11 Nɛ nugä'be tengu'bu ya dá tu'be ra hmudä bu guí 'buhmbu nangue ra te. Pe xiya ha guím bemhbu hingui ho 'bu xcá xoc'be ngue ga si'be. Nu'a nam bøn'a dí xi ahu, tengu'bu ya xquí jurca'be. ¹²Pε nu'u mi'da yu xänbate i hani 'be'a guídí unhdu, ne man'da i ja man t'ɛdi'be xcá ham'be 'bu xcá nde'be. Pε hinga gue'a dí hongä'be ngue'a ga tą'be. Xun ngu u gätho dadín 'yɛpta'be, nguetho dí su'ahu hin xquí hyamhbu a rán ho ma'da'yo ra Cristo. ¹³Pε guí pahmbu 'be'a i øt'u to'o dim pepu ja yú niją ma mijudíohe, hønt'a i tim bu ja ra niją i si, ne gue'a nam pep u yun t'unni din t'un'na Oja

bu. ¹⁴Nε nguthogähe ya, ngue'a dím mamhbe rán ho ma'da'yo ra Cristo, bi zän ra Hmu ngue gue'a dám pεpähe a rám hma. ¹⁵Pε hin dí øt'u yun t'ɛdi gä bin 'daqui. Nɛ hinga gue'a nam bøn'a dá ot'ahu a, ngue gui 'daju man zäbigä. Pe man'da xun ho 'bu ga tugä, xínda gue'bu 'bo'o da 'uingui, ne ndetho dí 'uega man johya. 16 Pε nu'bu hønt'a ga øt'ä ngue ga mangä rám hman ra Cristo, pε hin dí guah man johyagä a 'bu, nguetho gue'a ín 'dac ma 'bɛfi a. Nguetho jats'ɛdi tho gam mangä a ram hma. 17 Pε nu'bu mpähä thoho dí øt'ä rá 'befi ma Hmu, ne i ja 'be'a dí taha. Pe nu'bu dats'edi tho ga øt'e ts'utho, pe guemhma 'yo ma güenda ga juadi. ¹⁸Pε 'bε'a nin jurca 'bu mpähä thoho dím man rán ho ma'da'yo ra Cristo. Pe man'da dí tah ran johya 'bu nte dí tạcä ra hmɛ. Janangue'a man'da xun ho 'bu nte ga taha, madague'bu i ja man t'ɛdi ngue xcá tạhạ nangue'a ma 'bɛfi. 19 Nɛ madague'bu hingan ts'änni ngue dan 'yehegä, ne njo'o n'da ra ja'i ngue'a ma hmu, pe dí cohi tengu'bu drá 'yehegä u gätho yu ja'i, nguepu da zä ga zedi da din ra 'yu xun ho u mi'da xun ngu. 20 Janangue'a nu'bu dí 'buhmbe ma mijudíohe, ngue i øt' yun t'edi bi xi Oja yu judío, necä dí øt'ä u, madague'bu hin di mandagä u. Janangue'a da zä ga zerpa yú mbui da 'yęc'yei ra Cristo. ²¹Pe nu'bu dí 'buhmbe u hingui pah yun t'edi bi xi Oja yu judío, necä hin dí øt'ä u. Janangue'a da zä bu ga zedi da 'yec'yei ra Cristo. Pε hingui nde da ma ngue dí sotho u yún t'edi Oja, nguetho dí tendä

a im man ra Cristo. 22 Ne nu'bu dí 'buhmbe u xun güent'i thoho yú t'εc'yεi, pε nεcä dí øt'ä tengu'bu xun güent'i thohogui, janangue'a i sä bu dí zedi da 'yec'yei ra Cristo. Nε gue'a dí øt'ä, ngue 'da'iguje n'da ngu n'da yu ja'i, ne dí honi xun ho 'bεpu dí 'yεc'yεi yu ją'i. ²³Guehna gätho dí øt'ä na, janangue'a da zä ga comhbu rán japi ra Cristo hønt'a go to'o ní ja'i da hyan'a ran ho ma'da'yo. 24 Pε guín nuhu yun t'uti nangue'u i tihi, madague'bu i tihi, pε n'datho a i tạh ran t'unni. Pε dami tihmbu ya nguepu da zä gui tahmbu. 25 Ne tengu thoho yun 'yeni ua ja ra ximhäi, emme din jamansuse, ne hingui nde da 'yøt'a di hɛni. Pɛ hønt'a dim 'bɛdi i tą u. Pe nu'bu in jabu ga øthu, ga tahmbu a da hyät'i mazai. ²⁶Ne nugä tengu'bu dí øt' ra 'dihi, dí hạx ra 'yu i ugntho bu hapu i ja ran taha. Ne tengu'bu 'bo'o dadin tun'be, pe hinga ha sätho dí pucpi, pε dí pądi hapu dí täpi xun ho. 27 Pε dí sam zehe ma ngøc'yei, dín ndepe da 'yøt'a dí xifi, n'damhma hin go ga 'bɛcä a 'bɛ'a dí xi'u mi'da ngue da daha.

Ma hecpi yu 'yec'yei nangue yu hmite

Ne gue'a dín nde ahu gui pahmbu a, ma zi cu ahu, ngue 'be'a bi 'yøt' mam bombøtahe maya'bu, gätho mi cot ra güi bu ní mba u, ne bi zits'i. Ne gätho bi 'daxpu 'danguadi ra thengdeja.

Ne gätho bin yam bu ja ran unbi 'bu mi den ra Moisés, tengu'bu ya yú yante a. Ne janangue'a i t'embi tengu'bu bin xixya nangue'a ra

1 CORINTIOS 10 320

deja bu bi thogui ne ra güi. ³Ne gätho 'da'an zitho ra maná ngue ra hmε bi un Oją hapu ní mba. ⁴Nε gätho bi zi ra dehe bi bøm bu ja ra do, tengu'bu bi zip rán zaqui a ra Cristo, ne tengu'bu ya bin 'vohu ra Cristo bu ní mba u. ⁵Ne madague'bu bi t'ørpe gätho u, pe Emme xun ngu u him bi numanho Oja a bi 'yøt'e. Ne hønbu go hapu bin c'uaxt' yú do'yo bu ja yu dapo bi thogui. ⁶Nε gue'a urcahu a, janangue'a hin gan ndehu ga øthu yu ts'oqui, tengu mi øt'u 'bu mi 'yo bu ja ra dapo. ⁷Janangue'a o guí thandehu yu hyäte oja, tengu mi øt'i 'da u, tengu mán t'o't'i, ngue bin sihme u ne bim mihni, bi ndants'i bin ne 'bu mi dande ra pøte xí 'yøzehe. ⁸ Janangue'a hin ga øthu ran 'yomt'eni tengu mi øt'i 'da, ne n'dapa thoho án du 'däte ma hyu mahuahi nja'i. ⁹Pε hingui sä ga sähu ra Hmu nangue ma ts'oquihu, tengu mi øt'i 'da, ne xun ngu bi du, bi za yu c'ɛyą. 10 Janangue'a hin ga säman'uhu nangue Oja, tengu bi 'yøt'u 'da, ne gue'a bí mbenh Oja n'da ram 'bɛhni mahɛts'i ngue'a bi hyo u. ¹¹Nε gue'a bin ja a tengu'bu ya n'da ran t'uti ngue i suju dan jahu bu. Ne gue'a xmán t'o't'i 'be'a dám 'buhmbu yu pa i jabu ya ngue rán zegui. ¹² Janangue'a nu'bu dím bemhbu tengu bi 'yøt'u, pe hingui sä ga ɛmhbu, nangue ra ts'ɛdi bi 'daju Oją hin'yu 'be'a ga suhu. Pe i jatho emme dam fäsehu, ngue hin ga tạnju bu ja yu ts'oqui. ¹³Pe nu'bu i ts'äc ma mbuihu ga øthu yu ts'oqui, tengu'bu i ts'äp yú mbui gätho mi'da yu ja'i. Pe dí pahmbu di zerca ma mbuihu Oja ga tafu ran

ts'äte. Pe nu'bu ena da siju mi'da xun hại ngue hin da zä ga tạfu, hin di jaju Oja gan nuhu u. Ne i urcahu 'bερu dá tạfu u dín nuhu. ¹⁴Nε nuya, ma zi cu ahu, ne xingui ts'u guim bemhbu gui thandehu yu hyäte oją. ¹⁵Ne guehna dá xi'ahu na ya, nguetho i ja nin 'yomfɛnihu, nɛ sä gui pąsehu 'be'a nam bøn'a dá xi ahu. 16 Ne zai dí äfu Oją rán jąpi 'bu dí sihu ran ts'ihme bi zän'na ra Cristo bu ja ram peti. Ne nu'bu dí sihu rán gui ra uva, ha hin dím bemhbu ngue dí comhbu rá ji ra Cristo ngue bi hogahu. Ne'bu dí xemhbu ra hme ne dí sihu a, ha hin dím bembbu ngue dí combbu rá ja'i ra Cristo ngue bi unba 'bu mi hogahu. 17 Madague'bu ɛmmɛ xun nguju ngue dá sihu u, pe n'dat'a ra hmε, nε gue'a ní 'yørcahu n'datho ma ja'i dí comhbu a ra Cristo. ¹⁸Ne tengu bi 'yøt' ma mi'israelhe, gä bi zi yun t'unni mí pa nt'unni Oją, nε gue'a í gomhma rá te Oją a. 19 Janangue'a hin nin sähu gui comhbu a i si u pa m'bøspe yu hmite, madague'bu hingui nduxqui u yu ngø i pa m'bøspe u, nε hin'yu yú ts'edi u yu hmite. 20 Pegue dí xi ahu, nu'u 'da ngue hingui pa Oja, i pøspa yu hmite, pegue yu zithu i hani. Janangue'a hin dín nde'ahu gui com'ma gui sihu u yú 'bøts'e, n'damhma hin gui comhbu rá 'befi yu zįthu. ²¹ Hingui sä ga thecpahu rá tasa ra Cristo 'bu dí thecpahu rá tasa yu zithu. Ne hingui sä ga comhbu rá ngợc'yei ra Cristo 'bu dí comhbu yú 'bøts'e yu zįthu. 22 Uague guím bemhbu go gui muthu a Oja. Ha man'da i ja ni ts'edihu xinda gue Oja.

I sä 'bε'a da 'yøt' yʉ 'yε̞c'yε̞i, pɛ da bɛ̞n ran huɛ̞cate

²³ Majuani a ram hma ngue da zä ga øthu 'be'a go dín numanhohu. Pe nu'bu ga øthu 'be'a gä i ja, hinga gä xun ho bu dán gohi. Majuani da zä da 'yøt'e hønt'a go numanho n'da ra ją'i, pe hinga gätho nan te rá 'befi Oja u. 24Pe i jatho ga huanhdu nda'a man'da xun ho, ngue da zä ga fäxhu u mi'da, ne hin nangue man hosehu. ²⁵Pe dami sihu 'be'a gätho i 'bä bu ja ra täi, ne hingui jatho gui 'yänhdu 'bɛ'a di ja a ra ngø 'bu m'bøts'e o hin'na. ²⁶ Nguetho gätho rá mbeti Oja u gätho i ja ua ja ra häi, ne ra ngø, ne'a ra ximhäi buya. ²⁷Nε nu'bu 'bo'o da zix'ahu na ts'ihme bu ja yú ngu u hing yu 'yɛc'yɛi, nɛ nu'bu guín nde gui mbähä, dami sahu 'be'a gätho di 'da'ahu, ne hin te gui 'yänhdu, ne o guím bemhbu ngue di hec'ahu Oją ngue gui sihu. 28 Pε nu'bu n'da ngue da xi'ahu: "Nuna ra ngø bi mba m'bøspe yu hmite," da t'ɛn'ahu, pε o guí sihu buya, janangue'a hin gui unbahu rá mbui a to bi xi'ahu, nguetho im bɛni hingui nde Oją gui sihu a. 29 Nguetho i jatho gui jamansup rá mbui ni mija'iui, madague'bu guí padi ngue xun ho a ra ngø. Pε masque 'bu'i 'da ahu guín nde gui 'yängahu: "Hanja ngue ga et' man ts'ihmehu 'bu 'bo'o hingui numanho a, pε tengu'bu hin'yu ma ts'edihu 'bu. 30 Ne nu'bu dadí unhde ra jamadi Oja nangue man ts'ihme dí sihe, hanja ngue sä di c'aman'uje u 'da," gue'bu 'bo'o da 'yängui. 31 Pe dí xi'ahu, dami jamansuhu a guí øthu, uague ran

ts'ihmɛ guí sihu, o 'be'a gätho guí øthu, pɛ hønt'a dí t'ɛspa Oja gui 'yøthu. ³²Nɛ ɛmmɛ ga jamansuhu 'be'a dí øthu ngue njon ga jafu da dangui, xinga n'da ra judío, xínga gue'u hing yu judío, nɛ xínga gue'u ma mi'yɛc'yɛihu. ³³Nguthogä ya, ɛmmɛ dí honi ngue ga øt'ä 'be'a gätho da numanho mi'da yu ja'i xun ngu, nɛ hin dí honi 'be'a dín numanhosɛgä. Pɛgue dí honi nangue mi'da, nguepu da zä da din ra tema'da'yo u gä mi'da xun ngu.

Pe dí xi'ahu gui tenhdu a dí øt'ä, nguetho dí øt'ä a i øt'a ra Cristo dí tendä.

'Be'a da 'yøt' yu xisu bu ja ram peti

²Pe xun ho guí øthu ngue'a guím benthohu 'be'a gätho dá xi'ahu, ngue bi bεngä Oja ga xi ahu. ³Pε dín nde ahu gui pahmbu, ngue nu ra Cristo, go rá hmu n'da ngu n'da ran 'yohu, nε nu yu xisu, tengu'bu yú hmu u yú ndø. Ne dín jahu bu nangue Oją. Nε in jabu a ra Cristo, rá Hmu a Oją a. ⁴Pε nu'bu n'da ran 'yohu i yaui Oja bu i ja ram peti, o gue im man ram hma, pe hingui sä da hyu'ts' rá fui, tengu'bu hin'yu rá ts'εdi. 5Pε nu'bu n'da ra xisu i yaui Oja bu ja ram peti, o gue im man ram hma, i jatho da gomp' rá ya, ngue hin da mispa a rá ndø, nε hin da 'yøt'e tengu'bu nt'axi rá ya. ⁶Pε nu'bu n'da ra xisu hingui nde da gomp' rá yą, man'da xun ho 'bu da 'yax rá ya 'bu. Pe nu'bu guím bemhbu ra 'yasä 'bu nt'axi n'da ra xisu, o gue'bu tengu'bu hin'yu yú xta, ρε man'da xun ho 'bu xtán gomp' rá ya. ⁷Pe nu n'da ran 'yohu hingui sä da hyu'ts' rá fui bu ja ram peti, nguetho i udi

1 CORINTIOS 11 322

i ja rá ts'edi xun ho, tengu 'bu guese Oja i 'bupu. Pe nu n'da ra xisu i udi man'da ja rá ts'edi n'da ran 'yohu. ⁸Nguetho mbudi bi 'yøt' Oja a ran 'yohu, ne m'bejua buya bi thącpa n'da rá do'yo'bøts'e a ran 'yohu, ne gue'a í t'øt' ra xisu a buya. 9Nu ran 'yohu hin í t'øt'e ngue da mbäx'a ra xisu, pε í t'øt'a ra xisu ngue da mbäx'a ran 'yohu. 10 Nε ε gue'a dím mangä a, ngue nu yu xisu i jatho da gomp' yú ya, janangue'a da 'yudi ja yú ts'edi yú ndø. Ne gue'a dín numanho yúm 'behni Oja mahets'i a buya. ¹¹Pe nu bu ja rá 'befi ra Cristo, hin da bømanho 'bu hønt'u yun 'yohu dim pepu, xín da bømanho 'bu hønt'u yu xisu, pegue gätho 'da dám fäxtahu u. ¹²Nguetho majuani nu'a ra xisu nt'øt'e nangue rá do'yo'bøts'e a ran 'yohθ, ρε guexta'a majuani ím 'bu a n'da ran 'yohu nangue rá mbe. Ne gätho bi zän Oja din jabu. ¹³Pe dami bensehu 'be'a man'da xun ho gui 'yothu, nangue n'da ra xisu 'bu in yąui Oją, 'bu hingan jo'mi rá ya. Ha guí ɛmhbu xun ho i øt'e uague hin'na. ¹⁴Nɛ dí pahmbu 'yasä 'bu xtá mba rá ya n'da ran 'yohu. ¹⁵Nε ngutho n'da ra xisu, gue'a ní nεcmanho a rá xta 'bu xu mba. Νε gue'a í ts'änba n'da ra xisu a, ngue'a xtá mba vú xta, tengu'bu ya rán jo'maya a. ¹⁶Pε nu'bu 'bo'o in nde dán junt'a 'be'a dí xi ahu, pe hingui sä dán junthu a. Ne i jatho ga xifi ngue ngutho i t'ørpu ja mi'da yúm peti yu 'yec'yei.

Da hnumansu ran ts'ihme bi zän ra Hmu

¹⁷Pε nu'a man'da ga xi ahʉ ya, hingui sä ga εn'ahʉ xʉn ho guí øthu. Nguetho hingui sä di zɛt'a ni mbuihu a guí øthu bu ja nim petihu, pε man'da di ts'on'nahu. ¹⁸Nguetho i siqui 'be'a guí øthu 'bu guídím petihu, guídín junthu n'da ngu n'da ahu. Ne dí ec'yei ngue majuani a i siqui. ¹⁹ Masque guím bɛmhbu jatho gan heju. Pe guepu bi fadi nda'a majuani yu 'yɛc'yɛi. 20 Nguetho nu bu ja nim petihu guí sihmehu, pe him majuani gue'a ran t'øt'e bi xic ma Hmuhu guí øthu. 21 Pe nu'bu ra ora guí sihmehu, emme guídín uemhbu nin ts'ihmehu n'da ngu n'da ahu. Nu'u 'da xínga n'damhme gá unhdu, ne nu'ahu buya gue'bu go ɛmmɛ gán niyahʉ. ²²Ha hin'yʉ ni ngumhbu ngue gan sihmehu bu. Nguetho guídí ts'onbahu rá 'befi Oją, ne guídí 'yąsäbahu u ni cuhu nte gá unhdu. 'Be'a guí ena ga xi ahu. Ha guí ena ga en'ahu xun ho a guí øthu. Pe hin'na.

Nangue 'bɛ'a nam bøn a ran ts'ihmɛ bi zän ra Hmu

²³ Janangue'a dín nde ga xi ahu mahøn'a ya 'bɛ'a nam bøn a ran ts'ihme bi zän ra Hmu. Ne tengu thoho bi xängä ra Hmu, ne ngutho dí xi ahu. Ngue n'dat'a ra xui bi mba ma dä ra Hmu Jesús, ne bi hyac ra hmε, ²⁴bi 'yäp ra jamadi Oja nε bi xem buya. Ne bi 'yena: "Dami sihu na, nuna ma ngøc'yɛigä na, ngue din unbi nangue ahu. Ne gui thoqui gui 'yøthu na, n'damhma guim bɛnju." ²⁵Nu'bʉ mi jua a bi zi a ra hmɛ, bi dɛc a ra tasa buya, ngue mi po ra gui'uva, nε bi 'yɛna: "Nuna nam bøni ngue ya di hoc'ahu xun ho ra 'da'yo'yu da 'yøt'ahu Oja nangue ma jigä. Ne n'dandi ngu n'dandi gui sihu, guim

bɛnju dá tugä nangue ahu," bi 'yɛn'a ra Jesús. ²⁶ Janangue'a n'dandi ngu n'dandi ga sihu ra hmɛ nɛ ra gui'uva, dí uhmbu rán date ra Hmu gue'bu go bá pengua mahøn'a.

'Bepu dá fen ran ts'ihme bi zän ra Hmu

²⁷Pε nu'a to'o hin din 'yomfεni, nε sä i si a ra hme ne ra gui'uva, ya i ja rá ts'oqui, nguetho hingui numansup rán date a ra Hmu bi du. 28 Janangue'a i jatho m'bet'o da base n'da 'be'a i ja mbo rá mbui, ne nubuya da zä da zi ra hmɛ nɛ'a ra gui'uva. ²⁹Nguetho nu'bu i si a ra hme ne i si rán gui ra uva, ne hinguim beni 'be'a in unba ra Hmu 'bu mi du, ne hønt'a ran unbi da nu a. ³⁰Nε gue a guí øthu a, janangue'a xun ngu xun u ahu ne xun güent'i ahu, ne ya xcá tuhu 'da ahu. ³¹Pe nu'bu m'bet'o dadí juanbazehe ma mbuihu, hin da zegbahu ra Hmu 'bu. ³²Pe nu'bu hin dadí juanbazehe ma mbuihu, guemhma da 'yørcahu ram fei 'bu. Pe man'da xun ho 'bu da mbegbahu ra Hmu ya, n'damhma hinga 'darpu gan nuhu ran unbi ra ximhäi. 33 Janangue'a ma zi cu ahu, nu'bu guidím petihu, ngue gui sihu ra hme ne ra gui'uva, nde'bu hin gan uensehu, pe gui tømhbu din 'da ahu n'da ngu n'da ahu. 34 Ne nu'bu 'bo'o i tumanthuhu, hin da beni din sihme bu ja ram peti, pe jatho 'be din sihme bu ja rá ngu, n'damhma hin da mbερ ahu Oją nangue'a nim peti guí øthu. Ne nu'a 'be'a gätho man'da guí øthu, ga hoc'ahu 'bu dá mba bu.

'Dahma 'dan'yo yú ts'ɛdi bi un rá Hogandąhi Oją

12 Ne nuya ma zi cu ahu, dín nde ahu gui pąhmbu 'be'a nam bøn a ra ts'edi di 'daju rá Hogandahi Oja nangue ga ørpahu rá 'bɛfi 'dahma 'dan'yo. ²Guí pahmbu 'be'a gá 'yøthu 'bu him maní 'yec'yeihu, ne gá hya 'dahu yu hyäte oja, ne hingui ya u. ³Janangue'a dín nde ahu gui pahmbu a majuani ya. Nu'bu guí øhmbu 'bo'o i yą nangue rá Hogandahi Oja, da 'yɛmbi rá Hmu a ra Jesús 'bu i ya. Pε nu'bu i san'a ra Jesús 'bu i ya, him majuani in 'youi rá Hogandahi Oja a. ⁴Ne 'dahma 'dan'yo yu 'befi da zä da hyan'a n'da ngu n'da yu 'yec'yei, pe n'dat'a rá ts'edi rá Hogandahi Oja ngue di unni. ⁵Ne 'dahma 'dan'yo 'bepu ní 'yørpa rá 'bɛfi Oja n'da ngu n'da, pɛ n'dat'a ra Hmu dí ørpahu rá 'bɛfi. ⁶Ne gätho bi ts'änbi 'be'a da mbefi n'da ngu n'da yu 'yec'yei, pe n'dat'a Oja di benbi 'be'a da 'yøt'e. ⁷Ne nu Oja bi 'daju ra ts'edi, janangue'a gätho dí uhmbu ngue dín 'yohu rá Hogandąhi Oją. Ne gue'a bi 'yørcahu Oja a, n'damhma da zä 'da dám fäxtahu. 8Nu'u 'da bin t'un ra ts'edi da man'a rá hogan'yomfeni Oja ngue him mám fadi, pe nangue rá Hogandąhi Oją di benbi da ma. Nε nu mi'da bin t'un ra ts'εdi da ma xun họ 'be'a nam bơn'a rám hman Oja. Ne n'dat'a rá Hogandahi Oja bi unni gätho yú 'bɛfi 'dahma 'dan'yo. ⁹Νε nu mi'da bin t'un ra ts'εdi da badi din t'un'na i äp'a Oja. Ne nu'u 'da bin t'un ra ts'edi da xox yu hyenni, ne n'dat'a rá Hogandahi Oja di unni. 10 Ne nu'u 'da bin t'un ra ts'edi ngue da 'yøt' yun t'øt'e mixte ngue hingui sä da 'yøt'a n'da ra ja'i. Ne nu'u 'da bin t'un ra ts'edi da ma 'bɛ'a din ja. Nɛ nu'u 'da bin t'un

1 CORINTIOS 12 324

ra ts'edi da bądi nda'a ním hma bi benba rá Hogandąhi Oją, ne nda'a bi benba ra zithu. Ne nu'u 'da buya bin t'un ra ts'edi din yą man'da ra nde ngue hingam fądi 'be'a nam bøni. Ne nu'u 'da buya da ma 'be'a nam bøn'a bi man a. ¹¹Pe gätho ya i øzehe rá Hogandąhi Oją, ne di darpi n'da ngu n'da 'be'a da ndese Oją da 'yøt'e.

Gätho n'danją'i tho dí comhbu

¹²Ne tengu n'da ra ja'i emme xun ngu ní hut rá ja'i, pe n'danja'i tho i cohi. Ne in jabu ra Cristo nangueju. ¹³Ne dá gue'bu dyu judíohu o dyu griegohu, o dá gue'bu dyú 'yehehu o hin'na, pε n'dat'a rá Hogandahi Oją dá hąmhbu bu ja ma mbuihu, tengu'bu 'darbu í nex ra dehe dá sihu. Ne gue'a í 'yørcahu ngue n'danja'i tho dín jahu. 14 Pε nu rá ja'i n'da, hinga n'datho ní huti, pe εmmε xun ngu i ja yú thuhu, ngue i juadi xun ho n'da ra ja'i. ¹⁵Pε nu'bu n'da ra gua da 'yεnsε ngue hinga gue'a ra 'ye: "Janangue'a hin te dí pɛcä 'bu," ɛna. Pɛ hingui sä ngubu da beni, nguetho rá gua ra ja'i a. ¹⁶Nɛ nu'bʉ n'da ra zagu da bɛni: "Hin te dí pɛcä," nguetho im beni hinga gue'a ra dä a. Pe hingui sä ngubu da beni, nguetho rá zagu ra ja'i a. Ne hingui sä da beni ngue hing rá ngø ra ja'i a. ¹⁷ Nguetho nu'bu gätho xtín ja'i a rá dä n'da, 'be'a dí 'yøhnahya 'bu. Xi'bu gä xtín zagu rá ja'i n'da, ne hin'yu rá xiyu, 'be'a xtán zä xtám baha tengu rá xiyu. ¹⁸Pe nu Oja bi zänni 'be'a gätho i ja rá ją'i n'da, ne n'da ngu n'da bi un rá ts'edi ngue da zä da 'yøt'e 'bɛ'a gätho in ndepe

da 'yøt'e. ¹⁹Pɛ nu'bʉ n'daxɛqui tho, ha dán zä din ja tengu ra ja'i. ²⁰Pε in jabʉ n'da ra ja̞'i, εmmε xʉn ngu yu xequi i ja, guepu nan ho a n'da ra ja'i. 21 Pe nu rá dä n'da hingui sä da 'yɛmp a rá 'yɛ, ngue nte ní mbäts'i, xinga gue'a rá ya hingui sä da 'yɛmp u yú gua nte ní mbäts'i. ²²Pɛ hingui sä ngubʉ da ma, nguetho n'da ngu n'da yu xequi gätho i ja yú 'befi. Pe nu yú xequi ma ja'ihu ngue dí ɛmfu nte i pɛfi, pε man'da εmmε di muui u. ²³Νε nu 'da yu xequi dí emfu di 'bedi, pe man'da ga hoju n'damhma xtán ho. Ne nu yu xequi dí emfu hingui sä da hnu, pε man'da dí jamansuhu n'damhma hin da ts'ani. 24 Pe nu 'be'a di necmanho nangue ma ja'ihu, ya hin'yu 'bɛ'a man'da ga jafu. Pɛ Oja bi hoqui gätho ma ja'ihu, ne bi japi ngue man'da bi muui a dí emfu hingui ho. Janangue'a hin da t'emp a n'da xequi nte di muui. ²⁵Janangue'a hin da zä din hec yu 'yec'yei, tengu'bu yú xequi ma ja'ihu, pe 'da xtín jamansu n'da ngu n'da. ²⁶ Janangue'a nu'bu n'daxequi ma ją'ihu xun u, ya 'da nan u tho gätho ma ją'ihu buya. O nu'bu n'da ra xequi ngue hin hapu i sä, ya di johya gätho ma ja'ihu buya. ²⁷Pε guim bembbu nangue nim petihu, nε gue'a rá ja'i ra Cristo a, nε n'da ngu n'da ahu tengu'bu n'da a n'daxegui ahu rá ja'i ra Cristo. ²⁸Ne ngubu bi zän Oją nangue ram peti dí øthu, ngue 'be'a ní 'befi dí øthu n'da ngu n'daju. Ne nu'u yú 'bäihu ra Cristo man'da bi ts'änbi da hnumansu u. Ne nu yú pøngahya Oja, ne'u bi ts'änbi da hnumansu u, pε hinga 'da'igu. Nε ná hyu buya

yu xänbate nangue rám hman Oja, nε bi ts'änbi nε'u da hnumansu u, pε hinga 'da'iguhʉ ʉ mi'da. Nε'ʉ mi'da i øt' yun t'øt'e mixte, ne'u mi'da i øthe yu hyεnni, pε nε'u mi'da to'o i fäx yú mi'yɛc'yɛihu nangue ran hugcate ørpe, ng'u mi'da yu ngurbi di manda ram peti, ne'u to'o 'dahma 'dan'yo bu na ya ngue yu nde hingam fadi, gätho bi ts'änba yú 'befi n'da ngu n'da. 29 Pe ha gätho ahu ni 'bäihu ra Cristo 'bu, uague yú pøngahya ahu Oja 'bu, uague guí ɛmhbu gätho gan xänbatehu, uague gätho gui 'yøthu yun t'øt'e mixte 'bu. 30 Ha gätho i ja ni ts'edihu ngue gui xoxhu yu hyenni, uague gä 'dahma 'dan'yo yu nde guí yahu, ha gätho guí padi guim mamhbu 'be'a nam bøn'u yu nde xun hei. Ne majuani dí xi ahu ngue hin'na. 31 Pε dami hyomhbu Oja ngue di 'da ahu ra ts'edi nda'a man'da dí fäx ni mija'ihu. Pe nuya ga ut'ahu man'da ra 'bɛfi 'bɛ'a ctí fäx ni miją'ihu pε xinda gue mi'da.

Nangue'a ran hugcate

Pe nu'bu gä xcán yahu yú nde yu ja'i, o tengu bu na ya u yúm 'behni Oja mahets'i, pe nu'bu hin'yu man huecatehu, hin te ní mba tho 'be'a dí øthu 'bu, tengu thoho n'da ra dambu o gue'u yu xit'egui zuntho ne ndetho emme xun hei. ²Ne madague'bu i ja ma ts'edihu gam mamhbu ram hma ngue dím pøngahyahu nangue Oja, pe nu'bu hin dadí hueju to dí xihmbu ram hma, nte ní mba tho. O nu'bu xcá pahmbu 'be'a gätho an t'agui nangue Oja, o gue'bu xcá pahmbu 'be'a gätho man'da xun

hei, o nu'bu ga pahmbu da t'ørcahu a dí äfu Oja, ne'u yu t'øhø da zä da 'uegue, ρε nu'bʉ hin'yʉ man hugcatehu, hin te dadí muhu 'bu. ³O nu'bu xcá unhdu yu hyoya 'be'a gätho dí peshu, pe nu'bu hin dá bembu a ran huecate, ya nte dá tahmbu bu na nu Oja 'bu. Ne ma xinda gue'bu gätho ma ja'ihu xcá umhbu ngue xtín zø, ρε nu'bu him bin ja man hugcatehu, ya nte dá tahmbu buya nangue rán japi Oja. ⁴Pe nu'a ran hugcate nam bøni, ra yembui, ne hin din xømbui, ne hin din seya, ne xín ná vat'a ngue ja rá ts'edi, xíngui honi da t'espa zehe. ⁵Ne nu ran huecate nam bøni, pespa rá sä rá mija'iui, ne hingui honi nangue rán hose pe i honba ran ho rá miją'iui. Ne hingui säman'u, ne hingui ørpa ra güenda ran ts'o bi t'ørpe 'bu majuani ja rán hugcate. ⁶Ne nu'u di huec yú mija'ihu, hin di johya 'bu 'bo'o in nu i øt' ra ts'oqui, pε εmmε di johya 'bu 'bo'o in nu i ten'na ra 'yu majuani. ⁷Ne nu'a i ja rán hugcate, hingui sumanhgi di huɛc'a n'da, madague'bu i ørpa ran ts'o. Ne hinjam'bu ec'yei 'bu t'embi øt' ran ts'o a to di huεqui. Pε nu'bu i padi bi 'yøt' ran ts'o, i tø'mi din 'yomfeni. Ne hinjam'bu e'ts'a ní 'yøt' ran hugcate. 8Pg nu'u 'da gä dí øthu ya, da zøni da zɛ'ʉ. Nguetho da zøn ra pa ngue njom mam pøngahya nangue Oją, ne njom mam ma nangue mi'da yu nde 'dahma 'dan'yo ngue hingam fadi. Ne nu'u to'o i ja yú ts'edi da ma 'be'a gätho xun hεi da fądi nangue Oją, pε him ma man'u, 'bu ya gätho ga pahmbu xun ho. ⁹Pε nuya nu to'o bin t'unni da man'a xun hei, pe hinga gätho

i padi xun ho nangue Oja. Ne'u to bin t'unni dim pøngahya, pε hinga gä im ma. 10 Ne nu'a dí øthu ya ngue dí 'buhmbu yu pøngahya, pe ya him ma homhbu 'bu dá pahmbu xun ho, nguetho hinga gätho im man'u. 11 Ne tengu'bu mán t'uhnihu, dá yahu tengu bu na ya yu t'uhni, ne ngubu dám bemhbu, tengu bu nam ben yu t'uhni. Ne nu'bu mán dan'yohuhu buya, ya dá bemhbu ngue ga sohmbu 'bɛ'a gätho mí øthu 'bu mán t'uhnihu. 12 Ne gue'a dí øthu yu pa i jabu a ya, ne hingui sä gan nuhu 'bɛ'a di ja Oja. Tengu thoho 'bu dí hethu n'da ran hyedä hingui di nequi xun ho rá hmi n'da ra ja'i. Pegue da zøni ngue da zä ga pahmbu xun ho 'bu dá nusehu Oja. Nuya hingui sä ga pahmbu xun ho ha in ja, pegue da zøni ga pahmbu xun ho, tengu thoho Oja i paju ya. ¹³Pe hyu i jaju ngue hinjam'bu ga juahmbu. Nu'a n'da, ngue'a ga pahmbu majuani da 'yøt'a ran ho bi man Oją, ne nu'a ná yoho ngue'a ga tømhbu a i mam buya, ná hyu buya, ngue a ran hugcate. Ng man'da xun ngu di muui ran hugcate xinda gue'u mi'da i hmangua.

Nangue'u 'dahma 'dan'yo bu na ya

Pɛ man'da ga humbi ga øthu ran huɛcate. Nɛ a man'da di bɛngahu rá Hogandahi Oja, dam pøngahyahu ga mamhbu rám hman Oja. Nɛ m'bejua ts'u da zä ga øthu mi'da yu 'bɛfi di bɛngahu rá Hogandahi Oja buya. Pɛ nu'u to'o i ya n'da ra nde hingam fadi, hønt'a Oja da zä din yaui, nɛ hinga gue'u yu ja'i i yahu. Nguetho njongui øde 'bɛ'a im ma.

Nε masque rá Hogandahi Oja di benbi, pe nt'agui thoho. ³Pe nu'u to'o dim pøngahya nangue ra nde ngue'a mfadi, i xih yú mija'ihu, ne da zä di japi din te yú mbui, ne di zerpa yú mbui, ne emme di un ran johya yú mbui. 4Pε nu'u to'o i ya n'da ra nde ngue hingam fadi, masque di zese rá mbui, pe nu'u to dim pøngahya, gä di ze'u yú mi'yεc'yεihu. ⁵Nε dín ndehmagä gätho ahu gan yahu 'dahma 'dan'yo yu nde. Ρε εmmε man'da dín nde ahu gätho gui mamhbu rám hma Oja nangue ra nde ngue mfadi. Nguetho man'da xun ho a, xinda gue'bu gan yahu mi'da yu nde gue n'dan'yo hinda høn'bu da zä gui mamhbu 'bɛ'a nam bøn'a gá mamhbu, ne gätho din te yú mbui yu 'yɛc'yɛi buya. 6 Jannangue'a ma zi cu'ahu, xi'bu hønt'u yu nde hingam fadi gam mangä 'bu dá mbagä bu, 'be'a ním fäts'i ga øt'ahu 'bu. Pe man'da xun ho 'bu ga xän'nahu rám hman Oja nangue ma ndesehu, ne ga 'da ahu n'da ran 'yomfeni hin guí pahmbu, ne ga xän'nahʉ 'bɛ'a bi 'yurcä Oja. ⁷Nɛ gam bɛmhbʉ 'bɛ'a i øt' yʉm 'bixt'i nε yu 'bida. Nu'u hingui ja yú te pε i ya. Pε nu'bu hingui pømanho a im ma, ya hingam fadi 'bɛ'a ní 'bei a buya, nguetho 'da nan getho. ⁸Ne ngutho n'da ra thuxi bu ja ra sui, da ma xun ho a ra 'bei ngue dín tunh yu dofui. Pe nu'bu hin da mba m'bixt'i xun ho, njon da badi 'be'a nam bøni, ne njon din sä da mba ra tuhni. ⁹Ne ngutho ahu 'bu hin guí yahu n'da ra nde nt'øde xun ho, hague dán zä da fadi 'bɛ'a guím mamhbu. 10 Nε masque εmmε xun

327 1 CORINTIOS 14

ngu yu nde i ja ua ja ra ximhäi, ne gätho xun ho 'bu 'bo'o i padi 'be'a nam bøni. 11 Pε nugä, nu'bu hin dí pa a ra nde ní ts'oqui, ya xcá øt'be tengu'bu n'da an 'danni ma hnini'be, ne hingui sä dam pa'be. ¹²Nu'a guí ndehu ɛmmɛ din ja ni ts'edihu nangue rá Hogandahi Oja, pe dami 'yäfu 'be'a ní ts'edi da zä dín te yú mbui gätho yu 'yɛc'yɛi guí 'buhmbu. 13 Nu'bu n'da ra ja'i din ya man'da ra nde hingam fadi, pε da 'yäp rá ts'εdi Oją da zä da ma 'be'a nam bøni. 14 Nu'bu dí ya'be Oja nangue man'da ra nde n'dan'yo, go i ya rá Hogandahi Oja i o ma mbui, pε hin dí thocpa ran 'yomfεni u mi'da 'bupu, ngue 'bɛ'a nam bøn'a dí ma. 15 'Be'a xun ho ga øt'e. Pe nde'bu dan ya'be Oja nangue rá Hogandahi, pe i jatho ga japi da ba u mi'da 'bupu ngue 'be'a nam bøni. Nε ngutho 'bu dan tuh yu thuhu, ga ęspa Oją nangue rá Hogandąhi, pε guexta'a i jatho ga bɛni 'bε'a nam bøni, ne ga japi da ben'u mi'da buya. 16 Nguetho nu'bu guí espahu Oja nangue n'da ra nde hingam fadi, ne madague'bu di ben'nahu rá Hogandąhi Oją, pε nu'u 'da hin da zä gui comhbu a ram hma 'be'a gní 'yɛspahu Oja, nguetho hingui padi 'be'a nam bøn'a guí mamhbu. ¹⁷Ne madague'bu majuani guídí unhdu ra jamadi Oja gue'bu n'dan'yo ra nde guí yąhu, ρε hin guídí zerpahu yú mbui ni miją'ihu, ngue ne'u dí un ra jamadi Oja. ¹⁸Jamadi Oja nguetho man'da i sä dan yagä yu nde hingam fadi xinda gue ahu. 19 Pε nu bu ja yum peti, madague'bu hønt'i cut'a thoho yum hma ga ma gue'u nt'øde xun

ho, pe man'da xun ho, xinda gue'bu ga ena ga mam bu 'det'a mahuahi yum hma gue'u hingam fadi 'be'a nam bøni. Nguetho dín nde ga xänba yu cu. 20 Ma zi cu ahu, o guí øthu tengu'bu gyú t'uhni ahu, pe damín 'yomfenihu xun ho 'be'a man'da xun ho gui 'yøthu bu ja nim petihu. Nguetho gyu dąją'ihu, madague'bu i t'ɛn'ahu gyu 'uɛrehu ngue'a hin guí nde gui 'yøthu yu ts'oqui. ²¹Bi 'yɛm bʉ ja rá t'ohni Oją: "Madague'bu dá japi bá ęh yu 'damhnini ngue 'dan'yo bu na yą, ngue da zo u 'bucua, pε ngutho him bi 'yurpa ra güenda a dám mangä u," bi' yɛn Oją. 22 Janangue'a ga pahmbu n'da ra hmepya 'bu 'bo'o din ya man'da ra nde n'dan'yo, i uh rá ts'edi Oją, hndepe da 'yęc'yei u hingui nde da 'yεc'yεi. Nε hinga gue'u yu 'yɛc'yɛi i pa nt'ørpe yu hmερya. Pε nu ra ts'εdi ngue da man rám hman Oja nangue yú ndese u, xun ho ngue'a da xänbi gätho yu 'yɛc'yɛi, nɛ hin nangue'u emme xum me yú mbui, hingui nde da 'yɛc'yɛi. ²³Pɛ xi'bʉ bim pɛti gätho yu 'yec'yei ne gätho 'dahma 'dan'yo yu nde i ya, ne da zøm bu 'da ngue hing yu 'yɛc'yɛi, o gue'u hinga na padi xun ho. Ha hin guím bemhbu ngue da 'yen'ahu guí jathu. ²⁴Ρε nu'bʉ gätho guí mamhbʉ rám hma Oją ngue ra nde mfądi, ne da yurpu 'da hing yu 'yɛc'yɛi o gue'u hinga na pądi xun ho. Ne da bąse buya ngue ja yú ts'oqui, ne da badi 'be'a i ja yú mbui zehe 'bu bi 'yø'a guí mamhbu. 25 Ne nu'a nt'agui bu mbo yú mbui da japi di nequi xun ho. Ne din danyahmu ne da 'yäp rá punbi Oja buya. Ne da 'yena:

"Majuąni maha guí 'bʉhmbʉ Oją," da 'yɛm bʉva.

Da t'øt'e xun ho a ram peti

²⁶Nuya, ma zi cu ahu, dín nde ga xi ahu 'be'a man'da xun ho gui 'yøthu 'bu guídím petihu. Pe nde'bu 'be guim bemhbu 'be'a dín te yú mbui gätho yu 'yɛc'yɛi, nɛ da zä gan tuhmbu n'da ra thuhu guín nde gan tuhmbu buya, o gue n'da ram hma guín nde gan xänbatehu, o gue n'da ram hma bi bɛn'nahu Oja ngue gui mamhbu, o n'da ram hma guí nde gui mamhbu n'da ra nde hingam fadi 'be'a nam bøni, pe gue'bu di 'bui to'o da man a 'bɛ'a nam bøni ngue hingam fadi. ²⁷Pe nu'bu guí yahu man'da ra nde n'dan'yo, hønt'u yonją'i din yą, ne nu'bu xun ngu, hyunja'i. Ne hinga n'dat'a ra ora din ya gätho. Nubuya i jatho dim 'bu'a n'da da ma 'be'a nam bøn a bi hma. ²⁸Pε nu'bʉ njongui 'bʉpʉ n'da i padi da ma 'bɛ'a nam bøn'a bi hma, man'da xun ho 'bu nte da mam bu ja nim petihu. Da zä din ya, pe n'danni din yaseui Oja. 29 Ximangutho u i man rám hman Oja nangue ra nde mfądi, din yą yoho o hyu. Ne nu'u to'o bin t'un ra ts'edi da badi 'be'a nam bøn'a ram hma, da mam 'bu hingui ho, ua gue'bu xun ho. 30 Ne nu'bu i hupu n'da bi benba Oja da ma 'be'a im beni da ma, pe 'be di jua a i yą bu, ne gui jafu din yą a man'da buya. 31 Janangue'a da xøt'a gan yahu 'dahmi 'datho, ne gätho ahu to'o gätho di benba Oja din ya. Nubuya tengu 'bu gán niyabahu yu cu nangue yú mbui ne gätho da hyą yu ts'edi yú mbui buya. 32 Nu'u to i man rám hman Oja i jatho da

zamzehe rá mbui zehe, madague'bu Oja bi benbi din ya, pe jatho da dø'mi ts'u, 'be din ya a man'da. ³³Nguetho nde Oja da ts'änni 'bɛ'a gätho din ja bʉ, nɛ hinga 'da ni thas thoho 'be'a gätho i øt' Oja. Ne in jabu i t'øt'e hønbu go hapu i ja yúm peti ma mi'yec'yeihu. 34Ne nu yu xisu hingui sä din ya bu ja yu dampeti, nguetho hin'yu yun t'edi din ya u, ne i jatho da 'yø'a 'be'a da sifi, ne hin dim 'bet'o, tengu i mam bu ja rá t'ohni Oja. ³⁵Nε nu'bu in nde da 'yänni 'bɛ'a nam bøn a hmam bu, i jatho da 'yän'na rá ndø bu ja rá nguse, nguetho hin di necmanho 'bu i ya n'da ra xisu bu ja ram peti. ³⁶Ha guím bemhbu gá dumzehehu rá 'befi Oja, ngue guí emhbu da zä gui sänzehehu 'be'a gui 'yøthu. Uague guím bemhbu høn'adahu gá hyamhbu a ram hma. 37 Pe nu'bu majuani bi 'da ahu rá ts'edi Oja gui mamhbu rám hma, o gue'bu majuani bin 'da ahu nin 'yomfenihu nangue rá Hogandąhi Oją, nu'bu, jatho gui 'yøthu a dá ot'ahu 'bu, nguetho rá manda ra Hmu a. ³⁸Νε nu'bu 'bo'o hingui nde da 'yø'a dá ot'ahu, pe hingui sä gui 'yurpahu ra güenda a. 39 Janangue'a ma zi cu ahu, man'da emme gui hyumbi gui mamhbu rám hman Oja nangue ra nde mfadi. Pe hin gui hecpahu to'o in nde din ya man'da ra nde. 40 Pe gan 'yomfenihu xun ho, ne 'darpu dí mba gui 'yøthu, ne hinga 'da dí thąs thoho 'bɛ'a gätho gui 'yøthu.

Bi ndants' mahøn'a ra Cristo

Nuya ma zi cu'ahu, dín nde ga xi ahu mahøn'a ran ho ma'da'yo, tengu dá xi ahu

329 1 CORINTIOS 15

mam 'bɛt'o. Nɛ gue'a ram hma gá hyamhbu, ne gue'a gním 'bähmbu xun ho a. 2Nε guet'a ram hman a gní yan ni tehu a 'bu guidí thoqui gui ten thohohu a dá xi ahu. Pe nu'bu hin'na, säti tho guí emhbu guí øthu 'bu. ³Ne dá ja ahu gá pahmbu a ram hma bin 'dacä ngue man'da jats'edi tho ga pahmbu. Ngue dá xän'nahu bi du ra Cristo, bi hoga ma ts'oquihu, tengu thoho mán t'o't'i bu ja rá t'ohni Oja. ⁴Bi t'ägui, ne bi xox Oja 'bu ná hyupa, tengu thoho mí mam bu ja rá t'ohni Oja. ⁵Ne nu'bu mi dambeni ra Cristo, m'bet'o bin 'yuse bu 'buh ra Pedro, nε m'bεjua buya bi nu mi'da yú xädi. ⁶Ne m'bejua buya xø 'bexque bi nequi bu 'darpu mídím peti cut'a ciento yu cu. Ne emme xun ngu i 'butho u ya, madague'bu xun du u 'da. ⁷Ne m'bejua bi nu ra Jacobo, nε m'bεjua mahøn'a bi nu gätho u yú 'bäihu. ⁸Pe rán zegui thoho necä bi zä dá nugä ra Cristo bu 'yu. Ne şmme xun hşi bu dá ec'yeigä a ram 'bui ma'da'yo, tengu'bu n'da ra 'uɛre hingui sä dim 'bui, ne emme din unbi. 9Ne him man zä'be ngue xtá t'engä ma 'bäi'be ra Cristo, nε man'da ts'utho dadí mu'be xinda gue'u mi'da yú 'bäihu, nguetho ɛmmɛ dá unbä u yú 'yɛc'yɛi Oja. ¹⁰Pɛ nu Oja rá mate zehe bi jaqui tengu dín jagä ya. Nε hinga säti thoho rá mate Oją bi 'yørque, nguetho ¿mmɛ dá humbi xinda gue gätho mi'da yú 'bäihu ra Cristo. Pε hinga guecä dá øt' ra 'bɛfi, nɛ gue'a rá mate zɛhɛ Oją bi zequi dá øt'e. 11 Madague'bu guecă o gue'u mi'da bi xän'nahu, pɛ n'dat'a ram hma dí mamhbe ngue

bi du ra Cristo nangue ma ts'oquihu, nɛ bi xox Oją 'bu mi du. Nɛ gue'a ram hma gá 'yɛ̞c'yɛihu a.

Da xox Oja u xun du

¹²Pε xi a ram hma dí mamhbu, ngue bi dambeni ra Cristo 'bu mí du, pe hanja gní 'yemhbu 'da ahu buya, ngue hingui sä da dambeni u xun du. 13 Nu'bu hin da dambeni u xun du, ρε xinga gue'a ra Cristo xtán dambeni 'bu, ne guexta'a ya xun du a ya 'bu. ¹⁴Νε nu'bu hin xtán dambeni a ra Cristo, hin'yu rá ts'edi a ram hma dí mamhbu 'bu, ne ndetho guí 'yohu bu 'bu. ¹⁵Ne nu'bu ngubu guím bemhbu ngue hingui sä da dambeni u xun du, guí nubethani gahe 'bu ngue dí mamhbe bi xox Oja a ra Cristo 'bu mi du. ¹⁶Nu'bu hingui sä da dambeni n'da ra du, pe xínga gue a ra Cristo xtán zä xtán dambeni 'bu. ¹⁷Nε nu'bu guexta'a ra du a ra Cristo, säti thoho guí ¿c'yeihu a 'bʉ, nε guexta'a him mahoqui ni ts'oquihu 'bu. ¹⁸Nɛ nu'bʉ ngubʉ guím bemhbu, pe ne'u yu 'yec'yei xun du bu ja rá 'yε ra Cristo, nε má zä dim 'bɛpʉ 'bʉ Oja 'bʉ, gue'bʉ ya má zä bim 'be a ra Cristo 'bu mí du. ¹⁹Pe nu'bu høntya dí nuhu ran ho nangue ra Cristo, ha hin guím bemhbu ga nuhu man'da ran ho 'bu dá tuhu 'bu. Pe huehigahu 'bu nte ga nuhu, xinda gue'u gä mi'da yu ja'i ngue nte mbeni da nu. ²⁰Pe majuani maha bi dambeni ra Cristo 'bu mí du. Ne tengu'bu rá mbudi n'da ra tha bi sopu ja n'da ra huahi, nε gue'a nam bøni ngue da xox Oją u to'o gätho i 'buhmi ra Cristo. ²¹Tengu thoho 'bu mí dump' 1 CORINTIOS 15 330

ran date ua ja ra ximhäi n'da ran 'yohu, ngue ra Adán, ne ngutho a man'da ran 'yohu ngue ra Cristo, bi du'mi ngue da ndants' mahøn'a yu du. 22 Ne tengu tho u gätho bi xand ra Adán, gätho i tu, pε nu gätho di xand ra Cristo, gätho da mba nsots'i. ²³Pε hinga gätho n'dat'a ra ora da mba nsots'i, nguetho rá mbudi a ra Cristo, ne nu'bu bá eh ra Cristo, gätho u xu huahni da mba nsots'i m'bejua. 24 Ne nubuya, ba εh rá pa ran zεgui. Nguetho nu'a ra Cristo xí dapi 'be'a gätho má ts'edi, ngue yún suihu Oja, ne gätho to'o i hase yún t'edi, ne to'o di manda zehe, ngue'u yu ja'i ne'u yu zithu. Nε nu'bu ya bi daha, di un'na Oja rá Ta rá ts'edi mahøn'a. ²⁵Nguetho nu ra Cristo, im Hmuts'ut'abi ya, ne gue'bu go bi daha di 'berpa yú ts'edi u gätho yún suihu. ²⁶Ne nu'a ran date ran zegui thoho da dapi, nε má zä dim 'bε a buya. ²⁷Tengu bi mam bu ja rá t'ohni Oją, di japi da dah ra Cristo 'be'a gätho má ts'edi i ja. Pe njon da beni ne'a Oja rá Ta da dapi, nguetho guesε bi un rá ts'edi ra Cristo a. 28 Ne nu'bu gätho bi da a ra Cristo u 'bɛ'a gä ní ts'edi i ja, ne nu'a ra Cristo buya, ngue rá Ts'unt'u Oja, ne din däse bu 'bu Oja rá Ta. Nguetho m'bet'o xí un rá ts'edi. Nubuya da hønse Oja din ja rá ts'edi buya. ²⁹ Ne man'da guí øthu guídín xixyahu nangue'u xun du. Pe hanja gní 'yemhbu him mam 'bu u xun du buya. ³⁰Ne hanja hin dí su man datehe, gätho u yu pa dí 'buhmbe ua tha, gue'bu xcá pahmbe hin ga ndanshe mahøn'a. 31 Ne majuani thocpa thoho dadím pom'be ran date. Ne gue'a dí xi ahu

a ngue'a dín nde ahu gui pahmbu 'bɛ'a dí øt'ä. Nguetho ɛmmɛ dí numanho ahu, ma zi cu ahu, ngue n'dat'a ma Hmuhu ra Jesucristo dí ɛc'yɛihʉ. ³²Nɛ dá hät'i xʉn ngu yun unbi, ne xi u yu zate dán tunhdä'be ua Éfeso, ngubu i ¿mb yu ja'i. Pe 'be'a ní mba a dá øt'ä 'bu hin da dambeni u xun du. Pe nu'bu hin ga ndanshu mahøn'a, mbähä dan sihmehu ya ne dam minhdu, nguetho má zä ga tuhu nixudi mani. ³³O guídín hyehmbu da thä ahu gui tenhdu yúm hman u 'da yu hyäte, janangue'a hin gui 'bɛhmbu yu hogan t'øt'e. 34 Pε damin 'yomfenihu xun ho gui pahmbu nda'a ram hma gue majuani, ne gui 'yɛshʉ yʉ ts'oqui bʉya. Nguetho guí 'buhmbu 'da hinga ná pąhmbu xun ho Oja. Ne guehna dí xi ahu na, janangue'a gui pɛs' ni sähu.

Hague din ja 'bu bi dąmbęni u xun du

³⁵Uague guím bɛmhbʉ 'da ahʉ gui 'yängahu: "'Bɛ'a di ja 'bu bi dambeni u xun du, ne 'be'a ní ngøc'yɛi din ja mahøn'a." 36Pɛ n'da rán t'änni yu 'yambui a. Ha hin guí nuhu 'bɛ'a di ja n'da ra hmudä 'bu pa nthuhu ngue i 'ya rá xi nε ja da bøx'a rá mbui buya. ³⁷Νε hønt'a go má hmudä guí tuhmbu, hinga guexta'a rá ndä 'bu bi bøts'e. Nguetho gue'a rá ndä gá tuhmbu, ne ra paxi bu dán go 'bu bi bøts'e. ³⁸Ne hønt'a go nda'a má hmudä da thuhu, gätho yú xise 'bu bin ja, tengu bi zänba Oja a. ³⁹Nɛ hinga 'da'angu ma ngoc'yeihu yu fani o gue yu doja o yu huą. 40 Ne in jabu 'be'a gätho i ja bu mahets'i ne 'be'a

331 1 CORINTIOS 15

gätho i ja ua ja ra ximhäi, nu'ʉ bí ja bu mahets'i, n'dan'yo thoho nán ho xinda gue'u ja ua ja ra häi. 41 Nu'a rán nequi ra hyadi ne ra zana ne yu sø gätho 'dahma 'dan'yo. Ne hinga 'da'angu u yu sø, 'dahma 'dan'yo bu ni nεqui. 42 Νε ngutho nangue'bu bi dambeni yu du, ne nu'bu bi t'ä a ra ngøc'yɛi, da 'ya nguetho nts'änbi da 'ya a. Pe nu'bu bi dambeni buya nε hin njąm'bu da du mahøn'a. ⁴³Nu'a bi t'ägui hingui ho, pε nu'a da bøts'e emme xun ho a. Nu'bu mi t'ägui hin'yu rá ts'edi, pe nu'bu mí bøts'e, man'da emme bin ja rá ts'edi. ⁴⁴Nu'a ra ngø 'bʉ mi t'ägui, nts'änni hønt'ua ja ra ximhäi dim 'bui. Pe nu'bu bi bøts'e, nts'änni dim 'bupu mahɛts'i buya. Ne guí pąhmbu i ja ma ja'ihu nangue ra ximhäi, pe man'da i jatho gui pahmbu ngue ne'a din ja ma ja'ihu nangue rá Hogandahi Oja. 45 Ne gue'a in ja a tengu mán t'o't'i bu ja rá t'ohni Oja, gue ná n'da ra Adán bi ts'änni bin ją'i ua ja ra ximhäi. Pe nu'a ná yoho gue'a di un ra temazai ngue njam'bu da guadi, gue'a ra Cristo a. ⁴⁶Nε m'bεt'o dám 'bʉhmbʉ nangue ma ngøc'yɛihu ngue hønt'ua ja ra ximhäi dim 'bui. Ne m'bejua buya dam 'buhmbu nangue ra ngøc'yei ngue nts'änni dim 'bupu mahɛts'i. 47 Nɛ nu rá mbudi ran 'yohu nt'øt'e nangue ra häi. Nu a ná yoho gue'a bí 'yɛh mahɛts'i, ma Hmuhu ra Cristo a. 48 Nε ngutho ma ngøc'yɛihu ua ja ra häi, tengu tho a ran 'yohu ngue bi t'øt'e nangue ra häi. Pe nu ma ngøc'yeihu m'bejua din ja tengu thoho rá ngợc'yεi a ma Hmuhu ra Cristo, nu'a ran 'yohu bí 'yeh mahets'i a. 49 Ne tengu

thoho bu dá nequihu nangue ra Adán nt'øt'e ra häi, ne ngutho bu dá nequihu mahøn'a nangue'a ra mɛngu bu mahɛts'i. 50 Nε dín nde ga xi ahu mahøn'a, ma zi cu ahu, ngue nu'a man ngøhu nε ma jihu i jaju ya, hingui sä da gonhui rá ts'edi Oja mahɛts'i a. Nguetho nu'a hingui hät'i, hingui sä 'darpu da 'bɛs'ui a da hyät'i høn'bu go njam'bu. ⁵¹Pε dín nde ahu gui pahmbu a him mam fadi, ngue hinga gätho ga tuhu ngue dyú 'yɛc'yɛihu, pɛ gätho da mba ma pärquigahu ma ngøc'yeihu. 52 Ne xøgue n'dan c'uerpadätho da 'yørcahu 'bu bin ya ra thuxi 'bu rán zegui ra pa. Nε nu'bu bin ya ra thuxi, 'bex da ndants'i gätho u yu 'yec'yei xun du, nε din ja yú ngø him man zä din ts'oni. Ne'u xí du, ne'u hin ní du, gätho da mba ma pädi. 53 Ne nu ma ngøc'yɛihu dí hehu ya hin da hyät'i, janangue'a da mba mahoqui ngue da hyät'i mazai buya. Ne i ja rán dąte a ma ngøc'yɛihu ya, pɛgue din jaju a njam'bu da du. 54 Ne nu'bu bin ja ma ngợc'yeihu ngue njam'bu da du, ya bi ja'ts'a bi man rá t'ohni Oja buya, bi 'yɛna: "Pɛ nu'bu dám 'buhmbu mahøn'a, gue'a dí guah ran date a, nguetho ya bi thapi." ⁵⁵"Hague grán date, hapu i ja ni ts'edi ya ngue gui hyoje. 'Be'a gá ja ya tha, ne ya guí ena xquí taje." ⁵⁶Nε nu yún t'εdi Oją nε gue'u nám fądi ja ma ts'oquihu. Ne nu'a ma ts'oquihu buya, gue'a ní zä di ungahu ran date a. ⁵⁷Pε jamadi gahu Oja, nguetho bi jaju dá tafu ran date nangue'a ma Hmuhu ra Jesucristo. 58 Janangue'a, ma zi cu ahu, damín zamhbu bu xun

ho nɛ hin hapu gui 'uehmbu bu. Nɛ gui hyumbi man'da man'da gam pɛhmbu nangue rá 'bɛfi ra Hmu, nguetho guí pąhmbu hinga säti thoho a, xinda gue'bu hin ga ndanshu mahøn'a.

Nthaqui yu mbeti da 'bäx yu cu

Nε nuya dín nde ga xi ahu J 'bε'a gui 'yøthu nangue ra mbeti guídí pethu, ngue nu'a rám fäts'i ma mi'yɛc'yɛihu. Damí 'yøthu tengu thoho dá xicä u 'bupu ja yum peti bu Galacia. ²Ngue gätho 'bu domingo, n'da ngu n'da ahu gui hyaju ts'u a hangu xquí tahmbu nhyato 'bu nhyato, gui peshu. Ne nu'bu dá søngä bu, ya di jabu, ne hinga ja gui pethu buya. ³Ne nu'bu dá søngä bu, ga pehndä bu Jerusalén u yun 'yohu ngue gá huanhdu. Ne ga un ra søcua da gats'i nangue ran zengua, ne da hyąx'a xquí pεthu buya. 4Nε 'bε dán 'yomfeni 'bu da zä 'nequi ga mba, ya 'darpu dá mbähmbe buya.

Bi ma da bøn na 'yo ra Pablo

⁵Nɛ nu'bʉ dá mba na 'yo, i jatho 'bɛ ba søngä bʉ Macedonia, nɛ ja ga thocä bʉ Corinto bʉya. ⁶Nɛ xømhma thoho dam 'bʉhmbʉ bʉ 'da yʉ pa, uague dam 'bʉhmbʉ bʉ gätho dám bøn yʉ pa xʉ sɛ. Nɛ nubʉya xømhma thoho da zä gui zɛjʉ ts'ʉ 'bʉ di nɛqui to'o da 'yurca ra 'yu hapʉ gätho dan 'yo m'bɛjua. ⁷Pɛ hin dín ndegä ngue xø ga thotho bʉ guí 'bʉhmbʉ, pɛ dín nde dam 'bʉpʉ 'da yʉ pa, 'bʉ gue'a da nde ma Hmuhʉ a. ⁸'Bɛ dam 'bʉcä ua ja ra hnini Éfeso man yozna, ja ga mba bʉ. ⁹Nguetho

emme hndeque ga man rám hman Oja ua, madague'bu xun ngu man sui'be 'bucua. Pε εmmε i te rá 'bεfi Oja ua, jannangue'a him 'bexque sä ga mba n'dihi. ¹⁰Nɛ nu'bʉ da zøm bu a ra Timoteo, dami simanhohu, janangue'a nte da bɛni. Nguetho dim pefi nangue rá 'befi ma Hmuhu a, tengu thohogä. 11Pe jatho gätho ahu gui numansuhu a ra Timoteo. Nε nu'bu bá εcua, dami fäxhu ngue da zømanho ua. Nguetho dí tøn'ua a, ne emme dín nde ga nu mahøn'a, ne'u gätho mi'da. ¹²Ne emme dá xicä ma cuhu ra Apolo xtá mbähä 'da yu cu 'bucua, ngue da nu ahu. Pe him bi nde bi mba ya. Pe xømhma thoho m'bejua da mba bʉ 'bu bi zä da mba.

Yún zegui ran zengua

¹³Nε jant'a thoho gui 'yøthu tengu'bu gan äthahu, ngue gan zamhbu bu ja ni t'ɛc'yɛihu. Dami hyuthu ran zambui, din ja ni ts'edihu xun ho. 14Ne 'be'a gätho guí øthu, ρε dami 'yøthu nangue ran huεcate. ¹⁵Nε nuya ma zi cu ahu, guí pahmbu ngue gätho ja a yún jahu ra Estéfano, mbudi yu 'yɛc'yɛi bu ra häi Acaya, nɛ ɛmmɛ hønt'a im beni ngue da mbäx yú mi'yɛc'yɛihu u. 16 Janangue'a dín nde ahu ɛmmɛ gui numansuhu a ra Estéfano, ngue'a gui 'yøthu a da man a. Pe ne'u mi'da i 'bupu, ngue 'da'angu i øthu a ra Estéfano, ngue'a hin din sui, ne humbi da 'yøt' ra 'befi xun ho, ne'u gui numansuhu u. ¹⁷Nε εmmε dadí johyagä, ngue nu'a mí hembä 'be'a guí øthu, pe ya dí pącä ya, nguetho bi zøcua a ra Estéfano, ne ra Fortunato, ne'a

333 1 CORINTIOS 16

ra Acaico. ¹⁸ Janangue ɛmmɛ bi xah ma mbui. Nɛ ahu bi xah ni mbuihu ya, nangue'a ram hma gá 'yängahu gue'a hin gmí pahmbu. Nɛ dami numanhohu u yu ja'i tengu u. ¹⁹ Nu yu cu i 'bucua ra häi Asia, gätho i pɛn'nahu ran zɛngua. Nu ra Aquila nɛ ra Priscila rá xisu, nɛ gätho u dim pɛti bu ja rá ngu, nɛ gätho i pɛn'nahu ran zɛngua nangue rá thuhu ma Hmuhu. ²⁰ Dami hyanbahu yún zɛngua gätho yu cu i 'bucua. Damin zɛngua zɛhɛhu n'da ngu n'da ahu ngue 'da gdín

huɛctahu. ²¹Pɛ nugä dra Pablogä ga ozehɛgä n'da ran zengua dí pɛn'nahu nangue ma 'yɛsɛgä. ²²Nu'bu i 'bu a n'da ngue him majuani i numanho a ma Hmuhu ra Jesucristo, nɛ hin te rán jaui Oja a 'bu, nɛ da zänba ran unbi a. Nɛ mi ts'utho ba ɛh ma Hmuhu da 'yøt' ran juanbi a. ²³Nɛ nuya da mbäx ahu rá mate ma Hmuhu ra Jesucristo. ²⁴Nɛ ɛmmɛ dadí huɛc'ahu gätho ahu nangue 'darpu dí 'buhmbu ra Cristo Jesús. Nɛ hønt'a dí xi ahu ya.

2 CORINTIOS

Ná yoho ra søcuą bi 'yorba ra Pablo u yu 'yec'yei bu ja ra dahnini Corinto

Ran zengua

Nugä drá Pablogä, nɛ nangue rá pähä Oją ma 'bäigä'be a ra Jesucristo. Dín 'yogä'be ma cuhu ra Timoteo. Nɛ dí pɛn'nahu bu ra søcuą gyu 'yɛc'yɛihu ngue dim pɛti bu ja rán ngu Oją bu ja ra hnini Corinto, nɛ gätho yu 'yɛc'yɛi i 'bupu ja ra xɛqui Acaya. ²Nɛ nu'a Oją ma Tahu nɛ ra Jesucristo ma Hmuhu di 'da ahu rá mate a, nɛ da hyut'a ni mbuihu.

Yún unbi ra Pablo

³ Jamadi Oją rá Ta ma Hmuhu ra Jesucristo, nguetho i ja rá yembui nangueju. Nɛ guesɛ Oją thocua thoho i hurca ma mbuihu. ⁴ Nu'a Oją i hurca ma mbuihu nangue gätho yun unbi dín nuhu. Janangue'a da zä ga hurpahu yú mbui 'da to'o in nu ran unbi, tengu tho bu í hyurcahu ma mbuihu Oją. ⁵ Nu'bu dí comhbu yún unbi ra Cristo, nu'a di zɛrca ma mbuihu, go din thɛui ran unbi dín nuhu. ⁶ Nɛ nangue ran unbi dín nugä'be, gue'a dín te ni t'ɛc'yɛihu, nɛ di zɛt'a

ni mbuihu a. Ne nu'bu di zerca ma mbui'be Oja, ne ahu di zet'a ni mbuihu. Nguetho nu'bu guím bemhbu a ran unbi dín nu'be, sä gui hyäthu ne hin gan xømbuihu ran unbi guín nuhu, tengu thohogä'be. ⁷Hin ts'u dadí 'yon ma mbui'be nangue ni t'ɛc'yɛihu. Nɛ dí pa'be ngue guí comhbu man unbi'be. Ngutho Oja da hyurca ma mbuihu. 8 Nugä'be dín nde ahu, ma cu ahu, gui pahmbu ngue dán nu'be ran unbi bu ja ra häi Asia. Nε hin'yu ma ts'εdi'be ngue xcá häzehe'be, nguetho emme ts'edi ran unbi dá nu'be, nε mi ts'utho xcá tu'be bu. ⁹Majuani ε maguepu xcá tu'be, ρε gätho u bin ja n'damhma sä ga pą'be ngue hin'yu ma ts'edi zehe'be, pe ga tøm'be 'be'a da 'yøt' Oja, ngue man'da xun ndoho rá ts'edi ngue da xox'u xun du. ¹⁰Nu'a Oja bi yangä'be bu ja ran date ngue emme nts'utho, ne dí pa'be ngue Oja da yangä'be mahøn'a. Ne dí εc'yεi'be nε dí tøm'be ngue thocua thoho da yangä'be Oja. ¹¹Ne nu ahu sä gui zɛc'be ts'ʉ 'bʉ guín yahʉ Oja nanguecä'be, ne m'bejua buya da zä gätho ahu n'dat'a ga xihmbu jamadi Oja nangue 'bɛ'a bi 'yørca'be.

Ra Pablo bi ma hanja him bi mba n'dihi bu ja ra hnini Corinto

¹²I hu ma mbui'be nguetho di benga ma mbui'be ngue xun ho 'be'a dí øt'be ua ja ra ximhäi, ne xun ho 'bε'a dí øt'be nangue ahθ. Nε hin nangue man 'yomfenise'be, pe Oja i fäxca'be ngue dí øt'be ran ho. 13 Dín nde ahu gui pahmbu xun ho 'be'a dí øt'be, tengu dí ot'ahu ya. ¹⁴Νε madague'bu hin guí pahmbu gätho ya dí xi'ahθ, pε nu'bθ bi zøn ra pa ba ɛh ra Hmu Jesús, gan johyahu nangue a ram hma dí ot'ahu. Ne ngutho ga'be da hyu ma mbui'be nangue ahu. ¹⁵Majuani min ndegä xcá mba bu, ne nu'bu xcá mba bu, mi sä nyondi xcá hut'a ni mbuihu. ¹⁶Mim bɛngä ngue xcá thocä bʉ guí 'buhmbu, gan nu ahu ts'u nu'bu má mbagä bu ja ra häi Macedonia, ne dím bengä ga thopu mahøn'a 'bu dá pøngä ua ja ra häi Macedonia. Ne nu'bu dá mba bu, dím bengä ngue gui fäxcä bu ja ra 'yu Judea. ¹⁷Pε hingui yoho man 'yomfεnigä, tengu guí ɛnju dí øt'ä 'bu him má thocä bu. Hin dí øt'ä tengu øt'i 'da u yun 'yohu ngue yoho im beni. ¹⁸Ne majuani dá bengä xcá mba bu 'bu má xi ahu. Ne i pa Oja majuani dí xi ahu. ¹⁹Nugä nε ra Timoteo nε ra Silvano ya dá xi ahe nangue ra Cristo Jesús, rá Ts'unt'u Oją. Ne nu'a ra Cristo hin di pä a im bɛni, pε hønt'a majuani im man a. ²⁰Nε gue'a ra Cristo ní ja'ts'i 'bɛ'a gätho i sän Oją da 'yøt'e, nε nangue bi hogahu ra Cristo dí pahmbu di 'daju rá mate Oja 'bu dí äfu, ne

gue'a ná ɛspahu Oja a. ²¹ Guet'a Oja bi 'daju ra ts'edi ngue thocua thoho ga tenhdu ra Cristo, ne n'da ngu n'daju bi 'daju ra 'bɛfi. ²²Nɛ guet'a Oja bi 'yøt'e yú mbeti gahu a, nε bi 'daju rá Hogandahi mbo ma mbuihu, guepu na fadi majuani di 'daju 'bɛ'a gätho man'da. ²³Majuani a dí xi ahu ngue hanja hin dá thocä bu guí 'buhmbu. Nu'bu xcá søngä bu a ra pa dá xi ahu, xcá damhya ahu ts'u 'bu, nguetho hinga nadí hoju 'be'a guí øthu. Ne ndetho emme xcá un'na ni mbuihu 'be'a xcá xi ahu. Ne dí padi majuani a dí xi ahu ya, ne dí xi Oja di 'dac ran unbi 'bu him majuani a dím ma. ²⁴Pε dín nde ahu da hyu ni mbuihu, ne hin da du ni mbuihu 'be'a ga xi ahu. Ne gue'a dín nde ga øt'ahu 'bu dá mbagä bu. Pe hin'yu man'da sä ga xi ahu gui 'yɛc'yɛihu, nguetho i jua'a guí ɛc'yɛihu ngue guí pahmbu majuani ra Cristo.

Janangue'a dá ensegä, u'bʉ dá mba bʉ mahøn'a. hin ga 'da ahu ra dumbui mahøn'a. ²Nguetho nu'bu guím bendumbuihu, hingui sä gui 'daju ran johya 'bu. Ne hønse ahu sä gui 'daju ran johya, pe hingui sä 'bu i tu ni mbuihu. 3 Janangue'a dá ot'ahu ra søcua nguetho dín nde ngue gan 'yomfenihu ts'u, ne sä gui hoju 'be'a gnám 'buhmbu. Ne nu'bu dá mbagä bu, ya xquí hoju a 'bɛ'a man'da gnám 'buhmbu, ne sä gui 'daju ran johya buya ne hin din ja'ahu ra dumbui. Nguetho dí ɛnsɛgä ngue n'dat'a dím bemhbu, nu'bu dín johyagä ne ahu ja nin johyahu. ⁴Ne emme mi tu ma mbui nu'bu má ot'ahu ra søcua, ne emme dán

zoni, nguetho hin dín nde gui u't' ni mbuihu nangue 'bɛ'a dá ot'ahu, pɛ dín nde gui pąhmbu ngue ɛmmɛ dadí huɛc ahu.

Da mba ma punbi to'o bi 'yøt' ran ts'o

⁵Hinga hønsegä pe gätho ahu i ja ahu ra dumbui nangue 'bɛ'a bi 'yøt' ran 'yohu ngue bi zin rá hømbe. ⁶Pe dí ena xøt'a ya ran unbi gá unhdu a ran 'yohu. ⁷Ne nuya nde'bu gui punbahu rá ts'oqui, ne gui hyurpahu rá mbui. Nguetho nu'bu hin gui hyurpahu rá mbui, man'da din ja ra dumbui ngue njam'bu sä din hogui. ⁸Nuya dí ä ahu ra mate ngue gui 'yuthu xun ho nin hugcatehu a ran 'yohu. ⁹Nugä dá ot'ahu nguetho dín nde ga pa 'bu guí øthu tengu dí xi ahu, uague hin'na. ¹⁰Nu'bu guí punbahu n'da ni mija'ihu, necä ga punba a. Ne nu'bu guí punbahu 'be'a bi 'yøt'a n'da, ne dí punbä a nangue rán t'edi ra Cristo. 11 Nguetho hin dín ndegä da daju ra zithu nangue 'bɛ'a dí øthu. Dí pahmbu 'be'a nde da 'yøt'a ra zithu nguetho in nde da hyäju.

Him bin säya a ní bem bu Corinto ra Pablo

12 Nu'bu má søngä bu ja ra hnini Troas, Oją ya xí xocua yú mbui yu ją'i bu. Nɛ hingui hɛi dá mangä bu rán ho ma'da'yo ra Cristo nguetho yu ją'i min nde da 'yøde. 13 Pɛ hin dán johyagä, nguetho hin dá tingä bu ma cuhu ra Tito. Ngue xtá xiqui 'bɛ'a guí øthu bu. Jananjabu dá socä yu ją'i bu Troas nɛ dá mbagä bu ja ra häi Macedonia, ja dá tingä bu a ra Tito.

Nangue ra Cristo sä ga tąfu ra zįthu

¹⁴Pε jamadi Oją, nangue dín 'yohu ra Cristo di jaju ga tafu ra zithu be'a gätho dí øthu. Ne hønbu go hapu dím mam'be ran ho ma'da'yo, Oja di japi da tho a, tengu tho 'bu n'da ra 'yɛthi i tux ran dahi i yʉmanho. 15 Νε nangue dín 'yohu ra Cristo, Oja in numanhoju, tengu ra 'yɛthi i yumanho bu nam ben Oja. Nugä'be dím mam'be ra Cristo Jesús bu 'bui gätho yu ja'i, gue'u i ja yú temazai, ne u di 'beh ra temazai. ¹⁶Nu a ram hma dím mam'be, da zänba ran unbi a 'bu hingui nde da hyan a n'da, pe nu u to'o i ec'yei 'be'a dím mam'be, di un ra te a. Pe to'o maha da hyät'i da'yøt' na. ¹⁷Hønt'u tengu gä'be ngue n'dat'a Oja dím bɛmhbe, ne dyum 'behnigä'be Oja, ne dyú 'yεhε gä'be ra Cristo, nε nu a Oja in nuc'be. Ne nugä'be hin dí øt'be tengu øt'u 'da xun ngu ngue in nde da dąse nangue rá 'befi Oją i øt'e.

Rán hoqui Oją ma'da'yo

Ha guí ṣmhbu dí ozɛhɛ ma certificado'be 'bu dí xi ahu 'be'a dí øt'be. Ha jatho din ja ma certificado'be ngue da xi ahu xun ho dí øt'be tengu i ca yu hyäte xänbate guí 'buhmbu bu. O ha guí ɛmhbu jatho gui 'yørca'be n'da tengu guí ørpa u 'da. ²Pɛ go guesɛ ahu ma certificado ahu nguetho nu'bu 'bo'o ngue bi ba'a gním 'buhmbu, da badi 'be'a ma hoga'befi dá øt'ä bu 'bu mám 'buhmbu bu.

Nɛ nu u yu ja'i ngue hingui ɛc'yɛi da nu ahu, tengu 'bu bi nu n'da ra søcua nangue rám hman Oja. Pɛ

hinga gue ra søcua nt'o't'i ra tinta o gue nt'o't'i bu ja ra do ngue da nu θ, pε gue'a bi 'yo't'a ra Cristo bθ ni mbuihu nangue rá Hogandahi Oja 'bu má xän'nahu. 4Da zä ngubu ga xi ahu ngue xun ho ra 'bɛfi dí øt'a'be, nguetho i fäxca'be Oja nangue dín 'yohu ra Cristo. ⁵Nε hin nangue man hose'be da zä ga øt'be ran ho, pe hønse Oja di 'dac'be ra ts'edi ga øt'be 'be'a dí øt'be. ⁶Nu Oja bi 'dac'be 'bɛ'a ga hom'be ngue i juadi xun ho, ngue da zä ga xi'be yu ją'i rán hoqui Oją ma'da'yo. Nu ran hoqui hinga 'da'anguui i mammi yun t'ɛdi nt'o't'i maya'bu. Nguetho nu'a ran ho ma'da'yo i xiju di 'daju ra temazai a rá Hogandahi Oja. Pe nu yun t'edi i xiju tengu 'bu ma yapatehu, ngue'a hin dí hät'i ga øzehehu a ran ho im mam bu. ⁷Pe nu'bu rá mbudi bin t'un yun t'εdi, pε min 'youi a rá nuixte Oją, nguetho ¿mmɛ madi yoxni rá hmi ra Moisés 'bu madín t'un yu do nt'o't'i yʉn t'ɛ̞di, janangue'a hingui sä u yu ja'i da hyerpa rá hmi. M'bεjua buya bim 'bε a rá nuixte mi ja bu rá hmi. Pε madague'a in 'youi ra nuixte u yun t'edi 'bu ja min t'uni, pε din yapate nε ran unbi. 8Nu yun t'edi min 'youi rá nuixte Oja nε bi man a ran date. Ρε emme xun ngu man'da rá nuixte Oja in 'youi rá 'bɛfi rá Hogandahi Oją. ⁹N'youi rá nuįxte Oją yún t'ɛdi ngue din yapate, pe emme man'da xun ngu rá nuixte Oja din 'youi ran ho ma'da'yo ngue im man Oja di hogahu. 10 Nuya bim 'beh rá ts'edi u yun t'εdi, nguetho εmmε man'da i ja rá ts'edi ran ho ma'da'yo. 11 Nu yun t'edi min 'youi ra nuixte, pe

nts'änni 'da yu patho da hyät'i, nε bi thogui. Pε nuya εmmε xʉn ngu ra nuixte in 'youi a ran ho ma'da'yo, nε njąm'bu da guadi. 12Dí pahmbu ngue njam'bu dim 'beh rá ts'edi a ran hoqui ma'da'yo ngue bi 'yøt' Oja. Janangue'a sä ga huthu nzambui gam mamhbu ran ho ma'da'yo. 13 Νε nu'bu dím mamhbu ran ho ma'da'yo, hin dí øthu tengu mi øt' ra Moisés maya'bu, ngue bi gop rá hmi ra 'bø't'e, ndepe hin da nu yu ja'i israel gue'bu xtím 'be a rá nuixte. ¹⁴Pε nu yu ja'i him mi pa u ngue dim 'bɛ u yú nuixte yun t'edi ne guexta'a yu pa ya, nu'bu in nu ra søcua guepu nt'o't'i yun t'ɛdi rán hogui Oja maya'bu, hingui sä da bądi. Nguetho tengu 'bu i ja n'da ra 'bø't'e bu ja rá hmi da gop rá dä. Nε hønt'a ra Cristo sä di 'uecpa a. ¹⁵Guexta'a yú mbui u 'da i 'buhya, nu'bu in nde da den yún t'edi ra Moisés ne nu'bu im ma, hingui sä da bądi 'bɛ'a nam bøn u, nguetho njot'i tho yú mbui. 16 Pε nu'bu di päh rán 'yomfeni n'da nangue a ra Cristo ne di däp rá mbui a, din ja ran negui rá mbui 'bu. ¹⁷Nu'a ra Cristo, 'da anguui rá Hogandahi. Nε nu'bu i 'bupu mbo ma mbuihu, ne gue'a í thogahu bu ja ra 'bexui ne ran unbi. ¹⁸Ne hingan jo'mi ma mbuihu tengu 'bu dí hanthu xun ho a rá nuixte ra Cristo. Ne tengu n'da ra hyedä di nequi bu to'o da hyandi, ne ngutho gahu man'da man'da di nequi gahu rá nuixte ra Cristo dí hanthu, nε gue'a ní 'yørcahu a ngue ga cohmbu tengu a.

A Nu rá mate zεhε Oją ngue bi 'dac'be ra 'bɛfi, janangue'a hingui cuent ma mbui'be nangue ra

2 CORINTIOS 4 338

'bɛfi dí øt'be. ²Zại hin di thoc man 'yomfɛnisɛ'be nangue rá 'bɛfi Oja, nε hin dí häte'be 'bu dím mam'be rám hman Oją tengu i øt'u 'da. Pɛ dím mam'be ngue majuani a rám hman Oja, ne gätho yu ja'i sä da badi ngue dí 'yo'be xun ho bu ja rá hmi Oją. ³Hønt'u ngue ní mba bu ja ran unbi hingui padi 'be'a nam bøn a dím mam'be ngue ran ho ma'da'yo. ⁴Nguetho nu ra zithu t'embi oja ua ja ra ximhäi i ja ya di xädäba yú mbui u i tenni, hin di japi ngue da nu nuixte a rán ho ma'da'yo ra Cristo, ngue xtí yorpu 'bui. Pε nu'a ra Cristo gue'a ní fa Oja a, ne 'da anguui rá ts'edi. ⁵Pε nugä'be hin dím mam'be a dí hnumanhoc'be, pε dím mam'be ngue gue'a ra Cristo Jesús ra Hmu a. Ne dí øt'be ni 'yehe ga'be, nguetho emme dín numanho be ra Jesús. ⁶Nu Oja rá mbudi bi manda din ja ran nequi bu mi ja ra 'bexui, guet'a Oją bi yorbu ja ma mbuihu. Nε nangue ran nεqui i jaju bu ma mbuihu, sä ga pahmbu rá nuixte Oja. Nguetho ra Jesucristo bi jaju dá pąhmbu rá nujxte Oją.

Nám 'buhmbu a ngue dí pahmbu a majuani

⁷Oją bi 'dajʉ rá ts'ɛdi mbo ma mbʉihʉ, tengu n'da ra jahäi bi järpʉ a xʉn ngu di muui. Tengu 'bʉ dyʉ ts'øehʉ din xɛn'a n'dihi. Pɛ guepʉ na fadi him ma ts'ɛdi zɛhɛhʉ a ná ørpahʉ rá 'bɛfi Oja, pɛ guesɛ rá ts'ɛdi a bi 'dajʉ. ⁸Nguetho thocua thoho dín nu'be yʉn ʉnbi, pɛ hingui tu ma mbʉi'be nangue rá ts'ɛdi Oja dín 'yohe. Nɛ ja'bʉ hin dí pa'be 'bɛ'a dán go a dí øt'be, pɛ

hin dím mam'be ngue ga hɛh ma 'bεfi'be. ⁹I 'bθh man sθi'be pε hin dí 'yose'be nguetho 'buh mam fäts'ihe ra Cristo, ja'bu in nu ran u ma ja'i'be, pε hin dí tu'be. ¹⁰Hønbu go hapu ga mbe'be, dín nu'be ran unbi, ne sä xcá tu'be nangue rá 'befi ra Jesús dí øt'be, tengu tho 'bu mi du ra Jesús. Pe nangue dí hät'be yun unbi di nequi dí 'buhmbe ra Jesús, nε di jamansuc'be. ¹¹Nε thocua thoho ena da thog'be nangue dí øt'be rá 'bɛfi ra Jesús, pɛ gue'a ní negui rá ts'edi ra Jesús dín 'yo'be a, ngue i fäxca'be, ne hin'yu ma ts'edi zehe'be. 12 Janangue'a thocua thoho i thusca man datehu, pe gue'a man'da gním 'buhmbu Oja xun ho a. ¹³Nu'a n'da ran 'yohu bi ma maya'bu bu ja rá t'ohni Oja: "Nugä dí ¿c'yeigä, janangue'a dím mangä na," bi 'yɛna. Ngutho dí øt'ä'be ya, dí ɛc'yɛi'be, janangue'a dí mam'be a dí ɛc'yɛi'be. ¹⁴Nɛ hin dí su'be, nguetho dí pa'be madá thog'be, pe guet'a Oją ngue bi xox'a ma Hmuhu ra Jesús 'bu mi du, da xoxcä'be tengu bu í xox'a ra Jesús. Nε ahu dan 'yohu 'bu dá sømhbu bu 'bu a Oja. ¹⁵Pε nu'u 'bε'a gätho dín nu'be nangue ahu, n'damhma man'da xtán ngu ahu guin nuhu rá mate Oja, ne man'da xtán ngu ahu gui 'yɛmfu Oja, jamadi ni mate. Nε gue'a man'da dí t'εspa Oja a buya. 16 Janangue'a hingui cuent ma mbui'be nangue a ma 'bɛfi'be, madague'bu man'da man'da in theh rá ts'edi ma ja'i'be. Pe Oja di un ra ts'edi ma mbui'be gätho yu pa. ¹⁷Nu'u yun unbi dín nuhu ua ja ra häi hingan ya'a u, pe gue'a man'da dá timhbu ran ho bu mahets'i.

Emme man'da xun ngu ra nuixte gan nuhu bu, xinda gue ran unbi dá nuhu ua ja ra häi. ¹⁸Hin dím bemhbu gätho yun unbi dín nuhu ua ja ra ximhäi, nguetho da tho u. Pe man'da dím bemhbu 'be'a gätho hin dín nuhu ya, nguetho nu'a din jagähu bu mahets'i hin da tho a.

Nε dí pąhmbu ngue ma ją'ihu tengu n'da ra ngu ua ja ra ximhäi, hinga ya'a da hyät'i. Ne nu'bu da yøt' ma ngu ua din ja bu a man'da ma ngumhbu bu mahets'i ngue bi hyø Oją. Ne njąm'bu da gua a, nguetho him bi hyøh yu ja'i. ²Ne nuju dadín xømbuihu nangue ma ngợc'yeihu i jaju ya, ne dín dømdahu di pärca ma ja'ihu, da gohi ma'da'yo, ngue rán säui bu mahɛts'i a. 3Nu Oją di japi ngue din ja ma ngøc'yɛihu bu. 4Pɛ nuya ngue dí 'buhmbu ua, ne in nu ran unbi ma ngøc'yeihu ne dín xømbuihu. Pe hin nangue a dín nde ga tuhu n'dihi, pε man'da dín ndehu a ma ją'ihu ma'da'yo, ngue dím pärcahu ma ngøc'yɛihu i ja ya. ⁵Nu Oja bi zänni ngue di pärca ma ją'ihu, ne bi 'daju rá Hogandąhi ngue ra hmepya majuani din ja. ⁶Nε dín dø'mate thohu yu pa dí 'buhmbu ua. Nguetho dí pahmbu nu yu pa dí 'buhmbu ma ja'ihu i jaju ya, hin dí 'buhmbu ma Hmuhu ra Jesús bu ja rá ngu bu mahets'i. ⁷Dí pąhmbu majuąni din ja ma ngumhbu bu, nguetho dí ¿c'yeigähu Oja, madague'bu hin dín nuhu. 8Ne dín dø'mate thohu ua, pe dí emhbu ngue man'da xun ho ga sohmbu ua ma ngøc'yɛihʉ, nɛ ga mbähä bu bí 'bu a ma Hmuhu mahets'i. ⁹Pε man'da hnεhi thoho dín nde

ga øthu 'bɛ'a in nde ma Hmuhu, madague'a dí 'buhmbu ua ja ra häi, uague dí 'buhmbu bu guepu bí 'bui.

10 Nguetho da zøn ra pa ngue gätho dyu 'yɛc'yɛihu jatho dam 'bähmbu bu ja rá hmi ra Cristo, n'da ngu n'daju. 'Dahmi 'datho ga hamhbu 'be'a yún thehu dá øthu ua ja ra häi. Ga tahmbu 'bu xun ho, ga 'behmbu 'bu hin ɛ ho.

Bi hogahu 'be'a nán suhmbu Oją 'bu mí du ra Cristo

¹¹Νε dí su ga øt'ä a hin da numanho Oja, janangue'a dí humbi dí xifi 'be'a dí 'yec'yei Oja u yu ja'i. Nugä'be Oja i pac'be xun ho 'be'a majuani dí øt'be, ne nu ahu dín nde ngue gui pąc'be xun ho. 12 Hin dín nde a'be guim bemhbu ngue dím ma nangue man hosε'be. Pε dín nde ngue guin numanhoc'be, guepu da zä gui hecuahu yu ja'i ngue i ten'ndu yun 'yohu din 'yezehe, pe nu'u yú mbui u him majuani u. 13 Pe dí øt'be 'bɛ'a gätho da numanho Oja, nguetho dín numanho'be Oja, madague'a im man yu ja'i dí tontogä'be. Pe nu'a 'be'a dí øt'ä'be da bømanho nangue ahu. 14 Nangue rán hugcate ra Cristo ná øt'be 'bg'a gätho dí øt'be, nguetho dí pahmbu ngue bi du bi nu ran unbi nangue gätho yu ja'i. Ne gue'a ní zä dim pomhbu ran unbi u, tengu 'bu xtán duse ngue xtán guzehe yú ts'oqui. ¹⁵Νε bi du nε bi ndants' mahøn'a ngue nde di un ra 'da'yote u gätho yu ja'i. Janangue'a da 'yɛ'ts'a ní 'yøt' yú pähä zehe u to da hyan ra 'da'yote, nε da 'yøt'e 'bε'a in numanho a. 16 Janangue'a nuya dá päh man 'yomfenihu, ne nuya hin

ná numanhohu ma mija'ihu 'be'a di ja, tengu mi øthu nu'bu him mi εc'yεihu. Pε gam bεmhbu tengu bu nam ben Oja u. Ne nu'bu him mi ęc'yeigä, dím beni ngue nu ra Cristo n'da ran 'yohu thoho tengugä, pε nuya hinguin ja bu dím bɛngä ya. ¹⁷Nguetho gätho to'o in 'yohu ra Cristo tengu 'bu ma'da'yo u, nu yún yon 'yomfeni zehe bi 'be'u, pe nuya gätho bi gohi ma'da'yo. ¹⁸Pε gätho bi 'yøzehe Oja dám 'buhmbu ma'da'yo. Nguetho bi hogahu 'bɛ'a madín suhmbu Oją 'bu mi du ra Cristo. Ne nuya bi 'daju ra 'befi ngue ga xihmbu yu ja'i 'be'a dí zin a Oja u, ne da mba ma punbi yú ts'oqui u gätho i ec'yei. ¹⁹Nguetho nu'a Oją min 'youi ra Cristo nu'bu mi 'yøt'e 'bɛ'a dí hocpa yú mbui yu ja'i ja ra ximhäi. Nuya hin da gucpa a rá muui u yú ts'oqui gätho to'o da 'yɛc'yɛi a. Nɛ bi 'dajʉ ra 'bɛfi ngue ga xihmbu yu ja'i 'bɛpu dín yamanhohu Oja u. 20 Nuju ma 'bäigähu ra Cristo, ɛmmɛ dí hah ma mbui dí xihmbu yu ja'i tengu tho 'bu xtá xise Oja u, ngue da 'yäpi di hocpa yú mbui, nε din 'yohu xun ho Oją. ²¹ Nu'a ra Cristo hin'yu rá ts'oqui, pε bi nu ran unbi nangue ma ts'oquihu tengu 'bu yú ts'oqui zehe. Janangue'a da 'yembi rán ho a rán hose ra Cristo to'o gätho da 'yɛc'yɛi 'bɛ'a í du a.

Nese a Oją dí comhbe rá 'befi, ne janangue'a gätho ma mbui'be dí xi ahu ngue gui jamansuhu rá mate Oją. ²Nguetho Oją bi mam bu ja rá t'ohni: "Dá ocä ni ndehu a ra pa gá zoju, ne dá ot'ahu ra mate. Ne dá ze ahu ra pa dá yan ahu," en'a Oja. Nuya

yu pa ja buya Oja sä da 'yøt'ahu ran ho, nuya nám pa ya Oja i sä di pø'ahu. ³Ne dí honi xun ho 'be'a gätho ga øt'be, ngue hin di u't' yú mbui 'da 'bɛ'a dí øt'be, n'damhma njon di c'aman'u rá 'bɛfi Oja dí øt'be. ⁴Nɛ nangue 'bɛ'a dí øt'be dín nde ga ut yu ją'i ngue majuąni yúm 'bɛhniga'be ra Cristo ua ja ra häi. Ne gätho dí øt'be xun ho ne hin dín xømbui'be, madague'bu xun ngu ran unbi dín nu'be. Ne xun hei 'be'a nám 'bu'be, ne ja'bu hin dí pą'be 'bɛ'a ga øt'be. ⁵Nɛ xʉn ngu yu nidi i 'bɛnzaga'be, nɛ dí ofädi'be, nε dín nu'be 'da yʉn 'yo'ts'i 'bʉ in cue yu ja'i. Ne 'da yu pa emme dí yä'be nangue ra 'bɛfi xʉn hɛi dí øt'be. Ne dí ätha'be 'da u yu xui, hin dí a'be, pe dí tømda'be 'be'a din ja. Ne 'da yu pa hin'yu ga si'be. ⁶Pε n'datho ma mbʉi'be tengu rán säui a majuani, ne dá øt'be ran ho nguetho dín 'yo'be rá Hogandahi Oją. Ne hin dadí xømbui'be nangue ma 'bεfi'be, ρε dí utä'be yʉ jạ'i ma yembui'be nε man huεcate'be. ⁷Nε dím mam'be a ram hma majuani, nguetho di zec'be Oja ga øt'be rá 'bɛfi. Nɛ nangue ma hocją'i dí øt'ä'be, hingui sä di yącpa'be yu ją'i. ⁸Ja'bu i hnumansuc'be, ja'bu hin'na, nu'ʉ 'da di c'aman'ʉc'be, nu'ʉ mi'da im ma xʉn ho dí øt'be, nu'ʉ 'da im ma dí fehnigä'be. Pe madague'a xun ngu 'bɛ'a man u yu ja̞'i, dím mam'be 'bɛ'a ngue majuani. 9'Bu i 'da ngue im ma ngue hingui padi 'bε'a dí øt'be, ρε 'bu i 'da i pac'be xun ho. Ne n'dapa ngu n'dapa i husca man dąte'be, pε guexta'a dí 'bu'be. Ne xun ngu yun unbi dín nu'be, pε hin dí tu'be. ¹⁰Nε nu'bu

dín nu'be ra dumbui, 'bex di 'dac'be ran johya ra Hmu mahɛts'i. Nugä'be dí hyoya'be, pε xun ngu u dí jap'be da din a ran ho, nguetho dí xicä'be 'be'a di un'na Oja. Ne hin'yu 'be'a da zä gam mam'be ngue ma mbeti zεhε'be, pε hin'yu 'bε'a dadí 'bε'be, nguetho Oja di 'dac'be gätho dí hom'be. ¹¹Nu ahu ma amigo ahu guí 'buhmbu bu ja ra hnini Corinto, ya dá xi ahu gätho 'be'a dím beni, nguetho dadí hugc'ahu ngue gätho ma mbui. ¹²Nugä'be majuani dadí huεc ahu, pε nu ahu hin ε ja nin huεcate nanguecä'be. ¹³Pε dí xi ahu tengu tho 'bu ma t'uhni ahu, dami xoc ni mbuihu ne din ja ahu ran hugcate nanguecä'be, tengu tho dí øt'be nangue ahu.

Oją i 'bupu mbo ma mbuihu

¹⁴O guín 'yohʉ ʉ 'da ngue hingui εc'yεi Oja, nguetho nte yún jahu n'da u øt' ran ts'o 'bu øt' ran ho n'da. Ne nte rán jaui ra 'bexui a ran nεqui. 15 Nε hin te rán jaui ra Cristo a ra Satanás ngue ra zithu, ne hinga 'dat'a im bemmi n'da ra 'yec'yei a hingui ɛc'yɛi. ¹⁶Nɛ hin te rán jaui rá ngu Oją u yu hmite, nguetho ni mbuihu rá ngu Oją ngue i 'bui maząi. Nε gue'a bi man Oja maya'bu: "Nugä dam 'bupu mbo yú mbui, ne dan 'yohu, ne nugä ga øt'e yú Ojagä u, ne nu'u ga øt'e ngue ma t'uhnigä u," bi 'yɛn Oja. ¹⁷ Janangue'a bi 'yɛn Oją: "Damí 'uehmbu bu, o guí tenhdu ngue'u hingui ec'yei, ne 'yo guí sähu 'bɛ'a xun ts'o. Nɛ ga øt'e ngue ni Ojaju, ne ga sin ahu buya. ¹⁸Ne ga øt'e ni Taju ne nu ahu ga øt'e ma ts'unt'u ahu ne ma t'ixu ahu." Gue'a bi man Oją ngue nuixte rá ts'edi.

Bim päh yú mbui yu 'yec'yei

Ma amigo ahu dadí hugo ahu, ya xun ngu yun ho bi man Oja da 'yørcahu, pe jatho ga 'uehmbu bu i ja 'bɛ'a gätho xun ts'o. Ne ga 'uehmbu 'be'a in nde di ts'on ma ja'ihu, ne ma mbuihu. Jatho ga homhbu man'da man'da 'bɛ'a dí gua'a dán hoju, ngue gan numansuhu Oja. ²Ne nu ahu guí 'buhmbu bu ja ra hnini Corinto, dami bene'be nanguecä'be, nguetho xinga n'da ahu bi nu ran unbi 'bɛ'a dá øt'ahu, ne hin te dá øt'ä'be ngue di ts'on'na ni mbuihu, ne xinga n'da ahu dá hä ahu ngue m'bejua ga ɛn'ahʉ gui jurcahʉ. ³Nuya hin dín nde ngue ga damhya ahu, nguetho ya dí xi ahu ngue ¿mmɛ dadí hugc ahu, ng thocua thoho dím ben ahu, asta gue'bu ga tugä. ⁴Nugä dí ¿c'yɛi ngue guí øthu ran ho, ne gue'a ní hyu ma mbui a. Ne nu ahu gadí 'daju ran johya, madague xun ngu yun unbi dín nugä'be, ρε εmmε hu ma mbʉi ran johya. ⁵Nu'bu má søngä'be bu ja ra häi Macedonia, emme xun hei 'bε'a dá øt'be, nguetho hønbu go hapu dá tho'be bi zuc'be yu ją'i, ne xun hei 'be'a nám 'bu'be ne mi ja ra mbidi ma mbui'be. ⁶Pε nu Oja nzai i hurpa yú mbui u to'o i tu yú mbui, ne bi hyurca ma mbui'be 'bu mi zøm bu ra Tito. ⁷Bi hyurca ma mbui'be nangue gá hyurpa rá mbui ra Tito 'bu gmí 'buhmbu bu. Nu ra Tito bi xicä'be ngue ɛmmɛ bi du ni mbuihu nangue 'bɛ'a gá 'yøthu ngue hingui ho. Ne bi xicä'be emme gmín ndehu guin nuju. Ne nu'bu mi c'aman'ugä 'da, nu ahu bu gá yanju.

Nε nangue guím bɛnjʉ, man'da i hu ma mbui. ⁸Bi du ma mbuigä 'da yu pa nangue rá mbudi søcua dá pen'nahu bu, pe hin'na ya. Bi du ma mbui nangue ra dumbui dá 'da ahu. 9Nuya dadí johyagä, hin nangue bi du ni mbuihu, pε nangue gá päh nin 'yomfɛnihu 'bu mi du ni mbuihu. Ne nu Oja bi japi ngue bi bømanho 'be'a dá xi ahu. Ne nte man unbi bi gohi 'be'a dá øt'a'be. ¹⁰Nguetho nu'u i hon Oja 'bu i tu yú mbui, di japi di päh yú mbui nangue yú ts'oqui, ngue da yani, ne da 'ue'a ra dumbui buya. Pe nu'bu i tu yú mbui ngue hingui padi 'be'a da 'yøt'e ne im ben ra ximhäi, hin di päh rá mbui 'bu, pe man'da di un ran date buya. ¹¹Nu ni dumbuihu bi 'da ahu ran 'yomfeni xun ho nangue gá hyomhbu Oja, ne emme gá hyumbi gá hoju 'be'a bin ja. Ne εmmε gá numan'uhu a ngue bi 'yøt' ra ts'oqui, ne emme gá suhu 'be'a bin ja. Ne gá un ran unbi to'o bi 'yøt' ran ts'o, ne emme gán ehyahu gui 'yøthu ran ho. Emme gmín ndehu xcá mbagä bu xcá ze ahu. Ne ya gá 'yuhmbu bin ho a ra ts'oqui gmín 'yohu. 12 Jananjabu gue'a dá ot'ahu ra søcuą a, ngue hinga hønt'a ngue di hoc rá mbui a ran 'yohu ngue bi 'yøt' ran ts'o, xínga gue'a bi t'ørpa ran ts'o, pe nangue ma søcua dá ot'ahu, Oja bi zä bi 'yut'ahu ngue majuani guí tengahu. ¹³Janangue'a ɛmmɛ hu ma mbʉi'be. Nε man'da dadí johya'be nu'bu mi xic'be ra Tito ngue gá hyurpa rá mbui a nangue 'bɛ'a gá 'yøthu. 14Nɛ dá xih ra Tito, gue da t'ømanho a rám hma bu guí 'buhmbu. Ne gue'a gá 'yørpahu, gá 'yømanho

a ram hma bi xi ahu. Janangue'a hin dí pɛ'ts' ma sägä nangue 'bɛ'a dá xifi, pɛ ɛmmɛ i hu ma mbui. ¹⁵Nguetho nu'bu mí mba bu ra Tito, ɛmmɛ gá numansuhu, nɛ ɛmmɛ gán ɛhyahu gá 'yøthu 'bɛ'a gätho bi xi ahu. Janangue'a man'da bin ja rán huɛcate ra Tito nangue ahu bu. ¹⁶Nɛ ɛmmɛ hu ma mbui nguetho sä ga ɛc'yɛi ngue majuani guí øthu ran ho.

Yun t'unni yu 'yec'yei

Ma zu cu'ahu, dín nde ahu gui pahmbu 'be'a gätho bi 'yøt' rá mate Oja bu mbo yú mbui yu 'yɛc'yɛi dim peti bu ja ra häi Macedonia. ²Nu yu 'yɛc'yɛi bu bi nu ran unbi nguetho yu hyoya thoho u. Pε guemhma εmmε i ja ran johya yú mbui, nε man'da man'da di unda yun t'unni yú mi'yɛc'yeihu. 3Nugä dí haxanjuani ngue bi unni xun ngu, madague'a hin'yu 'be'a da gopu ja rá nguse, ne rá pähäzehe bi uni. ⁴Ne bi 'yäc ra mate ngue ne'u da gom'ma ram fäts'i din t'un'ndu yu hyoya 'yɛc'yɛi bu ja ra häi Judea. ⁵Nɛ man'da xʉn ho bi 'yøt'e xinda gue'a dá bɛngä, nguetho m'bet'o thoho bi hyon rá pähä Oja ngue di bɛnbi 'bɛ'a da 'yøt'e, nɛ nubuya bi xiqui ngue da mbäxqui ga fäx u yu cu. 6Nu ra Tito rá mbudi bi xi ahu nangue yun t'unni gui umhbu. Ne dá xi'be ra Tito di jua'a di peti gätho nin t'unnihu gá mamhbu gui umhbu, nangue nin huɛcatehu, ngue ra mate thoho. ⁷Nu ahu ɛmmɛ xun ngu yun ho guí øthu, ne i ja ni t'ec'yeihu xun ho, ne sä guím mamfu rám hman Oja xun ho, ne emme guí pahmbu xun ho, ne emme guí εhya gui 'yøthu rá 'bεfi Oja, nε ja

ahu nin huɛcatehu nanguecä'be. Pɛ nuya xun ho 'bu gui umhbu xun ho nin t'unnihu, n'damhma hin te gui 'bɛhmbu nangue rá 'bɛfi Oja guí øthu. ⁸Nugä drá Pablogä hin dín nde ga manda ahu 'be'a guí øthu. Nuna 'be'a bi 'yøt' yu cu bu ja ra häi Macedonia, n'da ra hmepya a. Nu'bu ngubu gui 'yøthu, da zä ga pacä ngue majuani i ja ahu nin hugcatehu nangue yu 'yɛc'yɛi. ⁹Nguetho guí pahmbu rá mate ma Hmuhu ra Jesucristo. Nu'a tengu 'bu ra membeti a, pe bin hyoya nangueju ngue bi nde din jaju xun ngu. ¹⁰Nuya i ja a ga xi ahu 'bɛ'a dím bengä. Xun ho 'bu gui juahmbu 'be'a gá dumhbu má jeya, nguetho ęmme gán ęhyahu má jeya gá un nin t'unnihu. 11 Nuya dami pethu nin t'unnihu, ne daman ehyahu ya, tengu 'bu rá mbudi gá bemhbu, ne gui umhbu 'bɛ'a gätho sä gui umhbu. ¹²Nu'bu ja a nde di un a n'da, Oja da numanho, 'bu gue'a rán theui 'be'a pe'ts'a n'da a di uni. ¹³Pe hin dí ena go din danhyei u 'da o dim membeti u 'da nangue a gá unhdu, nε nu ahu buya hin'yu 'be'a gui hyomhbu. ¹⁴Pe nu'a dí xi ahu, pe nuya xun ngu i ja ahu, xun ho 'bu gui unhdu ts'u u 'da hin'yu 'be'a da hyoni. Ne nu'bu da zøn ra pa ngue hin'yu 'be'a gui hyomhbu, nu'u di ze ahu u. Janangue'a gätho thocua thoho din ja 'bɛ'a da hyoni. 15 Nɛ gue'a mán t'o't'i bu ja rám hman Oją: "To'o di pεti xun ngu, pε hin da bong thoho a da hyonse, pe ne'u di peti zu ts'utho, hin te di 'bεdi."

Ra Tito ne'u in 'yohu

¹⁶Dí ɛmfe jamadi Oją ngue bi 'dac mam fäts'i'be ra Tito, ngue nɛ'a ɛmmɛ

im ben ahu ne emme ehya nangue ahu. ¹⁷Ngue nu ra Tito min nde da 'yøt'e 'bɛ'a dá xifi, nɛ'a mi ja rá pähä zehe da mba bu. 18 Ne da mbe ra Tito na man'da ra cu ngue dí penhdä bu, nu'a im man rám hman Oja xun ho, ne gätho yu 'yec'yei ngubu im ma nangue'a. 19 Ma mi'yɛc'yɛihu bi huanhna ran 'yohu na, ngue dan 'yohe 'bu dá haxhe ra mbeti bu Judea. Nε gue'a ná uh man hugcatehe ngue dín nde ga fäx ma cuhu, ne dí nuixte ra Hmu mahɛts'i a. ²⁰Nugä'be dadí jamansu 'bɛ'a dí øt'be nangue yʉn t'unni xun ngu, nguetho hin dín nde din ja 'bɛ'a dí c'aman'uc'be. Nɛ gue'a í than'ndu mi'da yu cu ngue ga mbähmbe 'bu dá haxhe a ra mbeti. ²¹Nguetho dín nde ga øt'be gätho xun ho bu na nu Oją nepu na nu ma mija'i'be. ²²Νε ga pεn'nahu bu man'da ra cu mahøn'a ngue da mbähä ra Tito. Ne nuna dí pahmbe ngue ra 'yec'yei xun ho na. Nehna emme ehya da 'yøt'e xun ho rá 'befi Oją. Emme nde da mba bu da nu ahu, nguetho ya dá xihna nangue ni hogant'øt'ehu. ²³Νε nuna ra Tito, man 'yo'be nangue ma 'bɛfi dadí ze ahu. Ne nu'u mi'da in 'yohu ra Tito, yám 'behni u yu 'yec'yei dim peti ua. Ne da mbäx ahu nangue rá 'befi Oja, gue'a dín nequi xun ho rá nuixte ra Cristo bu guí 'buhmbu. ²⁴Nuya dami 'yørca'be ra mate gui simanhohu yun 'yohu, n'damhma gätho mi'da yu 'yɛc'yɛi da badi ngue majuani i ja nin hugcatehu, tengu tho dím mangä ngue nzai i ja ahu ran hugcate.

Di pet yun t'unni nangue yú mi'yec'yeihu

Nugä hingui jatho ga xi ahu nangue gui zɛhmbu ni mi'yɛc'yɛihu, nangue yun t'unni gui unhdu. ²Nguetho dí pądi ngue εmmε i ja ahu ra pähä gui zehmbu u. Ne ya dá xih yu ja'i ngue i 'bucua ja ra häi Macedonia 'bɛ'a guí øthu bu ja ra häi Acaya. Dá xihya ngue gán ghyahu gá pet nin t'unnihu má jeya. Ne yu cu ua nde da den'nahu 'be'a guí øthu. ³Nuya dí pen'nahu ya yu cu da mbäx ahu gui pethu nin t'unnihu jannangue'a di ja bu 'bu dá søngähe bu, ne din nequi ngue guín ehyahu gui fäxhu yu hyoya, tengu dá xih yu cu ua ngue guí øthu. 4Ne nu'bu ga mbähmbe bu u 'da yu mengu ua ja ra häi Macedonia, ne hin xquín ghyahu gui pet nin t'unnihu, ga pe'ts' ma sähu 'bu. Nguetho emme dí ec'yei guí øthu 'be'a guím mamhbu. ⁵ Janangue'a dá xihya yu cu dim 'bɛt'o da mba bu, di zɛ ahu, n'damhma da zä gui pethu gätho nin t'unnihu, di jua a gá mamhbu. Nε nu'bu dá mbähmbe bu, ya xtí guadi xquí pet'u gätho nin t'unnihu. Nε nu man 'yohe da badi ngue gá umhbu nangue ni pähä zehehu, nε hin nangue dá xi ahu. ⁶Dami bemhbu ya, to'o i tu zu yoho yu hmudä, zu yoho da xoc'u, pe to'o da duhu xun ngu, da xoqui xun ngu u. Janangue'a mpähä thoho gui unhdu yu hyoya yun t'unni, ne nu Oja xun ngu ran japi di 'da ahu buya. ⁷N'da ngu n'da di uni tengu im ben rá mbui zehe di uni. O gadí umhbu 'bu hin guín ndese ni mbuihu, pe xinga gue'u mi'da da xi ahu gui umhbu. Nguetho Oja di hugc'u to'o i ja ran johya di uni. 8Nu Oją sä di 'da ahu xun ngu, janangue'a dí gua a gui hyonsehu, pe ne'a thocua thoho gui

unhdu to'o hin'yu 'bɛ'a da hyoni. ⁹Nt'o't'i bu ja rám hman Oja to'o ngue di unni xun ho u yu hyoya, nu'a rá hogant'øt'e da gohi mazai. ¹⁰Nguetho nu'a Oja ngue nzai di un yu hmudä to'o i tupu ja ra huahi, ne di japi din xandi ngue din ja 'bɛ'a da zi, guet'a Oja di 'da'ahu ra hmudä dán xand ni hogant'øt'ehu, tengu bu nan xand yu hmuda bu ja ra huahi. ¹¹Nu Oja di 'daju xun ngu, n'damhma da zä xø ga thoju xun ngu buya. Nε nu'bu dá undähe nin t'unnihu, ne to'o da hyani da 'yespa Oja ne di un ra jamadi Oja. ¹²Yoho yun ho da bøni nangue nin t'unnihu, nu yu 'yɛc'yɛi din ja 'bε'a da hyoni, nε gätho u di un ra jamadi Oją buya. 13 Ne gätho to'o da hyan nin t'unnihu da 'yespa Oja, nguetho nu nin t'unnihu ra hmepya a ngue majuani guí ec'yeihu rán ho ma'da'yo ra Cristo, nε εmmε di johya ngue guí pahmbu ni cuhu u, ne'u gätho mi'da yu cu. 14Ne to'o da hyan nin t'unnihu, da 'yap Oja da mbäx ahu, ne di huec ahu buya, nguetho i ja ahu xun ngu rá mate Oja bu mbo ni mbuihu. 15 Pe jamadi Oja nangue ran t'unni emme xun ho bi 'daju, ngue rá Ts'unt'u, ne hingui sä gam bemhbu hangu na ngu di muui a. Janangue'a nu'bu dím bemhbu 'be'a bin 'daju, hin ga hyøju 'be'a dí peshu 'bu.

I ja rán t'ędi ra Pablo 'be'a da xih yʉ 'yec'yei

10 Nugä drá Pablogä, εmmε dín nde ahu gui 'yøhmbu a ga xi ahu, pε janate tho ga xi ahu, tengu thoho 'bu da xi'azεhεhu ra Cristo. Nguetho guí 'buhmbu

bu 'da u sä ena mbe dín su 'bu dí 'buhmbu bu, ngue'a janate tho dím mangä, pe nu'bu dí pen'nahu ma søcua, emme nts'edi dím mam buya, sä ɛn u 'da. ²Nu'bu dá mbagä bu, hin dín nde ga ut'ahu hangu rá ts'edi man zambui, pe sä ga damhyagä ts'u to'o im ma ngue dím bɛnsegä'be 'bɛ'a dí øt'be. ³Majuani dyu ja'i thohoga'be ua ja ra ximhäi, pε hin dí tịm'be ua a ra ts'εdi ná tafu ra ximhäi. ⁴Nuju hinga gue'a ma ts'edizehe nán suhmbu, pe rá ts'edise Oja a ná tafu rá ts'edi ran ts'o. ⁵Nangue rá ts'edi Oja dí hecuahu yún 'yets'i yu ja'i nangue 'be'a pase, ne'u hinguin nde da ba Oja. Ne nu rá ts'edi Oja da zä di pärpa yún 'yomfeni yu ją'i ngue 'da'anguui da bɛmhbʉ ra Cristo. 6Ne nu'bu ya dá pa'be ngue majuani guí øthu 'bɛ'a in nde Oja, nugä ga hut'anzambui ngue ga 'uec'u 'da guí 'buhmbu bu, ngue hingui nde da 'yøt'a in nde Oja. ⁷Dami bemhbu ya 'be'a i t'øt'ahu. 'Bu i 'da ahu ngue im beni ngue majuani in 'yohu ra Cristo, xun ho 'bu, pe jatho da badi ngue necä'be dín 'yo'be ra Cristo. 8Hin dí pɛ'ts' ma sä xʉn ngu yu nidi ga xi ahu, ngue bi 'dac man t'ɛdi'be Oja. Nu Oja bi 'dac'be ra ts'edi ga ze ahu man'da gui pahmbu Oją, pε hin nangue ga ts'ongä'be ra 'bɛfi bu. ⁹Nugä hin dín nde gui suhu nangue 'bɛ'a dí ot'ahu. ¹⁰ Nguetho 'bupu 'da di c'aman'ugä, nε εn'u: "Emme ja rá ts'edi rá søcua ra Pablo, pε nu'bu i 'bucua hin'yu rá ts'edi, ne hingui sä din ya xun ho," en u 'da. ¹¹Pε jatho guim bɛmhbu 'da ahu ngue tengu bu nan ja rá ts'edi u ma søcuagä, ne ngutho 'bu dá xi

a zehehu. 12 Nugä'be hinga 'da'ígu dím bembe yu ja'i i 'bupu, ngue i ja ran 'yɛts'i nangue 'bɛ'a ɛna pasɛ u. Pe nu'u to'o im beni man'da i pase xinda gue'u mi'da, pe hingui pa a majuani. Nguetho sä i nuispa yú mija'ihu nangue 'bɛ'a im bɛnsɛ. ¹³Pε nugä'be hin dím mam'be man'da ja man t'ɛdi'be xinda gue'a bi zänga'be Oja, ρε hønt'a dí øt'be 'bε'a i xic'be Oja. Nε bi xic'be Oja dam pe'be bu guí 'buhmbu. 14Ne njon da zä da 'yɛna man'da bi tho'a dá øt'be, xinda gue'a bi xic'be Oją 'bu mbudi thoho dá søm'be bu guí 'buhmbu dá xi ahu rán ho ma'da'yo ra Cristo. ¹⁵Ne hin dín nde ga em'be ngue ma 'bɛfi'be 'bɛ'a bi 'yøt'u mi'da bu guí 'buhmbu, hønt'a ma 'bɛfi'be ga ja ahu guim bɛnthu ni t'ɛc'yɛihʉ xʉn ho, nɛ gue'a dí zä ga øt'be man'da ra 'bɛfi bʉ, 'bʉ da xic'be Oja. 16 Ne sä ga mbe'be bu mi'da yu hnini buya ngue man'da yatho guepu njom bi xih yu ja'i rán ho ma'da'yo ra Cristo. Nε njon da zä da ma ngue n'dan'yo dá thocpa rá 'befi bu. ¹⁷Hingui ho 'bu din 'yezehe n'da, pε man'da da hyądumbui da 'yɛspa ra Hmu mahɛts'i. 18 Nguetho hin te di muui 'bu din 'yezehe n'da, pε nu'bu i øt'e 'bε'a da numanho Oja, gue'a di muui.

Ra Pablo bi ma nangue yu hyäte

11 O gadín xømbuihu 'bɛ'a dí xi ahu ya, madague'a dí yatontogä ts'u. ²Pε nugä εmmε dí hah ma mbui nangue ahu, nguetho i ja bu mbo ma mbui rán huεcate Oja. Νε εmmε dín nde ahu hønsε ra Cristo guin numanhohu, tengu n'da ra hmute ngue hin di ts'on rá mbui,

2 CORINTIOS 11 346

hønt'a in numanho a to'o dim 'buhmi. ³Pɛ dín su ngue di ts'on nin 'yomfenihu nangue ra fehni im man ra zithu, tengu thoho bi 'yørpa ra zithu ra Eva rá mbudi thoho, ne ts'urpu thoho di ja ahu ngue hinga gätho ni mbuihu guin numanhohu ra Cristo. ⁴Pe emme guí øhmbu 'be'a gätho i xi ahu 'da yu ja'i ngue i søm bu guí 'buhmbu, madague'a i xi ahu n'dan'yo ra Jesús ngue'a hin din theui a dá xi ahu, ne n'dan'yo n'da ran 'yomfeni in nde di 'da ahu, ne i xi ahu n'dan'yo thoho nangue ran ho ma'da'yo, xinda gue'a dá xi ahu. 5Pe nugä hingui coh ma ts'edigä xinda gue u 'da guí tenhdu, ngue im manse ngue man'da yú 'bäihu ra Jesucristo. 6Pe dí pacä a majuani ran 'yomfeni nangue Oja, ne gue'a dá ut'ahu xun ngu yu nidi, madague'a hingui sä dan høt'ahyą tengu'u yun 'yohu. ⁷Uague guí ɛmhbu hingui ho dá øt'ä nguetho nte dá hạc'ahu 'bu má mangä rán ho ma'da'yo ra Cristo bu. Pe dá øt' ra 'befi dá honse man ts'ihme, nguetho min nde ga ze ahu. 8Ne nu'bu má xän'nahu bu. nu'u yu 'yec'yei i 'bupu mi'da yum peti, gue'u bi 'dacä 'be'a dá hongä bu, janangue'a bi zä dá xi ahu ran ho ma'da'yo nε nte dá ä ahu. ⁹Nε nu'bu mám 'buhmbu bu, him mi ja 'bɛ'a dá hongä, nɛ hin te dá ä ahu. Pe nu'bu mí zøm bu ma cuhu yu mengu macedonia, bi 'dacä 'be'a madi 'becä. Ne ngubu ga øt'ahu mahøn'a bu, hin te ga ä ahu. ¹⁰Ne dím ma majuani bu ja rá hmi ra Cristo, ngue hin te ga hacua yu cu 'bupu ja ni häihu Acaya, nangue rá 'befi Oja dí øt'ä bu, ne njon da

zä da xiqui ga äh ra mbɛti. ¹¹Ha gue'a dí øt'ä gní 'yɛmhbu hin dadí huεc'ahu, pε Oja i padi ngue dadí huɛc'ahu. 12 Ne ga thoqui tengu dá øt'ä, n'damhma di nequi ngue hinga 'da'igu dí øthe yu hyäte madague'bu ná yąt'a ęna i øt'e xun ho rá 'befi Oją. ¹³Nu u im manse u ena yú 'bäihu ra Cristo, pε him majuani im man u, yu hyäte thoho, ne hin yú 'bäihu ra Cristo u. ¹⁴Pε nde'bu hin gui hyonya thohohu 'bɛ'a i øt'u, nguetho nese a ra zithu da zä da hyä ahu, da zä da 'yøt'e tengu 'bu n'da ra hogam'behni mahets'i bá pen'na Oja. 15 Janangue'a 'da'igu øthu u yú 'yehe ra zithu, ne im ben yu ja'i yu hogam'behni u. Pe da zøn ra pa da nu ran unbi din thehu 'be'a bi 'yøt'e.

Ran unbi bi nu ra Pablo nguetho rá 'bäiui ra Cristo a

¹⁶Pε εmmε dí nde ahu gui 'yøhmbu 'bɛ'a dí xi ahu, madague'bu guím bemhbu ngue dí tontogä ts'u 'bu dí manse 'be'a dí øt'ä. 17 Nu'bu dím manse 'be'a dí øt'ä, ena gue'bu hinga gue'a bi xicä Oją ngue gam ma, pε εna gue'bu dí tontogä ts'u 'bu dím mangä tengu na. ¹⁸Pε nu yun 'yohu bu i xi ahu nangue yún hose, nuya necä ga xi ahu ts'u nangue man hosε. ¹⁹Nu ahu emme xun ho nin 'yomfenihu, pe emme guí ehyahu guí øhmbu 'bε'a i xi ahu yu tonto. 20 Nε εmmε gadí hohu gan 'yɛhɛhu to'o in nde di manda ahu, madague'bu i hä ahu o gue i ä ahu 'bɛ'a gätho i ja ahu. Ne guín numansuhu u emme din 'yɛzɛhɛ, madague da mbɛp'a ni hmihu, pe guexta'a guí tenhdu u.

²¹Nugä'be hingui sä ga øt'be tengu u, pε gue'a gním mamhbu hin'yu ma ts'edigä'be. Nu'u yun 'yohu guí 'buhmbu bu im man yún hose. Necä ga hut'anzambui gam mangä ts'u nangue man hose, tengu n'da ra tonto. 22 Ná yąt'u ngue yu hebreo u, pε nεcä drá hebreogä. Nε ná yąt'u gue yu israel u, pe necă drá israelgă. Nε ná yat'u gue yúm bom'bεto ra Abraham u, pe necä drám bom'betogä ra Abraham. ²³Ne ná yat'u ngue yú 'yehe ra Cristo u, pe nugä man'da drá 'yehegä a ra Cristo xinda gue'u. Nuya dím mangä tengu n'da ra tonto.Nugä man'da xun ngu ra 'bɛfi dí øt'ä xinda gue'u 'da yun 'yohu, ne man'da xun ngu yu nidį dán ofädigä, ne xun ngu yu nidį dá nu ran unbi nangue yum fei, ne xun ngu yu nidi mi ena xtá thogä. ²⁴Ne cut'a nidi bi 'yørcä 'däte ma 'de'maguto yum fei u ma mεnguhe yu judío. 25 Νε nhyundi bi 'benzagä, ne n'dandi yu ja'i bi bat'adogä. Ne nhyundi án xen'a ra barco mi hugă buya, bi zo bu ja ra dehe, ne 'däte ma goho ora dá o bu ja ra dehe buya. 26 Pε xun ngu yu nidi dán 'yogä ne xun ngu yu nidį má guepu xcá tugä bu ja yu dathe, nepu 'buh yu be. Ne bi gorcä ra 'yu ma menguhe yu judío, ne'u hing yu judío. Ne mi ena xtá thogä bu ja yu hnini nepu ja yu dąpo. Ne dá hu yu barco bu emme εn ra dehe ran dahi εmmε nts'utho. Nε mi εna xtá hyogä u yu hyäte 'yɛc'yɛi. ²⁷Nɛ ja'bʉ ɛmmɛ dá yäcä nangue ma 'bɛfi, nɛ bin unba ma ją'i, nε ja'bu nya'a thoho hin dán ącä. Ne ja'bu nya'a thoho hin dán sihmegä, xinga gue ra dehe dá

sigä. Ne ja'bu xun se nguetho hinga xøt'a ma pahnigä. 28 Emme xun hei 'be'a dí øt'ä, ne'u yu 'yec'yei gätho hønbu go hapu dim peti emme dí hadumbui ga jamansugä u. 29 Ne'a dí øt'ä 'da'angu dí sägähe u 'bɛ'a gätho i sä u, nu'bu 'bu a n'da ra 'yɛ̞c'yɛi xʉn güent'i, dí com'be rán güent'i a. Ne nu'bu n'da ra 'yec'yei i øt' ran ts'o, nugä emme dí cuegä nangue a to bi 'bɛpi da 'yøt'e. 30 Pɛ nu'bu i ja a dín nde dá yadä, ρε hønt'a dán güent'igä dá yądä. 31 Nu Oja rá Ta ma Hmuhu ra Jesucristo mająpi maząi a, i pądi ngue hing ra fehni dím mangä. 32 Tengu dá øt'ä n'dandį nu'bu mám 'bucä bu ja ra hnini Damasco, nu'bu min ts'ut'abi ra Aretas, ne nu'a ra ts'ut'abi bi xi u yu dofui da gorca ra 'yu bu ja ra goxthi rá mbä't'i ra hnini, mim beni ngue da bendgä bu. ³³Pe nugä dá pøngä bu ja n'da ra ventana ne dá hugä bu ja n'da ra dą'bøts'e, nɛ nu'u ma amigo bi ca'ma ra 'bøts'e ngue ra xahi bu thi rá mbä't'i ra hnini. Ne him bi bendgä u yu cot'yu. Mahotho dá øt'ä 'bu má pøngä bu ja ra hnini Damasco.

Oja bi 'yurpu mahets'i ra Pablo

Nu'bu dím mansegä 'be'a dí øt'ä, hin te di muui. Pe guemhma ga xi ahu 'be'a bi 'yurcä ra Hmu mahɛts'i 'bu n'dandi. ²Bi bonga 'de'magoho njeya Oja bi zixcä bu mahɛts'i. Hin dí pacä 'bu ne'a ma ngøc'yei o hin'na, pe Oja padi 'bepu ín ja. ³Hønt'a dí pacä ngue dá mba mahɛts'i, hin dí pacä 'bu n'youi ma ngøc'yei o hin'na, hønt'a Oja padi 'be'a dá øt'ä. ⁴Nɛ nu'bu mí ts'ixcä bu guepu

2 CORINTIOS 12 348

mahotho, dá øcä 'bɛ'a bi hmam bu, nε njongui man yu ja'i tengu a. Nε him bin 'dac ran t'ɛdi gam ma 'bɛ'a dá øpu. ⁵Ne nuna bi t'ørcä i sä xcá yadä a 'bu gue'a xcá beni gam ma, pe hønt'a man hosegä gam mangä ngue dí pacä hin'yu ma ts'edi zehegä. ⁶Nugä i jagä 'be'a xcan 'yɛxä 'bʉ xcá ndegä nɛ hin dadín hyät'ä tengu 'bu ra tonto, nguetho da zä xcá ma majuani 'bɛ'a bi t'urcä. Pε hin dín nde ngue gue'a dí t'εscä a, pe dín nde ngue gue'a in nuse yu ja'i a dí øt'ä dí numansugä u, ne'a 'bε'a øsε ngue dím mangä. ⁷Nugä dá nugä emme mahotho bu. Pe nu ra zithu bi 'dacä n'da ran unbi dí sägä. Ne Oja bi un ran t'edi da 'yørcä, ndeque hin dan 'yɛzɛhɛgä nangue 'bɛ'a bi 'yurcä Oja. ⁸Nɛ hyundi dá äpä Oja ngue di 'uec'i ts'u ran u i jagä. ⁹Pe nu'a Oja bi xiqui hin di 'uec'a ran θ, ρε di 'dacä rá mate ne rá ts'edi sä ga hät'ä ran unbi. "Nu'bu hin'yu ni ts'edizehe, man'da di nequi ma ts'edigä," i engä Oja. Janangue'a nu'bu hin'yu ma ts'edi zehegä, man'da emme dadín johyagä, nguetho dí pacä ngue'a man'da dí nequi rá ts'edi ra Cristo. ¹⁰Nuya hingui tu ma mbui 'bɛ'a dí øt'ä, madague'a xun ngu yun unbi dín nugä, ngue di c'aman'ug yu ja'i, uague i pa ma uguigä. Ne hingui tu ma mbui nangue 'bɛ'a i ørca yu ja'i 'bu dí øt' rá 'bɛfi ra Cristo. Nguetho nu'bu hin'yu ma ts'εdi, pε man'da di 'dac rá ts'edi ra Cristo.

I hạh rá mbui ra Pablo nangue yu 'ygc'ygi bu Corinto

¹¹Nu'a 'bɛ'a guím bɛngahʉ, jatho ga xi'asɛhʉ 'bɛ'a dí øt'ä, tengu 'bʉ

drá tontogä. Man'da xun ho 'bu xquím mansehu man hogä xinda gue'bu gam mansegä. Nu yun 'yohu guí tenhdu, hin'yu 'be'a i ja u ngue hin'yugä, madague'a nte i jagä a di muui. 12 Nu'bu mám 'bucä bu, dá ut'ahu ngue majuani ma 'bäigä'be ra Jesucristo, hin dán xømbui 'bu má ut'ahu yun t'øt'e nuixte nε yu hyonya nt'øt'e gue gá nusehu 'bu mám 'buhmbu bu. ¹³Hanja guím mamhbu ngue hin dá øt'ahu bu tengu dá øt'ä bu 'buh mi'da yu 'yɛc'yɛi. Pɛ 'da'angu dá øt'ahθ, ρε hønt'a n'da, ngue hin dá ä ahu 'bɛ'a dá hongä. Ha gue'a gni 'yɛnju hingui ho a dá øt'ä. Pɛ dami pungahu 'bu. ¹⁴Nuya ná hyundi ga mbagä bu. Ne hin te ga ä'ahu 'be'a dí hongä mahøn'a, nguetho hin dín ndegä a ni mbetihu, pe dín ndegä gan jahu tengu 'bu ma t'uhni ahu. Nε hinga gue'u yu t'uhni i ρε'ts'i 'bε'a i hon rá ta o rá mbe. Pε nu yu ta ne yu mbe i pe'ts'i 'be'a da hyon yú t'uhni. ¹⁵Pε da hyu ma mbui 'bu da zä ga 'bɛdi 'bɛ'a gätho dí pɛ'ts'i guepu da zä ga hon'na ran ho ni mbuihu, ne guepu go him mi sä dam pefi ga ze'ahu. Pe masque hin gadí huggahu tengu bu na hugc'ahu. ¹⁶Nε guím mamhbu majuani ngue hin te dá hạcä ni mbetihu, pe guím bemhbu 'da ahu ngue dá tạcä ni mbetihu ngue guí emhbu dá hä ahu. ¹⁷Ha guím bemhbu dá hä ahu ngue dá pen'nahu yum 'behni bu. ¹⁸ Nugä dá ndep ra Tito da mba bu, in 'youi man'da ma cuhu. Guí pahmbu hin te bi daha ngue dąmá 'yä ahu. Nguetho 'da'ingu dím bengä'be ra Tito ngue dadí huɛc'a'be, nɛ 'da'ingu bu na øt'

ma 'bɛfi'be. 19 Ma cu'ahu, dadí huɛc'ahu, dín 'yohu ra Cristo. Ne Oją pądi majuani a dím mam'be ya, ngue dí hom'be 'bɛ'a dín te ni mbuihu. Janangue'a dí honi ga tạpä u yum hma him majuani, ngue im man'u yu hyäte di ugui. Nε hinga gue'a guím bɛmhbu 'da ahu, ngue guí ɛmhbu dí hom'be guin numanhoju. ²⁰Pε dí su ngue hin gan numanhogä 'bɛ'a guí øthu bu 'bu dá mbagä bu. Pe ne da du ni mbuihu 'bɛ'a ga xi ahu buya. Dí su ngue ga tin ahu gadín suhmbu n'da ngu n'da ahu, ne gadín seyabahu, ne gadín cuefu n'da ngu n'da ahu, ne gadín tafu n'da ngu n'da ahu, ne gadín c'aman'uhu, ne gadín 'yøspatho 'be'a gadín xihmbu, ne gadín 'yezehehu, ne dí su ga tin ahu hinga gue'a guí øthu bu ja nim petihu. 21 Ne nu'bu dá mbagä bu, dí su ngue ma Ojahu di jaqui ga pe'ts' ma sä nangue 'bɛ'a guí øthu bu. Nɛ din jagä ra dumbui nangue to'o bi 'yøt' ran ts'o mam'bet'o, ne guexta'a hin ni päh yú mbui, him bi 'yäp rá punbi Oja nangue ran ts'o bi 'yøt'e, gue'u bi 'yøt' ran 'yomt'eni, ne'u bi zinba yú xisu mi'da yun 'yohu.

Rán zofo ra Pablo, ne yun zengua

Na hyundi ya ga mbagä bu gan nu ahu. Nɛ nu'bu dá mbagä bu, ga juanbä u i 'bähmbu u yoho o gue hyu yu testigo.

Nu'bu mám 'bucä bu mam'bɛt'o dá damhya u to'o zai i øt' yun ts'o. Nuya ga xi'u mahøn'a nɛ gätho mi'da ahu, nu'bu dá mbagä bu mahøn'a, to'o gätho i øt' ran ts'o hin ga huɛcthoho u. Ne nu'ahu da zä gui pahmbu xun ho ngue

majuani rá ts'edi ra Cristo 'bu ja a dím mangä buya, ne him ma ts'edi zehegä. Ne nu'a ra Cristo hingui 'beh rá ts'edi ne guí pahmbu nguetho dim pepu mbo ni mbuihu rá ts'edi. ⁴Nu ra Cristo him mi ja rá ts'edi 'bu mi du bu ja ra pont'i, pε nuya i 'bʉi nangue rá ts'εdi Oją. Necä'be hin'yu ma ts'edi zehe'be tengu tho a ra Cristo 'bu mi du, ρε nuya dín 'yohe ra Cristo nangue rá ts'edi Oja, n'damhma da zä ga hoc'ahu bu. ⁵Nuya n'da ngu n'da ahu dami bemhbu xun ho mbo ni mbuizehehu. janangue'a gui pahmbu majuani guí ɛc'yɛihʉ o hin'na. Nu'bʉ hin gán hyäzehehu, sä gui pahmbu majuani i 'bupu mbo ni mbuihu ra Cristo. 6Necä'be dín nde ahu gui pahmbu ngue majuani dí εc'yεi'be ra Cristo. ⁷Dí äp'be rá ts'edi Oja ngue gui 'yøthu ran ho, nε hin nangue da bømanho ma 'bɛfi bu, nguetho man'da dín nde ahu gam 'bumanhohu ra Cristo, xinda gue'bu guin numansuc'be. ⁸Nugä'be hin dín ndehma ngue ga hɛm'be to'o i øt'a majuani pɛ hønt'a dín nde ga øt'be 'bɛ'a di zε u. ⁹Da hyu ma mbui'be 'bu di zac ni mbuihu nangue Oja, madague'a guím bemhbu ngue hin'yu ma ts'edi'be. Pe hønt'a dí äp'be Oja ngue din te ni mbuihu nangue Oja. 10 Dí o't'ahu ngue gui hoc ni mbuihu, nguetho hin dín nde nts'edi ga damhya ahu 'bu dá mbagä bu. Nu Oja bi 'dacä ran t'edi ngue ga tet'a ni mbuihu, pe him bi 'dac ran t'ɛdi ga ʉ't'a ni mbuihu. 11 Nuya hønt'a dí xi'ahu ya, ma zu cu'ahu, Oja gui cohmbu

2 CORINTIOS 13 350

bu guí 'buhmbu. Pɛ man'da din te xun ho ni mbuihu. Nɛ dami bɛmhbu 'bɛ'a gätho dá xi'ahu, nde'bu n'dat'a guim bɛmhbu n'da ngu n'da ahu, nɛ gam 'bumanhohu, nɛ hin gan suhmbu bu. Nɛ Oja da zä man'da di huɛc ahu nɛ da hyu ni mbuihu. ¹²N'da ngu n'da dami

zomanhothu nangue ran huɛcate, nguetho n'dat'a ra Hmu dí tɛnhdu. ¹³Nɛ gätho yu 'yɛc'yɛi 'bucua i pɛn'nahu ran zɛngua. ¹⁴Nu rá mate ma Hmuhu ra Jesucristo, nɛ rán huɛcate Oja, nɛ rám fäts'i rá Hogandahi Oja dí comhbu gätho ahu. Nɛ hønt'a dí xi ahu ya.

GÁLATAS

Ra søcuą bi 'yorba ra Pablo u yu 'yęc'yei bu ja ra häi Galacia

Ran zengua

Nugä dra Pablogä, guecä him bi huangä yun 'yohu, pe guese a ra Jesucristo, ne'a rá Ta, ngue bi xox'a rá Ts'unt'u 'bu mi du. ²Nugä nε gätho ya ma cuhu nangue Oją ngue i 'bucua dí pen'nahu ran zengua. Guehna ra søcua dí ot'ahu, nangue gätho yu 'yɛc'yɛi i 'bupu ra häi Galacia. ³Dí äp Oją ra Ta nɛ ma Hmuhu ra Jesucristo di 'da ahu rán jąpi ne da hyut'a ni mbuihu. ⁴Nu'a ra Jesús bin däse bi gurca ma ts'oquihu. Ne nangue'bu mí du a, bi zä da yanju nangue ran ts'o i jaua ja ra ximhäi. Ne guehna rá pähä ma Tahu Oją bi 'yørcahu. ⁵Janangue'a dí ɛspahu Oją ne i ja rá nuixte gätho yu pa mazai.

Hin'yu man'da ram hma ngue dím pø a n'da

⁶Nugä xøgue dadí hyonya thoho hanja 'bexque gá hyɛhmbu Oją ngue bi zon'nahu xquí pąhmbu rá mate ra Cristo, nɛ gá hyąxhu n'dan'yo ra 'yu t'ɛmbi ní zin ahu Oją. ⁷Pε hin'yu man'da ra 'yu ní

zinju Oją, hinda hønt'a rán ho ma'da'yo ra Cristo. Pε i 'bu'i 'da'u in nde da hyä ahu, ngue nde di pät'ahu ra 'yu nangue ra Cristo. ⁸Pε ya xtá xi ahu ra 'yu ngue majuani dí yanju Oja a. Nu'bu 'bo'o da xi ahu ne 'dahma 'dan'yotho da xi ahu, da nu rán ts'embi Oja a, madague'bu guecä o n'da rám 'bɛhni mahɛts'i. ⁹Ga xi ahʉ mahøn'a tengu ya xtá xi ahu, nu'bu 'bo'o xi ahu n'dan'yo n'da ra 'yu xinda gue'a gá hyamhbu, Oja da zänba ran unbi a. 10 Nuna ram hma dí xi ahu nts'edi ts'u. Mfadi hin dí honi guin numanhoju, pegue dí hongä Oją da numanhogui. Pe nu'bu xcá honi 'bɛ'a dí numanhog yu ją'i, hingui sä xcán 'yɛhɛgä nangue ra Cristo 'bu.

Hønt'a Oją bi benba ram hma im man ra Pablo

11 Ma zu cu ahu, dín nde ahu gui pạhmbu hing rám hman yu jạ'i a rán ho ma'da'yo ra Cristo dá xi ahu. 12 Nu ran ho ma'da'yo dím mangä, xínga n'da ran 'yohu bi xiqui, nɛ hín dá øcä bu ja man xädi a, pɛ GÁLATAS 1, 2 352

guese a ra Jesucristo bi jaqui dí pądi. 13 Nu ahu ya gá 'yøhmbu 'be'a mí øt'ä nu'bu mi tendä yú t'ęc'yei u ma mijudíohe, ¿mmɛ madí undä ran unbi u yú 'yɛc'yɛi ra Cristo, nε mim bengä xcá juadi gätho u. ¹⁴Ne mi øt'ä xʉn ho yʉ́ t'ec'yei ma mεnguhe yu judío, εmmε mi εhya ga ją'ts'ä u, ne xínda gue'u mi'da 'da ingu yʉ jɛya mi pɛs'he. Nguetho emme min nde xcá thocä yún t'øt'e u ndu mam bombøtahe maya'bu. ¹⁵Pε nu'bu hin nám 'bucä, Oja xí huangui, ne m'bejua bi zongui nangue rá mate. Nguetho bi ndese Oja a. ¹⁶ Janangue'a bi jaqui dá pa'a rá Ts'unt'u ngue gue'a ra Cristo, guepu bi zä gam man rám hma bu 'buh yu ja'i hing yu judío. Ne nu'bu mi zoncä Oją, xínga n'da ra ja'i bi xängui. ¹⁷Nε him 'bex dá mbagä bu ja ra hnini Jerusalén ngue xcán yạ'be u mi'da yú 'bäihu ra Cristo ngue m'bet'o xinda guecä. Pε m'bεt'o dá mbagä bu ja ra häi Arabia bu njongui 'bui, guepu dán yase'be Oja. M'bejua buya duá pengä bu ra hnini Damasco. ¹⁸Pe xí tho'an hyu jeya 'bu má mbagä bu ja ra dąhnini Jerusalén, ja dá pacä ra Pedro buya, ne 'de'macut'a thoho dám 'b++'be b++ ra Pedro. ¹⁹Pε hin dá nugä mi'da yú 'bäihu ra Cristo, pe hønt'a ra Jacobo rán 'yohu ma Hmuhu dá nugä bu. ²⁰Pe majuani na dí ot'ahu, nguetho i pą Oją hin dí mangä ra fehni. ²¹M'bɛjua bʉya dá mbagä bʉ ja ra häi Siria ne ra häi Cilicia. ²²Ne nu'u yu 'yec'yei dim peti bu ja yúm peti bu ra häi Judea, him mi pąqui nguetho njąm'bu min nugui. ²³Pegue mi øde ngue guecä drá

Pablo mi ɛna xcá juah yʉ 'yɛc'yɛi, pɛ nuya dím mangä rám hman Oją. ²⁴Janangue'a bi un ra jamadi Oją ngue 'bɛ'a bin ja nanguecä.

Mi'da yú 'bäihu ra Cristo bi zimanho a ra Pablo

Nu'bu mi tho'a 'de'magoho njeya dá mbagä mahøn'a bu ja ra dahnini Jerusalén. Dá mbe'be ra Bernabé nε dá six'be ra Tito. ²Nugä dá mbähmbe bu nguetho bi bengä Oją. Ne dán yąhe 'da'u yú ngurpi yu 'yɛc'yɛi. Nɛ hønt'u dá xi'be 'bɛ'a ním hma dí xi'u hing yu judío, ngue gue'a rán ho ma'da'yo ra Cristo. Nguetho dí su di u't' yú mbui 'be'a dí øt'ä, ngue hinga ne'ʉ yʉ́ t'ɛ̞c'yɛi yu judío dí mangä hapu dí 'yo. Ne nu'bu hin xtá numanho, xtí ts'onga ma 'bɛfi bʉ 'bʉ. ³Pɛ nte bi xic'be, xím bi ma ngue jatho da thecua rá xifani ra Tito tengu yú t'ęc'yei yu judío. Ne nuna ra Tito hin ra judío na, pε ra griego na. 4Pε mi 'bupu u 'da yu hyäte ngue yun 'yøxte, ngue høntho in øxtho, ngue nde da badi gue'bu dí øt'ä yú t'ɛc'yɛi yʉ judío o hin'na. Nu'ʉ in nde di hɛgahʉ 'bɛ'a gätho bi 'daju ra Cristo, ngue bi jaju ga hehmbu yún t'øt'e yu judío. ⁵Pe xíngui ts'u dán hychmbe ngue da hyäje u yu hyäte, pe dá zacuahe a ram hma majuani. Nguetho dín ndehe, hønt'a majuani rán ho ma'da'yo ra Cristo gui 'yɛ't'ambuihu a. ⁶Ne nu'u njuantho yu ngurpi bu, madague'bu t'embi man'da ja yún t'εdi xinda guecä, ρε 'da'angudähe, nguetho 'da'angu yʉn 'yohʉthoho bu na nu Oją. Nε him bi xiqui n'dan'yo n'da ram hma ga xänba yu ja'i. ⁷Pe nu'u yu ngurpi bi hyaxa

353 GÁLATAS 2

njuani ngue gue'a Oja bi 'dacä ra 'bɛfi ga xi'u hing yu judío a rán ho ma'da'yo ra Cristo, tengu thoho ra 'bɛfi bi un Oja ra Pedro nangue da xih ma mijudíohe. 8 Nguetho n'dat'a Oja bi 'dac'be ra ts'edi ra Pedro, ne bi xifi da xi'u yu judío, pe nugä, bi xiqui ga xi'u hing yu judío. ⁹Janangue'a nu'bu mi hyąxa njuąni ngue 'da'angu nan hets'i a ra 'befi bin 'daje u yu ngurpi a ra Jacobo, ne ra Pedro, ne ra Xuua, bi bendga ma 'yɛ'be ra Bernabé. Nu'a nám bøn'a n'dat'a dí εc'yεihe, nε n'dat'a dím mamhbe ga mbɛ'be bu 'bu'u hing yu judío, dam pε'be bu, pε nu'u, di thoqui da xih yu judío. ¹⁰Hønt'a bi xic'be jatho ga fäx'be yu hyoya, pe ngubu dí ehya ga øt'a.

Nu'a ra Pablo bi dąmhyą ra Pedro bu Antioquía

¹¹Pε nu'bu mi mba bu ja ra hnini Antioquía a ra Pedro, nugä dá xip rá hmi, nguetho hingui ho bi 'yøt'e. ¹²Nguetho nu'bu mi zøm bu 'da u ma mijudíohe bi mben'na ra Jacobo, nε 'bex bi 'yε'ts'a na sihmehu u hing yu judío, sä bi zu da 'yɛmp'u yú mijudíohu hingui ho bi 'yøt'e. ¹³Νε nu'u mi'da yu judío ngue mi ec'yei bu, bi den'na ra Pedro. Ne'a ra Bernabé bi den'ndu ngue madí yorba yún t'øt'e. ¹⁴Pe nu'bu má nugä ngue him bin theui ran ho ma'da'yo a bi 'yøt'u, dá xi'a ra Pedro, nε gätho mi 'bäpu: "Nu'i gra Pedro gra judío, pe hin gmi øt' yún t'øt'e yu judío. Pε hanja gní 'yøt' mahøn'a yún t'øt'e yu judío, ne n'danni guín sihme. Pe tengu'bu guí uthu u hing yu judío ngue da 'yøt' yún t'øt'e yu judío," dá embi.

Dyu judíohe, ní vanje a ra Cristo

¹⁵Nugähe ngue dám 'buhmbe dyu judíohe, nzai dá øthe yún t'edi Oja bi sije. Nε hin dám 'buhmbe tengu'u hing yu judío, ngue hingui pah yún t'edi Oja u. 16 Pe guehma dí pahmbe hin dí hogahe u yun t'ędi gue Oją bi un mam bombøtahe maya'bu, pe hønt'bu ga hamhbe rá mate ra Jesucristo, di hoga ma ts'oquihe, dyu judíogähe. Janangue'a necähe ngue dá pahmbe yún t'gdi Oją, pe dá hąmhbe rá mate ra Jesucristo ngue di hogahe. Nε hin dí εmhbe di hogahe 'bu dí øzehehe u yun t'edi. Nguetho mán t'o't'i: "Xínga n'da da t'ɛmbi xʉn ho nangue yún t'εdi Oją." ¹⁷Nε nugähe dyu judíohe, pε nangue ra Cristo dí hombbe di hogahe ya. Ne gue'a ná εs'he a dím bεmhbe di hogahe u yún t'edi Oja. Pe hin dím bembbe ngue dyu 'yøt'ats'oquihe 'bu dí εs'he θ, nguetho gätho xθn hotho rá 'yu ra Cristo. 18 Pε nu'bu gam mangä ngue jatho ga øt'ä mahøn'a yún t'edi Oja bi un ma mijudíohe, ngue gue'u dí hogä u, pe ga cohi dra 'yøt'ats'oqui 'bu, nguetho hin dí hät'i ga øt'ä yun t'edi tengu in nde Oja. 19 Janangue'a dá ε'ts'ä ná bengä ní zingä Oja u yún t'edi, ne dá ten'na ra Jesucristo nguepu da zä di 'dac ra 'da'yote, ne da zä bu ga ørpa rá 'befi Oją buya. 20 Nuya dám 'bucä tengutho 'bu 'darpu xcá tu'be ra Cristo bu ja ra pont'i, ngue bi 'berca man 'yomfenise. Ne gue'a ra Cristo i 'bucua mbo ma mbui ya, di benga a dím ma ne 'be'a gatho man'da dí øt'ä. Pe gue'a nám 'bucä a ngue thocua tho dí hạngä rá ts'edi GÁLATAS 2, 3 354

a rá Ts'unt'u Oją, ngue bi huggä a ng bi un rá te nanguecä. ²¹Ng nugä hin te dím mangä ngue säti thoho bi du'a ra Cristo. Pg nu'bu xtí hogahu u yún t'gdi Oją, säti thoho bi du'a ra Cristo 'bu.

Hinga gue'u yun t'ɛdi ín 'daju rá Hogandahi Oja u

Nu'ahu ma zu cu ahu, ngue guí 'buhmbu bu ra häi Galacia, hanja gnán 'yambuihu, to'o bi hyä ahu ngue hin gui 'yothu a majuani. Nguetho rá mbudi gá 'yøhmbu xun ho 'be'a nam bøn'a í du'a ra Jesucristo. ²Pe damim bemhbu ya nda'a ín 'daju rá Hogandahi Oją a, ha gue'u yún t'ɛdi Oją bi man ra Moisés, uague gue'bu má εc'yεihu bi du ra Cristo nangue ma ts'oquihu. ³Ne ya gá duhmbu gán 'yohu rá Hogandahi Oja nangue gá 'yɛc'yɛihu ra Cristo. Ha guí ɛna gui hyehmbu a, ne guí ena gan hoczehehu ya. Hanja gán tontohu. ⁴Nε nangue gätho yʉn ʉnbi gá nuhu, ha hin te ts'u nin 'yomfeni bi 'da ahu yun unbi. Nde'bu gui pahmbu ts'u 'be'a nam bøn'u yun unbi. ⁵Pe gá 'yec'yeihu 'be'a bi 'yøt'ahu ra Cristo, ne gue'a ín 'da ahu rá Hogandahi Oja a, ne gue'a ní ja ahu gui 'yøthu yun t'øt'e nuixte, nε hinga gue'a gní 'yøthu yún t'gdi yu judío. 6Nu ra Abraham bi 'yɛc'yɛi a bi xi Oją da 'yørpe, nɛ hin'yu man'da 'be'a í ts'imanho a. ⁷Nde'bu gui pąhmbu ya ngue gätho yu 'yɛc'yɛi i comhbu rán japi Oja bin t'un'na ra Abraham, tengu'bu njuantho gätho yú t'uhni ra Abraham. Nguetho i ¿c'yɛi 'bɛ'a bi man Oją tengu ra Abraham.

⁸Nu Oją mám'bet'o mi pądi ngue da numanho u gätho to'o da 'yęc'yei 'be'a bi ma, dague'bu dyúm bom'bɛtohʉ ra Abraham o hin'na. Janangue'a Oja bi xi'a ra Abraham: "Gätho yu nde 'dahma 'dan'yo gui comhbu ran japi u da 'yɛ̞c'yɛigui tengu i," bi t'ɛ̞mp'a ra Abraham. 9 Janangue'a gätho to'o da hyantho ram hma nangue ran ho da 'yørcahu Oja, n'dat'a ran japi ga comhbu ra Abraham, nguetho n'dat'a rá t'ęc'yei dí øthu. 10 Nu'u gätho ngue i ɛna, jatho da 'yøt' yʉn t'edi bi un Oja yu judío, gätho da nu rán ts'embi Oja u. Nguetho i mam bu ja rám Hman Oja: "Nu'bu gui festhohohu a n'da ran t'edi, säti thoho 'be'a mi'da gui 'yøthu 'bu, ne guexta'a gui nuhu rán ts'embi Oja." ¹¹ Mfadi ya ngue xínga n'da ra ją'i sä da zin'a Oją nangue'a ní 'yøt' yún t'ɛdi yu judío. Pɛ tengu i mam bu ja rám Hman Oją: "Gätho to'o da hyantho ram hma nangue ran ho da t'ørpe, nu Oją di hocpa yú ts'oqui, nε di un ra temazai." ¹²Pε nu yún t'εdi Oją, guí εmhbu gui uąspahu rá mate Oją u. Pε bi 'yɛntho u: "Nu'bu 'bui to'o da hyät'i da 'yøt'e gätho yún t'øt'e yun t'gdi, dí zin Oja u yún t'edi 'bu," bi 'yen'u. ¹³Nu'a ra Cristo bi yanju nangue ran ts'embi mi ja xcá nuhu ngue hin dá jąs'hu yun t'ędi. Nguetho bi nu ran ts'embi nangueju 'bu mín zupu ja ra pont'i. Ne gue'a nam bøn'a mán t'o't'i bu ja rám Hman Oja: "Da nu rán ts'embi Oja a to'o din zupu ja ra za," mi ɛna. 14 Nangue 'bε'a bi 'yøt'a ra Cristo Jesús, sä ga hamhbu rá Hogandahi Oja, nangue'a dá ɛc'yɛihʉ. Nɛ n'dat'a ran

jąpi bi un Oją ra Abraham ngue da comhbu yu ją'i hing yu judío, ne gätho mi'da ngue da 'yɛɛ'yɛi.

Hingui sä yun t'edi di ts'onba ran hoqui bi 'yøt' ra Jesucristo

¹⁵Ma zu cu ahu, ga xi ahu n'da ra hmepya ya. Tengu'bu yoho yun 'yohu i hon yu testigo da 'yøt'a n'da ran hoqui, ne i huspa yú firma ne rá sello ra ze'mi. Njo'o man'da ran 'yohu sä di pädi. 16 Nu ran hogui bi 'yøt'ui Oja a ra Abraham nε rám bom'beto. Pe nu rám hman Oja him bi ma ngue gätho yúm bom'beto, pe bi ma hønt'a n'datho, ngue gue'a ra Cristo. ¹⁷Nugä ga xi ahu ya 'bɛ'a nam bøn'a dím mangä. M'bɛt'o thoho xí 'yøt'ui ran hogui Oja a ra Abraham, ne tengu'bu ya bi firmabi ngue njam'bu dim pädi. Ne m'bejua buya bi un yun t'edi ma mijudíohe, 'bu ya xí thoqui goho ciento ne 'däte ma 'det'an jeya. Pe hin'yu yú ts'edi u yun t'edi ngue di ts'onba a ran hogui bi 'yøt'ui Oją ra Abraham. ¹⁸Ne nu'bu da gue'u yun t'edi xtí zinju Oja, pe hin xtá man'a Oja a ran hogui í hogazehehu Oja 'bu. Pe nu'a ran hogui bi mammi Oją a ra Abraham, di untho nangue rá mate zεhε. 19 Pε hanja í zän'na Oja u yun t'edi, gue'bu ya hinga gue'u ørcahu ran ho u. Pe m'bejua bi man Oja yun t'ɛdi, guepu da fadi gätho i ja yú ts'oqui yu ją'i. Pe nu'u yúm 'bεhni Oja mahεts'i bi xi'a ra Moisés ngue di un yun t'edi yu ja'i ne hinga guese Oja. Ne bi zän Oja din t'e'ts' 'bu bi zøh rám bom'beto ra Abraham ngue bi ma ba ɛhɛ, ngue gue'a ra Cristo. 20 Pε nu Oją bin yaseui ra Abraham 'bu mí 'yøt'ui

ran hogui, njom mi 'bä'inde n'da ra pøngahyą, ne him mi 'bähmi n'da rám 'behni mahets'i. Ne hønt'a Oją bi 'yøt'ui ran hogui ra Abraham.

'Be'a nam bøn u yun t'edi

²¹Pe nu'a Oja hingui yoho yum hma bi xiju. Nu'bu xcá häthu xcá jas'hu yún t'øt'e u yun t'edi, gue'u xtí 'daju ra temazai 'bu. ²²Pε nu rám Hman Oja i ma ngue gätho yu ja'i i ja yú ts'oqui. Ne gätho to'o da 'yɛc'yɛi 'bɛ'a bi 'yøt'a ra Jesucristo, da hyani 'bɛ'a bi man Oja ngue di unni. ²³Nu'bu hin ní zøcua häi ra Cristo, mí øthe yún t'edi Oja madí mandagahe xun ho, tengu'bu dyu ofädihe. Jague'bu mi zøh ra Cristo, dá hamhbe rá mate bi xogahe. ²⁴Ne nu yun t'ɛdi midí mandagahe 'bu hin ná pahmbe ra Cristo. Ne tengu n'da ra t'uhni i pa ma unbi 'bu hingui ho øt'e, ρε gue'u dá hamhbe rá mate ra Cristo di hogahe. ²⁵Nuya dá däh ma mbuihu ra Cristo, ne him man dí homhbu 'bɛ'a man'da di mandagahu. ²⁶Nguetho gätho bi 'yørcahu yú t'uhnigahu Oja 'bu má hamhbu rá mate ra Cristo. 27 Ne gätho dán xixyahu nangue dí tenhdu ra Cristo ne 'da'angu dím bemhbu a. 28 Ne dí 'buhmbu ra Cristo, janangue'a hinga 'dahma 'dan'yo bu na nuju Oja, dyu judíohu, o gue dyu griegohu, o gue dyu 'yehehu o gue hin dyu 'yehehu, o gue yun 'yohu, o gue yu xisu. Pe gätho gahu tengu'bu dí 'buhmbu n'danja'itho bu na nu Oja. ²⁹Ne nu'bu dí 'buhmbu ra Cristo, tengu'bu ne ahu gätho bi xandgahu ra Abraham, ne sä ga comhbu ran hogui bi 'yøt'ui Oją a, ne sä ga hąmhbu rán jąpi Oją bi ma di unni.

GÁLATAS 4 356

Nuya dín nde ga xi ahu n'da ra hmεpya 'bε'a mi ørcahe yún t'ɛdi Oja 'bu him mi timhbe ran 'yomfeni. Tengu'bu n'da ra t'ut'uhni da du rá ta, ne i 'bui tengu'bu n'da ra 'yɛhɛ bu ja rá ngu, madague'bu xun ngu 'be'a bi zocpa a rá ta. ²Jatho da mba ma manda asta gue'bu go bin te ra t'uhni. ³Ne gue'a mi øthe a 'bu hin ná pahmbe, midí mandagahe u yún t'edi Oja, gue bi xije 'bepu dán 'yohe ua ja ra ximhäi. ⁴Pε nu'bu mi zøn ra pa ngue bá pεnh Oją rá Ts'unt'u, ne bim 'bui nangue n'da ra xisu ngue ma mijudíohe. Ne nu'a rá Ts'unt'u Oja bi 'vøt' yún t'edi Oja. ⁵Janangue'a bi zä bi hyągahu gätho yu ts'oqui dín dupatehu nangue hin dá øthu yun t'edi xun ho, ne bi zä bu bi zinju Oja ngue dyu t'uhni gahu buya. ⁶Ne nuju yú t'uhnigahu Oja, ne bá pengahu a rá Hogandahi bu ja ma mbuihu. Ne nangue dí 'buhmbu rá Hogandahi Oja, sä gam mamhbu ngue ma Tahu Oją. ⁷Nuya guí 'buhmbu ngue yú t'uhni ahu Oja, ne hin guí 'buhmbu tengu gyu 'yɛhɛhʉ. Nɛ nangue'a 'bɛ'a bi 'yøt'a ra Cristo, Oją di 'da ahu 'be'a gätho i ja, nguetho yú t'uhni ahu.

I hądumbui ra Pablo nangue yu 'yęc'yei

⁸Pɛ nu'bu hin gní pạhmbu Oją majuani, ngue gue'ahu hing yu judío ahu, gmín 'yṣhṣhu yu oja ngue him majuani. ⁹Pɛ nu ahu ya gá pahmbu Oja, nɛ'a Oja i pa ahu. Ha guím bṣmhbu gui hyomhbu man'da ra 'yu mahøn'a, ngue gan 'yṣhɛhu yún t'ṣdi Oja guím bṣnsɛhu dí zin'ahu Oja u. Pɛ nu yun t'ɛdi

hin'yu yú ts'ɛdi u, tengutho a ra 'yu gá hyehmbu mam'bet'o, 'bu gmí thandehu yu oja him majuani. Pe nte manho da 'yøt'ahu mahøn'a u. ¹⁰Pε nuya guí εmhbu i ja yú ts'εdi u 'da yu pa, o gue'u 'da yu zana, o gue 'da yʉ jɛya. ¹¹Nugä dra Pablogä, emme dí su nangue ra 'befi xtá øt'ä bu guí 'buhmbu, ne 'be'a dá xi ahu, ɛna gue'bʉ nte ní mbatho. 12 Nu ahu ma zu cu ahu, dín nde ahu gam 'bʉhmbʉ tengugä, nguetho dá e'ts' yun t'edi mi øt'ä, ne dí 'bucä tengu ahu ngue njam'bu gá 'yøthu yun t'edi mam'bet'o. Ne nu'bu mám 'buhmbu bu, gán numanhoju, nte mán ts'o gá 'yørcahu. Masque nehya gui 'yømanhohu na. ¹³Pe guí pahmbu ngue mi uga, ne gue'a dá mbagä bu. Ne nu'bu mám 'buhmbu bu, dá xi ahu ran ho ma'da'yo buya. 14 Emme xun hei ran u mi jagä, pε njo'o ahu gá sanju ngue xun ugui. Pe gätho ahu gá sinju xun ho, tengu'bu dram 'bɛhni mahɛts'igä, o tengu'bu da guecä dra Jesucristogä. 15 Emme mi hu ni mbuihu 'bu má xi ahu ram hma. Ne nu'bu 'bo'o xtán zä, xtá hyah rá dä nε xtí 'daqui. 16 Pε nuya, ha guí suju ya nangue dí xi ahu majuani. ¹⁷Nu yu ja'i ngue i hä ahu, høntho in nde di 'uec'ahu nanguecä, nguetho in nde ahu go gui numansuhu u ne gui tenhdu u. ¹⁸Xun ho ngue gui tεnhdu u 'da, pε gui huanhdu to'o majuani im ma xun ho, madague'a hinga 'darbu dí 'buhmbu, ¹⁹Ma zu t'uhni ahu nangue ra Cristo, nts'edi gá ungahu, tengu'bu n'da ra xisu ngue hinga nam 'buh rá t'uhni, ngue xø ga ja ahu gam 'buhmbu ma'da'yo mahøn'a. Ne guexta'a ga

thoqui ga nu ran unbi, jague'bu gá pahmbu xun ho a ra Cristo. ²⁰Xi'bu di 'bucä bu, n'dahma sä dan yasehu, nguetho nuua dí 'bucä hingui sä ga padi 'be'a guím bembu.

Rá hmepya ra Agar ne ra Sara

²¹Nu ahu ngue guín nde gui 'yøthu yún t'gdi ma mijudíohe, ga xi ahu ya 'be'a nam bøn u yun t'ɛdi. 22 Nt'o't'i ngue mi 'bu'i yoho yú ts'unt'u ra Abraham. N'da rá ts'unt'u ra 'yehe xisu, ne n'da rá ts'unt'u a rá xisu zehe ngue hinga gue'a rá 'yɛhɛ. 23 Nu rá ts'unt'u ra 'yehe xisu bim 'bui tengutho 'bu im man yu ja'i dim 'buh yú t'uhni, pe nu rá ts'unt'u a rá xisu zehe bim 'bui nangue rá ts'edi Oja nguetho ya xí man'a Oją ngue dim 'bui. ²⁴N'da ra hmɛpya ngue yoho yʉ 'yu i hax yu ja'i. Nu ra 'yehe xisu ní huti ra Agar, rán t'uti u yún t'ɛdi Oja bin t'un'na Moisés bu ja ra t'øhø Sinaí. Ne nu'u to i ten'ndu, tengu'bu yu 'yεhε u. 25 Nu ra Agar i uh ra hmepya nangue ra t'øhø Sinaí nubu ja ra häi Arabia, ne ngutho ra dąhnini Jerusalén ngue'a i ja bu a ya. Ne nu yu ja'i i 'bupu, i uh ra hmεpya tengu'bu yú 'yɛhε u yún t'øt'e yun t'edi u. 26 Pe nu ra xisu ngue hing ra 'yɛhɛ i uh ra hmɛpya nguepu mahets'i, ra hnini Jerusalén ma'da'yo. Νε njongui pa ma manda bu nangue yun t'ɛdi. Nɛ nuju dyú menguhu bu. 27 Nt'o't'i bu ja rám hman Oja:

> Gan johya gra xisu ngue hing ra 'yɛ̞hɛ, madague'bʉ hinga nam 'bʉh ni t'ʉhni.

Nts'edi gan ya nangue nin johya, gue'e hin gana nu ran unbi.

Nguetho dim 'buh mi'da ni t'uhni ngue yú t'uhni Oją, gmme xtán ngu, xinda gue'a ra 'yṣhɛ xisu ngue i tịn yú t'uhni nangue bi mansɛ tengu yu ja'i.

²⁸Ma zu cu ahu, nuya dí øthu tengu ra Isaac rá ts'unt'u ra Abraham, ngue Oją bi ma dim 'bui. Nguetho yú t'uhnigahu Oja tengu bi ma. 29 Pε nu man'da ra ts'unt'u ngue bim 'bui nangue bi manse tengu man yu ja'i, bi zu'a ra ts'unt'u ngue bim 'bui nangue rá ts'edi a rá Hogandahi Oja, tengutho in ja ya. 30 Im mam bu ja rám hman Oja; "Dami 'yethu ra 'yehe xisu ne'a rá t'uhni, nguetho hin da gonhui 'bɛ'a i ja rá ts'unt'u ra xisu ngue hing ra 'yɛhɛ." 31 Gui pahmbu ya, ma zu cu ahu, ngue hin dyu t'uhni gahu ra 'yehe xisu. Pe tengu'bu dyu t'uhnigahu ra xisu ngue hing ra 'yεhε.

Hin dan 'yehehu yun t'edi mahøn'a

Nu'a ra Cristo bi yanju bu min yehehu mam'bet'o, ngue ya him man dan 'yehehu bu. Pe damin ząmhbu bu hapu bi mbäp'ahu ra Cristo, ne 'yo gadin umhbu gan 'yɛhɛhu mahøn'a. 2Dami 'yøhmbu ya 'bɛ'a dí xi ahu, nugä dra Pablogä. Nu'bu gui 'yɛna gui 'yøthu 'da yun t'edi ngue gui hyec ni xifanihu, nu'a ra Cristo hin da zä da 'yøt'ahu n'da ran ho a 'bʉ. ³Dín nde ga xi ahu mahøn'a. Nu'bu gui du'mi gui 'yøthu yún t'edi ma mijudíohe, jatho gätho gui 'yøthu, nguetho hinga xøt'a n'datho gui 'yøthu. ⁴Nu'bʉ 'bʉ i 'da ahʉ ɛna ngue ja yú ts'edi u yun t'edi di hoc'a ni

GÁLATAS 5 358

mbuihu ngue da zimanho ahu Oja, pε ya gá hyεhmbu ra Cristo 'bu, nε gá 'uehmbu bu ja rán hugcate Oja buya. ⁵Pε nu rá Hogandahi Oja dá hamhbu 'bu má pahmbu majuani ra Cristo, gue'a dí 'yɛnjʉ xʉn hojʉ Oja a, ne gue'a ná tømhbu da zinju xun ho. 6Ne nu'bu dí 'buhmbu ra Cristo, madague'bu da mba nthequi ma xifanihu o hin'na, hin te di muui. Pe man'da hnehi thoho ga simhbu xun ho ma mbuihu a ra Cristo, ne gue'a dí jaju ga øthu ran hugcate a. ⁷Pg nu'bu rá mbudi thoho, emme gmí 'yohu xun ho bu ja rá 'yu Oja. To'o bi zamp'ahu ngue hin guí øthu ra 'bɛfi majuani. ⁸Him bi zamp'ahu Oja, nguetho guese Oja bi zon'nahu gan 'yohu bu ja rá 'yu. ⁹Nu'bu guí 'buhmbu n'da in nde di ts'on'na nin 'yomfenihu, 'da xni ts'on'natho ni mbuihu 'bu. tenguthoho 'bu rá íxi ra thuhmε i sinni gätho ra juni. ¹⁰ Nugä dí haxa njuani ngue ma Hmuhu Oja di ja ahu 'da'angu gam bemhbu. Ne to'o i 'bupu ngue in nde di ts'on'na nin 'yomfenihu, da nu rán ts'embi Oja a, hønt'a go to'o. 11 Nu'bu guexta'a dí xicä yu ją'i, jatho gui 'yøthu yún t'ɛdi ma mijudíohe, hin din nugä ran ucpi 'bu. Pe guexta'a i pa ma uguigä nguetho dím mangä, jatho gui 'yɛc'yɛihu a ra Cristo, ngue bi du bu ja ra pont'i nangue ma ts'oquihu. ¹²Nu'a to'o in nde da hyec'a ni xifanihu, man'da xun ho 'bu da 'uetho u. ¹³Nguetho nu ahu, ma zu cu ahu, Oja bi ja ahu bi thøc'ahu yun t'edi, ne bi zon'nahu in nde ahu gan 'yɛhɛhu n'da ngu n'da ahu nangue ran huεcate. Νε hínguin nde ahu gui 'yøthu ni

pähä zɛhɛhu. ¹⁴Pɛ tengu'bu dá jąs'hu gätho yún t'ɛdi Oją 'bu dan huɛju n'da ngu n'daju tengu bu nan huɛcsɛhu. ¹⁵Pɛ gan jamansuhu, xøhma ts'urpu thoho gam 'bɛsɛhu 'bu gan suhmbu n'da ngu n'da ahu, nɛ gan täthu.

Gam bemhbu rá Hogandahi Oja

¹⁶Pε guehna dí xi ahu na ya. Dami 'yøthu a di bɛn'nahu rá Hogandahi Oja, ne gue'a gní 'yes'hu gní 'yørpa rá pähäzehe ni ja'ihu buya. ¹⁷Nguetho nín 'yomfenise n'da, hinga gue'a im man rá Hogandahi Oja a, ne nu rá Hogandahi Oja hinga 'da'anguui ní pähäzehe n'da, ne din suhmi u. Ne nu rá Hogandahi Oja hin di jaju ga øthu 'bɛ'a in nde ma ts'on 'yomfenihu. ¹⁸Ne nu'bu gue'a rá Hogandahi Oja dí tenhdu, di zerca ma mbuihu, janangue'a hin da zä da siju dá festahu yún t'ędi Oją. ¹⁹Gätho mfadi 'bɛ'a nín t'øt'e n'da 'bu øzehe 'be'a in nde ní ja'i n'da. Ngue i øt' ran 'yomt'eni, ne ran ts'om'bäi, ne ra ts'on'yomfeni, 20 ne i thande yu za o gue yu hmite, nε i øt' yun jaxtøni, ne i øt' yun sui, ne i øt' ran ts'eya, ne in cue, ne i øt'a i numanhose, ne i øt' yun heque, ne i nde n'danni din 'yo, ²¹ne i siyate, ne i hote, ne mihni, ne di muns' pu ja yu ngo ngue da 'yøt' yu ts'oqui, ne n'dan'yo thoho i øt'e. Ne dí xi ahu mahøn'a tengu dá xi ahu, ngue nu'u to'o øt' ya, hin nan säui da yurpu di manda rá ts'edi Oja. ²²Pe nu'a rá Hogandahi Oja di jaju ga øthu ran hugcate, ng ran johya, ng ní hyu ma mbuihu a, ne hin dan xømbuihu, ne ga øthu ra yembui, ne ran hocja'i,

nɛ ga jạs'hu dí mamhbu, ²³nɛ hin ga säman'uhu, nɛ ga sąmzɛhɛ ma mbuihu. Nɛ nu'bu ga øthu ya, hin'yu n'da ran t'ɛdi da zä dí zuju 'bu. ²⁴Nɛ nu'a to'o in 'youi a ra Cristo, tengu'bu xí guarpu ja ra pont'i a rá ts'on'yomfɛni zɛhɛ, ngue him man di manda a rá pähä zɛhɛ nɛ gätho 'bɛ'a mí nde rá ją'i. ²⁵Pɛ nu'bu dí 'buhmbu rá Hogandahi Oja, jatho ga jafu di mandagahu 'bɛ'a gätho dí øthu 'bu. ²⁶Pɛ nde'bu hin dan 'yɛzɛhɛhu, janangue'a hin ga bɛnbahu u mi'da ngue da nde da 'yøt'e tengu'u 'da bin 'yɛts'i.

Dam fäxhu n'da ngu n'daju

Ma zu cu ahu, nu'bu 'bu'a n'da ahu bi dang bu ja ran ts'o, ρε nu'ahu gue guexta'a guím bemhbu rá Hogandahi Oja, janate tho guin zohmbu a, gui zehmbu da mbeng bu ja rá 'yu Oją, guim bemhbu ne'ahu hin'yu ni ts'edihu, ts'urpu thoho ne ahu gui tạnju 'bu da ts'ä ahu. ²Nɛ nu'bu guí comhbu ni dumbuihu, guí øthu rán t'edi ra Cristo 'bu. 3Pe nu'bu 'bu'a n'da ahu din 'yezehe, ne hin'yu 'be'a padi, din hyäzehe 'bu. 4Ne hinga gue'a nan johyahu ngue gam bemhbu xun ho ma 'bɛfihʉ xinda gue mi'da. Pɛ ga ørpamasu ma 'bɛfihu ngue ga øthu xun ho, ne gue'a dán johyahu a buya. ⁵Pe n'da ngu n'da ahu jatho gui 'yøzehehu 'be'a go ní 'befi di 'da ahu Oją, ngue ni 'bɛfizɛhɛhu. ⁶Nu ahu ngue i sän'nahu ran ho ma'da'yo, nde'bu gui fäxhu ni xänbatehu gätho 'bɛ'a i honi, janangue'a 'da xtám fäxtahu. ⁷O guím bemhbu gui nuhu ran ho 'bu guí øthu ran ts'o, nguetho guidín

hyäzehehu 'bu guím bemhbu a, ne hingui sä ga häthu Oja. Tengu'bu ga tuhmbu yu hmudä. Nu'bu dá tuhmbu a xun ho, xun ho a din ja buya, pε nu'bu ga tuhmbu a hingui ho, hingui ho din ja buya. 8 Nu'bu 'bui to'o i øt'e ngue i numanhose rá ja'izehe, xmá mba di 'beh ra temazai 'bʉ. Pɛ to'o 'bʉi nangue rá pähä rá Hogandahi Oja, nu'a din t'un ra temazai. 9Nde'bu hin dan xømbuihu ngue ga øthu ran ho, nguetho da zøn ra pa da hnurca ma 'bɛfihu 'bu hin da güent' ma mbuihu. 10 Janangue'a jant'a thoho ga ørpahu ran ho gätho ma mija'ihu a ra ora ngue da zä ga ørpahu. Ne man'da gam bemhbu ga ørpahu ran ho u ma cuhu nangue ra Cristo.

Man'da ran zofo, ne ran zengua ran zegui

¹¹Guín nuhu ya yu t'ohni xun ndoho dá o't'äzehe. 12 Nu'u to'o in nde di 'bεp'ahu ngue gui hyεc ni xifanihu, pε hønt'a in nde dí numanho yu ja'i. I su xtá nu ran unbi 'bu xtá ma, hønt'a ra Cristo í hogahu 'bu mí du bu ja ra pont'i nangue ma ts'oquihu. 13 Nu'u to'o im ma ngue da thec'a ni xifanihu, pε nde hønt'a dí yat'a gui tεnhdu, gue'bu da zä di 'bɛp'ahu gui hyɛc ni xifanihu. Ne hingui øt'e gätho yun t'εdi. ¹⁴Pε nugä hin dín nde dá yat'a dí øzehe. Pe hønt'a nán johyagä a í du bu ja ra pont'i ma Hmuhu ra Jesucristo. Ne nugä tengu'bu 'darbu dá tu'be ra Cristo, tengu'bu dá tugä ua ja ra ximhäi, ngue hin dí øt'ä yún t'øt'e a. Ne nu yún t'øt'e ra ximhäi, hin te rán jaui a 'bε'a dí øt'ä. 15Pε nu'u

GÁLATAS 6 360

in 'yohu ra Cristo, hin te di muui 'bu nthequi o hin'na, pe man'da di muui ngue i ja ra tema'da'yo. ¹⁶Ne di äp Oją da hyurpa yú mbui, ne di un rán johya u gätho to'o i 'yo ra 'yu dí xi ahu, nguetho gue'u majuani yú t'uhni Oją u. ¹⁷Nu yu

pa dí mba bu ya, o ¿mmɛ gadí ungahu ma mbui, nguetho i ja yu mbɛdi ma ja'i hapu bi ts'ɛgui, nangue dán 'yɛhɛgä ra Hmu Jesús.

18 Ma zu cu ahu, dami cohmbu rá mate ma Hmuhu ra Jesucristo. Nɛ hønt'a dí xi ahu a ya.

EFESIOS

Nu ra søcuą bi 'yorba ra Pablo u yu 'yęc'yei bu ra dąhnini Éfeso

Ran zengua

Nugä drá Pablogä, nangue rá pähä Oją ma 'bäigä'be ra Jesucristo. Nu'ahu gyú 'yɛc'yɛihu bu ja ra hnini Éfeso, dí ot'ahu na ra søcuą. Nɛ gätho gyu mbɛti ahu Oją nangue guí ɛc'yɛihu ra Cristo Jesús. ²Dí äp Oją ma Tahu di 'da ahu rán jąpi, nɛ rán johya da hyut'a ni mbuihu, nɛ ma Hmuhu ra Jesucristo.

Oją di jącuahu nangue dín 'yohu ra Cristo

³Dí ɛspahu Oja, nu'a rá Ta ma Hmuhu ra Jesucristo. Nɛ nangue a dín 'yohu ra Cristo, nu'a Oja bi jacuahu nangue gätho yun japi i ja bu mahɛts'i. ⁴Nu Oja bi huangahu nangue ra Cristo nu'bu ma hin'yu ra ximhäi, nguetho in ndeju hin din ja ma ts'oquihu, nɛ xtán hotho ma mbuihu bu na nu Oja. ⁵Nɛ nangue rá pähä Oja ya xu huangahu, nɛ nangue ra Jesucristo bi jaju ngue dyú t'uhnigahu Oja. Nɛ gue'a bi 'yøt'e nguetho bi huɛgahu. ⁶Janangue'a zai dí ɛspahu Oja,

nguetho ¿mmɛ xun ngu rán huɛ cate bi 'yørcahu 'darbu dí ' buhmbu a rá Ts'unt'u di huɛqui. Nɛ gue'a rán japi bi 'daju 'bu má däh ma mbuihu a rá Ts'unt'u. ⁷Ngue ɛmmɛ bi huggahu Oją, ne gue'a í du a rá Ts'unt'u bi pøju, bi nde bi punga ma ts'oquihu. ⁸Ne emme xun ngu rán hugcate Oja, ngue bi jaju dá pahmbu a rá 'yu, ne bi 'daju rán 'yomfeni xun ho. ⁹Pe bi jaju Oja dá pahmbu 'be'a mán t'agui, ngue 'bε'a mím bɛnsε da 'yøt'e ngue da 'yøt'a ra Cristo. 10 Nguetho da zøn ra pa di jua'a 'bɛ'a mim bɛn Oja da 'yøt'e, ngue di jap ra Cristo di manda gätho ja ua ja ra häi nepu mahɛts'i. 11 Nu'a Oja i øt'e 'bɛ'a gätho mim beni da 'yøt'e, ne bi huangahu maya'bu ngue dan 'yohu ra Cristo. Ne nangue'a dín 'yohu ra Cristo, sä ga hamhbu yun japi di 'daju a. 12 Gue'a bi zän Oją nangueju, janangue'a da t'ɛspa Oja 'bu bi hnu a ran ho da 'yørcahu. Ne guecähe yú mbudigähe dá ¿c'yeihe ra Cristo, nε yú mbudigähe bi 'yørcahe a. ¹³Nε ahu, nu'bu gmí 'yøhmbu rán ho ma'da'yo ra Cristo di pøju, gue

EFESIOS 1, 2 362

ram hma majuani a, gá 'yɛc'yɛihʉ a. Nɛ nu'bʉ gmí 'yɛc'yɛihʉ, nɛ ahʉ gá hyamhbʉ rá Hogandahi Oja, ra hmɛpya ngue yɨ mbɛti ahʉ Oja, tengu xí ma. ¹⁴Nu rá Hogandahi i udi ngue majuani ga hamhbʉ rán t'unni di 'dajʉ Oja 'bʉ bi zøn ra pa da zixcahʉ bʉ mahɛts'i, gätho gahʉ ngue yɨ mbɛtigahʉ a. Gue'a ná ɛspahʉ nuixte thoho a.

Nu ra Pablo i äp Oją di un ran 'yomfęni xun ho yu 'yęc'yei

¹⁵Νε nu'bu má øcä ngue guí εc'yεihu a ra Hmu Jesús, nε i ja ahu ran hugcate nangue ni mi'ygc'ygihu, dán ya'be Oja, 16 ne zai dí xi Oja i hu ma mbui ngue di hugc'ahu, ng zai dí äpä rám fäts'i nangue ahu. ¹⁷Nε nu'a ra Ta nuixte thoho, gue'a rá Oja ma Hmuhu ra Jesucristo, dí äp'ahu ran 'yomfeni man'da gui pahmbu xun ho a. 18 Ne dí äp'a Oja ngue man'da da xoc'a nin 'yomfɛnihʉ, ngue gui pahmbʉ a ran ho nuixte guí tøhmbu, ngue gue'a í zon'nahu gui comhbu a. Ne gui pahmbu ngue emme nuixte thoho di muui 'be'a di 'da ahu Oja gätho u to'o yú mbeti a. 19 Ne dí äp Oją gui pahmbu emme xun ndoho rá ts'edi rá Hogandahi hin hapu nín zegui, ngue dim pepu mbo ma mbuihu, gätho gahu dí ɛc'yɛihu. ²⁰Nɛ n'dat'a rá ts'edi ngue emme se a dim pepu mbo ma mbuihu, gue'a bá xox'a ra Cristo bu 'bu u xun du, ne bi japi ngue da hyupu ja rán 'yɛi Oja bu mahɛts'i. 21 Nɛ nu'a ra Cristo bin t'un man'da ra ts'ɛdi xinda gue'u to'o gätho ja yú ts'edi bu mahets'i necua ja ra häi, o gue yu ts'ut'abi, o gue yu ngurbi, o gue'u mi'da

di manda. Nɛ hingui sä n'da da ndønba n'da ra thuhu da t'ɛmbi i ja man'da rá ts'ɛdi gue i 'buhya o gue yu pa dí 'yɛpu. 22 Nɛ gätho 'bɛ'a i ja Oją bi jap'a ra Cristo ngue gätho di manda. Nɛ bi jap'a ra Cristo ngue di manda gätho yu 'yɛc'yɛi, nguetho tengu 'bu ma yahu a di mandagahu. 23 Nɛ nu yu 'yɛc'yɛi i 'bui tengu 'bu rá ja'i ra Cristo. Nɛ dí comhbu 'bɛ'a gätho i ja ra Cristo. Nɛ nu rá ts'ɛdi í yu'a 'bɛ'a gä øzɛhɛ ua ja ra häi, nɛpu mahɛts'i.

Dám pøhmbu nangue rán huscate Oja

Nε mam'bεt'o tengutho 'bu xtá tuhu nangue ma ts'oquihu, nguetho him mi ørpahu masu a ran ho mi siju. Pe nuya nu Oja bi 'daju ra temazai nangue ra Cristo. ²Nɛ nu'ahʉ nu'bʉ hin gmí 'yɛc'yɛihu, gmí tɛnhdu yún t'øt'e ra ximhäi, ne madí manda ahu rá hmu yu zithu, tengutho yu pa ja bu ya, gätho to'o hingui ørpa masu Oja, ne hingui øt'e 'be'a nde Oja. ³Nɛ gätho gähe 'da'angu tho mi othu 'bu mam'bet'o, ne mi tenhdu 'be'a min nde ma ja'i zehehu. Ne dá øt' ma pähä zehehu. Ne nu'bu xcá thoqui xcá tenhdu, emme xcá nuhu rá cue Oja 'bu, tengu tho u mi'da. ⁴Pe nu'a Oja emme xun ngu rá yembui i ja, ne emme i ja rán huccate nangueju. ⁵ Janangue'a bi 'daju ra 'da'yote, tengu 'bu 'darbu bi xoxgahu ra Cristo, madague'bu tengu 'bu ya xí du ma tehu nangue ma ts'oquihu. Pe nangue rá mate thoho Oja xtám pøhmbu. ⁶Ne nu'a Oja n'dat'a bi xoxgahu ra Cristo Jesús, ne bi jaju 'darbu dá huhmbu

363 EFESIOS 2

a ra Cristo bu mahets'i bu nam ben Oją. ⁷Guehna bi 'yøt'e, ngue gätho yu pa maząi da 'yuh rán huęcate, nε da fadi hin hapu sε a rá mate bi 'yørcahu 'bu mí yanju ra Cristo Jesús. 8Bi pøju Oja 'bu má hamhbu rá mate thoho Oja, ne hin nangue yu hogant'øt'e dá øthu. Pε nangue a rán t'unni zehe Oja xtám pøhmbu. ⁹Nε hin nangue ra 'bεfi xʉn ho xtá øthu, janangue'a njon da zä din 'yɛts'i. 10 Nguetho bi 'yørca zɛhɛhu Oja ngue dám 'buhmbu ma'da'yo nangue ra Cristo Jesús, guepu da zä ga øthu xun ho rá 'befi bi zän Oja maya'bu.

Nu ra Cristo bi jaju dán yamanhohu dyu judíohe ne'ahu

¹¹Nε nu ahu ngue hin gyú judío ahu, o gadín vexhu nangue rá mate Oja, pe damim bemhbu ngue yatho gnán hyaju Oja mam'bet'o. Nε nte má hmεpya gmí øthu tengu mí øt'ähe ngue dá hɛc ma xifanihe dyú judíohe. Νε gue'a ná hut'a thohohe gyu 'yanthequihu. 12Ne nu'u yu pa u, hin te nin jahu ra Cristo, xín te nin jahu u yu judío. Nε hin gní pąhmbu ran hogui ngue mi man Oją da 'yøt'e. Pe gám 'buhmbu ua ja ra ximhäi ne nte gmí tømhbu 'be'a da 'yøt' Oja, nguetho hin gní pahmbu Oja. 13 Ne gmí 'yo man hethu nangue a Oją, pε nuya bá jun'nahu, nε sä guin 'yohu ra Cristo ngue bi du nangueju. ¹⁴Pε nu'a ra Cristo bi jaju dán yamanhohu, dyu judíohe nε ahu ngue hin gyú judíohu. Nε bi jaju ngue 'da'angu bu na nuju Oją yu judío ne'u hing yu judío. Nu'a ra Cristo bi hogahu 'be'a madín

hyaju. ¹⁵Nguetho bi du ra Cristo, ne gue'a í jua u yún t'ɛdi yu judío bi xi Oja, ngue yun t'uti mi øt'u. Ne bi japi ngue 'da'angu ga comhbu ra temazai yu judío ne'u hing yu judío, nangue ma'da'yo dí 'buhmbu ra Cristo ya, ne hinga 'dahma 'dan'yo bu dán nuju Oją. Janangue'a hin dadín suhmbu ya. 16 Ne nu'bu mi du bu ja ra pont'i ra Cristo, bi japi da numanho Oja u hønt'a go to'o ma ja'i da 'yɛc'yɛi a, madague'a yu judío, uague hing yu judío. Ne him man suhmbu u. ¹⁷Nu'a ra Cristo bi zøcua ja ra häi ne bi xiju ran ho ma'da'yo, ngue'a dá eshu ran sui mi øthu a Oja, guecähe dyu judíohe ngue mi hänthe rá 'yu Oją, nε ahu ngue hing yu judío ahu ngue gmin 'yomanhetho nangue rá 'yu Oja. 18 Ne gue'a ra Cristo bi zä dán yamanhohu Oja rá Ta, nguetho n'dat'a rá Hogandahi bi 'daju, madague'bu dyu judíohu o gue hin dyu judíohu. 19 Pε nuya hin guí 'buhmbu tengu 'bu gyú 'damhninihu ya, pe 'da'angugdahu ngue dyu 'yɛc'yɛihu. Nguetho nuya gätho gahu dyu menguhu bu bí 'bu Oja, ne gätho gahu yú t'uhni gahu Oją. 20 Ne nuju dyu 'yęc'yeihu, tengu 'bu n'da ra ngu bi thøe nguepu dim 'bu Oja. Ne bi du'mi bi hyøh yu pøngahyą maya'bu, ne'u yú 'bäihu ra Cristo nu'bu mi ma nangue ra Cristo. Nε bi du'mi tengu 'bu i pa m'bä'mi yú guangujądo n'da ra ngu, ne guese a ra Jesucristo a ra do mahyoni bim pεpu. Nε guenju tengu 'bu dyu fø't'ehu buya. ²¹Ne nu'a ra Cristo tengu 'bu ra cemento nín zøt'u yu do bu pa nthøts'e a ra ngu, ngue da gomanho, asta

EFESIOS 2, 3 364

gue'bu go bi guadi xun ho, guepu ja rá ngu Oją, tengu ndese Oją. ²²Ne nangue dín 'yohu ra Cristo, neju tengu 'bu dyu dohu ngue dim pepu ja a rá ngu Oją, guepu i 'buh rá Hogandahi.

Nu ra Pablo rá 'befi i xih ran ho ma'da'yo u hing yu judío

Janangue'a dí äpä rá ts'ɛdi Oja nangue ahu, drá Pablogä. Pε dí ofädigä nangue dí xi ahu ran ho ma'da'yo, gue ahu ngue hing yu judío'ahu. ²Masque ya gá 'yøhmbu ngue Oja bi 'dacä ra 'bɛfi ngue dí xi ahu rám hma, nangue rá mate thoho. ³Nugä ya dá ot'ahu ts'u 'bɛ'a bi 'yurcäzehe Oja, ngue njom mi pądi, ngue nε u hing yu judío da zin Oja nangue ra Cristo. ⁴Ne nu'bu gá nuhu ra søcua, sä gui pahmbu a bi xicä Oja ngue njom mi padi nangue ra Cristo. 5Ne xun ngu yu jeya bi thogui ngue him mi xi Oja yu ja'i 'be'a mim beni da 'yøt'e. Pe nuya bi 'uega ma mbuihe gueje ma 'bäigähe ra Cristo ne u yú pøngahya, nε bi jaje rá Hogandahi ga pahmbe 'bɛ'a him mam fadi, ngue i fah ya. ⁶Pε nuna him mam fadi, guehna ngue ran ho ma'da'yo sä gui pahmbu ya 'bɛ'a i ja ua ya, ngue ne'u yu ja'i hing yu judío sä dim 'buhmbu Oja tengutho yu judío. Νε n'dat'a gui comhbu yu judío ran hogui bi 'yøt' Oją nangue ra Cristo Jesús. Ne n'danją'itho gui comhbu nangue rá ja'i ra Cristo, nguetho ya gá 'yɛc'yɛihu rán ho ma'da'yo ra Cristo. ⁷Pe nangue rá mate zehe ne rá ts'edi Oja sä gam mangä rán ho ma'da'yo ra Cristo, madague'a him man 'yenigä'be. 8Nugä hin te ts'u

dadí mu'be, nε him man 'yεni'be ngue ga xih yu ja'i ngue hing yu judío rán ho ma'da'yo ra Cristo. Pe guehma bi 'dacä Oją ra mate ngue gam mangä a, ne ga xih yu ja'i njon da hyät'i da mbede hangu nan ngu yun ho in nde di 'daju ra Cristo. ⁹Ne bi 'dac rá 'befi ga japi gätho yu ja'i da badi 'be'a him mam fadi, ngue 'bɛ'a mím bɛn Oja da 'yøt'e 'bu rá mbudi thoho, ngue ne'u hing yu judío da zin Oja 'bu da hyan rá mate ra Cristo. Ne gue'a mi sänni da 'yøt' Oja, n'dat'a Oja bi 'yøt'e 'be'a gätho ja ua ja ra ximhäi, nepu mahɛts'i. ¹⁰Gue'a mím bɛn Oja da 'yørpa yu 'yɛc'yɛi, guepu da fadi xun ho gätho rá hogan'yomfeni, da ba u i 'bupu mahets'i ngue i ja yú ts'edi. ¹¹Ne gue'a i øt' Oja ya, tengu mim bɛm 'bu ra mbudi thoho da 'yøt'e, nangue ma Hmuhu ra Jesucristo, nε da 'yøt'e gätho yʉ pa mazai. ¹²Ne nangue dí ec'yeihu ra Cristo, hin dí su ga sømhbu bu nangue ma mbuihu ngue dan yahu Oja. Ne dí pahmbu da 'yøde. ¹³ Janangue'a dí ä'ahu ra mate hin da du ni mbuihu 'bu dín nugä ran unbi, nangue'a dá xi ahu ran ho ma'da'yo. Xingui ts'u guim bemhbu ngue'a dín nugä ran unbi, pe 'da dán johya thohohu ngue bin 'dac ra ts'edi ga hät' yun unbi.

Rán hugcate ra Cristo

14 Nu'bu dím bɛngä ngue nɛ ahu gyu mɛnguhu bu bí 'bu Oja, dín danyahmu dí äp'ahu ra jamadi Oja rá Ta ma Hmuhu ra Jesucristo. 15 Nɛ rá Ta u gätho yu 'yɛc'yɛi, nɛ'u bi zøm bu mahɛts'i, nɛ'u 'butua ja ra ximhäi. 16 Nɛ dí äp Oja ma Tahu

365 EFESIOS 3, 4

nuixte thoho di muui rá ts'edi, ngue di zac ni mbuihu nangue rá ts'edi rá Hogandąhi Oją. 17 Ne dí äp Oja ngue din zam bu mbo ni mbuihu a ra Cristo, nguetho guí ɛc'yɛihu a. Nɛ dí äp Oja ngue man'da din te nin hugcatehu, ng nangue nin huɛcatehu dí zac ni mbuihu. 18 Janangue'a nε ahu nε gätho mi'da yu 'yɛc'yɛi da zä gui pahmbu hangu nan uant'i, ne hangu na mba, ne hangu nan he, ne hangu nan hɛts'i a rán huɛcate ra Cristo. 19 Ne madague'bu hingui sä gätho ga pahmbu rán hugcate ra Cristo nguetho emme xun ngu, pe dí äp Oja ngue man'da man'da gui pąhmbu a, janangue'a da zä gätho da yuh ni mbuihu a rá ts'edi zehe Oją. 20 Pe xun ho ga ęspahu Oją gätho yu pa mazai, nguetho i ja rá ts'edi da 'yøt'e xun ngu man'da, xinda gue'a 'bɛ'a dí ähmbu o 'bɛ'a dím bemhbu. Ngue n'dat'a ra ts'edi dim pepu mbo ma mbuihu. 21 Ne gätho gahu dyu 'yɛc'yɛihu, xun ho dan johyahu ga ɛspahu Oją, nangue'a ra Cristo Jesús dí pahmbu, høn'bu go njam'bu mazai. Ne hønt'a gam bemhbu a ya.

Nu rá Hogandahi Oja di jaju n'dat'a gam bemhbu

A Nugä drá Pablogä dí ofädigä nangue dí øt'a rá 'bɛfi ra Hmu. Nɛ dí ä'ahʉ ra mate ngue gam 'bʉmanhohʉ tengu nin sähʉ ngue ya bi zon'nahʉ Oją. ²Nɛ hin gan 'yɛxhʉ, pɛ gui 'yøthʉ ngue hin'yʉ ni ts'edi zehɛhʉ, nɛ hin gan xømbʉi n'da ngu n'da ahʉ 'bɛ'a i t'øt'ahʉ, nɛ hin gan xuhnanyahʉ n'da ngu n'da ahʉ, pɛ gan huɛjʉ. ³Nɛ ɛmmɛ

gan jamansuhu ngue hinga 'dahma 'dan'yo guim bɛmhbu. Pɛ dami thoqui gui tenhdu rá Hogandahi Oja di ja ahu n'dat'a guim bemhbu. 4 Nguetho tengu 'bu gätho n'danja'idähu bu na nuju Oja dyu 'yɛ̞c'yɛihʉ, nɛ n'dat'a rá Hogandąhi Oja dí comhbu. Ne n'dat'a dí tømhbu 'be'a da 'yørcahu Oją, ngue gätho bi zongahu. ⁵Hønt'a n'da ma Hmuhu i 'bui ngue di mandagahu. Nε n'dat'a ma t'εc'yεihu nangue ma Ojahu i 'bui, ne n'dat'a man xixyahu dí øthu, ngue dí uhmbu yú mbetigahu Oja. 6Ne n'dat'a Oja gue'a ma Tahu dí comhbu, ngue gätho gahu, ne gätho di mandagahu, ne gätho di 'yonju, ne gätho gahu i 'bupu mbo ma mbuihu a. ⁷Nu'a ra Cristo, nangue ra mate thoho, 'dahma'dan'yo yu ts'edi bi 'daju n'da ngu n'daju ngue sä ga øthu ra 'bɛfi ngue ndeju ga øthu. 8Ne gue'a mán t'o't'i bu ja rám hman Oją maya'bu: "Pe gue'a ra Cristo bi un yú ts'edi u yu ja'i 'bu mí mbeng bu mahets'i, 'bu mi dambeni. Ne bi 'berba rá ts'edi gätho nan ngu ran ts'o mim bent'u yu ja'i." 9Ne nu'bu mi mbeng bu mahɛts'i, mfadi ngue guepu bá nexpu, ne bi zøcua ja ra häi, ne bi mba nt'ägui. 10 Guet'a bá cai, nε guet'a bi ndex mahεts'i, ngue da yu'ts' rá ts'edi bu mahets'i, ne hønbu go hapu, necua ja ra häi bi yu'ts' rá ts'ɛdi. 11 Nɛ 'dahma 'dan'yo yu ts'edi bin 'daju n'da ngu n'daju ngue dyu 'yɛc'yɛihu. Bin 'dac ma ts'edihe 'dagähe ngue ma 'bäigähe ra Cristo, ne 'da ahu di ja'ahu gam pøngahyahu, ne mi'da ahu di ja ahu gadí 'yomhbu a ran ho ma'da'yo, ne 'da ahu di ja ahu gam mbädihu,

EFESIOS 4 366

nε mi'da ahu di ja ahu ngue gan xänbatehu nangue rám hman Oja. ¹²Ngubu bi 'yøt'a ra Cristo, bi un yú ts'edi yu 'yec'yei, nguepu da zä da 'yøt'e xun ho ra 'bɛfi bi zänbi n'da ngu n'da, nangue rá 'bɛfi Oja. Janangue'a da zä 'da dám fäxtahu. Ne gue'a dín te rá 'befi Oja a, tengu 'bʉ bi zac rá ją'i ra Cristo. ¹³Nɛ da zøni ngue gätho 'dat'a gam bemhbu nangue ma t'ec'yeihu, ne gätho n'dat'a ga pahmbu xun ho rá Ts'unt'u Oja. Ne gue'a dín te xun ho ma mbuihu ne dam 'bumanhohu tengu ra Cristo. 14 Ne nu'bu gue'a dí homhbu, hin da thäju tengu 'bu dyu t'uhnihu, 'bu 'bo'o 'dahma 'dan'yo da xiju ngue da 'yena da hyäju. Nguetho nu'u yu hyäte ɛna gue'bu εmmε pądi, pε hønt'a in ndeju ga tεnhdu yú fεhni. 15-16 Pε ga padi ga tenhdu a majuani nangue ran hugcate. Ng gue'a nán te xun ho ma mbuihu, nε di jaju tengu 'bu n'danja'i tho ga cohmbu. Tengu 'bu rá ją'igahu ra Cristo, ne nu'a ra Cristo, tengu 'bu rá ya a. Ne gue'a nín zøt'u yu 'yɛc'yɛi. Nguetho di manda gahu ne di zerca ma mbuihu, di jaju n'dat'a gam bemhbu, ne gätho ga comhma'øt'ehu xun ho ra 'bɛfi bi 'daju n'da ngu n'daju, ngue 'da dám fäxtahu, nangue ran hugcate. Ng gue'a nán te xun ho rá 'bɛfi Oją, tengu 'bʉ bin te xʉn ho rá ja'i ra Cristo.

Dám 'buhmbu ma'da'yo nangue ra Cristo

¹⁷Nugä dra Pablogä dím pøngahyągä nangue ra Hmu 'bʉ dí xi ahʉ na jaua, ngue nu'ahʉ him mam 'bʉhmbʉ ya tengu ʉ

yu ja'i hinga na pa Oja. Ne him mam 'buhmbu tengu yu ja'i ngue di manda yú ts'on'yomfɛni zehe. 18 Ne nu'u i 'yo tengu n'da ra xädä nangue yún 'yomfeni, ne hingui padi 'bɛ'a nam bøn'a i øt'e nguetho hingui 'yo bu ja rán nequi Oją. Ne hinguin nde da bą Oją nguetho ɛmmɛ xʉm mɛ yʉ́ mbʉi u. ¹⁹Ne hingui pe'ts' yú sä 'bu øt yu ts'oqui, nguetho ya xum bent ran ts'o, ne emme di ho da 'yøt'e hønt'a go 'bɛ'a man ts'o, nguetho hin'yu mbo yú mbui 'be'a di zedi ngue da zammi. 20 Pε nu'ehu hinga ngubu bi xän'nahu u bi xi'ahu nangue ra Cristo. 21 Ya gá 'yøhmbu nangue ra Cristo, ne nu'bu majuani gá 'yøhmbu 'bɛ'a bi xi ahu, guí pąhmbu ya ngue gue'a majuąni a. ²² Janangue'a dami hyehmbu gätho 'bɛ'a gnám 'bʉhmbʉ, ngue ni nyon'yomfenisehu i hä ahu, ngue 'bε'a guí ndesε gui 'yøthu. ²³Νε ma'da'yo ni mbuihu nε nin 'yomfenihu, ngue gätho ma'da'yo guim bemhbu ya. 24 Ne dami hyehu ngue gätho ma'da'yo tengu bi zän'nahu Oją nangue rá pähä zehe. Nuya dami 'yuhmbu ram 'bui njuantho gui 'yøthu, ngue nte man ts'o gui 'yøthu ya. ²⁵Dami 'yɛshu a ra fehni ngue madín xihmbu n'da ngu n'da ahu, ne guim mamhbu a majuani. Nguetho tengu 'bu n'danja'itho dí comhbu ra Cristo. ²⁶Nɛ nu'bʉ guín cuɛhʉ nangue ran ts'o i t'øt'e, pe damím fähmbu, mamán da ahu ran ts'o. Ne hinga n'dapa gan cuehu. ²⁷Pe xingui ts'u ga cuthu ra zithu bu ja ma mbuihu. ²⁸Nu'bu guím pehu 'da ahu, pe gui 'yeshu a gnám pehu.

367 EFESIOS 4, 5

Ne gam pehmbu xun ho, ne gue'a gdí timhbu a guí homhbu, ne da zä gui fäx'u mi'da ngue hin'yu 'bɛ'a da hyoni. ²⁹Νε 'yo guím mamhbu yu ts'ore, pε guim mamhbu ran ho dí ze'u ne dí hyu yú mbui u to'o gui xihmbu. 30 Ne 'yo gadí unhdu ra dumbui a rá Hogandahi Oja nangue n'da ra ts'oqui. Nguetho nu'a i 'bupu mbo ma mbuihu, nε gue'a da 'yudi ngue yú mbetigahu Oja 'bu rán zegui ra pa, tengu 'bu jaju ra sello. 31 Dami 'yeshu a gní beman'uhu, ne hin gan cuehu 'bu ja 'be'a da si ahu o ja 'be'a da t'øt'ahu. Nε 'yo gadí c'aman'uhu n'da ngu n'da ahu, ne o guím bemhbu ran ts'o nangue ni mija'ihu. ³²Pe gan 'yørpahu ran ho n'da ngu n'da ahu, nε 'da xtán ja ni yembuihu, nε gam punbahu n'da ngu n'da ahu, tengu tho í pun'nahu Oja nangue ra Cristo.

Da 'yøt'e xun ho u yú t'uhni Oją

Ga øthu 'be'a øt'a Oją, nguetho yú t'uhni gahu a ngue di huggahu. ²Ngue ga ørpahu ran hugcate ma mija'ihu, tengutho ra Cristo bi huggahu 'bu mín däse bu ja ra pont'i nangueju. Ne nu ra Cristo bi un rá te, n'da ran t'unni ngue bi numanho Oja. ³Ne yú t'uhni gahu Oja, janangue'a xingui ts'u gam bɛmhbu ran ts'o, hin ga øthu ran 'yomt'eni, xíng ran ts'iyate, ne xínga n'da ran ts'o ga øthu. ⁴Nε hin gam mamhbu ra ts'ore o gue ran 'yant'u, ne hin dan ya mangat'ihu, nguetho hin rán theui rá 'yɛc'yei Oją u. Pe ga xihmbu Oją jamadi nangue rán ho bi 'daju. 5Pε dí pahmbu hingui sä n'da da yurpu

di manda ra Cristo nε Oja, nu'bu i øthoho ran 'yomt'ɛni, o gue im ben ra ts'on'yomfeni, o gue i øt' ran ts'iyate. Nguetho nu ra ziyate tengutho 'bu i thande 'be'a i ja. 6Ne njon ga jafu da hyäju gue'bu 'bo'o da xiju ngue xun ho 'bu ga øthu ran ts'o. Nguetho to'o da 'yøt' ya yun ts'o, emme xun ngu da nu rá cue Oja, nangue a him bi 'yørpa masu Oja. ⁷Pε hin dan 'yohu to'o i øt' ran ts'o, nguetho hin'yu 'bɛ'a man jahu u. 8Pe nu'ahu mam'bet'o gmí 'yohu bu ja ra 'bexui. Pe nangue guí 'buhmbu ra Cristo ya guí 'buhmbu bu ja rán nequi a. Nuya damam 'buhmbu tengu rán säui bu ja ran negui. ⁹Ne nu'a rán negui Oja, gue'a dán jahu ra hogambui a, ne gue'a dám mamhbu majuani a, ne gue'a dá øthu ran ho a. 10 Nε dami hyumbi gan xähmbu gui 'yøthu 'bɛ'a dí hyu rá mbui Oja. ¹¹Pε xíngui ts'ʉ ga øthʉ tengu øt'ʉ i 'yo bu ja ra 'bexui. Pe ga uhmbu ngue nte ní mbatho 'bɛ'a øt'u. 12 Pɛ ga pe'ts' ma sähu hin gam mamhbu 'be'a øt'u i øt' mán t'aguitho ran ts'o. ¹³Pε nu'a rán nεqui Oją di yot'u to'o i 'yo bu ja ra 'bɛxui, ndepe da badi ngue i ja yú ts'oqui. Nε hingui sä da 'yan mant'agui thoho n'da 'be'a øt'e, nguetho nu'a rán nequi Oja di yot'u gätho ran ts'o. ¹⁴ Janangue'a nt'o't'i: "Daman nuhmbu ngue guí ąhmbu, tengu 'bu gyú duhu, nguetho nu'a ra Cristo di 'da ahu ran nequi," bi 'yena. 15 Janangue'a dami jamansu 'be'a guí øthu, ne hin gam 'buhmbu tengu u yu ja'i ngue hingui padi 'be'a øt'e. 16Pe madague'a xun hei yu pa i ja bu ya, dami hyumbi gam pehmbu xun

EFESIOS 5, 6 368

ho. ¹⁷'Yo guí co'yambuihu, pɛ dami hyumbi gui hyoni gui pahmbu rá pähä ra Hmu. ¹⁸Pɛ hin dán johyahu a ra sɛi, nguetho di ts'ongahu a. Pɛ man'da dán johyahu rá Hogandahi Oja. ¹⁹Nɛ 'da dán johyabahu n'da ngu n'daju ngue dan xihmbu 'bɛ'a i ørcahu ra Hmu, ngue dan tuhmbu yú thuhu Oja gätho ma mbuihu dá ɛspahu Oja a. ²⁰Nɛ thocua thoho ga xihmbu jamadi Oja ra Ta, nangue 'bɛ'a gätho jaju, nangue rá thuhu ma Hmuhu ra Jesucristo.

Dim 'bumanho yu 'yec'yei bu ja yun nguse

²¹Ne hin dan junthu, pe 'da xtán 'yehe thohohu, nguetho gätho gahu dín numansuhu ra Cristo. 22 Ne nu ahu gyú xisuhu, dami 'yøthu 'be'a im man ni ndøhu, tengutho bu gní 'yøthu a im mam ma Hmuhu mahɛts'i. 23 Nguetho nu'u yun 'yohu i 'bɛt'o bu ja rá ngu, tengu a ra Cristo i 'bet'o bu 'buh yu 'yec'yei, ngue tengu 'bu guese a rá ją'i a, ne rám pørpate gätho u. 24 Nu'u yu xisu da 'yøt'e 'bɛ'a gätho im man yú ndø, tengu tho yu 'yɛc'yɛi da 'yøt'e 'bɛ'a gätho im man ra Cristo. ²⁵Ne nu ahu ma min'yohu ahu, dami huge ni xisuhu, tengu tho a ra Cristo bi huɛc yu 'yɛc'yɛi, nɛ bi un rá te nangueju. ²⁶Ne nu a ra Cristo ngubu bi 'yøt'e, nu'bu mi japi da bo xun ho gätho yu 'yɛc'yɛi nangue rám hman Oją. Nguetho ram hma tengu 'bu ra dehe i pe't'e gätho ran ts'o. Ne nu'a ran xixya, n'da ra hmepya ngue ra Cristo bi hoga ma mbuihu. ²⁷N'damhma da zin u yu 'yɛc'yɛi, ngue ya gätho mahoqui, nɛ nte man ts'o din 'yohu. Ne hin'yu

'be'a da thinbi, pegue gätho i jua a ran ho. 28 Ne gätho yun 'yohu, nde'bu di huɛc yú xisu, tengu bu ní hugc rá jalizehe. Nguetho nulu to'o di hugc rá xisu, din hugc zehe a. ²⁹Ne xinga n'da ra ja'i i san rá ja'izehe, pe din jamansu, ne i 'uini xun ho rá ja'i, tengutho i øt'a ra Cristo nangue yu 'yɛc'yɛi. 30 Nguetho nuju dyu 'yɛc'yɛihu, tengu 'bu rá ngợc'yei ne rá do'yo gahu a rá ja'i ra Cristo. 31 Tengu mán t'o't'i: "Nu'bu n'da ran 'yohu i sin rá xisu, i soh rá ta ne rá mbe. n'damhma da zä di manda rá xisu. tengu 'bu ε rá ja'izεhε," bi 'yɛn'a ra t'ohni. ³²Ne xʉn hei da badi 'be'a nam bøn na, pe dí engä drá Pablogä, ngue i udi nangue ra Cristo ne nangue yu 'yɛc'yɛi. ³³Pɛ nɛ im ma, gätho ahu ngue gyun 'yohuhu, dami hugc ni xisuhu tengu bu gní huge zehehu. Ne nu'ahu gyu xisuhu damin numansu ni ndøhu.

Nu'ahu gyu t'uhnihu gyu 'yɛc'yɛihu dami 'yøthu 'bɛ'a man ni tahu ni mbehu, nguetho gue'a yún thehu a ngue gui 'yøthu. ²Dami numansu ni tahu ne ni mbehu. Ne gue'a rá mbudi a rán t'ędi Oją ngue ní jąp Oją n'da a, ngue bi ma maya'bu. 3Ne guehna ran japi bi ma da nu n'da 'bu da 'yøt'e, ngue din ja ran johya ne xun ngu yu pa dim 'bucua ja ra häi. ⁴Ne nu ahu gyú tahu, nu'bu guí suh ni t'uhnihu, nde'bu hin gui jafu din cuetho. Pe dami temanhohu guepu dí 'yɛc'yɛi ra Hmu u. ⁵Nɛ nu ahu gyu mbefihu ne gyu 'yehehu, dami 'yøthu xun ho 'bɛ'a im man ni hmuhu ua ja ra häi, ne guin numansuhu u, ne gui suhu. Ne

369 EFESIOS 6

mpähä thoho gui 'yøthu ni 'bɛfihu, tengutho bu gní 'yørpahu rá 'bɛfi ni Hmuhu ra Cristo. 6Dami 'yøthu xun ho ni 'befihu, hinga høn'bu in nu ahu ni hmuhu, pe dami 'yøthu tengutho bu gnín 'yɛhɛhu ra Cristo. Ne gätho ni mbuihu, ne gue'a rá pähä Oja a buya. ⁷Dami 'yøt' ni 'bɛfihʉ nangue ran johya, tengu bu gní 'yøthu rá 'bɛfi ni Hmuhu mahɛts'i, nɛ hinga hønt'a dín numanho ahu yu ja'i. 8Nε damim bemhbu ya, Oją di cos'ahu ran ho nangue ran ho xcá 'yøthu, madague'a gyu 'yehehu o gue gyu hmuhu. ⁹Ne nu ahu gyu hmuhu, pe gui 'yørpahu a xun ho u ni mbefihu, o gue ni 'yɛhɛhʉ, tengu tho bʉ gní ndepe da 'yøt'ahu ran ho. Νε hin gui xihmbu yun unbi, nguetho guí pahmbu ngue n'dat'a ni Hmuhu mahets'i. Ne nu a ra Hmu mahets'i hin di hyespu na nuju.

Di zerca ma mbuihu rá ts'edi Oja tengu rá he ra dofui

¹⁰Ne nuya ma zʉ cu ahʉ, ga zacua ma mbuihu nangue rá ts'edi Oja i jaju. ¹¹Ngue tengu n'da ra dofui i he rá he ngue ra t'egui ní täcua yún są u yún suihu. Ne ngutho rá ts'edi Oja 'bu dí homhbu ngue hin da zä da hyäju ra zithu. ¹²Nguetho hinga gue'u yu ja'i man suihu, pe gue'u yú hmu yu ts'oqui, ngue ra zįthu rá hmu ra 'bexui i ja gätho ra ximhäi. Ne u gätho yum fäts'ihu ra zithu in 'youi ran dahi, ne gätho 'be'a má ts'edi bá nexpu 'buh rá hmu ran ts'o, gätho man suihu u. ¹³Janangue'a tengu 'bu ga hehu yu t'egui ya, nangue gätho rá ts'edi Oja, ngue ga häthu ga tafu yún sa

ra zithu i säc ma mbuihu. Ne nu'bu dá tạhmbu ran sui, ya dá juahmbu xun ho, ne dá nuhu xingui ts'u dá 'behmbu. 14 Ne nu yu t'egui dí xi ahu, nε gue'u nán sähu u. Ngue nu'a ram hma dí tenhdu, ngue tengu 'bu ran gut'i ngue ra t'egui gam päthu. Nε nu'a ná hạmhbu ran hogui bi 'yørcahu ra Cristo, tengu 'bu ra coto ngue ra t'egui a, ngue hingui sä da daju ra zithu. 15 Ne nu'a ná yamanhohu Oja nangue'a ran ho ma'da'yo dá hạmhbu, ne gue'a ná huthu ran zambui tengu 'bu dí net' ma zapatohu ngue yu t'egui, ne dan tihmbu ga suhmbu ra zithu. 16Ne man'da, nu'a ná pahmbu majuani Oja, ngue tengu 'bu n'da ra xit'egui ní däqui gätho yún są ra zįthu, tengu 'bu t'engbahu n'da ra sibi. ¹⁷Ne nu'a ná pahmbu majuani dám pøhmbu, tengu 'bu dá pant' ma yahu ra fui ngue ra t'egui, ngue hin gam bemhbu a in nde di bengahu ra zithu. Ne nu'a rám hman Oja, tengu 'bu ra espada di 'daju rá Hogandahi Oja, gue'a dám muthu ra zithu a. ¹⁸Pε thocua thoho dan yahu Oja, ga äfu rá ts'edi, xíngui ts'u ga eshu nan yahu Oja, tengu di bengahu rá Hogandahi Oja. Ne dan ehyahu hin dan xømbuihu, ngue ga äfu Oja da mbäx'u gätho ma mi'yɛc'yɛihu. ¹⁹Ne nugä drá Pablogä, dami 'yäfu Oja nanguecä, n'damhma di 'dacä ran 'yomfeni ne ga hut'anzambui gam mamp'a rám hma, ne ga xi u hing yu judío 'bɛ'a nde Oja ngue da bah ya. ²⁰Gue'a nán ofädigä a, ngue dí xicä yu ja'i 'bɛ'a bi xicä Oja. Dami 'yäfu rá ts'ɛdi Oja ngue hin ga su ga thoqui gam mangä rám hma.

EFESIOS 6 370

Ran zengua ran zegui

²¹Nuya dí pɛnhdä bʉ na ma cuhʉ ra Tíquico, ngue ɛ̞mmɛ mahuɛ̞qui. Nɛ nuna ɛ̞mmɛ øt'e xʉn ho rá 'bɛfi Oją. Nu'a da xi ahʉ 'bɛ'a gätho dadí jagä, nɛ nangue gätho 'bɛ'a dí øt'ä. ²²Nuna ra Tíquico da gąx na ra søcuą dí øt'ä, nɛ da xi ahʉ nanguecähe, nɛ da hyut'a ni mbuihu. ²³Pɛ Oja ma Tahu nɛ ma Hmuhu ra Jesucristo da hyut'a ni mbuihu, nɛ di ja ahu gui huɛ c ni mi'yɛc'yɛihu, nguetho gá hyamhbu rán ho mbo ni mbuihu. ²⁴Pɛ Oja di 'da ahu rán japi gätho ahu to'o gätho hin gui 'yɛ'ts'a gnín numanhohu a ma Hmuhu ra Jesucristo. Nɛ hønt'a dá xi ahu ya.

FILIPENSES

Ra søcuą bi 'yorba ra Pablo u yu 'yɛc'yɛi bu ja ra dahnini Filipos

Ran zengua

Nugä drá Pablogä dí yo'be ra Timoteo drá 'yɛhɛ'be ra Jesucristo. Dí o't'ä'be na ra søcua gätho ahu ma zu cu ahu, nɛ u yu ngurbi nɛ u yúm fäts'ihu yu ngurbi, nɛ gätho u i 'bupu ra dahnini Filipos ngue i tɛn'na ra Cristo. ²Pɛ dí ndep Oja ma Tahu nɛ ma Hmuhu ra Jesucristo da 'yɛnts'ahu rán japi nɛ da hyut'a ni mbuihu.

Nu ra Pablo i äp ra jamadi Oją nangue yu 'yęc'yęi

³ Jamadi, dí ɛmp'a ma Oją, n'dandi ngu n'dandi dím bɛn ahu, nguetho gue ahu mam fäts'i ahu bi 'dacä Oją. ⁴Nɛ zại ɛmmɛ i jagä ran johya 'bu dí äpä ra jamadi Oją nangue ahu. ⁵Nɛ dadín johyagä nguetho n'dat'a rá 'bɛfi ran ho ma'da'yo dí comhbu, gue'a gní zɛju a, nɛ gue'a gá 'yøthu 'bu rá mbudi gá 'yɛc'yɛhhu, nɛ asta gue yu pa i jabuya. ⁶ Nugä dí padi ngue Oja di thocta a ra hoga'bɛfi ngue bi du'mi bi 'yørbu ni mbuihu, janangue a di juadi xun ho 'bu bi zøn ra pa

ba εh mahøn'a ra Jesucristo. ⁷Nε gue'a ná äpä ra jamadi Oją a, ngue emme dím ben ahu. Ne tengu'bu 'da'angu dí sähu ran unbi dí sägä ne gue'a ná comhbu rán japi Oja a, dá gue'bu dí ofädigä, o gue'bu dí 'bäpu ja ran juanbate, ngue dadín yan a rán ho ma'da'yo ra Cristo dím ma ngue majuani a. ⁸Nε hønt'a Oja i padi hangu nan gu bu ná hugc'ahu, ne tengu bu emme ni huegahu ra Jesucristo. 9Hanangue'a dí äp Oja ngue man'da xʉn gu din ja ahʉ ran huɛcate n'da ngu n'da ahʉ, nɛ din ja ahu ran 'yomfeni xun ho, ne guim bemhbu xun ho nangue a 'be'a gätho guí øthu. ¹⁰N'damhma gui huanhdu 'bɛ'a man'da xun ho gui 'yøthu, ne n'dat'a guim bemhbu, ne hin hapu di nequi ni ts'oquihu 'bu bi zøn ra pa ngue ba ɛh ra Cristo. ¹¹Nɛ hønt'a ra Jesucristo sä di 'da ahu ra hogambui, ngue xun gu yu hoga'befi din ja ahu, ne gue'a dí t'espa Oja a.

Hønt'a ra Cristo nám 'bu a ra Pablo

¹²Ma zu cu ahu, dín nde ahu ngue gui pạhmbu, gue'a nán te

FILIPENSES 1 372

ran ho ma'da'yo a nám 'bäcä ua. ¹³Ngue gätho yʉ dofʉi ua ja ran guts'ut'abi, ne'u gätho mi'da yu ją'i i pądi ngue rá 'bɛfi ra Cristo a ná 'bäcä ua. 14 Ne dá gue'bu dí ofädigä, pε gue'a ní hyut'an zambui ma cuhu ngue'u xun gu i 'bucua, nε hinguin su 'bu im man rám hman Oją. 15 I 'bucua 'da u ngue im mamp'a rám hman Oja, i seya nangue rám hman Oja dí øt'ä. Pe i 'buh mi'da ngue im man rám hman Oją ngue nde da 'yøt' ran ho. ¹⁶Νε nu'u ngue u i ja ran ts'eya, im ma nangue ra Cristo, nguetho in nde 'be'a da dase u. Pe hinga gätho rá mbui im ma, pe høntho nde u ngue di yop a ma dumbuigä ua ja ra fädi. ¹⁷Pe nu'u mi'da di huegä, ne nde da mbäxgui, ne gue'a ní man rám hman ra Cristo u, nguetho i padi 'bɛ'a ná 'bäcä ua, ngue dín yanba a rán ho ma'da'yo ra Cristo. ¹⁸Pε madague a hønt'a go to'o im mamp'a rám hman Oją, dá gue'bu n'dat'a im beni o hin'na 'bu im ma nangue a ra Cristo, ne guexta a şmmɛ dadín johya. Nɛ thocuą thoho dan johyagä. 19 Nguetho dí pądi ngue ga pømanhogä ua ja ra fädi, nguetho zại guí äfu rá ts'edi Oja nanguecă, ne zai i făxcă rá Hogandahi ra Jesucristo. ²⁰ Nugä hin dín ndegä ngue m'bejua ga pe'ts' ma sä nangue 'bε'a dí øt'ä, ρε εmmε dín nde ga hut'an zambui gam mangä xun ho rám hman Oją 'bu bi ts'egbä. Janangue a gätho yu ja'i da bah rán ujxte ra Cristo nangue a dí øt'ä, madague'bu dí 'bucä o gue'bu da thogä. 21 Nguetho hønt'a dí 'bui nangue ra Cristo, dín ndegä ngue din uixte ra Cristo nangue

'be'a gätho dí øt'ä, ne man'da tho 'bu dá tugä. ²²Pε nu'bu guexta a dadí thoqui dí 'bucua ja ra häi, sä ga tạh mi'da yu jạ'i ngue da 'yɛc'yɛi a ra Hmu mahɛts'i. Pɛ hin dí pasɛ nda a ga huanhni, hague dam 'bui, uague ga tu. ²³Pɛ nugä ɛmmɛ xʉn hei ga padi nda a ngue man'da xun ho. Pe nu'bu da hønsegä, man'da dín nde 'bu ga tu ngue ga mba ním 'bu'be ra Cristo, nguetho man'da xun ho nanguecä. 24 Pε man'da xun ho nangue ahu ngue guexta a dí 'bucä ua ja ra ximhäi. 25 Janangue a dí haxanjuani guexta a dam 'bucä ua ngue ga fäx ahu ngue dín te ni t'ɛc'yɛihʉ. Nɛ man'da din ja ahʉ ran johya 'bu man'da gá 'yɛc'yɛihu ra Cristo. 26 Ne nu'bu dí 'bucä ua ja ra häi, ne guín nuju mahøn'a, emme da hyu ni mbuihu nangue ra Cristo, ne gui 'yespahu ra Cristo buya. ²⁷Pe damam 'buhmbu 'be'a rán sähu rán ho ma'da'yo ra Cristo. Nε madague a 'darbu dí 'buhmbu o yabu dí 'bucä, pe ga øcä ran ho gui 'yøthu buya, nangue 'da' angu guim bemhbu, ne gui fähmbu ma t'ec'yeihu nangue rán ho ma'da'yo ra Cristo. ²⁸Ne hin gui suhu to'o da zu ahu nangue ran ho ma'da'yo. Νε nangue hin gá suhu, da badi ngue di 'bɛh yú te u, nɛ da badi ngue i ja ahu ra temazai ngue bi 'da ahu Oja. ²⁹Nguetho hinga hønt'a ran ho bi 'da ahu Oją ngue gui 'yɛc'yɛihu ra Cristo, pe ne'a man'da ran ho, ngue gui sähu yun unbi nangue ra Cristo. ³⁰Ne 'da'angu dí øthu ya, dadín unbahu ngue dín yamhbu a ran ho ma'da'yo, tengu thoho gá nuhu dá øt'ä mám'bɛt'o, nɛ guí øhmbu ngue guexta'a dí øt'ä ya.

373 FILIPENSES 2

Nu rán uįxte ra Cristo, hin'yu ran 'ygts'i

Nu'bu gue'a ra Cristo di ze 🚄 ahʉ, ոε guí pąhmbʉ rán hugcate a, ng nu'bu guín 'yohu rá Hogandąhi Oją, ne guí pąhmbu gui 'yøthu ra yembui ne ra mate, dan johyagä 'bu. 2Pe dami yusca ma mbui ran johya nangue 'be'a guí øthu ya, ngue n'dat'a guim bemhbu, ne 'da xctín huectahu, nε 'da'angu nin 'yomfεnihu guim bemhbu, hinga 'dahma 'dan'yo guim bemhbu. ³Ne hin ga øthu ran 'yuya, ne hin dan 'yexhu, ne hin gam bemhbu ngue dan uixtehu, pe man'da da bense n'da hingui hose xinda gue'θ gä mi'da. ⁴Nε hinga hønt'a ga honsehu gam bemhbu, pe ne'a i hon u mi'da ga fäxhu. 5Pe n'da ngu'n'da dam bemhbu tengu tho bu í benju ra Cristo. ⁶Nu ra Cristo 'da'angudui Oja a, pe him bin 'yɛzɛhɛ ngue Oja a, nguetho bi bɛnju. 7Ngue bá sogui gätho rá ts'edi mahetsí, ne bin 'yehe 'bu mín ja'i ua ja ra ximhäi, ne bi mbäx yu ja'i. ⁸Ne nu'bu mín ja'i xingui ts'u bin 'yɛts'i, pɛ bi 'yøt'e gätho 'bε'a min nde Oją, nε bi du bu ja ra pont'i tengu n'da ra ts'om'bäi. ⁹Ne nangue a bi 'yøt' ra Cristo, Oja bi 'yespa a, ne bi un ra ts'edi man'da xun gu, ne gue'a ra thuhu bi unni εmmε man'da di muui. 10 Janangue a nu'a ra Jesús gue'a rán säui din thande a, gätho 'bupu mahɛts'i necua ja ra häi ne'u gätho xun du, yu ja'i ne yúm 'behni Oja ne yu zįthu, gätho da 'yęspa ra Jesucristo ra Hmu. 11 Ne gätho nán gu da bądi nε da ma ngue gue'a ra Jesucristo

a ra Hmu nangue gätho 'bɛ'a i ja, n'damhma gätho da 'yɛ̞spa Oja̞ ra Ta.

Nu yu 'yεc'yεi guesε u yun yot'i ua ja ra 'bεxui

¹²Janangue a ma zʉ cu ahʉ ngue dadí huɛc'ahu, zai gá 'yøthu 'be'a dá xi ahu nu'bu 'darbu mám 'buhmbu, pe madague'a yaua dí 'bucä ya, man'da hnehi thoho gui 'yøthu a nin sähu ngue i 'buh ma pørpatehu, ne hin gan 'yexhu, pe guin numansuhu Oja. ¹³Nguetho gue'a Oja dim pepu mbo ma mbuihu ne gue'a di 'daju rá pähä ne rá ts'edi ngue ga ørbahu rá pähä Oja. ¹⁴Nε o gadí yani thohu, xín gan junthu, pe dami 'yøthu gätho in nde Oją. 15 N'damhma njon da dingahu n'da ran ts'o ngue da ma i ja ma ts'oquihu. Pe dam 'buhmbu tengu man sähu ngue yú hogat'uhni gahu Oją, guepu 'bu u yu ją'i ngue i øt' ram fɛ'ts'i. Janangue a ga øthu buya tengu n'da ran yot'i bu ja ra 'bɛxui, ngue ga xihmbu rám hman Oja di un ra te. ¹⁶Nɛ nu'bu gui xihmbu rám hman ra temazai, nugä dan jhyagä 'bu bi zøn ra pa ngue ba εh ra Cristo, ngue hin'yu 'bε'a dá pe'ts' ma sä nangue ra 'befi xtá øt'ä bu guí 'buhmbu. 17 Nguetho dadí hoc'a ni t'ɛc'yɛihu, tengu'bu dadí hocä n'da ra 'bøts'e, xun ho 'bu dá undä Oją. Ne nugä 'bu hin dí gua u yun ungi dá sä 'bu gmí 'yec'yeihu, pε man'da xun ho 'bu ga un ma te nε ga fäm ma ji, ngue dí gua a ra 'bøts'e ga undä Oja nangue gätho ahu. Guexta a dadín johyagä, ne da zä gui hyamhbu man johyagä. ¹⁸Janangue a ga comhbu man

johyagä 'bʉ bi zøn ra pa da t'ɛ̞na da thogä.

Ra Timoteo nε ra Epafrodito

¹⁹Nε nu'bu rá pähä Oja 'bex ga pen'nahu bu ra Timoteo da nu ahu. Nε nu'bu dá padi 'bε'a gadí jahu bu dan johyagä buya. ²⁰Nguetho njohgui 'bucua man'da ngue im beni tengu dím bem'be ra Timoteo nangue ahu. ²¹Nguetho gätho mi'da i 'bucua im bense nangue yú 'befi zehe, ne him majuani rá 'befi ra Cristo Jesús im bem buya. ²²Pe ya guí pahmbu ngue emme di muui nangue 'bɛ'a i øt' na ra Timoteo, ngue dí com'be rá 'befi Oja, tengu n'da ra ts'unt'u i conhui rá 'befi rá ta. ²³Pɛ dí tø'mi hasta gue'bu ga pącä 'be'a din jacä ua. Ne m'bejua ga penhdä bu na ra Timoteo. ²⁴Pe xømhma da nde ra Hmu mahets'i ngue da zä ga mba bu n'dihi, gan nu ahu. ²⁵Pe dím beni ngue m'bet'o ga pen'nahu bu mahøn'a na ra Epafrodito, ma cuhu, ne dí com'be rá 'bɛfi ra Cristo dín yanba'be a rán ho ma'da'yo. Guehna guá pencä'be ua nangue da mbäxca'be. ²⁶Pε nuya emme nde da mba bu gam 'buhmbu mahøn'a, ne emme tu rá mbui ngue ya rá 'yøhmbu ngue mí u a. ²⁷Ne majuani emme mi u ne mi ts'utho xtán du. Pε nangue rá mate Oja ngue him bi du. Ne nu'bu xtán du, man'da ɛmmɛ xun gu ra dumbui xcá nugä 'bu. 28 Pε janangue a dí humbi ga penhdä n'dihi na, n'damhma gan johyahu 'bu guin nuhu mahøn'a, necä da hyu ma mbuigä ua. 29 Ne nu'bu bi zøm bu dami simhbu xun ho, ne gui 'yäfu ra jamadi Oja ngue bi xox a. Ne

gätho yu ją'i guin numansuhu ngue øt'e tengu i øt' na ra Epafrodito. ³⁰Nɛ nuna mi ts'utho xtán du nangue rá 'bɛfi Oją, nguetho bi 'yɛn rá te nangue bi zɛqui, ngue bi 'yøt' ra 'bɛfi tengu tho'bu gue ahu xzuí zɛju.

Nu ra Cristo 'bu dí ɛc'yɛihu, gue'a ní bo ma mbuihu a

Nuya ma zu cu ahu, dí xi ahu, daman johyahu nangue ra Hmu mahɛts'i. Nugä hin dadín xømbui ngue ga xi ahu mahøn'a, gan johyahu, nguetho nin hos'ehu ngue dí xi ahu. ²Daman jamansuhu nangue u yu ts'on'yomfeni ja'i, nguetho nu'u tengu tho'bu yu satexa'yo, ne i xi ahu jatho da hmεpya ni ją'ihu ngue da mba nthequi ahu. ³Pe nuju majuani am hmepya gahu bu na nuju Oja, nguetho dí thandehu Oja nangue rá Hogandahi, ne dadín johyahu nangue a ra Cristo Jesús, ne dí pahmbu hinga gue'a man hosegahu ní 'yɛnju yú t'unigahu Oja. ⁴Pe nu'bu 'bo'o sä ena yú t'uhni Oja nangue xun hose, pe man'da sä xcá ɛngä 'bʉ, nguetho man'da mi pømanho man t'øt'egä. ⁵Nguetho dám 'bui nangue yu judío, ne ná hyatopa xtám 'bucä 'bu mi thegä ma xifani, ne gätho dá comhbe a bi xije Oja dyú hebreohe dyú judíohe, nguetho nu'a ma ta ra hebreo a gue a bi xand mam bombøta ra Benjamín mi 'buh maya'bu. Ne dá tendä 'be'a im man yu fariseo, ngue ɛmmɛ dá humbi dá øt'ä u yún t'ędi yu judío. 6Ne nugä emme dá yangä a ma t'ɛc'yɛihe dyú judíohe, janangue a madí unba vú 'yɛc'yɛi

375 FILIPENSES 3

ra Cristo. Ne mi øt'ä u gätho yun ho im man u yún t'gdi yu judío, janangue'a njo'o to'o mi sä da man'a n'da rán t'ɛdi Oja ngue dá festhoho. ⁷Ne mím bengä ní zingä Oja a man hose. Pe nuya dí padi ndetho di 'berpa nín 'yomfeni n'da a. Ne dá e'ts'ä a ná bengä xun ho segä janangue bi zä dá tingä ran ho nangue ra Cristo. 8Ne madague'a hangu nan gu xtá øzehegä, pe ndetho man'da dí 'bɛdi, nguetho man'da di muui ngue dí pacä ra Cristo Jesús ma Hmu. Janangue a gätho man hose dá 'bedi, ya him mín numanho, n'damhma bi zä dán 'yo'be ra Cristo. ⁹Nε nuya sä dam 'bu'be ra Cristo, ne ntemanho i jagä 'be'a dí øzehegä nangue yun t'edi, pε nangue a dí εc'yεi 'bε'a bi 'yørca ra Cristo, ne gue'a í bo ma mbui a nε in numanhogä Oja. Nguetho Oja in numanho u i hantho rá mate ra Cristo. 10 Ne nuya hønt'a man'da εmmε dín nde ga pądi xun ho a ra Crsito. Ngue ga com'be xun ho a rá ts'edi bin t'um 'bu mi dámbeni, nguepu da zä dam 'bui xun ho 'bu dí 'butua ja ra ximhäi, ne da zä dan unbä tengu yun unbi bi nu a, ne da zä ga com'be rán dąte, ngue nde da ma di 'berqui xun ho a man yombui zehe. 11 Ne nubuya xømhma thoho da zä ga com'be xun ho a rá ts'edi ra Cristo bin t'um 'bu mí dambeni, ngue dam 'bui xun ho a ra 'da'yote.

Gan uɛnthohu ga tahmbu ra 'dihi buya

¹²Pε nugä hingui sä gam mangä ngue gätho dí com'be rá ts'εdi ra Cristo, nguetho hin daná søni ngue gätho xtán hotho ga øt'e. Pε guexta

a dadí thoqui dí honi ngue ga pądi gätho 'bɛ'a bi bɛngä ra Cristo Jesús 'bu mi bεndgä. 13 Pε ma zu cu ahu dí xi ahu ya, ngue hinga gätho dí øt'ä xun ho, pε hin dín nde gam bɛngä mahøn'a 'be'a xtá øt'ä mam'bet'o. Pe guexta a ɛmmɛ dadí thoqui dí nde man'da ga øt'ä ran ho, ngue ga taha xun ho. 14 Nε dín nde gan uɛntho xun ho, ngue ga taha ga han a í zoncahu Oja bu mahɛts'i ga hamhbu, nangue dí ec'yeihu ra Cristo. 15 Ne gätho ahu ngue xun te nin 'yomfenihu nangue ni t'ɛc'yɛihʉ, nde'bʉ 'da'angu guim bemhbu tengu dím bengä. Ne nu'bu bu a n'da ahu n'dan'yo guím bemhbu, nu a Oja di ja ahu ngue gui pahmbu 'be'a nde Oja. ¹⁶Pe nde'bu ga thohmbu tengu zai dí øthu, nangue rá 'bɛfi Oją. 17 Ma zu cu ahu, dami tenhdu a 'be'a dí øt'ä, ne'u mi'da 'bu i øt'a tengu dí øt'ä, dami tenhdu u. 18 Nugä drá Pablogä, ga xi ahu mahøn'a, emme xun gu yu nidį ya xtá xi ahu, nguetho εmmε tu ma mbui nangue 'bɛ'a i øt'u 'da xun gu, i ena i 'yo bu rá 'yu Oja, pegue din suhmbu ra Cristo ngue hingui εc'yεi 'bε'a í du bu ja ra pont'i. ¹⁹Νε da zøn ra pa ngue da guadi ne di 'bεh yú te, nguetho hønt'a 'bε'a i si nε 'bε'a ndesε rá ja'i i hadumbui. Pe emme din 'yex u nangue 'be'a i øt'u ne hin'yu yú 'yasä. Ne hønt'a im beni nangue a 'be'a jaua ja ra ximhäi. 20 Pe nuju dyú 'yec'yeihu, dyú menguhu bu mahets'i, ne dadí thoqui dí tømdahu ngue ba eh mahets'i a mam pørpatehu, ngue gue'a ma Hmuhu ra Jesucristo. ²¹Ne nu'a ra Cristo di pärca ma ngøc'yɛihu tengu rá ja'izehe ngue nuixte thoho, rá

rs'ɛdi i ja. Nɛ n'dat'a rá ts'ɛdi ngue di manda 'bɛ'a gätho i jaua.

Thoscua thoho dan johyahu nangue ra Hmu

Ma zu cu ahu emme dadí hugc'ahu ng gmmg dím ben ahu, nguetho xcá 'daju ran johya, nε nangue gá 'yεc'yεihu, gue'a ní nequi xun ho ma 'befigä a. Ne nuya ma zu cu ahu, o gadí uanspa nin 'yomfenihu nangue ni t'ec'yeihu. ²Ne nu aui man ju aui nangue ra Cristo ra Evodia ne ra Síntique, dami 'yørcaui ra mate ngue 'yo gadín suhmi, nguetho gadín cuui nangue ra Hmu mahɛts'i. ³Nɛ nu i ma hogamfäts'i'i ngue gá fäxca ra 'bɛfi, dami fäx u yu xisu ngue dim 'bumanho, nguetho emme dám pecähe u nu'bu má mamhbe bu rán ho ma'da'yo ra Cristo. Νε a ra Clemente ne'u mi'da bi mbäxqui, ngue gätho bi thusca ma thuhuhu bu ja ra xøcua bu mahets'i nangue bin 'daju ra temazai. ⁴Pε thocua thoho dan johyahu nangue ra Hmu, ne dí xi ahu mahøn'a, dan johyahu. ⁵Ne ga fäxhu ma mija'ihu, n'damhma gätho yu ja'i da nu ngue dadí jamansuhu 'be'a nám 'buhmbu. Nε gam bɛmhbu ngue mi ts'utho ba eh ra Hmu mahets'i. ⁶Ne hin ga hadumbuihu nangue 'be'a gätho dí homhbu, pe gätho ga xihmbu Oja 'be'a dí homhbu, ne ga xihmbu ra jamadi ngue zại ørcahu a xun ho. ⁷Nε nu Oja da hyurca ma mbuihu buya nangue ran johya hingui sä xtám base n'da, pe gue'a ran johya ní jamansuc ma mbuihu nε man 'yomfenihu, nangue dín 'yohu ra Cristo Jesús.

Gam bemhbu 'be'a gähto xun ho

⁸Nuya ma zʉ cu ahʉ, mi'da jaua ngue dín nde ga xi ahu. Ngue gam bemhbu gätho 'be'a a majuani, ne gätho 'be'a yún thehu ngue dí hnumansuju, ne gam bemhbu hin di yoho bu dá øthu 'be'a dí øthu, ne hin te man ts'o gam bemhbu. Ne gam bemhbu ga ørpahu 'be'a dí hyu yú mbui u ma jija'ihu, ne gam bemhbu ga øthu 'be'a mfadi ngue xun ho. Ne gam bemhbu gätho 'be'a emme xun ho, ne gam bemhbu ngue 'be'a gätho da t'espi xun ho. 9Ne gui 'yøthu 'be'a gätho dá xän'nahu, ne gui tenhdu gätho 'be'a xtá ut ahu. Nε nu'bu ngubu gui 'yøthu, da zä gan 'yohu xun ho Oja ngue zai i hurpa ní mbui n'da.

Bi 'benpi ts'u ram fäts'i a ra Pablo

¹⁰Nε nu Oja bi 'dacä ran johya nangue a gá benju mahøn'a, ngue gadí zeju ts'u. Ne dí pacä ngue hin gá pumbeniju, pe hønt'a nja, him mi sä bu gui zeju mam'bet'o. 11 Pe hin dí ena ngue xcán unbä 'bu hin xquí fäxcahu, nguetho ya xtán zai ngue i jagä ran johya madague'bu i ja a ga honi o hin'yu. 12 Nugä dí pacä 'be'a nám 'bumanho n'da ra hyoya, ne dí pacä 'be'a nám 'bumanho n'da ngue i ja xʉn gu. Nɛ dadín johyagä madague a dín niyagä o gue dí tumanthuhugä. Ne hønt'a go 'bɛ'a dín nu, uague xʉn gu i jagä o hin'yu, pe i hu ma mbuigä. ¹³Ne hønt'a go má ts'edi i ndec Oja, ya gätho sä ga øt'e, nguetho i fäxca ra Cristo. 14 Pe guexta a xun ho gá 'yøthu ngue gá zeju ts'u, ngue i pan hnuman'ugä. ¹⁵Nɛ nu ahu guí

377 FILIPENSES 4

'buhmbu bu Filipos, guí pahmbu ngue hønse ahu gá zeju ts'u nu'bu má pøngä bu ra häi Macedonia, ngue rá mbudi dá mangä ran ho ma'da'yo bu, ne gá pencahu ra mbεti. ¹⁶Nε nu'bu guexta a mí 'bucä bu ra hnini Tesalónica, vondi hyundi gá pencahu ra mbeti, gue'bu má hongä. 17 Ne hinga høntho dín nde ga hani, pε dín nde ngue di jap ahu Oja nangue a xcá 'daju, nangue gá zeju. 18 Nugä ya dá hani 'be'a guá pencähu 'bu mi zøcua ra Epafrodito, nε i pongui ts'u 'bε'a dí honi. Νε nangue 'be'a guá pencähu, nu Oją i numanho, tengu'bu n'da ran t'unni εmmε di muui. 19 Νε nu'a ma Ojąhu di 'da ahu xun ho 'be'a gätho guí homhbu nangue dí 'buhmbu ra

Cristo Jesús. Nguetho nte di 'bɛ'a, nɛ ɛ̞mmɛ xun ho a di 'daju. 20 Pɛ dí ɛ̞spahu ma Tahu Oją nɛ gätho yu pa maząi. Nɛ hønt'a dím bɛ̞ngä a.

Rán zegui ran zengua

21 Ne dí pen'nahu ran zengua gätho yu 'yec'yei ngue i 'bupu, nangue rá thuhu ra Jesucristo. Ne gätho ya yu cu dí 'buhmbe ua i pen'nahu ran zengua. 22 Ne'u mi'da yu 'yec'yei ngue i 'bucua ja ra hnini, gätho i pen'nahu ran zengua. Ne nu'u yu 'yec'yei ngue dim pecua ja ran guts'ut'abi man'da in nde di zengua ahu. 23 Ne nu ma Hmuhu ra Jesucristo dí äpä di 'da'ahu rán japi gätho ahu. Ne hønt'a dí xi ahu a, ne hønt'a gam bemhbu a ya.

COLOSENSES

Ra søcuą bi 'yorba ra Pablo u yu 'yɛc'yɛi bu ja ra dahnini Colosas

Ran zengua

Nugä drá Pablogä, ma 'bäigä'be ra Cristo Jesús, nangue rá pähä Oją. ²Nɛ dí yo'be ma cuhu ra Timoteo, dadí zɛngua ahu gätho yu 'yɛc'yɛi ngue guí 'buhmbu bu ja ra hnini Colosas, dadín cuhu nangue n'dat'a dím bɛmhbu ra Cristo. Nɛ dín ndehe ngue gätho ahu guin nuhu rán japi Oja ma Tahu, nɛ da hyut'a ni mbuihu.

Jamadi dí emfe Oja

³Nu'bu dí yąhe Oją ngue rá Ta ma Hmuhu ra Jesucristo, thocua thoho dí ¿mfe jamadi nangue ahu. ⁴Nguetho ya xtá øhmbe nangue ni t'¿c'y¿ihu nangue ra Cristo Jesús, nɛ dá øhmbe ngue ja ahu ran hu¿cate nangue ni mi 'y¿c'y¿ihu. ⁵Nguetho guí tømhbu 'bɛ'a gätho yun ho guin nuhu bu mahæts'i, nɛ guí tømhbu gue'bu go rá mbudi gmí 'y¿c'y¿ihu a ram hma majuani. ⁶Nu ran ho ma'da'yo ngue xcá 'yøhmbu, nuya din xandi, nɛ hønbu go hapu i pa, di pärpa yú mbui yu ja'i, tengu

tho bin ja bu guí 'buhmbu 'bu gmí 'yɛc'yɛihu njuantho rá mate Oja. ⁷Gmí 'yøhmbu ran ho ma'da'yo gue'a bi xi ahu man 'yo'be ra Epafras. Nugähe emme dadí hueje na, nguetho nuna ran 'yohu n'da rá 'yεhε ra Cristo, nε di zε ahu nangue rá 'befi Oją. 8Ne nuna ra Epafras bi xije ngue gadí huggahe nangue rá Hogandahi Oja di ben'nahu. 9Ne nu'bu ra pa dá øhmbe ngue xun ho ni t'ɛc'yɛihʉ nɛ nin huɛcatehʉ, thocua thoho dí äfe rá ts'edi Oja nangue ahu, ngue gui pahmbu rá pähä Oja ne gui pahmbu rán 'yomfeni a rá Hogandahi Oja. ¹⁰Ne dí äfe rá ts'edi Oja ngue gam 'buhmbu tengu rán säui u yú t'uhni Oja, ne thocua thoho zai gui 'yøthu a in numanho ra Hmu. Ne dí äfe Oja ngue gui 'yøthu yu hogant'øt'e, nε din te ni mbuihu ngue man'da gui pąhmbu Oją. 11 Ne gätho nan gu rá ts'edi Oją dí äpähe nangue gätho yun unbi guín nuhu, ngue hin gan xømbuihu. Ne nangue rá ts'edi Oja di ja ahu ngue hin di un'na ni mbuihu, ne din ja ahu ran johya. ¹² Janangue a da zä gui 'yɛmfʉ

379 COLOSENSES 1

jamadi ma Tahu Oją, nguetho bi hogahu da zä ga comhbu 'bɛ'a gätho di un yu 'yɛc'yɛi guepu bí ja rán nɛqui. ¹³Nɛ bi yạnju Oją bu ja rá ts'edi ra 'bɛxui, nɛ bi zixgahu bu di manda rá Ts'unt'u di huɛqui. ¹⁴Nɛ nu'a rá Ts'unt'u bi gurca ma ts'oquihu, nɛ gue'a í zä bi pungahu Oja a.

Rá 'befi bi 'yøzehe ra Cristo

¹⁵Ne nu Oja hingui sä da nu n'da, pε nu ra Cristo ngue 'da'angudui Oją, ne bin ją'i ua ja ra häi tengu tho 'bu dá nuhu Oja. Nu ra Cristo mi 'bu 'bu rá mbudi thoho, 'bu nte mi ja ua. ¹⁶Ne nangue rá ts'edi Oja ra Cristo bi 'yøt'e 'bɛ'a gätho i ja nε to'o gätho i 'bui, guecua ja ra häi, nepu mahets'i, nu'u di nequi ne'u hin di nequi, gätho u i ja yú ts'edi, ne'u embi i jase yú ts'edi, pε nu ra Cristo bi 'yøt'e gätho u ngue di manda μ. ¹⁷Nε nu'a ra Cristo mi 'bui nu'bu ma hin'yu ua ra ximhäi. Ne nangue rá ts'edi di jamansu xun ho gätho 'be'a bi 'yøt'e, ne gue'a ní bømanho a. ¹⁸Nu gätho yu 'yɛc'yɛi i 'bui n'dam'bui tho i øt'e tengu'bu n'danja'i tho, nu ra Cristo tengu'bu rá ya a. Ne di un ra temazai yu 'yɛc'yɛi. Nɛ nu'a, rá mbudi ngue bi dambeni a. Janangue a hin'yu man'da ra ts'edi nuixte tengu rá ts'edi a. 19 Nguetho bi zän Oja hønt'a rá Ts'unt'u bi unni gätho rá ts'ɛdi. 20 Nɛ nu'bu mí mbän rá ji ra Cristo bu ja ra pont'i, bi 'berpa yú ts'edi u gätho madín suhmbu Oja i 'bucua ja ra häi nepu mahɛts'i. Ne gue'a dí hocpi gätho 'bε'a i ja, nε gue'a dí hocpa u to'o gätho in nde. ²¹Nɛ nu'a ra Cristo bi

hogahu, nguetho yatho dá 'uehmbu bu rá 'yu Oja, nε mí øthu yun ts'o, nε gue'a dán suhmbu Oja a. Pε nuya Oja sä da numanhoju. ²²Nu Oja bi hogahu gätho ma ts'oquihu, nguetho rá ja'i ra Jesús bi nu ran unbi ne ran date nangueju. Janangue'a xtán hotho gahu 'bu bi däju bu 'bu Oją, ne hin da dinga ma ts'oquihu. ²³Pε nu'bu guín nde ngue din ja ahu bu, pe jatho thocua thoho gui 'yɛc'yɛihu, nɛ hin gui 'yon nin 'yomfenihu. Ne gui thoqui gui tømhbu ran ho ma'da'yo gá 'yøhmbu, nu'a bi sih yu ja'i gätho ra ximhäi. Ne n'dat'a ram hma dí øt'ä ngue dím pøngahyagä, guecä drá Pablogä.

Rá 'befi ra Pablo

²⁴Ne nugä di johya ma mbui 'bu dín nu ran unbi nangue ahu. Ne xun zän Oja ga comhbu rán unbi ra Cristo, nguetho yú mbeti gahu a. Nu'a bi nu ran unbi nangue gätho yu 'yɛc'yɛi, necä dín nu ran unbi tengu bi zän Oja ngue gan nugä. 25-26 Ne bi huancă Oja gätho yu 'yɛc'yɛi ga pɛpi, ngue ga xih ran ho ma'da'yo. Ne nu'a ran ho ma'da'yo ní gua a rám hman Oją a, ngue im ma gätho him mam fadi mam'bet'o. Nguetho gue'bu rá mbudi thoho njom mí padi. Ne nu'bu mám 'buhmbu buya, nε ja dá pąhmbu buya. ²⁷Ne nuna ram hma him mam fądi, ngue dim 'bupu ra Cristo bu mbo ma mbuihu, ngue gätho dyú 'yɛc'yɛihu i 'buh ra ximhäi, nε'u hing yu judío. Nε nangue dim 'bupu mbo ma mbuihu ra Cristo, sä ga tømhbu a rán ho nujxte bí ja bu mahɛts'i. Ne guehna ran t'øt'e

nuixte in ndeju Oją ga pąhmbu ya. ²⁸ Janangue a nu ran ho ma'da'yo dím mamhbe nɛ dí xänbahe xun ho, nɛ gätho yu ją'i dí xihmbe ran ho, nangue bi 'dacä ran 'yomfɛni Oją. Nguetho dí ndepe gätho da mba ma hocpi yú mbui u, nu'bu i pądi 'bɛ'a bi 'yørba ra Cristo. Nɛ da zä dim 'bui xun ho ra Cristo bu mbo yú mbui buya. ²⁹ Janangue a gätho ma mbui dí øt'ä ma 'bɛfi, nangue ra ts'ɛdi ngue bi 'dac ra Cristo dí øt'ä.

Nugä drá Pablogä dín nde ahu gui pąhmbu ngue dí hadumbui dí äpä rá ts'edi Oja nangue ahu gyú 'yɛc'yɛihu. Nɛ'u ngue 'bupu ra hnini Laodicea ne gätho u mi'da ngue njam'bu mi nugui. ²Dín nde ahu ngue da hyu ni mbuihu, ne n'dat'a guim bemhbu nangue i ja ahu nin hugcatehu n'da ngu n'da ahu. Nε hin te di 'bɛdi ngue gui pahmbʉ nangue ra Cristo, nguetho 'be'a gätho him mam fądi sä gui tįmhbu nangue ra Cristo. ³Pε nangue ra Cristo sä gui timhbu 'be'a him mam fadi nangue rán 'yomfeni ra Cristo. Ne hønt'a ra Cristo sä da 'yut ahu rán 'yomfɛni Oją. 4Nuna guehna dí xi ahu na, nguetho 'bu'i 'da nde da hyä ahu, emme mahotho im man u, pε him majuani. ⁵Nugä hinga 'darbu dí 'buhmbu ya, pe i so ma mbui nangue ahu. Ne emme i hu ma mbui 'bu dí øde ngue hingui cuent' ni mbuihu, ne hingui tap a ni mbuihu u yu hyäte, nangue ni t'ec'yeihu nangue ra Cristo. 6Nde'bu thocua thoho gan 'yohu ra Cristo Jesús ra Hmu, nguetho ya gá sin a ra Cristo ngue dim Hmu bu ja ni mbuihu, ne bi du nangue ahu. ⁷Nu

ra Cristo tengu'bu ra da'yu a, ne n'dat'a guí comhbu rá te ni mbuihu, ne gue'a nán te ni mbuihu a. Ne dami zacua ni t'ec'yeihu, tengu bi sän'nahu. Ne zai gui 'yemfu jamadi Oja gätho bi 'da ahu.

Dí comhbu ra 'da'yote ra Cristo

⁸Damin jamansuhu ngue hin din ts'on ni t'ɛc'yɛihʉ nangue 'bɛ'a im man i 'da yʉn 'yohʉ, ngue nde da hyä ahu. Pe im bense a i xi ahu, ne him majuani a i xi ahu. Gue'u yúm hmanse yun 'yohu im ma mi'da yu hmu hin di negui di manda ua ja ra ximhäi, ne hin rán t'edi ra Cristo н. ⁹Pe nangue a ra Cristo da zä ga pahmbu xun ho Oja. Nguetho Oja bin ja'i nangue rán gøc'yɛi ra Cristo, nε nte di 'bεdi gätho i ja a Oją nangue rá ja'i ra Cristo. 10 Janangue a nu'bu dín 'yohu ra Cristo, i jaju 'be'a gätho dí homhbu. Ne nu'a ra Hmuts'ut'abi a, ne hønt'a di manda gätho 'bɛ'a i ja. 11 Nɛ nu'bu má ęc'yeihu ra Cristo, bi thegahu gätho ma ts'oquihu gätho gahu, ne ahu ngue hing yu judío ahu. Ne gue'a njuantho ran thequi in nu Oja a bi 'yøt ahu ra Cristo. ¹²Nguetho nu'bu mán xixyahu, tengu'bu 'darbu bi t'ägahu a ra Cristo, ngue dá sohmbu bu ma nyon 'yomfenihu. Ne tengu'bu 'darbu dá thambenihu ra Cristo bu ja ra 'da'yote, nguetho dí ec'yeihu rá ts'edi Oja bi xox'a ra Cristo 'bu mi du, nangue rá ts'edi xun ndoho. 13 Ne nu'bu hin ní hoc ni mbuihu, gätho ahu ngue hing yu judío ahu, tengu'bu gyú duhu nangue ni ts'oquihu, ne hin gmi comhbu ran hoqui bi man Oja maya'bu. Pe nu Oja bi ja ahu ne'ahu

dá comhbu ra tema'da'yo ra Cristo, ne bi pungahu gätho ma ts'oquihu. ¹⁴Ne nuju hin dá jąshu yún t'ędi Oją, o gue'a ran hocją'i dí pąsehu hin dá jąshu a, ne gue'a gä dín dupatehu a. Pe bi gurga man dupatehu a ra Jesús 'bu mi du bu ja ra pont'i. Ne gue'a ní hogahu Oją a. ¹⁵Ne nangue a 'be'a bi 'yøt' ra Cristo 'bu mi du bu ja ra pont'i, bi 'berpa yú ts'edi u i ena i ja yú ts'edi ngue hin di nequi. Ne bi japi ngue bi mbe'ts' yú sä 'bu mi hnu ngue bi da a ra Cristo.

Ga homhbu ga øthu ngue dyu menguhu bu mahets'i.

¹⁶Janangue a njon da zä da xiju ga sufu 'be'a dí sihu, ne njon da zä da xiju jatho ga sufu n'da ran go, gue'u yu t'ungopa, o gue'u yu pa ran ts'äya. ¹⁷Nε nuya yun t'edi embi xun duxqui, bi man Oja maya'bu ngue bi xi u yu judío, pe 'da yu patho u. Ne din t'es' 'bu bá εh ra Cristo u, nguetho yu hmεpya thoho nangue a ra Cristo. Pε nuya bi zøh ra Cristo, ne gue'a majuani i ja rá ts'edi a. ¹⁸Ne masque i si ahu gui 'behmbu rán japi Oja 'bu hin gui thạndehu yúm 'bεhni Oja mahεts'i. Pε o guí suhu. Gue'a im man u 'da, nguetho embi ran 'yɛts'i 'bu dí thandehu ra Cristo, nguetho i ja rá ts'edi. Pe go i en u hing ran 'yɛts'i 'bu ga thandehu u i coh yú ts'edi, ngue yúm 'behni Oją mahęts'i. Pe im manse, ne him bi 'yut Oja, nguetho ɛmmɛ xun ts'o yún 'yomfeni u. 19 Pe nu'u hin'yu 'bε'a yún jahu ra Cristo. Pε nuju dyu 'yɛc'yɛihu dí 'buhmbu ra Cristo tengu'bu n'danja'i tho dí comhbu. Nu ra Cristo tengu'bu ra ya, nε di

bɛ̞ngahʉ yʉn 'yomfɛ̞ni xʉn ho, nɛ gue'a nán te ma mbʉihʉ a, tengu bi zän Oją.

'Darbu dá tuhu ra Cristo ne 'darbu dí 'buhmbu a

²⁰Ha hin gá tuhu ra Cristo, ne guí ena gá hyehmbu yún t'øt'e ra ximhäi. Pε hanja guexta a gní 'yøthu tengu'bu rá mbeti ahu ra ximhäi, ngue guí ødahu yún t'ɛdi u to'o embi di manda ua ja ra ximhäi. 21 Ngue sä i ɛn ahu: "'Yo guí thähmbu ya, ne o guí sahu ya, ne o guí haxhu ya." Pe nde'bu hin gan hyehmbu ngue di 'bep ahu u yún t'edi u. ²²Pe gätho ya enju ga sufu, pε an ts'änni gätho ga homhbu nε din thegue. ²³Νε εna gue'bu gue'a ran 'yomfeni xun ho a im man ya yun 'yohu, nguetho im man a n'da ran thande ngue hin dín 'yex a n'da, nε im ma da zεthoho 'bε'a in nde n'da. Pe mfadi hinga gue'a, nguetho hinga gue'a ní zerpa ní mbui n'da 'bu im beni da 'yøt' ran ts'o.

Pε gam bεmhbu ngue 'darbu dá thambenihu ra Cristo, tengu'bu ya dá sohmbu ra ximhäi. Janangue a ga homhbu ga øthu ngue dyu menguhu bu mahets'i, ngue ya dí 'buhmbu ra Cristo, ne nu'a i 'bupu ja rán 'yɛi Oja, i conhui rá ts'edi a. ²Gam bemhbu tengu bu nam ben u 'bupu mahets'i, ne hin gam bemhbu tengu bu nam ben u 'bucua ja ra ximhäi. ³Gam bɛmhbu ngue 'darbu dá tuhu ra Cristo, ne nuya 'darbu bi 'besca ma tehu ra Cristo bu bí ja rá ts'edi Oja, bu nam ben a. ⁴Nu ra Cristo dá simhbu mbo ma mbuihu, ne gue'a ma tehu i jaju a ya. Ne nu'bu bi hnu a rá ts'edi

COLOSENSES 3 382

nuixte ra Cristo, neju da hnu ngue dí comhbu rá nuixte a.

Hønt'a ma'da'yo gam bemhbu ya

⁵Janangue a nuya gätho yún ts'o ra ximhäi i ja bu mbo ma mbuihu ga hehmbu, tengu'bu dán hyosehu. Hin dan 'yomt'enihu, xin ga øthu yu 'yasä, ne ga eshu u yu ts'on'yomfɛni. Xín dan siyatehu, nguetho tengu'bu dí thandehu u yu oja ngue him majuani. ⁶Pegue guehya da nu rán ts'embi Oja nts'utho, ngue gätho u hin di jamansu 'bɛ'a im man Oja. ⁷Nu'ehu ngubu gmí øthu 'bu gmí 'yohu bu ja ra 'bεxui. 8Pε nuya dami hyehmbu 'be'a gmím benbahu ni mija'ihu ya, gätho ra cue, ne dami hyehmbu a gní 'yet'ambuihu ran ts'o. Ne o gadí c'aman'u ni mija'ihu nangue ra ts'ore, ne gui 'yeshu nangue ra ts'ore i pøn ni ndehu. ⁹Ne o gadín xihmbu yu fehni n'da ngu n'da ahu, nguetho ya gá pähmbu nin 'yomfenihu ne gätho 'bε'a gmí øthu. 10 Nε nuya i ja ahu ma'da'yo nin 'yomfenihu. Pe nu Oja man'da man'da di 'da ahu ran 'yomfɛni, da gohi tengu thoho rán 'yomfɛni ra Cristo, ngue bi 'dajʉ ra 'da'yote. ¹¹Nu ra Cristo 'da'angu bu na nu yu ja'i, madague hønt'a go 'bɛ'a má ja'i, yu griego, o gue yu judío o gue hing yu judío, o gue yum 'bundąpo ją'i, o gue yu 'yehe, o gue hing yu 'yεhε. Nu ra Cristo in 'yohu hønt'a to'o nde da 'yɛc'yɛi, nε nangue ra Cristo ga timhbu gätho dí homhbu. 12 Ne nangue rán hugcate Oja ya bi huancahu ngue ga ɛc'yɛihu. Janangue a nde'bu ga øthu ran hocja'i, ne hin dan 'yexhu,

ne ga ørbahu ran ho ma mija'ihu, nε din ja ma yembuihu, nε hin dan xømbʉihʉ 'bɛ'a da t'ørcahʉ. ¹³Nɛ dam punbahu n'da ngu n'daju nu'bu da 'yørcahu ran ts'o n'da, tengutho bu í pungahu ra Cristo. ¹⁴Pε man'da emme hnehi thoho ga øthu ran hugcate, hin te dadí 'behmbu 'bu. ¹⁵Nɛ ga jafʉ ra Cristo di manda gahu, n'damhma dim 'bumanho ma mbuihu. Nguetho ya bá zoncahu Oja ngue dam 'buhmbu tengu'bu n'danja'itho. Ne thocua thoho ga xihmbu ra jamadi 'be'a bi 'yørcahu Oja. ¹⁶Ne gam bemhbu rám hman ra Cristo, ne nangue rám hma din jaju ran 'yomfeni xun ho. Ne gue'a dán xänbahu a n'da ngu n'daju. Ne ga emfu jamadi Oja nu'bu dí tuhmbu yu thuhu, o gue dím mamhbu rám hman Oja. ¹⁷Ne 'be'a gätho dí øthu, ne 'be'a gätho dím mamhbu, pe ga øthu a dí t'espa ra Hmu Jesús. Ne ga emfu jamadi Oja ma Tahu, nangue a ra Jesús.

Dam 'bumanhohu bu ja ma ngumhbu

¹⁸Ne nu ahu gyu xisuhu, dami 'yøhmbu 'bɛ'a im man ni ndøhu, nguetho gue'a rán säui n'da ra 'vɛc'vɛi. 19 Nɛ nu ahu gyun 'yohuhu, dami hugc ni xisuhu, ng hin gui suhmbu u. 20 Ne nu ahu gyu t'uhnihu, dami 'yøthu 'be'a gätho man ni tahʉ nε ni mbehʉ, nguetho gue'a in numanho Oja a. ²¹Nɛ nu ahu gyu tahu, ne gyu mbehu, hinga thocua tho gui suh ni t'uhnihu, janangue a mpähä thoho da 'yøt'a guín numanhohu. 22 Ne nu ahu gyu 'yehehu ne gyu mbefihu, dami 'yøthu 'bɛ'a gätho nde ni hmuhu, yu ja'i. Pe hinga hønt'u guim bemhbu

da numanho ahu u, pɛ gue'a Oją guín ndehu da numanho ahu.
Janangue a gui 'yøthu xun ho ni 'bɛfihu ngue dí numanho ahu Oją.

²³ Nɛ nu'u 'bɛ'a gätho ní 'bɛfi guí øthu, gui 'yøthu xun ho, nguetho hinga hønt'a ra ja'i ni hmuhu, pɛ nɛsɛ a Oją.

²⁴ Nguetho ya guí pahmbu a ra herencia di 'daju ra Cristo, ngue i juadi xun ho, nɛ gue'a majuani ni Hmuhu a.

²⁵ Pɛ nu'u to'o i øt' ran ts'o, Oją di cospa a bi 'yøt'e, madague a hønt'a go to'o ní ja'i.

Nε nu ahu gyu hmuhu, dami 'yørpahu ran ho ni 'yεhεhu o gue ni mbɛfihu, nguetho guí pahmbu i 'bupu mahɛts'i ni Hmuhu.

Man'da ran zofo

²Ne gätho gahu hin dan xømbuihu nangue dan yahu Oja, ne thocua thoho ga xihmbu jamadi Oja 'bɛ'a gätho di 'daju. ³Ne nu ahu damin yahu Oja nanguecähe, ngue di jaje ga thoje gam mamhbe rám hma, ne ga xih yu ją'i 'bɛ'a bi 'yurcahu, ram hma ngue him mam fadi, ngue dim 'bupu mbo ma mbuihu ra Cristo. Nε nugä dí ofädigä nguetho dím mangä na ram hma. ⁴Dami 'yäfu rá ts'edi Oją ngue da bømanho 'be'a dím mangä, ngue 'bɛ'a bi 'yurcahu, nguetho jatho gam mangä xun ho a. ⁵Ne dami jamansu ni mbuihu, janangue a nu yu ja'i hing yu 'yɛc'yɛi da nu ngue majuani guín 'yohu ra Cristo. Nε dąman εhyahu gui xihmbu nangue ra Cristo. ⁶Dami zomanhohu yu ja'i, ne hin gui 'yuthu u, pe dami hyurpahu yú mbui. Pe ga pahmbu 'be'a dá thahmbu n'da ngu n'da, nangue a ran ho di bengahu Oja ngue ga xihmbu.

Ran zengua ran zegui

⁷Nuna ma zu cuhu ra Tíquico, emme dadí hueca na, ne bi mbäxqui xun ho ngue dá øt'be rá 'befi Oją. Nu'bu bi zøm bu, da xi ahu gätho 'bɛ'a dadí jagä. ⁸Janangue a dí pɛhndä bʉ ya, ngue gui pąhmbu 'bɛ'a dí jagähe ua. Ne nu'a da hyut a ni mbuihu nangue ra Cristo. ⁹Nε da mbε ra Tíquico ma cuhu ra Onésimo, nuna i ec'yei xun ho na, nehna dadí hugcä na. Nuna n'da ra mengu bu guí 'buhmbu, ne da xi ahu 'be'a gätho bin ja ua. ¹⁰Nehna ma mi ofädi'be ra Aristarco, i pen'nahu ran zengua, ne ra Marcos rá meni ra Bernabé i pɛn'nahu ran zɛngua. Nε ya dá xi ahu nangue ra Marcos, nε nu'bu da zøm bu, dami simhbu xun ho. 11 Nehna ra Jesús í Justo i pen'nahu ran zengua. Pe høndi hyutho ya ma mijudíohe ngue yu 'yεc'yεi dadím pεhmbe ua nangue rá 'befi Oją, ne guehya hyu emme i hurca ma mbui. ¹²Νε nuna i pen'nahu ran zengua na ra Epafras, n'da ra mengu bu guí 'buhmbu, ne rá 'yehe ra Cristo na. Ne zai i äp rá ts'edi Oją nangue ahu, ngue hin gui päh nin 'yomfenihu nangue ra Cristo, ρε njuantho gui 'yøthu rá pähä Oja. 13 Ne majuani dím mangä nangue ra Epafras, ngue şmme xu hyadumbui in yaui Oja nangue ahu, pε hinga høn'a thohu, pε nε'u yu 'yεc'yεi i 'bupu ja ra hnini Laodicea, ne'u 'bupu ja ra hnini Hierápolis. ¹⁴Nu'a ra Lucas, ra médico, emme dadí hueju a, ne'a i pen'nahu ran zengua. 15 Necä dra Pablogä dí penpa ran zengua yu

COLOSENSES 4 384

'yɛ̞c'yɛ̞i ngue i 'bupu ja ra hnini Laodicea, nɛ'a man juhu nangue ra Cristo ra Ninfas, nɛ gätho u yu 'yɛ̞c'yɛ̞i ngue dim pɛti bu rán gu. ¹⁶Nɛ nu ahu, nu'bu gá jua a gá mamhbu na ra søcua dí pɛn'nahu ya, dami thocpahu u yu 'yɛ̞c'yɛ̞i bí 'bupu ja ra hnini Laodicea. Nɛ'a man'da ra søcua dá pɛhndä bu Laodicea, dami nuhu bu. ¹⁷Nɛ nu'i gra Arquipo, pɛ i jaua a dí xi a'i. Dami 'yøt'e xun ho ra 'bɛfi ngue bi 'da a'i ra Hmu, nɛ hingui ts'utho gui 'yøt'e. ¹⁸Nugä dra Pablogä, dá o't'ä ua na man zɛngua nangue ma 'yɛsɛ. Pɛ damim bɛmhbu ngue dí ofädigä. Oją di jamansu ahu nɛ da mbäx ahu. Nɛ hønt'a dí xi'ahu ya.

1 TESALONICENSES

Ná n'da ra søcuą bi 'yorba ra Pablo u yu 'yɛc'yɛi bu ja ra dahnini Tesalónica

Ran zengua

Nugä dra Pablogä nɛ ra Silvano nɛ ra Timoteo dí ot'ähe na ra søcua, nɛ dí pɛnh'nahe ran zɛngua gätho u yu 'yɛc'yɛi gue dim pɛti bu ja ra hnini Tesalónica, gätho yu ja'i ngue in 'yohu Oja ma Tahu nɛ ra Jesucristo ma Hmuhu. Nɛ nu ahu nɛ dín ndehe din ja ahu rán japi Oja, nɛ da hyut'a ni mbuihu Oja ma Tahu nɛ ma Hmuhu ra Jesucristo.

Bi t'ut'u 'bepu dí 'yec'yei u 'bupu mi'da yu häi

²Nɛ zại dí xihmbe jamadi Oją nangue ahu. Nɛ zại dím bɛn ahu 'bu dí yạhe Oją. ³Nɛ dím bɛn ahu 'bu dí yạhe Oją ma Tahu, nangue ni t'ɛc'yɛihu gní'yøthu rá 'bɛfi Oją nɛ nangue nin huɛcatehu ɛmmɛ guí humbi gam pɛhmbu, nɛ nangue a guí tømdahu ngue ba ɛh mahøn'a ra Jesucristo, nɛ gue'a gní hyät'i gní sɛthu 'bɛ'a gätho guín nuhu. ⁴Ma zu cu ahu dí pąhmbe ngue ɛmmɛ di huɛc'ahu Oją, nɛ bi huan'nahu ngue gyu mbɛti ahu a. ⁵Nɛ nu'bu rá mbudi dá mangähe bu a rán ho

ma'da'yo ra Cristo, gá pahmbu him mam hmansegä, pe nangue rá ts'edi a rá Hogandahi Oja guí hyamhbu a ram hma bi bɛn'nahu gue majuani a. Nε guí pahmbu mam 'buihe nu'bu mám 'bucähe bu, nguetho dá ut'ahu 'bɛ'a dám 'bu a n'da. 6Ne nu ahu gá tenhdu a ram 'bui dá ut'ahe ngue tengu bi 'yøt' ra Hmu mahɛts'i. Nε madague'a xʉn ngu ran ʉnbi gá nuhu, pe guehma gá hyamhbu a ram hma nε gán johyahu nangue rá Hogandahi Oją. ⁷Pε nangue mpähä thoho gá hyamhbu ram hma ne gám 'bumanhohu, gätho gá 'yuthu 'bepu dí 'yec'yei u 'bupu ra häi Macedonia nepu ra häi Acaya. ⁸Nɛ nangue ahʉ gá jafʉ bi fa a rán ho ma'da'yo ra Cristo, janangue'a hinga hønbu ra häi Macedonia ne ra häi Acaya, ρε hønbu go hapu i fadi gue ɛmmɛ i ja ni t'ɛc'yɛihʉ nangue Oją. Ne him mahyoni ga xihmbe a ram hman ya. 9Nε nu'u gätho yu ją'i i ma ngue ɛmmɛ gá simanhoje 'bu má mbähmbe bu ni hninihu. Ne i ma nangue gá sohmbu ni nyoguihu, ne nuya guí thandehu Oja i 'bui ngue majuani

a. ¹⁰Nɛ i ma gue guí tøhmbu ba ɛh mahøn'a mahɛts'i ra Jesús, rá Ts'unt'u Oją. Gue'a bá xox'a Oją bu 'bu u xun du, nɛ gue'a ra Jesús da yanju nangue rán ts'ɛmbi Oją xun u tho ngue ba ɛhɛ.

Rá 'befi ra Pablo bu Tesalónica

Ne nu anu ma za pahmbu ngue hinga säti thoho pahmbu ngue hinga säti thoho Nε nu ahu ma zu cu ahu guí dá mbähmbe bu guí 'buhmbu. 2Ne guí pahmbu hangu nangu ran unbi bi mba ma unguigahe nu'bu mám 'buhmbe bu ja ra hnini Filipos. Pε madague'a dá nuhe ran unbi, nu Oja bi 'daje ran zambui dá xi ahu rán ho ma'da'yo ra Cristo, madague xun ngu min nde da zuje. ³Nguetho hin dá xi ahu n'da ram hma him majuani, ne hin dá xi ahu nangue 'be'a ga tasehe, ne hin dím beni ngue høntho xcá hä ahu. ⁴Pe nugähe nzai dí mamhbe tengu in nde Oja, nguetho Oja bi huangähe ga mambbe rán ho ma'da'yo ra Cristo, ne i pa Oja ngue hin te dá cømhbe, ne hin dá hombbe 'be'a da numanho yu ja'i. Pε Oja di asca ma mbuihe. ⁵Nε hin dí huanhde yum hma mahotho guepu da numanhoje yu ja'i. Ne hin dí hombbe ngue ga tąhmbe ra mbeti. Nu'a Oja i padi 'bɛ'a dí mamhbe. ⁶Nɛ hin dá hombbe 'bɛ'a dí numansuje yu ja'i, xínga gue ahu o gue'u mi'da, madague'a mi sä xcá øt'ahe ts'edi nguetho ma 'bäigähe ra Cristo. ⁷Pε emme dá tump'a ma mbuihe tengu'bu n'da ra mbe di jamansu yú t'uhni, nangue man hugcatehe dá øt'ahu. ⁸Dín nde ga comhbu a rám hman Oja madague'a jatho ga em ma tehe, nguetho ɛmmɛ dadí huɛc'ahu. 9Ma zu cu ahu, ha hin guím bemhbu 'be'a dá øthe 'bu mám pehmbe bu ma pa

ne ra xui ngue dá honsehe 'be'a dá hombe, nguetho him mi nde ga pa ahe. Pε ra mate thoho dá xi ahu rám Hman Oją. 10 Pε ha hin guí pasεhu, nε a Oja i padi 'be'a mam 'buihe nu'bu mám 'buhmbe bu guí 'buhmbu gyu 'yɛc'yɛihʉ, ngue hønt'a Oja dín ndehe da t'ɛspi, nɛ hin'yʉ 'bɛ'a dí mba ma yacpihe, nguetho gätho xun ho 'be'a dá øthe. 11 Ne guí pahmbu ngue n'da ngu n'da ahu dá øthe tengu'bu ma t'uhni ahe tengutho n'da ra ta di huεc yú t'uhni nε di un ran zofo. Nε xtá hạt'ahʉ ra ts'ɛdi ni mbʉihʉ. ¹²Nɛ dá xi'ahu ja ts'editho gui 'yøthu ram 'bui tengu i numanho Oja. Nguetho Oja bi zonh'nahu gui comhbu a rá ts'edi nuixte bu di manda. 13 Ne nzai dadí unhde ra jamadi Oja nangue ahu, nguetho nu'bu má xi ahu rám Hman Oja, gá hyamhbu a majuani rám Hman Oja, ne hin gá 'yemhbu gue høntho rám hman ra ja'i. Ne gue'a ram hma dim pepu mbo ni mbuihu ya, gätho ahu ngue guí ɛc'yɛihu. 14 Nu ahu ma zu cu ahu, gá nuhu ran unbi gue bi 'yøt'a ni menguhu, tengutho bi nu yu 'yɛc'yɛi bu ra häi Judea nu'bu mi nu ran unbi ngue bi 'yørpa yú mijudíohu u. 15 Nu yu judío bi hyo a ra Hmu Jesús, tengutho bi 'yørpa yú pøngahya Oja mam'bet'o, necähe bi hyønje thi, nε Oja din suhmbu u, nε njo'o to i numanho u. ¹⁶Ne nu'bu má xihmbe yu ja'i ngue hing yu judío ra 'yu dí pø Oja u, pe bi hegähe u yu judío. Janangue'a bin te yú ts'oqui u, nε nuya bi ts'änni da nu rán ts'embi Oja nts'utho u.

Nu'a ra Pablo nde da mba mahøn'a bu Tesalónica

¹⁷Ma zu cu ahu, nu'bu má njo'ogähe bu 'da yu pa, hin dadí

nε εmmε dín ndehe ga mbähmbe bu, gua nu ahe. 18 Nugähe mim beni ga mbähmbe bu, ne nugä dra Pablogä mi säpi ga mbagä bu xun ngu yu nidi, pε 'bex bi zangua ra zithu. 19 Pe gue'a zehehu man johya ahe. Nguetho nu'bu bá sh mahøn'a ma Hmuhu ra Jesucristo, di nequi xun ho ma 'bεfihe, ngue ya gá 'yεc'yεihu. 20 Majuani guesε ahu man johya ahu, nguetho tengu'bu man t'unni ahu ga dä ahu bu. 1-2 Pe nugä him mí hät'i ga tø'mi mi'da yu pa ngue da 'bäx ahu. Janangue'a dá pɛn'nahu na ma zu cuhu ra Timoteo ba fäx ahu ne di ze ahu nangue ni t'ęc'yeihu, ne dá co'be ua ja ra hnini Atenas. Ne nu ra Timoteo n'da rá 'yehe Oja ngue dadím pehmbe ngue dí mamhbe rán ho ma'da'yo ra Cristo. ³Nuna ra Timoteo di ze ahu ngue hin gui 'uehmbu bu ja rá 'yu Oją nangue ran unbi guín nuhu. Nguetho ya guí pąhmbu gue rá pähä Oja ga nuhu ran unbi nangue'a ga tenhdu ra Cristo. 4Guí pahmbu 'be'a dá xi ahu nu'bu mám 'buhmbu, ngue jatho guin nuhu ran unbi tengu guín nuhu ya. ⁵Ne nu'bu him mi sä man'da nya'a ga tø'mi, dá pεhndä n'dihi bu ra Timoteo,

nguetho dín nde ga padi 'be'a guí

nugä dí su da da ahu ra zithu, ne

øthu nangue ni t'ɛc'yɛihu. Nguetho

säti thoho ra 'bɛfi dá øt'ahe bu 'bu.

⁶Pε nuna ra Timoteo ya bí 'bärpʉ

guepu guí 'buhmbu ne dá hamhbe

nangue nin hugcatehu. Ng bi xije

guín nde guin nuje, tengutho bu na

ra nde nangue ni t'ɛc'yɛihu nɛ

ngue nzại emme guím benje ne

pumbeni ahu, pe dím ben ahu

ndegähe gan nu ahe. ⁷Janangue'a ma zu cu ahu, madague'a dín nuhe ran unbi ua, pε nu'bu má øhmbe ngue'a gadí zacuatho ni t'ɛc'yɛihu, 'bex bi hyu ma mbuihe. ⁸Nε nugähe sä ga häthe u yun unbi dín nuhe ua, nguetho dí pahmbe gue ya gadí thot'a ni t'ɛc'yɛihu nangue'a ra Hmu. ⁹Thocua thoho dí xihmbe jamadi Oją nangue'a ran johya gadí 'daje. 10 Ne nu ra pa ne ra xui dí vahe Oja nangue ahu, ne dí äp'ahe rá ts'ɛdi Oja ngue gan nu ahu mahøn'a. Nguetho dín nde ga xän'nahu 'be'a gadí 'behmbu nangue ni t'ɛc'yɛihu. 11 Nɛ dí äcähe Oja ma Tahu ne'a ma Hmuhu ra Jesucristo gue di jaje ga mbähmbe bu gua nu ahu. 12 Νε ma Hmuhu di ja ahu ngue 'da gdán huɛctahu n'da ngu n'da ahu, ne gui hueju gätho mi'da, tengugähe ngue dadí huɛc'ahu. 13 Gue nu'a ran huɛcate i ia ahu dí zac'a ni mbuihu ne di ja ahu n'dat'a Oją guim bemhbu, nε gätho ma hoqui bu dán nu Oją ma Tahu nu'bu bá εh mahøn'a ma Hmuhu ra Jesús din 'yohu gätho xum pøhø.

Dam 'buhmbu a dí numanhoju Oja

A Nuya ma zu cu ahu, dí xi ahu nangue rá thuhu ma Hmuhu ra Jesús gue gui thoju gui 'yøthu 'bɛ'a dá xän'nahu. Nɛ gam 'buhmbu a dí numanho ahu Oja, nɛ man'da gui thoju xun ho. ²Nɛ guim bɛmhbu ya 'bɛ'a gätho dá xän'nahu nangue rá thuhu ma Hmuhu ra Jesús gue gui 'yøthu. ³Nɛ gue'a nde Oja gue gui däfu gätho ni mbuihu, nɛ hin gui 'yøthu ran 'yomt'ɛni. ⁴Nɛ n'da ngu n'da ahu nde'bu gui

pahmbu guin numansu ni xisu zehehu, janangue'a hin gui 'yøthu ran 'yomt'εni mi'da yu xisu. 5Nε hin gui 'yørpahu ran ts'o tengu i øt'u yu ja'i ngue hingui pa Oja. ⁶Nde'bu xínga n'da ahu gui 'yøthu gui unba ni min'yohuhu ngue gui nutontofu rá xisu. Nguetho Oja di cos'ahu ran unbi 'bu gue'a gui 'yøthu, tengu dá xi ahu. ⁷Nguetho Oja bi zongahu ga øthu ran ho nε him bi zongahu ga øthu ran ts'o. ⁸Nu'a to'o festhoho u yun zofo im mangua, pe hin rám hmanse n'da ran 'yohu i festhoho pε rán t'edi Oja, ngue bi 'daju rá Hogandahi. ⁹Nu Oja ya bi xän'nahu ngue gan huɛju n'da ngu n'da ahu, janangue'a hin'yu man'da ga xi ahu. ¹⁰Ne ya gá 'yuthu nin hugcatehu gätho yu cu i 'bupu ra häi Macedonia. Pε dí xi ahu ma zu cu ahu ne man'da gui 'yuthu nin huɛcatehu. 11 Nɛ nu ahu o gadím pate thohohu pe gui 'yøzehe ni 'befi zehehu ne gui hyadumbui gui hyomhbu 'be'a gdám 'buhmbu, tengu xtá xi ahu. 12 Nu'bu ngubu gui 'yøthu, da numanho ahu u hingui εc'yεi, nguetho hin guí äthu 'be'a guí homhbu.

Ba ɛ̞h mahøn'a ma Hmuhʉ ra Jesucristo

13 Nuya ma zu cu ahu dín nde ahu gui pahmbu 'bɛ'a din ja u yu 'yɛc'yɛi xun du, janangue'a hin da du ni mbuihu tengu u yu ja'i nte mán ho i tø'mi, ngue hingui pa Oja.

14 Nɛ tengu bu na ɛc'yɛihu ngue bi du ra Jesús nɛ bi dambɛni a, nɛ ngutho bu dá ɛc'yɛihu da dambɛni u yu 'yɛc'yɛi xun du, nɛ di jap Oja gätho din 'yohu ra Jesús nu'bu

bá sh mahøn'a. 15 Guehna rám hman ra Hmu dí xi ahu ya, nuju dyu 'yɛc'yɛihu gue dí 'buthohu 'bu bá gh mahøn'a ra Hmu, hin dam 'bɛt'ohu ga texhu mahɛts'i, pɛ nu'u yu 'yec'yei xun du dim 'bet'o u. ¹⁶Nguetho guesε ra Hmu ba cah mahøn'a mahets'i, ne emme ts'edi da ma nangue rá ts'ɛdi nu'bʉ bi zøn ra pa da man Oja. Ne rá ngurpa m'behni mahets'i emme nts'edi da ma. Ne gätho na nguni ra ximhäi da t'ø a rá thuxi Oja. Ne gätho u to'o xí 'yɛc'yɛi, ngue xʉn du, da dambeni, ne gue'u rá mbudi da ndexpu mahets'i. ¹⁷Ne dim 'bejua u yu 'yɛc'yɛi ngue i 'butho, 'dat'a da zixcahu, ne dan c'athu ra Hmu bu i ia vu güi ne dam 'buhmbu ra Hmu gätho yu pa mazai. 18 Ne guehna dá xi ahu gnín hyurpa ni mbuihu n'da ngu n'da ahu.

Ma zu cu ahu, hingui jatho ga xi ahu jam'bu da zøn u yu pa din ja u an ts'änni din ja. 2 Nguetho nu ahu guí pąhmbu xun ho ngue njongui padi, o gue ra pa o gue ra xui ba εh ra Hmu. Tengu'bʉ hingui pa a n'da jam'bu ba ¿'a n'da ra be. 3Ne nu'bu da man u hing yu 'yɛc'yɛi gue gätho i 'bumanho nɛ nte mán ts'o din ja, 'bex ba gh ran ts'embi da 'yøt' Oja ngue hin dim pommi u. Nguetho tengu n'da ra xisu gue bi zøn ra ora dim 'bʉh rá t'uhni, ne hin hapu sä da mbatho. ⁴Pɛ nu ahʉ ma zʉ cu ahʉ, hin di pi ahu ngue tengu'bu ba ε a n'da ra bε, ne hingan ts'ärbu da zøhø, ne di pi u i hupu ja ra 'bexui. Pe guí tømhbu ra pa ba ɛh ra Hmu. ⁵Nguetho gätho gahu dí 'buhmbu bu ja ra 'bexui tengu'bu ra xui. ⁶Nde'bu hin

dam 'buhmbu tengu'bu dí ahmbu, tengu u mi'da, pε dí nuhmbu nε dan 'yomfenihu xun ho. 7Nu ra xui i ah yu ja'i ne ra xui di ho di mihni. 8Pe nuju gue dí 'buhmbu ja rán nequi Oja, nde'bu nzai din jaju ran 'yomfeni xun ho. Ne nuju jatho ga hehu rá ts'edi Oja nangue ma t'ɛc'yeihʉ, ne ran huɛcate, ne ga tømdahu rán ho ma'da'yo ra Cristo gue gue'a dí pøju, janangue'a hin da daju ra zithu. ⁹Nguetho Oja him bi zängahu ga nuhu rán ts'embi a. Pe bi zängahu ga hamhbu a ran ho ma'da'yo ngue di pøju ma Hmuhu ra Jesucristo. 10 Nguetho nu ra Jesucristo bi du nangueju, ngue in nde 'darbu dam 'buhmbu a, madague'bu xtá tuhu o gue dí tehu nu'bu bá ɛh mahøn'a. 11 Janangue'a damin hyurpa ni mbuihu ne gam fäxhu n'da ngu n'da ahu tengutho guí øthu ya.

Nu ra Pablo di un ran zofo yu 'yec'yei

12 Nuya ma zu cu ahu, damin numansuhu u gätho bi huan Oja ngue yun ngurpi bu, ngue xän'nahu ne di 'da ahu ran zofo nangue Oja.

13 Dami numanhohu u ne emme gui hueju nangue ra 'befi i øt'e nangue ahu. Ne dami 'yes'hu a gnín junthu bu guí 'buhmbu. 14 Nuya ma zu cu ahu dí xi ahu, dami xihmbu u i danhyei ngue hingui ho 'be'a i øt'e. Ne dami zehmbu to'o i tu yú mbui, ne dami zehmbu u ngue hinguin zaqui yú t'ec'yei. Ne o gadín

xømbuihu nangue gätho u, pe dami fäxhu u. 15Ne gan jamansuhu hin gui cospahu ran ts'o 'bu i øt'ahu ran ts'o u 'da, pε gan 'yørpahu ran ho n'da ngu n'da ahu, ne gätho i 'bucua ja ra ximhäi. ¹⁶Nε daman johyahu gätho yu pa. ¹⁷Nε 'yo guí es'hu gan yahu Oja. 18 Ne Oja gui xihmbu jamadi 'be'a gätho bi 'yøt'ahu. Nguetho gue'a in nde Oja a gui 'yothu, gue ahu guín 'yohu ra Cristo Jesús. 19 Ne 'yo guí serpahu rá ts'edi rá Hogandahi Oja dim pepu mbo ni mbuihu. 20 Ne 'yo guí øman'uhu 'bu 'bo'o da ma, ngue dim pøngahya Oja. ²¹Dami bemhbu gue 'bɛ'a gätho xun ho o hin'na. Nu'bu xun ho, dami pɛs'hu. ²²Dami 'uehmbu gätho 'bɛ'a mán ts'o. 23 Nu Oja gue bi hoc'ahu, ne di ja ahu gätho ni mbuihu guim bemhbu a. Nε di ja ahu ni mbuihu nε ni tehu nte mán ts'o din 'yohu nu'bu bá ɛh mahøn'a ma Hmuhu ra Jesucristo. ²⁴Nu Oja gue'a bi zon'nahu, ngubu da 'yøt'ahu. Nguetho di ja'ts'a im ma nε da 'yøt'e gätho na.

Ran zengua ran zegui ne rán jąpi Oją

²⁵Ma zu cu ahu dami 'yäfu rá ts'ɛdi Oją nanguecähe. ²⁶Dami zɛnguagahu ts'u u yu cu nangue ran huɛcate. ²⁷Nuya dí xi ahu nangue rán t'ɛdi ma Hmuhu, dami mamhbu ma søcuagä bu 'bui gätho yu cu. ²⁸Nɛ gue'a ma Hmuhu ra Jesucristo di jap'ahu. Hønt'a dí xi ahu ya.

2 TESALONICENSES

Ná yoho ra søcuą bi 'yorba ra Pablo u yu 'yɛc'yɛi bu ja ra dahnini Tesalónica

Ran zengua

Nugä dra Pablo, nɛ ra Silvano nɛ ra Timoteo dí o't'ahʉ na ra søcua gätho ahʉ gyʉ cuhʉ nangue ra Cristo guí 'bʉhmbʉ bʉ ra hnini Tesalónica, gue ahʉ guí 'bʉhmbʉ Oja ma Tahʉ nɛ ma Hmuhʉ ra Jesucristo. ²Nu'a Oja ma Tahʉ, nɛ ma Hmuhʉ ra Jesucristo dí ndepe di 'da ahʉ rán japi nɛ da hyut'a ni mbʉihʉ.

Di unba u yu ts'om'bäi 'bu bá peng ra Cristo

³Ma zu cu ahu jatho ga xihmbe Oją jamadi nangue ahu. Nɛ xun ho ngue ngubu dím bɛmhbe, nguetho thocua thoho man'da te ni t'ɛc'yɛihu, nɛ man'da man'da gnín huɛctahu n'da ngu n'da ahu. ⁴Janangue'a man'da jagähe ran johya nu'bu dí xihmbe mi'da yu 'yɛc'yɛi 'bɛ'a guí øthu. Nguetho hin gadín xømbuihu nangue ni t'ɛc'yɛihu, madague'a hangu nangu yun unbi guín nuhu nɛ'u 'bɛ'a gätho i t'øt'ahu ya nangue guí tɛnhdu ra Cristo. ⁵Nangue a guí häthu yun

unbi, guí uhmbu gue jatho di unba Oja u to di un'nahu, pe nu ahu gám pomhbu a. Ne nu'u yun unbi guín nuhu ya, gue'a ní hoc'a ni mbuihu Oja tengu rán säui bu di manda Oja. ⁶Ne xun ho da 'yøt' Oja 'bu bi un ran unbi u to di un'nahu. 7NE nu Oja di japi din säya nin unbi guí nuhu ya, ne ngutho da 'yørcahe 'bu bá ch mahøn'a mahets'i ma Hmuhu ra Jesús, din 'yohʉ yʉ́m 'bεhni gue i ja yú ts'edi, ne ban 'yohu ra sibi nts'utho. 8Ne nu'bu bá ehe, di un ran ts'embi gätho to'o hingui pa Oja, nε gätho to'o him bi 'yørpamasu rán ho ma'da'yo ma Hmuhu ra Jesucristo. ⁹Ne nulu tolo da nu ran ts'embi xmá mba da nu ran unbi ngue njam'bu da guadi, nε ma 'ueque tho bu 'buh ra Hmu mahɛts'i, nερu hapu ja rá ts'edi nuixte. ¹⁰Pε nu'u yu 'yɛc'yɛi, gue'u dí hnu a rá nuixte a ra Hmu 'bu bi zøn ra pa ba ehe. Ne gätho yu 'yec'yei da 'yespa a, ne ahu gan 'yohu u, nguetho gá 'yɛc'yɛihu ran ho ma'da'yo dá xi ahu. 11 Janangue a nzại dí yạhe Oją nangue ahu. Ne dí äfe di 'da'a ni mbuihu ngue yún thehu ram 'bui bi

zän'nahu. Nɛ nu'a Oją di 'da ahu rá ts'edi gui 'yøthu ran ho guím bɛni gui 'yøthu. Nɛ nangue ni t'ɛc'yɛihu, Oją di zɛ ahu gui 'yøthu rá 'bɛfi. ¹²Nɛ nangue'a 'bɛ'a gui 'yøthu buya, nu'a ma Hmuhu ra Jesucristo da t'ɛspi. Nɛ nu'a xin da 'yɛs'ahu, nangue rá mate zɛhɛ a Oją nɛ ma Hmuhu ra Jesucristo.

Ran 'yohu ngue ra ngurpa 'yot'ats'oqui

Nuya ma zu cu ahu, dí xi ahu ya 'bɛ'a din ja nu'bu bá εh mahøn'a ma Hmuh# ra Jesucristo, ngue di percahu 'darbu dam 'buhmbu. 2'Yo gadí päh nin 'yomfenihu 'bu 'bo'o da xi ahu, ya bi zøn ra pa ba ɛh ra Hmu. 'Yo gadí 'yon ni mbuihu 'bu 'bo'o da xi ahu bi benba Oja ngue ya ba eh ra hmu ya. Ne 'yo guí ec'yeihu 'bu 'bo'o da hyä ahu ngue da 'yɛn ahu dá o't'ähe ra søcua dá mamhbe ya bi zøh ra Hmu mahets'i. 3Ne 'yo guí ec'yeihu 'bε'a gätho i man yu ją'i. Nguetho him ba ɛh ra Hmu asta gue'bu go gätho yu ja'i i 'bucua ja ra häi ngue hingui ec'yei din suhmbu Oja. Ne him ba ɛh ra Cristo asta gue'bu din 'yo a n'da ran 'yohu ngue ra ngurpa 'yøt'ats'oqui, ngue m'bejua da t'erpu ja ran unbi mazai. ⁴Ne nu'a ra ngurpa 'yøt'ats'oqui da zui gätho yu 'yɛc'yɛi gue i thande Oja, nε da zu u mi'da i thande hønt'a go 'bɛ'a i thande, nguetho in nde a dí mba nthande zehe. Ne da yurpu ja n'da ra nija nε da hyupu, tengu'bu gue'a Oja a. ⁵Ha hin guím bɛmhbʉ guehna dá xi ahu nu'bu mám 'buhmbu bu. ⁶Pe nuya guí pahmbu 'bε'a i sammi ngue ba εhε, nguetho

hinga na søn ra pa da man Oja gue ba ehe. 7Pe nuya emme xun ngu dim pepu yú mbui yu jaji a rá ts'edi ra zithu, ngue hin di nequi. Pe i pa nts'ambi thoho rá ts'edi asta gue'bu go bi zøn ra pa ngue Oja di 'uec'a to'o i sammi. 8Ne gätho da nu ran 'yohu ngue ra ngurpa 'yøt'ats'oqui. Pε nu'bu bá εh mahøn'a ra Hmu Jesús nuixtetho rá ts'edi, da hyo a ran 'yohu, ngue da huic thoho. 9NE nu'bu bá ɛh ran 'yohu ngue xun ngu rá ts'edi ra zithu in 'youi, ne da 'yøt'e xun ngu yu hmepya, ne yun t'øt'e nuixte ngue dí hyät' yu ja'i. ¹⁰Nε gätho 'bε'a mán thäte da 'yøt'e, ngue da hyät' yu ja'i i 'yo rá 'yu ram 'bɛdi, gue'u him mín nde da 'yɛc'yɛi a majuani guepu mí sä xtím pøhø. 11 Ne nu'u gätho him bi nde da 'yɛc'yɛi a majuani Oja, di japi da 'yɛc'yɛi yʉ fɛhni nɛ da den'na ran 'yohu ngue ra ngurpa 'yøt'ats'oqui. 12 Janangue'a gätho u him bi 'yεc'yεi a majuani pε man'da di ho ran ts'o, 'darbu da nu rán ts'embi Oja u.

Nthahni dim pøhø

13 Pɛ nzại ga xihmbe jamadi Oją nangue ahu 'bɛ'a gätho bi 'yøt'ahu ma zu cu ahu, ngue di huɛc'ahu ra Hmu. Nguetho Oją bi huahn'nahu rá mbudi thoho ngue di pø ahu. Nɛ nangue gá 'yɛc'yɛihu a majuani, nu'a rá 'bɛfi rá Hogandahi Oja í bo ni mbuhu. 14 Nɛ bi huahn'nahu Oja ngue gá 'yɛc'yɛihu 'bu má xi ahe rán ho ma'da'yo ra Cristo. Nɛ bi zän'nahu Oja gui comhbu rá nuixte ma Hmuhu ra Jesucristo. 15 Nuya ma zu cu ahu dami thoctahu ni t'ɛc'yɛihu, nɛ 'yo gadí uans'hu

'be'a guím bɛmhbu, nɛ 'yo gadí pumbɛnihu 'be'a dá xän'nahu nu'bu 'darbu mám 'buhmbu, nɛ'a 'be'a dá xi ahu nu'bu má o't'ahe u yu socua. ¹⁶ Nuya gue ma Hmuhu ra Jesucristo, guesɛ a, nɛ Oja ma Tahu, da hyut'a ni mbuihu mazai nangue rán hosɛ Oja. Nu'a Oja di huɛc'ahu, nɛ nangue rá mate bi jaju ga tohmbu 'bɛ'a di 'daju. ¹⁷Nɛ nu'a Oja da hyu ni mbuihu, nɛ di zɛt'a ni mbuihu ngue gui mamhbu nɛ gui 'yothu 'bɛ'a gätho xun ho.

Gui 'yäfu Oją nanguecähe, ɛn'a ra Pablo

Hønt'a dí xi ahu ya ma zu cu ahu, dami 'yäfu rá ts'edi Oja nanguecähe n'dahma din ja rá ts'edi rám hman ra Hmu, ne da bømanho hønbu go hapu ga 'yomhbe. Ne gätho to'o da 'yøde da hyani nangue ran johya, tengutho bin ja bu guí 'buhmbu. ²Nε gui 'yäfu rá ts'ɛdi Oją ngue da yąnje bu 'buh yu ts'om'bäi ja'i, nguetho hinga gätho in nde da hyan rám hman Oja. ³Nguetho nu'a ra Hmu njam'bu da hyegahu pe nzai da mbäju, ne i ja rá ts'edi ngue hin di japi di un'nahu ra damants'o. ⁴Nε nu'a ra Hmu di jaje dí pahmbe ngue gadí thoctahu guí øthu 'be'a gätho dí xi ahe. ⁵Nε nu'a ra Hmu di ja ahu man'da man'da gui pahmbu rán hugcate Oją, ng di ja ahu gui hyäthu 'bɛ'a gätho guí thohmbu tengutho bi 'yøt'a ra Cristo.

Jatho gui 'yøt' ni 'befi zehehu

⁶Ma zu cu ahu dí xi ahu nangue rá thuhu ma Hmuhu ra Jesucristo, dami 'uehmbu ts'u bu 'bu u ni cuhu

i danhyεi, ngue hingui nde dim pefi, gue'u hingui ten'na 'be'a dá xän'nahe. ⁷Nε nu'ahu guí pạhmbu 'be'a gdám 'buhmbu, tengu dá ut'ahe 'bu mám 'bucähe bu, ngue hin dám 'bundanhygi thohogähe. ⁸Ne xíngui ts'u gá 'daje 'be'a dá homhbe. Pε dám pεhmbe ra pa ne ra xui n'dahma bin ja 'be'a dá hombbe, ne xíngui ts'u dá pa ahe. 9 Madague mí sä xcá ähmbe ngue xquí zeje. Pe dá ndehe ga ut'ahe ra hmɛpya gui 'yøthʉ. ¹⁰Nɛ nu'bu mám 'buhmbu bu, dá xi ahu, ngue'bu 'bu a n'da hingui nde dim pεfi, hin din sihmε 'bu, pε da zä ra thuhu 'bu. ¹¹Nguetho dí øhmbe gue 'bu i 'da ahu hingui nde dim pefi, pε di hødanhyεi thoho nε ndetho din thịnt pu hin yú 'befi. ¹²Nuya nangue rá ts'edi ma Hmuhu ra Jesucristo, dí xi u to'o hingui nde dim pefi, ngue da hyanya zehe rá 'befi da 'yøt'e, ne da hyonse 'be'a dám 'bui. 13 Pe nu'ahu ma zu cu ahu, o gadín xømbuihu gui 'yøthu ran ho. 14 Nu'bu 'bu a n'da ahu hingui nde da 'yøt'a 'bɛ'a dí xi ahʉ, dami hyethu 'bu, janangue'a da mbe'ts' yú sä. ¹⁵Pε o gadín sʉhmbʉ, pε gui unhdu ran zofo tengu'bu ni cuhu.

Ran zegui ran zofo

16 Nɛ guesɛ ra Hmu, hønt'a sä da hyut'a ni mbuihu, hønt'a go 'bɛ'a guí thohmbu gätho yu pa. Nɛ nu'a ra Hmu gam 'buhmbu gätho ahu.

17 Nugä dra Pablo dí o't'ä na ran zɛngua i ja ua ya nangue ma 'yɛsɛgä. Tengu'bu ma firmagä na, ngue gätho ya ma søcuą. 18 Nuya nu'a ma Hmuhu ra Jesucristo di jąp'ahu, gätho ahu. Nɛ hønt'a dí xi ahu a ya.

1 TIMOTEO

Ná n'da ra søcuą bi 'yorba ra Timoteo a ra Pablo

Ran zengua

Nugä dra Pablogä, ma 'bäigä'be ra Jesucristo nangue rán t'ɛdi Oją ma yantehu, nɛ ra Jesucristo, guesɛ'a ran ho dí tømhbu a. ²Dí pɛnh'na n'da ra søcua gra Timoteo, tengu'bu majuani ma ts'unt'u i, ngue ya dá xän'na ma t'ɛc'yɛihu. Nɛ dí äp Oja ma Tahu di 'da'a rá mate nɛ rán huɛcate, nɛ da hyut'a ni mbui a ra Cristo Jesús ma Hmuhu.

Da mba ma hecpi u n'dan'yo in xänbate

³Nɛ tengu dá xi'a 'bu má mba bu Macedonia, nɛ ngutho dí xi'a ya, dami copu Éfeso, nɛ gui hɛcpa u 'da bí 'bupu, ngue hinga n'dan'yo da ma 'bu in xänbate. ⁴Nɛ dami xifi hin din xäh mi'da yu cuento gue 'bɛ'a sä ɛmbi bi 'yøt'u ndu ma bombøtahu maya'bu nɛ'bu ɛmmɛ ma 'bɛ'a yú thuhu u, ngue man'da di xant'u yúm hma. Nguetho nu'u yum hma tengu u, säti thoho ran 'yomfɛni di un'na n'da, pɛ hin di 'yomfɛniba n'da da 'yɛc'yɛi Oja. ⁵Pɛ nu'a ma 'bɛfihu dyu xänbatehu, ga

xänba yu ja'i dan huɛju. Nɛ gue'a ran hugcate di nequi bu ma mbuihu 'bu m'be't'e a, ne'bu zai dí øthu a di bengahu Oją, ne'bu hønt'a Oja dím bemhbu a. 6Pe nu'u 'da hinga guehya yum hma dín hugca n'da i honi, ρε bi 'uepu ja rá 'yu Oja, janangue i ten yum hma säti thoho. ⁷Nu'u, ɛmmɛ i honi nde din xänbate nangue yún t'edi Oja bi man ra Moisés, pε hingui pądi 'bε'a im ma. Sä i mants'editho, pe ne hingui pądi 'bɛ'a nam bøn'u yúm hmanse i ma 'bu i man yun t'edi. ⁸Dí pąhmbu gue xun ho u yun t'ɛdi bi xi Oja ra Moisés. Pε bi ts'än yún t'ɛdi Oja gue dí mba ma hɛcpi u yu dadits'oqui. ⁹Ne gue'u yun t'edi dí mba ma hecpi u to'o jase yún t'edi zehe, ne'u i festa yún t'ędi Oją, ne'u to hingui numansu Oja, ne di ho da 'yøt' yu ts'oqui. Ne'u to hingui espa Oja, ne i ten ra ximhäi, ne i ho yú ta ne yú mbe, ne yu hyodu. Gue'u da sih yún t'ɛdi Oja u, nɛ hinga gue'u hønt' Oja mbeni. 10 Ne bi ts'än yún t'edi Oja dí mba ma hecpi u øt' ran 'yomt'eni, ne'u din 'yasäbi yú min'yohuhu tengu'bu n'da ra xisu, ne'u i pe yú mija'ihu, ne'u i man

yu fɛhni, nɛ i xih ra fɛhni yu zɛ'mi. Nɛ gätho u n'dan'yo i øt'e xínda gue ra hoganxädi, nɛ gue'u da sih yun t'ɛdi Oja u, nguetho i xiju hin ga øthu yu ts'oqui. 11 Pɛ nu'a rán ho ma'da'yo ra Cristo dí pärca ma mbuihu Oja a, nu'a mixte xun hotho a. Nɛ gue'a ran ho ma'da'yo bi xicä Oja gam mangä.

I xi Oją jamadi ra Pablo, nangue rá mate xun ngu

¹²Jamadi dí xih ma Hmuhu ra Jesucristo, nguetho bi huangui dram 'bɛhnigä, nɛ i padi ga ja'ts'i, nguetho di 'dac rám fäts'i ga øt'a i xiqui. 13 Pe nugä emme dra nexmategä mam'bet'o, ne mí sangä a ra Cristo gue'bu go má unba u 'da yú 'yɛc'yɛi. Nɛ xíngui ts'u mí pacä 'be'a nam bøn'a mí øt'ä, nguetho him mí ɛc'yɛigä ra Cristo. Pe Oja bi 'dac rá mate bi pungui. 14 Pe emme xun ngu rá mate ma Hmuhu ra Cristo Jesús, bi jaqui dá däpä ma mbui a, ne bi jaqui emme dá numanhogä a Oja nε dá huεc ma mija'i'be. ¹⁵I ja ua n'da ram hma da zä ga pahmbu majuani, ngue bi zocua ja ra ximhäi a ra Jesucristo di pø'u yu ts'om'bäi tengugä man'da xun ts'o dá øt'ä. ¹⁶Pe emme xun ngu rá mate bi 'yørcä Oją, nguetho nde gätho da 'yut mi'da yu ja'i ɛmmɛ ja rá yembui a ra Jesucristo. Ne tengu thohogä, ngutho da 'yørpa u to'o di däp yú mbui a, ne'u din ja ra te mazai. ¹⁷ Janangue'a ga ɛspa ma Ojąhu gätho yu pa maząi. Nu'a, ra Hmuts'ut'abi mazai a, ne njongui sä da nu, ne njam'bu da guadi. Ne n'datho Oja, njo'o man'da, ne gätho

i pądi. Ne hønt'a gam bemhbu a ya. ¹⁸Νε nuya gra Timoteo, tengu'bu ma ts'unt'u i, i ja ua a dí xi'a ya. Nu'i gra dofui nangue Oja, dami 'yøt' ra hogatuhni, tengu thoho bi xi'a u yú pøngahyą Oją. Janangue'a dami hyadumbui gui 'yɛc'yɛi rá hogamhma Oją, ne gui 'yøt'a 'be'a i xi'a 'bʉ in zop'a ni mbʉi. ¹⁹Nε hin gui 'yøt'e tengu mi øt'u 'da 'bu mí zop yú mbui Oja, pε bi mbesta'a 'be'a bi sifi, bi ts'onse yú mbui buya. ²⁰Tengu mí øt'a ra Himeneo nε ra Alejandro. Pε dá juanba u, nε dá xifi bi mba ma dä bu 'buh ra zithu, di unbi, da badi hin da zan Oja.

Da mba nt'äpi rám fäts'i Oją nangue gätho yu ją'i

Ne i ja ua irua ram gra Timoteo, ngue mahyoni Ne i ja ua n'da ram hma ga xi'i, gui 'yørpu ja ram peti. Ngue nu'bu guí yahu Oja, gui xihmbu nangue gätho yu ją'i, gui 'yäfu rá mate nangue'u, ne gui xihmbu jamadi Oją nangue'a 'bɛ'a bi 'yørpa n'da ngu n'da u yu ja'i. ²Ne'u yu ts'ut'abi ne gätho to'o ja yú ts'edi, dami 'yäfu rám fäts'i Oją nangue'u, ngue hin din ja yu sui ne xíng ra dumbui, ne hin te gam bemhbu, ne da zä bu ga øthu xun ho 'be'a bi man Oja buya. ³Ne xun ho 'bu ga øthu a, nguetho gue'a numanho Oją mam pørpatehu a. 4Nguetho in nde Oją da yąni gätho yu ją'i nangue rá ts'edi ra zįthu ne di 'yomfenibi nangue'a majuani. ⁵Ne n'datho Oja i 'bʉi. Nɛ n'datho a i 'bä'inde nɛ din hocpate bu bí 'bu Oja, nu'a ra Jesucristo ngue bin ją'i a. 6 Nguetho bin däse ngue gätho bi gurca ma ts'oquihu. Ne guehna ram hma bi

xiju Oja 'bu mi zøn ra pa bi ma. ⁷Ne guehna ram hma í thangä gam mangä na, ne guehna bí 'bencä na, ne majuani hin dí fehnigä, ngue ma 'befigä ga xänba u hing yu judío, ga japi di däp yú mbui Oja, da yani, ne da 'yec'yei a majuani. 8Ne man'da dí xi'i, hønbu go hapu dim peti yu 'yęc'yei, xtán hotho yú 'ye u yun 'yohu di 'ua'ts' 'bu din yahu Oja, ngue nte má cue da beni, ne xíng ran ucpate. 9Ne dí xi'i 'be'a gui xih yu xisu, ngue hin din hoc zehe nangue ran 'yɛ̞ts'i, uague di hoc yú ya, uague ra oro o yu thebe o 'be'a xum hmadi da japi. Pe din hoc zehe nangue yú he rán säui n'da ra hogambui ne ra hogan'yomfeni. ¹⁰Nε da bądi da 'yøt' ra hogambui, nε gue'a ran hoqui rán säui n'da ra xisu i numansu Oja. ¹¹Ne nubu ja nim petihu, da ndese yu xisu da sänbi, nε hin go din xänbate, nε gätho da 'yøde. 12 Nε dí xi'i hin dim 'bɛt'o yu xisu ngue da xänba yun 'yohu, pε din hεtho. 13 Nguetho m'bɛt'o bi 'yøt' Oja a ra Adán, nε m'bεjua a ra Eva, janangue'a hingui sä dim 'bɛt'o n'da ra xisu. ¹⁴Nguetho nu ra xisu bi numanho 'bu mí xih ra zịthu da 'yøt' ra ts'oqui, pe nu ra Adán him mín nde xtá 'yøt'e. 15 Janangue'a din unba 'bu xum 'buh yú t'uhni u yu xisu, pε da mbäx Oja u 'bu thocpa thoho i ęc'yei, ne'bu din ja yún huęcate, ne'bu din 'yomfeni xun ho, n'dat'a Oja da beni.

Nda'u yun 'yohu din ngurpi

Majuani a ram hma, nu'bu in nde din ngurpi n'da, in nde n'da ra 'bεfi xun ho. ²Pε jatho din

hocja'i n'da ra ngurpi, ne nte da thinba n'da rá ts'oqui. Ne hønt'a n'da rá xisu da zi, ne da badi da zamzehe rá mbui ne din 'yomfeni xun ho, ne di jamansu 'be'a i øt'e, nε di ho di un ran ts'äya bu ja rá ngu, ne da badi din xanbate nangue rám hman Oją. 3Ne njam'bu dim mihni, xín din ndesui, ne hin da 'yøman'u a i sifi, ne xín din hecpate pε din hocpate, nε hin da nde xun ngu ra mbeti. ⁴Ne da badi dim 'bɛt'o bu ja rá nguse, ne nu yú t'uhni da 'yøt'e 'bɛ'a i xifi, nguetho numansu yú ta. ⁵Nguetho nu'bu hingui padi dim 'bɛt'o bu ja rá nguse n'da ran 'yohu, hin da badi di jamansu yu 'yɛc'yɛi 'bu. 6Nɛ hin din ngurpi n'da ra 'da'yo 'yɛc'yɛi, ts'urpu thoho din 'yɛts'i tengutho ra zithu, ne da dex'a Oja a. ⁷Ne nu yu ngurpi da 'yøt'e ngue da hnumansu, nepu 'bu u hing yu 'yec'yei da 'yøt'e 'bɛ'a dí hnumansu, janangue'a njon di c'aman'u, ne hin da dap ra zithu buya.

Ndana ní ją'i dim fäxte

⁸Ximangut'u yúm fäts'ihu yu ngurpi, ngutho guexta'a jatho din hocją'i, ne 'da'angu da ma, ne hin dim mihni, xín din siyate nangue ra mbeti. ⁹Ne da bądi xun ho 'be'a gätho rán theui a ram hma ne din ząm bu, ne zại øt'a xi Oją 'bu in zop yú mbui. ¹⁰Ne nde'bu 'be da hnu 'bu tenni xun ho, ne nubuya nu'bu hin te da thịnbi, da zä da 'yøt' ra 'befi dim fäxte buya. ¹¹Ximangutho 'bu dim fäxte n'da ra xisu, i jatho da hnumansu, pe hin din c'ąte, ne xín dim mihni, pe din 'yomfeni xun ho, ne di ja'ts'i 'be'a gä øt'e. ¹²Ne nu

n'da ran 'yohu 'bu im fäxte, n'datho rá xisu da zi, nɛ da badi dim 'bɛt'o bu ja rá ngu, nɛ da 'yøt'u yú t'uhni 'bɛ'a da xifi. ¹³Nguetho nu'bu i øt'e xun ho rá 'bɛfi n'da ram fäts'i, da hnumanho buya, nɛ man'da da hyut' ran zambui nangue rá 'bɛfi ra Cristo.

Mixte xun ho a ram hma dí ęc'yeihu

14 Guehna dí ot'a na ya, gra Timoteo, madague'bu dím bɛni ga mba bu n'dihi. 15 Pɛ xi'bu him 'bex da zä ga mba bu, pɛ ya dá xi'i 'bɛ'a xun ho gui 'yøt'e nangue a rá ngu Oja. Ngue nu yu 'yɛc'yɛi xa hyømba rá ngu Oja nangue yú mbui, ngue 'dat'a Oja i 'bui. Nɛ tengu'bu rá nguju Oja guepu na fadi xun ho rám hma Oja, nɛ dín yamhbu a. 16 Nɛ gue'a ran ho ma'da'yo dí tɛnhdu mixte xun ho a,

ngue bin 'yusɛ ra Cristo ua ja ra häi 'bʉ mín ją'i a, pɛ bin 'youi rá Hogandąhi Oją guepʉ í fądi hin'yʉ rá ts'oqui

ne bi nu u yúm 'behni Oją mahets'i.

Ne bi hmangua dí 'buhmbu hønbu go hapu 'buh yu ja'i gue 'dahma'dan'yo bu na ya. Ne bi t'ec'yei ua ja ra ximhäi, bi ts'ix mahets'i bu bí ja rá ts'edi Oja mixte buya.

Mi pą Oją da 'ue'u 'da

A Nu rá Hogandąhi Oją m'bɛt'o di bɛ̞ngä ngue da 'uepʉ ja rá 'yu Oją ʉ 'da. Ngue da 'yømanho ʉ yʉ nde ʉ yʉ hyäte xänbate bin xädi nangue yʉm hman yʉ zɨthu. ²Nu yʉ hyäte hingui sä bʉ da zop yʉ́

mbui Oją, nguetho bi ts'on yú mbui nangue yu fɛhni zại im ma. ³Ngue sä di hɛcpa yu jạ'i, i xifi hin din thạti, xín da zi 'da yun ts'ihmɛ, sä ɛn'u. Pɛ bi zängahu Oją ga hạmhbu hønt'a go 'bɛ'a mán ts'ihmɛ 'bu dí xihmbu jamadi Oją, gue nuju dyu 'yɛc'yɛihu, nɛ dí pạhmbu nda'a majuạni. ⁴Nguetho gätho xun ho 'bɛ'a bi 'yøt' Oją, nɛ hin'yu 'bɛ'a ga ɛmhbu, pɛ ga hạmhbu nɛ ga ɛmfu jamadi Oją buya. ⁵Nguetho majapi ngue'a dí äfu rán japi Oją, nɛ nu rám hman Oją i ɛmbi xun ho a.

Rá hogambεfi ra Jesucristo a ra Timoteo

⁶Nu'i gra Timoteo, xun ho 'bu guim benba yu cu na ram hma i ja ua, janangue'a gam pɛfi xʉn ho nangue ra Jesucristo. Nguetho bi ha'a ra ts'edi ni mbui a ra hogamhma dí εc'yεihu, ngue ra hoganxädi guí tenni. ⁷Ne o gui urpa ra güenda yum hmanse yu ją'i säti thoho nε xʉn ts'o. Pε dami hyadumbui nangue rá 'befi Oja. ⁸Ne tengu 'bu zai dadin cunh ma ja'ihu, nε da hyą ra ts'εdi, nε ngutho ga øthu nangue ma mbuihu, da hyą ra ts'edi 'bu zai ga humbahu nangue rá 'befi Oja. Ne emme xun ngu di muui 'bu ga humbahu, nguetho i ørcahu ran ho yu pa i jabu ya, ne gätho yu pa mazai. 9Ne majuani na ram hman na, janangue'a nde'bu gätho ga øthu xun ho. 10 Janangue'a dí häthu yun unbi ne dí humbi dadím pehmbu, guepu go da zä ga xihmbu xun ho rám hma Oja yu ja'i. Nε da zä ga däp yú mbui Oją buya, nε dim pøhø. Nguetho n'dat' Oja dí tømhbu i 'bui, nu'a in nde da yan'u

gätho yu ją'i i 'bui, ne da yąn'u to'o da 'yɛ̞c'yɛi a. ¹¹Nuya yʉn xädi i ja ua, thocpa thoho gui hyadumbui emme gui benbi ne gui xänbi gätho yu cu bí 'bupu. ¹²O to guídí japi da 'yu'ts'i'i ngue gra ts'unt'u thoho. Pe gui 'yut'u yu cu nangue yun t'øt'e bi xiju Oją gue gui 'yøzehe xun ho, gui jamansu 'be'a gui ma, o 'be'a gui 'yørpu. Janangue'a gui 'yuti din hugqui n'da ngu n'da, ng di ja'ts'i, ne da zamzehe yú mbui. ¹³Pe gätho 'bu hin ná søngä bu, pe gui jamansu ni 'bɛfi 'bʉ guí man rám hman Oja, ne'bu gadí un ran zofo yu ja'i, ne'bu guí xänbi 'be'a nam bøn'a n'daxequi gui xifi. ¹⁴Damim pefi xun ho nangue a rá ts'edi Oja bi 'da'i, tengu bi xi'a u 'da yú pøngahyą Oją. Ngue bi bɛn'na ni mbui Oja 'bu mí 'yäp rá mfäts'i nangue'e, nε bi gäx yú 'yε bu ja ni yą. 15 Thocpa thoho gui 'yøt'a dí xi'i, nε hønt'a gui hyądumbui gui 'yøt'a, nε nubuya da nu i gätho yu ją'i ngue bin te xun ho ni mbui nangue rá 'befi Oja guí øt'e. 16 Ne thocpa thoho gui hyadumbui gam fäse nangue ni mbui, ne gui jamansu 'be'a gätho gui xi u 'bupu nangue rám hman Oją. Ne nu'bu ngubu gui 'yøt'e, ne di jap'a Oja, ne'u gä mi'da yu ja'i guí xänbi.

Ga fäx ma cuhu

O guí su'a n'da ra dạc'yɛi, pɛ dami zofo xun ho, tengutho 'bu ni ta. Nɛ nu'u yu ts'unt'u gui 'yøt'e tengutho 'bu nin 'yohuhu.

Nɛ nu yu zi bømbe gui 'yøt'e tengutho 'bu ni mbe, nɛ nu yu hmute, gui 'yøt'e tengutho 'bu nin ju, nɛ hin guim bɛn'a n'da

ra 'yasä nangue'u. ³Nɛ nubu ja yum peti gui jamansuhu n'da ra bømbe 'bu xun du rá ndø, ngue'bu njo'o to'o di jamansu. ⁴Pε nu'bu n'da ra bømbe xun du rá ndø, ne 'buh yú t'uhni, o gue yú 'beto, da bạdi rán t'gdi Oja a di jamansu yú mbe, tengutho bi 'yørpa 'bu mín t'uhni. Ne gue'a in nde Oją. ⁵Ne nu'bu n'da ra zi bømbe i nyaui Oja gä ra pa ne ra xui, ne hønt'a Oja im beni, ne nu'bu njo'o to'o di jamansu, pe gui fäxhu a buya. ⁶Pε nu mi'da yʉ xisu, xʉn du yʉ́ ndø, ngue hinguim ben Oja, ne i honi da 'yøzehe yú pähä zehe. Madague'bu i 'bui, pe tengu'bu xun du bu nam ben Oją. Hinga gue'u da mba ma jamansu bu ja ram peti u. ⁷Nε nuya yum hma i ja ua, gui xänba u yu cu, janangue'a njon da 'yɛna hingui ho øt'ʉ. 8Nɛ nu'bʉ n'da hin di unni 'be'a di 'be a rá ta o gue rá mbe, o gätho mi'da yú meni, man'da xun ts'o rá mbui 'bu, xinda gue'bu hin xtá 'yɛc'yɛi, nɛ bi gøn'a ra Cristo. ⁹Nuya ga xi'i nda'u ní hyoya bømbe gui hyuspa yú thuhu dim pepu ja ram peti. Hønt'u pe'ts'a hyate njeya ne emme bim 'bumanhoui yú ndø. 10 Νε i hnumanho nangue yu hoga'befi i øt'e, ne bi jamansu xun ho yú t'uhni, ne zai di säyaba yu ja'i bu ja yú ngu, ne him bin 'yęzehe pe bin 'yɛhɛ nangue yú mi'yɛc'yɛihu, nε bi hyurpa yú mbui to'o mi tu yú mbui, ne bin ehya bi 'yøt' mi'da yu hogant'øt'e. Ne guehya yu hyoya bømbe gui hyuspa yú thuhu ya. ¹¹⁻¹²Pe nu mi'da yu xisu xun du yú ndø, nu'bu hingui ngu yu jeya pe'ts'i, hin gui hyuspa yú thuhu

gue gui 'yɛmfu dim pɛpu. Nguetho ts'urpu thoho da beni din thati, ne nu'bu din thati mahøn'a hin da 'yøt'a ra 'bɛfi mí ma xtá 'yøt'e. Nɛ ra ts'oqui a nguetho him bi ja'ts'a bi ma. ¹³Ne nu'u, ts'urpu thoho din danhysi yú mbui 'bu njo'o yú ndø, nε da hya'da thoho yu ngu, nε høn nan c'ate di ja, im man'a hingui ho, nε sä din thịnt'i i øt'e nε hin rá 'bɛfi bu. 14 Janangue'a man'da xun ho 'bu din thạti mahøn'a, dim 'buh yú t'uhni, ne dim pepu ja yú nguse. Ne nu'bu din jabu da 'yøt'e, hin di c'aman'uju man suihu 'bu. ¹⁵Nguetho i 'bu i 'da yu xisu xun du yú ndø, ne ya xu mbengui ne i ten ra zithu. ¹⁶Ne dí xi'i mahøn'a, nu'bu 'bu a n'da ra cu ngue bi du rá ndø a rá mbe, jatho da mbepi, o gue rá nana bi du rá ndø, o gue rá meni, i jatho di jamansu, ne hinga gue'a ra mbeti pa ma peti bu ja ra niją dí mba ma jamansu u. Janangue'a dí gua'a ra mbeti bu ja ra niją ngue hønt'u njo'o to'o di jamansu da mba m'bepi bu. ¹⁷Nu yu ngurpi bu ja ram peti, nu'u to di ją'ts'i xʉn ho yʉ́ 'bɛfi, da t'ɛ̞spa u. ne da mba m'bäts'i 'be'a di 'bedi. Nε nu'u to i humbi din xänbate nangue rám hman Oja, man'da jats'editho da t'espi. ¹⁸Nguetho nt'o't'i: "Nu yu uafanindani 'bu i uahi hingan thu't'i yú nde, pε da zä da za yu paxi i ja bu." Ne man'da ram hma i ja: "Nu'a to dim pefi ja rán t'edi din ju't'i," i ena. ¹⁹Ne hin gui 'yurpa ra güenda 'bu da mba ma yapi n'da ra ngurpi t'embi bi 'yøt' ra ts'oqui, hinda hønt'bu di yoho hyu u di yapi gui 'yøh puya. 20 Ne nu'bu majuani bi

'yøt' ra ts'oqui, da mba ma hecpi bu dim peti u mi'da, n'dahma gätho din su. 21 Ne madague'bu gadín amigoui o hin'na, pe 'da'angu gui 'yørpe. Ne gue'a i jats'edi dí xi'i gui 'yøt'a, nguetho in nu a Oja, Oja da badi 'bu guí ja'ts'i, ne'a ra Hmu, ra Jesucristo, in nu i, ne yú hogam 'bεhni Oją mahεts'i in nu i. ²²Him 'bex gui un ra 'bɛfi n'da ran 'yohu, 'be gui pahmbu 'be'a rá mbui. Nguetho nu'bu n'da gá un ra 'bɛfi, nε da 'yøt' ra ts'oqui, guí conhui rá ts'oqui a buya. Janangue'a gan 'yomfeni xun ho, ne nte gan dupate buya. ²³Nuya dí xi'i gra Timoteo, nangue ni mbui xun u, ne jant'a punts' thoho, dami si zits'utho ra vino, nε hinga hønt'a ra dehe gui si. ²⁴Guim bemhbu ndana u yun 'yohu da sih ra 'befi bu ja ram peti, 'bu i 'da ngue mfadi i ja yú ts'oqui, ne 'bʉh mi'da ngue hinga mfadi i ja yú ts'oqui jague'bu da zøn ra pa da thịnba yú ts'oqui. 25 Ne ngutho nangue ran hocją'i i øt'a n'da, mfadi nangue yu ja'i. Ne nu'bu him 'bexque mfadi, pe m'bejua da fadi, nguetho hingui sä da 'yagui.

Nu'u yu 'yɛhɛ bí 'bupu, da numansu u yú hmu to i ørpa yú 'bɛfī. Nɛ nu'bu din jabu da 'yøt'e, njon di c'aman'u nangue Oja nɛ njon di c'aman'u rán xädi Oja. Nɛ nu'bu yu 'yɛc'yɛi u yú hmu yu 'yɛhɛ, pɛ guexta'a da numansu u yú hmu nɛ hin da zani ngue'bu mbɛni din cuhu u. Pɛ man'da da bɛni da mbɛpi xun ho, nguetho rá mi'yɛc'yɛiui da mbɛpi, nɛ di huɛc'a rá hmu. Dami xänba na ram hma, nɛ thocpa thoho gui bɛnba u.

399 1 TIMOTEO 6

Xun ngu dí tạhmbu nangue rá 'bɛfi Oją nguetho i hurca ma mbuihu

³Pɛ i 'bʉ'i 'da yʉ xänbate n'dan'yo ram hma in xänbate, ne hin din theui a rám hma ma Hmuhu ra Jesucristo ngue majuani di zerca ma mbuihu, ne hin din theui a ram hma ga däp ma mbuihu Oja. ⁴Pε nu'u, bi u't' yú mbui nangue ran 'yɛts'i, nɛ nte i padi. Nɛ ɛmmɛ honi di dunba yum hma guepu i fupu ran ts'eya, ran heque, ran ts'ante, ran t'u't'ate, 'be'a gätho im ben rá mbui. ⁵Ne nu'u thocpa tho din sui n'da ngu n'da u, gue'u bin ts'on yún 'yomfeni, ne hingui sä da badi ndana a majuani. Ne im beni xun ngu ra mbeti da daha nangue rá 'befi Oja. Pe o guí øhmbu a i man u. ⁶Pe majuani xun ngu dí tahmbu nangue rá 'bɛfi Oja, i hurca ma mbuihu, ne dí 'bumanhohu nangue Oja. ⁷Nguetho nte bá hạhu 'bʉ mám 'buhmbu ua ja ra ximhäi, ne nte da zä ga haxhu 'bu bi zøn ra pa ga tuhu. 8Pe hin da du ma mbuihu 'bu zí ts'utho dí pes'hu yun ts'ihme nε yu he. ⁹Pε nu'u to'o in nde dim membeti, hingan ts'ärpu thoho da thät'i da 'yøt'a ra ts'oqui. Ne tengu'bu da mba nthu't'i rá mbui, ne man'da man'da nin xandi 'be'a gätho da ben rá mbui. Pe ndetho din unbazehe, ne din tonto rá mbui 'be'a gätho honi, ne gue'u yun t'øt'e ní zo bu ja ram 'bedi. 10 Nguetho nu'bu 'bu a n'da emme in nde ra mbeti, gue'a ní mbudi gätho yu ts'oqui bu rá mbui a. Ne nu'a ní ho ra mbeti u 'da, bi 'uepu rá 'yu Oja, ne di unba zehe rá mbui nangue ra dumbui.

I øt' ra hogatuhni nangue Oja a ra Timoteo

¹¹Pε nu'i gra Timoteo, rá mbεfi'i Oja, dami 'uegue nangue yun ts'o i mangua. Pe gui hyumbi gui ten'na ran ho, ne hønt'a Oja guim beni da mbäx'i'i, ne gui huec ni mija'ihu, nε hin gan xømbui, nε din ja ni yembui. 12 Xun ngu yu ja'i bi 'yø 'bu gmím ma xun ho ni t'ec'yei. Nε ngutho ya gui hyut'anzambui gui taha, tengu'bu n'da ra dofui i hät yun unbi ngue da dah ran sui. Janangue'a da zä guim bent'i xun ho a ra te ma'da'yo, gue'a í zon'na a. 13 Ne guim beni Oją in nu i, nu'a di un yú te 'bɛ'a gätho i 'bui. Janangue'a gui hyut'anzambui nε hin gui su nin date. Nε in nu'a ra Jesucristo ngue bi ma xun ho a majuani 'bʉ mí mba ma däpi ra Poncio Pilato. ¹⁴ Janangue'a dí xi'i, jats'editho gui ja'ts'i gätho ra 'befi bin 'da'i, nte gui ts'oni, nε njon da man ran ts'o nangue'a buya. Ne gue'a gui 'yøt'a ya, gue'bu go bi zøn ra pa di nequi ma Hmuhu ra Jesucristo. ¹⁵Nguetho nu'bu bi zøn ra pa nts'änni, Oja ba penhua ra Cristo mahøn'a. Ne nu Oja mixte xun hotho, ne emme di johya, ne i 'dase ngue di manda. Ne nu'a Oja ra ts'ut'abi xinda gue gätho mi'da yu ts'ut'abi 'bui, ne nu'a ja rá ts'edi xinda gue gätho mi'da ja yú ts'ɛdi. ¹⁶Ne hønt'a Oja njam'bu da du. Ne emme di nec thoho hapu bí 'bui, njon da zä da hyäm bu, ne njongui sä da nu Oja. Nu'a ɛmmɛ i t'ɛspi nɛ da 'yuh rá ts'edi mazai. Ne hønt'a gam bemhbu a ya. 17 Dami xi'u yu mεmbεti 'yεc'yεi, ngue'u to i ja yú

1 TIMOTEO 6 400

mbeti ua ja ra ximhäi, dami xifi hin din 'yets'i, ne xín da beni di muui yu mbeti, nu'u ts'urpu thoho dim 'bedi. Pe dami xifi hønt'a Oja da beni, ngue di muui xun ho, ne da badi bi nexpu 'bu Oja gätho xun ho di pes'hu, ndeju dan johyahu. 18 Pe dami xifi da 'yøt' ran ho, ne man'da tengu'bu gue'a na membeti u buya. Ngue hin din 'yuya pe da gomhbu yu ja'i 'be'a pe'ts'i. 19 Ne nu'bu din jabu ga øthu, ga pes'hu 'be'a majuani di muui, ne ga nuhu xun ngu ran japi Oja 'bu bi zøn ra pa, ne

majuani dam 'bumanhohu gatho yu pa mazai.

N'da ran zofo ran zegui

²⁰Nu'i gra Timoteo, dami jamansu xun ho ra 'bɛfi nangue rám hma Oją bi 'da'i. Nɛ dami 'uegue nangue'u yum hma εmbi ní din ran 'yomfɛni n'da, pɛ hingui ho u. Säti thoho, nɛ n'dan'yotho ra 'yu i ut'a n'da. Nɛ nu'u to'o bi dɛnni, bi 'bɛh rá 'yu Oją. ²¹Nɛ nuya Oją di 'da ahu rá mate. Nɛ hønt'a dí xi'a va.

2 TIMOTEO

Ná yoho ra søcuą bi 'yorba ra Timoteo a ra Pablo

Ran zengua

Nugä dra Pablogä, Oją bi zänni ma 'bäi'be a ra Jesucristo, ga xih yu ją'i a bi mam majuani Oją, ngue di un ra temazai u to di däp yú mbui ra Cristo Jesús. ²Dí pɛn'na ra søcuą gra Timoteo, dadí huɛc'a'i tengu'bu ma ts'unt'u i. Nɛ dí äp Oją ma Tahu di 'da'a rá mate nɛ rán huɛcate nɛ da hyut'a ni mbui, nɛ ra Cristo Jesús ma Hmuhu.

Ra Timoteo da ma ran ho ma'da'yo nangue ra Jesucristo

³Dí ɛmbä jamadi Oją 'bu dím bɛn'i, ra xui nɛ ra pa thocpa thoho, nguetho dí padi guí ɛc'yɛi xun ho tengugä, ngue dá øt'ä ra 'bɛfi bi 'dacä Oja, nɛ ngutho mi øt'u mam bombøtahe 'bu maya'bu. ⁴Dím bɛn'i gán zom 'bu mán xummi, nɛ bi däh ni guidä. Nɛ ɛmmɛ dín nde ga nu i mahøn'a, nɛ din jagä ran johya xun ho 'bu ga nu i. ⁵Dím bɛn'i ngue hingui yoho ni mbui. Pɛ guí ɛc'yɛi xun ho, tengubu na 'yɛc'yɛi ni ndømbe ra Loida nɛ'a ni mbe ra Eunice. ⁶Janangue'a dín nde'e thocpa tho guim bɛni bi 'da'a

rá ts'edi Oja 'bu má cäx ma 'ye bu ni ya, ne dí xi'i gan ehya gui 'yøt' rá 'bɛfi Oja bi 'da'i. ⁷Nguetho nu'a rá Hogandahi Oja bi 'daju hin di jaju dan suhu, pe di jaju ga huthu ran zambui, ne dan hueju n'da ngu n'daju, ne ga sam zehe ma mbuihu. ⁸Janangue'a o guí pɛs' ni sä gui mamp'a rám hmam ma Hmuhu, ne o guí su ngue dí ofädigä nangue Oja. Pe ne'i dami hyät'i gui set yun unbi tengu thohoga, nangue rám hman Oja guí øt'e. Ne Oja da mbäx'i'i. 9Ne bi yanju Oja ne bi mberca ma mbuihu, ne nubuya bi xiju ga ørpahu rá 'bɛfi. Pɛ hin í yanju a rá 'befi Oja dí øthu, pe bi yanju 'bu má hamhbu rá mate. Ne gue'a bi zän zehe Oja 'bu him maní 'yøt' ra ximhäi, ngue da yanju ra Jesucristo. ¹⁰Nuya bi nequi a mán ts'änni, ngue bi nequi ma yantehu ra Jesucristo, nu'a bi dap rá ts'edi ran date, ne bi jaju dán 'yohu rá 'yu ra te mazai. Ne gue'a i xiju rán ho ma'da'yo ra Cristo. 11 Ne gue'a ram hma dá mangä, ne bá 'bengä, ne gue'a ram hma dá xänba u yu ja'i hing yu judío. 12 Janangue'a dí sägä ran unbi ya. Pe hin dí pes' ma sä,

nguetho dí pacä a to'o dí ec'yeigä, dí padi i ja rá ts'edi da mbesca ma tegä ngue dá däpi, ga pømanho 'bu rán zegui. ¹³Ne nangue ran ho ma'da'yo dá xän'ni'i, dami thoqui gui 'yɛc'yɛi ra Cristo Jesús nɛ dami 'yøt' ran huɛcate bi 'da'i. 14Nɛ dami jamansu ran ho ma'da'yo i 'yo ni güenda, nangue rá Hogandahi Oja i 'bupu mbo ma mbuihu. ¹⁵Guí padi gätho bi 'ue'u yu cu ngue yu mengu bu Asia, bi 'uegue nanguecä, nε ra Figelo nε ra Hermógenes. ¹⁶Pε nu'u gätho 'bupu rá ngu ra Onesíforo, Oja dí jap'u. Nguetho nu ra Onesíforo xun ngu yu nidi bi mbäxcagui, ne him bi mbes' rá sä nangue yu cadena i thurcä. ¹⁷Nɛ nu'bu mi zøcua Roma a, emme bi hyongui nε bi dịngui. ¹⁸Nu ra Jesucristo di japi xun ho 'bu rán zegui ra pa, nguetho nu'bu mám 'bupu Éfeso, ne emme xun ngu 'be'a gätho bi 'yørpu ngue bi mbäx rá 'bɛfi Oją bu a. Nɛ man'da guí pądi xinda guecä.

Ra hoga dofui nangue ra Jesucristo

Pɛ nu'i tengu'bu ma ts'unt'u i, gra Timoteo, dami hya ra ts'ɛdi nangue rá mate bi 'da'a ra Jesucristo. ²Nu ram hma gá 'yøde dá mangä, nɛ xun ngu'u i man'a majuani. Nɛ n'dat'a ram hma gui thocpa ra 'bɛfi mi'da yu hocja'i, gui huan'ndu to'o da zä da xänba u mi'da. ³Dami hyät yun unbi tengugä, nguetho gra hogadofui nangue ra Jesucristo. ⁴Nu ra dofui hingui sä xtán hɛti rá mbui, ngue xun ngu mi'da 'bɛ'a gätho da 'yøt'e tengu mi'da yu ja'i thoho, janangue'a da zä da 'yøt'a i

numanho rá hmu ngue bi cu't' ran dofui. 5Nu'a to'o nde da dah ran t'ɛni, pε hin da dą 'bu hin da 'yørpa yún t'edi a ran t'eni. 6 Nu'a to dim pepu ja ra häi da zi a rá mbudi din ja, janangue'a da hyumbi da 'yøt' rá 'bɛfi, ngue da bạdi rá mbʉdi i tạse rá 'befi nangue rá mbui zehe. ⁷Dami padi 'be'a dí xi'i, Oja di 'yomfeni'i ngue 'be'a gätho gui 'yøt'e. ⁸Thocpa thoho guim bɛni i 'bu'a ra Jesucristo ya, bi dambεni 'bu mi du, ne nu'a n'da rám bom'beto ra David. Ne gue'a ram hma dí mangä a. ⁹ Janangue'a dí sä ran unbi ya, ne dí ofädi, tengu'bu drá ts'om'bäigä. Pε nu rám hman Oja hingui ofädi a. 10 Ne dí hät'i dí thocă a ra 'bɛfi, madague'bu pa ma unguigä, dín ndepe ne'u dim pø u to'o gätho nthahni. Ne ga comhbu rá ts'edi mixte a ra Cristo, gätho yu pa mazai. ¹¹ Majuani a ram hma, ngue

> Nu'bu dím bɛmhbu tengutho 'bu 'darbu xcamá tuhu ra Cristo, da zä 'darbu dam 'buhmbu 'bu.

¹² Nɛ nu'bu dí häthu yun unbi, pɛ 'darbu ga comhbu bu ja rá ts'edi 'bu.

Pε nu'bu dí cømhbu a ra Cristo, nε'a da gønju a.

13 Nu'bu hin dí ɛc'yɛihu gue majuani a, pɛ guexta'a majuani a,

nε gätho da 'yøt'a bi ma da 'yøt'e.

Oja da numanho ra hogambefi

¹⁴Dami bɛnba u bí 'bupu nanguehya yum hman ya, nguetho in nu Oja u. Gui xifi hin din junt'i

nangue yɨm hma. Nguetho säti tho 'bu din junt'i, ndetho di u't'u to'o i øde. 15 Nε gan εhya gan xädi nguetho gra hogambefi nangue a ram hma majuani. Damin 'yomfeni gui hyoni 'bɛ'a nam bøni n'da ngu n'da ram hma, ne gui pądi 'be'a pε u n'da ngu n'da yum hma, nε gui pepi xun ho. Janangue'a da numanho Oja a guí øt'e, ne hin gui pes' ni sä. 16 Ne gui 'uegue nangue yum hma säti thoho, nguetho nu'u hingui ho u, ne di japi emme din ts'om'bäi n'da. 17 Ne nu'u yúm hma, tengu'bu ra sasi din ndoqui, nε da 'ya rá ja'i n'da. Ngue tengu Fileto. ¹⁸Nu'u bi 'uegue nangue ram hma majuani, ne sä en'u ya bin ja ngue ya xun dambeni u yu 'yec'yei i 'bui. Janangue'a bi pärpa yú t'ɛc'yɛi u 'da. ¹⁹Pε nu rá 'bεfi Oja i ørpa yu 'yec'yei, hin da zä dim 'bedi, nguetho di jamansu u yú t'uhni Oją. Ne nu'u yú t'uhni Oją, ngue i man rá thuhu ra Cristo, i jatho da 'uepu ja ra ts'oqui. ²⁰Nε nuju dyu 'yɛc'yɛihu, dí øthu tengu'bu dyum pefihu bu ja rá ngu Oją. Ne tengu'bu xun ngu yum pefi bí ja bu. Nu'u 'da yu oro, ne yu t'axi, pegue ra za u 'da, ne ra jahäi u mi'da. Nu'u 'da ɛmmɛ pa nthoni, nu'u 'da hin ε mahyoni. ²¹Nu'bu n'da ra ją'i da 'uese bu ja ra ts'oqui, da gohi xun ho, tengu n'da ram pefi i pa nthoni, da mba ma jamansu, nε da zä di pεpi xun ho rá hmu bu ja rá ngu. ²² Janangue'a dami 'uegue nangue yu ts'oqui di ho yu ts'unt'u, pe gan ehya gui 'yøt' ran ho in nde Oją. Nε gui hyą ra ts'εdi nangue guim ben Oja, ne din ja nin

hugcate, ng n'dat'a guim bembbu u gä mi'da i ęc'yei Oją, nangue'u m'be't'e yú mbui. ²³Nε gui 'uetho nangue ran junt'i im man'u to'o hin din 'yomfeni, nguetho ja guepu da mbupu n'da ra sui. 24 Pe nu yú 'yehe ra Hmu hingui sä din sui, pe din ja yú yembui nangue n'da ngu n'da θ, nε din şhya din xänbate, nε da hyät'i xun ho 'be'a da t'ørpe. 25Ne nu'bu 'bu'a n'da n'dan'yo im beni, jante thoho gui 'yuti, xøhma tho Oją di japi di päh rá mbui, da zøni da ba a majuani. ²⁶Ne da din ran 'yomfeni xun ho buya, nguetho da yani nangue rá 'dihi ra zithu xí bent'i, mín nde a ra zithu xtá 'yørpa rá pähä.

I jatho dam fähmbu nangue'u yu ts'om'bäi

Nu'i Timoteo, dami padi 'bɛ'a din ja. Ba gpu yu pa xun hgi, nguetho dim 'buh yu ts'om'bäi. ²Nguetho din huɛc zɛhɛ, nɛ hønt'a ra mbeti da nde. Ne ná yąt'a, ne din 'yezehe, ne din sante, da mbesta'a 'bε'a i xih rá ta nε rá mbe, nε hinguim ben ra mate bi t'ørpe, ne hingui numansu Oją. ³Ne hin din ja yɨn huṣcate, nɛ njam'bɨ din hoh yú mbui, ne hønt'a go 'be'a da xih yú mija'ihu, ne øzehe yú pähä zehe, nε njo'o to i su, nε i san'ʉ i øt' ran ho. ⁴Nε yu zandatetho, nε hingam 'bε din 'yomfɛni 'bε'a da 'yøt'e. Nε mbeni ma guese, ne di ho rán johya ra ximhäi xinda gue rá pähä Oja. ⁵I ja yún t'øt'e tengu yú t'ɛc'yɛi, pɛ hingui nde da hyan rá ts'edi Oja u. Pε gui 'uegue nangue'u. ⁶Nε i pa bu ja yu ngu, i hät' yu xisu, i xifi 'da'angu da 'yøthu ngue'u yu

xisu hinguin zaqui yú mbui, ngue'a xun ngu yú ts'oqui i tu. Nε man'da ní ts'ixpu ja ra ts'oqui. ⁷Ne da 'yømanho 'bɛ'a gä ním hma da sifi nε thocpa tho din xädi pε njam'bu da ba a majuani. 8 Tengu mi øt'u ra Janes ne ra Jambres, ngue'a mim badi u, ne midín suhmbu ra Moisés, ngue rá pøngahya Oja. Ne ngutho i øt' yun 'yohu ya, din suhmbu a ram hma majuani. Ne bi ts'on yún 'yomfeni, ne bim 'bedi nangue'a ra 'yu majuani. ⁹Pe hingui ngu yu pa da hyät'i, nguetho gätho da t'uti nte ní mbat'u yúm hma, tengu bin jap'u yu badi ngue ra Janes nε ra Jambres.

Rán zegui ran zofo

¹⁰Pε nu'i Timoteo, gá tεnni 'bε'a dá xän'na'i. Ne guí padi 'be'a dám 'bucä, ne guí padi hanja dá øt'ä a. Guí padi 'be'a dí ec'yeigä, ne gán nu njam'bu dán xømbuigä. Ne guí padi ja man hugcate. ¹¹Ng guí padi şmme bi mba ma ugui, ne gán nu 'be'a mán unbi dá hät'ä. Ne guí padi 'be'a gätho dá thocä bu Antioquía, nepu Iconio, nepu Listra, ngue nu yun ucpi dá nugä. Pe Oją bi yangui nangue gätho u. 12 Ne majuani dí xi'i, to'o gätho da nde n'dat'a ra Cristo da denni, da mba ma ucpi u. ¹³Nu yu ts'om'bäi ne yu hyäte, man'da man'da xun ts'o 'be'a da 'yøt'e. Νε 'da xtín hyäthoho. ¹⁴Ρε nu'i, dami thoqui 'be'a gán xädi, guí padi gue majuani a, gue guí padi to'o bi xän'na'i. 15 Ne gue'bu go gmín t'uhni, gá pah rá t'ohni Oja, i ja rá ts'edi bi ben'ni'i gá däp ni mbui ra Jesucristo, ne gán yani. ¹⁶Gätho rá t'ohni Oja bi benba Oja

nangue rá mbui to'o bi 'yo't'i. Nɛ mahyoni di jaju ga pahmbu 'bɛ'a rán 'yomfɛni Oja, nɛ da xiju 'bu hinga gue'a dí øthu, nɛ gue'a dí pärca ma mbuihu a, nɛ da xängahu ran ho ga øthu. ¹⁷ Janangue'a nte di 'bɛ a rá mbɛfi Oja, da zä bu da 'yøt'e 'bɛ'a gätho xun ho.

Janangue'a dí xi'i gra Timoteo, Oja in nuju, ne ra Jesucristo, nu'a i jatho ba pengua da 'yøt' ran ts'ut'abi, di juanba u 'bui ne'u xun du. In nuju, janangue'a emme dí xi'i: ²Dami mamp'a rám hma, emme gan ehya guim ma, hønbu go hapu ne hønt'a go ní ora, pe guehma gui xifi n'da ngu n'da yu ja'i. Dami hecpa yu dadits'oqui, japi da 'yɛ'ts' yú ts'oqui, nɛ gui zɛrpa yú mbui buya. Νε jante thoho gui xänbi ne hin gan xømbui. ³Gui hyumbi nguetho ba epu yu pa njon da nde da 'yø'a ram hma di hocpa yú mbui, pegue da zonh'nu mi'da yu xänbate, da man u 'da yum hma man'da di hose. ⁴Da goh yú mbui nangue'a majuani, ne da den'nu yum hma him majuani. ⁵Pε nu'i thocpa thoho gan 'yomfeni xun ho. Dami hyät' yun unbi, dami ja'ts'i xun ho a ni 'bɛfi, nangue rán ho ma'da'yo ra Jesucristo. ⁶Ne nugä, mi ts'utho da zøn ra pa da guah ran t'unni nangue ma te dadí un Oja, da zøn ra ora ga pøngä ua, ngue ga tu. ⁷Bi gua a ran tạha dá øt'ä ya nangue'a ran taha xun ho, nε bi gua a ra 'dihi dá øt'ä. Dá jamansu ma 'bɛfi nangue ma t'ɛc'yɛi dá øt'e. ⁸Ne nuya bí jabu a ran ho di 'dacä ra hoga Inspector, ngue rán theui a ran ho dá øt'ä. Νε di 'dacä 'bʉ bi zøn ra pa. Ne hinga høngdä, ne

gätho u mi'da gue i xønni ba ɛh ra Hmu, nɛ'u gätho din t'un ran ho u.

Bi mba ma benbi ra Timoteo

⁹Nε nu'i, Timoteo, dami 'yøt' ra ts'edi gua ecua n'dihi. 10 Nguetho nu ra Crescente bi mba bu Galacia, nε ra Tito bi mba bu Damacia. nu'a go ra Demas bi mbase bu ra hnini Tesalónica, ngue bi ho ra ximhäi in nu ya. 11 Hønt'a ra Lucas dí 'bu'be ua. Bá si a ra Marcos 'bu guá ehe, nguetho ga hongua a. 12 Ne dá penh pu ja ra hnini Éfeso a ra Tíquico. 13 Pε nu'bu guá εhε, gua cangui ts'u ma coto dá sopu Troas bu bí 'buh ra Carpo, ne'u ma libro gua cangui ts'u, pe man'da jats'edi gua canga yu søcua hinga nt'o't'i. ¹⁴Nu ra Alejandro ra 'yøt'acobre, xun ts'o 'be'a bi 'yørque. Oja di cospi nangue yún t'øt'e. 15 Damim fädi hin da 'yøt'e'e tengu bi 'yørcä, nguetho εmmε bi gorca ma nde 'bu mán ya. ¹⁶Nu'bu rá mbudi bi mba ma juangui njom bi mbäxcagui, pe gätho bi hyega thoho. Oja di punba

u. ¹⁷Pɛ Oją dám 'bä'be nɛ bi zɛrca ma mbui, janangue'a dá ją'ts'i dá man'a rám hman bu bí 'bu'u hing yu judío. Nɛ Oją bi mbäxqui bi yangui nangue yú nde yu zate. ¹⁸Nɛ Oją da yangui nangue gätho 'bɛ'a xun ts'o, nɛ 'bex da zixca bu mahɛts'i bu di manda. Ga ɛspahu Oja gätho yu pa mazai. Nɛ hønt'a gam bɛmhbu a ya.

Yun zengua rán zegui

¹⁹Dami zɛnguagui ts'ʉ ra Prisca, nɛ'a rá ndø, nu'a ra Aquila, nɛ'ʉ 'bʉpʉ rá ngu ra Onesíforo. ²⁰Nu ra Erasto bí copʉ Corinto. Nu'a ra Trófimo dá sopʉ Mileto ngue xʉn ʉ. ²¹Dami 'yøt' ra ts'ɛdi gua ɛ 'bʉ hin ní yʉt' yʉ pa xʉn sɛ. I pɛnh'na ran zɛngua gätho yʉ cu i 'bʉcua, nu ra Eubulo nɛ ra Pudente, nɛ ra Lino, nɛ ra Claudia, nɛ gätho mi'da yʉ cu 'bʉcua, gätho i pɛnh'na ran zɛngua. ²²Nu ma Hmuhʉ ra Jesucristo da mbäx'a ni mbʉi, nɛ di 'da ahʉ rá mate Oją. Nɛ hønt'a dá xi'a ya.

TITO

Ra søcuą bi 'yo't'a ra Pablo bi mbenpa a ra Tito

Ran zengua

Nugä drá Pablogä, dí pen'na ra søcua i ja ua grá Tito. Nugä rá 'yehegä Oja, ne ma 'bäigä'be ra Jesucristo. Ga zedi da 'yec'yei u bi huan Oja, ne da ba a ram hma majuani, janangue'a da 'yøt' ran hocją'i nangue Oją. ²Guehna dí øt'ä nguetho dín ndep u ga comhbu ra temazai ngue bi ma majuani Oja 'bu rá mbudi ra ximhäi. Ne nu Oja hingui sä da man ra fehni a. ³Ne nuya bi zøn ra pa ngue bi ts'änni da hman ran ho ma'da'yo, ne bi 'dac man t'ɛdi gam mangä, ngue guesε Oją ma yantehu. ⁴Nε nu'i Tito, tengu'bu majuani ma ts'unt'u i, ngue dá ja i gá 'yεc'yεi. Nε dí äp Oją ma Tahu di 'da'a rán jąpi nε rán huεcate, nε da hyut'a ni mbui, nε ra Jesucristo ma Yantehu.

I pa nsifi ra Tito 'bε'a da 'yørpu Creta

⁵ Janangue'a dá soc'a bu ja ra häi Creta, ngue gui juadi hapu di 'be'a ra 'befi. Ngue gui huan'ndu yu ngurbi n'da ngu n'da yu hnini bu guí 'bui, ngue nu yu ngurbi nangue yu 'yɛ̞c'yɛi, tengu dá xi'a

mam'bɛt'o. 6Gui huan'ndu to'o nte ma ts'oqui i thinbi, nu'a n'datho rá xisu i si, ne nu yú t'uhni bi däp yú mbui Oja, nε hingui øt'a n'da ran tonto, xinga gue ram fe'ts'i i øt'u yú t'uhni, janangue'a njon di yapi. ⁷Nguetho nu yu ngurbi i 'yo yú güenda a rá 'befi Oja. Janangue'a da thahni to'o hingui øt' ran ts'o, nu'a hin din 'yɛzɛhɛ, nɛ hin din cuɛ, nε xín dim mihni, xín din ndesui, xín din siyate ngue ra mbeti. ⁸Ne da thahni to'o di säyaba yú mija'ihu bu ja rá ngu, nε di ho 'bε'a gätho xun ho. Ne din 'yomfeni ts'u, ne 'da ni hugethoho gätho, ng da numansu Oja nangue n'da ra hogambui, ne i samzehe rá mbui hin din tonto. ⁹Ne din zam bu ja ram hma majuani, nangue ram hma dadín xähmbu, janangue'a da zä da xänba u bí 'bupu, da mbäts'i. Ne nu mi'da bí 'bupu, ngue'u di ucpa rám hman Oja, di benbi hapu di 'be'u, janangue'a da 'yɛc'yɛi. ¹⁰Nguetho nu'u to'o im ma da 'yøthoho yun t'øt'e mi xi Oja yu judío maya'bu, i jatho da mba ma hɛcpi u. Nguetho nte ní mbat'u yúm hma u, ne i häte u, ne i øt' yú pähä zehe. ¹¹Ne

407 TITO 1, 2

hønbu go hapu i curpu ja yu ngu, i u't'u gätho i 'bupu, nangue yúm hmanse yu hyäte, ngue hingui sä da hma. Ne hønt'a ra mbeti in nde. ¹²Nɛ i øt'e tengu mi man'a n'da yú mengu zehehu bu ra häi Creta, ngue n'da ra basøcua, bi ma: "Zai yu ndøbethani u ma menguhe ua, ne tengu yu zate ngue xun ts'o øt'u, ne hønt'a da zi i honi, ne εmmε i danhyεi," bi 'yεna. ¹³Νε majuani bi man'a n'da yú menguhu. Janangue'a gui hecpa u, n'damhma da bømanho yú t'ɛc'yɛi u i 'bupu. ¹⁴Νε gui xifi hin da 'yεc'yεibi yúm hman se u yu judío, ne xín da numansup yú t'ec'yei se yu ja'i, gue'u hinguin nde da 'yøt'a majuani. ¹⁵Nu'u to'o xun ho yú mbui, hønt'a xun ho im beni, pe nu'u to'o hin bi däp yú mbui Oja ne xun ts'o yú mbui, nu'u, hin'yu 'be'a numanho u. Nguetho bin ts'on yún 'yomfɛni, nε him bi zä bi 'yø'a bi xi Oja 'bʉ mi zop yú mbui. 16 Ne nu'u yu ją'i tengu u, ęna ngue i ęc'yei Oją, pe n'dan'yo thoho yún t'øt'e, guepu ní fadi hingui ec'yei u. Ne xun ts'o yú mbui nangue'a festhoho 'be'a sifi, hingui sä da 'yøt' ran ho.

Ra Tito din xänbate nangue ra hoganxädi

Pɛ nu'i gra Tito, dami xänbi 'bɛ'a nín t'øt'e rán thɛui a ra hoganxädi. ²Nu yu zí ndø, dami xifi hin din iti, nɛ da 'yøt'e ngue da hnumansu, nɛ da bɛni xun ho 'bɛ'a da 'yøt'e, nɛ da 'yɛc'yɛi xun ho, nɛ da 'yøt' ran huɛcate, nɛ hin din xømbui. ³Nɛ'u yu zí bømbe, dami xifi da numansu Oja hapu din 'yo, nɛ njon di c'aman'u, nɛ xín dim

mihni, nε da 'yuh ra hoga'yu. ⁴Nε nu yu zí bømbe da xänba yu hmute di huge yú ndø ng yú t'uhni. ⁵Ng da xänba n'da ran 'yomfeni xun ho, hin din 'yomt'ɛni, nɛ di jamansu bu ja yú nguse, din ja ra yembui, ne da 'yøt'a da xih yú ndø, n'damhma njon da zä da man ran ts'o nangue rám hman Oja. 6Ne nu'u yu ts'unt'u, gui xifi din 'yomfenise ts'u. ⁷Ne nu'i Tito, dami 'yut'u mi'da 'bɛ'a gätho guí øt'e, ngue dim 'bumanho. Ne n'dat'a guim beni ngue gui xänbi 'bɛ'a majuani, nɛ gui 'yøt'e ngue da hnumanho'i 'bu guín xänbate. ⁸Ne emme xtán ho 'be'a gätho guim ma, n'damhma nte da thin'na nim hma. Ne da mbe'ts' yú sä to'o nde da zuju, ne hin hapu dí mbu'a 'be'a da ma. ⁹Ne'u yu 'yehe i 'bupu, dami xifi da 'yøt'e gätho i xih yú hmu, nε hin da dati, nε mpähä thoho da 'yøt'a i sifi. ¹⁰Ne hin da bepi 'be'a pε'ts' yú hmu, pε da 'yøt'a gätho in numanho yú hmu. Νε nu'bu gätho din jabu da 'yøt'e, gue'a dí necmanho ram hma nangue ma yantehu Oja. 11 Nguetho bi nequi rá mate Oją ngue in nde di pø'u gätho 'bʉcua ja ra ximhäi. ¹²Nɛ nu rá mate Oją di bengahu ga hehmbu ran ts'om'bäi, ne ga hehmbu ma pähä zehehu. Ne di bengahu ga samzehe ma mbuihu ne ga øthu ran hocją'i, ne gan numansuhu Oją gätho yu pa dí 'buhmbu ua ja ra ximhäi. 13 Ne di bengahu ga tømhbu ja gue'bu bi nequi a ran johya dí tømhbu, ngue di nequi a ma Ojahu ra Jesucristo tate tho rá ts'edi, ne ma yantehu a. ¹⁴Nε bin däsε a ngue di 'bercahu gätho man ts'om'bäihu, nε da mberca ma mbuihu, da 'vøt'e

TITO 2, 3 408

ngue yú t'uhni zehegahu Oja, ne di ehyagahu nangue ran ho ya. ¹⁵Ne guehna i ja ua gui xänba buya. Dami xänbi, gui 'yomfenip yu cu, ne gui hecpi, nguetho bin 'da'a ran t'edi xun ho gui 'yøt'e. Ne o guidí japi da mbesta'a nim hma.

I sih ra Tito nda'a nín zofo da xänba yu 'yec'yei

Ne nu'i gra Tito, dami benba u yu cu ngue da numansu ra ts'ut'abi, ne'u yúm fäts'ihu ra ts'ut'abi gätho da numansu. Ne hin da 'yørpa ram fe'ts'i, pegue mpähä thoho da 'yøt'e 'bɛ'a gätho xun ho. ²Ne gui xifi njon ga c'aman'uhu, ne hin dan junthu, pε ma pähä zεhεhu da thącpahu. Ne din jaju ra yembui nangue gätho yu ją'i. 3Guim bemhbu ngue neju dán tontohu mám'bet'o, ne mi jase man t'edihu, neju dán hyäzehehu, ne gätho dán 'yɛhɛhu rá ts'oqui ra ximhäi. Nε dá 'bεh ma pahu nangue man ts'om'bäihu dá øthu, ne dá seyabahu ma mija'ihu. Mí ts'anju nε xim mí santehu. ⁴Pε bi zøn ra pa bi nequi rá mate Oją ma yantehu, ngue bi 'yørpa ran hugcate u yu ja'i. ⁵Nε bi yanju Oja. Pε hin nangue yun t'øt'e xun ho dá øthu, pε bi yanju nangue rán hugcatese 'bu má ømanhohu a. Bi 'daju ra 'da'yote 'bu mi mberca ma mbuihu, nε dí 'buhmbu ma'da'yo nangue rá Hogandahi. 6Ne bi 'daju xun ho rá Hogandahi n'youi xun gu rán japi nε rá ts'εdi nguetho ra Jesucristo ma yantehu a. 7 Ngue bi hogahu nangue rá mate, janangue'a 'darbu dam 'buhmbu nangue ra temazai, nε gue'a dí tømhbu a ya. ⁸Νε

gätho majuąni na im mangua. Gui hyah ni mbui gui xanbi xun ho yu 'yɛ̞c'yɛi 'bʉpʉ, janangue'a da bɛ̞ni εmmε da hyumbi da 'yøt'a ran ho. Nguetho xun ho a, ne da mbäx yú mija'ihu buya. ⁹Pε o guidín junthu nangue'u yum hma nte ní mbatho, ne hinguin junthu nangue 'be'u yú thuhu u yum bombøta maya'bu. O guídín suhmbu nangue yun t'edi midí un Oja yu judío, nguetho säti thoho 'bu dán suhmbu u. 10 Nu'bu 'bu a n'da n'dan'yo yum hma im ma ní dup'ahu yun junt'i, dami hecpi. N'dandi o yondi gui hecpi. Pe nu'bu hin da 'yøde, gui hyethohu a. ¹¹Nguetho nu'a xi'ahu yum hma ní dup'ahu yun junt'i, xí bøm bu ja rá 'yu Oją a, ne øt' yu ts'oqui, ne da nuse bu 'be'a xí 'yør buya.

Man'da i xih yú amigo ra Pablo

¹²Dí ena ga penhna ra Temio o gue ra Tíquico. Nu'bu bi zøm bu, 'yørqui ts'u ra mate gua ε'a n'dihi, dan c'at'ui bu ra hnini Nicópolis. Nguetho dín nde dam 'buhmbu bu 'bu bin ja yu pa xun se. ¹³Dami fäts'i xun ho a ra Zenas, nu'a im pøngahyą nangue yʉn t'ɛ̞di. Nɛ'a ra Apolos, dami zedi da din'a mahyoni ngue da hyax 'bu bi mbe bu n'danni. ¹⁴Nguetho nu yu cu da badi ngue dim pefi xun ho nangue yú 'befi zehe, n'damhma da zä da mbäx u mi'da di 'bɛ'a mahyoni. ¹⁵Dami zengua gahe ts'u u bí 'bupu, ngue'u ma mi 'yɛc'yɛihu, ngue 'da xtán hugctahu. Ng dí äp Oja da 'yɛnts'ahu rán japi gätho ahu. Nε hønt'a dí xi ahu ya, nε hønt'a gam bemhbu a ya.

FILEMÓN

Ra søcuą bi 'yo't'a ra Pablo bi mbenpa a ra Filemón

Ra Pablo bi 'yorba ra søcua ra Filemón

¹Nguä drá Pablogä dí ofädigä nangue ra Cristo Jesús. Dí ot'ä'be ra søcuą ra Timoteo, nɛ ga pɛn'na'be ma amigo'a'be grá Filemón, man 'yohu i nangue rá 'bɛfi Oją. ²Nɛ dadí zɛngua'be yu 'yɛc'yɛi ngue zại dim pɛti bu ni ngu, nɛ ma cuhu ra Apia. Nɛ dadí zɛngua ra Arquipo man 'yohuhu dín yamhbe rá 'bɛfi Oją. ³Nu Oja ma Tahu nɛ ma Hmuhu ra Jesucristo di 'da'ahu rá mate nɛ da hyut'a ni mbuihu.

Rán huεcate nε rá t'εc'yεi ra Filemón

⁴Nε nu'i ma zu cu mahuɛqui i, nu'i grá Filemón, dadí undä ra jamadi nangue'e nu'bu dí ya'be Oja. ⁵Nguetho dá øde 'bɛ'a guí ørpu guí 'buhmbu, ɛmmɛ i ja nin huɛcate nangue yú t'uhni Oja bu. Nɛ dí øde ngue i ja ni t'ɛc'yɛi xun ho nangue ra Jesús ra Hmu. ⁶Nɛ dí äcä rá ts'ɛdi Oja ngue xun ngu yu ja'i da 'yɛc'yɛi ra Jesús nangue nim hma, nɛ da hyani 'bɛ'a gätho ran ho di 'daju ra Cristo Jesús. ⁷Gueczɛhɛgä ɛmmɛ dadí johya, nɛ i hu ma mbui

nangue nin huɛcate, ma zʉ cu i grá Filemón. Nguetho xʉn ngu gá hyurpa yʉ́ mbʉi yʉ́ t'ʉhni Oją.

Bi t'äp ra mate ra Filemón nangue rá 'yɛ̞hɛ̞ ra Onésimo

⁸Nuya madague a i ja man t'edigä nangue ra Cristo ngue xcá manda i, ⁹pɛ man'da xʉn ho ga ä'a n'da ra mate tho gui 'yøt'e nangue ran hugcate tho, ngue gui simanho mahøn'a na ni 'yɛhɛ ra Onésimo. Nugä drá Pablogä, ya xtán dąc'ygigä, ng dí ofädigä nangue rá 'befi ra Cristo Jesús. ¹⁰Dí ä'a ra mate nangue ra Onésimo, nu'a tengu'bu ma t'uhnigä nangue ra Cristo, nguetho bi 'yɛc'yɛi ra Cristo nangue dá xicä ua ja ra fädi. ¹¹Nu'u 'da yu pa xu thogui, hin te madí muui ni 'yehe ra Onésimo. Pe nuya xun ho da 'yørcaui. ¹²Nuya ga pen'nahu ra Onésimo bu guí 'bui. Ne nu'bu bi mba a, da du ma mbui, nguetho emme dím ben a. ¹³Nɛ dín ndepe xtán gocua ra Onésimo, sä xtí zegui ts'u, nguetho dí ofädigä, ngue dím mangä ran ho ma'da'yo, ngue tengu'bu da gue'a zεhε xquí zεqui. ¹⁴Pε hin dín nde

FILEMÓN 410

gam ma ngue da gocua 'bu nte guím ma, nguetho nu'a ran hugcate jatho da bense n'da, hin da t'ørba ts'edi n'da a. 15 Pe nu'a bi 'yøt'na bi 'dapu guí 'bui 'da yu pa, pε bi bømanho, nguetho bi hocpa rá mbui Oja ya. Ne nuya gadin cuui maząi na ya. 16 Hin gui sini nangue ni 'yεhε thoho pε gui sini nangue ni zu cu nangue ra Cristo, nguetho nuna ma zu cuhu mahugqui. Nuya man'da di nuui ya, nguetho hinga hønt'a ni 'yεhε, pε ni zu cu nangue ra Cristo ma Hmuhu ya. 17 Nu'bu majuani dadín amigoui xun ho, dami sin na ra Onésimo, tengu tho 'bu xquí sin zehegä 'bu xcá mbasegä bu. ¹⁸Nu'bu ja 'be'a bi 'yøt'e'e, uague i ja 'bɛ'a i tu'a'i, pe 'yo ma güenda ga juzehegä. ¹⁹Nugä ga firmagä, drá Pablogä, janangue da fadi majuani ga ju't'ä a rá güenda na. Janangue'a hingui hεi gui sin ya nε gadín cuui. Pε nde'bu guin 'yomfeni ts'u, nguetho guengä dá ja'a'i gá tịn a ra temazại 'bu gmí 'yɛc'yɛi ram hma dá xi'i.

²⁰Nuya ma zu cu, 'yørqui ts'u ra mate 'bɛ'a dí ä'a'i, nangue guín 'youi ra Hmu. Nu'bu gui 'yut nin huɛcate nangue ra Onésimo, da hyu ma mbui 'bu. ²¹Nugä dá o't'ä a ra søcua i ja ua ya, nguetho dí εc'yεi ngue gui 'yøt'e 'bɛ'a dí xi'a'i. Nɛ dím bɛni hinga hønt'a dí xi'a'i pɛ man'da ran ho guim bɛnsɛ 'bɛ'a gui 'yøt'e. ²²Dami hoqui ts'u hapu sä dan säyagä bu, nɛ dami 'yäfu Oja nanguecä, nɛ Oja da 'yøt'e da xogagui, da zä ga mbagä bu, gan nu'ahu buya.

Yún zεngua ra Pablo, nε bi ma da nu ran jąpi a ra Filemón

²³Nuya dí ofädi'be ra Epafras, ne'a di zengua i. Ne nu'a i ofädi nangue bi mamp'a rán ho ma'da'yo ra Cristo Jesús. ²⁴Nu ra Marcos ne ra Aristarco ne ra Demas ne ra Lucas, nuya ma mimbefihe nangue rá 'befi Oją di zengua i. ²⁵Ne nu'a ma Hmuhu ra Jesucristo di 'da'ahu rán jąpi a, gätho ahu. Ne hønt'a dí xi a ya.

HEBREOS

Ra søcuą bi 'benba yu 'yec'yei, yu israel, ngue na ya ra hebreo u

Bin 'yuse Oja nangue'a rá Ts'unt'u

Nu'bu maya'bu thoho 'dahmi ts'u bu í 'yu'a rán 'yomfeni Oja, ne 'dahma 'dan'yo bu á xi'u yú pøngahya. Νε gue'u bi xi a mam bombøtahu u, gue dyu israelhu. ²Pe nuya rán zegui yu pa ya, bi jaju ga pahmbu xun ho Oja ya nangue rá Ts'unt'u bi zocua dí 'buhmbu. Ne guese a rá Ts'unt'u í 'yøt' Oja gätho yu ximhäi, ne bi zänni dim Hmu 'be'a gätho i ja. ³Ne ní 'yepu bí 'bu Oją rá Ts'unt'u tengu'bu rá thai ra hyadi, gue'a di jaju ga pahmbu a rán ho Oja. Nε tengu 'bu ra sello, 'da angu da bøni. Ne di 'yonse 'be'a gätho i ja a rá Ts'unt'u Oja, nangue rám hma i ja rá ts'edi. Ne nu'bu mí juase bi hoga ma ts'oquihu ua, bi mbeng bu mahets'i 'darpu ní mandaui a tate thoho i ja rá ts'edi.

Man'da i ja rá ts'edi rá Ts'unt'u Oją xinda gue'u yúm 'behni mahets'i

⁴Nu rá Ts'unt'u Oją 'bu ya xí hogahu, bin t'un rá ts'edi xun ho xinda gue'u yúm 'behni mahets'i. Nguetho ya rá Ts'unt'u zehe Oja a, i conhui rá ts'ɛdi rá Ta xinda gue'ʉ yʉ́m 'bɛhni. ⁵Nguetho:

Nu'i ma 'dats'unt'u i, dí 'da a ni ts'edi ya, pe njam'bu bi t'emp'u yúm 'behni Oja, pe hinda hønt'a rá Ts'unt'u zehe. Ne:

Nugä dra Ta nangue ma Ts'unt'u, ne xínga n'da rám 'behni Oją bi 'yembi. ⁶Pe nu Oją 'bu mambá si ua ja ra ximhäi a rá Ts'unt'u, ne bi 'yena:

Nu ahu gyum 'bɛhnihu mahɛ̞ts'i, gätho gui tha̩ndehu na ma Ts'unt'u,

bi 'yɛn Oja. Nguetho nu'a rá
Ts'unt'u go da t'ɛspa a bu na nu
Oja. ⁷Pɛ nu yúm 'bɛhni mahɛts'i, i
øt' Oja yú 'yɛhɛ thoho u, tengu mán
t'o't'i:

Emme i tih yém 'behni 'bu i ørpa rá 'befi tengu 'bu yun dąhi,

ne di juadi 'be'a gätho hingui numanho Oją tengu 'bʉ yʉ sibi, nangue rá ts'edi zehe Oją.

8 Pegue bi 'yemp'a rá Ts'unt'u Oją: Nu'i gra Oją, thocpa thoho gam manda zehe mazai, njąm'bu dim 'bɛh ni ts'ɛdi, nɛ guidí manda xun ho.

⁹Nε bi 'yɛmbi:

Nu'i gra Oją, ęmme guí numanho a ran ho, ne 'be xingui ts'ʉ guí nde gui nu a ran ts'o.
Janangue'a ni Ojągui man'da dá 'da'a ran johya xinda gue'ʉ gätho mi'da ni cu gue ma 'yec'yei,

bi 'yɛmbi. ¹⁰Nɛ bi 'yɛmp'a rá Ts'unt'u a Oją:

Nu'i gra Hmu, rá mbudi gá 'yøt' ra ximhäi,

ne gá 'yøzehe 'be'a gä bí ja mahets'i,

bi 'yɛn Oją.

¹¹ Nɛ nu'a ra ximhäi dim pädi, nɛ mahɛts'i, pɛ nu'i gam 'bui mazai.

Gätho yu din ts'oni tengu'bu yu 'yahe.

¹² Nɛ tengu'bu di päh ní he n'da, din jabu 'bu gá päh ra ximhäi. Pɛ nu'i njam'bu gam pädi gätho yu pa,

nε njam'bu da gua'a ni te.

13 Nɛ, dami manda ua ja ma ts'ɛdi ui,

ja gue'bʉ ga ja i gui tạp'ʉ gätho man sʉihʉ,

bi 'yɛmp'a rá Ts'unt'u a Oją. Pɛ njam'bu bi xi u yúm 'bɛhni Oja tengu a. ¹⁴Gätho yúm 'bɛhni bí pɛnhua, tengu'bu yun dahi gue hin dí nuhu, i øt' yú 'yɛhɛ Oja nangueju to'o gätho nts'änni da hyan a ra te njam'bu da guadi.

Jatho ga urpahu ra güenda a ní yanju Oja

Pε nu'a rá Ts'ʉnt'ʉ Oją bi 'yurcahʉ rá 'yu Oją, xinda

gue u 'bɛ'a mí hma maya'bu. Janangue'a man'da ɛmmɛ jats'editho ga jamansuhu a 'be'a dí øhmbu ya, n'dahma hin ga 'behmbu a, ne xín dam 'behmbu buya. ²Nu'bu mí man'u yúm 'bɛhni Oja u yún t'edi Oja maya'bu, pe guehma bi nu ran unbi a rán säui a to bi mbesta a bi ma. Pe nu'a rám hma Oja bi man'a rá Ts'unt'u, man'da ja rá ts'edi a. ³ Janangue 'be xíngui ts'u ga ponju 'bu hin dí urpahu ra güenda a rám hma mixte thoho. Ne gue'a ram hma ní yanju Oja a. Ne rá mbudi bi manse ra Hmu 'bu mim 'bucua ja ra ximhäi. Ne m'bejua bi xiju u yú xädi gue bi 'yø a bi man ra Hmu. ⁴Nε'a Oją bi 'yudi majuąni a ram hma 'bu mí 'yøt' yu hmepya nε xun ngu yun t'øt'e mixte. Ne'bu mí 'daju ra ts'edi nangue rá Hogandahi, tengu mí ndese Oja bi darcahu. Ne gue'a í 'yudi majuani a ram hma.

Nu ra Jesús njuantho bin ja tengu thohogahu

⁵Pɛ nuna rá ts'ɛdi Oją gue dí mangä, hinga nan ja xun ho. Pɛ hinga gue'u yúm 'bɛhni mahɛts'i di jap Oją di manda bu ja ra 'da'yo ximhäi 'bu bin ja rá ts'ɛdi Oją xun ho bu. ⁶Pɛgue bi zän Oją to'o di manda bu, tengu bi si'a Oją 'bu mí t'änni 'bɛ'a di 'yɛt'ui yu ją'i:

'Bε'a gue ε dí pεhmbe gue εmmε guím bɛnje,

nε dyu ją'i thohohe. Nε man'da guidí jamansuje.

⁷ Pε ja 'da yʉ pa gá jaje him mí ja ma ts'ɛdihe, xinda gue'ʉ nim 'bɛhni bʉ mahɛts'i.

Pegue gá sänni gui 'yɛscahe, nɛ gui 'dac ma ts'ɛdihe.

Ne gá sänni ga mandahe 'be'a gätho i 'bʉi ne 'be'a gätho i ja gue gá 'yøt'e.

8 Ne gätho gá sän'ndu mi'da 'be'a gä gá 'yøt'e gue da 'yec'yeigahe,

bi 'yem bu mán t'o't'i. Janangue'a hin'yu 'bɛ'a bi zänni gue hin ga mandahu, nguetho bi 'yɛna: "Gätho da t'ɛc'yɛi u yu ja'i." Pɛ hindaná nuhu gue gätho da 'yɛc'yɛigahu. ⁹Pɛ hinda hønt'a ra Jesús, bin ja tengu mán t'o't'i, bi t'espa 'bu mí du, bin t'un rá ts'edi. Pegue xín ja 'da yu pa bin japi him mí ja rá ts'edi xinda gue'u yúm 'bɛhni Oja mahɛts'i. Janangue'a bi zä bi du nangue n'da ngu n'daju, nangue rán hugcate Oja. Ne nu'a ran date bi nu, gue'a í t'ęspa a. 10 Nu Oją bi zän'ndu gätho da hyonse. Ne bi nde bá si xun ngu yú t'uhni bu ja rá ts'edi. Janangue'a xun ho a bi 'yøt' Oją gue bin unba u yú Hmu, guepu bi zä bi yąnju xun ho. ¹¹Ne nu'a ra hocpate ne'u to'o mahoqui, nε n'dat'a yu Ta. Janangue'a hingui pe'ts' rá sä a ra hocpate da 'yɛmbi yú cu u bi hoqui. ¹²Tengu mán t'o't'i, bi 'yɛna:

Ga xi u ma cu gätho nangue'e, ne ga ɛs'i'i nubu ja rám peti ma cu,

bi 'yɛ̞n'a ra Cristo. ¹³Nɛ man'da bi man ra Cristo:

Dí tø'mi da mbäxcä Oją. Ne xø bi 'yena:

> Dí 'bähmbe ua ya yú t'uhni Oją bi 'daqui,

bi 'yɛn'a ra Cristo. ¹⁴Nuju yú t'uhnigahu a, dyu ja'i thohohu, ngue i ja ma ngøhu nɛ ja ma jihu. Nɛ a ra Jesús bin ja'i nɛ bin ja rá ngøc'yɛi tengu thoho gahu.

Janangue'a bi zä bi du ngue í 'bɛrpa rá ts'edi a rá hmu ran dąte, ngue ra zįthu. 15 Ne guepu da zä di 'uecpa yú mbidi u to'o i su ran date gätho yu pa i 'bui. ¹⁶Nε mfadi hinga gue'u yúm 'behni Oja mahets'i bi 'yørpa ra güenda da yani, pegue guenju dyu 'yɛc'yɛihu yúm bom'bɛtoju ra Abraham, nde Oją da yąnju. ¹⁷ Janangue'a nu ra Jesús njuantho bin ja tengu thoho gahu, bi beni 'be'a gätho dím bemhbu, bi zä 'be'a gätho dí sähu. Nu'bu hin xtín jabu, hin xtán zä xtí huggahu, hin xtán zä xtí juah rá 'bɛfi Oja gue bi hoga ma ts'oquihu. Gue'a í t'ɛmbi bim hmumbäja a. ¹⁸Ne nuya da zä da mbäxcahu to'o i ts'ä nangue yun unbi, nguetho nese a bi ts'ä nangue yun unbi, ne bi hyät'i.

Nu ra Jesús man'da sä da t'ɛspi xinda gue'a ra Moisés

Nuya, ma hoga cu ahu, gue Nuya, ma noga en bi huan'nahu 'darpu dam 'buhmbu bu mahets'i a Oją. Dami 'yøhmbu ya nangue ra Jesús, nu'a ra pøngahyą ne ra hocpate nangue rá 'yu Oja dí tɛnhdu. ²Nu ra Jesús bi juah rá 'bɛfi bi un'na Oją, tengutho ra Moisés bi juah rá 'bɛfi gue bi jamansu u n'dam'bui yú t'uhni Oja. ³Pe nu ra Jesús man'da sä da t'espi xinda gue'a ra Moisés, tengu thoho ra ta bu ja n'da ra ngu man'da da t'ɛspi xinda gue'ʉ yʉ́ t'ʉhni. ⁴Pɛ madague'bu i ørpa rá 'bɛfi Oją u yu ją'i, tengu bi 'yøt' ra Moisés, pe nu'a Oja i øzehe gätho rá 'befi. ⁵Nguetho rá 'yɛhɛ Oja a ra Moisés, ne bi ją'ts' rá befi bi jamansu gätho yú t'uhni Oją maya'bu. Ne nu rá 'bɛfi ra Moisés bi 'yu i ts'u a rá 'bɛfi

ra Cristo da 'yøt' 'bu bi zøhø. ⁶Pɛ nu ra Cristo rá Ts'unt'u Oja a, nɛ bi ja'ts'i bim hmu nangue'u n'dam'bui yú t'uhni Oja. Nɛ guectahu ya n'dam'bui yú t'uhni gahu Oja, 'bu dadí thoctahu dí pahmbu majuani a, nɛ'bu dadí thoju a nán johyahu a ran ho dí tømhbu.

Da zin yú t'uhni Oją da hyurpa yú mbui

⁷ Janangue'a i ɛ̞n'a rá Hogandahi Oja bʉ ja rá t'ohni:

> Nuya ra pa i jabu ya in zo ahu Oją. Pɛ ɛ̞mmɛ xun ho 'bu gui 'yøhmbu a i xi ahu.

8 'Yo gadí u't' ni mbuihu tengu bi 'yøt'u mí ten ra Moisés, bi numan'utho Oja 'bu mín 'yo bu ja ra uhäi.

Nε bi zä Oją u yu ją'i nangue 'bε'a bi numanhosε.

⁹ Nu nim bombøtahu bi 'yørca ran ts'äte ne bi numan'uthogui 'bu nyote njeya mín 'yo bu ja ra 'yu, madague'bu bi nu xun ngu yun t'øt'e gue dá ut ma ts'edi, bi 'yen Oja.

Janangue'a dán cuegä nangue'u yu ja'i,

nguetho thocpa thoho i 'uegue nangue yú mbui,

hin jąm'bu bi bą a ra 'yu dá xifi, bi 'yɛn Oją.

11 Janangue'a ɛmmɛ dán cuɛgä
nangue'u. Majuani dá ma,
hin ga singä bu ja ra häi u ngue
da hyu yú mbui, bi 'yɛn Oja.

12 Ma zi cu ahu, pɛ dam fähmbu.
Xi'bu n'da ahu gui 'uehmbu 'bu din
ja ahu ra ts'ombui, gue gui 'yɛna
hin gui nde gui 'yɛc'yɛihu Oja, i

'bui. ¹³Pɛ n'da ngu n'da ahu damim fäxhu bu ja ra hoga'yu, n'da pa ngu n'da pa, janya i sä ga øhmbu a im ma Oją, yu pa ya. Nɛ nu'bu din jabu gui 'yøthu, xínga n'da ahu da hyä ahu yu ts'oqui, gue di 'bät'a ni mbuihu. ¹⁴Nguetho dí comhbu a rán ho ra Cristo 'bu dí thoju a ní hyu ma mbuihu a, gue'bu go rán zɛgui tengu 'bu rá mbudi dá timhbu. ¹⁵Janangue'a i xiju a rá t'ohni Oja ya:

Emme xun ho 'bu gui 'yøhmbu a rá nde Oją gue in zo ahu ya. 'Yo gadí u't' ni mbuihu tengu bi 'yøt'u 'da bi numan'u tho Oją, bi 'yɛna.

¹⁶To'o u bi 'yøh rám hma Oją nε bi numan'u tho. Ha hinga gue u yu ją'i bi yạn Oją nangue'a ra häi Egipto mín 'yohu ra Moisés. ¹⁷Nε to'o bi un ra cuε Oją gätho nyote njɛya. Ha hinga guet'u bi yạn Oją bu ja ra häi Egipto, bi 'yøt' yu ts'oqui, janangue bi du bu ja ra uhäi. ¹⁸Nε to'o u majuani bi t'ɛmbi hin da hyurpa yú mbui Oją. Ha hinga guet'u him bi 'yɛ̞c'yɛi Oją. ¹⁹Gam bɛmhbu ya hanja him bi zä bi zin Oją u, nguetho him bi 'yɛ̞c'yεi Oją u.

Nuya i jatho ga suhu, janya i ja yu pa i xiju Oją da zinju bu ja rá ngu ngue da hyurca ma mbuihu. Xøhma ts'urbu thoho hin da zøni ga cuthu bu. ²Nguetho neju bi siju a ram hma gue dí cu't'a n'da, tengu bi sih yu ja'i mí 'buh maya'bu, gue'u bin 'yohu ra Moisés. Pe nu'u, him bi zä í ts'im bu a ram hma bi sifi, nguetho him bi nde bi ba u gue majuani a. ³Pe nuju gue dí pahmbu majuani a ram hma, guenju gue ga cuthu bu da hyurca

ma mbuihu Oją. Ne guepu him bi zä bi yut'u 'da, bi 'yen Oją:

Janangue'a dán cuegä nangue u,

ne majuani dá ma,
njam'bu ga singä u gue da hyu
yú mbui, bi 'yen Oja.
Pe bi du'mi bi xih yu ja'i gue da zim
bu 'bu mí jua a bi 'yøt' ra ximhäi
Oja, ne bin säya bu, bi hyu rá mbui
zehe. 4Tengu bi ma rá t'ohni gue
nubu bi ma, gue:

Ná voto ma pa bin säya Oja 'bu

mí jua a bi 'yøt' ra ximhäi.

⁵ Pɛgue bi xi'u buya nangue'u 'da
mín 'yohu ra Moisés:

"Njam'bu ga singä u gue da hyu
yú mbui," bi 'yɛn Oja.

⁶ Pɛ guehma 'bui to'o din säya bu
da hyu yú mbui. Pɛ hinga gue'u
'da bi sifi maya'bu, nguetho him
bi 'yɛc'yɛi a ram hma. ⁷ Pɛgue bi
'yu Oja n'da ra pa mahøn'a, gue ra
pa i jabu ya, tengu bi ma ra David
nangue u xun ngu yu jɛya xí thogui
'bu mí 'buh ra Moisés. Nɛ gue'a ram
hma xí hmangua, gue ɛna:

Nuya ra pa i jabu ya in zo ahu Oją. Pɛ ɛ̞mmɛ xun ho 'bu gui 'yøhmbu a i xi ahu.

'Yo gadí u't' ni mbuihu tengu bi 'yøt'u 'da bi numan'utho Oją, bi 'yɛn'a ra David.

⁸Nu'a ra Moisés bim pommi a ra Josué bi thoqui bi zix u yu ja'i. Bi säyabi bu ja a ra häi Canaan bi un Oja, bin johya bu. Pɛ nu'bu da gue'a ran johya bi man a Oja, hin xtá ma mahøn'a Oja nangue man'da ra pa 'bu. ⁹Janangue'a guexta'a i ja n'da ra xɛqui í juadi xun ho, guepu da hyurca ma mbuihu Oja, gue yu t'uhnigahu a. ¹⁰Nu'u to'o da yut'i gue da hyurpa yu mbui a Oja, din

säya nangue gätho yú 'bɛfi u tengu tho Oja bin säya nangue gätho rá 'befi bi hyu rá mbui 'bu mí jua a bi 'yøt' ra ximhäi. 11 Janangue'a nde'bu ɛmmɛ ga ndehu ga cuthu bu. Hin ga øthu tengu u him bi 'yɛc'yɛi ram hma 'bu mí xi Oja. 12 Pε nu'a rám hman Oja dim pefi tengu'bu ra thεni yoho yú hεt'i, pε man'da i ja rá ts'edi a xinda gue ra theni, ngue i sä da zørpu mbo ní mbui n'da, i urcahu 'be'a gätho dím bemhbu mbo ma mbuihu, 'be'a majuani dín nde ga øthu, ngue nda'a bi bengahu Oja, ne nda'a dá bensehu. ¹³ Xinga n'da u bi 'yøt'a Oja gue i sä da 'yacpi 'be'a mbeni, gätho i padi, ne di nequi bu ja rá dä a to i hąscahu ra güenda.

Nu ra Jesús ma hmumbäjąhu xun ndoho rá ts'edi

14 Nu ra Jesús rá Ts'unt'u Oja, i t'embi ma hmumbäjahu nguetho ma hocpatehu a. Ne bi zøm bu mbo mahets'i. Ne i fäxcahu a gue i ja rá ts'edi mixte. Janangue'a ga thoqui ga tenhdu a rám hma. 15 Nu ra Jesús ma hmumbäjahu i padi hinga gätho dí häthu u dí sähu, nguetho bi zä 'be'a gätho dí sähu. Pe hin jam'bu bi 'yøt'a n'da ra ts'oqui. 16 Janangue'a hin ga suhu dan yahu Oja bu bí ja rá ts'edi, nguetho di huegahu ne di pungahu, ne da mbäxcahu a ra ora dí hombbu a.

Bi than'du 'da yu ja'i israel 'bu maya'bu ngue dim hmumbäja. Nɛ da 'yäp'a Oja nangue gätho mi'da. Nɛ midí thocpa Oja u yú 'bøts'e nangue u yu zu'uɛ bi tho, gue ní mba ma punbi yú ts'oqui yu ja'i. ²Nɛ nangue yu ja'i thoho u yu

HEBREOS 5, 6 416

hmumbäja, hinga gätho bi 'yøt'e xun ho, ngutho u mi'da yú miją'ihu. Janangue'a bi zä janate tho bi hoc'u yu 'yambui ne yu 'yøt'ats'oqui. ³Ne jatho rá mbudi midí un Oja n'da ra 'bøts'e ra mbäja nangue yú ts'oqui zεhε, tengu bi 'yøt'e nangue yú ts'oqui yu ją'i. ⁴Njongui sä da 'yøt'e gue dim hmumbäjąse, ne hønt'a Oją sä da huahna n'da ra hmumbäja, tengu 'bu mí huahna ra Aarón. ⁵Ne ngutho bin ja nangue ra Cristo, him bi manse gue dim hmumbäjąse, pε Oją bi un ran t'ędi gue dim hmumbäja, tengu bi ma rá t'ohni Oja 'bu mí 'yena:

Nu'i ma 'dats'unt'u i, dadí 'da'a ni ts'ɛdi ya. ⁶Nɛ bi 'yɛ̞mbi mahøn'a: Nu'i gam mbäja gätho yu pa ya, tengu ra hmɛpya bi 'yøt' ra Melquisedec,

bi 'yɛn Oja bu ja rá t'ohni. ⁷Nu ra Cristo 'bu mim 'bucua ja ra häi, zại nan yaui Oją, bi 'yäp rá mfäts'i da dąp'u. Nts'edi bi mbafi ne bin zoni. Pe bi badi ja rá ts'edi Oja da yam bu ja ran date. Ne bi 'yø Oja 'bu mí nde din unse bu ja rá pähä Oją. 8Nu'a ra Cristo, madague'bu rá Ts'unt'u Oją a, pegue bin ją'i a, janangue'a bi xänba yun unbi 'be'a dí 'yørpa rá pähä Oja a. ⁹Bin jabu bi 'yøt'e, janangue'a bi zøni bi ją'ts'i gätho rá pähä Oją. Nε bi zä bi un'na ra te mazai gue to'o gätho da 'yɛc'yɛi a. 10 Nguetho bi huan Oją a gue dim hmumbäją nangue dyu 'yɛc'yɛihu, tengu ra hmεpya bi 'yøt' ra Melquisedec.

Nts'utho 'bu ga penju

¹¹I ja xʉn ngu 'bɛ'a dín nde ga xi ahʉ nangue a bim hmumbäja

a ra Cristo. Pe xʉn hẹi ga xi ahʉ nguetho hin guí honi gui pąhmbu. 12 Ne xun ngu yu pa xu thogui gue mí ja ngue xquín xänbatehu, pε guexta'a i jatho da si ahu u yum hma hingui hei nangue Oja. Nguetho gá cohi gán 'yambuihu. I jatho gui sihu ra xi'ba tengu'bu gyu 'uɛrehu, nɛ hin guí häthu gui sihu njuantho ran ts'ihme. ¹³Ne nu'a gnán ts'ihmehu ra xi'ba, in ja tengu yu 'uere, ne hinda ná pahmbu 'be'a ra te gue dám 'buhmbu njuantho. ¹⁴Pε nu ran ts'ihmε xʉn ho nt'øt'e nangue yu daja'i. Ne xun te yú mbui nangue zai din 'yomfeni, janangue'a padi nda'a xun ho ne nda'a hingui ho.

Janangue'a nde'bu ga thoqui ga homhbu gue dan daja'ihu. Nde'bu hinga hønt'a ga mamhbu a rá mbudi bi sängahu nangue ra Cristo. Nde'bu hinga hønt'a ga mamhbu gue ga päh ma mbuihu gue mí ɛna xtá hyoju, nɛ hinga hønt'a ga mamhbu ga däp ma mbuihu Oja. ²Nde'bu hinga hønt'a ga mamhbu ram hma dan xixyahu, ne nangue ran jäxa'ye, ne nangue da dambeni u xun du, ne nangue din ja ran juanbi 'bu rán zegui, nde'bu hinga hønt'u ga mamhbu ya, nguetho dí pahmbu nda'a u. ³Mbähä ga thoju 'bu da zä da xoc'a ni mbuihu Oją, nguetho i ja mi'da. 4-6 Nguetho nu'bu hin ga thohmbu, xøhma thoho da bɛni da mbenc i 'da. Ne nubuya him man'dandi da nde ba pengui mahøn'a. Nguetho nu'bu mí numanho n'dandi rán negui Oja, ne bi zämanho a bi un Oją, ne bin 'yohu rá Hogandąhi Oją, nε bi zämanho a rá hogamhma Oja,

nε bi ba i ts'u rá ts'εdi a ra 'da'yo ximhäi din ja. Pe nu'bu da mbengui, ya him man'dandi da zä di hoc yú mbui mahøn'a. Nguetho im beni tengu'bu da zä di cuat mahøn'a bu ja ra pont'i a rá Ts'unt'u Oja, nε di japi din thenda a ra Cristo. ⁷Nguetho tengu'bu n'da ra häi a ra ją'i, n'dandį ngu n'dandį din 'ye, i pøt'e, ne i pøts'e 'be'a pa nthuhu bu. Ne nu'a ra häi nu'bu di japi din ja 'be'a tupu a ra mbefi, da hyan rán japi Oja a. ⁸Pε nu'bu hin di japi da bøx'a 'bε'a bi thupu, nε hønt'u yu 'uini i ja bu, nte di muui 'bu. Ne hin da hnumanho a ra häi 'bʉ. Νε nzegui da mba nt'udi nangue ra sibi.

Bi ząngba ma mbuihu a ra Jesús, dí tømhbu a ran ho ya

⁹Pε madague'bu njabu dá mamhbe, ma zi cu ahu, pegue dí haxhe njuani gan jahu tengu ra hogahäi, bin japi bin ja xun ngu 'bε'a bi thupu, nguetho bi hoc'a ni mbuihu Oją. Ne xun ndoho ran jąpi ba ehe, guin nuhu. 10 Nguetho xun ho øt' Oja ngue hin di pumbeni a ra 'bεfi gá 'yøthu, nε ran huεcate gá 'yuthu u 'da ni cuhu, nangue rá thuhu Oją, ne nangue a guí ødahu ya. ¹¹ Emme dí ndehe gui thoju gan ehyahu, n'da ngu n'da ahu, gue'bu go rán zegui ra pa. Janangue'a da zøni gui hyamhbu 'be'a gätho guí tømhbu. ¹²Hin dí ndehe da yundanhyei thoho ahu, pe dami 'yøthu 'be'a mí øt'u 'da 'bu mí badi majuani a rám hma Oja, ne bi hyät'i bi zet yú mbui, janangue'a bi hyạn a ra herencia bi ma majuani Oja. ¹³Nu Oją 'bu mí xih majuąni a ra Abraham, bi ma majuani nangue rá

thuhu zehe. Nguetho njo'o man'da xun ndoho rá ts'edi hinda hønse a. 14 Ne bi 'yen Oją: "Majuąni xun ngu ran ho ga 'da i, ne ga 'da i xun ngu nim bom'beto," bi t'emp'a ra Abraham. 15 Nu ra Abraham buya bi hyät'i bi dø'mi, janangue'a bi hyąni 'bε'a bi xi a Oją. 16 Nu'bu 'da yu ją'i im ma majuani 'bε'a da 'yøt'e, i ndønba rá thuhu Oja, nε ya him ma hyom mi'da yum hma dí hoc'a, nguetho i fadi majuani a bi ma. ¹⁷Ne'a Oja 'bʉ mí nde da 'yurcahʉ ngue majuani a rám hma, bi man rá thuhu zehe 'bu mí xiju ra herencia. Ngue gueju nts'änni ga hamhbu a. Janangue'a ga pahmbu njam'bu di pä a bi xiju. 18 Janangue'a yoho bu dá pahmbu, rám hmanse ne rá thuhu zehe, ga pahmbu hin dim fehni Oja, pe majuani da zinju bu. Ngue gueju bá 'dahmbu bu mí ja xcá tuhu, dá benthu bu hapu da zinju ya. ¹⁹ Janangue'a bi zinju bu a ra Jesús, bi zangba ma mbuihu bu mbo rá ngu Oją, njam'bu da hyegahu. 20 Nguetho m'bet'o bi yurpu a ra Jesús. Ne bi xi a Oją ngue bi hogahu ngue da numanhoju bu. Gue'a nam bøni ma hmumbäjąhu, ngue i 'bui mazai, tengu ra hmepya bi 'yøt' ra Melquisedec.

Bim mbäją ra Jesús tengu ra hmɛpya bi 'yøt'a ra Melquisedec

Nu ra Melquisedec bim hmuts'ut'abi bu ja ra hnini Salem, nε bim mbäją nangue Oją mixtetho rá ts'εdi. Nε nu ra Abraham 'bu mam bá tąp'u 'da yu ts'ut'abi, bin c'at'ui ra Melquisedec, bi t'äp rán jąpi Oją nangue a ra HEBREOS 7 418

Abraham. ²Νε nu'a ra Abraham buva bi un'na ra Melquisedec a ná 'dɛt'a gue xpí hyanba yun suihu, gue rán t'unni Oja a ná 'dɛt'a. Nɛ nu rá thuhu ra Melquisedec nde da ma "ra hoga hmuts'ut'abi." Ne nde da ma gue "ra hmuts'ut'abi di hocpa ra sui," ne gue'a nam bøn'a rá thuhu rá hnini Salem. ³Ne hinga mfadi to'o rá ta ra Melquisedec, o to'o rá mbe. Ne hinga mfadi nda'a rá 'yu, ne hinga nt'o't'i gue'bu mím 'bui o gue'bu mí du. Janangue'a tengu'bu rá ts'edi rá Ts'unt'u Oja bu ín 'yu a ra Melquisedec, gue dim mbäja gätho yu pa høn'bu go njam'bu. ⁴Janangue'a sä ga pahmbu ya gue xun ngu rá ts'edi ra Melquisedec 'bu min ja, nguetho guese ma ngurpa bøtahu ra Abraham bi un'na ná 'det'a bá tạp'u yún suihu. ⁵Nu rán t'ɛdi Oja bi xi u yú t'uhni ra Leví gue yú mbäja yu israel, gue da hyacpa a ná 'dɛt'a u yú mɛni, madague'bu yúm bom'beto ra Abraham u, pe nese u. ⁶Pε nu ra Melquisedec, madague'bu hingui conhui rá 'yu ra Leví gue ra Abraham, pe bi un'na ná 'det'a gue'a bá tạh ra Abraham. Ne nu ra Abraham, madague'bu xun ngu rá ts'edi bu nam ben Oja, nguetho bi xifi majuani da 'yørpa a Oja. Pe man'da ja rá ts'edi ra Melquisedec nguetho bi t'äp a ran japi a ra Abraham. ⁷Ne mfadi nu'a di jap'a n'da man'da ja rá ts'edi xinda gue'a pa ma japi. ⁸Pε nu'u yú mbäja ra israel zai midin t'un'na ná 'dɛt'a, pɛ yu ja'i u, ne i tu u. Pe nu man'da ra mbäja gue ra Melquisedec, i mam bu ja ra t'ohni tengu 'bu i 'butho. ⁹Nε da zä gam bεmhbu ya, gue

gätho rá 'yʉ ra Leví, gue yʉ́ mbäja ra israel, gue i äp'a ná 'dɛt'a u yú meni, gam bemhbu gue ne'u tengu'bu bin jut'u 'bu mí un'na ná 'dɛt'a xɛqui a ra Melquisedec a ra Abraham. 10 Nguetho da zä gam bɛmhbʉ nangue ra Abraham, tengu'bu ya xmín 'yohu yúm bom'beto 'bu mín c'at'ui ra Melquisedec, madague'bu hin nám 'bui. ¹¹Bim mbäją ra Aarón gue rá 'yu ra Leví, ne rá ngurpa bøta a ra Abraham a. Ne gue'u bim mbäja u nangue'u yu israel, tengu bi man yún t'ɛdi Oją. Pɛ nu'bu da guehya yú 'befi gue ní yan Oja u yu ja'i, him mi jatho xtí negui man'da ra mbäja gue n'dan'yo 'bu, tengu ra hmepya bi 'yu a ra Melquisedec, nε hin nangue a ra Aarón. ¹²Ρε nu'bu mí mba ma pädi yu mbäją, ne 'be'a mí øt'e, ne u yun t'edi mí tenni, mí jats'editho da mba ma pädi u. 13-14Bi 'yɛn ra t'ohni gue nu a man'da ra mbäja gue ra Cristo a, bim 'bui nangue man'da rá ts'unt'u ra Israel, ngue hing rá 'yu yu mbäja. Nguetho mfadi xun ho gue ma Hmuhu bim 'bui nangue rá 'yu ra Judá. Ne nte bi ma yún t'edi ra Moisés, gue dim mbäją a rá 'yu ra Judá. 15 Pe man'da gui pahmbu 'be'a dá mangä 'bu guim bemhbu nangue a ra Melquisedec, gue i udi tengu a man'da ra mbäja, nu'a ra Cristo a. 16 Nε hin nangue ra 'yu bi man u yun t'edi da zä dim mbäją a ra Cristo. Ne xín nangue u yun t'edi mí ma 'be'a da t'øt'ua bi den'na, nguetho him mán ts'änni zại din ja u. Pegue bi zä bim mbäją nangue a rá ts'edi a rá tese njam'bu da zä da guadi. ¹⁷Gue'a bi man Oja:

Nu'i gra mbäją maząi, tengu ra hmεpya bi 'yøt'a ra Melquisedec,

bi 'yɛn Oja. 18 Gue'a án t'ɛ'ts'a ra 'yu gue bi ts'än maya'bu, nguetho mbe nte midí muui a. 19 Nguetho njom bi zä bi hocpa yú ts'oqui u yun t'εdi bin t'un ra Moisés. Pε bi nεqui man'da xun ho, gue i sixcahu bu bí 'bu Oja. ²⁰Ne man'da xun ho ra 'yu nangue ra 'da'yo mbäja, nguetho bi manse rá thuhu Oja 'bu mí un rán t'edi a rá Ts'unt'u. 21 Pe nu mi'da yu mbäją 'bu mín t'un yú 'bɛfi, him bi hndønba rá thuhu Oja. Ne nanguehna ra hmumbäja, bi manse rá thuhuse Oja. Tengu bi mam bu ja rá t'ohni Oja, bi 'yɛmp'a rá Ts'unt'u zehe:

> Nugä dra Oją, dí manse ma thuhugä, ne hin ga pä a dí ma. Nu'i gam mbäją gätho yʉ pa maząi,

tengutho ra hmɛpya bi 'yøt'a ra Melquisedec,

bi 'yɛn Oją. ²²Nu ra Jesús, da zä di ja'ts'a n'da ran hoqui man'da xun ho xinda gue'a mí ja mam'bɛt'o, nguetho dim hmumbäja mazai a. 23 Nu'u 'da yu mbäją bi zøni xun ngu mí 'bui, nguetho i tu, ne him bi zä bi thoqui høn'bu go njam'bu. 24 Pε nu ra Jesús hingui tu, janangue'a njo'o man'da sä da hyanba rá 'bɛfi. 25 Janangue'a da zä di hoqui xun ho u to'o da zøm bu 'bu Oją ya, nangue a ra Cristo. Nguetho i 'bui mazai, da zä thocpa thoho da 'yäp'a Oja nangue u to da zøm bu. ²⁶Njuantho ε gue'a ra Jesús a ma hmumbäją dí homhbu. Nguetho xun hotho a, nte in dupatese him bi 'yøt' yu ts'oqui,

nε him bi hyanba yum 'bäi u yu ts'om'bäi, ne man'da i pa nt'espi gue i ja rá ts'edi bu mahets'i. ²⁷Nu yu ja'i 'bu mim hmumbäja di thoqui da mbøspa Oja gätho yu pa, mbudi bi mbøspe nangue yú ts'oqui zehe, nε m'bejua yú ts'oqui yu ja'i. Pe nu ra Jesús him bi 'yøt'e tengu u, ne n'dandį thoho bi mbøspa Oją 'bu mi un rá tese, nguetho di muui mazai a. 28 Nu rán t'ɛdi Oja bi man ra Moisés bi t'embi dim hmumbaja u yu ja'i thoho, pε him bi hyät'i bi ją'ts'u yún t'ędi Oją. Pe nu'bu mí manse rá thuhu Oja, bi ma gue dim hmumbäja rá Ts'unt'u zehe. Ne nu'a gätho bi ja'ts'u yun t'edi ne bi juadi, nte di 'bɛh ya. Nɛ gue'a rám poniui a rán t'gdi Oją bin t'un ra Moisés a ra Jesús.

Nu ra Jesús bin hocpate nangue ra 'da'yon hogui

Bí 'bupu mahɛts'i a ma hmumbäjahu gue ma hocpatehu, 'darpu ní mandaui a tate thoho rá ts'edi. Ne guehna man'da jats'edi na dí xi ahu. ²Ne dim mbäją bu majuąni i pa nthąnde Oją bu mahęts'i, tengu'bu ra niją bi 'yøt' Oją, nε him bi hyøh yʉ ją'i. ³Gätho yú hmumbäja u yu israel, bi ts'änni di un yu 'bøts'e nangue u yu zu'uɛ bi tho, nɛ mi'da. Janangue'a nε a ra Jesucristo ja 'bε'a bi uni, nguetho nε a ra hmumbäją a. ⁴Pε hinga guecua ja ra ximhäi bim mbäja a. Ne nu'bu xtín zangua ja ra häi, njam'bu xtán zä xtím mbäja. Nguetho hing rá 'yu ra Leví a, ne hing yu zu'uε bi mbøx'a, tengu bi man rán t'ɛdi Oja bi man ra Moisés. ⁵Ne nu'a ra nija bu midím

pε u yu mbäja ua ja ra ximhäi, n'da ra hmεpya thoho gue 'bε'a ørpu mahɛ̞ts'i. Nguetho bi sih ra Moisés 'bu mí dup'a ra niją: "Dami jamansu 'bɛ'a gui jap'ʉ i ja bʉ, nɛ 'bɛ'a gätho gui 'yørpu, tengu thoho dá ut'a 'bu gmí 'bupu ja ra t'øhø," bi 'yɛmp Oją. ⁶Pε nu ra Cristo bin t'un'na n'da ra 'befi emme man'da xun ho xinda gue'u mi'da yu mbäja. Nguetho din hocpate nangue ran hogui man'da xun ho 'be'a gätho i ma da 'yørcahu. ⁷Nu'bu xtán zä xtí hocpa n'da a rá mbudi ran hogui, him mí jatho xtán ja a ná voho ran hogui. 8Pe nu Oja him bi zä bi numanho yu ją'i nangue a ran hogui mí ja, pe guexta'a ndupate bu na nu Oją u. Janangue'a bi 'yɛna:

> Da zøn'a n'da ra pa ga øt'ä n'da ra 'da'yon hoqui mahøn'a nangue yu mɛ israel nɛ yu mɛ judá.

⁹ Ne hin din ja tengu ran hoqui dá xi u yúm bombøta
'bu mambá jucpu ra häi Egipto, ne dá jamansu.

Dá xifi xtí ją'ts'i, pɛ him bi hyät'i da 'yøzɛhɛ man hoqui dá xifi, gue man t'ɛdi dá xi a ra Moisés.

Janangue'a him bi zä dá
numanho u, bi 'yɛn'a ra Hmu.

10 Pɛ nu ran hoqui ga ørpa yu
israel 'bu m'bɛjua mi'da yu pa,
din ja tengu gam mangä ya.
Ga un man 'yomfɛni bu ja yún
'yomfɛni u,

nε ga japi mpähä thoho da dengui.

Janangue'a da numanhogui, ne ga øt'ä gue yú Ojągä u, ne din ja gue ma t'uhni zehe u buya. ¹¹ Ne hinga hnehi thoho 'bo'o da xänba u,

ne njon da sänbi gue da bąqui, nguetho gätho da bąc zehe u, yu ngurpi o gue yu ją'i thoho.

¹² Ne ga punbi nangue ran ts'o, ne him man gam bengä u yú ts'oqui,

bi 'yɛn Oja. ¹³In jabʉ a ra 'da'yon hoqui, nɛ gue'a í t'ɛmbi ra nyonhoqui a mí ja, gue ya bi juah rá 'bɛfi a, nɛ ní mba bʉ dim 'bɛdi 'bʉ mí man na.

Necua ja ra häi mí ja rá ngu Oją, nepu mahets'i

Nu'a rá mbudi ran hoqui, mí ja yún t'ędi nangue yun t'øt'e mí t'ørpu ja ra nija ua ja ra ximhäi. ²Nɛ nu'a ra niją bi t'øt'e, bin ja n'da ra cuarto rá mbudi, t'embi xun duxqui, guepu mí ja rán 'døgue yu lámpara, ne ra mexa gue i cux yu 'bøxthuhmε. ³Nε mí ja man'da ná yoho ra cuarto gue nubu mbo, mán joti n'da ra 'bø't'e, guepu mí t'ɛmbi man'da xʉn dʉxqui. ⁴Nɛ nubʉ, mí ja bu ra mexa ra oro guepu mí zø ra xeca xiza yʉmanho. Ne a rá huada ran hoqui gue mán jots'i ra oro gätho yú hyo. Ne nubu mbo ra huada mí høpu n'da ra xaro gue ra oro, mí o bu zi ts'u ra hme i t'embi ra maná. Ne a rá tøhø ra Aarón gue bi 'dogui, ne u yu xindo bi t'o't'a ra nyonhoqui, gue nu'u yún t'ɛdi Oją maya'bu. 5Ne nu rán jo'mi ra huada, n'da ra xithe i t'embi ran ts'äya ram punbate. Ne mí tøpu voho vú pøte u yú mbädi Oją mahęts'i, mí com'pu mate ra xithe bu mí pa nsits'i ra ji dím punba yú ts'oqui yu ją'i. Pe hinga xøt'a ga xi ahu 'be'a nam

421 HEBREOS 9

bøn'u gätho yu hmepya mí ja bu mbo ra niją. ⁶Bin jabu bi t'øt'e. Nu yu mbäją thoho, thocpa thoho mí curpu a rá mbudi ra cuarto, gue mí øt' yú 'bɛfi nangue ran dande bu ja ra niją. ⁷Pε nubu ná yoho ra cuarto man'da xun duxqui, hønt'a ra hmumbäja mí thopu, hønt'a n'dapa thoho i tho a n'da jeya. Ne nu'bu mí yurpu, i thexpu rá ji yu zu'ue gue mí xixpu, nangue rá ts'oqui zehe 'bu rá mbudi, ne nangue yú ts'oqui yu ja'i 'bu ná yondi. ⁸Nu'a rá Hogandąhi Oją di jaju ga pahmbu, ngue hin ní soc'a ra 'yu ní mba bu bí 'bu Oja 'bu gätho mí t'øthoho ran dande bu ja a ra nija ua ja ra ximhäi. Ne gue'a n'da ra hmεpya bi 'yu a ra 'bø't'e mí corpu man'da xun duxqui, mí corpa bu u yu ja'i. ⁹Gätho u yun t'øt'e mí t'ørpu ja a ra nija, n'da ra hmepya thoho nangue a njuantho i jaju ya. Nguetho yun t'unni nε yu 'bøts'e bi un'na Oją, him bi zä bi hocpa bu mbo rá mbui u mi øt'e. Janangue mí pa njorpi bu u. 10 Nguetho hønt'a mí man yun t'ɛdi nangue yʉn ts'ihme midí hoqui, ne midín xut'i. Pe nu'u gue'u 'da yun t'edi gue i ja thi. Ne gue'a bi zän Oją da 'yøt'u, ja gue'bu mam bá sh ra Cristo, ja bi negui a majuani ra 'yu ja rá ts'edi a buya. ¹¹Gue ya bá εh ra Cristo, nε gue'a ma hmumbäjąhu a, nangue ra 'da'yo nhoqui i ja ya. Ne nu'a ra niją guepu dim pehna ra mbäją ya, man'da xun ho, ne guepu majuani bu. Ne him bi 'yøt' yu ja'i, nguetho hing ra ngugua ja ra ximhäi a. ¹²Pegue mahets'i bu bi yut' na ra Cristo ya, tengu ra hmepya bi 'yuh yu hmumbäja 'bu mí yurpu man'da

xun duxqui. Ne ya hin di un yú ji yu t'ude'yo o gue yu t'undani, pe bi un rá jise. Ne n'dandi thoho bi yurpu, nε bi yanju xun ho a. ¹³Nu rán t'edi Oja bi t'embi xun ts'o ní ngøc'yei n'da 'bu xí dä a n'da ra du. Nε bi ma jatho da mba ma c'uaspa rá ji ra toro ne ra de'yo, ne rá 'bospi a ra t'ʉsundąni gue bi t'upʉ ja ra sibi. Ne gue'a dí hocpa ní ngợc'yei n'da a. Ja bi zä bi dande Oja u buya. ¹⁴Pe gam bemhbu man'da εmmε i ja rá ts'εdi a rá ji ra Cristo, bi mberca ma ts'on'yomfɛnihu midí 'uegahu nangue Oja, n'dahma da zä ga ørpahu rá 'bɛfi Oja gue i 'bui. Nguetho hin'yu rá ts'oqui ra Cristo, ne bin unse bu 'bu Oja, ra 'bøts'e gue mazai di muui bu nam bęn Oją. 15 Nu ra Jesucristo bin hocpate nangue ra 'da'yon hoqui 'bu mí du. Janangue'a gätho bi mba mahoqui ma ts'oquihu, gue gueju mí tenhdu rá mbudi ra yonhogui. Hinga høngdahu, pe ne u mí 'bu 'bu hin nán ja a ra 'da'yon hoqui. Nε nubuya gätho bi zä dá comhbu ran japi mazai gue bi xi Oja u bi zohni. ¹⁶Nu'bu i man'a n'da to'o da zocpa u 'be'a pe'ts'i, pe 'be da fądi 'bu majuąni bi du, ja da t'øt'a xi ma buya. 17 Hingui sä da t'øt'a xi ma 'bu i 'butho, hinda høn'bu bi du. ¹⁸In jabu bin ja 'bu rá mbudi a ran hoqui bi man Oją, gue bin ho 'bu mí mba m'bänbi rá ji n'da ra zu'uɛ, ja bi fadi majuani bi nu ran date buya. 19 Janangue'a nu'a ra Moisés 'bu mí xih rán t'ɛdi Oja gätho yu me israel, ne bi c'uaspa ra ji buya. Bi mit' ra thenga xide'yo ne n'da ra t'u'yeza gue n'youi yú paxi, nε bi garbu ja ra dehe n'youi rá

ji ra t'undani nε rá ji yu chibo, bi c'uaspa bu ja rá søcua i man rán t'ędi Oją, ne gätho yu ją'i bi mba ma c'uaspi a ra ji buya. 20 Nubuya bi 'yɛna: "Nuna ra ji, guehna dí hoc'a ran hoqui na, gue bi man Oja nangueju. Nuya da zä di punga ma ts'oquihu," bi 'yɛn a ra Moisés. ²¹Nɛ nubuya bi c'ua'ts' ra ji bu ja rá niją Oja, ne 'be'a gätho mí ja bu mbo mí pa nthoni bu ja rán thande Oja, gätho bi mboxpu yu ji. 22 Ne i mam bu ja rán t'ɛdi Oją, gue gue'a ra ji í hoc'u 'be'a gätho mí t'øt'e. Pe nu'bu hin dim fän ra ji, hin'yu ra punbi nangue ra ts'oqui, i em bu mán t'o't'i.

Í 'uec yu ts'oqui a ím 'bøts'e ra Cristo

²³Nu'a ra niją, n'da ra hmɛpya thoho mí ja ua ja ra häi, bi mba ma hoqui nangue u yú ji yu zu'uş mí hma. Janangue'a bin ja ra 'bøts'e man'da xun ho gue dí hogahu, tengu'bu dyú nijąhu majuąni bu mahεts'i. ²⁴Nε hinga guepu ja ra nija bi 'yøt' yu ja'i i 'buh ra Cristo ya, nguetho yu hmepya tho u nangue a majuąni rá ngu Oją. Pε ε guepu mahɛts'i bi yut'i, i äp Oją ya nangueju. ²⁵Nu yú hmumbäją yu israel, jeya 'bu njeya mí curpu ja ra cuarto man'da xun duxqui, midí un ra ji, pe hin rá jise. Pe nu ra Cristo hinga thocpa thoho di un ra 'bøts'e. ²⁶Xi'bu xtín ja tengu yu hmumbäją, jeya 'bu njeya midí un ra ji. Mí jatho xun ngu yu nidi xtán du ra Cristo 'bu, gue'bu go rá mbudi ra ximhäi. Pe him bin jabu bi 'yøt'a. Pε nuya n'dandi thoho bi zøcua ra Cristo gue bin unse bim 'bøts'e zehe, gue í 'uecpa vú ts'ogui vu

ją'i. Nɛ guehya yʉ pa gue di ją'ts'a mí hma mám 'bɛt'o. ²⁷Tengu yʉ ją'i, nts'änni n'dandį thoho da du, nɛ m'bɛjua da nu ran juanbi. ²⁸Nɛ ngutho ra Cristo, n'dandį thoho bin uni bim 'bøts'e, ngue bi 'uecpa yʉ́ ts'oqui ʉ xʉn ngu yʉ ja'i. Nɛ m'bɛjua ba pengua da zin ʉ i tø'mi, pɛ hin dí 'yɛ̞hɛ dí 'uec yʉ ts'oqui mahøn'a.

Nu'a ran t'ɛdi bin t'un ra Moisés nangue yu 'bøts'e bi 'yøt' yu mbäją, n'da ra hmepya thoho nangue'a ran ho bá ɛhya. Nɛ hinga gue'a majuani ran ho a. Ne njam'bu bi zä bi mba ma hocpi yú ts'oqui u mí øt' yu 'bøts'e, madague'bu njeya 'bu njeya midí uni. ²Nu'bu da gue'u yu 'bøts'e xtán zä xtín hoc'u, ρε n'danditho xtí uni, ne xtá 'ye'ts'a ní un yu 'bøts'e 'bu. Ne ya xtám badi n'dandi thoho bi bo y\u00ed ts'oqui b\u00edya. ³Pɛ nangue yʉ 'bøts'e bi uni gätho yu jeya, bi japi da beni gue in dupate tho yú ts'oqui. 4Nguetho hinjam'bu da zä di punba yú ts'oqui n'da u yú ji yu ndani nε yu dε'yo. ⁵Janangue'a bi 'yɛn ra Cristo 'bu mí zøcua ja ra häi, bi 'yɛmp'a Oja rá Ta:

Hinga njuantho gue'u yu zu'u guí nde.

Janangue gá jaqui dán ja'igä ngue dam 'bøts'egä, bi 'yɛn'a ra Cristo.

6 Ne hin gnán johya n'da ran t'unni ngue yu zu'ue bi t'upu ja ra sibi, xínga gue'u yu 'bøts'e nangue yu ts'oqui.

⁷ Janangue dá rngä: "Bá rcä ya ga øt'ä ni pähä ma Oja i, dam 'bøts'e zehegä,

tengu mán t'o't'i bu ja nim hma." 423 HEBREOS 10

bi 'yɛn'a ra Cristo. 8Nu'a rá mbudi bi mangua, hin nán johya Oja u yu 'bøts'e gue yu zu'ug bi t'udi nangue yú ts'oqui n'da, madague'bu gue'a bi man'a n'da rán t'edi a. 9Pe xø bi 'yem mahøn'a buya: "Bá ecä ya gue ga øt'ä ni pähä, ma Oja i, gue dam 'bøts'e zɛhɛgä." Gue nde da ma, dí 'ueh ya yu 'bøts'e mí ja, ne din ja nu man'da ra 'bøts'e. 10 Nu ra Jesucristo bi 'yøt' rá pähä Oja, gue bi unse rá ja'i n'dandi thoho bi juadi. Janangue'a bi hogahu Oją ya. 11 Nu yú mbäją yu israel mí øt'u yú 'bɛfi gätho yu pa, nɛ thocpa thoho midi un yu 'bøts'e, madague'bu hinjam'bu mí sä di hocpa yú ts'oqui n'da u. ¹²Pε nu ra Jesucristo n'dandi thoho bin uni bim 'bøts'e nangue ma ts'oquihu, pe him man'dandi din uni. Ne bí 'bupu 'darbu ní mandaui Oja ya. ¹³Ne guepu bí 'bupu ya, gue'bu go bi dap'u yun suihu. 14 Nguetho nangue n'dandi thoho bin unse, janangue'a bi juadi bi hoc'u to'o bi 'yøt'e yú mbeti. 15 Guese a rá Hogandahi Oja di jaju ga pahmbu a mangua, 'bu mí ma:

Nu ran hoqui ga ørpa yu ja'i 'bu m'bejua, din ja tengu na, ga benba bu ja yu mbui ma pähä zehe, da ndese gue da dengui. Nguetho ga un man 'yomfeni bu ja yun 'yomfeni u.
17 Ne xø bi 'yem mahøn'a:

Him man'dandi gam bɛngä yú ts'oqui, nɛ xínga gue'u yum fɛ'ts'i mí øt'u,

bi 'yɛn rá Hogandąhi Oją. ¹⁸Nangue Oją bi punga ma ts'oquihu, hingui sä ga unhdu mi'da yun t'unni dí punga ma ts'oquihu.

Da zä ga sømhbu bu 'bu Oja

19 Ma zi cu ahu, gam bemhbu nangue a ra nyonhoqui mi ja, njo'o n'da ra ja'i thoho mí sä da yurpu man'da xun duxqui, ne gue'a í t'u'a ra 'bø't'e mí ndam bu. Pε nuya bi zä dí cuthu bu ja a rá ngu Oją mahets'i, man'da xun duxqui. Ne dí cuthu nangue a rá ji ra Jesucristo, bi hogahu. Ne hin dín suhu ya. 20 Ne dí cuthu nangue a ra 'yu ma'da'yo gue i 'bui. Nguetho bi 'uegahu ra 'bø't'e mí ndam bu ja ra goxthi, 'bu mí unse rá ja'i ra Cristo ya. ²¹ Nu'a ra Jesús, gue'a ma hmumbäjahu, nangueju gue yút'uhnigahu Oja. ²²Janangue'a mbähä ga sømhbu bu 'bu Oją ya, n'dat'a gam bɛmhbu majuani i ndeju. Nguetho bi mberca ma mbuihu nangue rá ji ra Cristo, hin gam bemhbu gue dín dupatehu yu ts'oqui ya. Ne tengu 'bu am 'be't'egahu a ra dehe xun güe. 23 Nε ga thoqui ga mamhbu a ran ho dí tømhbu, hin ga suhu. Nguetho majuani di ja'ts'a rám hma bi xiju Oja gue di pøju. ²⁴Mbähä dan xänbahu ga øthu ran hugcate, ng 'da dán ghyadahu ga øthu a. 25 Ne hin ga øthu tengu øt'i 'da him mi søm bu ja mam petihu. Pegue mbähä ga thoqui dam petihu, ne dan xänbahu n'da ngu n'daju. Ne man'da ga humbi ga øthu ya, nguetho ya mí ts'utho ba ɛ̞h ra Hmu. ²⁶Pɛ nu'bʉ dí ndesɛ ga thoctahu yu ts'oqui 'bu ya má pahmbu a majuani, tengu'bu hin dá jamansuhu a ra 'bøts'e xtím pungahu. Pe ya hin'yu 'be'a man'da sä ga umhbu buya, gue dí mba ma pungui ma ts'oquihu. ²⁷Pε hønt'a

ra mbidi gan nuhu 'bu, gue ran unbi dí co'ts'a Oja, nangue ra sibi nts'utho 'bu bi de, gue di jua u yún suihu Oją. ²⁸Gam bemhbu tengu ran t'edi bin t'un ra Moisés, gue'bu 'bʉ a n'da i øt' ram fɛ'ts'i, nɛ di nεqui yoho o gue hyu yu testigo gue bi nu, bi tho a ra ja'i buya, ne hin da mba ma huεqui. 29 Pε ha hin dím bemhbu gue man'da nts'utho ran ts'embi ga nuhu 'bu dím beni ga nemhbu bu häi a rá Ts'unt'u Oja, nε dí εmhbu nte di muui a rá ji xtí hoga ma mbuihu, ne'bu dí numan'u tho a rá Hogandahi Oja gue mí ena xtí huggahu. 30 Pg dí pahmbu a ra Hmu gue bi ma: "Nugä ma 'bɛfi ga ju't'i, ga un'na rá muui bi 'yøt'e." Ne bi 'yen ra t'ohni: "Da zemba yú t'uhni Oją 'bu di thoqui da 'yøt' ra ts'oqui." 31 Emme nts'utho 'bu da dinba yú ts'oqui n'da a Oja bu ja ran juanbi, gue'a i 'bui. 32 Pe dami bemhbu 'be'a gá 'yøthu u yu pa xu thogui, gue'bu ja gmí timhbu ran nequi. Xun ho gá 'yøthu, jante tho gá hyäthu yun unbi xun ndoho. ³³Nε 'da ahʉ bi mba nthenni ahʉ, nε bi mba ma un'ni ahu bu ja yú hmi yu ja'i. Ne mi'da ahu gue hin gá suhu da mba ma un'ni ahu 'bu 'darbu gmí 'yohu u bi mba ma unbi. ³⁴Ne hin gán suhu gue gá zenguahu u ni cuhu 'bäpu ja ra fädi, ne gán johya thohohu 'bu mí than'nahu 'be'a gmí pes'hu. Ne gá pąhmbu ja ahu bu mahets'i a man'da xun ho, gue da hyät'i mazai. ³⁵Ο guí εs'hu a gní hyuthu nzambui, janangue'a din 'da ahu n'da ran t'unni xun ndoho. ³⁶Pe i jatho ga sethu ts'u, n'dahma da zä ga øthu rá pähä Oja, janangue ga hamhbu a bi ma

majuani di 'daju. ³⁷Nguetho i mam bu ja rá t'ohni Oja:

Mi ts'utho ba ¿'a i ja gue ba ¿hɛ, ya hin da ya'a ba ¿hɛ, nɛ di 'da ahu a guí tømhbu.

³⁸ Nɛ nu'u to da 'yec'yei majuanigä, gue'u ga hocpa yú ts'oqui, ga embi xun ho buya, ne ga un'ndu ra temazai u.

Pε nu'ʉ bi mbengui hin ga numanho ʉ,

bi 'yɛn Oją. ³⁹Pɛ nujʉ hinga guejʉ dá penjʉ guepʉ xcá nuhʉ ran ʉnbi mazại. Pɛ dí ɛc'yɛihʉ gue majuạni a Oja, janangue'a din jajʉ ra temazai.

Nε gue'a ná εc'yεihu majuani a Oja

'Be'a nam bøn'a na ec'yeihu majuani a Oja. Nám bøni, gue dí ɛc'yɛihʉ majuạni ga hạmhbʉ a ran ho bi xiju Oja. Ne nam bøni ga ec'yeihu majuani 'be'a gätho i ma Oja, madague'bu hin dí nuhu a. ²Nu ma bombøtahu bi hnumanho nguetho bi 'yɛc'yɛi majuani a Oja. ³Dí ɛ̞c'yɛihʉ majuạni bi 'yøt' Oją yʉ ximhäi, madague'bu hin dá nuhu 'bu mí 'yøt'u. Nu'bu mí 'yɛna din ja, ya bin ja buya, gue bi 'yøt'e nangue u 'be'a him midí negui. ⁴Nu'a ra Abel bi un Oja n'da ra 'bøts'e xun ho xinda gue a bi un a ra Caín, nguetho bi 'yɛc'yɛi majuani a bi xi Oja. Nu'bʉ mí thanba a rán t'unni ra Abel, bi fadi bi numanho Oja a. Ne madague'bu bi du ra Abel, pε tengu 'bu 'butho, gue urcahu 'be'a mí øt'a, gue bi 'yɛc'yɛi majuani a Oja. ⁵Ngutho ra Enoc, bi 'yɛc'yɛi mbo rá mbui a majuani. Janangue'a bi ts'ixpu ja rá ngu Oja ne him bi du. Nε him bi thịngua ja ra häi a, nguetho bi zix'a Oja. Ne i en ra

425 HEBREOS 11

t'ohni: "Nu'bu hin ní ts'its'i, bi hnumanho a." 6Pe nu'bu i 'bu a n'da i nde da zøm bu 'bu Oja, pegue da 'yɛc'yei majuani i 'bu a, ne da 'yɛc'yei majuani din t'un ran ho a to i hon Oja. Nguetho hingui sä da numanho Oja n'da 'bu hingui ec'yei a majuani. ⁷Bi 'yɛc'yɛi a ra Noé gue majuani a mí xi Oja din ja a ra dambunt'i, madague'bu hin ní nu. Ne bi 'yøt'a ra dabarco bi xifi, guepu da yan'u i 'bupu rá ngu. Ne bi 'yembi xun ho Oja a nguetho mí ec'yei mbo rá mbui a Oja. Ne gue'a í negui hing yu 'yɛc'yɛi gätho ra ximhäi, jan í ts'emba u. 8Bi 'yec'yei majuani Oja a ra Abraham. Janangue'a bi bøm 'bu mí zon'na Oja, gue da mba bu ja a ra häi bi xi Oja gue di unni. Bi nexpu ja rá häi zehe, ne him mí padi hapu man ní mba. ⁹Νε nu'bu mí zøm bu, pε bin 'yotho bu. Nguetho bi 'yεc'yεi majuani gue ja nín zam bu rá ngu Oja mahets'i. Janangue'a bi hyøtho yu ngum'bø't'e bu. Ne ngutho bi 'yøt'a ra Isaac rá ts'unt'u, ne a ra Jacob rá 'beto, gue ne'u da gombbu ra herencia bi sih majuani ra Abraham. 10 Nguetho nu ra Abraham mí tơ mi da zơni nín zạm bu ja n'da ra dahnini gue mahets'i, din ja høn'bu go njam'bu, gue bi ben Oja ne bi 'yøzehe. 11 Ne bi 'yec'yei majuani a ra Sara, ne gue'a í hyan rá ts'edi Oja a gue dim 'buh rá ts'unt'u. Ne him mí sä xtím 'buh rá t'uhni. gue ya xum bømbe. Pe bim 'bu'a rá ts'unt'u, nguetho bi badi majuani da 'yøt'a bi man Oja. ¹²Ne ngutho ra Abraham, madague'bu ya xí thoh yu pa gue mí sä xtím 'buh yú t'uhni, pegue bi zøni bim 'buh yúm bom'beto emme xun ngu, tengu yu

sø mahɛts'i, o tengu yʉ 'bomu bʉ ja ra ndendeją, gue njongui hät'i da mbede. 13 Ne gätho u bi du 'bu him mani hyan a ran ho bi xi Oja. Pe tengu'bu mí handi yatho bu bí ja a ran ho bi sifi, nguetho mí εc'yεi mbo yú mbui gue majuani din t'unni. Janangue'a bin johya 'bu mí bɛni gue da nu a. Jananjabu bi manse tengu'bu bi thotho ua ja ra ximhäi u. ¹⁴Ne nu u im ma tengu na, i udi gue i 'votho nε i hon man'da ra häi guepu din zai. ¹⁵Nɛ nu'bu xtám bentho a ra häi bu xpí bøn u, mí sä xtá mbeng mahøn'a u 'bu. 16 Pε mí nde n'da ra häi man'da xun ho, gue nde da ma, ra häi mahɛts'i. Janangue'a bin johya Oja gue da 'yɛmbi yú Oja u, ne bi hocpa yú hnini u. ¹⁷⁻¹⁸Ne nu'bu mí ts'äp rá mbui ra Abraham, gue bi sifi bá si a rá ts'unt'u ra Isaac, da mbøspa Oja. Ne mí nde xtá 'yøt'e, nguetho bi 'yɛc'yɛi majuani a Oja, madague'bu bi xifi dim 'buh yum bom'beto 'bu bi xand ra Isaac. ¹⁹Gue'a bi bɛn'a ra Abraham gue i ja rá ts'edi Oja da xox u xun du. Janangue'a tengutho 'bu bi dambeni bu 'bu u xun du a ra Isaac 'bu mam bá si mahøn'a a rá ta. Nε n'da ra hmεpya bi 'yøt' na. ²⁰Nε nangue a bi 'yɛc'yɛi majuani ra Isaac gue da gomhbu rán ho Oja u yú t'uhni, janangue bi sih majuani ra Jacob ne ra Esaú gue da mba majapi. Ne bi sifi 'be'a bi zänba Oja n'da ngu n'da θ. 21 Νε ngutho a ra Jacob, bi 'yɛc'yɛi majuani a ran japi bi man Oja. Ne ní mba bu da du, pe bi thocpa a ran jąpi u yú 'beto, gue'u yú ts'unt'u ra José. Ne bi dande Oja 'bu mí dospa rá va rá tøhø a ra Jacob. ²²Ne a ra José bi 'yec'yei majuani a

HEBREOS 11 426

bi man Oją. Janangue'a nu'bu mí ts'utho da du, bi xi u yú menguhu gue yu israel, gue da zøni da mbeng bu yú häi zehe. Ne bi xifi da thux'a ra ánima 'bu bi bøm bu u, gue'a ra José xí du. ²³Nε rá ta nε rá mbe ra Moisés 'bu mim 'buh ra Moisés, bi 'ya'a rá ts'ʉnt'ʉ an hyuzna. Nɛ him bi numansu a rán t'ɛdi ra ts'ut'abi gue mí ma xtí tho u yú ts'unt'u yu israel. Nguetho midí negui din hocja'i, ne mí ec'yei majuani di jamansu Oja. ²⁴Ne a ra Moisés guexta'a mí ec'yei majuani a Oja. Janangue'a nu'bu mín dan'yohu, him mam bi nde da t'embi rá ts'unt'u a rá t'ixu ra ts'ut'abi bu Egipto, gue xtán zä xtín jase rá ts'edi. Ne gue'a rá t'ixu a ra ts'ut'abi bi dim bu mán t'agui ne bi tede. ²⁵Pε man'da bi nde 'darbu bin unbahu u yú t'uhni Oja a ra Moisés nu'u yú menguhu, xinda gue'bu xtán den rán johya ra ximhäi gue ní mba bu da guadi. 26 Ne nu'bu mín 'yomfɛni ra Moisés, man'da di muui 'bu n'dat'a yun ts'ante da nuui ra Cristo, xinda gue'bu xtí manda 'be'a gätho mí ja bu ra häi Egipto, nguetho man'da mí numanho 'be'a di un Oja m'bejua. ²⁷Ne nangue bi 'yɛc'yɛi majuani ra Moisés, janangue'a bi bøm bu ra häi Egipto, ng him bị zu a nán cug a ra ts'ut'abi. Pε bi hyut'an zambui, nguetho bi bądi in 'youi Oją, madague'bu him mí nu. ²⁸Pe bi 'yec'yei majuani a bi xi Oją a ra Moisés, janangue'a bi 'yøt'a bi xifi, ngue bi manda dí cots'i ra ji bu ja yú 'yojut'i yu israel. Janangue'a him bi thop yú mbudi ts'unt'u u yu israel 'bu mam bá ɛh rám 'bɛhni Oja. Gue'a t'ɛmbi ndabaxjua bi du'mi bi 'yøt'u. 29'Bu

mí 'yɛc'yɛi mbo yʉ mbʉi i ja rá ts'ɛdi a Oja u yu israel, janangue'a bi jap'a Oja bi xocpa n'da ra 'yu bu ja ra deja, gue bi tho u. Pe nu'bu mí 'yena ne u xtá 'dax'ʉ yʉ mɛ egipto, gue'ʉ mí cute, bi comp' ra dehe bi du u buya. ³⁰Nu yʉ israel bi sifi di thɛ'ts'a ra dahnini Jericó gätho nyoto pa, nguetho ma mbä't'i ra jado a ra hnini. Ne nu'a í 'yec'yei majuani a Oja, ne gue'a í yøt' ra jado a 'bu mí gua'a nyoto pa di thɛ'ts'i. Nɛ bi zä bi dap ra hnini u yu israel buya. 31 Pe mí 'bupu n'da ra xisu gue ra Rahab. Nε madague'bu man ra 'yomt'εni mam'bet'o, pe hinga ne a bi tho a 'bu mí tho yú mɛnguhu gue him mí εc'yεi Oja. Nε nu'a í zimmanho u yúm 'bɛhni yʉ israel, nɛ gue a í fadi mí εc'yεi mbo rá mbui a Oja. ³²Νε xun ngu mi'da xtán zä xcá xi ahu, pe hinga xøt'a yu ora ga xi ahu, nangue ra Gedeón ne ra Barac, ne nangue ra Sansón ne ra Jefté, ne nangue ra David ne ra Samuel, ne gätho mi'da yu pøngahyą. 33 Ne mí ęc'yei majuąni Oja u, ne gue'a í hyan rá ts'edi Oja u, gue bi dap yu ja'i mí 'bupu n'danni mi'da yu häi 'bu mín suhmbu. Ne bin ts'ut'abi xun ho. Ne mí ec'yei majuani a bi sifi, janangue'a gätho bi zä bi 'yør buya. Ne nu'u mi'da mí ec'yei majuani a Oja, janangue'a him bi za yu dazate. 34 Ne him bin zø u mi'da bí thøtpu ja ra orno 'bu ɛmmɛ midí thoni nám pa, nguetho bi 'yɛc'yɛi a majuani u. Ne him bi zä bi tho mi'da 'bu mí t'embi xtá tho nangue ra juai. Ne nu'bu mí güent yú ja'i u mi'da, bi jap'a Oja bi zaqui. Ne madague'bu him mí ja yú ts'edi u mi'da, pegue tengu'bu ya mí ja yú ts'edi 'bu mí 'yec'yei majuąni Oją, ne

gue'a í 'da u yu dofui yún suihu. 35 Nε mí 'bu i 'da yu xisu 'da'a n'danni, gue xí du yú t'uhni. Pε bi dambeni u yú t'uhni 'bu mí 'yec'yei majuani u yú mbe. Ne nu'u mi'da bi ndese bi tho nangue'a bi 'benza, ne him bi nde bi goh yú mbui guepu xtá mba ma thøgue, nguetho bi 'yɛc'yei majuani da bømanho bu ja ran date u, da mba bu ja ra te man'da xun ho. 36 Ne nu'a í 'yec'yei majuani u mi'da, ne gue'a í hyät' yun ucpi gue bi t'uspi, nε bi hyät' 'bu mím 'benza, ne'bu bi thu't'i 'da nangue yu cadena ne bi jot'a fädi. ³⁷Nε bi tho θ 'da gue bi mba ma bat'ado. Ne nu'u mi'da bi thengui nde nangue ra thegui. Ne mi'da í tho ra juai 'bu mí sifi da mba ma thøgue. Nε mí 'yotho u mi'da, nε í huεhi thoho u, mí he yu xide'yo, nguetho pa ma ucpi. Ne mí sä ran u gue mí pa ma unbi. Ne gätho u bi hyät'i, nguetho bi 'yɛc'yɛi majuani a Oja. ³⁸Nε him mí fądi gue man'da xʉn ho u, pε man'da di muui u xinda gue'u gätho ra ximhäi. Pe ha sä mí 'yotho bu ja yu uhäi 'bu mí 'dagui, nepu ja yu t'øhø. Ne mí 'bupu ja yu hyado nepu ja yu hyahäi. 39 Pe gätho bi hnumanho u nangue bi 'yɛc'yɛi majuani Oja. Janangue'a i pa mfeni thoho u. Pe him 'bex bi hyan a bi xi a Oja di unni. ⁴⁰Nguetho xí zän Oja 'be'a man'da xun ho da 'yøt'e nangueju, gue 'darbu ní hąmhbu ran ho u mí 'buh maya'bu.

Thocpa thoho ga tenhdu a ma ngurpihu ra Jesús

Janangue'a nuju i 'bui xun ngu yu ją'i gue xu 'yurcahu a majuani Oja tengu ja dá xi ahu.

Janangue'a ga 'ueju ts'u gätho di paju, ne yu ts'oqui gue tengu'bu an thu't'i ma guahu, n'dahma ga häthu dan tihmbu nangue'a ran taha bin 'daju guepu go him min sä. ²Nɛ thocpa thoho ga hanthu a ma ngurpihu ra Jesús, janangue'a da zä n'dat'a ga øthu buya. Ne di jaju ga øthu tengu bi 'yøzɛhɛ, gue bi 'yɛc'yɛi majuani a Oja, nɛ gue'a í hyät' ran unbi bu ja ra pont'i a. Nε nu'a ran date bi nu, yún date u yu ts'om'bäi, emme ma ucpi a. Pe him bi zu da nu a tengu a, nguetho mí padi din ja ran johya m'bejua nangueju. Ne nuya bí 'bupu mahets'i 'darbu ní mandaui Oja. Nε guepu i sixcahu bu. ³Nε gam bɛmhbu tengu bi 'yøt' ra Jesús, bi hyät 'bu mí ts'ui, ne'bu bin unba bu 'buh yu ts'om'bäi. Janangue'a hin dan xømbuihu, ne hin gam bemhbu gue ga penju. ⁴Pe nu ahu hinga ná es'hu yu ts'oqui guepu gdí tuhu. Pe dami 'yɛs'hu u, madague'bu gdí tuhu 'da ahu. 5Ha gá pumbenihu a ran zofo gue i xiju Oja, gue yú t'uhni gahu a, tengu mam bu ja ra t'ohni bu i ɛna:

> Ma ts'ʉnt'ʉ i, dami bɛ̞ni 'bɛ'a dí mbɛp'a a ni Hmu, gue'bʉ bi xi i hapʉ gá 'bɛdi.

Ne xín gui säman'u 'bu bi zu i.

6 Nu'a ra Hmu i xänba u di
huequi,

ne i fe u gätho u i embi yú t'uhni.

⁷Dami hyäthu u yum fɛi, nguetho gue'u i xän'nahu u. Nu Oją i ɛna yú t'uhni ahu. Nɛ jo'o n'da ra t'uhni gue hin da xänba rá ta nangue yum fɛi. ⁸Pɛ nu'bu hin da mbɛp'ahu Oją, tengu u gätho yú t'uhni i fɛi, nu'bu,

HEBREOS 12 428

masque hin yú t'uhni ahu 'bu. Guín jahu tengu ra t'uhni gue hinga mfadi to'o rá ta. 9Ne man'da, nu'bu mín t'uhnihu, gue'bu mí mbegba ma tahu dám 'buhmbu ua ja ra häi, dá numansuhu u. Hanja man'da hin dín umhbu da mbegbahu Oja, rá Ta ma mbuihu, janangue ga timhbu ra te ma mbuihu. 10 Nu ma tahu ua ja ra ximhäi bi mbegbahu 'bu n'dandi, gue mím beni xun ho. Pe nu Oja 'bu i fegbahu, zai xun ho i ørcahu, gue di jaju xtán hothogahu tengu a. 11 Majuani hin dí ɛmhbu xun ho a ram fei 'bu ra ora dí sähu a, nguetho xun u. Pe nu'bu bin hoh ma mbuihu nangue ram fei, ne dí 'bumanhohu buya, ne i hu ma mbuihu.

Nts'utho 'bu ga hεhmbu rá nde Oją

¹²⁻¹³ Janangue'a dan ɛhyahʉ mahøn'a gue ga thoju a rá 'bɛfi Oja, nε hin ga 'uehmbu. Pε ga haxhu ra 'yu xun juani. Nubuya nu ni guahu guí hemfu, mí ena xtá 'uagui, pegue da yani, da hya ra ts'edi mahøn'a. ¹⁴Ne gui hyomhbu hin gui dumhbu n'da ra sui. Ne gui hyomhbu ra hogambui. Nguetho nu'a hin'yu ra hogambui hin da zä da nu a ra Hmu. ¹⁵Nɛ 'da gdám fäxta nin 'yomfenihu n'da ngu n'da ahu, janangue'a hin dim 'bu i 'da ahu hin da nde rá mate Oja. Ne xínga n'da ahu din ja tengu n'da rá 'yu ra ts'oqui, gue hin di nequi 'bu rá mbudi, pε nu'bu bi bøts'e din xandi, di ts'on u mi'da buya. 16 Ne dam fähmbu njon dan 'yomt'enihu. Ne xín ga samhbu a rá mate Oją, tengu bi 'yøt' ra Esaú, gue í pä a ra tuhu a rán japi mí ena xtí un'na Oja, gue

rá mbudi ts'unt'u ra Isaac. 17 Ne guí pahmbu 'bɛ'a bi 'yøt' ra Esaú, gue m'bejua bi nde a ran japi mí ena xtí un'na rá ta. Pɛ him mam bi zä bi un'na. Ne ts'edi bin zoni, pe him bi dịni 'bɛ'a xtá 'yøt' mahøn'a gue xtá hyan'a. 18 Gam bemhbu 'be'a bi 'yøt' yu israel, bi zøm bu ja n'da ra t'øhø ua ja ra ximhäi, guepu bi de ra sibi nts'utho, ne bi 'bexui yu güi tengu 'bu ra xui, ne bin ja ra ndønthi 'bu mi sih yún t'ɛdi Oja u. Pegue n'da ra hmepya a tengutho bu rá ngu Oja gue emme xun duxqui. ¹⁹Ne bi 'yøh ra thuxi, ne rá nde Oja bi 'yø u. Ne nu'bu mí 'yø a rá nde u yu israel, εmmε bi 'yäh ra mate gue hin da 'yøh mahøn'a, nguetho emme bin su. 20 Him mí hät'i da 'vø a ra nde bi xifi, bi 'yɛna: "Xinga n'da ra ja'i ne xing yu zu'ue da zä da däcua, nu'bu da däcua, 'bexque da tho, ne da mba ma 'ye'mado o gue da mba ma sunza." 21 Emme nts'utho 'be'a bin ja bu. Nese ra Moisés bi 'yɛna: "Dí fɛt'i gue dín su." ²²Pε nuju ya njuantho rá hnini Oja bu mahets'i dí cuthu, i papu ma mbuihu, gue Oja zai 'bui. Ne i t'embi ra t'øhø Sión a rá hnini Oja, ne i t'embi Jerusalén bu mahets'i. Ne dá sømhbu bu 'buh yúm 'behni Oja mahets'i gue yu mahuahi thoho, guepu di munts'i i thande Oja emme di johya. ²³Ne dá cuthu bu an thuts'i ma thuhuhu bu mahets'i, guepu dám petihu gätho to'o bi hyan ra herencia bi un Oja. Nε dá cuthu bu bí 'bu Oja ra Ze'mi di juanbi gätho. Nepu 'buh yú mbui u i tu, gue nu'u bi t'embi xun ho 'bu mí hoc'a Oją. 24 Nε dá cuthu bu 'buh ra Jesús ma hocpatehu

bu bí 'bu a i ørcahu ran hoqui ma'da'yo. Ne dí cuthu nangue rá ji ra Jesús 'bu mí tho, í pungahu Oją a. Janangue'a man'da xun ho i xiju rá ji 'bu mí tho, xinda gue'a rá ji ra Abel 'bu mí tho, nu'a i ma di unba a to bi hyo a. ²⁵Janangue'a i jatho dam fähmbu hin ga hehmbu a rá nde a in zoju ya. Gam bɛmhbu him bi zä bi zo a ran unbi u bi mbesta a rá nde Oja, 'bu mí ts'ocua ja ra ximhäi. Janangue'a 'be xíngui ts'u da zä ga sohmbu ran unbi 'bu ga festahu a Oją, nguetho mahęts'i bu in zoju ya. ²⁶Nu'bu mí man yun t'edi Oja bu ja ra t'øhø, bi japi bi 'yan ra häi. Pe nuya i en Oją: "Man'dandį ga japi di 'yani, pe hinga høn ra häi, pe ne mahets'i," bi 'yɛn Oją. 27 Nɛ nu'a 'bɛ'a gätho hingui du, da mba ma bunt'i. Ne din zam bu u hingui sä da mba ma 'ueque, gue nu'u 'bɛ'a gätho bi zän Oja gue din zam bu. ²⁸Ne bin 'daju bu di manda Oją gue hingui sä da mba ma 'ueque. Janangue'a ga xihmbu jamadi Oja, ne ga thandehu ngue ga numansuhu ne ga suhu. Ne gue'a numanho a buya. 29 Nguetho nu ma Ojąhu di juadi 'be'a hingui numanho tengu ra sibi.

Ga øthu a dí numanhoju Oją

O guí ɛ'ts'a gnán huɛju n'da ngu n'da ahu tengu'bu guidín cuhu. ²Nɛ guim bɛmhbu gui säyabahu ja ni ngumhbu to'o da zøm bu. Nɛ nu'u 'da njabu mí øt'e, bi zin u 'da yúm 'bɛhni Oją bá nɛxpu mahɛts'i nɛ him mí padi. ³Nɛ dami bɛmhbu u yu ofädi, ngue tengu'bu n'da gnan ofädithohu. Nɛ guim bɛmhbu u bi mba ma

unbi, nguetho nε ahu i ja ni ja'ihu gue sä da mba ma un'ni ahu. ⁴Ne gätho ahu guin numansuhu a ran thạti gá 'yợthu ni xisuhu, ne a bi 'yøt'u mi'da. Ne gam 'bumanho nangue nin thatihu, njon di ts'on a. Nguetho di unba Oja u to'o da 'yøt' ran 'yomt'eni, ne u hinga na din thati, ne u xun thati nu'bu i øt' ran 'yomt'eni. 5Ne 'yo guí numanhohu xun ngu ra mbeti. Pe gan johyahu nangue hangu ts'u i ja ahu. Nguetho: "Njam'bu ga hec'ahu, thocpa thoho ga jamansu ahu," bi 'yɛn Oja. 6 Janangue'a sä dan johyahu 'bu dí emhbu:

I fäxcahʉ ra Hmu, nε hin ga suhʉ 'bε'a da zä da 'yørcahʉ yʉ ją'i.

⁷Dami bɛmhbʉ 'bɛ'a bi 'yøt'ʉ yʉ ngurpi gue bi xi ahu rám hman Oją. Ne guim bemhbu 'be'a bi bøni nangue ra te man nám 'bu u. Ne gui thoju a bi 'yut'ahu, nangue bi 'yęc'yei majuąni a Oją u. ⁸Nu ra Jesucristo hingui dim pädi, gue'bu go maya'bu, nehya ne gätho yu pa høn'bu go njam'bu. ⁹Janangue'a hin gan hyehmbu da ts'ix ahu bu ma'ueni, guepu i hman yum hma 'dahma 'dan'yo ne hingam fadi. Pe nu'a ná bemhbu rá mate Oja gue'a ní zac ma mbuihu a, xinda gue'u yun t'ɛdi gue 'bɛ'a i ts'i. Nguetho njo'o to'o xí zac yú mbui 'bu supi 'bu ja a i si. ¹⁰Pegue i jaju n'da ran ts'ihme, tengu ra hmepya gue ra 'bøts'e mí øt' yu mbäją bu ja ra niją maya'bu, him mí ja ran t'ɛdi da zi. ¹¹Pε nu rá hmumbäją yʉ israel 'bʉ mí mbøspa Oją nangue yu ts'oqui, bi dexpu mbo a rá ji u yu zu'ue, guepu ja ra cuarto man'da xun

HEBREOS 13 430

duxqui. Pe nu yú ngø u yu zu'ue mí zø bu ndehnini. ¹²Ne gue'a bi 'yøt' ra Jesús, bin unbi bi du bu ndehnini bu 'buh yu israel. Ne gue'a rá jise í hoc yu ja'i. ¹³Pε ga mbähä ga tenhdu bu ndehnini bu 'buh ra Jesús, tengu'bu n'da na 'bengadahu bu ma'ueni. ¹⁴Nguetho nuua ja ra ximhäi hin'yu ua n'da ma hninihu gue din zại xun ho. Pɛ dí homhbu ra dahnini gue njam'bu da gua a, guepu nín zamhbu bu. 15 Ne nde'bu thocpa thoho ga thandehu Oja nangue ma ndehu, ne ga xihmbu ra jamadi. Ne di thoc'a mam hmamhbu a ra Jesucristo, tengu'bu di un Oja ma 'bøts'ehu. ¹⁶Νε hin dam pumbenihu a na øthu ran ho. nε hin dam pumbεnihu ga comhbu 'bɛ'a jaju, nguetho nɛ'u tengu'bu yu 'bøts'e i numanho Oja u. ¹⁷Ne gui 'yothu a xi a ni ngurpihu, ne gui pahmbu ja yún t'ɛdi da xi ahu 'bɛ'a gui 'yøthʉ. Nguetho i fät'a ni mbuihu u, ne i jatho di däp Oją ra güenda nangue ahu. Gui 'yøthu a dán johya ni ngurpihu, ne hin da du yú mbui. Nguetho nu'bu hin gui 'yøthu a, xín da bømanho ahu 'bu. ¹⁸'Yäfu rám fäts'i Oja nanguecähe, nguetho n'dat'a dím bembbe ga

tɛnhde a, nɛ dí nde ga øthe xʉn ho gätho. ¹⁹Dí ä ahʉ ra mate, gue ɛ̞mmɛ gui 'yäfʉ Oja di jaqui ga mbagä bʉ n'dihi.

I äp rán jąpi Oją u yú cu

²⁰Nu Oją ra hocpate a, bi xoxpu 'bu u xun du a ma Hmuhu ra Jesucristo, nu'a di jamansuc ma mbuihu. Ne nu'a rá ji í hoc'a ran hoqui njam'bu da guadi. ²¹Ne dí äp rá mate Oja da 'yøt'ahu hin hapu gui 'bɛhmbʉ, n'dahma da zä gui 'yøthu rá pähä a. Ne dí äp rá mate da 'yørcahu 'bɛ'a gätho i nde a rá ts'edi ra Jesucristo. Ga numansuhu Oja gätho yu pa mazai. Ne hønt'a gam bemhbu a. ²²Ma zi cu ahu, dí ä ahu ra mate hin gan xømbuihu gui 'yøhmbu na ran zofo, nguetho nuna ram hma dá ot'ahu hingui ngu 'bɛ'a ma. 23 Ja n'da ram hma dí nde ga xi ahu, nu'a man 'yohuhu ra Timoteo ya bi so'ts'i. Nu'bu da zøcua n'dihi, ga six 'bu dá mba bu. ²⁴Zenguagahu ts'u bu gätho ni ngurpihu, ne gätho u yu cu gue ma mi'yec'yeihu. Nehya bá nexpu Italia i pen'nahu ran zengua. ²⁵Ne dí äp rán japi Oja nangue gätho ahu. Ne hønt'a dí xi ahu ya.

SANTIAGO

Ra søcuą bi 'yo't'a ra Jacobo Santiago

Ran zengua

Nugä drá Jacobogä, rá 'yɛhɛgä Oją nɛ ma Hmuhu ra Jesucristo. Nɛ hønbu go hapu gá mbähä n'da ngu n'da ahu, dí zengua ahu ma mɛni ahu, ngue n'dat'u mam bombøtahu u 'dɛ'mayoho yú ts'unt'u ra Israel.

Di 'daju ran 'yomfeni Oją

²Ma zi cu ahʉ, nde'bʉ dan johyahu 'bu dí sähu yun unbi, hønt'a go man unbi dín nuhu. ³Nguetho dí pahmbu nu'bu da ts'äc ma t'ɛc'yɛihʉ, gue'a ní jajʉ ga häthʉ xun ho a. ⁴Pε i jatho ga häthu xun ho nε hin gan suhu, nε gue'a dín te ma mbuihu a, ne di haju xun ho ra ts'edi, ne nte ga 'behmbu buya. ⁵Pe nu'bu hin dí pahmbu nda'a xun ho ga øthu, ga äfu Oja ran 'yomfɛni nɛ di 'dajʉ a. Nguetho di unni xun ho to'o da 'yäpi, ne hin di japi da mbe'ts' rá sä n'da. ⁶Pe jatho n'dat'a gam bemhbu 'bu ja 'be'a dí äfu, ne hinga 'dahma'dan'yo gam bemhbu. Hin ga øthu tengu ra t'øthe bu ja ra dądądehe, hønbu go hapu ní 'yen ran dahi. ⁷Nu ra

ja'i i øt'e tengu a, sä im beni di un'na i äp a Oją, pε nte di unni. ⁸Nguetho 'dahma'dan'yo im bɛ̞nsɛ, nε hingui sä n'dat'a da 'yøt'e. ⁹Pe emme di johya n'da zi hyoya 'yɛc'yɛi, nguetho i padi ɛmmɛ xʉn ngu di muui bu nan nu Oja. ¹⁰Ne'a ra membeti 'yec'yei, emme di johya 'bu mi bądi hinga gue'a rá mbeti ní numanho Oja a, ngue nu rá mbeti tengu vú døni u vu paxi i høe. 11 Ngue nu'bu xpám bøx ra hyadi ɛmmɛ xum pa, di hmang yu paxi ne i høh yú døni buya, ne him man di necmanho. Din jabu n'da ra membeti 'bu hønt'a ra mbeti in numanho, madague'bu di thoqui dim pefi, pe di 'bedi 'be'a gätho i pe'ts'i.

Ga häthu 'bu bi ts'äju

¹²Nu'bu ga häthu yun unbi, dan johyahu buya. Nguetho nu'bu mi ts'äju nε dá häthu, ya din 'daju ra temaząi, tengu bi man Oją di 'daju 'bu hønt'a gam bεmhbu a.

Dím bensehu yu ts'oqui

¹³Nu'bʉ 'bʉ'a n'da da bɛ̞ni da 'yøt'a n'da ra ts'oqui, pɛ hin da

'yɛna Oja bi bɛnbi. Nguetho xʉn ho Oja nε hingui xifi da 'yøt' ra ts'oqui n'da ra ja'i, ne xín da zä da si Oja da 'yøt' ra ts'oqui. ¹⁴Pε n'da ngu n'da yu ja'i 'bu im beni da 'yøt' yu ts'oqui, pe bin 'yørpazehe nangue rán 'yomfeni se. 15 Ne nu'a 'bε'a bi numanho sε, nε nu'bʉ mi beni da 'yøt'e, ne gue'a dí mbuxca yu ts'oqui rá mbui a. Ne nu'bu mi 'yøt'u yu ts'oqui mi bɛni, nɛ man'da bi thoqui bi 'yør buya, nε gue'a dí nu ran unbi mazai a buya. 16 Ma zi cu ahu, hin dan hyäzehehu 'bu dí øthu yu ts'oqui, gue'a hin gam bemhbu Oja di 'becpahu. 17 Nguetho xun hotho 'be'a gätho di 'daju Oja, nε hønt'u gätho xun ho bí nexpu bí 'bu Oja, ngue bi zän yu nyot'i ua ja ra häi. Nu'u ja'bu di 'beh yun nequi 'bu xu 'bät'u, pe nu Oja njam'bu di 'beh ran ho. ¹⁸Rá pähä zehe Oja bi xandgahu 'bu má hamhbu rám hma majuani, ne yú t'uhni gahu a buya. Janangue'a man'da xun hoju xinda gue'u mi'da gätho bi 'yøt'e.

Dan xähmbu ram hma ne ga øthu yun thehu

19 Gue'a dí pąhmbu a, ma zi cu ahu. Janangue'a dan ɛhya dan xähmbu a rám hma, xinda gue'bu go dan yasɛhu, ogue ga ɛmhbu go dí pasɛhu ngue dan junthu.
20 Nguetho nu'bu dadín junthu, hingui sä ga øthu 'be'a nde Oją.
21 Pɛ ga ɛshu a ná øthu yu ts'oqui, nɛ ran ts'o zại dá bɛmhbu. Nɛ hin dan 'yɛzɛhɛhu. Janangue'a da zä ga cu't' ma mbuihu a ram hma, tengu'bu n'da ra hmudä da thupu, nɛ din te bu. Nɛ gue'a dí pøcpa ma mbuihu a buya. 22 Pɛ hinga

høntho dan xäthohu ram hma. Nguetho dán hyäzehehu 'bu dím bemhbu hin'yu man'da ga øthu. Pe i jatho thocpa thoho ga øthu yún thehu a ram hma dadín xähmbu. ²³Nguetho nu'bu dí ɛmhbu dadín xähmbu ram hma, ne hin dí øthu yún thehu, dadí pumbeni thohu a dán xähmbu 'bu. Tengu'bu dí hethu ran hyedä ma hmihu, ne hin dí zamhbu bu. 24 Dá nuhma a ma hmihu, pe 'bex dá pumbenihu 'bu má 'uehmbu. ²⁵Pε nu'bu dan zamhbu a ra 'da'yomhma, gue'a di zeju ga øthu yún thehu a. Ne nu'bu zại dí øthu a, ne hin dí pumbenihu a, di jacpahu Oja buya nangue 'bɛ'a gätho dí øthu. ²⁶Nu'bu sä ena ørpa rá 'befi Oja n'da, ne hin di jamansu 'bε'a ma, din hyäzεhε 'bu, nε nte ní mbat'a ní 'yørpa rá 'bɛfi Oją 'bu. ²⁷Pε nuna majuani rá 'bεfi Oja ma Tahu da numanho 'bu ga fäxhu yu hyoya t'uhni, ne yu xisu xun du yú ndø, ngue in nu ran unbi. Ne nde'bu dam fäsehu hin di ts'onga man 'yomfenihu rán t'øt'e ra ximhäi.

Hin ga huandahu to'o gan numanhohu

Ma zi cu ahu, nu'bu dí εc'yεihu ma Hmuhu ra
Jesucristo ngue mixte xun ho
a, nde'bu ga øthu tengu i øt'a,
ngue hin ga huandahu to'o dín
numansuhu. ²Xi'bu da zøm bu
ja mam petihu n'da ran 'yohu i
fo rá 'yε ram fo'yε εmmε xum
hmadi, nε mahotho rá he. Nε da
zøm bu n'da zi hyoya hingui ho rá
he. ³Nε man'da gan numanhohu a
mahotho rá he, xinda gue'a n'da
zi hyoya. Nε ga εmfu a mahotho

433 SANTIAGO 2

rá he: "Nu'i n'yø, damin säya ts'u ua ja ran thuts'i," ga ɛmfu. Nɛ nu'a zi hyoya buya: "Nu'e, damím 'bäh nu ogue damí hyuh nu häi ja rá hyo ran thuts'i," ga ɛmfu a buya. ⁴Ha hin dím bɛmhbu ngue yoho man t'øt'ehu 'bu dí samhbu a nan hyoya u 'da, ne nu'a na membeti u 'da, gue'a na ɛspahu u. Ne guexta'a ra ts'oqui dí øthu 'bu dí huandahu a dín numanhohu. 5Ma zi cu ahu, damí 'yøhmbu na ga xi ahu. Ha him bi huan Oją u xun ngu i hyoya bu na nu ra ximhäi, ngue da din a man'da di muui, ngue da gomhbu yún japi u di un yú t'uhni Oja. Ne gue'a bi ma majuani di un'ndu to'o gätho da ben a. 6Pe nuya gá 'yasäbahu yu hyoya. Ha hin dí pahmbu ngue gue'u yu membeti di ungahu, ne i sixcahu bu ja yu ngunts'ut'abi. ⁷Ha hinga gue'u yu membeti dí øhmbu im man ra ts'ore nangue rá hoga thuhu ma Hmuhu ra Cristo. 8Pe: "Ga huec ma miją'ihu tengutho bu na huęczehe ma ja'ihu." Guehna xun ho ga øthu na, nguetho rán t'ɛdi ra Cristo mixte thoho a, tengu man t'o't'i bu rám hman Oją. ⁹Pε nu'bu hinga gätho yu ją'i dadí hugju, ra ts'oqui a dí øthu 'bu, ne dín dupatehu a ran t'ɛdi ngue im ma gätho 'da i gu bu dán huεju. ¹⁰Pε dín ndehu made tho ga øthu gätho rán t'edi Oja. Pe madahønt'a n'datho rán t'edi Oją hin dá øthu, ya dín dupatethu gätho rán t'edi Oja 'bu. ¹¹Ngubu dí ørpahu yún t'edi Oja ngue bi 'yena: "O guí øthu ran 'yomt'eni," ne: "O guí hącpahu rá te ni miją'ihu," bi 'yɛna. Madague'bu hin dí øthu ran 'yomt'eni, pe dí hacpahu rá te ma

mija'ihu, guemhma dín dupatethu gätho rán t'ɛdi Oja 'bu. Nguetho n'dat'a Oja bi ma gätho yún t'ɛdi. 12 Pɛ nu'a rán t'ɛdi ra Cristo, gue'a di zɛju ga øthu yún thɛhu. Nɛ gue'a rán t'ɛdi dí 'yängahu Oja a 'bu dá øthu o hin'na. Janangue'a ga jamansuhu a dím mamhbu nɛ'a dí øthu. 13 Nɛ nu'bu him bi 'yøt' ran huɛcate n'da, nɛ hingui ngu 'bɛ'a dí huɛc Oja a 'bu bi juanbi. Pɛ nu'bu bi 'yøt' ran huɛcate n'da, da bømanho 'bu bi juanba Oja a.

Hingui ho 'bu nte n'youi yun t'øt'e rá t'ec'yei n'da

¹⁴Ma zi cu ahu, 'bɛ'a gue ní mba a i øt' i 'da sä εna ja yú t'εc'yεi, pε hingui øt'u yún thehu. Hin da yan Oja n'da 'bu sä ena ja rá t'ec'yei. ¹⁵⁻¹⁶Xi'bʉ 'bʉ'a n'da ma cuhʉ ra 'yahe ne sä ra thuhu. Ne ga emfu: "Ní mba, bá he ni he, ne bán sihme, da hyu ni mbui," ga ɛmfu. Pɛ nte dá unhdu 'be'a honi. 'Be'a gue ní mba a dá ørpahu 'bu. ¹⁷In jabu n'da 'bu hingui øt' yun t'øt'e rán säui rá t'ec'yei, nu rá t'ec'yei nte di muui, tengu'bu n'da ra du ngue hingui di 'yani. ¹⁸Pe nu'bu gui 'yenju: "Nu'i ja ni hogant'øt'e, pe nugähe dí ec'yei mbo ma mbuihe." Ne ga xi'ahu buya, damí 'yurca ni t'ec'yei ngue nte n'youi nin t'øt'ehu, gan nugä. Nugä da zä ga ut ahu yun t'øt'e dí øt'ä, janangue'a di nequi ma t'ɛc'yɛigä ngue majuani a. 19 Guí pahmbu i 'bu Oja, pε hin dí gua a zi ts'u. Nguetho ne'u yu zithu i pądi i 'bu Oja, pε εmmε di fεt'i, nguetho yún suihu Oją u. 20 Gyú 'yambuihu, ha hin guí pahmbu ngue xingui ts'u nte di muui ni t'ec'yeihu 'bu hin te

guí øthu. ²¹Nde'bu gam bɛmhbu ts'u nangue mam bombøtahu ra Abraham. Ja bi nequi a xmí pa Oja xun ho 'bu mi 'yøt'a bi xifi, ngue bi gäxpu ja ra do a Isaac rá ts'unt'u, ngue ena xtá hyo xtí un'na Oja. ²²Nangue bi 'yɛ̞c'yɛ̞i mbo rá mbʉi, bin ja ra ts'edi buya ngue da 'yøt'u yún thεhu. Janangue'a rám pε ra t'ec'yei u yun t'øt'e. 23 Ne gue'a mi mam bu ja rám hman Oja, bi 'yɛna: "Nu ra Abraham bi 'yɛc'yɛi a bi man Oja, janangue'a bi 'yemp Oja xun ho," ne bi 'yembi rá amigo xun ho Oja buya. ²⁴Dí pahmbu ya, i emp Oja xun ho n'da ra ja'i 'bu øt' rán säui rá t'ec'yei, ne hinga sä da 'yena εc'yεi Oja. ²⁵Ximangutho a Rahab, ngue ra xisu zai min 'yomt'eni mam 'bεt'o. Pε bi 'yεmp Oją xun ho 'bu midí nequi rá t'ec'yei, 'bu mi 'yøt'a ran ho bi 'yøt'e, ngue bi jamansu u yu 'yec'yei 'bu mi mba bá aspa rá hnini. Ne bá uti n'dan'yo ra 'yu bá hạx 'bu mam bá pengui, janangue'a him bi mba mfɛnt'i u. ²⁶Ja ga pahmbu buya ngue hingui ho rá t'ec'yei n'da 'bu hingui øt'u yún thehu, tengu n'da ra ja'i xun du ngue hin'yu bu rá mbui.

Ga samzehe ma janihu

Ma zi cu ahu, nde'bu hinga gätho dan xänbatehu bu ja ram peti. Nguetho dí pahmbu Oja da nu 'be'a dí øthu, ne nuje, man'da da 'yängahe Oja, xinda gue'bu hin xcán xänbatehe. ²Ne gätho gahu xun ngu yu nidi ja'bu dí øthu yu ts'oqui. Pe nu'bu 'bu'a n'da xinga n'da ra ts'oqui im ma, ya xun te xun ho rá mbui a, ne i padi di jamansu xun ho gätho i øt'a 'bu.

³Tengu'bu dí cärbahu yún ts'are yu fani, da 'yøt'a dí xihmbu buya, ne hinga hønt'a rá nde di 'bä't'i, ρε 'da dí 'bäthoho. Ngutho 'bu i sąmzεhε rá jani n'da, ne hinga hønt'a rám hma da badi da zammi, pe da da badi di jamansu xun ho gatho i øt'e. ⁴Nɛ tengu ra dabarco, madague'a xu ndoho, ne ts'edi ran dahi i joni, pε εmmε zicuε a ní mba ma 'yoni, pε hønbu go da ndepe dí mba a di 'yoni. ⁵Ngutho ma janihu, zicue, pe emme xun ngu da bøni nangue 'bε'a da ma. O tengu'bu n'da ra despi zicue, pe emme xun ngu 'be'a da 'yudi, ne da zä da 'yu a n'da ra xanthø xu ndoho. ⁶Nguetho ma janihu tengu'bu n'da ra sibi. Ne man'da xun ts'o øt' ma janihu xinda gue'a ma 'yɛhʉ ogue ma guahʉ. Nɛ gue'a ní ts'oni gätho dí øthu a, ne di xand ran ts'o gätho ra ximhäi, ngue di benba a ra zithu. ⁷Pe nu yu ja'i man'da da zä di maxubi hønt'a go má zate ne yu doja ne yu pozu ne yu huą. ⁸Pε nu rá jąni n'da, njo'o to da zä di hat ra 'yu. Ne i hote, tengu n'da ra pozu, emme in cue, ran date a rá nde. ⁹Nangue ma janihu sä dí emhbu dí espahu Oja ma Tahu, pe nε dí äfu ra 'yanthi ma mija'ihu. Ρε nu'u, bi zän'na Oja u, bi ndepe dim 'bui tengu tho Oja u. 10 N'dat'a ma ndehu ná vahu 'bu dí espahu Oja ne'bu dí äfu ra 'yanthi ma mija'ihu. Pe ma zi cu ahu, hingui sä ga øthu tengu a. 11 Ha i sä 'darbu da bøhmi ra dehe xun ho a ra dehe xun xa. ¹²O 'bɛ'a di ja yʉ za'ixi, ma zi cu ahu, ha ne'u yu peni i zupu. O xi n'da ra zabot'i, ha zupu yu ixi. Xíngui sä 'darbu da bøhmi ra dehe xun ho a hingui ho.

Bí nexpu bí 'bu Oją ran 'yomfeni xun ho

¹³Nu'bu dí pahmbu ran 'yomfeni, pε ga uhmbu 'bu, nangue ran hocją'i ga øthu, nε hin dan 'yɛzɛhɛhʉ, guepʉ da fadi majuani i ja man 'yomfεnihu. 14Pε nu'bu xun ju dím benba ma mija'ihu nangue ran ts'eya, ne dadí mispahu, ne sä dí emhbu ja man 'yomfenihu, pe ra fehni a dím mamhbu 'bu. 15 Pε nuna ra ts'on'yomfeni na him bí nexpu bí 'bu Oją, pe bi nequida ua ja ra ximhäi, ne dá bense ma mbuihu, nε ra zithu bi bεngahu tengu na. ¹⁶Nguetho nu'bu dí øthu ran ts'eya, nε dín nde dam mixtehu, nu'bu, dí øthu gätho yu ts'oqui 'bu, ne yu sui. ¹⁷Pe nu ran 'yomfeni di 'daju Oja, n'dat'a gam bemhbu, ne ga hocpahu rá mbui ma mija'ihu, ne gan numanhohu u, ne din ja man huεcatehu, nε ga fäxhu u, nε hin da goh ma mbuihu 'bu ja a dí xihmbu u, ne hin ga häthu u. 18 Pe nu'bu jante thoho ga hocpahu rá mbui ma mija'ihu, dí øthu tengu'bu dí pomhbu ra hmudä dí bøx ran ho 'b#.

Hin ga øthu rá pähä ra ximhäi

Ha hin guí pạhmbu hapu di nɛqui u yun sui guí øthu, nɛ yun heque. Ha hinga gue'u di ho ni mbui zɛhɛhu a gnín suhmbu.

Nu'a hin ní zä gui timhbu a guín ndehu, gue'a gnín hote thohohu a. Nɛ gue'a ran ts'ɛya a gnín suhmbu 'nɛ gnín tunhdu, nguetho hingui sä gui tạhmbu a guín ndehu nangue ni pähä zɛhɛhu. Pɛ hin guí timhbu ngue hin guí äfu Oja. 3Pɛ

madague'bu guí äfu Oja a guín ndesεhu, pε hin di 'da'ahu, nguetho hingui ho guím bemhbu, guín nde gui xạnd ni pähä zehehu. 4Sä guí emhbu hønt'a Oja guím bemhbu, ne ya guí ten thohohu ra ximhäi. Ha hin guí pąhmbu gadín suhmbu Oją 'bu guín numanhothu ra ximhäi. ⁵Uague guí ɛmhbʉ säti thoho bi man rá t'ohni Oja ngue bi 'yɛna: "Pe emme dín ndepe da bengui, janangue'a dá un ma Hogandahi di huęc'u, ne di jamansup yú mbui," bi 'yɛn Oją. 6Pe di zet'a ni mbuihu Oja, n'damhma da zä hønt'a guim bemhbu a. Janangue'a en Oja, di un rá mate n'da 'bu hin din 'yɛzɛhɛ, pɛ da zu a n'da 'bu din 'yezehe, i en rá t'ohni Oja. ⁷Damin unsehu ya ngue di manda ahu Oją, ne dami suhmbu ra zithu, da 'dagui nangue'ahu. ⁸Zai damim bemhbu ngue 'darbu guí 'buhmbu Oja, ne zai da hyut'a ni mbuihu buya. Dami 'yeshu yu ts'oqui guí øthu, nε hingui yoho da ben ni mbuihu. ⁹Pe i jatho da du ma mbuihu nguetho dyú ts'om'bäi hu. Ne dan zomhbu, hingui sä dan thethohu. Nu ma thedehu dim pommi ra ts'oni, ne nu man johyahu dim pommi ra dumbui. 10 Ne ga øthu ngue hin'yu ma ts'edi zehehu bu ja rá hmi Oja. Ga äfu ra punbi, janangue'a di pungahu nε di jaju dan johyahu buya.

Hin dan c'aman'uhu

11 Ma zi cu ahu, o gadín c'aman'uhu, nguetho nu'bu gadín c'aman'uhu, masque guím bɛmhbu hingui ho rán t'ɛdi Oja i ɛna dan huɛju. Nɛ nu'bu hin dí øthu rán t'ɛdi Oja, ɛna gue'bu jasɛ man t'ɛdihu 'bu. 12 Pɛ hønt'a n'da sä di 'daju yun t'ɛdi, nguetho Oja a, nɛ hønt'a sä da yan'a n'da nɛ i sä di jua'a n'da. Pɛ ha dím bɛmhbu dyu ojahu ngue sä ga ɛmhbu ja yú ts'oqui u 'da.

Hin dí hand bu ní 'yeh man zaquihu

¹³Mbähä dan 'yomfɛnihʉ ts'ʉ ya, nguetho dí enthohu: "Nuya ogue nixudi ga mbähä n'danni, dam 'buhmbu n'da jeya bu, ne dam pehmbu, ga tahmbu," dadin 'yemfu. ¹⁴Pε hingui sä gam mamhbu tengu a, nguetho ya hin dí pahmbu 'be'a ga øthu, ne hin dí hand bu ní 'yeh man zaquihu. Tengu tho n'da ra güi, guín nu, jabu, ne xø gán nu, hin'yu bu. Njarbu n'da ra ja'i. ¹⁵Pε nde'bu ga ɛmhbu: "Nu'bu da nde Oja, dam 'buhmbu ts'u, ne din ja 'be'a da zä ga øthu buya." Guehna gam mamhbu na ya. 16 Pe dán 'yezehehu 'bu hin dá äfu Oja 'bɛ'a da zä ga øthu. Pe ra ts'oqui a. 17 Nu'bu dí pahmbu a ran ho, ne hin dí øthu a, ra ts'oqui a 'bu.

N'da ran zofo i sih yu membeti

Damin 'yomfɛnihu ts'u gyu mɛmbɛtihu, gan zomhbu nɛ ga mbahmbu nguetho nts'utho ra 'yanthi guin nuhu. ²Nu'a 'bɛ'a gä guí pɛshu tengu'bu xu 'ya bu nam bɛn Oja, nɛ ni hehu tengu'bu xun za yu zu'uɛ. ³Nu ni mbɛtihu xun ts'om bu na nu Oja a, nguetho nin ts'iyatehu a gní timhbu u, nɛ hin gá pahmbu nda'a xun ho xquí jafu. Nɛ gue'a dí jua ahu a tengu'bu ra sibi. Nɛ tengu'bu guidí munshu a ran unbi guin nuhu 'bu ran zɛgui. ⁴Gá hyät ni mbɛfihu hin gá

juarpahu yún zäbi 'bu min xopu ni huahihu. Ne nu'a ran zäbi gá cønba ni mbefihu, ne gue'a dí yap ahu a. Ne nu'a rá ts'oni ni mbefihu bi 'yø Oja tate thoho rá ts'edi, ne da hya ra güenda nangue'u. ⁵Nu'ahu gám 'buhmbu nangue nin johya zehehu nguecua ja ra ximhäi gyú ziyatehu. Ne bi zac ni mbuihu tengu n'da ra ts'udi. Pe gue'a dín ja'ahu tengu'bu ran thots'udi 'bu rán zegui ra pa. ⁶Ne nu'ahu guí cothu fädi u nte in dupate, ne xø guí hohu buya, ne hin di mu.

Ga häthu 'be'a i t'ørcahu

⁷Janangue'a ma zi cu'ahu, nu'bu i t'ørcahu a, pe hin dan xømbuihu, nε ga tømhbu gue'bu go bá εh ma Hmuhu ra Cristo. Tengu'bu dí tuhmbu yu hmudä ua ja ra häi, dí tømhbu hønt'bu go njam'bu ba eh ra 'ye, di hoqui 'bɛ'a gä xtá tuhmbu buya. Nε din ja a mi numanhohu din ja buya. 8 Janangue'a ga sethu hin dan xømbuihu, nguetho ya him maya'a ba ɛh ra Hmu. ⁹Ma zi cu'ahu, hin ga ɛmhbu rá ts'oqui na n'da ma cuhu 'bu dín nuhu yun unbi, ne xømhma di ungahu Oja. Pe guim bemhbu mi ts'utho da zø'a ra ze'mi ya. ¹⁰Ma zi cu'ahu, gam bemhbu gue bi hyät yun unbi u yú pøngahya Oja, ne ngutho ga häthu u. ¹¹Nguetho dí pahmbu majapi u i hät yun unbi. Xtá øhmbu ngue bi hyät yun unbi a ra Job, ne xun ngu ran ho bi t'ørpa m'bejua. Nguetho nu'a Oja xun ngu rán hugcate ng xun ngu rá mate. 12 Hnchi thoho hin ga uaspahu rá thuhu Oja a mam hmansehu, xín ga ndønbahu rá thuhu 'bɛ'a man'da jaua ja ra

437 SANTIAGO 5

häi ngue ga ɛmhbu di zɛrca mam hmansɛhu. "Ha guí ɛc'yɛi a dí xi'i uague hin'na," ga ɛmthohohu. Janangue'a hin di ungahu Oją.

Dan yahu Oja

13 Nu'bu dín nuhu ran unbi, dan yahu Oja 'bu. O nu'bu dadín johyahu, dan tuhmbu n'da ra thuhu ngue dí ɛspahu Oja. 14 Nu'bu xun uju, ga xihmbu yu ngurbi bu ja ram peti ba ɛhɛ da 'yäp rá mfäts'i ra Hmu, nɛ da jaju ra aceite nangue rá thuhu ra Hmu. 15 Nɛ Oja di 'uec'a ran u dí hɛmfu, nguetho dá ɛc'yɛihu ngue majuani da yanju 'bu má äfu a. Nɛ nu'bu ma ts'oquihu a dán hyɛnhdu, pɛ di pungahu. 16 Nɛ dan xih ma ts'oquihu n'da ngu n'daju, janangue'a da zä dan

'yäfu rá mate Oja n'da ngu n'daju, nε nu'bu xun u n'da da yam buya. Nguetho xun ngu rá ts'edi da 'yøt' Oja 'bu da 'yäp a majuani n'dat'a Oja im beni, ne gue'bu di benba Oja a i ädi. ¹⁷Tengu a ra Elías, nu'a n'da ra ja'i thoho tengu gahu, ne bi hyah rá mbui bi 'yäp Oja ngue hin din 'ye. Nε him bin 'ye ua ja ra ximhäi gätho nhyunjeya ne n'dato zana. 18 Ne xø bin yaui Oja mahøn'a ngue bi 'yäp ra 'ye. Nε bá pεnh'na Oja ra 'ye, ne bi bøx yu hmudä ua ja ra häi buya. 19-20 Ma zi cu'ahu, nu'bu n'da ra 'yɛc'yɛi da 'uepu ja ra 'yu xun juani, ne nu'bu da zä ba sihu mahøn'a, ga pahmbu ngue dá yanbahu rá te a xí 'uegue. Νε madague'bu xun ngu yú ts'oqui, pe bi mba ma punbi.

1 PEDRO

Ná n'da ra søcua bi 'yo't'a ra Pedro

Ran zengua

Nugä drá Pedrogä, ma 'bäigä'be ra Jesucristo. Dí penh'nahu ra søcua gyu 'yęc'yeihu ra Cristo, n'da'a n'danni gá mbähä ja ra häi Ponto nepu Galacia nepu Capadocia nepu Asia nepu Bitinia. ²Nu ma Tahu Oją maya'bu thoho bi huancahu, ne bi zänni da 'yørcahu yú t'uhni gahu. Ne bi 'uega ma mbuihu a rá Hogandahi Oja, ne bi mbän rá ji nangueju a ra Jesucristo, guepu nan zä ga øthu a i xiju. Dí äp'a Oja ngue man'da gui hyamhbu rá mate, ne man'da da hyu ni mbuihu buya.

Ga tafu ran date

³ Jamadi Oją, ngue nu rá Ta ma Hmuhu ra Jesucristo, nɛ rá Oją a. Nguetho xun ngu rán huɛcate bi jaju dám 'buhmbu ma'da'yo. Nuya dí pahmbu gan nuhu ran ho mazai, nguetho bi dambɛni ra Jesucristo. ⁴Nɛ nuya dí tømhbu u yu erencia di 'daju Oja ngue m'bɛ'ts'i bu mahɛts'i, nɛ njam'bu dim 'bɛdi, nɛ njam'bu din ts'oni. ⁵Nɛ nuya i fäju Oja nangue rá

ts'edi, nguetho dí ec'yeihu a. Ne ya i sänni da yanju xun ho 'bu bi zøn ra pa ran zegui. 6Ne nu'bu dím bεmhbu ya, nε guehya ní 'daju ran johya, madague'bu da du ma mbuihu bu na sähu hønt'a go man unbi 'da yu pa ya, 'bu da 'yen Oja. ⁷Tengu ra oro i ts'ä ngue ra sibi ngue din hogui. Ne ngutho ma t'ec'yeihu i ts'ä, ne man'da di muui a xinda gue'a ra oro ngue dim 'bɛdi. Janangue'a di necmanho ma t'ęc'yeihu 'bu bá peng ra Jesucristo, nε da numanhoju, nε di 'daju ran ho, ne 'darbu dam 'buhmbu buya. ⁸Nε nuya madague'bu hinga nán nuhu ra Cristo, pe emme guín numanhohu a. Ne madague'bu hin guín nuhu a ya, pe guí pąhmbu majuani a. Janangue'a ɛmmɛ dadí johyahu, tengu tho'bu ya dí 'buhmbu ra Cristo bu mahets'i. Ne hin di jua u mam hmansehu gam mamhbu a ran johya. 9Nguetho ya dí du'mi dí hamhbu a dí tømhbu, ngue da yanju Oja. 10 Guehna bi 'yo't'u yu pøngahya maya'bu ngue da yanju rá mate Oja. Nε bi hyadumbui min nde xtám badi xun ho 'be'a nam bøn a ram hma

439 1 PEDRO 1, 2

bi 'yo't'u. ¹¹Min nde xtám bądi jąm'bu din ja a, nɛ nda'a ní pa din ja a bi man rá Hogandąhi ra Cristo mi o yú mbui. Nguetho bi bɛnbi da 'yo't'i 'bɛ'a da 'yøt' ra Cristo 'bu bi zøhø, ngue da nu ran unbi ngue da tho, nɛ da t'ɛspa 'bu m'bɛjua. ¹²Pɛ bi xi Oją u yu pøngahya ngue hin da bạsɛ, xinga gue'u yu ja'i mi 'buhmbu, pɛgue gue'a go i siju a ya nangue ran ho ma'da'yo. Nɛ nu'u to bi xiju na, bi ma nangue rá Hogandahi bá pɛnpa Oja. Nɛ'u yúm 'bɛhni Oja mahɛts'i ɛmmɛ in nde da badi 'bɛ'a nam bøn a i siju ya.

I xiju Oją ngue xtán hoju

¹³Pe nuya dan sähu ga øthu a rán thehu a dí tenhdu, ngue ga samzehe ma mbuihu 'bɛ'a gätho dím bemhbu. Ne hønt'a rá mate Oja ga tømhbu di 'daju 'bu bá ɛh ra Cristo. ¹⁴Nε ga øthu 'bε'a i xiju Oją, tengu yu t'uhni i øt'a i xih yú ta. Nε hin ga øthu tengu mi øthu mam'bɛt'o ngue ma pähä zɛhɛhʉ 'bʉ nte mi pahmbu. 15 Pe gä xtán hotho ga øthu, nguetho xun hotho Oja ngue bi zoncahu bi 'yøt'e yú t'uhni gahu a. 16 Tengu nt'o't'i: "Xtán hotho ahu nguetho xun hotho gä," bi 'yɛn Oją. ¹⁷Pe nu'bu dí yahu Oja, dí emfu ma Tahu. Pe gam bembu njuantho da gurcahu 'be'a dá øthu n'da ngu n'daju. Janangue'a dam fähmbu ngue gan numansuhu Oją gätho yu pa dí 'buhmbu ua ja ra ximhäi. ¹⁸Nguetho dí pahmbu bi yanju Oja nangue yun t'øt'e bi xänga ma tahu säti thoho. Pe hing ra mbeti í yanju a, nu'a dim 'bε'a. 19 Pε bi yanju ra Cristo 'bu mi du ngue bi mbän rá ji, ne hønt'a da zä di pø

a n'da a. Nguetho xun hotho ra Cristo, tengu n'da ra de'yo mi man Oją maya'bu ngue da 'bøts'e, pɛ gue'a hing ra mbɛdi nɛ xʉn hotho. ²⁰Nu ra Cristo bi ts'änni din yante 'bu hin ní 'yøt' ra ximhäi a Oja. Ne ran zegui ya ja bi nequi ua ja ra ximhäi nangueju. ²¹Nε nangue ra Cristo bi zøcua, gue'a dá ɛc'yɛihu Oja ya, ngue bi xox a ra Cristo 'bu mi du, ne bi 'yespi. Janangue'a dí pahmbu majuani di 'daju rán ho Oja dí tømhbu ya. ²²Nuya nangue rá Hogandahi Oja dá tenhdu ram hma majuani, ne gue'a dán hoju a. Nε gue'a dán zä ya majuani ga huεc ma cuhu. Janangue'a mpähä thoho dan hugju n'da ngu n'daju nangue gätho ma mbuihu. ²³ Nguetho dám 'buhmbu ma'da'yo nangue rám hman Oja da hyät'i mazai a, ne njam'bu di 'beh rá ts'edi a. Pe nu ma tehu bi 'dac ma tahu nε ma mbehu, hinga gue'a da hyät'i mazai a. ²⁴Νε nt'o't'i:

> Tengu yu paxi thoho yu ją'i, ne gätho xun ho 'be'a pe'ts'i tengu yú døni u yu paxi. Pe nu yu paxi di hmangui, ne yú døni i høe.

25 Pe nu'a rám hman a ra Hmu njam'bu dim 'beh rá ts'edi. Gue'a ran ho ma'da'yo i siju a.

Nu'a ra Cristo tengu n'da ra do

Jatho ga ɛshʉ gätho ran ʉcpate
nɛ ra fɛhni nɛ'bʉ yoho ma
mbʉihʉ, nɛ ga ɛshʉ ran ts'ɛya nɛ
ran c'ate. ²Nɛ tengu yʉ 'uɛre ngue
ma'da'yo bim 'bʉi, ngue ɛmmɛ i
hon ra xi'ba da zi, nɛ ngutho ga
øthʉ, thocpa thoho ga homhbʉ rá
hogamhma Oja, ngue dín te xʉn ho

1 PEDRO 2 440

ma mbuihu a. 3 Nguetho ya dá timhbu a rá mate Oja nangue rám hma, ne dá pahmbu ngue xun ho a. 4Ne man'da gam bemhbu ga cuathu ra Cristo xun ho, nu'a bi 'daju ra te. Madague'bu i pa ma ucpi, tengu'bu n'da ra gado di bunt'a n'da ra do, pε Oja bi huahni man'da di muui bu da thøh rá ngu. ⁵Tengu'bu n'da ra do man'da di muui a ra Cristo bu ja ra ngu, ne nuju i pa ma cuati gahu buya, tengu'bu dyu dohu, da 'yøju rá ngu Oja ngue hin di nequi. Ne yú mbäja gahu Oja, nguetho dí unhdu Oją yun t'unni gätho ma mbuihu. Ne di thocpa a rá Ta man t'unnihu a ra Cristo, janangue'a da numanho Oja u. 6Ne nt'o't'i maya'bu bu ja rám hman Oja nangue 'bɛ'a da t'ørpa ra Cristo. Bi 'yɛn Oja:

Tengu'bu drá ngurpagado dá huahna n'da ra do man'da di muui, ne dá høpu ja ma dongu bu Sión, nubu hapu ja ma ts'edi, bi 'yen Oja.

Ne nu'a to'o da guat'a, hin da mbe'ts' rá sä 'bu bi nu ran juanbi, bi 'yen Oja. ⁷Neju xun ngu dadí muhu nguetho dí cuathu a ra Cristo. Pe madague'bu hin da guat'u 'da, pe guexta'a din ja tengu bi man Oja, ngue bi 'yena:

Madague'bu him bi numanho u 'da yu gado a ra do, pe da gopu ja ma dongu, ngue man'da di muui 'bu da thøh ma ngu,

bi 'yɛn Oją. ⁸Nɛ man'da mi hma: Nu'a ra Cristo tengu'bʉ n'da ra do ngue di ferpʉ rá gua n'da, nɛ dim 'bɛpʉ,

bi 'yɛn ra t'ohni. Nɛ bi ts'änbi dim 'bɛpʉ, nguetho hinguin nde da 'yɛ̞c'yɛ̞i ram hma nangue ra Cristo.

Yú t'uhni gahu Oja

⁹Pɛ nuju, Oją bi huancahu bi 'yørcahu tengu'bu n'da'bui gahu, ma'ueque ma mbuihu. Nɛ gätho gahu dyu mbäją gahu bi 'dac ma ts'ɛdihu Oją, nɛ yú mbɛti gahu a. Nguetho in nde ga uhmbu ngue mixte xun ho Oją, ngue bá jugahu bu ja ra 'bɛxui mi 'buhmbu, nɛ bi zixcahu bu ja rán nɛqui mahotho ya. ¹⁰Nu'bu mám'bɛt'o mi 'buhmbu tengu'bu dyu hyoya t'uhnihu, nɛ nuya dí 'buhmbu yú t'uhni gahu Oją. Pɛ nu mám'bɛt'o him mi pahmbu rá mate Oją, pɛ nuya dá hamhbu rá mate Oja ya.

Ga humbi ga øthu ngue yú mbɛfi gahu Oja

¹¹Ma zi cu ahu, ɛmmɛ dadí huɛc'ahu. Janangue'a nts'ɛdi dí xi'ahu ga øthu tengu'bu hin dyu menguhu ua ja ra ximhäi, hin ga øthu rá pähä ma nyon 'yomfenihu ngue i ørcahu ran sui ma mbuihu. ¹²Νε thocpa thoho dam fähmbu dan 'yomanhohu, nguetho in nuju u hingui pa Oja. Νε madague'bu i εnju dyu ts'om'bäihu, pε xømhma thoho da zøn ra pa da 'yɛspa Oja 'bu bi nu ran hocja'i dí ørpahu. Nguetho da zä da xocpa yú mbui Oja u. ¹³Ne ga øthu a im man a ra ts'ut'abi ngue i 'bɛt'o ua ja ma häihu, janangue'a da hnumanho ma Hmuhu ra Cristo buya. 14 Ne'u mi'da to'o gätho bi un yún t'ɛdi ra ts'ut'abi, gätho ga ɛc'yɛihu u. Nguetho i ja yú ts'edi di unba u to'o øt' yu ts'oqui, nε da numanho u to'o øt' ran ho. 15 Nguetho ne'a Oja rá pähä a 'bu dí øthu a, ne

441 1 PEDRO 2, 3

gue'a dí 'yɛ'ts'u yun c'ate im man u yu 'yambui buya. ¹⁶Nuya hingui ørcahu ra ts'edi ga tɛnhdu yún t'ɛdi Oja, nguetho in ndeju mpähä thoho ga tɛnhdu. Pɛ hin gam bɛmhbu gue'a ní jaju ga øthu yu ts'oqui a, pɛ man'da ga øthu ngue yú mbɛfi gahu Oja. ¹⁷Nɛ gan numanhohu gätho yu ja'i, nɛ ga huɛc ma mi'yɛc'yɛi hu, nɛ gan numansuhu Oja, nɛ ga ɛspahu ra ts'ut'abi i 'bɛt'o ua ma häihu.

Ga øthu tengu bi 'yøt ra Cristo bin unbi nangueju

¹⁸Gyu 'yehehu ne gyu mbefihu dami 'yɛc'yɛi ni hmuhu 'bu gadí zehmbu u. Ne'u yu hocją'i ne'u yu ts'om'bäi 'bu di un'nahu, gätho guin numansuhu u. ¹⁹Nguetho man'da da numanho ahu Oja 'bu gui hyäthu yun unbi 'bu nte man ts'o gá 'yøthu, pε bi un'nahu nangue guí tenhdu Oją. 20 Pe nu'bu gan nuhu ran unbi nangue ma ts'oquihu, ne ga häthu, pe hin gam bemhbu ga tahmbu n'da ran ho nangue'a. Høntho dá jut ma ts'oquihu. Pe nu'bu ga häthu ran unbi nangue ran ho dí øthu, da numanhoju Oją. ²¹Oją bi zänni ga häthu yun unbi tengu ra Cristo, bi nde bin unbi nangueju, nε bi 'yurcahu 'be'a ga øthu. ²²Nguetho nu ra Cristo njąm'bu bi 'yøt' yu ts'oqui, ne njam'bu bi man yu fehni. 23 Ne nu'bu mi ts'ani, njam'bu bi dadi. Nu'bu mi mba ma ucpi, him bi ma dí co'ts'i. Him bi zu da zan yu ją'i, nguetho bi bądi Oją da numanho a. 24 Nu rá ją'i zehe ra Cristo bi nu ran unbi nangue ma ts'oquihu 'bu mi 'dømp'u ja

ra za. Nɛ gue'a í thøgahu ma ts'on 'yomfɛnihu a, nguepu da zä ga øthu ran ho ya. Nu yun unbi bi zä 'bu mi tho, gue'a í yanju a. ²⁵Nuju dá 'bɛhmbu ra 'yu, tengu yu dɛ'yo. Pɛ nuya bá penju bu 'buh ma mbändɛ'yohu, nu'a i färca ma mbuihu.

Ran zofo bi sih yu xisu ne yu ndø

Nu'ahu gyu xisuhu, gui 'yespa ni ndøsehu n'da ngu n'da ahu. Nε nu'bu 'da ni ndøhu hinguin nde da 'yɛc'yɛi rám hman Oja, pε nu'bu bi nu guí 'bumanhohu, xømhma thoho da zøni da 'yɛc'yɛi u, ne hinga hnehi thoho ja a gui xihmbu 'bu hinguin nde da 'yøde. ²Nguetho da nu ahu gadím fähmbu ngue guín numansuhu Oją, nε hin gui 'yomt'ɛnihu. 3Nɛ nu'bu guím beni gan hoczehehu, pe nangue ni mbuihu. Ne hin guim bemhbu nangue 'bɛ'a gä i ja'ahu thi ngue dí necmanho ahu, ogue ni yahu, ogue ni hehu gui hoju, ogue yu thebe, ogue yu ts'ungu. ⁴Pe gan hoczehehu ngue ni mbuihu, ngue di necmanhotho bu dá nu Oją, ngue hin di nequi, ne nu'a njam'bu dim 'bε a. Ngue'a hin gan 'yεzεhεhu, pε gan johyahu nangue Oja. Ne emme xun ngu di muui bu nam ben Oja a. ⁵Nɛ njabʉ mi øt' yʉ xisu mi 'bʉh maya'bu, ngue gue'u yu 'yɛc'yɛi mi numansu Oją, nu'u mi hoczehe yú mbui ngue mi numansu yú ndø. ⁶Tengu ra Sara bi 'yɛc'yɛi a rá ndø ngue ra Abraham, ne bi 'yembi rá hmu. Nuya tengu'bu yú t'įxu ahu ra Sara 'bθ guí øthθ 'bε'a mi øt'e, ngue thocpa thoho gui 'yøthu ran ho nε nte gui suhu. ⁷Nε ngutho

1 PEDRO 3 442

dí xi'ahu, man 'yohu ahu, dam 'bumanhohu ma xisuhu nangue ran 'yomfɛni bi 'daju Oja. Ga pahmbu hin'yu yú ts'ɛdi yú ja'i u yu xisu, janangue'a ga fäxhu u. Nɛ gan numansuhu u, nguetho n'dat'a rá mate Oja i conhui rá xisu n'da ran 'yohu, ngue n'dat'a ra te ma'da'yo. Nɛ nu'bu hin dam 'bumanho ma xisuhu, hin da 'yomanho ma ndehu Oja 'bu.

Ga øthu a di benga ma mbuihu Oją

⁸Nε gätho gahu n'dat'a gam bɛmhbu n'da ngu n'daju, nɛ gam bɛmhbu tengu'bu 'da dá sähu 'bɛ'a i sä a n'da. Nɛ dan huɛju n'da ngu n'daju, nɛ din ja ma yembuihu, nɛ hin dan 'yɛzɛhɛhu n'da ngu n'daju. ⁹Nɛ hin ga cospahu ran ts'o 'bu 'bui to da 'yørcahu ran ts'o, xín ga cospahu ran ts'ante 'bu 'bo'o da zanju. Pɛ ga äfu ran japi tengu thoho i ørcahu Oja, bi zoncahu di 'daju rán japi. ¹⁰Nguetho nt'o't'i:

Hønt'a go to'o in nde dim 'bʉmanho, nε da nu yʉ pa xʉn ho,

pε i jatho da ząm rá jąni nangue ran ts'o,

nε xín da man yu fεhni.

¹¹ Nε da hyε a ran ts'o, da 'yøt' ran ho.

Nε hin da nde dim 'buh yun suihu, pε εmmε da hyoni 'bεpu dí hocpa rá mbui rá mija'iui.

12 Nguetho nu ra Hmu in numanho u to i øt' ran ho, nɛ i ømanho 'bu ja a äpi, pɛgue da zu u øt' ran ts'o, bi 'yɛ̞n rá t'ohni. 13 Pɛ to'o maha di ungahu 'bu dan ɛhya ga øthu ran

ho. 14Pe madague'bu ga sähu ran u 'bu dí øthu ran ho, pε gue'a man'da ná timhbu rán ho Oja a. Janangue'a hin ga suhu 'bu in nde di piju u 'da, xín da du ma mbuihu. 15 Pe høntho gan numansuhu ra Cristo mbo ma mbuihu, ngue ma Hmuhu a. Nε thocpa thoho dan sähu ga xihmbu 'bɛ'a dí ɛ̞c'yɛ̞ihu 'bu 'bo'o da 'yängahu. Pe jante thoho ga xihmbu ne gan numansuhu u. 16 Ne thocpa thoho ga øthu a di benga ma mbuihu Oją. Janangue'a da mbe'ts' yú sä to'o di c'aman'u ran ho dí øthu 'bu dí tenhdu ra Cristo. ¹⁷Nguetho man'da xʉn ho 'bʉ gue'a ran ho ná sähu ran unbi, 'bu da nde Oja, xínda gue'bu ga sähu ran unbi nangue ma ts'oqui zehehu. ¹⁸Ne'a ra Cristo bin unbi, ne njam'bu bi 'yøt' yu ts'oqui. Pe n'dandi thoho bi du nangue ma ts'oquihu, gueju dyu ts'om'bäihu, nguetho bi nde da zixcahu bu bí 'bu Oja. Ne majuani bi tho rá ngợc'yεi, pε nu rá mbui guexta'a mi 'bʉi. ¹⁹Nɛ nu rá mbʉi ra Cristo 'bu mi du, bi mba bi zop yú mbui u xun du ngue ofädi. 20 Ngue yú mbui yu ja'i nangue u ngue him bi 'yɛc'yɛi Oja 'bu maya'bu thoho. Pe Oją mi tø'mi xtá 'yęc'yei gätho ní 'yøt' ra barco ra Noé. Guepu bi zä bin yan u zi hyato nja'i thoho, bi bong 'bu min ja ran ts'embi, nangue ra dehe ra dambunt'i. ²¹Ne nu ran xixyą nam bøni, neju dám pomhbu ran ts'embi nangue bi dambeni ra Jesucristo. Ne nu ran xixya hinguin nde da ma ngue i pa m'be't'e ma ja'ihu ngue ra häi, pε nam bøni dí äfu Oja di hoga ma mbuihu. 22 Ne nuya, nu ra Jesucristo bi mba mahɛts'i, darbu di mandaui bu ja rá

443 1 PEDRO 3, 4

ts'ɛdi Oją. Nɛ nu'ʉ gätho yʉ ts'ɛdi i 'bʉi i su a ra Cristo, nguetho hønt'a i ja rá ts'ɛdi xinda gue'ʉ yʉ́m 'bɛhni Oja mahɛ̞ts'i nɛ yʉ zi̞thu.

Dan darbahu rá mate Oja

M'bɛt'o thoho dan sähu din unba ma ngøc'yeihu tengu ra Cristo, ne gue'a ní täc yu ts'oqui a. Nguetho nu'a to bin unba rá ngøc'yɛi, him man da nde yu ts'oqui a. ²Ne gätho mi'da yu pa dí 'buhmbu ua ja ra ximhäi, hin dám 'buhmbu nangue ma pähä zehehu, pe dam 'buhmbu ga øthu rá pähä Oja. 3Dá xøt'a dá øthu rán t'øt'e ra ximhäi, midí hohu ran 'yomt'eni, ne mi øt' ma pähä zehehu, ne mi minhdu, ne madín sixhu bu ja yu calle ne mi mbahmbu bu, ne dám munshu bu dám minhdu, ne mi thạndehu yu pøte, pegue Oją him bi zänni ga thandehu u. ⁴Ne nu'u 'bucua ja ra ximhäi hingui sä da badi hanja hin dí øthu ran tonto tengu i øt'u, janangue'a i sanju u ya. ⁵Pe Oja di unba u to i sanju, nguetho di juanba Oja u 'bui ne'u xun du. 6Ne nu yu ja'i xun du ya, bi sih ran ho ma'da'yo 'bu mi 'bui, ngue'a í zä bi un Oją ra te yú mbui u, madague'bu ya xun du yú ngøc'yei. Ne gue'a rán säui nangue yú ts'oqui, nangue gätho yu ja'i i tu. ⁷Nuya bi zøn ra pa ran zegui. Janangue'a dan 'yomfenihu xun ho, ne ga sąmzehe ma mbuihu, ngue da zä thocpa thoho dan yahu Oja buya. ⁸Ne m'bet'o thoho ga øthu ngue emme dan hueju n'da ngu n'daju. Nguetho nu'a to'o ja rán hugcate, di punba rá ts'oqui rá mija'iui, madague'bu xun ngu yú ts'oqui.

⁹Dan säyabahu n'da ngu n'daju bu ja ma ngumhbu nangue ma pähä zehehu. 10 Ne 'da dám fäxtahu n'da ngu n'daju nangue rá 'befi Oja 'dahma 'dan'yo bin 'daju, gue dan darbahu a rá mate Oja 'dahma 'dan'yo ngue dá hạmhbu. 11 Ne nu to bin t'un ra 'befi da mamp'a rám hman Oją, da ma tengu'bu da guese Oja da ma. Nu to bin t'un ra 'befi da mbäx'u mi'da, da mbäts'i nangue ra ts'edi xun ho bi un'na Oja. Ngue'a da nde dí 'yɛspa Oją a 'bɛ'a gätho øt'e, nangue dí tenhdu ra Jesucristo, nu'a mixte thoho, ne i ja rá ts'edi gätho yu pa mazai.

Gan nuhu ran unbi nangue dí tenhdu ra Cristo

¹²Ma zi cu'ahu, hin ga hyonya thohohu 'bu i ts'äju yun unbi nts'edi, ne hin ga emhbu, hague in ja a ya. ¹³Pε dan johya thohohu, nguetho dí comhbu yún unbi ra Cristo. Ne nu'bu bi nequi xun ho rá ts'edi, man'da xun ngu ran johya gan nuhu buya. 14 Nu'bu pa ma ugui gahu nangue dí tenhdu ra Cristo, pe majapi gahu, nguetho mixte thoho rá ts'edi rá Hogandahi Oja dín nuhu buya. Ne madague'bu di ucpa ra Cristo u 'da, pe nuju dí espahu a. ¹⁵Pε nu'bu gan hotehu nε gam pεhu, ogue n'da ran ts'o ga øthu, ogue sä dan thinthu 'be'a øt' ma mija'ihu, ga pe'ts' ma sähu 'bu, ne gan nuhu ran unbi nangue a ra ts'oqui dá øthu. 16 Pε nu'bu dín nuhu ran unbi nangue dí tenhdu ra Cristo, hin ga pe'ts' ma sähu 'bu. Pe ga emfu jamadi Oją, ngue dí pąhmbu ngue dí tenhdu ra Cristo. 17 Nguetho bi zøn ra pa ya di du'mi øt' rán

1 PEDRO 4, 5 444

ts'embi Oją. Pe rá mbudi thoho gahu i ørcahu ran ts'embi, ngue yú t'uhni gahu a. Pe ts'utho dín nuhu. Pe nu'u hingui ec'yei rám hman Oja, xun ngu 'be'a gä da nu u 'bu bi zøn ra pa da 'yøt'e xun ho rán ts'embi Oją. ¹⁸Ne emme xun ngu yun unbi gan nuhu bu dí pøju Oja, ngue dyu 'yɛ̞c'yɛ̞ihʉ, nguetho ja'bʉ n'dandi̞ hin dí øhmbu a i xiju. Ne 'buh mi'da 'be xíngui ts'u nde da 'yøde, nε i san Oja. Nε nu'u hin da zä dim pø u. ¹⁹ Janangue'a nu'bu dí sähu yun unbi bi zängahu Oją, pe ga däh ma mbuihu Oja di jamansuju. Ne njam'bu da hyegahu, nguetho gue'a bi 'daju ra te. Ne ga thoqui ga øthu ran ho.

Di jamansu yú de'yo Oją u yu ngurbi

Nuya n'da ram hma dí xi'ahu, yú ngurbi ahu yu 'yɛc'yɛi. Necä drá ngurbigä, dá nuse ra Cristo 'bu mi du, necä ga comhbu ran jąpi din 'daju m'bejua. ²Ma mi ngurbi ahu dyu mbände'yohu, dí xi'ahu ya, jatho ga jamansuhu yú dε'yo Oja, nguetho 'yo ma güendahu ga jamansuhu u. Ne hin gam bemhbu i t'ørcahu ts'edi, pegue gam bemhbu ma pähä zehehu ga øthu. Ne hin nangue a din jurgahu ngue dyu ngurbihu, pe nangue a dín numanho sehu a. ³Ne hin ga suthohu yú t'uhni Oja hapu dí 'buhmbu n'da ngu n'daju, pe janate tho ga uthu ra 'yu nangue man t'øt'e zehehu. 4Ne nu'bu bi nequi ma Hmuhu dyú mbände'yohu, di 'daju ran japi ngue ga tahmbu, ngue hin jam'bu din thegue. ⁵Ngutho ahu man 'yohu ahu, dami 'yɛc'yɛihʉ 'bɛ'a im man yʉ dac'yɛi

ngue ni ngʉrbihʉ. Nɛ gätho ahʉ gan umhbʉ da si ahʉ n'da ngu n'da ahʉ. Nɛ njạm'bʉ gan 'yɛ̞zɛhɛhʉ, nguetho:

Da zu Oją a din 'yɛ̞ts'i, pɛ di un rá mate a to'o hin din 'yɛ̞ts'i.

⁶Janangue'a ga øthu ngue hin'yu ma ts'edi zehehu bu ja rá hmi Oja, gam bemhbu hønt'a ja rá ts'edi xínda gueju. Janangue'a da 'yɛsca zehehu Oja 'bu bi zøn ra pa. ⁷Ne ga xihmbu Oja gätho ma dumbuihu, nguetho di jamansuju a. ⁸Damín äthahu xun ho, ngue damím fähmbu, nguetho nu man suihu ra zithu i 'yo ua, tengu n'da ra zate i 'yo, in cuɛ, i honi to'o da za. ⁹Pɛ dami suhmbu a ra zithu nangue rá ts'edi Oją guí ęc'yeihu. Ne gam bemhbu ngue n'dat'u yun unbi dín nuhu ma mi'yɛc'yɛihu ngue gätho ra ximhäi. 10 Pe nu Oja emme xun ngu rá mate, bi zoncahu ga comhbu rá ts'edi mixte gätho yu pa mazai, nangue dí 'buhmbu ra Cristo. Pe m'bet'o thoho dan unbahu ts'u, ngue di hoga ma mbuihu Oja, ne di hat ra ts'edi ma mbuihu, ne di jaju dan zamhbu xun ho bu. 11 Nu Oja nte hembi, gätho da zä da 'yøt'e, gätho yu pa mazai. Ne gue'a gam bemhbu a ya.

Rán zegui ran zengua

12 Dí penh'nahu ra søcuą i ja ua, ngue da gax a ra Silas, nuna n'da ma cuhu ngue da zä ga ¿c'yɛihu a man a. Nuna ra søcua ja ua, hingui ngu 'bɛ'a ma, n'da ran zofo thoho, nɛ dí xi'ahu majuani rá mate Oja a guí tɛnhdu. Janangue'a damín zamhbu bu. 13 I 445 1 PEDRO 5

pɛnh'nahʉ ran zɛngua ni cuhʉ i 'bʉcua Babilonia, nthahni nangue Oją, tengu ahʉ. Nɛhna ra Xuua Marcos di zɛngua ahʉ, tengu'bʉ ma ts'ʉnt'ʉ na. ¹⁴Nɛ zại gan

zohmbu n'da ngu n'da ahu nangue ran huɛcate. Nɛ dín nde da hyu ni mbuihu nangue guí tɛnhdu ra Cristo. Nɛ gue'a gam bɛmhbu a ya. Hønt'a dí xi'ahu ya.

2 PEDRO

Ná yoho ra søcua bi 'yo't'a ra Pedro

Ran zengua

Nugä dra Simón Pedrogä, rá 'yɛhɛgä ra Jesucristo, nɛ ma 'bäigä'be a. Dí pɛnh'nahʉ ra søcua ja ua, ngue gätho n'dat'a dí ɛc'yɛihʉ a bi zängahʉ Oja. Nɛ 'da nan zimanhogdahʉ Oja, nguetho 'da í hoga thohohʉ ra Jesucristo, nu'a ma Ojahʉ a nɛ mam pørpatehʉ a. ²Dí äp Oja man'da gui pahmbʉ a, nɛ ma Hmuhʉ ra Jesús. Nɛ man'da gui hyamhbʉ rá mate, nɛ man'da da hyu ni mbʉihʉ bʉya.

Nu Oją i ørcahu dan jahu tengu a

³Nu rá ts'ɛdi Oją bi 'dajʉ 'bɛ'a gätho ga homhbʉ ngue dam 'bʉhmbʉ ra 'da'yom'bʉi, janangue'a bi zä bʉ dá tɛnhdʉ Oją. Nguetho dá pạhmbʉ a bi zoncahʉ 'darbʉ dam 'bʉhmbʉ bʉ bí ja rá ts'ɛdi mixte.

⁴Nɛ nangue rá ts'ɛdi i ørcahʉ ran ho mixte thoho ngue mím ma, nguetho i ørcahʉ dan jahʉ tengu a, ngue in yạnjʉ bʉ ja rá ts'o'yu ra ximhäi i øt' ran ts'iyate. ⁵Nɛ nu'bʉ dí pạhmbʉ in yạnjʉ Oją nangue ra ts'o'yu, ɛmmɛ ga hądumbʉihʉ ga øthʉ 'bɛ'a mangua 'bʉ. Ya dí

εc'yεihu rá mate bi hogahu. Pε hinga hønt'a, nuya ga øthu yu hogant'øt'e. Ne hinga hønt'a ga øthu yu hogan t'øt'e, pe man'da ga homhbu dan xähmbu ga pahmbu rá 'yu Oja. 6Nε hinga hønt'a dan xähmbu rá 'yu Oja, pε man'da ga samzehe ma mbuihu. Ne hinga hønt'a ga samzehe ma mbuihu, ne man'da ga sethu. Ne hinga hønt'a ga sethu, ne man'da hønt'a Oja gam bemhbu. 7Ne hinga hønt'a ga øthu ngue gam bɛmhbu Oja, nɛ man'da ga fäx ma mi 'yɛc'yɛihu. Ne hinga hønt'a ga fäx ma mi 'yɛc'yɛihʉ, nɛ man'da ga huɛjʉ gätho yʉ ja'i. 8Nɛ nu'bu emme ga humbi ga øthu u im mangua, dyu hoga mbefi gahu a ma Hmuhu 'bu, ne da zä ga fäx ma mi ja'ihu buya, nguetho dí pah ma Hmuhu ra Jesucristo. ⁹Pe nu'bu hin ga øthu u im mangua, hin dí cuthu xun ho ran negui ma mbuihu 'bu. Nguetho dí pumbeni thohu ngue m'be't'e ma mbuihu nangue yʉ ts'oqui mi øthʉ. ¹⁰Pε ma zi cu'ahu, ɛmmɛ ga hadumbuihu ga uhmbu ngue yú thahni gahu Oja, ngue bi zoncahu a. Ne nu'bu din jabu ga øthu, hin hapu ga tanju 447 2 PEDRO 1, 2

'bu. ¹¹Nɛ din johya Oja 'bu dá cuthu bu di manda rá ts'edi mazai a ma Yantehu ma Hmuhu ra Jesucristo buya. ¹² Janangue'a thocpa thoho dín nde ga bɛn'nahu na mangua, madague'bu guí pahmahu a, ne guí ząnthu bu ja ram hma majuąni ngue bi si ahu. 13 Pe man'da xun ho 'bu ga thoqui ga 'yomfɛni ahu, ngue gätho yu pa dí 'bucä ua gätho ma ngøc'yei, ga ja ahu guim bemhhu a dá xi'ahu. 14 Nguetho mits'utho da zøn ra pa ngue ga soh ma ngøc'yɛi, ngubu bi xicä ma Hmuhu ra Jesucristo. 15 Janangue emme dí humbi dí xi'ahu, n'damhma thocpa thoho guim bembbu a 'bu dá mbagä.

Dá nuhe rá ts'edi mixte ra Cristo ngue ma däsehe

¹⁶Nugä xtá xi'ahu nangue rá ts'edi ma Hmuhu ra Jesucristo, din ja 'bu bá ecua mahøn'a a. Hinga ngu mi'da yu ja'i im bense 'da yu cuento ngue ní hyät'a n'da. Pe nu'a dá nuhe, gue'a dím mamhbe a. Nε gue'a xtá xi'ahʉ a, nguetho dá nusehe rá ts'edi mixte ra Cristo ngue ma däsehe. 17 Gue'bu má øhmbe n'dandį rá nde Oją bí 'yɛh mahets'i mixte thoho, ne gue'a í 'yespa a rá Ts'unt'u 'bu mi 'yena: "Guehna ma Ts'unt'ugä na, ngue emme dadí huecä na, ne ní hyu ma mbui na," bi 'yen Oją. Ne bi japi εmmε bi necthoho. 18 Nε majuani dá øhmbe rá nde Oja bí 'yɛh mahɛts'i, nguetho 'darbu mi 'buhmbe ra Jesucristo bu ja ra t'øhø guepu bin yą. 19 Janangue'a man'da da zä ga pąhmbu majuąni a mi hmam bu ja yú søcua yu pøngahya

maya'bu, ngue mi ma nangue ra Cristo ba ɛhɛ, nɛ din ja rá ts'ɛdi mixte. Ne nu ram hma man t'o't'i, xun ho 'bu thocpa thoho ga honi ga pahmbu, tengu'bu ra nyot'i di yot'ua ja ra 'bexui, gue'bu go bi zøn ra pa ngue da mbudi gan nuhu yu hmepya ngue udi ya ba epu ra Hmu, ga pahmbu xun ho 'be'a man t'o't'i buya. 20 Ne m'bet'o thoho ga pahmbu ngue xínga n'da ra ja'i sä da base n'da rá t'ohni Oja 'bu hin nangue a rá Hogandahi di zedi. ²¹Nguetho nu'u yú pøngahyą Oją ma'ueque yú mbui, him bi bense a ram hma bi 'yo't'θ, ρε guesε a rá Hogandahi Oja bi benbi 'be'a bi 'yo't' 'bu mi 'yo't' rám hman Oja u.

Dim 'buh yu hyäte xänbate

Ne mi 'buhmbu 'da yu hyäte pøngahyą yu ją'i israel maya'bu, ngutho ahu, gam 'buhmbu 'da yu hyäte xänbate. Ne yu zandate tho, nguetho di cu't' yúm hmanse 'bu im man rám hman Oja. Ne nangue u yúm hma dím 'bε'a n'da θ. Nε hingui ørpa rá pähä a ra Hmu ngue bi gurba yú ts'oqui. Janangue a ją xun dąmbęni, ya xím 'bɛdi. 2Nɛ xun ngu da dɛn'na dí 'yøt' yú pähäzehe u yu hyäte xänbate. Janangue da mba nthenni thoho a ra 'yu majuani. 3Ne emme da nde da hyä ahu nangue yum hma mahotho, nguetho da nde gui juthu u. Pe ya maya'bu thoho bi ts'änni da nu yun unbi u, tengu øt'u, ne guehma da nu nguetho hingui pa ma pumbeni 'be'a da nu. ⁴Nguetho xínga gue'u yúm 'bɛhni Oją mahęts'i bi yąm 'bu mi 'yøt' ra ts'oqui. Ne'u bi hyøtpu ja ra 'bexui,

2 PEDRO 2 448

bi dat'i con yu cadena, guepu bi got'u, da dømp'u ran juanbi. ⁵Νε xím bi yan yu ja'i 'bu maya'bu a Oja, hinda hønt'a ra Noé, ngue bi 'yɛc'yei Oja, ne bi xih yu ja'i xtá 'yøt' ran ho. Ne hønt'u yotonja'i min 'yohu ra Noé bi yan Oja 'bu mam bá pεnh ra 'ye, bin ja ra dąmbunt'i gätho ra ximhäi nangue u yu ts'om'bäi mi 'bui. ⁶Ximangutho a ra hnini Sodoma nε Gomorra, bi nu ran ts'embi ne bi gohi bim 'bospi u. Janangue'a nu Oja i urcahu 'bɛ'a din jap u yu ja'i hinguin nde da den Oja. ⁷Pε bi yan a ra Lot ra hocja'i a. Ne nu'a emme madin xømbui nangue u yún t'øt'e u mi sänzehe 'bɛ'a mi øt'e. ⁸Nɛ ɛmmɛ madi ʉnba rá mbui a ra hocja'i, nguetho n'dapa ngu n'dapa min nu y\u00eun t'øt'e xun ts'o ne mi øh yú ts'ore 'bu 'darbu mi 'buhmbu bu ra hnini Sodoma. ⁹ Janangue'a dí pąhmbu ja rá ts'edi Oja i färpa yú mbui u to'o mben Oją, hin da 'yøt'e tengu øt' yu ts'om'bäi 'bu 'darbu i 'buhmbu. Ne i ja rá ts'edi Oja da gorbu ja ran unbi u yu ts'om'bäi, nε ya in nu ya gätho yu pa tømp'u ran juanbi u. ¹⁰Νε nu'u 'da i ørpa yú pähä yú ngøc'yɛi, man'da da nu ran unbi u. Pe di ts'on yú mbui ngue i øzehe yú pähä zehe, ne i san ma Hmuhu ra Cristo. Nu'u yu zambui u, ne yun 'yets'i u, i thenda u to'o ja yún t'ɛdi, nɛ hingui su. ¹¹Pe nu yúm 'behni Oja mahets'i man'da i ja yú ts'edi ne yún t'edi xinda gue'θ yθn 'yohθ i sante, pε i su di cospa ran ts'ante u go i sante, nguepu ja rá hmi Oja. 12 Tengu yu zu'uɛ i 'bucua ja ra ximhäi, i ts'änba u ngue da fent'i ne ma zä dim 'bedi, ne ngutho u yu hyäte

xänbate. Ne i sani 'be'a hingui padi. Ne nu'bu bi du, hønt'a ran unbi mazai da nu. 13 I øt' ran ts'o, pε hønt'a ran unbi da daha. Nε im beni ngue ran johya 'bu di thoc'a ní 'yøt' yú pähä zehe gä ra pa. Ne nu'u tengu yun ts'oni ne yu mbedi bu guidím petihu, nguetho di johya i øt' yú pähäzehe 'bu guí sihmehu u. 14 Nε hønt'a ran 'yomt'eni im bem 'bu i hand yu xisu, ne njam'bu sä da 'yɛ'ts' yú ts'oqui. I hät'u 'da hinga na ec'yei xun ho, nguetho nu'u thocpa thoho yu ziyate. Pε Oją di unba u. 15 Nguetho bi zoh ra 'yu xun juani, bi mbase bu ma'ueni. Ne i ten ra 'yu mi ten ra pøngahya Balaam, rá ts'unt'u a ra Beor, nu'a emme madí ho din ju't'i nangue yu ts'oqui mi øt'e. 16 Pe bi hecpa Oją 'bu n'dandi, ngue bi japi bin ya rá fani hingui sä din ya. Pe bin ya rá fani ngue bi hecpa a ra pøngahya, ngue hin da 'yøt'a ra ts'ogui mi εna xtá 'yøt'e. ¹⁷Pε nuya yu hyäte ya, tengu n'da ra hyado ena i po bu ra dehe, pε nte po bu. Nε tengu yu güi i tuxta ran dahi, sä ena din 'ye. Ne nts'änni ra 'bexui man'da xum pothi da nu u, tengu u, gätho yu pa mazai. 18 Nguetho ɛmmɛ xu ngu 'be'a ma, pe hin'yu 'be'a nam bøni. Nε i hät yʉ ja'i mi εna xtá 'uepʉ ja ra ts'o'yu. Ne xø i xifi dá 'yøthu yu ts'oqui, ne emme da 'yørpa yú pähä yú ngợc'yεi, nε im beni nte din japi. ¹⁹Nɛ i xifi, mathøgue thoho ahʉ, njon da zamp ahu 'bu gui tengahe, sä ena. Pe i fehni u, nguetho guese u i sam ra zithu u. Nguetho nu'bu bi dạp ra ts'oqui n'da ra jạ'i, ya rá 'yɛhɛ ra zithu a buya, ne hingui sä da mba mathøgue nangue yú ts'oqui.

449 2 PEDRO 2, 3

²⁰Nguetho nu'bu n'da ra ja'i bin yąni nangue rá ts'o'yu ra ximhäi, nangue bin xäh rám hma ma Hmuhu mam pøtehu ra Jesucristo, pε nu'bu da mbengui mahøn'a, hingui sä da bøm bu ja yu ts'oqui mahøn'a a. Ne nubuya man'da xun ts'o da 'yøt'e xinda gue'a mi øt' 'bu him mi pah ra Cristo. ²¹ Janangue'a nu'u to bi mbenc 'bu ya mi du'mi da ba'a ra hoga'yu, man'da xun ho 'bu hin xtí du'mi, nguetho bi hyetho rá hogant'edi Oja 'bu mi sänbi. ²²Nɛ bi 'yøt'e tengu man t'o't'i: "Tengu'bu n'da ra fo'yo bi zi mahøn'a yú ts'odi xí zani. Ne tengu'bu n'da ra ts'udi bi 'yo mahøn'a ra bøhäi 'bu xín hi."

Ra Cristo bi ma majuani ba eh mahøn'a

Ná yoho na ra søcuą dí ot'ahu ya, ma zi cu'ahu. Ne nu gätho yoho yu søcuą n'dat'a dím beni man'da ga ben'na ni hogan 'yomfenihu. 2N'damhma guim bemhbu u yum hma mi ma mam'bet'o u yú pøngahyą Oją. Ne guim bemhbu mam hmamhbe dá xi'ahe, ma 'bäi gähe ma Hmuhu ra Jesucristo, nε ma pørpatehu a. ³M'bɛt'o thoho ga pahmbʉ 'be'a din ja 'bu rán zegui yu pa. Di nequi 'da yu 'yuspate da denthoho ra 'yu majuani, gue'u zại øt' yú pähä zehe. 4Ne da 'yena: "Hapu gán yạhu ngue bi xi'ahu ra Jesucristo ba ɛh mahøn'a, nɛ hin jam'bu i sä ba ɛhɛ. Nɛ gue'bu go mi 'bu u ndu ma ngurba bøtahu maya'bu thoho, guexta'a i ja, gue'bu go rá mbudi ra ximhäi," da 'yɛna. 5Pɛ nu'u 'da i ɛna, i ɛna

nguetho di pumbeni tho 'be'a bin ja maya'bθ, nε hinguin nde da bądi, ngue bi juah ra ximhäi Oją nangue ra dambunt'i. Nguetho xí 'yøt' Oja mahets'i ne ra ximhäi nangue rám hma. Ne bi japi bi bøx pu ja ra dehe a ra häi, ne gue'a ra dehe ín 'yøt' ra häi. ⁶Pe guet'a ra dehe bi juah ra ximhäi mi ja, ngue bi mbunt'i. ⁷Nε nuya mahets'i ne ra ximhäi ngue i ja ya, Oja i sänni di juadi mahøn'a. Pe i tø'mi da zøn ra pa ngue bi ma ba penh ra sibi ua ja ra häi, gue'a ran unbi da 'yøt'a Oja a nangue yu ts'om'bäi. ⁸Ma zi cu'ahu, hin ga pumbeni thohu ngue nu'a dí emfu n'da mahuahi njeya, da zä da 'yen Oją n'dapa tho bu nam ben a, ne nu'a dí ¿mfu n'dapa thoho, da zä da 'yen Oja n'da mahuahi njeya bu nam ben a. 9Ne hingui danhyei Oja tengu im man i 'da, guemhma da 'yøt'e 'bɛ'a bi ma da 'yøt'e. Pɛ i tøgbahu Oją da zøni ga coh ma mbuihu, nguetho in nde xínga n'da dam 'behmbu. 10 Pe nu'bu bá εh ra Hmu, tengu'bu ba ε'a n'da ra bɛ 'bʉ bin xui, hinga mfadi 'bɛ'a ma ora da zøhø. Nɛ di juadi gätho u di nequi mahets'i, emme din thoni ndøspi, ne gätho 'be'a i ja da mbʉnt'i ngue nám pa. Νε gätho ra häi, ne gätho 'be'a bi 'yøt' yu ja'i ua ja ra häi, gätho din zø u. 11 Janangue'a nte man ts'o da ben ma mbuihu, ne thocpa thoho gan numansuhu Oja, nguetho dí pahmbu da mbunt' ra ximhäi ra sibi. ¹²Ne nuya dín dømdahu da zøn ra pa bi man Oją, ngue da 'yuh mahets'i, ne dim 'bedi gätho jabu. Ne din hyegui 'be'a gätho i ja 2 PEDRO 3 450

nangue ra sibi. Ne dí xønhdu din ja n'dihi a. ¹³Nguetho dí tømdahu ma'da'vo mahets'i ne ra ximhäi, tengu bi ma majuani Oja, ngue din zam bu ran ho. 14 Janangue'a, ma zi cu'ahu, nu'bu dí tømhbu ngue din ja, ga humbi gan nde da numanhoju ra Cristo 'bu bá εhε da 'yøt' ran ts'ut'abi. Nε nte man ts'oni, ne nte man dupate da dingahu 'bu bá sh puya. 15 Ns gam bemhbu ngue i set rá mbui Oja, i tø'mi dim pø'u 'bucua ja ra ximhäi. Tengu thoho bi 'yot'ahu ma zi cuhu ra Pablo nangue rán 'yomfeni bi un Oja. 16 Ne mbe gätho yú søcua bi 'yo't'i im ma tengu dí ot'ahu ya. Pe xun hei da fadi 'be'a

nam bøn'i 'da yum hma bi 'yo't'a ra Pablo. Ne 'bu'i 'da him bin xädi nε him bin zam bu ja ram hma. Janangue'a nu'bu sä im man'a rá t'ohni ra Pablo, ogue mi'da yú t'ohni Oja, pε hinga gue'a bu na hma. Ne gue'a ím 'be'i 'da a. ¹⁷Pe nu'ahu guí pahmbu ngue ngubu da 'yøt'i 'da yu ja'i. Janangue'a gam fähmbu hin da zix'ahu bu rá 'yu Oja gmí zamhbu, guepu i ya u yu ja'i i honse yum hmanse. 18 Pe man'da damí pahmbu rá mate ma Hmuhu ra Jesucristo, nε ma pørpatehu a. Ne nu'a ga espahu a ya, ne gätho yu pa mazai. Ne gue'a gam bemhbu a ya. Hønt'a dí xi'ahu va.

1 XUUA

Ná n'da ra søcua bi 'yo't'a rá 'bäiui ra Jesucristo ra Xuua

Ram Hma ngue di 'daju ra 'da'yote

Nu'a mí 'bu 'bu rá mbudi thoho, gue'a dá hethe ma dähe, nε dá øhmbe a bi ma, nε dá nuhe xun ho, nε dá thähmbe ma 'yεhe. Nε gue'a ra Jesucristo a, rám Hma Oja ngue bi ma di 'daju ra 'da'yote. ²Nguetho nu'a di 'daju ra 'da'yote bin 'yuse gue bin ja'i, ne dá nuhe, janangue'a dí mamhbe majuani a bin ja, ne dí xi ahu ya gue zai xmí 'bui ne zại dim 'bui. Mam bí 'buhmi rá Ta nguetho n'dat' Oją a, ne bin 'vuse ua dí 'buhmbu. ³Ne nu'a dá nuhe nε dá øhmbe a bi ma, gue'a dí xi ahe a ya, n'dahma ne'ahu gui pahmhu a, ne gätho dan vamanhohu a ra Ta ne rá Ts'unt'u ra Jesucristo. ⁴Guehna dí ot'ahu na ya, n'damhma ne'ahu din ja ahu ran johya xun ho.

Nu Oją ran Nequi a

⁵Nu'a Oją ran Nɛqui a, nde da ma xun hotho a, nɛ hin'yu ra 'bɛxui nangue'a. Nɛ gue'a ram hma bi xije ra Jesucristo, nɛ gue'a dí xi'ahu a ya. ⁶Sä dí ɛmhbu dí yamanhohu ra Jesús, pɛ nu'bu guexta'a dí 'yohu

bu ja ra 'bexui, dí fehnihu 'bu, nguetho hín dí øthu a rán säui a majuani. ⁷Pe nu'bu majuani dí 'yohu bu ja ran nequi guepu 'bu Oja, hin'yu 'be'a ga ahmbu bu, ne dí yamanhohu a 'bu, ne nu rá ji ra Jesús rá Ts'unt'u Oja, thocpa thoho i thugahu gätho ma ts'oquihu a. ⁸Pe nu'bu sä dí emhbu hin'yu gahu ra ts'oqui, dadín hyäzehehu 'bu, nguetho hin dá cu't' ma mbuihu a majuani. ⁹Pε nu'bu ga mamhbu ma ts'oquihu, gue hingui ho dá øthu, da zä di pungahu Oją nangue ra Cristo bi gut'i, ne da mbercahu gätho ran ts'o, tengu mím ma. 10 Pe nu'bu sä dí ɛmhbu hin te dá øthu yu ts'oqui, dí nubethanihu Oja 'bu, nguetho bi 'yɛn Oja gätho bi 'yøt' yu ts'oqui. Pe xíngui ts'u dí cu't' ma mbuihu rám hman a 'bu.

Ma hocpatehu a ra Jesucristo

Ma zi t'uhni ahu gue dyu
'yεc'yεihu, dí ot'ahu ra søcua
i ja ua, dadí hεc'ahu hin gui 'yøthu
yu ts'oqui. Pε nu'bu ga øthu n'da
ra ts'oqui, gue him majuani dí
numanhohu, pε dí 'bähmbu ma
Hocpatehu din hocpaui bu 'buh

1 JUAN 2 452

ra Ta, ra Jesucristo, ra Hocją'i a. ²Nguetho guesε a ran t'unni a di hoga ma ts'oquihu. Ne hinga høngdahu in nde di hogahu, pe gätho yu ts'oqui ja ua ja ra ximhäi in nde di hoqui nangue bi du ra Cristo. ³Nu'bu majuani dí øthu u yún t'ędi Oją, da zä ga pąhmbu gue dí yamanhohu a buya. 4Pe sä en i 'da: "Dí pacä Oja," en u, pe fehni u nε hingui ørpa yún t'εdi, nε hin di cu't' rá mbui a majuani. ⁵Pe nu'bu i øt'a man Oja n'da, hinga ndetho bi huɛc Oja n'da 'bu, pɛ bi bømanho a bi 'yørpe. Ga xi ahu ya 'bερu dán zä ga pahmbu 'bu majuani dí 'buhmbu a ra Cristo. 6 Nguetho nu'bu ɛn'a n'da gue i 'buhmi ra Cristo, "jatho ga øt'ä tengu bi 'yøt' ra Cristo," da 'yɛnsɛ 'bʉ. ⁷Ma zi cu ahu, nu ran t'ɛdi dí ot'ahu gue dan huɛju, him ma'da'yo a, pɛgue guet'a ram hma mbudi bi siju maya'bu, 'bu ra mbudi thoho dá pahmbu ra Cristo. 8 Pegue tengu 'bu ma'da'yo a, nguetho janaguehya dí øthu ya tengu bi 'yøt' ra Cristo. Nguetho bi du'mi di 'uegahu ra 'bexui ma mbuihu ra nyot'i majuani. ⁹Nu'bu sä ɛn'a n'da i 'bupu ja ran nequi, nε i san rá cu, pε guexta bu ja ra 'bexui i 'bu 'bu. 10 Ne nu'a to'o di huec rá cu, bin zam bu ja ran nequi a, ne nu'a hin hapu da danc'a. ¹¹Pe nu'a to'o san rá cu, i 'bupu ja ra 'bɛxui a, nɛ i za̞m bʉ. Hingui sä da bądi nda'a xun ho, nguetho bi 'berpa ran 'yomfeni a ra 'bexui. ¹²Dí ot'ahu ma zi t'uhni ahu, nguetho dí padi xu pun'na ni ts'oquihu, bi hoc'ahu ra Cristo. ¹³Ne nuya 'da ahu dyu dąc'yeihu, dí ot'ahu nguetho dí padi guí pahmbu a mí

'bui gue'bu rá mbudi thoho. Ne 'da ahu gyu ts'unt'uhu, dí ot'ahu nguetho dí pądi gá tąfu ra zįthu. Nε xø dí ot'ahʉ ya gätho ahʉ ma zi t'uhni ahu, nguetho gätho gahu dá pahmbu ra Ta. ¹⁴Ne xø dí ot'ahu, dyu dac'yɛihu, nguetho dí padi gá pąhmbu a mí 'bui gue'bu rá mbudi thoho. Ne xø dí ot'ahu gyu ts'unt'uhu, nguetho dí padi i ja ni ts'edihu gá tafu ra zithu, nangue rám hman Oja thocpa thoho guím bemhbu. 150 guídí hohu rá pähä ra ximhäi, gue hin gui 'yøt' ni pähä zehehu. Nguetho nu'bu dadí ho ma pähä zehehu, hin dadi hohu Oja 'bu. ¹⁶Nguetho nu'u yú pähä ra ximhäi, gätho him bi zän Oja u, 'be'a gä di ho ní ngợc'yei n'da, ne ní dä n'da di ho 'bɛ'a gätho in nu nde da mbezehe, ne'bu im beni jase rán 'yomfeni n'da. Pe nu'u bi nequida ua ja ra ximhäi u tengu u. ¹⁷Pe nu ra ximhäi ní mba bu da guadi, ne'u yún 'yomfeni ra ximhäi da gua'u. Pe nu'u ørpa rá pähä Oją, dim 'bumanho gätho yu pa mazai.

Ba ch rán suiui ra Cristo

18 Ma zi t'uhni ahu, rán zegui ya. Ne xtá øhmbu ngue di nequi n'da rán suiui ra Cristo. Ne nuya bi mbudi bi nequi xun ngu yú mfäts'ihu a rán suiui ra Cristo. Janangue'a dí pahmbu mbe rán zegui ya. 19 Ne gue'u 'da xum bøngua dí 'buhmbu. Pe him majuani ma mi'yec'yeihu u, nguetho nu'bu majuani ma cuhu u, hin xtá 'ue u 'bu. Pe bi bøn'u janangue'a bi 'yuse gue him majuani ma cuhu u gätho u bi bøni. 20 Pe nu ahu bi 'daju

453 1 JUAN 2, 3

rá Hogandahi Oja a ra Cristo. Janangue'a gätho gahu dí pahmbu nda'a majuani. ²¹Dí ot'ahu na, pε hin dí εn'i hin guí pahmbu a majuani. Pe guí pahmbu a, ne guí pąhmbu hinguin 'youi ra fehni a majuani. 22 Nu'a gue ena hing ra Cristo a ra Jesús, ε gue'a ra ngurpa fehni a, ne rán suiui Oją a, nguetho i ena hing rá Ts'unt'u Oja a ra Jesucristo, ne xíngui εc'yεiba a rá Ta buya. ²³Nguetho nu'a to'o hingui ¿c'yɛi ra Cristo rá Ts'unt'u Oją xínga gue'a Oją rá Ta i padi. Pe nu'a to'o ec'yei rá Ts'unt'u ne'a rá Ta i parpa a buya. ²⁴Ne nu'a 'be'a gätho dá øhmbu ra mbudi dá pahmbu ra Cristo, ga thoqui gam bemhbu a. Nguetho nu'bu dí thoqui dím bemhbu a, zai dí 'buhmbu a ra Ts'unt'u ne'a rá Ta buya. ²⁵Ne bi xiju majuani di 'daju ra 'da'yote gue i ja ya ne njam'bu da guadi. ²⁶Guehna dí ot'ahu na, nguetho 'bu i 'da in nde da hyä ahu. ²⁷Pε nu ahu, nu'a rá Hogandahi bi 'daju ra Jesucristo bin zam bu ma mbuihu a, ne guese a i xängahu gätho 'be'a man Oją. Janangue'a him mahyoni to'o da xängahu yún thehu. Ne nu'a i xängahu rá Hogandahi Oja majuani a, hing ra fehni a. Ne di bengahu dan zamhbu bu 'buh ra Cristo. 28 Ne nuya ma zi t'uhni ahu, damin ząmhbu bu 'buh ra Cristo, n'damhma dan johyahu 'bu dá nuhu ne hin ga pes' ma sähu. ²⁹Nu'bʉ dí pạhmbʉ gue xʉn ho Oją, ngutho ga pąhmbu gue bim 'bui ma'da'yo nangue Oją u to'o gätho i øt' ran ho.

Yú t'uhnigahu Oją

Dyú 'yɛc'yɛihu, gam bɛmhbu gue emme xun ngu rán hugcate ra Ta, ngue bi 'yøt'e ngue yú t'uhnigahu a. Janangue'a hingui paju u i ten ra ximhäi, nguetho njam'bu mi pa Oja. 2Ma zi t'uhni ahu, nuya yú t'uhnigahu Oją. Ne hinga na urcahu hague dán jahu m'bejua. Pe nu'bu bi nequi 'be'a da 'yørcahu, dí pahmbu dan jahu tengu ra Cristo, nguetho da zä ga pąhmbu hague majuani in ja a ra Cristo. ³Ne n'da ngu n'daju 'bu dí tømhbu dan jahu tengu ra Cristo, janangue'a dadín hoc zehe ma mbuihu, dín ndehu da gohi xun ho tengu ra Cristo. ⁴Nu'a to'o øt' ra ts'oqui i festhoho rán t'edi Oją, nguetho nu'a ra ts'oqui nam bøni ram fe'ts'i nangue yun t'ɛdi. ⁵Pɛ dí pahmbu bi zøcua ra Cristo gue di 'bɛrca ma ts'oquihu. Ne nu'a ra Cristo hin'yu rá ts'oqui a. ⁶Nu'bʉ zại 'bʉhmi ra Cristo n'da, hingui nde da 'yøt' yu ts'oqui a. Pɛ nu'bʉ bin zam bʉ ja yu ts'oqui n'da, njam'bu bi cu't' rá mbui hague in ja a ra Cristo, ne njam'bu bi ndepe di hocpa rá mbui. ⁷Ma zi t'ʉhni ahʉ, njon gui jafʉ da hyä ahu, nguetho hønt'u gue zai øt' ran ho bi mba mahoqui u ne xun ho u tengu ra Cristo. ⁸Pe nu'a zai øt' ran ts'o, rá 'yɛ̞hɛ ra zi̞thu a. Nguetho nu ra zįthu ząi øt' ra ts'oqui gue'bu go rá mbudi thoho. Ne gue'a í zøcua ja ra ximhäi rá Ts'unt'u Oja, gue di ts'onba rá 'bɛfi ra zithu. ⁹Nu'ʉ to'o bim 'bʉi mahøn'a nangue Oja, hingan zại øt yu ts'oqui u, nguetho í hyaxta Oja yú ta gue ra hogambui. Hingui sä din zam bu ja yu ts'oqui

1 JUAN 3, 4 454

nguetho bim 'bui mahøn'a nangue Oja. ¹⁰Da zä ga pahmbu nda'u yú t'uhni Oja ne nda'u yú t'uhni ra zithu. Nguetho nu'u to'o bin zam bu ja ra ts'oqui, ne hin di huec yú cu, hing yú t'uhni Oja u.

Dan hugju n'da ngu n'daju

¹¹Nguetho guehna ran t'ɛdi bi sijʉ 'bu rá mbudi dá pahmbu ra Cristo, ngue dan huɛju n'da ngu n'daju. ¹²Ne hin ga øthu a bi 'yøt'a ra Caín gue í hyaxta a rám 'bäi ra zithu ne bi hyo rán 'yohu. Hanja ngue bi hyo a. Nguetho hingui ho rá mbui a, janangue'a bi hyo rán 'yohu ngue xun ho rá mbui a. 13 Janangue'a, ma zi cu ahu, hin ga hyonya thohohu ngue'bu di ugahu yu ja'i i ten ra ximhäi. ¹⁴Pe nuju dí pahmbu dá sohmbu rá ts'edi ran date, ne dá sømhbu bu ja rá ts'edi ra te. Guehna dí pahmbu nguetho dadí huce ma mi'yɛc'yɛihu. Nu'a to'o hin'yu rán huɛcate, bin zam bu ja rá ts'edi ran dąte a. 15 Nu'a to'o di up rá cu, ra hyodu a. Ne dí pahmbu njo'o n'da ra hyodu i ja ra 'da'yote mazai. ¹⁶Pε nu ra Cristo bi 'yurcahu 'be'a njuantho ran hugcate, ngue bi däsg rá te nangueju. Ne jatho ngutho ga øthu, hin ga su ga dä ma tehu guepu da zä ga fäx ma cuhu. ¹⁷Pe nu'a to'o i ja 'bɛ'a i pɛ'ts'i, nɛ i padi hin'yʉ 'bɛ'a da hyon a rá cu, ne nu'bu hingui ørpa ran hugcate, hinguim beni da numanho Oją a 'bu. 18 Ma zi t'uhni ahu, hinga høntho gam manthohu ran hugcate, pg guemhma ga øthu a.

Dadín johyahu 'bu dí yąhu Oją

¹⁹Nɛ nu'bʉ majuani dí øthʉ ran huɛcate, janangue dí pahmbʉ yʉ́ t'uhnigahu a Majuani, ne gue'a nan johyahu bu ja rá hmi a. ²⁰Pe nu'bu ga juanba zehe ma mbuihu, pε da hyurca ma mbuihu Oja, madague'bu i padi 'be'a gätho dá øthu, nguetho man'da ja rán hugcate xinda gueju. ²¹ Janangue'a ma zi cu ahu, nu'bu hin te dí timhbu ja ma mbuihu a xun ts'o, dadín johyahu ngue dí pahmbu dí yamanhohu Oja, 22 ne di 'daju 'be'a gätho dí äfu 'bu dí yahu, nguetho dí ørpahu yún t'edi, ne dí ørpahu gätho i numanho. ²³Nɛ i ja ua yún t'ɛdi Oja, gue ga ɛc'yɛihʉ rá Ts'unt'u, ra Jesucristo, ne dan hueju n'da ngu n'daju, tengu bi xiju. ²⁴Ne nu'a to'o i ørpa yún t'ɛdi, i 'buhmi Oja ne bim 'bupu Oja bu rá mbui a buya. Ne dí pahmbu dí 'buhmbu Oja, nguetho gue'a di bengahu rá Hogandahi bi 'daju.

Nda'a rám Hman Oją, ne nda'a rám hman a rán suiui Oją

Ma zi cu ahu, hingui sä ga εc'yεihu 'be'a gätho ním hma embi rám hman Oja. Pe i jatho ga pahmbu 'bu majuani ngue gue'a rám hman Oja, uague hin'na. Nguetho xun ngu yu hyäte pøngahya i 'youa ja ra ximhäi. ²Ne nu'a jatho ga pahmbu nda'a ním hma bi bɛnba rá Hogandahi Oja, nu'bu im ma ngue rá Thahni Oja ngue bin ją'i nɛ gue'a ra Jesucristo a, gue'a ram hma bi bɛnba rá Hogandahi Oja a buya. ³Pe to'o gätho ngue ɛna hin bin ja'i a rá Thahni Oja gue ra Jesucristo, pe nu'a ra hyäte a 'bu, nguetho bi thocpa rám hman a rán suiui ra Cristo. Xtá øhmbu ngue din 'yo

455 1 JUAN 4, 5

ua rám hma, ne ya i 'yo ua rám hman a ya. 4Ma zi t'uhni ahu, yú t'uhnigahu Oja. Ya dá tafu u yu hyäte pøngahya, nguetho nu'a dí 'buhmbu, man'da ja rá ts'edi a xinda gue'a rán suiui Oja, ngue i 'bucua ja ra ximhäi. ⁵Nu yu hyäte pøngahya, yú mbefi ra ximhäi u, ne guecua ja ra ximhäi bi nequida yúm hman u, janangue'a i ømanho ra ximhäi 'bɛ'a im man u. 6Pɛ nuju yú t'uhnigahu Oja. Janangue'a hønt'a to'o i pą a Oją i ømanho ma hmamhbu u. Pε nu'u ngue hin yú t'uhni Oja, hingui ømanho ma hmamhbu u. Guepu na pahmbu buya nda'a i ten'na majuani, ne nda'a i ten'na him majuani.

Ran hugcate a Oją

⁷Ma zi cu ahu, nde'bu dan huɛjʉ n'da ngu n'daju. Nguetho nu ran hugcate bí 'ygpu 'bu Oja. Ng nu'a di hugc rá mijajiui, gueja bim bui ma'da'yo nangue Oją, nε dim pąhmi Oją a. 8Pe nu'a hin'yu rán huęcate, hingui pa a Oja a, nguetho nu'a Oja ran hugcate a. ⁹Oja bi 'yurcahu ran hugcate 'bu mambá penhua ja ra ximhäi rá 'dats'unt'u bi yanju, n'dahma din jaju ra 'da'yote. 10 Oja bi 'yurcahu ran huɛcate ngue majuani, nguetho bá penhua rá Ts'unt'u ngue bin däse bi gurca ma ts'oquihu. Ne mada hangu gam bemhbu Oja, pe njam'bu da zä gam bemhbu, tengu bu nam bɛnju. 11 Ma zi cu ahu, nu'bu emme xun ngu rán huecate bi 'yørgahu Oja, nde'bu neju dan hueju n'da ngu n'daju. ¹²Hingui sä gan nuhu Oja nangue ma dähu. Pe mfądi bin ząm bu ja ma mbuihu 'bu dadín huɛju. Nɛ bi bømanho rán hugcate i ørcahu buya.

¹³Dí pahmbu ngue dí 'buhmbu Oja, ne nu Oja bin zam bu ja ma mbuihu. Guehna dí pahmbu, nguetho bi 'daju rá Hogandahi, ¹⁴neje dí ben'nahu nguetho dá nusehe rá Ts'unt'u Oja, ne dí mamhbe majuani bá penh Oja ua ja ra ximhäi gue da yanba yú te yu ja'i. 15 Nu'a to'o im ma ngue rá Ts'unt'u Oja a ra Jesús, nu'a Oja bin zam bu ja rá mbui, ne nu'a ra ja'i xim mi 'buhmi Oja a. 16 Dín nuhu rán hugcate Oja, nguetho dí gc'ygibahu a. Nu Oja ran hugcate a. Nu'a to'o zai εc'yεi rán huεcate Oja, nε'bu zai di huge rá mijajiui, nuja i buhmi Oja a, nε Oją bin ząm bu ja rá mbui a. 17 Nε nangue dí 'buhmbu Oja dí pahmbu xun ho rán hugcate. Janangue'a dan johyahu 'bu bi zøn ra pa din ja ran juanbi. Nguetho dí 'buhmbu tengutho ma Hmuhu ra Cristo i 'buhmi Oja, madague'bu guexta dí 'buhmbu ua ja ra ximhäi. 18 Nu'a to'o i su ran juanbi, i su nguetho hinga na padi xun ho ran hugcate i ørpa Oją. Pe nu rán hugcate Oją di 'uec'a ra mbidi a. Pe nu'bu dín suhu, dí emhbu di ungahu Oja 'bu. 19 Dí øthu ran huscate, nguetho m'bɛt'o bi huɛgahʉ Oja. 20 "Dí numanho Oja," sä dí ɛmhbu, pɛ dadí up ma cuhu. Dí fehnihu 'bu. Nguetho nu'bu hin dadí hugc ma cuhu gue zant'a dín nuhu, hague dán zä ga numanhohu Oja gue njam'bu dín nuhu. 21 Ne jaua rán t'edi Oją, bi xiju: "Nu'a to'o da numanho Oją, pε i jatho ngue ne'a rá cu da numanho, ne di hugqui."

Dí tạfu ra ximhäi nangue ma t'ẹc'yεihu

Nu'u to'o gätho i ɛc'yɛi gue bin ja'i Oja nɛ n'dat'a ra 1 JUAN 5 456

Jesucristo a, yú t'uhni Oja u. Ne gätho to'o i numanho Oja ne'u yú t'uhni Oją di huęc'u nguetho n'dat'a Oją yú Ta. ²Nɛ nu'bu majuani dín numanhohu Oja, ne'bu dí øthu yún t'ɛdi, dí pahmbu buya ngue majuani dadí huge ma cuhu. ³Ng nu'bu majuani din numanhohu Oją, ga øthu yún t'ędi, ne nu'u yún t'edi hingui hei. ⁴Nguetho nu'u to'o bim 'bui ma'da'yo nangue Oja bin t'un ra ts'edi rá mbui gue da dap ra ximhäi. Ne dí tafu rá ts'edi ra ximhäi nangue dí ɛc'yɛihu ra Cristo. ⁵To'o ngue i tạp rá ts'ɛdi ra ximhäi. Nu'a gue i ¿c'yɛi ngue rá Ts'unt'u Oja a ra Jesús.

Rá Hogandąhi Oją di bęngahu rá Ts'unt'u Oją a ra Jesús

⁶Nu ra Jesucristo bi zøcua ja ra häi. Bin xixya ra dehe a. Nε n'dat'a gue bi mbän rá ji 'bu mi du a. Ne hinga hønt'a ngue bin xixya ra dehe, pε nε bi mbän rá ji, ngue bi du. Nu'a ra Jesucristo, rá Thahni Oja a. Gue'a im ma majuani rá Hogandąhi Oją nguetho hingui sä dim fehni a. ⁷Hyu u bí 'buh mahęts'i im ma majuąni gue rá Ts'unt'u Oja a ra Jesucristo. Nu'a n'da, ra Ta, nu'a n'da ram Hma, nu'a n'da rá Hogandahi Oja, ne n'dat'a im man'u. ⁸Ne hyu u i urcahu majuani ua ja ra ximhäi gue rá Ts'unt'u Oja a ra Jesucristo. Nu'a n'da, rá Hogandahi Oja, nu'a n'da rán xixya ra Jesucristo, nu'a n'da, rán date ra Jesucristo. Ne gätho u hyu n'dat'a i urcahu. ⁹Dí ɛc'yɛihu yúm hman yu ja'i 'bu majuani, pe man'da ja ts'edi tho ga ec'yeihu rám hman Oja. Ne bi man Oja gue

rá Ts'unt'u a ra Jesús. 10 Nu'a to'o ęc'yɛi rá Ts'unt'u Oja, i pasɛ mbo rá mbui gue majuani a. Pɛ nu'a to'o hingui ɛc'yɛi, i nubɛthani Oja a 'bu, nguetho hingui ɛc'yɛi a bi man Oja nangue rá Ts'unt'u. 11 Nɛ i jaua a ram hma ngue bi ma, gue Oja bi 'daju ra 'da'yote mazai 'bu má ɛc'yɛihu rá Ts'unt'u. 12 Nu'a 'buhmi rá Ts'unt'u Oja, i ja ra te ma'da'yo a, pɛ nu'a hingui 'buhmi rá Ts'unt'u Oja, hingui ja ra te ma'da'yo a.

Dí pąhmbu dí pɛshu ra 'da'yote mazại

¹³Janangue'a dí ot'ahu gyu 'yɛc'yɛihu a rá Ts'unt'u Oja, n'dahma gui pahmbu i jaju ra 'da'yote. ¹⁴Νε dadín johyahu gue dan yąhu Oją, dí pąhmbu i numanhoju. Ne nu'bu din theui rá pähä Oja a dí ähmbu, dí pahmbu i ømanho 'bʉ dí yahʉ a. ¹⁵Νε nu'bu dí pąhmbu ngue ømanho, ga pahmbu gue da 'yøt'a dí ähmbu 'bu. ¹⁶Nu'bu dín nuhu n'da ma cuhu i øt' ra ts'ogui, ngue him má zä bi hyax ra ts'o'yu, ga äfu rá mate Oja nangue a. Nu Oją buya di japi ba pengui to'o bi 'yøt' ra ts'oqui. Pe nu'bu 'bo'o má zä bi hyax ra ts'o'yu, pε hin dí εn ahu ga äfu rá mate Oja nangue a. ¹⁷Gätho u hing yún thehu i øt'a n'da, ra ts'oqui a. Pe ja'bu øt' ra ts'oqui n'da him má zä bi hyax ra ts'o'yu, janangue'a ga äfu Oją buya. 18 Dí pąhmbu to'o gätho bim 'bui ma'da'yo nangue Oja, hin din zam bu ja yu ts'oqui a. Nguetho i fäh rá Ts'unt'u Oja a, ne hingui sä di 'uec'a ra zithu bu 'bu Oją a. 19 Nε dí pąhmbu ngue yú t'uhnigahu Oja. Ne dí pahmbu

457 1 JUAN 5

i o rá ts'edi ra zịthu u gặtho mi'da i 'bucua ja ra ximhäi. ²⁰Nuju dí pạhmbu bi zocua ja ra ximhäi rá Ts'unt'u Oją, ne nu'a bi jaju dá pạhmbu a majuani. Ne dí 'buhmbu a majuani nguetho dí 'buhmbu ra Jesucristo. Nɛ gue'a majuani Oja a, nɛ gue'a di 'daju ra 'da'yote ma mbuihu a gue njam'bu da guadi. ²¹Ma zi t'uhni ahu, hin ga ɛc'yɛihu yu hyäte oja. Nɛ hønt'a dí xi ahu ya.

2 XUUA

Ná yoho ra socua bi 'yo't'a rá 'bäiui ra Jesucristo ra Xuua

Ran zengua

¹Nugä dra dąc'yei ngurpigä, dí penh'na ra søcua jaua, grá xisu, nthahni nangue Oja, ne guí 'buhmbu bu ni t'uhni. Dadí huɛc'ahu ngue'a n'dat'a dí tɛnhdu ram Hma majuani. Ne hinga høngdä dadí huɛc'ahu pɛ nɛ'u gätho mi'da ngue i pa a Majuani. ²Dadí huɛc'ahu, nangue'a ram Hma majuani bin zam bu ja ma mbuihu nε njam'bu dim 'bερu a. ³Ma zi cu ahu, 'da'angu dím bemhbu a ram hma majuani, ne dadin hueju. Janangue'a dí äp Oja ma Tahu ne'a rá Ts'unt'u ra Jesucristo da gopu ni mbuihu a rá mate, ne rán hugcate, ng thocpa thoho da hyut'a ni mbuihu.

Ga cohmbu bu ja rán xädi ra Cristo

⁴Nugä ɛmmɛ dán johyagä 'bu má øcä ngue i tɛn'na ram Hman u 'da u ni t'uhni, tengu i xiju ra Ta. ⁵Nɛ nuya, grá xisu, nthahni nangue Oja, n'da ran t'ɛdi dín nde ga bɛn'ni i. Nɛ him ma'da'yo na ran t'ɛdi gue ga xi i, pɛ tengu thoho bi siju rá mbudi dá pahmbu ra Cristo, ngue

dan hugju n'da ngu n'daju. ⁶Nu'a ran hugcate nam bøni, gätho ga øthu yún t'edi Oja. Ne gue'a rán t'edi bi siju rá mbudi gue thocpa thoho dan hugju. ⁷Guehna dí xi ahu na, nguetho xun ngu yu hyäte i 'youa ja ra ximhäi, ngue i ɛna him bin ja'i a ra Jesucristo. Pe nu'u häte u. ne i ten rán suiui Oją u. 8Pe jatho gam fähmbu njon da hyä ahu, janangue'a hin dim 'be a xtá pehmbu. Pe dami thoju xun ho ni 'bɛfihu, janangue'a gätho gui tahmbu 'bɛ'a in nde Oja di 'da ahu m'bεjua. ⁹Ρε nu'a to'o in nde da mispa rán xädi ra Cristo, nu'a hinguin 'youi Oja 'bʉ. Pε nu'a to'o copu ja rán xädi ra Cristo, nu'a din 'voui ra Ta ne rá Ts'unt'u a buya. 10 Nu'bu da zøm bu n'da ena im man rám Hman Oja, ρε nu'bʉ hin din theui rám hman ra Cristo, hin ga säyabahu bu ma ngumhbu, xín ga äfu rám fäts'i Oja nangue a. ¹¹Nguetho nu'a to i äp rám fäts'i Oja nangue a, tengu thoho 'bu i fäx'u yún t'øt'e gue hingui ho.

Dím beni ga mba bu

¹²ξmmε xun ngu 'bε'a dín nde ga xi ahu, pε masque hønt'a dá 459 2 JUAN

huxä ra søcua jaua. Nguetho xømhma da zä ga mbagä bu, gan nu ahu bu, nɛ dan yahu bu, janangue a hin te ga 'bɛhmbu ran johya. ¹³I pεnh'na ran zengua u yú t'uhni a ni juhuɛ, nɛ'a nthahni nangue Oją a. Nε hønt'a dí xi ahu ya.

3 XUUA

Ná hyu ra søcua bi 'yo't'a rá 'bäiui ra Jesucristo ra Xuua

Ran zengua

¹Nugä dra dạc'yɛi ngurpigä, dí pɛnh'na ra søcuą ma zi cu i Gayo, mahuɛqui i. Dadí huɛc'i i nangue ram Hma majuạni dí ɛc'yɛiui. ²Dí äp Oją di ja i gui pømmanho, nɛ di zac ni jạ'i, tengu nán zaqui ni mbui. ³Emmɛ dán johyagä nangue'e, nguetho bi xicä 'da yu cu bá peng bu guí 'bui, ngue guí tɛn'na ram Hma majuạni, nɛ nu'u gätho guí øt'e din thɛui a ram Hma. ⁴Hin'yu man'da dán johyagä 'bu dí øde i tɛn'na ram hma majuạni u dá xänbi.

Xun ngu rá mate ra Gayo

⁵Ma zi cu i, xun ngu ni mate ngue'a gadí jamansu ni cuhu, madague'bu hin guí pa u. ⁶Nu'u 'da yu cu gue bá peng bu guí 'bui bi ma nangue'e. Nu'bu mám petihe bi xije ngue i ja nin huɛcate. 'Yørqui ts'u ra mate gui fäx'u 'bu bi zøm bu mahøn'a, nguetho yún sähu da 'bäx'u yúm 'bɛhni Oja. ⁷Nguetho nu'u 'da bi 'bɛhni da mba n'danni da ma nangue ra Jesucristo, nɛ hin te da 'yäp'u hingui ɛc'yɛi. ⁸Janangue'a jatho ga jamansuhu u.

Ne nu'bu dí fäxhu u, dí comhbu ra 'befi nangue rám Hman Oją buya.

Nu ra Diótrefes in hecpate

⁹Dá pɛnh'na n'da ra søcuą bu ja nim pɛtihu. Pɛ nu ra Diótrefes hinguin nde da 'yøde 'bɛ'a dí mamhbe, nguetho in nde dim 'bɛt'o nanguesɛ. ¹⁰Janangue'a, nu'bu dá mbagä bu, ga xi ahu 'bu dám pɛtihu, 'bɛ'a i øt'a ra Diótrefes, ngue di c'aman'uje. Nɛ hinga hønt'a, nɛ hingui sin'u yum 'bɛhni ya ní nɛts'i, nɛ di hɛcpa u to'o ɛna da zin u, nɛ i høn a thi buya.

Im mamanho nangue ra Demetrio

¹¹Ma zi cu'i, dí xi i, hin ga tenhdu u yún t'øt'e yu ts'om'bäi, pe ga humbi ga tenhdu yún t'øt'e yu hocją'i. Nu'u to'o zai øt' ran ho, bim 'bui ma'da'yo nangue Oja. Pe nu'u to'o zai øt' ran ts'o hingui pa Oja u. ¹²Pe nu ra Demetrio gätho im mamanho yu cu nangue'a. Ne nu yún t'øt'e gätho din theui a ram Hma majuani. Necä n'dat'a dím mangä ngue xun ho a ra Demetrio. Ne guí padi ngue majuani dím mangä.

461 3 JUAN

Rán zegui ran zengua

¹³ Emme xun gu 'be'a dín nde ga xi'i, pe hønt'a dá huxä ra søcua jaua. ¹⁴Nguetho xømhma mi ts'utho ga mbagä bu ba nu i, ne dan yaui bu. 15 Oja da hyut'a ni mbui. I penh'na ran zengua ni amigo 'bucua ne dami zenguagahe ts'u n'da ngu n'da u guí 'buhmbu bu. Ne hønt'a dí xi ahu ya.

JUDAS

Ra søcuą bi 'yo't'a rá 'bäiui ra Jesucristo ra Judas

Ran zengua

¹Nugä drá Judascä, drá 'yɛhɛgä ra Jesucristo, nɛ man 'yohugä a ra Jacobo Santiago. Dí o't'ahu ra søcua hønbu go hapu i 'buh yu 'yɛc'yɛi, gätho ahu ngue Oja bi huahn'nahu nɛ ɛmmɛ di huɛc'ahu, nɛ ra Jesucristo di jamansu ahu.
²Nɛ Oja dí ndepe di 'da ahu rá mate xun ngu, nɛ da hyut'a ni mbuihu. Nɛ thocpa tho man'da gui hyamhbu rán huɛcate Oja.

Yu hyäte xänbate

³Nu'ahu ma zu cu ahu dadí huɛc'ahu, mí ndegä ga o't'ahu nangue 'bɛ'a í pøju Oja gätho gahu. Pɛ dím bɛngä ngue n'dan'yo jatho ga xi ahu. Jatho gui hyuthu nzambui guin yamhbu a rám hma ma t'ɛc'yɛihu ngue bi 'daju Oja, dyu'yɛc'yɛihu, n'damhma njon da zä di pät'ahu 'bɛ'a guí ɛc'yɛihu. ⁴Dí xi ahu na, nguetho i 'bu i 'da u yu hyäte xänbate, gue'u 'darbu gadím pɛtihu, nɛ him bi xi ahu ngue xun ts'o im bɛni da 'yøt'e. Emmɛ xun ts'otho nɛ hinguin 'yohu Oja u. Nguetho sä i ɛn u: "Sä gui 'yøthu

'be'a go guím bensehu, ne hin di un'nahu Oja nguetho i ja rá mate," sä i ɛn u yu hyäte. Him majuani i man ʉ, nɛ nu'ʉ hingui ɛc'yɛi ma Hmuhu ra Jesucristo gue'a di mandagahu. Ne nt'o't'i bu ja rám Hman Oja 'bɛ'a ran ʉnbi da nu ʉ i ma tengu na. Ne Oja da 'yøt'e tengu bi ma. ⁵Nuya dín nde ga bεn'nahu 'be'a gá pahmbu mám'bet'o, ngue 'bɛ'a bi 'yøt' Oja maya'bu. Nu Oja bi yan u yu ja'i israel gue bi gucpu ja ra häi Egipto, pe to'o gätho him bi 'yøt'e 'bɛ'a nde Oją, gätho Oją bi japi bi du bu ma'ueni u. 6Nε nu 'da u yum 'behni mahets'i mí ja yú ts'edi. Pe m'bejua bi 'beh yú ts'edi 'bu mí ts'on yún 'yomfeni. Janangue'a bá pøm bu mahets'i guepu mí 'bui. Nuya Oją hin di japi da bøm bu ja ra 'bexui guepu 'buhya. Nguetho nu'u tengu nthu't'i yu cadena bu, ne da gopu asta gue'bu go da zøn ra pa din ja rán ts'embi Oja nts'utho. ⁷Ne'u yu ją'i mí 'bupu ja ra hnini Sodoma ne ra hnini Gomorra ne yu hnini mbe 'darbu mí jahu, bi 'yøt' ran ts'o. Bi 'yøt' yun 'yomt'eni, ne yun 'yohu bi 'yørpa ran ts'o yú min 'yohuhu, tengu 'bu ra xisu i 'buhmi,

463 JUDAS

nε yu xisu mí øt'e tengu a. Pε nu Oja bi juadi nangue ra sibi mahets'i. Nε nu'a 'bε'a bi t'ørpu, Oja bi 'yuh ra hmεpya 'bε'a da 'yørpa yʉ dadits'oqui. 8Pe madague'bu i ja yu hmεpya 'bε'a da 'yøt' Oją, pε nu yu hyäte xänbate guexta'a i øt'e tengu mí øt' yu ja'i bu ja ra hnini Sodoma. I ma guese Oją i uti 'be'a da 'yøt'e xun ho gue'bu i 'ui, ne i ørpa ran ts'o rá ja'izehe. Ne i festhoho yún t'edi ra Hmu mahets'i, ne di c'aman'u tho yum 'behni mahets'i. ⁹Pe nu ra Miguel rá hmu yum 'bɛhni mahɛts'i, hingui øt'e tengu i øt'u yu hyäte xänbate. Nguetho nu'bu mín junt'ui ra zithu nangue rá ja'i ra Moisés xun du, nu'a ra Miguel mí pądi ngue hingui ho 'bu dí yąp'a ra zįthu ram hma xun ts'o. Janangue'a bi t'ɛm thoho a ra zithu: "Oja di hec'a'i." 10 Pe nu'u yu hyäte i man ran ts'o nangue yum 'bɛhni mahɛts'i, nɛ nangue 'bɛ'a gue majuani. Pe nu'u hingui padi 'be'a gue majuani. Hønt'a i padi tengu yu xa'yo nε yu buru, nε i øt'e tengu u. Pe Oją di un yun unbi ne di jua u nangue ran ts'o i øt'u. ¹¹ Huɛcate u i øt' yú pähä zehe tengutho bi 'yøt'a ra Caín. Ne nu'u i nde da xänba yu ja'i 'bɛ'a gue him majuani, tengu bi 'yøt'a ra Balaam, n'damhma da dah ra mbeti. Nu'u i festhoho yún t'edi a i ja rá ts'edi di mandagahu, tengu bi 'yøt'a ra Coré. Ne'u da mba ma juadi, tengutho ra Coré. ¹²Nɛ nu'bu guí øt' nin ts'ihmehu, gue'a ra hmepya gadín hueju n'da ngu n'da ahu, ne i søm bu yu hyäte xänbate, nu'u tengu 'bu i pät'a xun ts'o bu ja ni pahnihu. Ne nu'u xingui ts'u i pe'ts' yú sä da zi nangue yún johya

zehe, ne xinguim beni 'be'a nam bøn'a ran ts'ihme. Pe nu'u yu hyäte hin te i ja a di muui, tengutho yu güi hinguin 'youi ra 'ye, nɛ ran dahi i tuts'i. Ne nu'u tengu tho n'da ra za njam'bu zuh yun dät'o. Tengutho n'da ra za xu 'yot'i bi yøt'e. ¹³Nε nu'u yu hyäte xänbate 'bu i yą, i mbafi tengu 'bu ɛmmɛ mahyoni tho u yum hma. Tengu ra dehe bu ja ra dadeja ngue emme di hị 'bu i en ran dạhi, pe hønt'a 'be'a xun ts'o min 'youi ra dehe bi zopu ndendeją. Nε nu'u hingui sä da 'yut ra 'yu n'da nguetho tengu yu sø bi dägui, hin din ja ran yot'i mahøn'a, da gohi ra 'bɛxui mazai. ¹⁴Nu'a ra Enoc bim pøngahya maya'bu 'be'a nín juanbi da nu a n'da ngue i øt'e tengu i øt'u. Nu'a ra Enoc, ná cut'a a rám bom'beto ra Adán, bi ma: "Dami 'yøhmbu ya 'be'a da 'yøt' ra Hmu mahets'i. Ba ehe din 'yohu yu miyone thoho u yúm 'bεhni mahɛts'i, 15 ngue di juanba u gätho u i øt' ran ts'o. Νε di unbi nangue 'be'a hingui ho bi 'yøt'u, ne bi man ran ts'o nangue Oją gätho u ngue him bi 'yɛc'yɛi Oją." 16 Nɛ nu'u yu hyäte xänbate i sani nangue dí øt' mam 'buihu tengu i nde Oją. Ne i ma embi ngue'a n'da ra ja'i rá ts'oqui a 'bɛ'a nám 'bʉ ʉ. Nu'ʉ i øt' ran ts'o tengu i ndese rá mbui u, ne din 'yezehe. Ne i xih rán ho u mi'da yu ją'i ngue i honi 'be'a i ndese.

Nu ra Judas bi zam yu 'yec'yei ne bi xifi 'be'a da 'yøt'e

¹⁷Pɛ nu'ahʉ ma zʉ cu ahʉ, dadí huɛ̞c'ahʉ, o guí pumbɛ̞nihʉ 'bɛ'a bi man ʉ yʉ́ 'bäihʉ ma Hmuhʉ ra Jesucristo. ¹⁸Ya bi xi ahʉ ngue dim JUDAS 464

'bu i 'da, gue'bu rán zegui, ngue da den'nahu nε da 'yøt' ran ts'o i ja bu mbo yú mbui u ne gue'a bi si ahu. 19 Nε nu'u yu hyäte di dump u yu 'yec'yei din junt'i. Pe i sänzehe 'bε'a i øt'e, nε hinguin 'yohu rá Hogandahi Oja u. 20 Pε nu'ahu ma zu cu'ahu, o guí øthu tengu i øt' yu hyäte, pε dami tεnni xun ho ni t'ec'yeihu him ma thaspi, ne gue'a dán te ni mbuihu a buya. Ne dami japi di manda ahu rá Hogandahi Oja 'bu guí yahu Oja. ²¹ Dami 'yøthu ram 'bui xun ho ngue din theui rán hugcate Oja, ne dami tømhbu a ra pa ba sh ra Jesucristo ma Hmuhu, din ja rá yembui nangueju ne di 'daju ra temazai. ²²Dami japi da 'yɛc'yɛi to'o di 'yon yú mbui nangue Oją. ²³Dami yąm

bu ja ran ts'o, tengu tho 'bu gá yam bu ja n'da ra sibi. Ne din ja ni yembui nangue u 'da, pe damin jamansuse ngue hin gui 'yøthu yun ts'o tengu i øt'u. Dami samhbu 'be'a i øt'u gue bi ts'on yú mbui u.

I ęspa Oją ra Judas

²⁴Nu'a Oją i ja rá ts'ɛdi di jaju hin ga øthu yun ts'o, nɛ di däju bu ja rá hmi mahoqui tho ma mbuihu. Nɛ ɛmmɛ din jaju ran johya bu. ²⁵Hønt'a n'datho Oją i 'bui, nɛ hønt'a i padi xun ho. Nɛ di pøju nangue 'bɛ'a bi 'yøt'a ra Jesucristo ma Hmuhu. Nɛ nu'a Oja i ja rá nuixte thoho, nu'a ra Hmuts'ut'abi, nɛ di manda 'bɛ'a gätho i ja a rá ts'ɛdi, nɛ gätho mí ja, nɛ i ja ya, nɛ din ja mazai. Nɛ hønt'a dí xi'ahu ya.

APOCALIPSIS

Rán t'uti ra Jesucristo bi nu ra Xuua

Rám hman ra Jesucristo bi sih ra Xuua

Nu'a Oja bi 'yut yú 'yehe i 'bucua ja ra häi. Janangue'a nu ra Jesucristo bá pεhna n'da rám 'behni mahets'i bi 'yurcä dra Xuuagä, rá 'yεhεgä, 'bε'a din ja. ²Nε nugä dra Xuuagä dí o't'ä ya 'be'a gätho dín nugä, ne'a rám hman Oja ne'a rám hman ra Jesucristo i xiqui. Gätho dí o't'ä ngue da fadi 'bɛ'a majuani din ja. 3Din johya gätho to'o da man'a 'bɛ'a nt'o't'i ua ja ra søcuą. Nε din johya to'o gätho da 'yøde 'bɛ'a din ja. Nɛ din johya 'bu da 'yøt'e 'bɛ'a gätho i mangua ja ra søcuą, nguetho him maya'a din ja 'be'a gätho nt'o't'i ua.

I t'orpa ra søcuą yu 'yęc'yei bu ja yoto yu hnini

⁴Nugä dra Xuuagä dí ot'ahu ra søcua gätho yu 'yɛc'yɛi dim pɛti bu ja yoto yu hnini bu ja ra häi Asia. Oja di jap ahu nɛ da hyut'a ni mbuihu, guet'a Oja i 'bui nɛ mi 'bui, nɛ guet'a dim 'bui mazai. Nɛ rá Hogandahi Oja i juadi xun ho rá ts'ɛdi, gue i 'bupu hapu di

manda rá ts'edi Oja, i pen'nahu rán jąpi. ⁵Nε bí pεn'nahu rán jąpi a ra Jesucristo, ne da hyut'a ni mbuihu. Nu'a ra Jesucristo zai i mam majuani, ne rá mbudi bi dambeni 'bu mi du, ne dim hmuts'ut'abi ne di manda gätho yu ts'ut'abi gue i 'bucua ja ra häi. Nu'a di huggahu nε bi yanju nangue ma ts'oquihu, bi mberca ma mbuihu nangue ran ts'o, nangue rá ji bi mbäm 'bu mi du bu ja ra pont'i. ⁶Nu ra Jesucristo bi 'daju ra ts'edi dan ts'ut'abihu ne dam mbäjahu ga ørpahu rá 'befi bu i ja rá ts'edi Oją rá Ta. Ne nu'a ra Jesucristo din ja rá nujxte ne rá ts'edi høn'bu go njam'bu mazai. Ne hønt'a gam bemhbu a ya. 7Nuna ra Jesucristo guet'a ba ɛhɛ ban 'yohu yu güi, ne gätho yu ja'i da nu. Ne gätho to'o bi ucpi da nu, ne gätho yu ja'i i 'bucua ja ra ximhäi emme din ja ra dumbui 'bu bi nu a. Majuạni njabu din ja 'bu bá ɛhɛ. Nε hønt'a gam bɛmhbu a ya. 8Nu ra Cristo bi 'yɛna: "Nugä ra mbudi dám 'bucä, ne njam'bu him mi 'bucä," ɛn'a ra Hmu mahɛts'i nuixte rá ts'edi, nu'a i 'bui ne mi 'bui, ne i 'bui mazai.

Ra Xuua bi nu madą rá ts'edi ra Cristo

⁹Nugä dra Xuuagä, ni cuju nangue ra Cristo, dí ot'ahu ra søcua ya. Nuju dí comhbu yun unbi guín nuhu nangue dí εc'yεihu ra Hmu mahets'i. Nu'a Oja di manda bu ja ma mbuihu, nε ra Jesucristo bi 'daju ra ts'ɛdi ngue hin dadí xømbuihu 'be'a dí nuhu. Ne nugä dra Xuuagä dí ofädigä bu ja ra häi Patmos, n'da ra t'uhäi i ja bu ja ra dehe nguetho dím mangä rám hman Oja ne dí mangä nangue ra Jesucristo. ¹⁰Nu'a ra pa domingo dán yą'be Oją, nε 'bex bi bɛngä a rá ts'edi rá Hogandahi Oja. Ne dá øcä n'da ra nde bu ja ma xuthä tengu'bu n'da ra thuxi, ɛmmɛ nts'edi thoho. 11 Ne nu ra nde bi 'yɛna: "Nugä dra mbudigä nɛ hinjąm'bu ngue him mi 'bucä, ne zai dí 'bucä." Ne nu'a ra nde bi xicä, bi 'yena: "Gui 'yo't' ya 'be'a gätho gui nu, ne gui penpu 'buh yu 'yɛc'yɛi, gue'u dim pɛti bu ja yoto yu hnini bu ja ra häi Asia, guepu ja ra hnini Efeso, nepu ja ra hnini Esmirna, nepu ja ra hnini Pérgamo, nepu ja ra hnini Tiatira, пери ja ra hnini Sardis, пери ja ra hnini Filadelfia, nepu ja ra hnini Laodicea." ¹²Ne nugä dra Xuuagä 'bex dá nyggui ngue dín nde ga nugä to'o bin yą. Ne dá nugä yoto yu lámpara ngue ra oro yú gua. ¹³Nε dá nugä i 'bä inde bʉ ja yʉ lámpara ra Cristo, ngue'a bin ja'i ua ja ra ximhäi, mi he ra pahni xum mba, i sørpu ja yú gua, nε man thu't'i rá tịya n'da ran gut'i ngue ra oro. 14 Nu'u vú xta tengu ra t'axca

xide'yo, ogue tengu ra t'axcase. Ne nu yú dä εmmε bi hyät'i tengu'bu n'da ra sibi i sø. 15 Νε nu'u yú gua, emme di fexni tengu ra xit'egui ra bronce di hoc ra sibi ne i pa nthạmmi xun ho. Ne nu'a rá nde tengu yu dąthe xun ngu ne nts'edi di hị. ¹⁶Nε mi o rán 'yεi yoto yʉ sø, nε bi bøxpu ja rá nde tengu n'da ra espada i yoho yú het'i ngue din juanbate. Νε nu'a rá hmi εmmε bi fexni tengu rá ts'edi ra hyadi 'bu bi hyuxyadi. ¹⁷Nε nu'bu má nugä, dá tạngä bu ja rá gua tengu'bu ya xtá tugä. Pe nuna bi dosca rán 'yei ne bi xiqui: "'Yo guín su, nguetho nugä dra mbudigä ne dran zeguigä, ne hinjam'bu him mi 'bucä. ¹⁸Nugä zai dí 'bui, guecä dá tugä pε nuya guí nu dí 'bʉcä ya, nε dam 'bʉcä mazại høn'bu go njam'bu. Ne i ja ma ts'edi gue dadí manda hapu i pa u xun du. I jagä ran sogui ngue ga xocpa u 'da, nε ga jurpa u mi'da." 19 Νε bi xiqui, bi 'yɛna: "Dami 'yo't' ya 'bε'a gätho guí nu ya, ngue gätho i ja ya, ne'u gätho din ja m'bejua. 20 Ga xi a ya 'bɛ'a ní hmɛpya i ja bʉ man 'yei, ngue yoto yu sø ne'u yoto yu lámpara ngue yu oro yú gua. Gue yoto yu sø, rá hmepya u yoto yum 'behni mahets'i, gue di ze'u dim peti bu yoto yu hnini, ngue 'da'a n'danni yu hnini i 'bui. Ne nu'u yoto yu lámpara rá hmepya u yoto yúm peti yu 'yec'yei hapu zai dim peti."

Ram hma da hmam bu ja ra hnini Éfeso

Nu'a ra nde bi xicä ngue ga o't'a n'da ra søcuą, ga undä a ram 'bεhni ngue i fäx u yu 'yεc'yεi

467 APOCALIPSIS 2

bu ja ra hnini Éfeso. Νε nu'a ra søcua da hmam bu 'buh yu 'yec'yei. Nu yúm hmansε a gue i 'yo inde bu ja yoto yu lámpara, ne i o rán 'yei yoto yu sø. ²Ne nu'a ra nde bi xi'u yu 'yɛc'yɛi bu, bi 'yɛna: "Dí paçä 'be'a gätho gá 'yøthu bu, ne dí pacä hangu nangu ra 'befi gá 'yøthu. Ne dí pacä gue hin gán xømbui nangue ni 'bɛfihu. Nɛ dí pacä ngue xingui ts'u gadí jafu da 'yøt' ran ts'om'bäi n'da. Ne gá 'yänhdu 'da yum hman u to'o ena yú 'bäihu ra Cristo, ne gá pahmbu yu hyäte thoho u. ³Ne dí pacä gue hin gán xømbuihu ran unbi gá nuhu, ne ra 'befi gá 'yøthu nangue gá 'yɛc'yɛigahu, nɛ xingui ts'u gá 'yɛ'ts' ni t'ɛc'yɛihu. ⁴Pɛ i ja ahu ts'u gue hin dí numanhogä, ngue gá 'yɛs'hu ts'u a guí bɛnju ya nε hín gadín huεju. Nε hin guín jahu bu 'bu ra mbudi thoho gá 'yɛc'yɛigahu. 5Dami bɛmhbu ya hangu na ngu bi ga'a ni t'ɛc'yɛihʉ 'bu gmí 'yes'hu a gní benju ne gá 'yɛ'ts' nin huɛcatehu. Dami päh nin 'yomfenihu ya. Dami thoju a gmí øthu rá mbudi thoho. Pe nu'bu guexta'a guí øthu, ga 'uecä n'da ra lámpara 'bu, ne him man ga ja ahu tengu'bu ra lámpara bu guí 'buhmbu, 'bu hin gui hoc nin 'yomfenihu. ⁶Pe i ja ahu 'be'a xun ho ts'u, nguetho n'dat'a dím bemhbu gue hin dín numanhohu a i øt'u yu nicolaítas. ⁷Nu'bu i ja ni zaguhu, gui 'yøhmbu 'be'a da xi ahu a rá Hogandahi Oja gätho gyu 'yɛc'yeihu. Ne nu'u to'o hin da thapi nangue ran ts'o, ga undä ran t'edi da za yun dät'o bu ja ra za t'embi rá za ra temaząi, gue i 'bäpu 'bu Oją," bi 'yɛn'a ra nde bi zoqui.

Ram hma da hmam bu ra hnini Esmirna

⁸Ne xø bi 'yengui: "Nuya gui 'yorpa ra søcua ram 'bɛhni gue i fäx yu 'yɛc'yɛi bu ja ra hnini Esmirna. Ne gui xifi gue mam hmangä, guecä mi 'bucä 'bu ra mbudi thoho ne dam 'bucä mazai, nugä dá tugä ne dá ndants' mahøn'a ne dí 'buhya, gui 'yena. Ne nu'a ra søcua da hmam bu 'buh yu 'yec'yei bu ra hnini Esmirna." ⁹Ne en'a ra nde: "Dí pacä 'bɛ'a gätho nín unbi guí sähu nanguecä. Ne dí pacä gue gyu hyoyahu bu ja ra häi, pe xun ngu i ja ahu nangue Oja. Nugä dí pacä gue di c'aman'u ahu 'da yu judío gue ense majuani yu judío u, gue nde da ma yú t'uhni Oja u. Pe him majuani yú t'uhni Oja u, pegue rám peti ra zithu a i øt'u. ¹⁰Ne 'yo guí suhu ran unbi gue mi ts'utho din ja ahu. Gui 'yøhmbu ya 'bɛ'a din ja ahu, ngue gui nuhu rán ts'äte ra zįthu nu'bu da jo ahu 'da ahu. Ne 'det'apa guin nuhu yun unbi. Ne nu'bu hin gui 'ye'ts' ni t'ec'yeihu madague'a gui tuhu, gá tạhmbu xun ho a ra te 'bu. 11 Nu'bu i ja ni zaguhu, gui 'yøhmbu ya 'be'a i xi ahu rá Hogandahi Oja gyu 'yɛc'yɛihu. Nɛ nu'u to'o hin da thapi nangue ran ts'o, hin da mba bu ja ran unbi mazai, ne hin di unba a ná yoho ran dąte," bi 'yɛn'a ra nde bi xiqui.

Ram hma da hmam bu ra hnini Pérgamo

¹²Ne bi xic mahøn'a ra nde, bi 'yena: "Nuya gui 'yorpa ra søcua ram 'behni ngue i fäx u yu 'yec'yei APOCALIPSIS 2 468

bu ja ra hnini Pérgamo, gue da mam bu 'buh yu 'yec'yei. Ne gui 'yo't'i 'bɛ'a dí mangä gue i jagä ra espada yoho yú het'i. 13 Nugä dí pacä 'bɛ'a guí øthu hapu guí 'buhmbu, guepu di manda ra zithu. Nε dí pącä gue hin gá hyεhmbu ni t'ec'yeihu, xíngui ts'u gá cønju nu'bu mi mba ntho bu a ma hoga'yehe ra Antipas, guepu 'buh ra zįthu. 14 Pε i ja ahu ts'u a gue hin dí numanhogä, nguetho i 'bu i 'da ahu i ten rán xädi ra Balaam. nu'a ran 'yohu gue bi xänba ra Balac 'bɛ'a da 'yøt'e gue da hyät'u yu israel. Nu ra Balac bi xih yu ja'i da den yún gopa yu hmite, ngue da zi 'be'a bi mbøspa u, ne da 'yøt' ran 'yomt'eni. 15Ne i 'bu i 'da ahu gue hingui nde da 'yɛ'ts' yún xädi yu nicolaítas, nε hin dí numanho 'bɛ'a øt'u. 16 Janangue'a dami päh nin 'yomfenihu. Ne nu'bu hin'na, ga mbagä bu n'dihi ne ga su'u nangue mam hmangä, tengu ra espada gue i pøm bu ma ndegä," bi 'yɛn'a ra nde gue bí 'yɛh mahɛts'i. 17 Nɛ bi thoqui bi xiqui, bi 'yɛna: "Ne to'o i ja yú zagu, da 'yøde 'bɛ'a xi'a rá Hogandahi Oja yu 'yec'yei. Ne to'o hin da thạpi nangue ran ts'o, ga undä ra maná mahets'i gue nt'agui. Nε ga undä n'da a n'da ra do xun t'axi guepu nt'o't'i ma'da'yo rá thuhu zehe. Ne xínga gue'u mi'da yu ja'i da badi 'be'a nt'o't'i bu, hønt'a to'o da hyani," ¿n'a ra nde bí 'yeh mahets'i.

Ram hma da hmam bu ra hnini Tiatira

¹⁸Nɛ bi xic mahøn'a, bi 'yɛ̞na: "Nuya gui 'yorpa ra søcua ram

'bɛhni gue i fäx u yu 'yɛc'yɛi bu ja ra hnini Tiatira, gue da hmam bu 'buh yu 'yec'yei. Gui 'yorpi 'be'a dí mangä rá Ts'unt'ugä Oją, gue i sø ma dä tengu ra sibi i the, ne nu'u ma gua di fɛxni tengu n'da ra bronce ra xit'egui gue i pa nthąmmi xun ho. 19 Dí pącä 'be'a gätho guí øthu ne dí pącä gue i ja nin hugcatehu ng majuani guím benju, ne ja a ni t'ec'yeihu xun ho. Nε dí pacä gue guí øthu xun ho rá 'befi Oją, ne hin gán xømbuihu. Nε man'da xʉn ho guí øthʉ ya xinda gue'bu ra mbudi tho gá 'yɛc'yɛihu. 20 Pe i ja ahu ts'u a hin dí numanhogä, nguetho gadí jafu in xänbate bu n'da ra xisu, ra Jezabel, gue'a i ɛ̞nsɛ rá pøngahyą Oją. Pɛ nu'a i xänba yu 'yɛc'yɛi bu da dɛn yún ts'ihmε yu hmite, nε i xänba ran 'yomt'eni. ²¹ Nugä dá tø'mi a ra xisu ngue xtí päh rán 'yomfɛni, pε hingui nde, i nde di thocta a ra ts'on'yomfeni. 22 Janangue'a ga un ran unbi nts'edi, gue din hyen'na ra xisu, ne'u gätho to'o i tenni da nu ran unbi nts'edi gue ga undä. Ne din jabu ga øt'ä nu'bu hin di päh yɨn 'yomfɛni u nɛ hin da hyɛh ran ts'o i øthu a ra xisu. ²³Ne nugä ga ho gätho yú t'uhni a ra xisu, guepu da ba u gätho yu 'yɛc'yɛi gue dí pacä yún 'yomfɛni yʉ ja'i, nɛ dí pącä 'bɛ'a gätho in nde yú mbui u. Ne ga cos'ahu 'be'a gá 'yøthu n'da ngu n'da ahu. ²⁴Pɛ mi'da ahu bu ja ra hnini Tiatira gue hin gá tenhdu rán xädi ra xisu, ne hin guí pahmbu rán xädi ra zithu tengu i man u 'da gue ɛna padi xun ho rán xädi ra zithu. Ne nugä hin ga 'da ahu man'da xun hei gui 'yøthu.

²⁵Pe hønt'a ga xi ahu, guim benthu xun ho ni t'ɛc'yɛihu asta gue'bu go bá ɛcä mahøn'a. 26 Nɛ nu'u to'o hin da thapi nangue ran ts'o, ne'bu di thoqui da 'yøt'e 'bɛ'a gätho dí ndegä asta gue'bu go rán zegui ra pa, ga undä ran t'ɛdi di manda 'da yu xequi ra häi, ngue ga combbe ra ts'edi bi 'dacä ma Ta. ²⁷Ne'u di manda gätho u yu ja'i ngue 'dahma 'dan'yo bu na ya. Ne da 'yut ram fet'egui u man suihe, tengu'bu da xen ra jahäi a ra bareta ngue din tɛxt'i. Ne gue'a ra ts'edi bi 'dacä ma Ta. ²⁸Nugä tengu'bu dra Dasø. Nε to'o da 'yøt'e 'bε'a xun ho, dam 'buhmbe 'bu guá pengä. ²⁹Nɛ nu'bu i ja ni zaguhu, gui 'yøhmbu 'bɛ'a i xih rá Hogandahi Oja yu 'yęc'yei," ɛn'a rá Ts'unt'u Oja.

Ram hma da hmam bu ra hnini Sardis

Nε xø bi 'yɛng mahøn'a: "Nuya gui 'yorpa ra søcuą ram 'behni i fäx u yu 'yɛc'yɛi 'bupu ja ra hnini Sardis. Ne gui xih mam hmangä, ngue dí 'bu'be rá Hogandahi Oją i juadi xun ho yú ts'edi. Ne i o ma 'yɛ u yoto yu sø. Nɛ nuna mam hma da hmam bu 'buh yu 'yɛc'yei. Nugä dí pacä 'be'a gätho guí øthu bu. Nu ahu guí mamhbu maxøts'e thoho, ne sä guí emhbu guí 'buhmbu nangue Oją, pε dí pącä, nu ahu, tengu'bu ya xun du ni tehu. ²Pε daman nuhmbu ya, nε dami zacuahu a zu ts'u ni t'ęc'yeihu bi bongui, n'damhma him majuani da du ni tehu ngue gan unbahu mazä. Nguetho dí pącä gue hin guí øthu in nde Oją gui 'yøthu. ³Dami bemhbu ya 'be'a bi sän'nahu. Nuya

dami päh nin 'yomfenihu, ne dami tenhdu 'be'a gá pahmbu rá mbudi. Pe nu'bu hin gui päh nin 'yomfɛnihu, ga mbagä bu tengu n'da ra be, ne hin gui pahmbu 'be'a má ora ga søngä bu, ne ga un'nahu. 4Pe i 'bu'i 'da ahu gue him bi ts'on yú mbui. Ne nu'u dan 'yohe u, ne da hye u yu pahni xun t'axi nguetho yún sähu dan 'yohe," bi 'yɛn'a ra nde bí 'yɛh mahɛts'i. ⁵Nɛ bi thoqui bi xic ra nde, bi 'yɛna: "Nɛ nu'ʉ to'o hin da thapi nangue ran ts'o, da hye yu pahni xun t'axi. Nε hin ga ts'onba yú thuhu i huxpu ja ra søcua i ma to'o i ja ra temazai. Ne gam mangä gue ma mbetigä u, guepu ja rá hmi ma Ta, guepu i 'bäh yúm 'behni mahets'i. 6Ne nu'bu i ja ni zaguhu, dami 'yøhmbu 'bɛ'a i xih rá Hogandahi Oja u yu 'yɛc'yɛi," εn'a ra nde.

Ram hma da hmam bu ra hnini Filadelfia

⁷Ne bi xiqui mahøn'a: "Nuya gui 'yo't' man'da ra søcua, gui un'na ram 'behni i fäx'u yu 'yec'yei 'bupu ja ra hnini Filadelfia, gue da hmam bu 'buh yu 'yec'yei. Ne gui xih mam hmangä gue xun hothogä, hin'yu ma ts'oqui, ne hønt'a majuani dím mangä. Ne dí ha ran sogui ngue ra hmepya i jagä ra ts'edi tengu ra hmepya bi 'yu'a ra David. Ne nu'bu ga xocpa n'da bu ja ma ts'edi, njo'o n'da da zä da gurpi, ne nu'bu ga jurpa n'da, njon da zä da xocpi. ⁸Nugä dí pacä 'be'a gätho guí øthu bu, ne dá xoc'ahu rá 'yu Oja man'da da zä gui 'yørcahu ma 'befi, ne hingui sä n'da ra ją'i da got ra 'yu. Ne dí pacä ngue

APOCALIPSIS 3 470

hinguin zaqui ni t'ɛc'yɛihʉ, pɛ i ja ahu ts'u. Thocua thoho gá ten man xädigä, xíngui ts'u gá hyegahu. 9Pe nuya dami 'yøhmbu ts'u ya 'be'a din ja yu ja'i bu gue i ten ra zithu, nu'u im ma gue yu hogajudío u, pε him majuani yu hogajudío, ngue hingui ten Oja u. Nugä ga japi din danyahmu bu ja ni guahu to'o i ten'na ra zithu, n'dahma da ba u emme ngue dádí huec'ahu gyu 'yɛc'yɛihu. 10 Nɛ nangue a dá xi ahu, nε hin gán xømbuihu 'bu mi mba ma un'ni ahu, tenguga, janangue'a ga jamansu ahu nu'bu bi zøn ra pa din ja ran unbi nts'utho ua ja ra ximhäi, ngue da ts'ä gätho yu ja'i i 'bucua ja ra ximhäi. ¹¹Nuya him maya'a ga mbagä bu. Nde'bu gan jamansuhu gue hin gui jafu n'da di ts'on'na ni t'ɛc'yɛihu, ngue hin da zä gui hyamhbu 'bɛ'a gá tahmbu. ¹²Ne nu'u to'o hin da thapi nangue ran ts'o, ga japi da hyan a ra 'bɛfi nuixte thoho, ngue tengu n'da ra guangu bu ja rá ngu ma Ojahu mahets'i, ne njam'bu da bøm bu. Ne ga o't'ä rá thuhu ma Oja bu ja rá ja'i, ne ga orpu rá thuhu rá hnini ma Oją, Jerusalén ma'da'yo, guet'a ra hnini ba capu bí 'bu Oja mahets'i. Ne'a ma thuhu ma'da'yo ga o't'ä bu ja rá ja'i u. ¹³Nɛ to'o i ja yú zagu, dami 'yøhmbu 'bɛ'a i xih rá Hogandąhi Oją u yu 'yęc'yei," bi 'yɛna.

Ram hma da hmam bu ra hnini Laodicea

¹⁴Ne bi xiqui mahøn'a, bi 'yena: "Nuya gui 'yorpa ra søcua ram 'behni i fäx'u yu 'yec'yei 'bupu ja ra hnini Laodicea, da hmam bu

a. Ne gui xih mam hmangä guecä zại dím mam majuani. Nugä dá øt'ä 'bɛ'a gätho i ja ua ya gue bi zänd Oja. 15 Nugä dí pacä 'be'a gätho gá 'yøthu bu, xøgue guí 'yo indethu, yoho nin 'yomfenihu, ne 'da xni hothu. Man'da xcá numanho ahu 'bu n'dat'a ni t'ɛc'yɛihu xquí 'yøthu, xtán ho ogue hin di ho. ¹⁶Pe nugä dí san'nahu a gá 'yøthu, ne ga sox ahu. ¹⁷Guetho nu ahu sä guí emhbu gyu membetihu 'be'a gätho guí homhbu, ne guí emhbu hin'yu 'be'a man'da guí homhbu. Pe nugä dí pacä gue hin'yu 'bɛ'a i ja ahu di muui. Pe huecate ahu, xøgue ndumbui thoho ahu, tengu'bu gyu 'yahehu ne guí xädähu," en'a ra nde bí 'yeh mahets'i. ¹⁸Ne xø bi 'yena: "Nugä gan zo ahu ts'u, gua ɛhmbu ga 'da ahu ra temazai, tengu'bu gui tämhbu ra oro mahoqui ngue ra sibi, janangue'a majuani gam membetihu. Ne ga 'da ahu ran ho ni mbuihu, tengu'bu gui tän yu pahni xun t'axi gui hyehu, janangue'a hin gui pe'ts' ni sähu ngue hin'yu 'be'a gdí comp' ni ja'ihu. Ne ga xoc'a ni dähu, tengu'bu gui tämhbu ra 'yɛthi gui cospa ni dähu, janangue'a da zä gui nuhu xun ho. 19 Nugä ga damhya ahu ts'u, ne ga 'da ahu ts'u ran unbi gätho to'o dadí hugcä, n'damhma di hoc'a ni mbuihu. Janangue'a daman ehyahu gui päh nin 'yomfɛnihu. 20 Nuya gui 'yøhmbu ts'u, nguetho dí 'bäcä bu ja ra goxthi, dín zo ahu. Ne to'o da 'yøh ma ndegä ne da xogui, ga curpu, dam 'bu'be bu ne dam pa'be. ²¹Ne to'o hin da thapi nangue ran ts'o, ga japi ga huxhe bu mahɛts'i, guepu i ja ma ts'edi, tenguthoho

'bu má tạpä ran ts'o nɛ dí hux'be ma Ta bu mahɛɛts'i. ²²Nɛ to'o i ja yú zagu, da 'yø'a i xi a rá Hogandahi Oja u yu 'yɛ̞c'yɛi," bi 'yɛ̞n'a ra nde bi xiqui.

Ran thạnde bu mahɛ̞ts'i

Nε nu'bu mi jua a bi mam buya, dá ndøts'e, ne dá nugä nsoqui n'da ra jut'i mahets'i. Ne nu'a ra nde dá øcä tengu thoho n'da ra thuxi i ya nts'edi, bi 'yengui: "Ba εcua nε ga ut'a'i 'bε'a jatho din ja m'bejua." 2'Bex bi 'dacä ra ts'edi rá Hogandahi Oja gue bi zä dá nugä bu. Ne dá nugä bu mahets'i n'da ran thuts'i mahoqui xun ho, tengutho bu hux yu hmuts'ut'abi. Nε mí huxpu n'da. ³Nε nu'a to'o mi hupu, di fexni tengu yu fexna sødo ra jaspe ogue ra cornalina. Ne bi go'ma ra 'bɛjʉni di fɛxni tengu ra fεxna sødo ra esmeralda. ⁴Nε bi mbäs' pu ja ran thuts'i mi 'däte ma goho yun thuts'i, guepu mi hupu 'däte ma goho yu dąc'ysi. Gätho mi he yu pahni xun t'axi ne mi hu'ts' yú corona ra oro. ⁵Nε guepu ja ran thuts'i mi hø inde, bi bøm bu ra huei nts'edi, ne ran gäni emme di thoni, ne yu nde. Ne nubu mi hu a n'da, mi ja bu yoto yu sibi gue mi xeh yu t'usibi, rá hmepya rá Hogandahi Oja u, gue í juadi xun ho yú ts'edi. ⁶Ne nubu mi hu a n'da, mi ja bu n'da εna ra deją, nε εna ra xito. Ne dá nugä goho yun t'uti gue madim 'bä't'a ran thuts'i, gue i 'bui. Nε gätho goho yʉn t'uti mi ja yʉ́ dä bu yú hmi ne yú xuthä, ne gätho yú ja'i. ⁷Nu'a n'da ran t'uti bi nequi tengu n'da ra zate ra león, ná yoho buya bi nεqui tengu n'da ra toro,

ne ná hyu buya bi nequi tengu rá hmi ran 'yohu, ne ná goho bi nequi tengu n'da ra dąpents'u madí tunts' yú zahua, tengu'bu 'yo. ⁸Ne gätho goho yun t'uti i 'bui, ja n'da ngu n'da 'dato yú hua. Ne gätho yú hua i ja xun ngu yú dä maxøts'e nepu mbo. Ne ma pa ne ra xui bi dąnde Oją, xíngui ts'u bin hę'a nán tuhu, ne bi 'yem 'bu min tuhu:

Xun ho, xun ho, xun hotho Oją nuixte rá ts'edi, gue'a mi 'bui ne i 'buhya, ne

guet'a i 'bui maząi.

⁹Ne gätho goho yun t'uti bi dande a gue mi hu inde bu, bi 'yespa a Oja ne bi xifi jamadi Oja gue i 'buhya ne dim 'bui mazai høn'bu go njam'bu. ¹⁰Ne nu'bu mi dande Oja yun t'uti, gätho 'däte ma goho yu dac'yei bin danyahmu bu ja rá hmi a i hu inde bu, ne bi un'ndu yú corona ra oro gue mi hu'ts'i. ¹¹Ne

bi 'yɛna:

Nu'i ma Hmu ahe, ma Oją ahe, høn'a thoho nin säui din ja ni nuįxte nɛ ni ts'ɛdi, nɛ høn'a thoho nin säui da numansu a u gätho i 'bui.

Nguetho gätho gá 'yøt'e 'bɛ'a i ja ya,

nangue ni pähä zɛhɛ, nɛ gue'a ni pähä án ja'ʉ 'bɛ'a i ja ya.

Ra T'ude'yo rán säui di tunts'a ra søcua

Nε nugä dra Xuuagä dá nugä a mi huxpu ja ran thuts'i mi cą bu rán 'yεi n'da ra søcuą m'bants'i nε nt'o't'i maxøts'e nεpu mbo. Nε mi ja yoto yún cuahmi bu ja ra søcuą. ²Nε dá nugä n'da ram 'bɛhni mahɛts'i xun zaqui, nε nts'ɛdi

APOCALIPSIS 5 472

bi ma: "Ha 'bu a n'da rán säui da xøc'u yún cuahmi i ja ua ja ra søcua, ngue di tunts'i," bi 'yɛna. ³Nɛ xínga n'da mi 'bupu mahɛts'i, xínga n'da mi 'bupu ja ra häi, ne xínga n'da mi 'bupu i 'bu u xun du rán säui da xøc yún cuahmi ra søcua ngue da badi 'be'a nt'o't'i bu. ⁴Ne nugä dra Xuuagä ɛmmɛ dán zongä nguetho njongui 'bui rán säui di tunts'a ra søcua ngue da nu 'be'a nt'o't'i bu. ⁵Ne nu n'da ra dac'yei bi 'yengui: "O guí zoni," bi 'yɛngui, "nguetho 'bu'a n'da t'embi ra León nangue rá 'yu ra Judá, ne rá 'yu ra ts'ut'abi ra David, nu'a him bi thapi nangue ran ts'o, ne da zä da xøc'u yún cuahmi ra søcua." ⁶Nε 'bex dá nugä n'da i 'bä inde bu 'buh yun t'uti, ne'u 'däte magoho yu dąc'yɛi. Nɛ nu'a bi nequi tengu n'da ra T'ude'yo bi mba ntho. Nu'a ra T'ude'yo mi ja yoto yú dani nε mi ja yoto yú dä, gue'a ra hmεpya rá Hogandąhi Oją gue í juadi xun ho yú ts'edi, bá 'behni gätho ná nguni ra ximhäi. ⁷Ne bi mba bu ne bi ganba ra søcua gue mi ja bu rán 'yɛi n'da gue mi hupu ja ran thuts'i. ⁸Ne nu'bu mi ganba ra søcuą, nu'u 'däte magoho yu dąc'yei bin dąnyahmu bu ja rá gua ra T'ude'yo. Ne n'da ngu n'da mi ha yú arpa'bida, ne gätho mi ja yú ximbo ra oro mayuh rán dega ra za i yumanho, ra hmepya gue ní mba nt'ęspi Oją, gue i ęspa Oją u yú t'uhni. 9Ne gätho bin tu a n'da ra thuhu ma'da'yo, ɛn'u:

Høn'a zɛhɛ i nin säui gui xøcua yén cuahmi ra søcuą, nguetho ya bi tho i, nɛ nangue ni ji guí jut'u yu ja'i, ngue gá 'yørpa yú mbɛti Oja u gätho u 'da gue 'dahma 'dan'yo bu na ya, ne gätho u 'da gue 'dahma 'dan'yo yú 'yu, ne gätho u 'da gue 'dahma 'dan'yo yú häi mi 'bui.

Ne gá un ni ts'edi din ts'ut'abi, ne dim mbäją bu di manda rá ts'edi Oją,

nε di manda bu ja ra häi, bi 'yɛm 'bu min tuhu.

¹¹Nɛ nugä dra Xuuagä, 'bex dá nugä nɛ dá øcä yɨ nde yɨm 'bɛhni mahɛts'i ɛmmɛ xɨn ngu yɨ munts'i, ngue yɨ millone thoho madim 'bä't'a mi hupɨ ja ran thuts'i, nɛ yɨn t'uti nɛ yɨ dac'yei. ¹²Nɛ gätho yɨm 'bɛhni mahɛts'i nts'edi bin tuhu, nɛ bi 'yɛm 'bɨ min tuhu:

Nangue bi du ra Jesús ra T'ude'yo,

rán säui din t'un rá ts'ɛdi, nɛ 'bɛ'a gätho di muui,

ne ran 'yomfeni nuixte, ne ra ts'edi nuixte,

ne da hyanba yum hman u i numansu. Ne da t'espi ne emme da hnumanho.

¹³Nɛ 'bex dá øcä bi mba nt'ɛspi a huxpu ja ran thuts'i, nɛ ra Jesús ra T'udɛ'yo. Gätho i 'bui bi man'u tengu n'dare thoho:

> Mająpi thoho nε i hnumansu ngue nuįxte thoho. Nε din ja rá ts'εdi xʉn ho,

ne gätho i 'bui da 'yespi høn'bu go njam'bu mazai. Njabu bi ma gätho i 'bupu mahets'i, nepu ja ra häi, ne'u xun du, ne'u 'bupu ja yu deja, ngue n'dat'a bi man'u.

¹⁴Nɛ gätho goho yun t'uti i 'bäpu mahɛts'i bi 'yɛna: "Nɛcähe n'dat'a dím bɛmhbe a," bi 'yɛn'u. Nɛ gätho 'däte magoho yu dąc'yɛi mi 'bupu bin dąnyahmu i thande a hu'inde bu mahɛts'i, nɛ ra T'udɛ'yo.

Yoto yun cuahmi

Ne nugä dra Xuuagä dá nu ra Jesús ra Τ'udε'yo bi xøc'a rá mbudi rán cuahmi ra søcua ne bi du'mi di tunts'a ra søcua. Νε n'da ran t'uti bi xicä, ne nt'øde rá nde tengu ran gäni: "Ba ɛcua gua nuua," bi 'yengui. 2Ne dá hetä bu, nε dá nu n'da ra t'axca ndøfani. Νε nu'a mi huxpu mi ha n'da ran sa, nε bi mba ma unni n'da ra corona. Nε bi mba bu zai da dah yun sui din ja. ³Nɛ nu ra Jesús ra T'ʉdɛ'yo bi xøc'a ná voho rán cuahmi ra søcua. Ne dá øcä a bi mam man'da ran t'uti, bi xicä: "Ba ɛhɛ, gua nu," bi 'yɛngui. ⁴Nɛ dá nugä, bi bøm bu n'da ra thenga ndøfani. Ne mi huxpu n'da, nε bi mba ma unni ra espada xʉm mba. Nε bin t'un'na ran t'gdi gue di japi din su'u yu ją'i gätho 'bupu ja ra ximhäi, ngue din hyo n'da ngu n'da u. 5Ne nu'a ra Jesús ra T'ude'yo bi xøcua ná hyu ran cuahmi, ne xø dá øcä rá nde man'da ran t'uti bi xicä: "Ba εhε, gua nu," bi 'yɛngui. 'Bex dá nugä bi bøm bu n'da ra 'bondøfani, ne mi huxpu n'da mi ha ra t'ent'i. ⁶Nε dá øcä n'da ra nde bi bøm bu mi 'bäh yun t'uti, bi 'yɛna: "Hønt'a n'da kilo ra trigo da dän'a n'dapa, nε hønt'i hyu kilo ra cebada da dän'a n'dapa. Pe dami jamansuhu ra aceite ne ra vino, o gadí japi dim 'bɛdi." ⁷Nɛ nu'bʉ mi xøc'a ná goho ran cuahmi a ra T'ude'yo, dá øcä rá nde man'da ran t'uti, bi 'yɛngui: "Ba ɛhɛ gua nu," bi 'yɛna. 8Nɛ 'bex

dá nugä bi bøm bu n'da ra ndøfani xun c'axt'i ts'u. Nε mi huxpu a n'da t'embi ran date, ne mí ten'na ran date n'da gue xí bøm bu 'bu u xun du. Nu'u bin t'un ra ts'ɛdi di manda u ná goho bu 'buh yu ja'i gätho ra ximhäi. Ne nu'u bin ja ra ts'edi gue da hyo yu ja'i nangue ra espada, nε nangue din tumanthuhu, nε nangue ra gehe, ne yu zate da hyo yu ja'i. ⁹Nε nu'bu mi xøc'a ná cut'a rán cuahmi ra søcua a ra T'ude'yo, dá nugä bu n'da ra mexa guepu i pa m'bøspe Oją, gue bim 'bøts'e zehe u yu 'yec'yei. Ne dá nugä bi hyupu 'bimexa yú te u gätho í tho a rám hman Oja, ne bi ma nangue ra Cristo. ¹⁰Nε gätho ʉ mi hupʉ 'bimexa nts'edi bi 'yena: "Ma Hmu tatethoho ni ts'edi, ne xun ho i, ne majuani guím ma. Ham'mi pa gui tø'mi ngue gui 'yørpa ran juanbi u, nε gui cospa u yu ja'i 'bupu ja ra ximhäi 'be'a bi 'yørcahe," bi 'yen'u. ¹¹Ρε nu'ʉ bin t'un yʉ́ pahni xʉn t'axi, ne bi sifi da dø'mi ts'u 'da yu pa, ja gue'bu bi gua'u dí du a rám hman Oja u yú mi'yehehu, ngue tengu u. 12 Nε nugä dra Xuuagä dá nugä ra T'ude'yo bi xøc'a ná 'dato rán cuahmi a ra søcua. Ne 'bex bin ja n'da ra 'yamhäi nts'utho. Ne nu'a ra hyadi gätho 'bex bi boqui tengu n'da ra 'bo'bø't'e, ne nu'a ra zana 'bex bi thengui tengu ra ji. ¹³Ne gätho yu sø bi däpu häi, tengu n'da ra za i høh yún dät'o 'bu i huạn ran dahi. 14 Ne nubu xun c'ammi ra ximhäi, bi mba m'bants'i tengu'bu ra søcua, bim 'bedi. Ne gätho yu t'uhäi mi ja bu ja ra dehe, ρε nε'u gätho yu t'øhø, bi mba ma pädi bu mi ja. 15 Νε gätho yu ts'ut'abi bu ja

ra häi, nɛ gätho yú ngurpi yu ją'i, nɛ gätho yu hmudofui, nɛ gätho yu mɛmbɛti, nɛ gätho i jasɛ yú ts'ɛdi, nɛ gätho yu 'yɛhɛ, nɛ gätho hing yu 'yɛhɛ, bi mba bu dapo, mi honi hapu din 'yani guepu ja yu hyanhäi, o guepu ja yu hyado. 16 Nɛ gätho mi nde u da zɛmba yú ya yu do 'bu bi xo't' yu t'øhø nɛ da go'mi, ngue i su da nu a rá cuɛ a i huxpu ja ran thuts'i mahɛts'i, nɛ'a ra T'udɛ'yo. 17 Nguetho bi zøn ra pa ran unbi nts'utho, nɛ njon da zä da hyät ran unbi.

Rá 'bede u yu israel bu mahęts'i

Ne nubuya dá nugä goho yum 'behni mahets'i, ne 'da a n'danni mi 'bäpu rá nyani ra ximhäi i sam'ma ran dahi i 'yo ua gue xíngui ts'u din 'yo bu ja ra häi, o guepu ja ra dadeja, ne xínga gue di 'yan yu za. Ne'u yu dadeja hin di 'yani, di nequi tengu n'da ra xito xun juani thoho. 2Nε dá nugä n'da ram 'behni mahets'i bí 'yepu ní box ra hyadi, ne nu'a bá hya a rá sello Oja ngue i 'bui, ne nts'edi bi mba't'u goho yúm 'bɛhni Oja gue i 'bäpu yú nyani ra ximhäi. Gue'u mi 'bäpu bin t'un ra ts'edi di unba ra häi ne ra dadeja. ³Ne nu'a ram 'bεhni mi ha ra sello, bi xi u mi'da gue da dø'mi ts'u, him 'bex di unba ra häi o gue ra dadeja o gue yu za, ja gue'bu di selloba bu ja yú de yu 'yɛ̞c'yɛi a rá sello Oją. ⁴Nɛ dá øcä hangu bi 'beh yu ja'i di jap ra sello yú dε, n'da ciento ne yote ma goho mahuahi, bi thasta u yum bom'beto yú ts'unt'u ra Israel. ⁵Bi thasta u 'de'mayo mahuahi yum bom'beto ra Judá. Ne bi thasta u 'de'mayo

mahuahi yúm bom'beto ra Rubén. Nε bi thasta u 'dε'mayo mahuahi yúm bom'beto ra Gad. ⁶Ne bi thạsta u 'de'mayo mahuahi yum bom'beto ra Aser. Ne bi thasta u 'demayo mahuahi yúm bom'beto ra Neftalí. Nε bi thasta u 'dε'mayo mahuahi yúm bom'beto ra Manasés. ⁷Ne bi thasta u 'de'mayo mahuahi u yúm bom'beto ra Simeón. Ne bi thasta u 'de'mayo mahuahi yúm bom'beto ra Leví. Ne bi thasta u 'de'mayo mahuahi u yum bom'beto ra Isacar. ⁸Ne bi thasta u 'de'mayo mahuahi u yúm bom'beto ra Zabulón. Ne bi thasta u 'de'mayo mahuahi u yúm bom'beto ra José. Ne bi thasta u 'de'mayo mahuahi u yum bom'beto ra Benjamín.

Yu ją'i mi he yu pahni xun t'axi

⁹Nɛ nugä dra Xuuagä, dá handi nɛ dá nugä xun ngu yu ja'i nɛ njon da zä da mbede hangu na ngu dá nugä. Dá nu u i 'bäpu gätho u 'da gue 'dahma 'dan'yo bu na ya, nɛ gätho u 'da gue 'dahma 'dan'yo yú 'yu, nɛ gätho u 'da gue 'dahma 'dan'yo yú häi mi 'bui. Nɛ gätho u mi 'bäpu mí hɛt'a mí huxpu ja ran thuts'i bu mahɛts'i, nɛ mi hɛt'a ra Jesús ra T'udɛ'yo. Gätho mi 'bäpu mi he yú pahni xun t'axi, nɛ mi ca yu xijam'boza. ¹⁰Nɛ gätho nts'ɛdi bi 'yɛna:

Emme dín numanho ahe, ma Oja ahe,

tątetho ni ts'edi, ne'e gra Jesús gra T'ude'yo, dí ęs'ahe ngue gá pøje, bi 'yɛn u.

¹¹Ne gätho yum 'behni mahets'i bi mbä'ts'a mi hupu made bu mahets'i, ne gätho 'däte ma goho yu dạc'yɛi nɛ'u gätho goho yun t'uti bi mbäs' thoho gätho mi 'bupu, bin dạnyahmu, bi nye'mahäi, bi dạnde Oja i hu inde bu. ¹²Gätho bi 'yɛna:

Necähe 'dat'a dím bemhbe, dí es'ahe, ma Oja ahe, nuixte xun ho i.

Ne gätho guí pạdi. Zại dí xi ahe jamadi nangue ran ho guí ørcahe. Dín numansu ahe, ne nte guí hɛmbi, pɛ i ja ni ts'ɛdi xun ho, nɛ gam 'bui høn'bu go njam'bu mazai.

Nε høn'a tho dím bɛn ahe ya, bi 'yɛn'ʉ.

13 Ne nu n'da ra dąc'yei bi 'yängä dra Xuuagä: "Ha guí padi hapu bá nex yu." 14 Ne dá emp'a ra dac'yei: "Nu'i guí padi." Ne nu'a ra dac'yei bi 'yengui: "Nu'u gue'u bi 'yec'yei Oja 'bu mi ja ran unbi ndumbui tho bu ja ra ximhäi. Ne nu'a rá ji ra Jesús gue a í bo yú pahni u, bi japi xtan t'axi. ¹⁵ Janangue'a i 'bähnu ja rá hmi Oją yu. Νε in 'yεhε ma pa nε ra xui ua ja rá nija Oja. Νε gue'a i huxpu ja ran thuts'i di jamansu yu. 16 Ne him man'dandi din tumanthuhu yu, ne him man'dandi din tuthe. Ne him man'dandi da nu ran unbi nam pa ra hyadi, xinga gue u mi'da xum pa di unbi. ¹⁷Nguetho nu ra Jesús ra T'ude'yo gue i 'bu inde bu mahets'i da 'yøt'e tengu 'bu ra mbände'yo, ne da zixpu hapu i ja ra dehe gue di un ra te yú mbui. Ne nu'a Oją him man'dandi di japi din zoni."

Ná yoto ran cuahmi nε ra t'uts'i ra oro

Nɛ nu'bʉ mi xøcua na yoto yʉ́n cuahmi ra søcua, made

ora njom bin ya bu mahets'i ne nte bi 'yani. ²Nu'bu mí gua'a buya dá nugä yoto yum 'behni mahets'i zai i 'bäpu ja rá hmi Oja, ne bin t'un yu thuxi n'da ngu n'da. 3Ne dá nugä n'dan'yo ram 'behni mahets'i, bi mba bim 'bäpu ja rá mexa yun t'unni, ne mi the n'da ra t'uts'i ra oro nε bi mba nt'unni xʉn ngu rá ndega ra za din zø bu, i yuman'u, nε nu'a rá 'bifi da mba ma uaspi yúm hma yu 'yɛc'yɛi 'bu i ɛspa Oja. Nε gätho i zø bu ja rá mexa ra oro gue i høpu ja rá hmi a Oją i hu inde bu. ⁴Ne nu'a ra 'bifi i nexpu ja rá t'uts'i a ram 'bɛhni, mauats'i yúm hman yu 'yɛc'yɛi 'bu i ɛspa Oją, nε bi zøm bu bí 'bu Oja. ⁵Nε nu'a ram 'behni bi yus' yu despi bu ja ra t'uts'i ra oro gue mi zø bu ja ra mexa, ne bi 'yem bu ja ra ximhäi. Ne 'bex dá øcä nts'edi yun gäni din thoni. Ne dá nu nts'edi yu huei bi c'ugti bu ja ra ximhäi, ng bin ja n'da ra 'yamhäi bu.

Yu thuxi

⁶Nuya bim 'bäpu yoto yum 'bɛhni mahets'i i tø'mi da huixt' yú thuxi. ⁷Ne rá mbudi ram 'behni bi huixt' rá thuxi, 'bex bi t'en bu häi yun do, ne ra sibi, mauaspi ra ji. Ne ná hyu xequi ra häi bin zø, bi gopu mi yoxequi ra häi. Nepu na hyu xequi bin zø yu za ne yu t'ei xun c'ammi. Pe bi gohi yo xequi ngue him bin zø. ⁸Ne na yoho yʉm 'bɛhni bi huixt' rá thuxi, ne dá nu tengu n'da ra t'øhø xun ndoho, i sø ne emme ndøspi, nε bi mba nt'εnt'i bu ja ra dadeja. ⁹Nε na hyu xεqui ra dądeją bi japi din ji. Ne gätho bi du u mi 'bupu mbo ra dehe. Ne gätho yu dambosa

gue mi 'yo bu bin ts'oni. Pe bi go u yoxεqui ra dadeja ngue him bin ts'oni. 10 Ne ná hyu yum 'behni bi huixt' rá thuxi. Ne 'bex bi däh mahets'i n'da ra sø xun ndoho ngue i zø ne emme xeh yu t'usibi. Ne bi däpu ja ná hyu yu dathe nε ná hyu yu mbøthe bu ja ra ximhäi. ¹¹Nu rá thuhu ra sø ngue bi dägui ra Ajenjo na. Nε guepu bi däh ra sø gätho ra dehe ɛmmɛ bi ju'ts'i. Nɛ xʉn ngu yu ja'i bi du ngue bi zi a ra dehe xun ju. ¹²Ne nu ná goho ram 'behni bi huixt' rá thuxi. Ne 'bex bi boqui ná hyu xequi ra hyadi, ne'a ná hyu xegui ra zana bi bogui. Ne a ná hyu nets'i yu sø bi boqui. Ne mbe ngoho ora ra pa ne ra xui him bin ja ran nequi. ¹³Ne drá Xuuagä dá nu n'da ram 'behni mahets'i mi 'yo inde bu mahets'i, ne emme nts'edi mbafi, bi 'yɛna: "Huɛcate, huɛcate, huɛcate yu ją'i 'bupu ja ra ximhäi, nangue 'be'a din ja 'bu bi huixt' yú thuxi yu mi hyu yʉm 'bεhni mahεts'i gue i 'bähnu," bi 'yɛna.

Nε ná cut'a yum 'bεhni bi huixt' rá thuxi ne dá nu n'da ra sø tengu n'da ram 'bεhni mahets'i ngue hingui ho, bi däpu mahęts'i bi zøpu ja ra ximhäi. Ne bin t'un'na n'da ran sogui da xoc ra hyahäi ngue emme xun he ne nts'utho, guepu i 'bu a ra zithu. ²Ne nu'bu mí xoc'a, bi bøm bu ra 'bifi xum pothi tengu 'bu fun ra sibi xun ndoho. Nε 'bex bi go'ma ra hyadi a ra 'bifi ne bin uants'ui ran dahi gätho ra ximhäi. ³Ne xun ngu yu he'yaxi bi bøm bu ja ra 'bifi ngue bin 'yo gätho ra ximhäi. Ne bin t'un yú ts'ɛdi da 'yøt'e tengu ran unbi di un yu mbozu. ⁴Ne bi sifi ngue hin

di ts'on yu t'ei o gue yu za o gue mi'da i ja ua ja ra ximhäi, hønt'u yu ją'i di unbi gätho to'o him mi ja rá sello Oją bu ja yú dę. 5Nε him bi japi da hyo yu ja'i, hønt'a cut'a zana di unba yu ja'i, tengu i øt' yu mbozu 'bu i sa n'da. 6Ne nu'u yu pa gue i 'yo ua yʉ hɛ'yaxi in nde yʉ ja'i da du pe hingui sä da du, hønt'a ran unbi thoho da nu. ⁷Ne nu yu he'yaxi di nequi tengu yu fani ena da mba ra sui, pe nu yú hmi tengu yú hmi yu ja'i, ne i hu'ts' yu corona yu oro. ⁸Nε nu u mi ja yú xtą tengu n'da ra xisu, nε mi ja yú ts'i tengu yú ts'i ra dązate. ⁹Νε nu u mi ja bu yú tiya tengu rá xi ra dahua, pe xʉm mɛ tengu ra t'ɛgui. Nɛ di hi yú zahua tengu'bu yu carro i jut yu fani i tihi, ɛmmɛ di thoni tengu'bu i pa bu ja ran sui. ¹⁰Ne nu yú 'yozu tengu yu mbozu, ne cut'a zana bin t'un ran t'ɛdi di unba yu ja'i, nangue yú 'bite i ja yú 'yozu. ¹¹Νε nu'a rá hmu u yu he'yaxi 'bupu ja ra hyahäi ngue emme xun he, ne nu'a rá thuhu ra Abadón ngue rá nde ra hebreo, nε nu'ʉ yʉ griego embi ra Apolión. Pe nu rá thuhu nde da ma, gue nde di ts'oni 'bɛ'a gätho i ja. ¹²Nuya rá mbudi ran unbi bi thogui, pe ba eh mi yoho yun unbi. ¹³Nε ná 'dato yʉm 'bɛhni bi huixt' rá thʉxi. 'Bex dá øcä n'da ra nde bi bøm bu ja yú dani gue'u mi ja bu goho yú ts'ąt'i ra mexa ngue ra oro i høpu ja rá hmi Oją. ¹⁴Nε nu a ra nde bi 'yɛmp'a ná 'dato yʉm 'bɛhni mahɛts'i gue i ja bu rá thuxi: "Dami xoc'u goho yum 'behni mahets'i ngue nthu't'i bu ja ra dathe Eufrates," bi t'ɛmbi. 15 Nɛ bi mba nsoqui, nguetho bi dø'mi da zøn ra

ora, ne ra pa, ne ra zana, ne ra jeya da soc'u. Ne da mba u da hyo a ná hyu nja'i bu 'buh yu ja'i gätho ra ximhäi. ¹⁶Ne yociento millone yu dofui i hux yu ndøfani bi den'ndu. Nugä dra Xuuagä dá øcä hangu na ngu bi mba. ¹⁷Nɛ in ja bu 'bu má nugä yu ndøfani, ne nu'u yu dofui madin tøgue bi däc yú tįya ra t'egui ma cuhu xun theni, xun c'ammi nε xun c'axt'i. Nε nu'u yú ya yu ndøfani tengu yú ya yu dazate. Ne bi bøm bu ja yú nde yu ndøfani ra sibi ne ra 'bifi ne ra despi. ¹⁸Ne na hyu ram 'bede yu ja'i mi 'bucua ja ra ximhäi bi du nangue rán unbi ra sibi, ra 'bifi ne ra despi gue bi bøm bu yú nde yu ndøfani. 19 Nu yu ndøfani mi ja yú ts'edi nangue 'bε'a bi bøm bu ja yú nde, nε mi ja ra ts'ɛdi yú 'yozu, nguetho yú 'yozu i ja yú ya tengu yu pozu di unba yu ja'i. ²⁰Ne gätho mi'da yu ja'i gue him bi du, him bi päh yún 'yomfeni, pε guexta'a bi dande yu zithu nε'u yu hmite bi 'yøzεhε, yún t'øt'e ra oro ne ra t'axi ne ra fexna t'egui, nε ra do, nε yu za, yu hmite u gue hingui nute ne hingui øhnahya, ne hingui sä din 'yo. 21 Ne xingui ts'u bi hyeh yun t'øt'e xun ts'o. Guexta'a bin hyodu ne bim badi ne bin 'yomt'eni, ne bim pe.

Ra t'usøcuą i cą n'da rám 'behni Oją

Ne nugä dra Xuuagä dá nugä man'da rám 'behni Oją bá cąh mahęts'i, mi ja rá ts'edi. Ne bán 'youi n'da ra güi, ne mi comba ra 'bejuni rá yą. Ne nu'a rá hmi bi yoxni tengu ra hyadi, ne nu'u yú gua madi nequi tengu'bu n'da ra sibi. ²Ne mi ca n'da ra

t'usøcua ma tunts'i. Ne nu'a rán 'yeigua mí nemp'u ja ra dadeja, ne nu'a rá gahagua mi nemp'u ja ra häi. ³Ne nu'a ram 'behni nts'edi bi mbafi, tengu'bu i mba a ra dazate. ⁴Nε nu'bu mi mbafi, 'bex dá øcä yoto yun gäni. Ne mí engä xcá o't'ä ra søcua 'be'a dá nugä, pe 'bex dá øcä n'da ra nde mahɛts'i bi 'yɛngui: "'Yo guí o't'ya 'bɛ'a bi ma yʉn gäni, nguetho hingui sä gui ma 'bɛ'a bi man'u." 5Ne dá nugä rám 'behni Oja mahɛts'i gue i 'bäpu ja ra deja nepu ja ra häi, bi 'ua'ts' rán 'yei bu mahets'i. 6Ne bi ndønba rá thuhu Oja i 'bui ne dim 'bui mazai, gue bi 'yøt' mahets'i ne ra ximhäi ne ra deja ne gätho 'be'a i jabu. Bi ndønba rá thuhu, gue majuani hin da dø'mi mi'da yu pa 'bɛ'a din ja. ⁷Nε εna, nu'bʉ bi huixt' rá thʉxi a ná voto rám 'behni Oja gue mi 'buhnu, 'bex din ja buya 'bɛ'a bi xi Oja yú pøngahya maya'bu gue din ja, gue him mám fadi. 8Ne nu'a ra nde mahɛts'i bi 'yɛngä mahøn'a: "Nu'i, ní mba bu, bá cạn'a ra søcua gue i ca'a rám 'bɛhni Oja mahets'i i 'bähnu ja ra deja ne ra häi." ⁹Janangue'a dá mbagä bu mi 'bä'a ram 'behni mahets'i, ne dá xifi gue di 'dac'a ra søcua. Ne nu'a ram 'behni bi 'yengui: "Cani, ne gui sa. Ne nu'bu gá sa, tengu'bu ra t'afit'asa bu dán zä ni nde, ρε nu'bu bi mba bu ni foho emme xtán ju buya." 10 Ne dá cạngä ra søcuą buya, ne dá sagä a. Ne bin ja tengu bi xicä ram 'behni, xu cuhi 'bu má sagä, εmmε xun ų, pε guepu ma foho, εmmε xun ju. ¹¹Nε bi xiqui: "Jatho gui mamp'a rám hma Oja mahøn'a, hønbu go hapu 'buh yu ja'i 'dahma

'dan'yo bu na ya nɛ 'da n'danni yú häi, nɛpu 'buh yu ts'ut'abi." Nɛ gue'a bi sicä a dra Xuuagä.

Yoho yu pøngahyą

Nε nugä dra Xuuagä, bin 'dacä n'da ra t'eni gue ra za, nε bi t'ɛngui: "Ní mba bu ja ra danija ne gui 'yeni hangu na ndoho ra ngu. Nepu ja ra mexa i pøx yun t'unni yu ja'i." Nε bi siqui ga pede hangu na ngu yʉ ja'i i thande Oja bʉ. ²Pε bi sicä: "O guí eni hangu na ndoho ra häi ma mbä't'i bu thi ja ra danija, nguetho bin t'un'du yu ja'i 'dahma 'dan'yo bu na ya, gue'u hingui pa Oja. Ne vote ma vozna din 'vo bu nε di un'na rá hogahnini Oja." ³Nε bi 'yengui: "Ga penhdä bu yoho ma pøngahyą, ne da hye yu he tengu'bu i tu yú mbui. Ne n'da mahuahi yo ciento ne hyate pa da man'a mam hmangä bu u," en Oja. 4Ne nu'u yoho yú pøngahya Oja, gue'u mí u'u yoho yu za ngue yu olivo, ne'u yoho bu tøh yu lámpara gue i 'bäpu ja rá hmi ra Hmu mahets'i, gue'a di manda gätho ra ximhäi. 5Nε to'o im beni di unba u yoho yun 'yohu gue yú pøngahyą Oją, da bøn ra sibi bu yú nde ngue'a í zø'u. Νε gue'a dí du'u gätho yún suihu u yoho yú pøngahya Oja. ⁶Ne nu'u yoho yu pøngahya, din ja yú ts'edi ngue di japi hin din 'ye gätho yu pa gue dim pøngahyą bu. Ne din ja rá ts'edi gue gätho yu dehe di japi ngue din ji. Ne din ja yú ts'edi hønt'a go 'be'a man unbi di unba ra ximhäi, hønt'a go ní pa i nde. ⁷Ne nu'bu mi gua'a rá 'bɛfi Oją u, 'bex bi bøm bu ja ra hyahai emme xun he tengu n'da ran datezate, rám 'behni ra zithu emme

nts'utho. Ne bi mba bu, bi zu'u yoho yú pøngahyą Oją, ne bi dąha bi hyo u. 8Ne nu'u yú ngợc'yei u yoho bi du, mi 'bɛm bʉ ja ra calle made ra dąhnini, gue n'dat'a ra hnini guepu bi du ra Hmu mahɛ̞ts'i bʉ ja ra pont'i. Ne nu'a ran ts'o bin ja bu ja ra dahnini 'da'angu nan ts'oui bin ja bu ja ra hnini Sodoma, nepu ja ra häi Egipto. ⁹Nε nhyupa made bi mba yu ja'i gätho 'dahma 'dan'yo bu na ya gue bi nexpu gätho yu häi, bi hyɛt'u 'bom bu xí du. Nɛ him bi japi bi mba nt'ägui. 10 Nε gätho yu ją'i i 'bʉcua ja ra ximhäi bin johya 'bʉ mi du θ, nε nangue ran johya, bi un yun t'unni n'da ngu n'da, ne bi hyu yú mbui ngue hin di paha mahøn'a u yú pøngahyą Oją, nguetho bi nu ran unbi nangue 'be'a bi 'yørpa u. ¹¹Pε nu'bu mi tho a nhyupa made mi 'bom bu, ρε Oja bi un ra xεhya mahøn'a, ne 'bex bi ndants'u, ne gätho to'o bi nu, ¿mmɛ bin su u. ¹²'Bex bá ε'a n'da ra nde mahεts'i nts'edi bin yą, bi 'yemp'u: "Ba ecua ya," bi 'yɛna. Nɛ bi ndex mahɛts'i u, in 'yohu n'da ra güi. Ne gätho yún suihu mi 'bäpu bi nu 'be'a bin ja. ¹³Νε nu'bʉ mi mba ʉ yʉ́ pøngahyą Oją, 'bex bi 'yan ra häi bu ja ra dahnini, emme nts'utho. Ne ná 'det'a ra xequi ra hnini bin ts'oni, yoto mahuahi yu ja'i bi du nangue nts'edi ra 'yanhäi. Ne nu'u yu ja'i gue him bi du, emme bin su, ne bi 'yespa Oja mahɛts'i buya. 14 Nuya ná yoho yun unbi bi thogui, nε 'bex ba ε'a ná hyu ran unbi.

Ná yoto ra thuxi

¹⁵Νε nu'bʉ mi huixt' rá thʉxi a ná yoto ram 'bɛhni mahɛ̞ts'i gue mi 'bäpu, 'bexque nt'øde bu mahɛts'i xun ngu yu nde nts'ɛdi bin ya, bi 'yɛna:

> Nuya gätho ra ximhäi bi dą Oją ma Hmuhu, ne'a ra Cristo bi huahni, ne hønt'u di manda bu høn'bu go njam'bu mazai, bi 'yɛn'u yu nde i ya mahɛts'i.

¹⁶Nε nu'ʉ 'däte magoho yʉ dạc'yεi ngue mi hupʉ ja yʉ́n thuts'i di mbä't'a Oją bʉ mi hudi, bin dạnyahmu nɛ bi dạnde Oją. ¹⁷Nε bi 'yɛ̞m 'bʉ mi dạnde:

Nu'i ma Oją ahe nte guí hɛmbi, Nu'i zại guí 'bui, nɛ zại gmi 'bui, nuya gá du'mi gá 'bɛrpa yú ts'ɛdi gätho mi'da, nɛ da zä gui manda xun ho 'bɛ'a

gätho i ja. Dí xi ahe jamadi, ngue ya gá 'yuh ni ts'ɛdi tạte thoho.

¹⁸ Nu'u yu ja'i i 'bupu hønbu go hapu i ja yu häi mme bin cue ngue ya bi zøn ra ora da nu ran unbi.

Nuya bi zøn ra ora da nu nin juanbi, ne gätho u xun du.

Bi zøn ra ora gue gui un'du ya 'bɛ'a bi da'u ni 'yɛhɛ nɛ ni pøngahya.

Ne bi zøn ra ora gue gui un'du yun t'unni gätho bi 'yɛc'yɛi, hønt'a go to'o i ja yú ts'ɛdi, ne'u hin'yu yú ts'ɛdi.

Ne bi zøn ra ora, gue gui jua'u gätho to'o di unba yú mija'ihu, bi 'yɛn'u.

¹⁹Ne nu'bu mi gua'a bi man'u yu dac'yei, dra Xuuagä dá nugä nsoqui ra danija mahets'i. Ne dá nugä ra huada i høpu mbo, guepu m'be'ts'i ran hoqui bi 'yøt'ui Oja u yá 'yɛc'yɛi. Nɛ bin ja nts'ɛdi ra huɛi, nɛ bin thoni, nɛ yun gäni, nɛ bin ja n'da ra 'yamhäi, nɛ bi hyøh yun do.

Ra xisu ne ra jąrga

12 Νε dá hant'a n'da ran t'uti xʉn ndoho bʉ maga̞ts'i, ngue n'da ra xisu mi he ra hyadi ngue rá pahni, ne mi topu ja ra zana. Ne mi hu'ts'a n'da ra corona gue min 'youi 'de'mayoho yu sø. 2Ne nu'a ra xisu mi hat'uhni a, ne emme mi mbafi ngue xun u, ngue nde dim 'buh rá t'uhni. ³Ne bi nequi bu man'da ran t'uti tengu n'da ra jarga xun ndoho ne xun theni, emme nts'utho. Ne nu'a ra jąrga mi ja yoto yú yą, ne n'da ngu n'da yú yą mi hu'ts' yu corona. Νε mi ja 'dɛt'a yɨ dạni. ⁴Nɛ nu'bu mi uạn'na rá 'yozu, bi hyøm bu häi ná hyu nets'i yu sø mi ja bu mahets'i. Ne nu ra jarga 'darbu mi 'bähmi ra xisu, i nde da zap'a rá t'uhni 'bu bim 'bui. ⁵Ne bim 'bu'a n'da ra ts'unt'u, rá t'uhni ra xisu buya. Ne guehna ra ts'unt'u din ts'ut'abi gätho yu häi, ne njon di japi da mbesta'a da ma. Pe nu'bu mim 'bui, bi jamansu Oją, nε 'bex bi zixpu mahɛts'i bí ja rá ts'edi. ⁶Pe nu ra xisu bi 'dagui, bi mba bu ma'ueni guepu bi hocua Oją dim 'bui n'da mahuąhi nε vociento nε hyate pa. Nε din ja bu 'be'a gätho da hyoni. ⁷Ne nu bu mahets'i bin ja n'da ra dasui, nu'a rá ngurba m'behni Oją mahets'i ngue ra Miguel ne gätho u mi'da yúm 'behni Oją mahęts'i, bin suhmbu a ra jąrga ne'u gätho yú 'yehe a ra jarga. 8Pe nu'a ra jarga him bi daha, nε Oja him bi japi dim 'bupu mahets'i buya. ⁹Ne bi thøn'a thi bu mahets'i a ra jarga, guet'a ra c'ɛyą, ra zithu a, rá thuhu ra Satanás, gue i häte gätho ua ja ra

ximhäi gue'bu rá mbudi thoho. 10 Ne nubuya nugä dra Xuuagä dá øcä n'da ra nde mahɛts'i nts'ɛdi bin ya bi 'yɛna: "Ya bi zøn ra pa da yan'u yu 'yɛc'yɛi, ne da nu a rá ts'edi Oja, di manda rá ts'edi Oja u, ne a ra Cristo. Nguetho ya bi thøn'a thi bu mahets'i ra zithu ngue nzai madi yap'u ma cuhu bu ja rá hmi Oja ma pa ne ra xui. ¹¹Pe gue'a rá ji ra Jesús, tengu'bu ra De'yo, ní dap'a ra zithu u yu 'yec'yei, ne'bu i ma ngue εc'yεi ra Jesús, nε'bu hingui su da du. ¹² Janangue'a dan johyahu gätho dí 'buhmbu mahets'i. Pe ndumbui thoho ahu gue guí 'buhmbu bu ja ra häi, nepu ja ra deja, nguetho bi zøm bu ja ra ximhäi ra zithu, ne emme in cue. I padi him maya'a yu pa din ja rá ts'edi bu," bi 'yen'a ra nde dá øcä bin ya bu mahets'i. ¹³Ne nu'bu mi nu ra jarga zithu ngue bá t'ent'ua häi, bi gu'a ra xisu gue bim 'buh rá ts'unt'u. 14Pe nu'a ra xisu bi mba nt'unni yoho yu zahua tengu n'da ra pents'u xun ndoho, ne bi zägui bi mba ma'ueni guepu him bi zä bi bent'a ra jarga. Ne bi mba ma jamansu bu hyu jeya made. ¹⁵Nu ra jarga buya bi bøn ra dehe rá nde, tengu'bu n'da ra dathe xun ndoho, ena xtán dux'a ra xisu ra dehe. ¹⁶Pε Oja bi xoc'a n'da ra hyahäi guepu bi yu'a ra dehe bi bøm bu rá nde ra jarga. ¹⁷Pε nu ra jarga buya εmmε bi dε ra cuε nangue'a ra xisu, ne bi mba bi zu'u gätho mi'da ngue rá 'yʉ'a ra xisu, gätho ʉ gue bi 'yøt'a bi man Oja ne bi den'du 'be'a bi man'a ra Jesús.

Ran t'uti bi bøxpu ja ra deją, ne ran t'uti bi bøxpu ja ra häi

Nε bi mba bim 'bäpu ja ndenthe a ra jąrga zįthu.

Nε nugä dra Xuuagä dá nu man'da tengu n'da ra zate, bi bøxpu ja ra dadeja. Ne nuna ra zate mi ja yoto yú ya, ne 'det'a yú dani, guepu mi ja 'dɛt'a yʉ corona. Nɛ mán t'o't'i bu yú ya yú thuhu zehe a ra zate εmbi guesε Oja, nε bi ma mants'o nangue Oją. ²Nε nuna ra zate dá nu, gue bi bøxpu ja ra deja, tengu n'da ram hmasni, pε nu yú gua tengu yú gua yu oso, ne nu u yú nde, tengu yú nde yu león. Nε nu'a ra jarga bi un zehe rá ts'edi ná voho ra zate gue xí bøxpu ja ra deją. Ne bi un ran t'gdi di manda bu hapu i ja rá ts'edi ra jarga zithu, emme xun ngu ra ts'edi mi ja a. ³Nu'a n'da rá ya mi ja bu n'da ra seni ngue mí embi dí du a, pe bi zä. Ne gätho yu ją'i mi 'bucua ja ra ximhäi, bi denni, ne bi hyonya thoho nangue rá ts'edi mi ja. ⁴Nɛ nu u yu ja'i bi dande ra jarga, nguetho ya xi un rá ts'edi ra zate xi bøxρu ja ra deja. Νε bi dąnde ra zate, nε bi 'yɛna: "Njo'o man'da tengu na, nε njo'o to'o da zä din suhmi na." ⁵Ne bin t'un rán t'edi ra zate xí bøxpu ja ra deja, da man ra ts'ore xun ts'o nangue Oja. Ne bin t'un ran t'edi din ja rá ts'edi yote ma yozna. 6Ne nu'bu mí nya, emme xun ts'o bi ma nangue Oja. Bi ndøm mánts'o rá thuhu Oja, nepu bí 'bui, ne gätho u i 'bupu mahets'i. ⁷Ne bin t'un ran t'edi ngue din suhmbu yú t'uhni Oja ngue di japi di 'bɛ'ʉ. Nɛ bin t'un ra ts'edi ngue di manda gätho ná ngu yu ja'i 'bucua ja ra ximhäi, gätho yu häi, ne gätho 'dahma 'dan'yo bu na ya yu ja'i, gätho yu hnini. ⁸Ne gätho yu ja'i bi dande a. Pe him bi dande u xmán t'o't'i yú thuhu bu

ja rá søcua ra Jesús gue bi 'yo't'a ra Τ'udε'yo gue'a bi tho. Nε ya mán t'o't'i bu u yú thuhu u 'bu má hin'yu ra ximhäi, im ma to'o i ja ra temazai. ⁹Nu'u to'o i ja yú zagu, dami 'yøhmbu xun ho ya. 10 Nu'a to'o di un ran unbi yu ja'i gue da got' ra fädi, nese a da nu ran unbi ngue da mba njot'i. Νε to'o din hote ngue di sente, nese a da nu ran date ngue da ts'eni. Janangue'a to'o gätho u yú t'uhni Oja, jatho hønt'a da beni gue yú yante Oja, ne hin din xømbui. ¹¹Ne nubuya dá nu man'da ran t'uti gue bi bøxpu ja ra häi, ne mi ja yoho yú t'udani tengu n'da ra t'udε'yo. Pε nu'bu mín ya emme nts'utho tengutho ra jarga zithu. ¹²Ne nu'a ran t'uti xí bøxpu ja ra häi bin ja rá ts'edi tengu ra zate ngue xí bøxpu ja ra dadeja ngue mi ja n'da ra seni a n'da rá ya gue xí zä. Ne bi japi gätho i 'bucua ja ra häi da dande ra mbudi ra zate. ¹³Ne nu'a ran t'uti gue bi bøxpu ja ra häi, bi 'yøt' yun t'uti nts'utho, bi japi bá cah mahets'i ra sibi ngue da nu yu ja'i. 14 Ne bi hyät' yu ja'i gätho 'bucua ja ra ximhäi 'bu mi 'yøt' yu hyonya nt'øt'e. Ne høn'bu i 'bäpu ja rá hmi ra zate xí bøxpu ja ra deja, bi zä bi 'yøt'u. Ne bi xih yu ja'i da 'yøt'a n'da ra nyoguido tengu ra zate xí bøxpu ja ra deja, gue mí ja ra seni bu ja n'da rá yą, ngue xí zä. 15 Ne nu'a ran t'uti gue bi bøxpu ja ra häi, bin t'un ran t'ɛdi di japi dim 'bu a ra nyoguido nt'øt'e tengu ra zate bi bøxpu ja ra deja. Nε di japi din ya. Ne bi japi da mba ntho gätho to'o him bi dande a. ¹⁶Nε bi manda ngue gätho yu ja'i din ja rá hmepya ra nyoguido bu ja rá de

nepu ja rán 'yei, madague'a hønt'a go má ja'i, gätho i ja yú ts'edi ne'u hin'yu yú ts'edi, gätho yu membeti nε gätho yu hyoya, gätho yu 'yεhε nε gätho ngue hing yu 'yɛhε, gätho yu ja'i jatho din ja ra hmepya. ¹⁷Ne hingui sä n'da ra ja'i dim pä o gue din täi 'bu hin di nequi rá hmepya ra zate xí bøxpu ja ra deja, nu bu ja rá ja'i. Gätho jatho din ja ra hmepya ngue nam bøni rá thuhu, o rá número, rá hmepya rá thuhu ra zate. ¹⁸Jatho gan 'yomfɛnihʉ xʉn ho ngue gui pahmbu 'be'a nam bøn'a rá número ra zate, nguetho nu rá número, 'dato ciεnto nε hyate ma 'dato, rá número n'da ra ja'i.

Bin tuhu u bim pøhø

Nε nubuya dá nugä ra Jesús ra Τ'udε'yo i 'bäpu ja ra nyuni t'embi Sión. Ne mi 'bähmbu ra Jesús n'da ciεnto nε yote ma goho mahuahi yu ja'i ngue gätho i ja bu ja yú dε rá thuhu ra Jesús nε rá thuhu rá Ta. ²Nε dá øcä n'da ra nde bu mahɛts'i nt'øde tengu yu dehe xun ngu emme di hi ne tengu ran gäni nts'edi di thoni. Ne dá øcä tengu'bu yu arpa'bida xun ngu i pei. ³Ne nu'u n'da ciento ne yote ma goho mahuahi bi yan Oja bu ja ra ximhäi, ne bin tupu n'da ra thuhu ma'da'yo bu ja rá hmi Oją gue'a i huxpu ja rán thuts'i, ne guepu 'bäh yun t'uti i 'bui, ne yu dąc'yei. Ne njo'o mi'da bi zä bi bą a ra thuhu. ⁴Nɛ nu'ʉ, gätho xʉn hotho u, gue hønt'a Oja mbeni. Ne i ten'na ra De'yo hønbu go hapu da mba. Ne nu'u gue bi yam bu ja ra ximhäi bu 'buh mi'da yu ja'i, yun t'unni man'da xun ho bin t'un Oja

APOCALIPSIS 14 482

ne ra De'yo. ⁵Ne xinga n'da ra fehni bi thịnba ʉ, xøgue xingui ts'ʉ yʉ́ ts'oqui bʉ na nu Oją.

Nu'a bi man'u hyu yum 'behni Oja mahets'i

⁶Nε nubuya dá nugä man'da ram 'behni mahets'i mi 'yo inde bu mahęts'i, ne i cą ra søcuą nt'o't'i bu ran ho ma'da'yo hin njam'bu da guadi ne da mba gätho nanguni ra ximhäi. Da mba bu gätho yu häi ne nu yu ja'i 'dahma 'dan'yo bu na ya da 'yøde hønt'a go to'o ní ja'i. ⁷Nɛ nu'a ram 'behni mahets'i nts'edi bi 'yɛna: "Dami numansuhu Oja nε gui 'yεspahu rá ts'edi nuixte a, nguetho ya bi zøn ra ora da 'yøt' rán juanbi Oja. Dami thandehu a ya, gue'a gue bi 'yøt' mahɛts'i nɛ bi 'yøt' ra ximhäi. Ne bi 'yøt' yu deja ne bi 'yøt' yu mbøthe," bi 'yɛna. ⁸Nɛ nu'a man'da ram 'bɛhni mahets'i mahøn'a bi den'na rá mbudi m'bεhni, nε bi 'yɛna: "Ya bin theh rá ts'edi ra dahnini Babilonia ngue emme mi ja rá ts'edi. Nguetho nu'u yu ja'i mi 'bupu bi xandi gätho ra ximhäi a ran 'yomt'eni mí øzehe. Nε gätho u bi 'yøt' ran ts'o tengu n'da ra įti gue com'ma rá sei gätho mi'da," bi 'yɛna. 9-10 Nɛ nu'a ná hyu ram 'behni mahets'i bi den'na ná yoho, nε nts'εdi bi 'yɛna: "To'o gue da dande ra zate gue bi bøxpu ja ra deją, ne ra nyoguido, ngue i ja rá hmεpya bu ja rá dε o guepu ja rá 'ye, da nu hangu nangu rá ts'edi rá cue Oja. Nu Oja xíngui ts'u da 'yɛ'ts'a ran unbi di un'ndu nangue rá cue. Ne da nu a ra Jesús ra De'yo ne yú hogam 'behni mahets'i 'bu bin t'un'na, ngue ra sibi n'youi ra despi.

¹¹Nu'a ra 'bifi i pøm bu njam'bu din he a hønt'bu go njam'bu mazai. Ne nu'u i 'bupu njam'bu din he a ran unbi i nu u ma pa nε ra xui. Gue'u gätho bi dande ra zate xí bøxpu ja ra deja, ne ra nyoguido, gätho u i ja bu ja rá ja'i rá hmepya ne rá thuhu ra zate. 12 Pε nu ahu gyu 'yεc'yεihu pε nde'bu man'da gui hyądumbuihu gui thoc ni t'ɛc'yɛihʉ nɛ gui hyäthʉ yun unbi. Nguetho yú t'uhni Oja u gätho di thoqui i øt' yún t'edi ne di thoqui i ec'yei ra Jesús," bi 'yen'a ná hyu rám 'behni Oja mahets'i. ¹³Νε nubuya bi 'yɛ̞ngä man'da ra nde dá øcä mahɛts'i: "Dami 'yo't' ya 'bɛ'a ga xi a i. Din johya thoho gätho u xun du 'bu ya mí ɛc'yɛi a ra Hmu Cristo mahets'i. Majapi thoho, ɛn'a rá Hogandahi Oja, nguetho din säya a rá 'bɛfi mi øt'e. Nɛ nu'a ran ho mi øt'ua ja ra ximhäi u, ne nubu mahets'i da nu rá muui bu."

Rán sofo ra ximhäi

¹⁴Nɛ dá nu n'da ra güi xʉn t'axi thoho ne mi hu inde bu ja ra güi a n'da tengu n'da ra ja'i. Ne mi hu'ts'a n'da ra corona ra oro. Ne mi ha ra mbore theni emme het'i. 15 Ne bá pøm bu rá danija Oja mahets'i man'da rám 'behni Oja, ne nts'edi bi xi a mi hupu ja ra güi: "Dami 'yørpa yu ja'i bu häi tengu'bu da hyec yu uva xun yaxpu ja ra nuandät'o. Nguetho ya bi zøn ra ora gue gui pɛ'ts'ʉ bin ja bʉ ni huạhi," bi 'yɛn'a rám 'bɛhni Oja. ¹⁶Nɛ 'bex bi 'yøt'a mi hupu ja ra güi tengu xi sifi. ¹⁷Nɛ man'da ram 'bɛhni bá pøm bu ja rá ngu Oja mahets'i ne'a mi ha n'da ra mbore theni emme i het'i. ¹⁸Ne xø bá pøm bu man'da

rám 'bɛhni Oja buya guepu ja rá mεxa yɨn t'unni Oja, nε nu'a di manda da de ra sibi bu. Ne nts'edi bi xi a ram 'bɛhni gue mi ha ra mbore theni: "Dami 'yøt' ya tengu i øt' yu ja'i 'bu i hec yu uva hingui ho nguetho bi zøn ra ora gue da nu ran unbi u nangue rán juanbi Oja," bi 'yɛna. 19-20 Nɛ njabu bi 'yøt' rám 'bɛhni Oja, tengutho 'bu di pɛt yu uva ne da 'yen bu ja ran the'mi da bøn rán gui buya. Ne tengutho ra ja'i i ne't'u yu uva da bøn yún gui, ne ngutho da 'yørpa u to da zembi, da nu rá cue Oja emme nts'utho. Janangue'a ran t'uti ngue bi mbän rá ji. Ne bi 'yørpu ja ra ndehnini, nε εmmε xun ngu ra ji bi mbäni, hyuciento kilómetro nan junni, ne nan he tengu 'bu da hyecpu ja yú nde yu fani a ra ji bi 'yugui.

Yoto yum 'behni di manda yoto yun unbi

Ne nugä dra Xuuagä dá nu man'da ran t'uti bu mahets'i, ne emme dá hyonya thoho. Mi 'bähmbu bu yoto yúm 'behni Oją mahęts'i, gue u di manda yoto yun unbi din ja ua ja ra ximhäi, ne nu'bu bi thoh yun unbi, ya bi thoh rá cue Oja buya. ²Ne dá nu n'da ra xito di nequi tengu ra deja, rá cuhu xun theni tengu ra sibi. Ne gätho mi 'bäpu ja ra xito, gue'u gue him bi dande ra zate xí bøxpu ja ra dehe, bi zedi, hím bi dąnde ra nyoguido ngue ra pøte a, ne xím bin jap'a rá número o rá thuhu a. Ne n'da ngu n'da mi ha yu 'bida, ngue yu arpa xí un'na Oją u. ³Ne gätho mi 'bäpu bin tuh rá thuhu ra Moisés rá 'yehe Oją, ne bin tuh rá thuhu ra Jesús ra De'yo. Bi 'yen'u:

Nu'i ma Oja ahe, ma Hmu ahe, nuixte thoho ni ts'ɛdi, ɛmmɛ xun ho i, nɛ ma hyonya thoho nin t'øt'e.

Majuani nin t'øt'e xun hotho u. Nu'i grá hoga ts'ut'abi mazai.

⁴ Xinga n'da dim 'bʉi gue hin da dạnde i,

gue hin da numansu ni thuhu, nu'i ma Hmu ahe.

Høn'a thoho i xʉn ho i, ma Oją ahe.

Gätho hønt'a go 'bɛ'a má nde da dande i,

nguetho gätho ya bi nu ngue xun ho 'be'a gätho guí øt'e, bi 'yen'u. ⁵Ne nubuya dá nu nsoqui n'da ra jut'i i ja bu mbo rá danija Oja bu mahets'i, guepu m'be'ts'i yun t'edi bi 'yo't' ra Moisés. ⁶Nε yoto yúm 'bεhni Oją ngue di manda yun unbi bu ja ra häi bi bøm bu. Gätho i he yú pahni xun t'axi ngue ra lino, nε gätho bi du't' yú tiya ra oro. ⁷Ne nu'a n'da ran t'uti mí 'bäpu bi un'i yoto yu ximbo bi un'ndu yúm 'behni Oją. Gätho ma yudi rá cue Oja, ne nu'bu 'dah mi'da da mbän u mí po bu ja ra ximbo, gätho yu ja'i i'bucua ja ra ximhäi da nu rá cue Oją, gue i 'bui maząi. 8Ne gätho rá niją Oją bu mahęts'i ma yudi rá ts'edi ne rá nuixte Oja tengu ra 'bifi 'bu i yupu mbo ra ngu. Ne xinga n'da sä da yurpu asta gue'bu bi gua'a rá 'bɛfi u yoto yum 'bɛhni gue di manda yoto yun unbi ua ja ra ximhäi.

Yu ximbo i po yun unbi ngue rá cue Oją

16 Ne dá øcä n'da ra nde gue bi bøm bu ja rá danija Oja. Ne nu'a ra nde bi xi u yum 'behni: "Dami fämhbu bu ja ra

APOCALIPSIS 16 484

ximhäi rán unbi Oja nts'utho i po u yoto ni ximbohu," bi 'yɛna. 2Nu rá mbudi ram 'behni bi mbäm bu ja ra ximhäi rá cue Oja mí po bu ja rá ximbo. Nε gätho yu ja'i gue bin ja rá hmepya a ra zate xí bøxpu ja ra dehe, ne'a ra nyoguido ngue i thande u, bi nu ran u ngue yu sasi xun ts'otho. ³Nubuya ná yoho ram 'bɛhni mahɛts'i bi mbän a rá cuɛ Oja mi po bu ja rá ximbo, bu ja ra dadeja. Nu'a ra dehe buya bin ja tengu rá ji n'da ra ja'i xun du. Ne gätho mi 'bupu mbo ra deja bi du. ⁴Ne ná hyu ram 'behni mahets'i bi mbän'a rá cue Oja mi po bu ja rá ximbo hapu ja gätho yu dathe ne gätho yu mbøthe. Gätho ra dehe mi po bu bin ji. ⁵'Bex dá øcä rá nde rám 'bɛhni Oją gue'a bi unba yu dehe bi 'yɛna: "Nu'i ma hoga Hmu, ma Oja i, zai guí 'bui ne gmí 'bui, xun hotho gätho nin juanbi, nguetho rán säui u gá unbi. ⁶Ya gá un ra ji da zi u, nguetho bi hyo u nim 'behni bu häi ne ni pøngahyą. Nuya gá cospa ra pengui nangue 'be'a bi 'yøt'u," bi 'yena. 7Ne dá øcä n'da ra nde bi bøm bu ja ra mexa guepu mí ja yún t'unni Oją, i ¿na: "Ma Hmu i Oją nuįxte ni ts'edi xun ho, njuantho a nin juanbi, ngue rán säui u," bi 'yɛna. 8Nɛ nu'a ná goho rám 'behni bi mbäm bu ja ra hyadi a rá cue Oja mi po bu ja rá ximbo. Nε εmmε bin ja rá ts'edi ra hyadi ngue bin zø u mi 'bupu ja ra ximhäi nangue nam pa ra hyadi. ⁹Ne nu'u gue bi nu ran unbi nangue rá ts'edi ra hyadi, bi ndømants'o rá thuhu Oją, gue'a bi manda yun unbi, pe guexta'a him bi 'yɛspa Oją, him bi päh yún 'yomfeni u. 10 Nuya ná

cut'a ram 'bɛhni bi mbäm bu rá cue Oja mi po bu ja rá ximbo, ne bi mbäm bu hapu i ja rá ts'edi ra zate xí bøxpu ja ra dehe. Ne nupu hapu ja rá ts'edi, gätho xum 'bexui thoho bu. Nε nu'u yu ja'i gue i 'bupu bi zase yú jani nangue ran unbi bi nu. ¹¹Ne bi c'amants'otho Oja nangue yun u, ne nangue yu sąsi mi ja. Pe guexta'a him bi 'yɛ'ts'a ran ts'o mi øt'e, him bi päh yún 'yomfeni. ¹²Ne nu'a ná 'dato ram 'behni bi mbäm bu rá cue Oja mi po bu ja rá ximbo, bi mbäm bu ja ra dathe xun ndoho t'embi Eufrates. Ne bi xä ra dehe ne 'bex bi 'yo't' ra dathe ngue da zä da thopu yu ts'ut'abi gue ní 'yɛpu ní bøx ra hyadi. ¹³Ne nugä dra Xuuagä, dá nu hyu yu ts'onthị di nequi tengu yu 'uɛ, ngue bi bøm bu ja rá nde ra jarga zithu, nepu ja rá nde ra zate xí bøxρu ja ra deja, nε bi bøm bu ja rá nde ran t'uti xí bøxpu ja ra häi, gue ra hyäte pøngahyą. ¹⁴Nguetho nu'ʉ, gue'ʉ yʉ́ ts'onthi ra zįthu u i ja yú ts'edi ngue da 'yøt' yu hyonya nt'øt'e. Ne nu'u bi mba bu gätho ná nguni ra ximhäi, hønbu go hapu 'buh yu ts'ut'abi, ngue bi japi di pet yu ja'i. Ngue din ja ra dąsui din suhmbu Oją. Ne nu'a ra pa din ja ra sui gätho da nu rá ts'edi Oja nujxte. ¹⁵Ne dá øcä rá nde ra Jesucristo ngue bi 'yɛna: "Gui 'yøhmbu ya, nugä ba ɛcä tengu n'da ra bɛ. Hinga mfądi njąm'bu ga søhø. Din johya thoho u gue him bin aha pε bi jamansu yu he dá unni, janangue'a hin din 'yahe ne hin din 'yasä buya, ngue im bentho a ran hoqui dá ørpa u, janangue'a hin di nequi yú ts'oqui, ne hin da mbe'ts' yú sä," bi 'yena. 16 Ne gätho

bim peti bu yu ts'ut'abi ne yu ją'i bu ja ra xequi t'embi Armagedón, ngue yú nde yu hebreo a. ¹⁷ Nuya ná yoto ram 'behni bi mbäm bu rá cue Oja mi po bu ja rá ximbo, bi huic ran dahi 'bɛ'a mi po bʉ. 'Bex bi t'ø a n'da ra nde bi bøm bu ja rá nija Oja mahɛts'i, guepu i hu inde Oja. Nɛ nu'a ra nde bi 'yɛna: "Ya da guadi gätho man ts'embi," bi 'yena. 18 Ne 'bex bi hyät'i nts'edi yu huei, ne nts'edi bin thoni yu ngäni. Ne bin ja n'da ra 'yanhäi nts'edi hin jam'bu bi nu n'da ra ja'i tengu na, asta gue'bu go mim 'bu u yu mbudi thoho yu ja'i. ¹⁹Nu ra 'yanhäi bi xen'a ra dahnini Babilonia, hyu xequi bi bøni. Ne gätho mi'da yu hnini hønbu go hapu mi ja bi guadi. Ne bi ben Oja gue xun ts'otho mi øt' yu ja'i 'bupu ja ra dahnini Babilonia, nε nts'edi bi unba u, nangue rá cue nts'edi a, asta gue'bu go min theh rá cuε Oją. 20 Nε gätho yu t'uhäi i ja bu ja yu deją bim 'bedi. Ne gätho yu nyuni ne yu t'øhø bim 'bedi, hin'yu buya. ²¹Nε 'bex bi däpu mahets'i yun do emme nts'utho nguetho yote kilo nán hyu n'da ran do, bi zu i 'da yu ją'i. Pe nu u yu ją'i bi c'amants'o Oja nangue ran unbi nts'edi bi nu nangue yun do.

Ra ngurpa 'yomt'eni xisu

Nε nu'a n'da u yúm 'bɛhni Oją mahɛ̞ts'i gue'a mí ja n'da ra ximbo, bi xicä: "Ba εhɛ ga ut'a i rán juạnbi Oją da nu ra 'yomt'ɛ̞ni xisu i hupu ja yu dehe 'dahma 'dan'yo bu gätho ra ximhäi. Nu'u yu ts'ut'abi bu ja ra ximhäi bi 'yo̞thu ran ts'o a ra 'yomt'ɛ̞ni xisu. Nɛ yu ja'i 'bucua ja ra ximhäi

bi xänba bu gue da 'yøt' ran ts'o guepu 'bu a ra 'yomt'ęni xisu. Gätho mi øt' ran ts'o tengu'bu iti thoho," bi 'yem 'bu mi xiqui. 3Ne nubuya nu rám 'behni Oja bi zixcä bu ja n'da ra huenhäi ma'ueni njon mi 'bupu. Ne nu rá Hogandahi Oja bi jaqui gue dá handi, ne dá nugä a ra xisu i hux'a n'da ra zate xʉn theni. Nu ra zate mi ja voto yú ya ne 'det'a yú dạni, ne nt'o't'i bu ja rá ja'i ena jase rá ts'edi, gue rá thuhu εna guesε Oją. ⁴Nu ra xisu mi he n'da ra hoc'bø't'e xun jupoi ne xun theni. Ne emme madín 'yøt'e xun ho nangue yu thebe ne yum fo'ye ra oro ne yu ts'ungu emme xum hmadi thoho, ne hønt'a go mi cuat rá pahni. Ne mi the n'da ra tasa ra oro. Pe gätho 'be'a mi po ra tasa ra hmepya nangue gätho yun ts'o mi øt' ra xisu. ⁵Nɛ nubʉ ja rá dɛ nt'o't'i bu rá thuhu: "Ra dahnini Babilonia, ngue ja rá ts'edi tengu'bu rá mbe gätho yu 'yomt'eni ne tengu'bu rá mbe gätho i øt' ran ts'o hønbu go hapu i ja ra ximhäi," bi 'yɛn'a ra t'ohni. Pe hin da base n'da 'be'a ním bøn'a. ⁶Ne dá hant'a ra xisu. tengu 'bu įti thoho nangue yú ji u gätho bi hyo 'bu mi den Oją ne'bu mi mamp'a rám hman ra Jesús. Nε nugä drá Xuuagä, dadí hyonya thoho 'bʉ má nugä a n'da ran t'uti. ⁷Ne nu rám 'behni Oja mahets'i bi xiqui: "O gadí hyonya thoho, nguetho ga xi a ya 'bɛ'a ni hmɛpya a ra xisu, ne 'be'a ni hmepya a ra zate i hux'a ra xisu, gue i ja voto yú ya nε i ja 'dεt'a yú dani. ⁸Nu'a ran t'uti ngue ra zate gá nu, pe gue'a n'da mi 'bui, ne hingui 'buh ya, pe him ma ya'a ba ehe mahøn'a, da

bøm bu ja ra hyahäi emme xun he. Nε m'bejua da nu ran date xun ho hin dim 'buh mahøn'a. Ne gätho yu ja'i ngue hinga nt'o't'i yú thuhu bu ja ra søcua mahets'i, gue bi t'orpu 'bu ma hin'yu ra ximhäi, di hyonya thoho 'bu bi nu mahøn'a tengu bu í hnu ra zate. Nguetho mi 'bui, nε njo'o ya, pε dim 'bui mahøn'a. 9Nu'u to'o i ja yún 'yomfeni xun ho, sä da badi 'be'a nim bøn a ra hmepya. Nu yoto yú ya ra zate ra hmepya ngue u yoto yu nyuni guepu i hu a ra xisu. 10 Ne ra hmepya gue'u yoto yu ts'ut'abi, ngue yu ts'om'bäi thoho. Bi du u cut'a ne nu ná 'dato i 'bupu ya, ne ná voto dim 'bui, pε hingan ya'a din ts'ut'abi. ¹¹Ne nu'a n'da, ná hyato ra ts'ut'abi buya, gue'a gue mi 'bui, pε njo'o ya. Nu'bu bá εh mahøn'a, di manda tengu u yoto yu ts'om'bäi ts'ut'abi, pe m'bejua da mba da nu ran unbi mazai. ¹²Ne nu'u yú dạni ra zate gá nu, yu hmepya ngue 'det'a yu ts'ut'abi din ja yú ts'edi 'da yu t'u ora tho ne da gomhbu rá ts'edi ra zate. ¹³Ne gätho yu ts'ut'abi 'dat'a da beni ngue di un ra ts'edi di manda ra zate. ¹⁴Nɛ gätho yʉ ts'ʉt'abi da zu'a ra Jesús ra Dε'yo. Pε nu'a ra Jesús da daha, nguetho ra Hmu a nangue gätho mi'da yu hmu, ne ra hmuts'ut'abi nangue gätho mi'da yu ts'ut'abi. Ne nu'u gätho din 'yohu ra Jesús 'bu bi dąhą, gue'u bi zon Oją u, ne bi huahni, ne him bi 'ye'ts'a ní denni," bi 'yen'a ram 'behni. 15Ne nu rám 'behni Oja mahets'i xø bi xicä mahøn'a dra Xuuagä: "Nu yu dehe gá nu guepu mi huh ra xisu, ra hmepya a nangue gätho mi'da

yu ją'i i 'buh nanguni ra ximhäi, gätho yu häi gätho yu nde 'dahma 'dan'yo bu na yą. 16 Nε nu yu dąni gá nu, ngue yú hmepya yu ts'ut'abi, ne'a ra zate, m'bejua da zu a ra 'yomt'eni xisu u. Ne nu'u da hyacpi 'be'a gätho mi ja a ra xisu, ne da zap rá ngợc'yei a, ne da 'yu'ma ra xisu nangue ra sibi. ¹⁷Nguetho Oja bi benba yu ts'ut'abi da 'yøt'e tengu mim ben Oja, ngue n'da ngu n'da u di un rá ts'edi ra zate di manda, asta gue'bu go bin ja 'bɛ'a bi man Oją ngue din ja. ¹⁸Nɛ nu'a ra xisu gá nu bu, rá hmepya ra dahnini gue'a di manda yu ts'ut'abi a, nangue gätho yu häi i ja ua ja ra ximhäi," bi 'yɛn'a ram 'bɛhni.

Bi 'beh rá ts'edi ra dąhnini Babilonia

M'bejua dá nugä man'da ram 'behni bá cah mahets'i, ne emme i ja rá ts'edi. Ne i ja rán negui, bi hyät ra ximhäi 'bu mi gại, tengu ra hyadi. ²Ne ɛmmɛ ts'edi bin yą, bi 'yęna: "Bi guahya, bi guahya rá ts'edi ra dahnini Babilonia. Ne hønt'u yu zithu dim 'bupu, ne gätho yu ts'onthi. Ne i 'bupu hønt'a go 'be'a mán ts'o, ne yu doja gue hingui ho øt'e, xun ts'otho. ³Nguetho nu yu mɛngu bu bi xänba ran ts'o gätho yu ja'i mi søm bu gue i 'buh ná nguni ra ximhäi. Ne gätho yu ts'ut'abi bi gomhbu ran ts'o ra hnini, ngue tengu'bu ra 'yomt'ɛni xisu bu. Nɛ xun ngu yu ja'i 'da n'danni yú häi, bim membeti 'bu mí mbäp'u 'be'a gätho bi numanhose yu mengu bu ja a ra hnini," bi 'yɛn'a ram 'bɛhni. ⁴Nε dra Xuuagä dá øcä man'da ra nde bí 'yɛh mahɛts'i, bi 'yɛna: "Ba

487 APOCALIPSIS 18

εhε gätho yu ja'i ngue ma mbεtigä, dami pøm bu ja ra dahnini, gue hin gui cohma øt'ehu ran ts'o i ja bu, ne hin guin nuhu ran unbi gue da nu u to'o da gopu. ⁵Nguetho nu'bu sä da mba ma munts'i yún ts'o i t'ørpu, tengu'bu da zuh nán hets'i ra ximhäi mahets'i. Ne nu'a Oją xíngui ts'u bi pumbęni ran ts'o 'be'a bi t'ørpu." 6Ne bi sih yúm 'bɛhni Oja buya: "Nuya dami cospahu ra pengui tenguthoho bi 'yørpa mi'da, dami cospahu ran u gue gui yofu mahøn'a. ⁷Dami un ya ran unbi ne nts'edi ra dumbui 'be'a rán theui bi 'yøt'e. Nguetho bi bεni maguesε, nε bi 'yøt' yʉ ts'oqui bi numanhose, ne xun ngu 'be'a gätho bi hyonse. Tengu'bu n'da ra xisu da manse mbo rá mbui, da 'yɛna: "Nugä xʉn ngu ma ts'ɛdigä, hingan ts'ogui thohogä, ne njam'bu din jagä ra dumbui," ngubu bi ma. ⁸Pe janangue'a da nu ran unbi di und Oją, ne gätho 'be'a din ja, 'da hugtho án ja gätho yu 'yanthi. Ng da nu ra gehe ne ra dumbui, ne di juadi nangue ra sibi. Nguetho tate thoho rá ts'edi Oja ra Hmu, gue di un'na rán theui bi 'yøt'e. ⁹Ne nu yú ts'ut'abi gätho yu häi gue zại i comhbu ran ts'o, gätho din zoni nε dim mbafi 'bu i hand rá 'bifi ra dahnini ngue i zø. ¹⁰Nε gätho dim 'bämanhe nguetho emme i su da nu ran unbi tengu in nu u i 'bupu ja ra dąhnini. Ne da ma: "Huecate, hugcate, nguetho mahotho ra dahnini, ne emme mi ja rá ts'edi, pε n'da huetho gue bi ts'embi," da 'yɛn'u. ¹¹Nɛ gätho yu mbä bu ja gätho ra ximhäi din zoni ne dim mbafi, nguetho njo'o da dämbi

'be'a da mbä. ¹²Ngue yu oro, yu t'axi, yun 'yøt'e, yu perla, ne ra 'bø't'e ra lino xun ho, ra 'bø't'e ra seda, ra 'bø't'e xʉn tudi xʉn jʉpoi nε xun theni, ne gätho yu za gue muman'u, ne'u nt'øt'e yu do'yo, ne gätho u yu za nt'øt'e emme xum hmadi, ne'u nt'øt'e ra bronce ngue ra thenga fexna t'egui, ne'u nt'øt'e ra t'egui, ne'u nt'øt'e ra 'yaxi. 13 Ne zai mi 'bä bʉ yʉ canela, yʉ 'yɛthi ngue in 'yohu yu tuhu, ra t'uza muman'u, yu 'yethi i yumanho, yu perfume, yu vino, yu aceite, ra hocjuni, ra trigo, yun dani, yu de'yo, yu fani, yu carro, ne yu 'yehe mi 'bä bu, nguetho mi 'bäp yú te yu ja'i tengu'bu i 'bä yu fani. ¹⁴Nɛ da 'yɛn'u yu mbä: "Gätho gue xun ho gmi honi bin thegue. Nε gätho yu mbeti ne gätho 'be'a mahotho ya bi mba. Him man'dandi guin nu mahøn'a tengu mí ja bu," da 'yɛn'u. ¹⁵Nɛ nu'u gue bim mɛmbɛti ngue'u mim pä bu ja ra dąhnini, dim 'bämanhɛ tho, nguetho i su da nu ran unbi, tengu in nu'u mi 'bupu. Nε εmmε din zoni, i tu yú mbui, nguetho njo'o da däi 'bɛ'a i ja da mbä. ¹⁶Nɛ da 'yɛna: "Dumbʉi thoho nangue 'bɛ'a bin ja ra dahnini, emme mi ja bu mahotho, ne mi ja bu yu 'bø't'e ra lino, nε yu 'bø't'e xun jupoi, ne yu 'bø't'e xun theni, nε madi nεqui bu 'bε'a mahotho gue yu oro ne yun 'yøt'e ne yu perla xum hmadi. ¹⁷Nuya nte jabu ya, n'da oratho ám 'bedi gätho emme xum hmadi mi ja bu," da 'yɛn'u mim pä bu. Ne gätho yú hmu yu barco ne'u gätho i hu bu, ne gätho yu mbefi di 'yon yu barco, mi 'bämanhetho. 18 Ne bi du yú mbui

'bʉ mi nu ra 'bifi i zø ra dahnini, ne bi 'yɛna: "Hin'yʉ man'da ra hnini mahotho tengu nu." 19 Νε nu'u, bi 'yux yú ya yu fonthäi, ra hmepya gue tu yú mbui, ne bin zoni ne bi mbafi, ɛna: "Huɛcate ra dahnini emme mi ja rá ts'edi, nguetho gätho gahu dyú hmuhu yu barco dám membetihu nu, ne xøgue n'da oratho ám 'bedi gätho mi ja bu," bi 'yɛn'u. 20 Pe gan johyahu gätho ahu gue guí 'buhmbu ua mahets'i, gan johyahu nangue 'bɛ'a bin ja ra dahnini, bi ts'embi. Ne dan johyahe gätho gahe ma 'bäihe ra Cristo ua ja ra häi, ne gätho gyu pøngahyahu Oja, ne gätho gahu ngue dí tenhdu Oja, dan johyahu, nguetho ya bi cos'ahu 'be'a bi 'yøt'ahu yu ja'i mi 'bupu ja a ra dahnini. ²¹Νε nubuya n'da rám 'bɛhni Oja mahɛts'i ngue xun ngu rá ts'edi, bi gu'ts'a n'da ra do emme xun ndoho, ne nts'edi bi 'yɛm bʉ ja ra dądeją. Nɛ bi 'yɛna: "Tengu thoho din ja ra dąhnini Babilonia ngue mi ja rá ts'edi, pe njam'bu da hnu mahøn'a, gätho n'da m'bedi thoho. 22 Ne hin da t'øpu mahøn'a yu mbe'bida, gätho u i pε yu arpa, nε gätho u i huixt yu thuxi, xínga gue'u yu hyuxi. Xinga n'da ran 'yohu dim pepu mahøn'a, nε njon din cum bu mahøn'a. ²³Νε din ca'bexui thoho, him man'dandi mahøn'a di nequi bu yu sibi, ne njon da 'yøt' ran thati bu ngue din johya tengu mi øt'e. Nguetho man'da mi ja yú ts'edi u mi øt' yú 'bɛfi bʉ xínda gue'ʉ mi'da gätho ra ximhäi. Pe mi hät yu ja'i 'bu mi xänbi di ho yú pähä zehe u gätho mi søm bu, bí nexpu ná nguni ra ximhäi. 24 Νε guepu bim fän yú ji u

yú pøngahyą Oją, ne u gätho mi'da yú t'uhni Oją, gue bi tho. Pe guepu bi tho u, ne gue'a í ts'emba a ra dahnini," bi 'yen'a rám 'behni Oja.

Nε nubuya, dra Xuuagä dá øcä yú nde n'da munts'i yu ja'i i 'bupu mahets'i. Ne bi 'yɛn'u: "Dí ɛspahu Oja, nguetho ma pørpątehu a, ne hønse ma Ojąhu i ja rá nujxte ne tate thoho rá ts'edi. ²Xun ho rán ts'embi Oja, nguetho rán säui bi t'ørpa ra dahnini, tengu'bu ra 'yomt'ɛni xisu, gue bi ts'onba yú mbui gätho yu ja'i ra ximhäi. Ne nuya Oja bi cospa u gätho to'o bi hyo yú 'yɛhɛ," bi 'yɛna. ³Nɛ nts'ɛdi bi mam mahøn'a yu nde dá øcä: "Dí ɛspahu Oja nguetho ya bi juah ra sibi a ra dahnini, ne hin din he a nín 'yo rá 'bifi," bi 'yɛn'ʉ yʉ ja'i. ⁴Nubʉya gätho 'däte magoho yu dac'yei ngue zai di mbä'ts'a Oja, ne'u goho yun t'uti i 'bui, bin danyahmu bu i hu a Oją, nε bi dąnde. Nε gätho bi ma bi 'yɛn'u: "Necähe, ngubu dím bɛmhbe dí espahe Oja," en'u.

Bi zin rá xisu ra De'yo

⁵Nɛ dá øcä man'da ra nde bi bøm bu guepu i hu a Oją, ngue bi ma: "Dami 'yɛspa ma Ojahu gätho u yú 'yɛhɛ. Dami 'yɛspahu gätho to'o i numansu Oja, ne'u i ja yú ts'edi ne'u hin'na," bi 'yɛn'a ra nde. ⁶Nɛ dá øcä yú nde yu ja'i xun ngu, ngue di hi tengu'bu xun ngu yu dehe, nɛ tengu'bu bi thoni yun gäni. Nɛ bi 'yɛm'bu mi ya: "Dí ɛspahu Oja, nguetho di manda ya ra Hmu, ma Ojahu tate thoho rá ts'edi. ⁷Gätho dan johyahu, nɛ da hyu ma mbuihu, nɛ ga ɛspahu Oja ngue i ja rá ts'ɛdi.

489 APOCALIPSIS 19

Nguetho bi zøn ra ora da zin yu 'yɛc'yɛi ra Jesús, ra Dɛ'yo, tengu thoho n'da ran 'yohu din that'ui rá xisu. Ne mahøntho da mba ra xisu, mahoqui thoho. 8Ne bin t'un ran t'ɛdi da hye ra pahni di fɛxni, gue ra lino xíngui ts'u ts'o. Nu'a ra pahni xun t'axi nam bøni ngue bi mba mahoqui yú ts'oqui u yú t'uhni Oja ne nubuya i øt' yún thehu." 9Ne nuna ram 'behni mahets'i bi xicä 'bɛ'a ga o't' ya: "Din johya gätho to'o u bi ts'on bu ja ran sihme nangue rán thati ra De'yo. Majuani rám hman Oja na dí xi a ya," bi 'yeng rám 'behni Oja mahets'i. 10 Ne nubuya dán danyahmu bu ja rá gua ram 'behni mahets'i. Pe nu'a bi xicä: "O guín jabu, nguetho nugä rá 'yɛhɛ thohogä Oją tengu thoho i, nε tengu ni cuhu, gätho u i mamp'a rám hman Oja nangue ra Jesús, gätho dadí jafu da fah ra Jesús," bi 'yeng 'bu mi xiqui.

Nu'a n'da bi hyux ra t'axca ndøfani

¹¹Ne nubuya, dra Xuuagä, dá nugä nsoqui mahets'i. Ne mi 'bäpu n'da ra t'axca ndøfani pa nthuts'i. Nε nu'a i huts'i, Majuani a rá thuhu, nguetho zại im mam majuạni a. Nɛ di Ja'ts'a rá thuhu, janangue'a n'da ngu n'da di un'na rán säui 'bu bi juanbi, ne xun ho 'bu i øt' ran sui a. ¹²Ne nu'u yú dä a mi huxpu, mi zø tengu ra sibi, ne mi jabu xun ngu yu corona bu ja rá yą. Ne nu rá thuhu nt'o't'i bu, hønse mi padi 'bε'a rá thuhu. ¹³Nε nu rá pahni mi he, bi zinni gätho ra ji, ne nu rá thuhu, ngue rám Hman Oja a. ¹⁴Ne nu'u yu dofui mahets'i, gätho mi he ra t'axca lino mahotho, xíngui ts'u

xun ts'o. Ne gätho mi hux yu t'axca ndøfani, ne bi den'na ra mbudi mi huxpu ja ra ndøfani. ¹⁵Ne nu'a ra ngurbi i pøxpu ja rá nde n'da ra espada emme het'i, ngue da dap yún suihu 'bupu gätho yu häi bu ja ra ximhäi. Ne gätho di manda u buya, ne njon di japi da mbesta'a da ma. Ne tengutho ra ja'i bu ja ran the'ma gui'uva, i nen yu uva, ne ngutho da 'yørpa u to da zembi, di un rá cue Oja nts'utho, ngue nu'a nte hembi da 'yøt'e. ¹⁶Ne nt'o't'i bu ja rá pahni ne rá xinthe rá thuhu, ngue ra Hmuts'ut'abi a ngue di manda gätho yu ts'ut'abi, ne rá thuhu, ngue ra Ngurpa Hmu a ngue di manda gätho yu hmu. ¹⁷Ne dá nugä n'da rám 'behni Oja mahets'i mi 'bäpu ja ra hyadi, ne nts'edi bi mba't'u gätho yu doja mi 'yo bu magats'i, bi 'yembi: "Gätho ahu gyu dojahu, ba ɛhmbu ya, nguetho Oja bi 'yøt'ahʉ n'da ra dants'ihmɛ. ¹⁸Ba ęhmbu ya gui sihu yú ngợc'yei yu ts'ut'abi ne yu hmudofui, ne'u gätho mi ja yú ts'edi. Ne yu ndøfani ne gätho mi huts'i, ne gätho yu ja'i yu 'yehe ne gätho hing yu 'yehe, ne yu hmu uague yú mbɛfi," bi 'yɛm 'bu mi mba't' yu doja. 19 Νε dá nugä ra zate gue xí bøxpu ja ra dadeja, ne 'darbu bim petihu gätho yu ts'ut'abi ngue gätho yu häi, ngue da 'yørpa n'da ra dasui a mi huxpu ja ra t'axca ndøfani, ne'u gätho mi tεnni. 20 Nε nu ra zate buya bi mba mfent'i a, ne'a ra hyäte pøngahya bi fent'i, gue'a ran t'uti í bøx ra häi nε xí 'yøt' yu hyonya nt'øt'e bu ja rá hmi ra zate. Ne gue'a mi hät yu ja'i gätho to'o mi ja rá thuhu bu ja rá dɛ. Gätho yoho bi t'entpu ja ra

sibi ra azufre, tengu n'da ra deją na ndoho a ra sibi. ²¹Nɛ gätho yʉ jạ'i mi tɛn'na ra zate, bi tho nangue ra espada mi pøxpʉ ja rá nde a mi huxpʉ ja ra t'axca ndøfani. Nɛ nu'ʉ yʉ doja bʉya bin niyą thoho nangue yʉ ngøc'yɛi.

N'da mahuahi njeya

Ne nubuya, dra Xuuagä dá nugä man'da rám 'behni Oja mahets'i bá cại ne bá hya rán sogui ra hyahäi emme xun he ne nts'utho, guepu i 'buh yu zithu. Ne nu'a rám 'behni Oja mi ca n'da ra cadena xun ndoho. ²Ne bi bent'a ra jarga, ne t'embi ra c'eya, pe guet'a ra zithu, rá thuhu í Satanás. Nε bi mba nthąt'i n'da mahuąhi njeya nangue ra cadena. ³Nε nu'a rám 'behni Oja buya, bi 'yentpu ja ra hyahäi a ra zithu. Ne bi go'mi, ne bi hyut'a ran sogui, ne bi cuahmi xun ho, ngue hin da zä da bøm bu da hyät yu ją'i, asta gue'bu bi gua'a n'da mahuahi njeya. M'bejua da mba nso'ts'i 'da yu pa. 4Ne dá nugä man'da ra hmepya mahets'i, xun ngu yun thuts'i, ne nu to'o mi huxpu bin t'un ran t'ɛdi da 'yøt' ran juanbate, gätho min 'yohu u bi tho 'bu mi ma i ɛc'yɛi ra Jesús, nɛ'bu mi mamp'a rám hman Oja. Gue nu'u gätho him mi thande ra zate xí bøxpu ja ra deją ne rá nyoguido. Nε nte mi ja bu yú dε rá thuhu ra zate, xínga guepu ja yú 'yɛ. Nu'u bi ndants' mahøn'a 'bu mi du, ne bin 'yohu ra Jesús bin ts'ut'abi n'da mahuahi njeya. ⁵Ne guehya yú mbudi bi xox Oja bi t'urcä. Pe nu'u mi'da gue bi du, hin da dambeni asta gue'bu bi gua'a n'da mahuahi

njɛya. ⁶Nɛ di johya nɛ mająpi u gätho u ra mbudi da xox Oją, nɛ hin da nu a na yoho ran dąte ngue ra sibi maząi. Nɛ dim mbäją nangue ra Cristo bu bí ja rá ts'ɛdi Oją, nɛ din 'yohu ra Cristo ngue din ts'ut'abi n'da mahuahi njɛya.

Da mba nthạpi ra zịthu

⁷Nε nu'bu bi gua'a n'da mahuahi njeya, da mba nsocui a ra zithu mi ofädi. 8Ne nu'a ra zithu buya da bøm bu, xø da hyät mahøn'a yu ja'i gätho na nguni ra ximhäi. Da mba bu ja ra häi Gog ne ra häi Magog ne di japi dim peti gätho nangue din ja ra dasui. Ne xun ngu da denni hingui sä da 'bede, tengu ra 'bomu 'bom bu ndendeją, njon da hyät'i da mbede. ⁹Ne din 'yerpa thoho bu ní mba bi mbä'ts'i hapu mi 'bu u min 'yohu Oja, guepu ja ra dahnini di huge Oja. Pg bá cah mahgts'i ra sibi bi juadi gätho yun suihu. 10 Ne nu'a ra zįthu ngue bi hyät'u, bi t'entpu ja ra sibi i the ra azufre, tengu n'da ra deja na ndoho, guepu xí t'entpu ra zate xí bøxpu ja ra dadeja, ne'a ra hyäte pøngahya gue ran t'uti xí bøxpu ja ra häi. Ne gätho hyu da nu ran unbi nangue ra sibi, ma pa ne ra xui høn'bu go njam'bu gätho yu pa mazai.

Ran zegui ran juanbi

11 Nɛ drá Xuuagä dá nugä mahøn'a, gue n'da ran thuts'i xʉn ndoho xʉn t'axi, nɛ mi hupʉ Oją. Nɛ nu ra ximhäi nɛ mahɛ̞ts'i bim 'bɛ 'bʉ mi hyant'a mi hupʉ, nɛ him man ja bʉya. 12 Nɛ dá nugä gätho ʉ xʉn du, hønt'a go 'bɛ'a ní jạ'i, mi 'bäpʉ ja rá hmi Oją i hupʉ. Nɛ bi mba ma

tunts'i yu søcua bu, ne'a ra søcua im ma to'o i ja ra temazai. Ne gätho bi mba ma juanbi nangue'a nt'o't'i bu 'be'a gätho bi 'yøt'a, nu'bu mi 'bui. ¹³Ne gätho u gue bi du bu ja ra deja, ne gätho u mi'da bi du hønbu go hapu, ngue gätho i 'bupu 'bu'u xun du, bi bøm bu, ne bim 'bäpu ja rá hmi Oją. Ne bi mba ma juąnbi nangue 'bɛ'a gätho bi 'yøt' 'bu mi 'bui. ¹⁴Ne nu'a ra xequi mi 'bu'u xun du, bi t'entpu ja ra sibi, tengu ra deja na ndoho. Gue'a na yoho ran date a. ¹⁵Ne nubu ja ra søcua gue im ma to'o i ja ra temazai, ne nu'u gätho him man t'o't'i yú thuhu bu, bi t'entpu ja ra sibi.

Ma'da'yo mahets'i ne ra ximhäi

Nε nubuya, dra Xuuagä, dá nugä man'da bi t'urcä, ngue ma'da'yo mahets'i ne ma'da'yo ra ximhäi. Nguetho ya bim 'bɛdi 'bɛ'a gätho mi ja bu mahɛts'i nɛ ra ximhäi. Ne hin'yu ra deją bu ja ra 'da'yo ximhäi. ²Nε dá nugä bá cah mahets'i guepu bí 'bu Oja n'da ra hogahnini, gue'a ra Jerusalén ma'da'yo, mahotho, mahoqui, tengu n'da ra hmute i he ra pahni mahotho da mba dín that'ui rá ndø. ³Ne dá øcä n'da ra nde nts'edi bin ya, gue bá nexpu ja ran thuts'i bu bí hu Oja, bi 'yɛna: "Dami hyand ya, bi gącua mahęts'i rá ngu Oją," bi 'yena, ne nuya zai dim 'buhmbu yu ja'i a. ⁴Nɛ guesɛ Oja di un ran johya, ne him man ja yu guidä yu ja'i, ne hin din ja ran date mahøn'a bu, ne hin din ja yu dumbui bu. Nguetho gätho 'bɛ'a mán unbi mi ja, ya bi thogui. ⁵Nε nu Oją ngue i hupu ja ran thuts'i, bi 'yɛna: "Gätho

ma'da'yo dá øt'ä ya." Ne bi xiqui, dra Xuuagä: "Dami 'yo't' ya 'be'a dí xi a i, ne sä da t'ec'yei nguetho majuani a." 6Ne bi xiqui mahøn'a: "Ya bi guadi 'bɛ'a gätho dá øt'ä ya. Gätho dá du'mi, ne ga juacä ra 'befi dá du'mi. Zại dám 'bucä ne dam 'bui mazai. Ne nu'u to'o i sä ngue di 'bε a ra te mahyoni thoho, tengu'bu i tuthe, ga undä ra te i juadi, tengu'bu ra mbøthe im fonts'a ra dehe ga unni, ne hin da gurqui. ⁷Ne to'o da daha, ga comhbe 'bɛ'a gätho i jagä, ne ga øt'e ma t'uhnigä u, ne dyu Ojagä u. 8Pe ga entpu ja ra sibi u to'o i su yun unbi 'bu da dengui, ne'u to'o yoho yún 'yomfeni, ne gätho u xun ts'o yú mbui, ne gätho yu hyodu, ne gätho yu 'yomt'eni, ne gätho u in yahu yu zithu, ne gätho u i thande hønt'a go 'bε'a gue him majuani, ne gätho u i man yu fehni. Gätho ya da nu na yoho ran date, da t'entpu i zø ra sibi ra azufre, tengu ra deją na ndoho," bi 'yɛn Oją.

Ma'da'yo ra hnini Jerusalén

⁹Nε xø dá nugä man'da ra hmepya bi t'urcä. Nu'a n'da u yúm 'bɛhni Oja mahɛts'i gue min 'yohu 'dato yum 'bɛhni, gue'u mi the yu ximbo gue bi un yun unbi bu ja ra häi, ne nu'a bi xiqui: "Ba ehe, ga ut'a ra hnini, tengu'bu ra hmute bin thạt'ui ra De'yo." 10 Ne nu'a rá Hogandahi Oja bi benga man'da mahøn'a, tengu'bu bi zixcä a rám 'bɛhni Oja bu ja n'da ra t'øhø xun hets'i, ne bi 'yurca ra hogahnini Jerusalén ma'da'yo, bi gah mahets'i guepu bí 'bu Oją. ¹¹Nε nu'a ra hnini emme di yoxni nangue rán hose Oja i 'bupu mbo. Nε di yoxni tengu ra

APOCALIPSIS 21 492

do ra jaspe i pømhyats'i. ¹²Ne nu'a ra hnini mi ja bu ra mbä't'i, ra jado xun hęts'i, goho yú ts'ąt'i. Ne nu'a ra mbä't'i, mi ja bu 'dɛ'magoho yu dajut'i, ne n'da ngu n'da yu jut'i mi 'bäpu n'da rám 'bɛhni Oja mahets'i, da mbäh ra goxthi. Ne nu'u 'de'mayoho yu jut'i, n'da a n'da nt'o't'i yú thuhu u 'dɛ'ma yoho yú ts'unt'u ra Israel. 13 Ne n'da nguadi min ja hyu yu jut'i, hyu i xopu ní bøx ra hyadi, ne hyu i xopu ní yuh ra hyadi, nε hyu i xopu ra norte, nε hyu i xopu ra sur. ¹⁴Nε nu'a ra hnini mi fa'ts'i 'de'mayoho yu do, n'da'a n'da nt'o't'i yú thuhu u 'de'mayoho yun 'yohu gue yú 'bäihu ra Jesús, ngue ra Dε'yo. ¹⁵Nε nu'a rám 'behni Oja mahets'i gue dán yą'be, mi hą n'da ra t'eni ra oro, tengu'bu ra metro, gue da 'yɛn ra hnini, hangu na ndoho yu jut'i, nε yu fø't'e. ¹⁶Nu'a ra hnini xun zant'ma ndoho, 'da'angu ná mba, ne 'da'angu nán junni. Ne nu'a ram 'behni mahets'i bi 'yen ra hnini, ne bi 'yu' ra güenda ngue yo mahuahi nε yo ciento kilómetro ná ndoho, 'da'angu ná mba, 'da'angu nán junni, ne 'da'angu nán hets'i. ¹⁷Ne nu'a ram 'behni bi 'yeni hangu nán hets'i rá mbä't'i ra hnini, ne bi 'yu' ra güenda ngue hyate ma goho metro. Nε bi 'yɛni tengutho i øt' yʉ ja'i. ¹⁸Ne nu'a ra mbä't'i nt'øt'e nangue yu do ra jaspe, pε nu ra hnini nt'øt'e nangue ra oro, tengu'bu ra xito a ra oro. ¹⁹Ne nu'u 'de'mayoho yu dado mi fa'ts'a ra mbä't'i, xun ngu nt'ut'i yu t'udo 'dahma 'dan'yo, ngue di fexni, xum hmadi di muui. Nu'a rá mbudi ra dado nt'ut'i yu t'udo ra jaspe, nu'a ná voho ra dado

nt'ut'i yu t'udo ra zafiro, nu'a ná hyu ra dado nt'ut'i yu ágata, nu ná goho ra dado nt'ut'i yu esmeralda. Ne nu'a ná cut'a ra dado nt'ut'i yu ónice, ná 'dato ra dado nt'ut'i yu cornalina, ná voto ra dado nt'ut'i yu crisólita, ná hyato ra dado nt'ut'i yu berilo, ná guto ra dado nt'ut'i yu topacio, ná 'det'a ra dado nt'ut'i yu crisoprasa, ná 'dε'ma'da ra dado nt'ut'i yu jacinto, ná 'de'mayoho ra dado nt'ut'i yu amatista. ²¹Ne gätho 'dɛ'mayoho yú jut'i rá mbä't'i ra hnini nt'øt'e nangue yu perla gue xun t'axi, ne n'da'a n'da yu perla gue bi t'øt'e n'da ngu n'da ra jut'i. Nε nu'a ra calle xʉn ndoho bu mbo ra hnini nt'øt'e nangue ra oro xun ho, tengu'bu ra xito a ra oro. ²²Nɛ hin dá nugä n'da ra nija bu, nguetho gätho rá nguse Oja a ra hnini, ngue ra Hmu tatetho rá ts'edi, nε ra Dε'yo, nε 'darpu i 'buhmbu u i 'bupu ja ra hnini. ²³Nε nu'a ra hnini, him mahyoni ra hyadi di yorpu, ogue ra ząna, nguetho guese Oją ne ra Dε'yo di yorpu. ²⁴Nε nangue'a ra nyot'i i ja bu, gätho di yot'u ne dim 'bumanho u yu ją'i dim 'bupu gätho yu häi ua ja ra ximhäi. Ne yu ts'ut'abi gätho yu häi dim 'bui di dä bu u yun ho xu 'yøt'e, tengu'bu di um bu yun t'unni xun ngu di muui. ²⁵Ne nsoquitho yu jut'i gätho ra pa, nε njam'bu da mba njut'i, nguetho njam'bu din xui bu. ²⁶Ne hønt'a go 'bɛ'a gätho di muui, gue bi zän Oja bi 'yøt' yu ja'i 'dahma 'dan'yo yu häi ua ja ra ximhäi, ne gue'a da hyaxpu u, ní thim bu mbo ra hnini. ²⁷Pε hin da yʉrpʉ ja ra hnini 'be'a xun ts'o, xíng yu ts'om'bäi da yurpu, xíng yu hyäte. Pe hønt'u

to'o bi 'yorpa rá thuhu ra Dε'yo bu ja rá søcuą, gue to'o gätho bi un ra temazại, hønt'u da zä da yurpu.

Mi ts'utho ba eh ra Jesucristo

Nε nu'a rám 'bεhni Oją xø bi 'yurcä man'da mahøn'a, dra Xuuagä. Ngue n'da ra dathe mahoqui thoho ra dehe xun güe tengu ra xito, t'embi rá dehe ra temazai. Ne bí nexpu ja rán thuts'i Oja nε ra Jesús ra Dε'yo. ²Nε bi tho'inde bu ja ra calle xun ndoho bu ja ra hnini. Ne n'da n'danguadi mi 'bäpu yu za t'embi yu za gue di un ra te. Ne nu'u yu za din zudi, n'dazna ngu n'dazna ma'da'yo yun dät'o din zupu, janangue'a 'demayo nidį din zudi n'dajeya. Ne nu'u yú xi di un yún zaqui gätho yu ja'i. ³Ne hin'yu 'be'a dí hnu rán ts'embi Oja bu. Pe din ja bu rá ts'edi Oja ne rá ts'edi ra Jesús ra Dε'yo. Nε gätho yú 'yεhε da dande u ne da 'yørpa yú 'befi. 4Ne nu'u dim 'bupu da nu rá hmi Oją, nε gätho din ja rá thuhu Oja bu ja yú dε. ⁵Nε hin'yu bu ra xui, janangue'a njon da hyom man'da ran nequi, xíng ra hyadi, nguetho guese Oją ra Hmu di yozehe bu. Ne nu'u dim 'bupu din ts'ut'abi gätho yu pa mazai. ⁶Ne nu'a ram 'behni bi xicä: "Gätho ram hma gá 'yøde, majuani a, ne da zä da t'ec'yei gätho. Nu'a Oją ra Hmu, gue'a di un rá Hogandahi yú pøngahya, ya bá pencä ua drám 'behnigä a, ngue ga xi ahu 'bɛ'a din ja, gue yú 'yɛhɛ ahu Oja. Ne him maya'a din ja," bi 'yɛna. 7"Dami 'yøhmbu ya," ɛn'a ra Jesús, "him maya'a gue gua ¿cä. Gan johyahu gätho ahu gue guí

εc'yεihu 'bε'a din ja, nt'o't'i bu ja ra søcuą," bi 'yɛna. 8Ne nugä dra Xuuagä, majuani dá øde ne dá nugä 'be'a gätho bi t'urqui ngue dá o't'ä ua. Ne nu'bu mi gua'a 'be'a dá øcä ne 'be'a xí 'yurqui, dán dạnyahmu bu ja rá gua ram 'behni mahets'i bi 'yurqui gätho, dí ɛna gue ga thąnde. ⁹Pε nu ram 'bεhni bi xiqui: "O guí thandegui, nguetho nugä dra 'yɛhɛgä tengu i, nɛ ni cuhu mi'da yu pøngahya, ne gätho mi'da u gue i εc'yεi 'bε'a gá 'yorpu ja ra søcuą. Hønse Oją gui thande," bi 'yɛna. ¹⁰Nɛ xø bi xicä ram 'bɛhni buya: "O guí pes' thoho na gá 'yo't'i, ngue 'bɛ'a din ja, nguetho him maya'a din ja. 11 Ne nu'u to'o i øt' ran ts'o, thocua thoho da 'yøt' ran ts'o, ne gätho to'o i øt' ran ts'om'bäi, thocua thoho da 'yøt'e. Pe nu'u to'o i øt' ran ho, thocua thoho da 'yøt' ran ho, ne to'o mahogui thoho yú mbui thocua thoho gue xtán ho yú mbui," bi 'yɛn'a rám 'bɛhni Oją mahεts'i 'bu mi xiqui. 12 Νε bi 'yɛngä ra Jesús bʉya: "Nɛ guehna dí xi ahu, him maya'a ba ɛcä. Nɛ n'da ngu n'da ga un rán theui 'be'a gätho bi 'yøt'e. 13 Nugä gätho dá du'mi ne ga juacä ra 'befi dá du'mi, dra mbudigä ne dran zeguigä, zai dám 'bui nε dam 'bui mazai. ¹⁴Majapi thoho gätho mahoqui yú mbui nangue Oją, tengu'bu m'beni yú pahni. Janangue'a i ja yún t'ɛdi da yurpu ja yú goxthi ra hnini. Ne nu'u to'o da zä da yurpu, da zä da zi yún dät'o yu za gue t'embi yu za di un ra temaząi. 15 Pε hingui sä da yurpu gätho u ngue bi 'uegue nangue Oją. Nε da gopu thi u gätho i yahu yu zithu, ne gätho yu 'yomt'eni, ne

APOCALIPSIS 22 494

gätho yu hyodu, ne gätho i thande 'be'a him majuani, ne gätho yu ja'i gue di ho da man yu fehni, hingui sä da yurpu u. 16 Nugä dra Jesúsgä, dá penhdä bu mam 'behnigä gue da xi ahu gyu 'yɛc'yɛihu, gue 'bɛ'a gá 'vorpu ja ra søcua. Nugä dram bom'betogä ra David, ne tengu'bu dra Dasø dín 'yo'be ran nεqui," bi 'yɛn'a ra Jesús. 17"Ba ɛhmbu gätho ahu," ɛn'a rá Hogandahi Oja, ne'a rá xisu ra De'yo ena. Ne'u gätho gue i øde, da ma: "Ba ɛhmbʉ." Nɛ ba εcua gätho i tuthe, nε gui sihu ra dehe gue di un ra temazai, ne hin gui juthu a.

Ran zofo ran zegui

¹⁸Nε nuya dí xi ahʉ, gätho ahʉ guí nuhʉ ya yʉm hma i jaua, ngue

i ma 'bɛ'a din ja, o gue ahʉ guí øhmbu 'bu i hman ya yum hma nt'o't'i ua, pε nu'bu guí εna gui hyuspahu mi'da yum hma, pe da hyus'ahu Oja u yun unbi im mangua ja ra søcua 'bu. 19O nu'bu guí emhbu him majuani 'da yum hma nt'o't'i ua, ɛna gue'bu gdí 'ueju u, pe Oja di 'uec'ahu yun japi im mangua ngue hin di ja ahu gui curpu ja ra hogahnini, ne hin di ja ahu gui sifu yún dät'o a ra za di un ra temazai. 20 Ne nu'a ra Jesús gue bi man ya yum hma gätho i jaua, i em buya, "Majuani ba ecä n'dihi," bi 'yɛna. Nɛ gue'a dín nde'e, nε dí xi a i, ba εhε ma Hmu i Jesús. ²¹Ne gätho ahu dín nde guin nuhu rán japi a ma Hmuhu ra Jesús. Ne hønt'a dí xi ahu ya.